


Aadi keyri: linjiila  
iisaa almasiihu



New Testament in Fulfulde, Maasina

# **Aadi keyri: linjiila iisaa almasiihu**

## **New Testament in Fulfulde, Maasina**

copyright © 2005 Wycliffe Bible Translators, Inc.

Language: Maasina Fulfulde (Fulfulde, Maasina)

Translation by: Wycliffe Bible Translators

Contributor: Wycliffe Bible Translators, Inc.

### **Copyright Information**

© 2005, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Fulfulde, Maasina

© 2005, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

---

PDF generated using Haiola and XeLaTeX on 21 Feb 2024 from source files dated 29 Jan 2022

680239a9-8aa6-5bc3-b42f-dc560bee09b8

## Contents

Matta . . . . .	1
Marka . . . . .	37
Luuka . . . . .	59
Yuhanna . . . . .	95
Golle Nelaabe . . . . .	124
Romankoobe . . . . .	156
1 Korintunkoobe . . . . .	170
2 Korintunkoobe . . . . .	183
Galaatiyankoobe . . . . .	192
Efeesunkoobe . . . . .	197
Filipiyankee . . . . .	202
Koloosiyankoobe . . . . .	206
1 Tesaloniikiyankoobe . . . . .	210
2 Tesaloniikiyankoobe . . . . .	213
1 Timote . . . . .	215
2 Timote . . . . .	219
Titus . . . . .	222
Filemon . . . . .	224
Ibaraninkoobe . . . . .	225
Yaakuuba . . . . .	236
1 Piyeer . . . . .	240
2 Piyeer . . . . .	244
1 Yuhanna . . . . .	247
2 Yuhanna . . . . .	251
3 Yuhanna . . . . .	252
Yahuuda . . . . .	253
Banngingol . . . . .	254

## Linjiila Iisaa Ngedu Matta

*Haala dammbe Iisaa*

<sup>1</sup> Dammbe Iisaa Almasiihu, taanii Daawuuda, taanii Ibarahiima, annii:

<sup>2</sup> Ibarahiima rimi Isiyaaka,  
Isiyaaka rimi Yaakuuba,  
Yaakuuba rimi Yahuuda e mijiraabe mum,  
<sup>3</sup> Yahuuda rimi Fares e Sera, <sup>6e</sup> bee ngoni <sup>6e</sup> o rimdi e Tamara,  
Fares rimi Hisuruuna,  
Hisuruuna rimi Aram,  
<sup>4</sup> Aram rimi Aminadaabu,  
Aminadaabu rimi Nasuuna,  
Nasuuna rimi Salmon,  
<sup>5</sup> Salmon rimi Bo'es, oo woni mo o rimdi e Rahab,  
Bo'es rimi Obed, oo woni mo o rimdi e Ruut,  
Obed rimi Yessa,  
<sup>6</sup> Yessa rimi Daawuuda kaananke oo.

Daawuuda rimi Suleymaana, oo woni mo o rimdi e debbo dalaado Uriya,

<sup>7</sup> Suleymaana rimi Robo'am,  
Robo'am rimi Abiya,  
Abiya rimi Asa,  
<sup>8</sup> Asa rimi Yusafat,  
Yusafat rimi Yoram,  
Yoram rimi Ujiya,  
<sup>9</sup> Ujiya rimi Yotam,  
Yotam rimi Akas,  
Akas rimi Hejekya,  
<sup>10</sup> Hejekya rimi Manaasa,  
Manaasa rimi Amon,  
Amon rimi Yusiya,  
<sup>11</sup> Yusiya rimi Yekuniya e mijiraabe mum.  
Dum hawrii e jamaanu nde Yahuudiyankooбе konaa so nañiraa Baabila ndee.

<sup>12</sup> Caggal <sup>6e</sup> konaama <sup>6e</sup> nañaama Baabila,  
Yekuniya rimi Salaatiyel,  
Salaatiyel rimi Jorobaabel,  
<sup>13</sup> Jorobaabel rimi Abihuda,  
Abihuda rimi Eliyakim,  
Eliyakim rimi Ajora,  
<sup>14</sup> Ajora rimi Sadok,  
Sadok rimi Akim,  
Akim rimi Eliyuda,  
<sup>15</sup> Eliyuda rimi Eliyaajaru,  
Eliyaajaru rimi Mattan,  
Mattan rimi Yaakuuba,  
<sup>16</sup> Yaakuuba rimi Yuusufu, jom suudu Mariyama,  
Mariyama woni inna Iisaa noddirteedo Almasiihu oo.

<sup>17</sup> No dammbe <sup>dee</sup> njokkondirta iwde Ibarahiima faa yottii Daawuuda, jamaanuuji sappo e nay hawrata, iwde Daawuuda faa yottii nde Yahuudiyankooбе konaa nañiraa Baabila, jamaanuuji sappo e nay hawrata, iwde nde Yahuudiyankooбе konaa nañiraa Baabila faa yottii Almasiihu oo, jamaanuuji sappo e nay hawrata.

*Haala pinaade Iisaa Almasiihu*

<sup>18</sup> No Iisaa Almasiihu finiri annii: Mariyama inniiko oo yo cabbaado Yuusufu, kaa fade makko suddeede, Ruuhu Ceniido wadi mo cowiido. <sup>19</sup> Yuusufu cabbudo mo oo yo neddo pooccitiido, ana waji hersa makko, miili yaltude e cabbugal ngal e cuucuukka. <sup>20</sup> Nde o miili dum ndee, malaa'ika Joomiraado wari e makko ley koydol, wii mo:

—Aan Yuusufu, taanii Daawuuda, pati hul 6amde Mariyama, sabi 6inngel o saawi ngel e Ruuhu Ceniiido iwi. <sup>21</sup> O riman 6iddo gorko, inndiraa mo Iisaa. Sabi oon hisinan yimbe mum e luutti mum'en dii.

<sup>22</sup> Dum fuu, dūm wadii yalla haala ka Laamdo yottiniri annabaajo oo kaa ana tabita nde oon wii:

23 «Surba oo 6aman reedu,  
rima 6iddo gorko,  
oon inndirre Immaanuwel.»\*

Maanaa innde ndee yo: «Laamdo ana wondi e meeden».

<sup>24</sup> Nde Yuusufu fini ndee, wadiri no malaa'ika Joomiraado oo wiirunoo dum nii. O 6ami Mariyama, <sup>25</sup> kaa o reentaali e mum faa 6eyni 6iddo gorko. Yuusufu inndiri oon Iisaa.

## 2

### No jom'en annde ngardi faa yeewa Iisaa

<sup>1</sup> Iisaa fini Baytilaama ley leydi Yahuudiya e jamaanu laamu Hirudus. Jom'en annde iwrii funnaange, ngari Urusaliuma. <sup>2</sup> Nde 6e ngari ndee, 6e mbii:

—Hoto kaananke Yahuudiyankoo6e dimaado jooni oo woni? Min njii hoodere makko 6anngii funnaange, min ngarii sujidanande mo.

<sup>3</sup> Oon kabaaru jii6i hakkille Hirudus, kajum e Urusalimankoo6e fuu. <sup>4</sup> O noddi hooree6e yottino6e sadaka 6ee e dunkee'en Sariya 6ee fuu, o lamndii dūm'en hoto Almasiihu oo foti rimeede. <sup>5</sup> Be njaabii mo, 6e mbii:

—Baytilaama ley leydi Yahuudiya, sabi ko annabaajo oo winndunoo koo anni:

<sup>6</sup> «Aan, Baytilaama, leydi Yahuudiya,  
tayoral a wanaa ngeenndi pamardi barke e geelle Yahuuda mawde dee.  
Sabi ardotoodo iwan e maa,

garoowo durde Israa'iilankoo6e, yimbe am.»\*

<sup>7</sup> E ley dūm, Hirudus noddi jom'en annde 6ee e cuucuukka, lamndii 6e wakkati mo hoodere ndee 6anngi oo. Been pammini mo. <sup>8</sup> Caggal mum, o neli 6e Baytilaama, o wii 6e:

—Njehee, kumpitoyo-don kabaaru cukalel ngel faa tayoron. So on njii ngel, kumpitee kam yalla mido yaha miin duu, mi sujidanoya ngel.

<sup>9-10</sup> Nde 6e nani ko kaananke oo haali koo ndee, 6e mbitti. Non 6e coynii hoodere nde 6e njinnoo funnaange ndee. Ko 6e njii nde koo, 6e ceyii seyo mango sanne. Nde ardi 6e yaade. Nde nde yottii do cukalel ngel woni doo ndee, nde darii. <sup>11</sup> Be naati ley galle oo, 6e njii cukalel ngel e inna mum Mariyama. Be korfii, 6e cujidani ngel, 6e kumti gineejia ma66e, 6e tediniri ngel kanjje e gowe e dacee uurooje biyeteede miiri. <sup>12</sup> Caggal dūm, Laamdo daalii 6e ley koydol pati 6e mbirfitoo to Hirudus, 6e kootiri leydi ma66e laawol gonngol.

### No Yuusufu dogiri suudoyaade Misira

<sup>13</sup> Nde 6e mbitti ndee, malaa'ika Joomiraado wari e Yuusufu ley koydol, wii dūm:

—Imma, 6am cukalel ngel e inna mum, dogu njahaa Misira, keddo-daa ton faa nde mbii-maa-mi ngartaa. Sabi Hirudus waran tewtude cukalel ngel faa wara dūm.

<sup>14</sup> Yuusufu immii jemma, na6i cukalel ngel e inna maggel Misira. <sup>15</sup> O heddi ton faa Hirudus maayi, yalla haala ka Laamdo yottinirnoo annabaajo oo kaa ana tabita nde oon wii:

«Mi noddii 6iyam gondo Misira.»†

### No Hirudus masinbiniri sukaabe Baytilaama

<sup>16</sup> Nde Hirudus faami jom'en annde 6ee njammbike dūm ndee, mettaa sanne. O yamiri sukaabe wor6e Baytilaama e dakkol mum fuu mbaree, gila keccoy faa he6u6e duu6i didi. O wadi dūm hakke palaade de jom'en annde 6ee ndokki mo tayoral mum dee. <sup>17</sup> Dum tabitirii haala ka Laamdo yottiniri annabi Yeremiya kaa nde oon wii:

<sup>18</sup> «Wullaango nanaama ley ngeenndi Rama,

ka6um e bojji e boytaali:

Dum Rahiilu<sup>‡</sup> woyata cukaloy mum.

O ja6aali waaltineede, sabi koy keddaki.»§

### No Yuusufu wartiri leydi Israa'iila

<sup>19</sup> Caggal maayde Hirudus, malaa'ika Joomiraado wari e Yuusufu to Misira too ley koydol, <sup>20</sup> wii dūm:

\* 1:23 Esaaya 7.14   \* 2:6 Mika 5.1   † 2:15 Hose'a 11.1   ‡ 2:18 Rahiilu woni jom suudu Yaakuuba. Mo yimbe Israa'iila njogorii hono inna mum'en.   § 2:18 Yeremiya 31.15

—Imma, wifintin cukalel ngel e inna mum leydi Israa'iila, sabi yifunooōe warde suka oo fée maayii.

<sup>21</sup> Yuusufu immii, naāti cukalel ngel e inna mum leydi Israa'iila. <sup>22</sup> Kaa o nanii Arikilawus loomtiima baam mum Hirudus laatike kaananke Yahuudiya, o huli yaade ton. Ley dūm, Laamđo jeertini mo ley koydol, o yehi leydi Galili, <sup>23</sup> o hodoyi ngeenndi mbiyeteendi Nasaraatu. Non dūm laatorii so dūm tabintini ko annabaabé 6ee mbiinoo koo: «O wiyyete Nasaraatunke.»

### 3

#### No Yaayaa waajorii

<sup>1</sup> E oon jamaanu, Yaayaa mo lootagal batisima 6anngi. Omo ooynoo ley ladde jeereende Yahuudiya, omo wiya:

2 —Tuubee, sabi Laamu Laamdo 6attiima.

3 Oo woni mo annabi Esaaya sappinoo, nde wiinoo:

«Neddo ana ooynoo ley ladde jeereende, ana wiya:

Moyyinee laawol Joomiraado ngol,

ndartinee dati makko!»\*

<sup>4</sup> Kaddungal Yaayaa yo capiraangal lee6i ngelooba, omo humii nguruwol. Nguure makko yo buureeti e njuumri ladde. <sup>5</sup> Yimbe iwri Urusaliiima e leydi Yahuudiya e seraaji maayo Urdun fuu, ngari e makko. <sup>6</sup> Eee njaadira luutti ma66e, Yaayaa looti 6e lootagal batisima ley maayo Urdun.

<sup>7</sup> Nde o yii Farisa'en e Saduki'en heewéé ana ngara faa lootee lootagal batisima ndee, o wii dūm'en:

—Bi66e bolle! Homo jeertini on ndogon jukkungo waroowo? <sup>8</sup> Ngollee golleeji kawrooji e tuubal. <sup>9</sup> Pati miilee e 6erde mon: «Minen, min taaniraabé Ibarahiima.» Sabi mido wiya on: Laamdo ana waawi waylitinde dee kaaye laatoo bi66e Ibarahiima! <sup>10</sup> Jooni, jammibere ndee huncaama faa soppa fadi ledde. Ndennoo, lekki fuu ki rimataa bi66e lobbe, soppete, wedee e yiite.

<sup>11</sup> Miin, ndiyam mbatisiran-mi on faa hollita on tuubii. Kaa garoovo caggal am oo, kajum 6uri kam baawde, mi fotaa fay soccuude paade makko. Kanko, Ruuhu Ceniido e yiite o batisirta on. <sup>12</sup> O lanndinike faa o hennoo jaamri makko faa laa6a. O moofta jaamri makko ley beembal, kaa jaande ndee o duppiran dūm yiite nge jnifataa.

#### No Iisaa lootiraa lootagal batisima

<sup>13</sup> Oon wakkati fuu, Iisaa iwi Galili, wari maayo Urdun to Yaayaa, yalla Yaayaa ana loota dūm lootagal batisima. <sup>14</sup> Kaa Yaayaa ujii, wii mo:

—Aan haani lootitude kam, hono aan ngardataa ga am faa mi loote?

<sup>15</sup> Iisaa jaabii mo, wii:

—Walaa baasi, ja6u ngadaa non, sabi hono non kaan-den hi66inirde ko dartii fuu.

Nden, o ja6i. <sup>16</sup> Iisaa lootaa tan, yeeni iwde e ndiyam dam. E oon wakkati, kammu oo udditii, o yii Ruuhu Laamdo ana jippoo no wuugaandu nii, ana wara e makko. <sup>17</sup> Don daande iwri dow kammu, wii:

—Oo doo yo Biyam mo korsin-mi, mo cu6ii-mi.

### 4

#### No Ibiliisa ndaardi seytoraade Iisaa

<sup>1</sup> E oon wakkati, Ruuhu Ceniido na6i Iisaa ley ladde jeereende, yalla Ibiliisa ana tewta seyttaade mo. <sup>2</sup> Iisaa jaamaali faa wadi balde capande nay jemma e jalooma. Caggal dūm, o yolbi. <sup>3</sup> Nii, Ceytotoodo oo 6attitii mo, wii mo:

—So a Bii Laamdo, yamir dee kaaye laatoo jaamdu.

<sup>4</sup> Kaa o jaabii oon, o wii:

—Ana winndii: «Wanaa jaamdu tan ned6o wuurdatal, ko ned6o wuurdatal dee, haala fuu ka Laamđo haali.»\*

<sup>5</sup> Caggal dūm, Ibiliisa na6i mo Urusaliiima ngeenndi ceniindi ndii, darni mo dow lenje-lejenje Suudu Dewal Mawndu, <sup>6</sup> wii mo:

—So a Bii Laamdo, suur njippo-daa e leydi. Sabi ana winndii: «Laamđo yamiran malaa'ika'en mum njab6ite pati koyngal maa gaajo e haayre.»†

<sup>7</sup> Oon wii mo:

—Ana winndii kasen: «Pati ittu koro Laamđo, Joomiraado maa.»‡

\* 3:3 Esaaya 40.3

\* 4:4 Fillitagol Tawreeta 8.3

† 4:6 Jabuura 91.11-12

‡ 4:7 Fillitagol Tawreeta 6.16

<sup>8</sup> Kasen Iibiliisa na&iacute; mo dow waamnde haayre toownde sanne, holli mo laamuujaduna dii fuu e darja mum'en,<sup>9</sup> wii mo:

—Mi hokkete dum doo fuu so tawii a sujidanii kam.

<sup>10</sup> Oon wii mo:

—Fottanam too, Iibiliisa! Sabi ana winndii: «Laamdo Joomiraado maa tan kaan-daa sujidanide, kanko tan kaan-daa rewde.»<sup>§</sup>

<sup>11</sup> Oon wakkati fuu, Iibiliisa seli e makko. Malaa'ika'en ngari e makko, ana ngollana mo.

*No Iisaa fuddiri golleeji mum ley Galili*

<sup>12</sup> Nde Iisaa nani Yaaya uddaama ley kasu ndee, o wirfitii Galili. <sup>13</sup> O eggii Nasaraatu, o hodoyi Kafarnahum e daande weendu nduu ley leydi Jebulon, kajum e Naftali,<sup>14</sup> yalla ana tabintina haala ka Laamdo yottiniri annabi Esaaya kaa nde oon wii:

<sup>15</sup> «Leydi Jebulon e leydi Naftali

gonde dow laawol weendu,

caggal maayo Urdun,

e Galili hodorde yimbe 6e nganaa Yahuudiyan koo6e:

<sup>16</sup> Lenjol gonnongol e nimre ngol

yii fooyre mawnde.

Wuur6e e ley leydi maayde ni66undi,

fooyre yaaynani dum'en.»\*

<sup>17</sup> Gila nden, Iisaa fuddi waajaade ana wiya:

—Tuubee, sabi Laamu Laamdo 6attiima.

*No Iisaa noddiri taalibaabe arannde6e*

<sup>18</sup> Iisaa ana yahannoo dow fonngoo weendu Galili, o yii wor6e didon mijiraado e mawniraado, Simon noddirteedo Piyeer e mijum Andire ana tipoo bubbi mum'en ley weendu nduu, yo awoobe. <sup>19</sup> Iisaa wii 6e:

—Njokkee kam, mi wada on awoobe yimbe.

<sup>20</sup> Don e don 6e njoppi bubbii ma6be dii, 6e njokki e makko. <sup>21</sup> O yehi yeeso, o yii kasen rimdaabe didon wobbe, 6i66e Jebede, Yaakuuba e mijum Yuhanna ana ley laana. Kambe e baam ma6be Jebede, ebe moyyintina bubbii ma6be. O noddi 6e. <sup>22</sup> Don e don 6e njoppi laana kaa e baam ma6be fuu, 6e njokki e makko.

*No Iisaa waajorii e no selliniri yimbe*

<sup>23</sup> Iisaa yiili ley leydi Galili fuu omo waajoo e ley cuudi baajordi ma66e, omo ooynoo Kabaaru Lobbo haala Laamu Laamdo oo, kasen omo sellina sii jawuuji e ellaaji fuu.

<sup>24</sup> Kabaaru makko saakii ley leydi Siriya fuu. Omo waddanee sii jaw6e fuu, laddaabe e kirikiraabe, kajum e wooy6e, o sellini dum'en. <sup>25</sup> Jamaa keewdo sanne jokki e makko iwrudo Galili e leydi ndi geelle sappo e Urusaliima e Yahuudiya e caggal maayo Urdun.

## Waaju Dow Waamnde Haayre

(Baabuwol 5–6–7)

### 5

<sup>1</sup> Nde Iisaa yii jamaa oo heewii ndee, o 6abbi dow waamnde haayre, o joodii ton. Taalibaabe makko 6ee ngari e makko,<sup>2</sup> o fuddi waajaade 6e, o wii:

*Haala mbelko'aaku*

<sup>3</sup> — Been annditin6e yonkiji mum'en ana lo'i, mbelii hoore,  
sabi kambe njey Laamu Laamdo oo!

<sup>4</sup> Been woyoo6e, mbelii hoore,  
sabi Laamdo waaltinan gerde mum'en!

<sup>5</sup> Been leydinkini6e, mbelii hoore,  
sabi 6e kefan leydi ndi Laamdo fodani 6e ndii!

<sup>6</sup> Been yolbube fooccitaare so domdi dum, mbelii hoore,  
sabi 6e kaaran 6e domditan!

<sup>7</sup> Been yurmoto6e, mbelii hoore,  
sabi Laamdo yurmoto 6e!

<sup>8</sup> Been laabube gerde, mbelii hoore,  
sabi 6e njijyan Laamdo!

<sup>9</sup> Been waddoo6e jam, mbelii hoore,  
sabi 6e noddirte 6i66e Laamdo!

<sup>10</sup> Been torraa6e kammari fooccitaare, mbelii hoore,

sabi kambe njey Laamu Laamdo oo!

<sup>11</sup> On mbelii hoore so yimbe njennii on, torrii on, kappii on sii boneeji fuu saabe am.  
<sup>12</sup> Ceyee, mbeltee, sabi mbarjaari mawndi ana doomi on dow kammu. Sabi hono non annabaabe adiibe on gee torriaa.

#### *Haala lamdam e fooyre*

<sup>13</sup> —Onon ngoni lamdam aduna oo. Kaa so lamdam joottii lammude, kodum lamminta dum? Dam nafataa fay huunde! Ko dam waawi wadeede tan, tippeede sella, yimbe njabbaa dam.

<sup>14</sup> Onon ngoni fooyre aduna oo. Ngalluure jibaande dow waamnde haayre waawaa noobude. <sup>15</sup> Fay gooto huubataa lampaa, so hippa hen kaakol. Ko wadata dee, sinndan ka, ka yaaynana gondo e suudu nduu fuu. <sup>16</sup> Hono non fooyre moodon haani yaaynirde yeeso yimbe, yalla ebe njiya golleeji lobbi ci ngadaton dii, ee njetta Baabiraado moodon gondo dow kammu oo.

#### *Ko Iisaa janngini banngal Tawreeta*

<sup>17</sup> —Pati cikkee mi gardo ittude Sariya binndaado ley Tawreeta naa ley dewte annabaabe oo. Mi waraali ittude mo, mi gardo hiibinde mo. <sup>18</sup> Mido haalana on goonga: so nii kammu e leydi ana keddii, wanaa tobbel wanaa masel tosataake e Sariya oo faa nde fuu tabiti. <sup>19</sup> Dum nee, boofudo ko buri fuu famduude e jamirooje dee, so janngini wobbe faa ngada non, laatoto burdo famduude e Laamu Laamdo. Kaa neddo fuu jokkuudo sariya oo, so janngini wobbe ngada non, laatoto mawdo e Laamu Laamdo. <sup>20</sup> Sabi mido wiya on: so on buraali dunkee'en Sariya e Farisa'en fooccitaare, on natataa e Laamu Laamdo abada.

#### *Haala tikkere*

<sup>21</sup> —On nanii njaatiraabe meeden bee mbiyanooma: «Pati jaadu hoore, jaadudo hoore fuu, ana haandi e sareede.»\* <sup>22</sup> Miin noo mido wiya on: tikkando sakiike mum fuu, ana haandi e sareede. Oon biido sakiike mum «Meereejo» darnete yeeso sariya burdo fuu naawde. Kasen neddo fuu biido mo «Nuyakaado» ana haandi e naatude yiite jahannama. <sup>23</sup> Ndennoo, so a warii e ittirde sadaka faa cakkodo-daa, a miccitike don e don sakiike maa ana jogani maa metti, <sup>24</sup> yoppu don sadaka maa oo, njahaa njaafondiroyaa e sakiike maa oo tafon, so kebaa wartude cakkodo-daa.

<sup>25</sup> So won gullaniido ma saabe jamaande, odon njaada sariya, yaawnu ndewritaa e joomum fade moodon yottaade, pati o wade e juude caroowo, oon wade e junngo kayboowo kasu, nden kaa, udde-daa e kasu. <sup>26</sup> Mido haalane goonga: abada a yaltataa so a yobsaali ko ndewete-daa koo faa laa6a.

#### *Haala jeenu*

<sup>27</sup> —On nanii wiyanooma: «Pati jeenu!»† <sup>28</sup> Miin noo mido wiya on: yeerudo debbo janano muuyo fuu, jeenii e ley bernde mum. <sup>29</sup> Ndennoo, so yitere maa jaamere luuttinte, sol nde tippo-daa nde to woddi! Mbaasaa salndu maa wooturu buri moyyande ma diina caldi maa dii fuu mbedee jaahannama. <sup>30</sup> So junngo maa jaamo luuttinte, tayu ngo tippo-daa ngo to woddi: mbaasaa salndu maa wooturu buri moyyande ma diina caldi maa dii fuu naataa jaahannama.

#### *Haala ceergal*

<sup>31</sup> —Wiyanooma kasen: «Ceerdo jom suudu mum fuu, yo hokku dum talkuru ceergal.»‡ <sup>32</sup> Miin noo mido wiya on: ceerdo jom suudu mum tawee oon jeenaali, so o 6amoyaama, gorko arano oo wadii mo e jeenu. Neddo fuu 6amdo debbo ceeraado, kajum duu jeenii.

#### *Haala hunoore*

<sup>33</sup> —On nanii kasen, njaatiraabe meeden mbiyanooma: «Pati fiirtu hunoore maa, tabintin nde yeeso Joomiraado.»§ <sup>34</sup> Miin noo mido wiya on: pati kuneey Fey. Pati kuneey kammu, sabi dum yo joodorgal Laamdo, <sup>35</sup> naa leydi, sabi dum yo njaafirdi koyde makko, naa Urusaliima, sabi dum yo ngeenndi Kaananke mawdo oo. <sup>36</sup> Pati hunora hoore maa ndee, sabi a waawaa rawninde naa 6awl inde fay lee6ol mayre gootol. <sup>37</sup> Mbiyaa «Mi wadan» naa «Mi wadataa», dum tan heyii. Ko feydiidii hen fuu, e Bondoo oo iwi.

#### *Haala yo6tagol*

<sup>38</sup> —On nanii wiyanooma: «Yitere yo6irtee yitere, jiinde yo6irtee jiinde.»\* <sup>39</sup> Miin noo mido wiya on: pati njootee gaafudo on ko boni. So won piido ma banaawo bannge jaamo, accu dum fiye bannge goddo oo duu. <sup>40</sup> So won gullaniido ma faa teeta forgo maa, accu dum naaba dolloke oo duu. <sup>41</sup> So won tilsindo ma roondaade doongal yaadu kiloomeetere,

\* 5:21 Pergu 20.13

† 5:27 Pergu 20.14

‡ 5:31 Fillitago 24.1

§ 5:33 Limooje 30.3

\* 5:38 Lewinkooje 24.20

roonda ngal yaadu kiloomeetereejii didi. <sup>42</sup> So won jaagiido ma, hokku dum, so won ndaardudo ma lušal, pati hadu dum.

### *Haala yidügol konnee'en*

<sup>43</sup>—On naniii wiyanoomaa: «Njidaa tanaa maa, mbajaa gajo maa.» <sup>44</sup> Miin noo mido wiya on: njidee konnee'en moodon, kasen duu nduwanee torroofe on, <sup>45</sup> yalla odon laatoo ſibbe Baabiraado moodon gondo dow kammu oo. Sabi no o fudinirta naange makko e bonbe nii, hono non o fudinirta nge e moyyuše, kasen duu no o točinirta e fooccitiibe nii, hono non o točinirta e oojubiše. <sup>46</sup> So yidübe on tan njidaton, mbarjaari hendi kebaton hen? Fay duwaaje'en bee ana ngadira non! <sup>47</sup> So sakiraabe moodon tan njowtaton, kodum seenndi on e wobbe bee? Fay heeferbe bee ana ngadira non! <sup>48</sup> Ndennoo, laatee hišbiše, hono no Baabiraado moodon gondo dow kammu oo laatorii kišbudo nii.

## 6

### *Haala sadaka*

<sup>1</sup>—Ndeentee e gollirde golleeji mon lobbi faa yiye. So on ngadii dum, on kebataa mbarjaari to Baabiraado moodon gondo dow kammu oo.

<sup>2</sup> Ndennoo, so ada itta sadaka, pati wadu dillere faa yimbe njiye, hono no naafigi'en bee ngadata ley cuudi baajordi, kajum e laawi nii. Ebe ngada non yalla yimbe ana mana 6e. Mido haalana on goonga, been kebii mbarjaari mum'en faa timmi. <sup>3</sup> Kaa aan, so ada itta sadaka, pati nano maa annda ko jaamo maa wadata, <sup>4</sup> yalla sadaka maa oo ana heddooye cuucukka. Nden Baabiraado maa jiyoowo ko woni e cuucukka oo, yobete.

### *Haala duwaawu*

<sup>5</sup>—So odon nduwoo, pati ngadee no naafigi'en nii: been ana njidi duworaade darnde ley cuudi baajordi, kajum e hakkunde dati celi, yalla yimbe fuu ana njiya dum'en. Mido haalana on goonga, been kebii mbarjaari mum'en faa timmi. <sup>6</sup> Kaa aan, nde nduwoto-daa fuu, naatu ley suudu maa, uddaa damal, jaago-daa Baabiraado maa e cuucukka. Nden, Baabiraado maa jiyoowo ko suuidi oo, yobete.

<sup>7</sup> So odon nduwoo, pati kebbinee haalaaji boli di ngalaa nafaa hono no heeferbe bee nii: eee miili Laamđo jaabanto be so be kebbinii haala. <sup>8</sup> Pati nemmbee 6e, sabi Baabiraado moodon ana anndi ko kaaje-don gila on jaagaaki mo. <sup>9</sup> Nii kaan-don duworaade: Baabiraado amen gondo dow kammu,

yo innde maa teddine.

<sup>10</sup> Yo Laamu maa war.

Yo muuyde maa ngade dow leydi no ngadiraar dow kammu nii.

<sup>11</sup> Hokku min hannde jaamdu heyooru min.

<sup>12</sup> Yaafa min luutti amen,  
hono no min njaafori toonjuše min nii.

<sup>13</sup> Pati accu min ceytée,  
hisin min e Bondo oo.

[Sabi laamu e baawde e teddeengal ana ngoodan maa faa abada. Aamiina.]\*

<sup>14</sup> Ndennoo, so on njaafima toonjuše on, Baabiraado moodon gondo dow kammu oo duu yaafoto on. <sup>15</sup> Kaa so on njaafataako toonjuše on, Baabiraado moodon oo duu yaafataako luutti moodon.

### *Haala koorka*

<sup>16</sup>—So on koorii, pati njurminkinee no naafigi'en 6ee nii: been ḥornoto, yalla yimbe fuu ana anndita be hoorbe. Mido haalana on goonga: been kebii mbarjaari mum'en faa timmi.

<sup>17</sup> Kaa aan, so a hoorii, culmaa yeeso maa, ngujaa hoore maa <sup>18</sup> pati yimbe annda a koordo. Baabiraado maa mo iyataake oo tan anndata. Kasen duu Baabiraado maa jiyoowo ko ngad-daa e cuucukka, kajum yobete.

### *Haala jawdi dow kammu*

<sup>19</sup>—Pati paggee jawdi aduna, do mooyu e ngudu mbonnata, do wuybe kelata baafe so nguja. <sup>20</sup> Paggee jawdi dow kammu, do fay huunde bonnataa, wanaa mooyu wanaa ngudu, do wuybe kelataa baafe sako nguja. <sup>21</sup> Sabi do jawdi maa woni fuu, don yonki maa duu woni.

### *Haala fooyre e nimre*

<sup>22</sup>—Gite ngori lampa caldi. So gite maa ana moyyi, caldi maa fuu pooynan. <sup>23</sup> Kaa so de moyyaa, caldi maa fuu nišban. Ndennoo, so fooyre wonnde e maa ndee yo nimre, nimre hoontii nimre!

\* **6:13** Cakite aaya 13 tawaaka e dereeji ūrđi fuu ūoyde dii.

### *Haala ndaartugol Laamu Laamdo*

<sup>24</sup> —Fay gooto waawaa gollande halfaaēe didon, sabi naa joomum wajii gooto, yidii keddiido oo, naa nanngondirii e gooto oo, yoppii keddiido oo. On mbaawaa gollidande Laamdo e jawdi.

<sup>25</sup> Dum nee, mido wiya on: pati cujlee e nguurndam mon ko jaamaton e ko njaraton e ko koltoton. Pati cujlanee ko boornoto-don. Tama nguurndam buraa nguure? Tama caldi buraa koltal? <sup>26</sup> Yeewee pooli diwooji dii: di aawataa, di kettataa, di mbeembataa, kaa Baabiraado moodon gondo dow kammu oo ana jammaa di. Onon nee, on buraa pooli teentilaade naa? <sup>27</sup> Homo e mon waawi beydude e balde mum fay nalooma gooto kamari sugulla mum? <sup>28</sup> Ko wadi so odon cujlanee kaddule? Yeewee piindiji ley ngesa no peertirta: di tampataa, di mottataa. <sup>29</sup> Haya mido wiya on: Suleymaana e ngalu mum fuu paroraaki no gootel e majji nii. <sup>30</sup> So Laamdo ana holtinira nii leggiri taweteendi ley ngesa hannde, tippeteendi e yiite janngo, ko hadata mo holtinde on faa bura nii, onon famdube hoolaare! <sup>31</sup> Ndennoo, pati cujlee faa mbiyon: «Kodum naamatene? Kodum njaraten? Kodum boornoto-den?» <sup>32</sup> Sabi dee kulle fuu heefere tan ndaarata dum. Kaa Baabiraado mon gondo dow kammu oo ana anndi odon kasindini e majjum dum fuu. <sup>33</sup> Ndaartee tafon Laamu Laamdo oo, kajum e foocitaare makko ndee. Ko heddi koo fuu, on seydante dum.

<sup>34</sup> Ndennoo, pati cujlanee janngo, sabi janngo sunjanan hoore mum. Nalooma fuu, donngal mum ana heyaa dum.

## 7

### *Haala njirondiral*

<sup>1</sup> —Pati njirree, yalla odon mbaasa njirreede. <sup>2</sup> Sabi hono no njirton wobbe nii, nii njirte-don. Kasen duu ko etiranton wobbe koo, dum etirante-don. <sup>3</sup> Ko saabii so ada yiya kudol ley yitere sakiike maa, tawee aan nee, a yiyyataa leggal gonngal e ley nde maa ndee? <sup>4</sup> Homo mbaawru-daa wiide sakiike maa: «Sakiike, dal mi ittane kudol gonngol e yitere maa ngol», tawee aan nee, leggal woni e ley nde maa ndee? <sup>5</sup> Naafiqi, ittu leggal gonngal e yitere maa ngal tafon, nden jile maa laabata, faa kebaa no ittiraa kudol gonngol e yitere sakiike maa ngol.

<sup>6</sup> Pati ndokkee dawaadi ko dagii, sabi di mbirfitanto on di njata on. Pati caakee jaaye moodon dime yeeso girooji, sabi di njaaaban de.

### *No Laamdo hokkirta jaagiido dum*

<sup>7</sup> —Naagee, on keban, tewtee, on njiitan, calminee gila odon damal galle, on udditante. <sup>8</sup> Sabi jaagiido fuu heban, tewtudo fuu yiitan, calmindo fuu udditante. <sup>9</sup> Homo woni e mon mo biyim jaagotoo buuru so hokka dum haayre? <sup>10</sup> Naa jaagoo dum liingu, hokka dum mboddi? <sup>11</sup> No mbonir-don fuu, odon ndokka biibbe mon kulle lobbe, sako Baabiraado mon gondo dow kammu oo. Omo hokka jaagiido mo fuu kulle lobbe. <sup>12</sup> Ndennoo, ngadiranee yimbe no njid-don ee ngadirana on nii. Dum woni ko Tawreeta Muusaa e dewte annabaabe deejamiri.

### *Haala damal paadungal*

<sup>13</sup> —Naatiree damal paadungal ngal! Sabi damal naatirgal e halkere ana yaajii, laawol mum ngol ana newii, jokkoobe ngol bee duu ana keewi. <sup>14</sup> Kaa damal naatirgal e nguurndam ana faadi, laawol mum ngol ana tiidi, kasen yiitoobe ngol bee yo seeda.

### *Haala lekki e bidde mum*

<sup>15</sup> —Ndeentee e annabaabe peneebee bee. So ege ngara e mon, ee nanndinkinto e baali, kaa so goonga, ee naatooji bondi. <sup>16</sup> Golleesi maabbe annditirton ee hono no lekki annditirtee fidde mum nii. Peguuje tebataake e kebbe, ibbe tebataake e jakkafer. <sup>17</sup> Lekki lobbi fidde lobbe rimata, kaa lekki mbonki fidde bonde rimata. <sup>18</sup> Lekki lobbi waawataa rimde fidde bonde, kasen duu lekki mbonki waawataa rimde fidde lobbe. <sup>19</sup> Lekki fuu ki rimataa fidde lobbe soppete, wedee e yiite. <sup>20</sup> Ndennoo, golleeji maabbe annditirton ee.

### *No taalibaabe peneebee carirtee*

<sup>21</sup> —Wanaa wiyoobe kam «Moobbo, Moobbo» bee fuu naatata e Laamu Laamdo oo. Wadoobe sago Baabiraado am gondo dow kammu oo bee tan ngoni naatoobe e makko. <sup>22</sup> Nannde darngal, heewbe mbiyan kam: «Moobbo, Moobbo! Wanaa e innde maa min njottiniri nulal naa? Wanaa e innde maa min ndibbiri seyfaani'en naa? Wanaa e innde maa min ngadirri kaayde keewde naa?» <sup>23</sup> Oon wakcati, mi jaaborts bee nii: «Mi anndaa on abada. Ngoddee kam, onon wadoobe ko boni bee!»

### *Haala cuuđi didi*

<sup>24</sup> —Ndennoo, neddo fuu kettindiido haalaaji am dii so jokki di, nanndan e hakkilante mahudo suudu mum e dow haayre. <sup>25</sup> Yiwoonde toöi, ilaali mbuuwi, kenuuli mawci mbibbi e mayru, fuu ndu saamaali, sabi ndu diidaama dow haayre. <sup>26</sup> Kaa neddo fuu kettindiido haalaaji am dii so jokkaal di, ana nanndi e mo walaa hakkille, mahudo suudu mum e dow njaaressi. <sup>27</sup> Yiwoonde toöi, ilaali mbuuwi, kenuuli mawci mbibbi e mayru, ndu wurji wurjugol manngol.

<sup>28</sup> Nde Iisaa tilii e diin konngi ndee, jamaa oo satti haayneede e waaju makko oo, <sup>29</sup> sabi o waajorike 6e hono no jom baawde nii, wanaa no dunkee'en Sariya 6ee nii.

## 8

### *No Iisaa selliniri ceppaado*

<sup>1</sup> Ko Iisaa jippii waamnde haayre ndee koo, jamaa keewdo jokki e makko. <sup>2</sup> Oon wakkati, gorko ceppaado wari dicci yeeso makko, wii mo:

—Moobbo, so tawii jaabii ada waawi sellinde kam.

<sup>3</sup> Iisaa foocci junngo mum, memi mo, wii:

—Mi jaabii, sellu!

Don e don, ceppu gorko oo selli. <sup>4</sup> Caggal dum, Iisaa wii mo:

—Hettinda faa moyya! Patikaalanaa dum fay gooto, kaa yaa holloy hoore maa jottinoowo sadaka, ngadaa sadaka mo Muusaa yamiri oo, faa anndina 6e a sellii.

### *No Iisaa selliniri golloowo hooreejo sordaasi'en*

<sup>5</sup> Nde Iisaa naatnoodo Kafarnahum ndee, hooreejo sordaasi'en 6attii mo, ndaardi mo mballa, wii:

<sup>6</sup> —Moobbo, golloowo am ana lelili cuudi, sellaa faa junngo yahataa koyngal warataa, ana naawa sanne!

<sup>7</sup> Iisaa wii mo:

—Mi yahan mi sellinoya mo.

<sup>8</sup> Kaa hooreejo sordaasi'en oo jaabii, wii:

—Moobbo, miin, mi wanaa fay huunde, fotaa ko ngaraa galle am. Ndennoo daja ko kaal-daa tan, golloowo am oo sellan. <sup>9</sup> Miin e hoore am mi laamaado, miin duu mido laamii sordaasi'en. So mi yamirii gooto yaha, yahan, so mi wii goddo wara, waran, so mi wii golloowo am wada huunde, wadan.

<sup>10</sup> Nde Iisaa hettindii mo ndee, haaynaa e makko sanne, wii jokku6e e mum 6ee:

—Mido haalana on goonga, mi yiayali hono ngal goondinal e sellude fay e Israa'iilanke. <sup>11</sup> Mido haalana on, heewbe iwrata funnaange e hirnaange, njoododoo e Ibarahiima e Isiyaaka e Yaakuuba, 6e jaamda ley Laamu Laamdo. <sup>12</sup> Kaa jogoraabe naatoobe e Laamu oo 6ee, mbedete ley nimre wonnde sella ndee, ton 6e mboyata 6e 6eryondira niiye.

<sup>13</sup> Caggal dum, o wii hooreejo sordaasi'en oo:

—Hootu galle maa! Yo laataane no ngoondinir-daa nii.

E oon wakkati jaati, golloowo hooreejo sordaasi'en oo sellinaa.

### *No Iisaa selliniri nawbe heewbe*

<sup>14</sup> Iisaa yehi galle Piyeer, tawi esii Piyeer debbo ana lelili yo jontaado. <sup>15</sup> Iisaa memi junngo makko, jontere makko selli, oon immii laatanii mo njaatigi.

<sup>16</sup> Nde hiirnoo ndee, Iisaa waddanaa yimbe heewbe 6e ladde woni e mum'en. Konngol makko tan o ribbiriladdeeki gondi e maabbe dii, o sellini nawbe 6ee fuu. <sup>17</sup> O wadi non faa dum tabintina haala ka Laamdo yottiniri annabi Esaaya kaa nde oon wii:

«O ittii tampere meeden,

o sellinii nawuuji meeden.»\*

### *No yimbe mbiiri njokkan e Iisaa*

<sup>18</sup> Nde o yii jamaa oo ana filii mo ndee, o yamiri o lummbinee. <sup>19</sup> Dunkee Sariya gooto 6attii, wii mo:

—Moobbo, mi jokkete do njahataa fuu.

<sup>20</sup> O wii oon:

—Doldolde ana njogii gayde, pooli duu ana njogii cuudi, kaa Biil Neddo oo walaa fay do soppinnoo sake faa lelna hoore mum fowtinoo.

<sup>21</sup> Goddo jeyaado e taalibaabe 6ee wii mo:

—Moobbo, accu mi iroya baabam tafon.

<sup>22</sup> O jaabii oon, o wii:

—Jokkam, dal maaybe ira maaybe mum'en.

\* 8:17 Esaaya 53.4

*No Iisaa waaltiniri yiwoonde e henndu*

<sup>23</sup> O naati laana, taalibaabe makko njokki e makko. <sup>24</sup> Don e don, yiwoonde immodii e henndu mawndu e weendu nduu faa bempeeje ana cudda laana kaa, tawi kanko omo daanii. <sup>25</sup> Taalibaabe bee battii mo, pinndini mo, mbiit mo:

—Moobbo, danndu min! Misen nii kalkoo!

<sup>26</sup> O jaabii 6e, o wii:

—Ko hulhinta on? Onon famduue hoolaare!

E oon wakkati, o immii, o jahii e henndu nduu e ndiyam weendu dam. Non fuu wii teen!

<sup>27</sup> Haaynii 6e, ebe mbiya:

—Gorko homo sifa mum wa'i nii, fay kenuuli e ndiyam ana dowtanoo dum?

*No Iisaa selliniri worbe didon laddaabe*

<sup>28</sup> Nde Iisaa lummbunoo so heetti e leydi Gadaren ndee, worbe didon laddaabe njalti ley janaale, kawri e makko. Ebe jannguno faa fay gooto suusaano yaabgoraade laawol ngol.

<sup>29</sup> Be ndarii ebe nduka ebe mbiya:

—Bii Laamdo, ko njid-daa wadude min? Torrude min waddu maa doo, gila wakkati cartaado oo yottaaki naa?

<sup>30</sup> Sewre girooji mawnde ana duranwoo sera don. <sup>31</sup> Seydaani'en 6ee ndaardi mo mbii:

—So ribbude min njid-daa, dunjana min min naatoya e ndee doo sewre girooji.

<sup>32</sup> O wii fe:

—Njehee!

Seydaani'en 6ee njalti, naatoyi e girooji dii. Don e don, sewre ndee fuu diiri iwi hoore waamnde haayre too, sumpitii ley weendu nduu, yoolii. <sup>33</sup> Duroobe 6ee ndogi kooti ngeenndi too, njantoyii ko wadi koo fay ko laddaabe 6ee koo. <sup>34</sup> Oon wakkati, yimbe ngeenndi 6ee fuu njehi hawritoyde e Iisaa. Nde 6e njii mo ndee, 6e ndaardi mo o yalta leydi ma66e ndii.

## 9

*No Iisaa selliniri gorko bonnguujo*

<sup>1</sup> Iisaa naati laana, lummbiti, warti ngeenndi mum. <sup>2</sup> O waddanaa bonnguujo ana lelnaa e dengleewo. Nde o yii goondinal yimbe 6ee ndee, o wii bonnguujo oo:

—Gidam, seya! Luutti maa njaaafama!

<sup>3</sup> E on wakkati, dunkeen Sariya yogaabe miili e ko'e mum'en: «Oo gorko ana bonkoo Laamdo!» <sup>4</sup> O faami miirooji ma66e, o wii:

—Kodum wadi so odon milloo dii miirooji bondi e berde moodon? <sup>5</sup> Wiide «Luutti maa njaaafama» e wiide «Imma yaa», kodum hen 6uri newaade? <sup>6</sup> Kaa, faa mi anndina on Bii Neddo ana jogii baawde e aduna oo yaafaade luutti...

Nden, o wii bonnguujo oo:

—Imma, 6am dengleewo maa, kootaa suudu maa!

<sup>7</sup> Gorko oo immii, hooti suudu mum. <sup>8</sup> Nde yimbe 6ee njii dum ndee, kuli, ndarii ana njetta Laamdo saabe ko hokki 6ii-aadama baawde baade nii koo.

*No Iisaa noddiri Matta jokka e mum*

<sup>9</sup> Iisaa iwi don, ana e laawol. O yii gorko biyeteedo Matta ana joodii e duwaajeere mum, o wii dum:

—Jokku e am.

Matta immii, jokki e makko.

<sup>10</sup> Caggal dum, o wari omo jaama ley galle Matta. Duwaaje'en heewbe e luuttoofe hono mum'en ngari njoodii ana jaamda e makko kanko e taalibaabe makko. <sup>11</sup> Farisa'en 6ee njii dum, ndarii ana mbiya taalibaabe makko 6ee:

—Ko saabii so moobbo moodon ana jaamda e duwaaje'en, kajum e luuttoofe hono mum'en?

<sup>12</sup> O nani dum, o wii 6e:

—Wanaa celludo hasindini e cawroowo, jawdo hasindini e cawroowo. <sup>13</sup> Njehee njanngoyee ko winndaa ley Dewtere Seniinde koo. Laamdo wii:

«Yurmeende woni ko njidu-mi,

wanaa sadaka duppeteedo.»\*

Sabi wanaa noddude fooccitiife waddi kam, noddude luuttoofe woni ko waddi kam.

*Haala koorka*

<sup>14</sup> E oon wakkati, taalibaabe Yaaya battii Iisaa, lamndii mo dum doo:

—Ko saabii so minen e Farisa'en 6ee misen koora kaa taalibaabe maa 6ee koorataa?

\* 9:13 Hosee'a 6.6

<sup>15</sup> O jaabii 6e, o wii:

—Tama nootiiße kuurtungu ana mbaawi ñoornaade so jommbaajo gorko ana wondi e mum'en? Kaa nalaade ngaran de jommbaajo gorko oo ittete e hakkunde maäße. E deen nalaade, 6e kooran. <sup>16</sup> Fay gooto dämmbataa fetalaare heyre e kaddungal kiinngal, sabi fetalaare heyre ndee daamtan kaddungal kiinngal ngal, ceekol ngol beydoo. <sup>17</sup> Kasen duu peguujam kesam loowataake e sumalleeji kiidfi. So dum wadii, sumalleeji dii pusam, peguujam dam yuppo, sumalleeji dii mbona. Haya peguujam kesam e sumalleeji kesi loowetee, yalla dum fuu edum reenoo.

*No Iisaa selliniri debbo e no wuurtiniri suka debbo*

<sup>18</sup> Nde Iisaa woni e haalde dum ndee, hooreejo suudu waajordu gooto yottii, dicci yeeso mum, wii:

—Biyan debbo heddiitaaki jooni temmbu. Kaa war faw junngo maa e makko, o wuurtan.

<sup>19</sup> Iisaa immii jokki e makko, kajum e taalibaabe mum. <sup>20</sup> Ebe e laawol, debbo gooto mo tuundi mum tayataa ko waarata e duu6i sappo e didi, iwi caggal Iisaa, memi kommbol saaya makko. <sup>21</sup> Sabi o miilii e becce makko: «So mi hebii memde saaya makko tan, mi sellan.» <sup>22</sup> Iisaa yeecitii, yii mo, wii:

—Banndam debbo, seya! Goondinal maa danndii ma.

Oon wakkati fuu, debbo oo selli. <sup>23</sup> Iisaa yottii galle hooreejo waajordu oo, non o yii fiyoobe cereeli won6e to maayde too bee e yim6e woyoo6e 6ee, <sup>24</sup> o wii:

—Immee doo, sabi suka debbo oo maayaali, o daaniido tan.

Be njali mo. <sup>25</sup> Nde yim6e 6ee njaltinaa sella ndee, o naati ley suudu nduu, o nanngi junngo suka debbo oo, nii immii. <sup>26</sup> Oon kabaaru saakii e leydi ndii fuu.

*No Iisaa wumtiniri wum6e didon*

<sup>27</sup> Nde Iisaa yahata ndee, wum6e didon njokki e mum ana ngulla ana mbiya:

—Taanii Daawuuda, yurma min!

<sup>28</sup> Nde o yottii cuudi ndee, wum6e bee battii mo, o lamndii dum'en, o wii:

—Odon ngoondini mido waawi wallude on?

Be njaabii mo, 6e mbii:

—Moobbo, miden ngoondini.

<sup>29</sup> E oon wakkati, o memi gite maäße, o wii:

—Yo laatano on no ngoondinir-don nii.

<sup>30</sup> Don e don 6e mbumti. O yaggini 6e, o wii 6e:

—Pati kaalanee dum fay gooto.

<sup>31</sup> Kaa 6e njehi tan 6e caaki kabaaru makko e leydi ndii fuu.

*No Iisaa selliniri gorko muumo*

<sup>32</sup> Nde wumtinaabe bee njaltunoo ndee, Iisaa waddanaa kasen gorko mo seydaani muumcindini. <sup>33</sup> O rippi seydaani oo tan, muumcunoodo oo watti haalde. Jamaa oo fuu haaynaa, ana wiya:

—Hono dum yiyaaka e Israa'iila abada!

<sup>34</sup> Kaa Farisa'en 6ee mbii:

—Hooreejo seydaani'en oo hokki mo baawde ribbude seydaani'en 6ee!

*No Iisaa yurmori 6e ngalaa kawjo*

<sup>35</sup> Iisaa ana yiiloo e geelle e gure fuu, ana waajoo e ley cuudi baajordi, ana ooynoo Kabaaru Lobbo haala Laamu Laamdo oo, omo sellina jawuuji e ellaaji fuu. <sup>36</sup> Nde o yii yim6e 6ee ndee, 6e njurminii mo, sabi 6e tampube 6e tayub6e dimme hono baali di ngalaa duroovo nii. <sup>37</sup> Oon wakkati, o wii taalibaabe makko 6ee:

—Gese 6endude ana keewi, kaa hettoobe keewaa. <sup>38</sup> Ndennoo, jaagee Jom kettal oo nelda hettoobe to hettantee too.

## 10

*No Iisaa suborii nelaa6e sappo e didon*

<sup>1</sup> Iisaa noddi taalibaabe mum sappo e didon 6ee, o hokki 6e baawde ribbugol seydaani'en e sellingol sii jawuuji e ellaaji fuu. <sup>2</sup> Inde nelaa6e sappo e didon 6ee annii: arano e maäße yo Simon noddirteedo Piyeer e Andire mijum, Yaakuuba 6ii Jebede e Yuhanna mijum, <sup>3</sup> Filipa e Bartolome, Tomaa e Matta duwaajne oo, Yaakuuba 6ii Alfaa, kajum e Tadde, <sup>4</sup> Simon kiranoowo suudu baaba e Yahuuda Isikariyota jammbootoodo mo oo.

*No Iisaa neliri taalibaabe mum sappo e didon 6ee*

<sup>5</sup> Iisaa neli been sappo e didon, o wii 6e:

—Pati njehi e leyde de Yahuudiyankoo6e ngalaa e mum dee, kasen duu pati naatee e geelle Samariya. <sup>6</sup> To baali suudu Israa'iila majjudi dii kaan-don yaade. <sup>7</sup> To njahaton fuu,

ooynee mbiyon «Laamu Laamđo 6attiima!»<sup>8</sup> Cellinon jawbe, nguurtingon maaybe, cellinon seppaaše, ndibbon seydaani'en. On kefirii nii tan, ndokkiree nii tan.<sup>9</sup> Pati naforee kanjje naa cardi naa mbuuđu jakawalle e njibaaji moodon.<sup>10</sup> Pati fay gooto e moodon nabora mbasu naa saayaaji didi. Pati fay gooto e moodon 6ama pade naa sawru. Sabi golloowo ana haandi e nguure.

<sup>11</sup> So tawii on ngarii e ngeenndi naa wuro, tewtee njaatigi lobbo, kasen keddee njaatigi mon doo faa nde iw-don don.<sup>12</sup> So odon naata e galle, calminon.<sup>13</sup> So galle oo ana haandi hen, yo jam mon yotto mo. Kaa so mo haandaa hen, yo jam mon wartu e mon.<sup>14</sup> So won galle naa ngeenndi do on njaabbaaka naa on kettindaaka, njaltee nokku oo, piddon colla koyde mon duu.<sup>15</sup> Mido haalana on goonga: jannnde darngal, jukkungo ndiin ngeenndi 6uran ngo geelle Sodooma e Gomoora ngoo naawde.\*

### *Haala torraaji garooji*

<sup>16</sup> —Kettindee! Mi nelii on no baali hakkunde pobbi nii. Ndennoo, yoyiree no boje nii, neworee no buugaaji nii.<sup>17</sup> Ndeento-don e yimbe bee, sabi 6e ndarnan on e carirde, 6e piyan on dorri ley cuudi maabbe baajordi.<sup>18</sup> On nabete yeeso saroobe e kaanankooibe saabe am, faa laatano-don kam seedee'en yeeso maabbe kambe e heefere 6ee.<sup>19</sup> So on ndarnaama e sarirde, pati mbemmbē-don no kaaldaton naa ko kaalaton. Sabi on ndokkete konngi di kaan-don haalde e oon wakkati,<sup>20</sup> di iwataa e moodon, ko selli hen dee, RuuhuBaabiraado moodon oo haalata ley moodon.<sup>21</sup> Neddo hokkitiran sakiike mum waree, baabiraado duu 6iyum. Biibbe immanto saaraabe mum'en, piya dabare yalla 6een ana mbaree.<sup>22</sup> Yimbe fuu mbajan on saabe am. Kaa mujudo faa timmoode, joomum hisinte.<sup>23</sup> So on torraama e ngeenndi ngootiri, ndoganee ngonndi. Mido haalana on goonga: on piltidataako geelle Israa'iila dee fuu tawa Bii Neddo wartaali.

<sup>24</sup> Taalibbo 6uraa moobbo mum, maccudo 6uraa kalfaado mum.<sup>25</sup> Ana yidaa taalibbo wuurdha no moobbo mum wuurdhi fuu, maccudo duu no kalfaado mum wuurdhi. Miin duu, mi noddiraama «Beelsebul» (hooreeo seydaani'en), wanaa haala mon onon.

### *Haala kulol Laamđo*

<sup>26</sup> —Ndennoo, pati kulee yimbe. Walaa fuu ko suudii ko 6anngintaake, walaa sirri mo saakataake.<sup>27</sup> Ko kaalan-mi on e nimre koo, kaaltee dum e fooyre. Ko ngunnadante-don koo, oynee dum dow beneeji.<sup>28</sup> Pati kulee warooibe terde, 6e mbaawanaa yonkiiji. Laamđo baawco halkude terde e yonkiiji fuu e jahannama, oo kaan-don hulde.<sup>29</sup> Tama biiwuujidici coottataake mbuuđu? Kaa fay gootel e majji yanataa e leydi tawa wanaa e sago Baabiraado moodon oo.<sup>30</sup> Onon, fay leebi ko'e mon fuu ko limaa.<sup>31</sup> Ndennoo, pati kulee, sabi onon 6uri biiwuujidici keewdi teentilaade.

<sup>32</sup> Neddo fuu ceettaniido kam yeeso yimbe, miin duu, mi seettanto dum yeeso Baabiraado am gondo dow kammu oo.<sup>33</sup> Kaa calaniido kam hakkunde yimbe fuu, miin duu, mi salanto dum yeeso Baabiraado am gondo dow kammu oo.

### *No Iisaa laatorii sabaabu ceeraagu yimbe*

<sup>34</sup> —Pati milee jam ngardu-mi e leydi ndii. Mi wardaali e jam, kaafaawi ngardu-mi.<sup>35</sup> Ko waddi kam dee, seenndude biddo gorko e baam mum, biddo debbo e inna mum, debbo 6amaado e esum debbo.<sup>36</sup> Neddo fuu koreeji mum laatotoo waybe mum.<sup>37</sup> Korsindo inna mum naa baam mum faa 6uri kam fuu, wanaa potudo laataade taalibbo am. Korsindo 6iyum gorko naa debbo faa 6uri kam fuu, wanaa potudo laataade taalibbo am.<sup>38</sup> Mo 6amaali leggal mum bardugal,<sup>†</sup> jokka e am fuu, wanaa potudo laataade taalibbo am.<sup>39</sup> Tewtudo reenude yonki mum fuu, waasan ki, kaa baasirdo ki sabaabu am, hewtan ki.

### *Haala mbarjaari*

<sup>40</sup> —Jaabbiido on fuu jaabbiima kam, jaabbiido kam fuu jaabbiima neldo kam oo.<sup>41</sup> Jaabbiido annabaajo saabe o annabaajo fuu, heban mbarjaari ndi annabaajo fodanaa ndii. Jaabbiido neddo pooccitiido saabe o pooccitiido fuu, heban mbarjaari ndi pooccitiido fodanaa ndii.<sup>42</sup> Mido haalana on goonga: neddo fuu dokkudo 6urdo famdude e taalibaabe am bee fay so horde loonde ndiyam 6uubudam tan saabe o taalibbo am, o waasataa hebude mbarjaari makko.

## 11

<sup>1</sup> Nde Iisaa tilii yamirde taalibaabe mum sappo e didon bee ndee, iwi don, yehi janngi-noyde e waajoyaade ley geelle piliiide dee.

### *No Yaayaa neliri taalibaabe mum to Iisaa*

\* **10:15** Sodooma e Gomoora yo geelle didi de Laamđo halkii saabe heewgol majje luutti. Yeew Puddfoode 19.1-29  
† **10:38** Koro 6amde leggal bardugal woni fellisidde mursude yonki mum hono no Iisaa nii.

<sup>2</sup>Yaayaa ana ley kasu. O nani golleeji Almasiihu oo ana njantee, o neli taalibaaē makko bēe, <sup>3</sup>faa lamndoo Iisaa:

—Aan woni kaando warde oo, naa min ndooman goddo?

<sup>4</sup>Iisaa jaabii bēe, wii:

—Njehee, njantanoyee Yaayaa ko nan-don e ko njii-don fuu: <sup>5</sup>wumbe ana mbumta, layannoobē ana njābā faa gasa, seppaabe ana cellinee, faadubē ana paadita, maaybe ana nguurta, misikiina'en duu kaalanaama Kabaaru Lobbo oo. <sup>6</sup>Oon mo salaaki goondinde kam, welii hoore.

<sup>7</sup>Nde nellaabe Yaayaa bēe njahata ndee, Iisaa fuddi haalande jamaa oo haala Yaayaa, o wii:

—Kodum yeewoyno-don to ladde jeereende too? Kudol dimmbotoongol e henndu naa? <sup>8</sup>Ndennoo, kodum yeewoyno-don? Gorko pariido naa? Pariibe e galleji kaanankooobē tawetee. <sup>9</sup>Ndennoo, kodum yeewoyno-don? Annabaajo naa? Goonga! Mido haalana on, omo buri annabaajo. <sup>10</sup>Kanko woni mo Binndi dīi cappii oo:

«Miin Laamdo, mi ardinante nellaado am moyyinanoowo ma laawol.»\*

<sup>11</sup>Mido haalana on goonga: bammbaade bammaali burdo Yaayaa mo lootagal batisima oo, tawee nee, burdo lo'ude e Laamu Laamdo oo buri mo teddude. <sup>12</sup>Gila Yaayaa mo lootagal batisima fuddi waajaade, Laamu Laamdo ana ruggoree semmbe, ruggotoobē bēe ana ndaara teetude mo. <sup>13</sup>Annabaabe bēe fuu kajum e Tawreeta Muusaa cappike Laamu oo faa e jamaanu Yaayaa. <sup>14</sup>So odon njāba haala maabē, Yaayaa woni annabi Iliyasa mo garol mum sappaa oo. <sup>15</sup>Jom nowru fuu yo nanu.

<sup>16</sup>Kodum mbaaw-mi nanndinde e yimbe oo jamaanu? Eēe nanndi e sukaabe joodiibē e luumooji, bēe doo ana mbiya bēe too:

<sup>17</sup>«Min piyanii on cereeli,  
on mbamaali,  
min mboyanii on woondu yurminniindu,  
on dusaali.»

<sup>18</sup>Sabi Yaayaa warii, o kooroowo, o yarataa doro, wiyaama o laddaado. <sup>19</sup>Bii Neddo oo duu warii ana jaama, ana yara, yimbe mbii dum: «Naamde e yarde tan woni e hakkille mum, o gido duwaaje'en e luuttoobē hono mum'en!» Kaa hakkilantaaku Laamdo ana 6anngina goonga muudum ley golleeji muudum.

#### No Iisaa feliri geelle caliide tuubude

<sup>20</sup>Caggal dum, Iisaa fuddi felde geelle de o buri waafude e mum kaayde dee, sabi hodufē e deen geelle bēe tuubaali. O wii:

<sup>21</sup>—Bone woodanii ma, aan Korasin! Bone woodanii ma, aan Baytisayda! Sabi so kaayde gadanoode e ley moodon dee ngadanooma Tirus e Sidon, nden, hodube ton bēe tuubanno law, tawete bēe boornike licce caakuuij, bēe njoodike e ndoondi faa bēe kollita tuubugol maabē. <sup>22</sup>Saabe dum, mido wiya on: jaannde darngal, jukkungo mon 6uran ngo Tirus e Sidon ngoo naawde. <sup>23</sup>Aan duu Kafarnahum, afa miila a toownete faa dow kammu naa? A leydinte faa keedaa ley maaybe. Sabi so kaayde gadanoode e maa dee ngadanooma Sodooma, nden, ndiin ngeenndi heddotono faa jooni. <sup>24</sup>Saabe dum, mido wiya on: jaannde darngal, jukkungo mon 6uran ngo Sodooma ngoo naawde.

#### No Iisaa fowtinirta yimbe

<sup>25</sup>Oon wakkati fuu, Iisaa wii:

—Baabiraado jom kammu e leydi, mi yetti ma, sabi a suudii dee kulle hakkilanteebē, kajum e anndubē, 6annginan-daa dum cukaloy. <sup>26</sup>Jaati Baabiraado, hono non worri sabi dum wel maai.

<sup>27</sup>Baabiraado am tumumbii huunde fuu e junngo am. Fay gooto anndaa Bajjo oo so wanaa Baabiraado oo, fay gooto anndaa Baabiraado oo so wanaa Bajjo oo, kajum e mo Bajjo oo muuyi 6annginande dum fuu.

<sup>28</sup>Onon yimbe tampube roondaade donnge teddude, on fuu ngaree e am, mi fowtinan on. <sup>29</sup>Dalee mi fawa tekkere am e dow mon, accon mi janngina on, sabi mido sawrii, mido leydinkinii, on tawan hen fowtere yonkiiji moodon. <sup>30</sup>Sabi tekkere am ana yaafi roondaade, donngal am ana huyfi.

## 12

### Haala jalaande fowteteende

\* 11:10 Malakiya 3.1

<sup>1</sup> Oon wakkati, Iisaa e taalibaabe mum ana ceeka gese ley jalaande fowteteende. Taalibaabe makko njolbi, ana kelta butaali ana yakka. <sup>2</sup> Nde Farisa'en bee njii dum ndee, ndarii ana mbiya mo:

—Yew, taalibaabe maa bee ana ngolla ko dagaaki gollude jalaande fowteteende!

<sup>3</sup> O jaabii 6e, o wii:

—Tama on njanngaali ko Daawuuda wadi nde yolbunoo, kajum e yimbe mum? <sup>4</sup> O naati e ley hukkum ceniido oo, kanko e yimbe makko, 6e jaami buuru cakkaado oo. Haya, 6e ndujanaaka jaamde mo, yottinoobe sadaka tan njey jaamde mo. <sup>5</sup> Naa duu, on njanngaali e ley Tawreeta Muusaa, nde wonnoo yottinoobe sadaka bee ana ngolla ley Suudu Dewal Mawndu nduu fay jalaande fowteteende? Kambe nee, ebe comna jalaande fowteteende ndee, kaa dum felataa 6e. <sup>6</sup> Mido wiya on: ko buri Suudu Dewal Mawndu ana doo. <sup>7</sup> Sinndo odon annduno ko kaa haala Laamdo firritata: «Yurmeende woni ko njisu-mi, wanaa sadaka dappeteedo», on carataano bee laabube. <sup>8</sup> Sabi Bii Neddo oo jey jalaande fowteteende ndee.

*No Iisaa selliniri gorko mo junngo mum waati*

<sup>9</sup> Iisaa iwi don naatoyi suudu mabbe waajordu. <sup>10</sup> Gorko mo junngo mum waati ana wonnoo don. Wonnoobe don bee tuufani Iisaa yalla ana keba no kappira dum. Saabe dum, 6e lamndii mo dum doo:

—Sariya meeden oo hokkii en sellinde neddo jalaande fowteteende naa?

<sup>11</sup> O jaabii 6e, o wii:

—So won e mon jogiido mbaalu, so oon mbaalu saamii e luggere palaande fowteteende, wanaa joomum yaltinoyan mo naa? <sup>12</sup> Odon anndi neddo ana buri mbaalu do woddil! Ndennoo, ana dagoo wadande neddo ko moyyi jalaande fowteteende.

<sup>13</sup> Caggal dum, o wii gorko oo:

—Fooccu junngo maa!

Oon foocci ngo tan, ngo selli faa ngo warti hono no wonngo ngoo nii. <sup>14</sup> Farisa'en bee njalti, njoodoyii faa ndawrida no mbarda Iisaa.

*No Laamdo suborii kaadime mum Iisaa*

<sup>15</sup> Nde Iisaa nani dum ndee, iwi e oon nokku, yimbe heewbe njokki e makko. O sellini jawbe bee fuu, <sup>16</sup> o daalii been pati kumpita fay gooto kabaaru makko. <sup>17</sup> Dum wadirii non yalla haala ka Laamdo yottinirnoo annabi Esaaya kaa ana tabita nde oon wii:

<sup>18</sup> «Annii kaadime am mo cubii-mi.

Kanko korsin-mi,

kanko welni 6ernde am.

Mi jippinan e makko Ruuhu am,  
o ooynanto leji dii laawol fooccitaare.

<sup>19</sup> O falondirtaake, o dukataa,  
daandee makko nanataake e mbeddaaji.

<sup>20</sup> O helataa kudol oojingol,  
o jifataa moottila mo pooyel mum famdi  
faa jannnde o hokki fooccitaare jaalogal.

<sup>21</sup> Lepi dii fuu pawon jikke mum'en e makko.»\*

*No Iisaa fenniri ko happaa koo*

<sup>22</sup> Nden, Iisaa waddanaa gorko bumdo muumo, sabi oon yo laddaado. O sellini dum faa wattu haalde e yiide. <sup>23</sup> Haaynii yimbe bee fuu, ndarii ana mbiya:

—Dum nee, taanii Daawuuda oo woni doo naa?

<sup>24</sup> Kaa nde Farisa'en bee nani dum ndee, mbi:

—E baawde «Beelsebul» hooreejo seydaani'en o ribbirta seydaani'en bee.

<sup>25</sup> Nde wonnoo Iisaa anndii millooji mabbe, o wii 6e:

—Laamu fuu pecciido ana haaba e hoore mum, bonan. Ngeenndi naa galle fuu pecciido ana haaba e hoore mum, heddataako. <sup>26</sup> So Ibiliisa ribbii seydaani'en mum, feccii hoore mum. Ndennoo, hono laamu mum heddortoo? <sup>27</sup> So tawili «Beelsebul» ndibbiran-mi seydaani'en, yimbe mon bee nee, homo ndibbirta 6e? Yimbe mon bee jaati kollata on ngalaa e goonga! <sup>28</sup> Kaa so Ruuhu Laamdo ndibbiran-mi seydaani'en, dum ana holla Laamu Laamdo warii e mon.

<sup>29</sup> Iisaa 6eydi hen, wii:

—Fay gooto waawaa naatude e galle gorko jom semmbe teeta jawdi mum tawee haabaaali joomum tafon. Kaa so haabii joomum faa teenji, ana waawi naabude ko woni e galle mum fuu.

\* **12:21** Esaaya 42.1-4

<sup>30</sup> Mo waldaa e am fuu yo gajo am. Mo mooftidataa e am fuu yo caakoowo. <sup>31</sup> Saabe dum, mido wiya on: yimþe ana mbaawi yaafeede luutti mum'en fuu, kajum e bonkaaji fuu. Kaa bonkiido Ruuhu Ceniido oo yaafataake. <sup>32</sup> Neddo fuu kaaldo ko boni e Bii Neddo, ana waawi yaafeede, kaa neddo fuu kaaldo ko boni e Ruuhu Ceniido, yaafataake jooni, yaafataake wakkati garoyoowo.

### No lekki annditirtee biddé mum

<sup>33</sup> —So lekki ana moyyi, biddé mum moyyan, so lekki moyyaa, biddé mum moyyataa, sabi lekki biddé mum annditirtee. <sup>34</sup> Biþþe bolle bonde! Hono hen mbaawirton haalde ko moyyi tawee on bonþe? Sabi ko woni e bernde, dum yaltata e hunduko. <sup>35</sup> Neddo moyyo, ko moyyi iwata e ndesaari ngnonndi ley bernde mum. Neddo bondo, ko boni iwata e ndesaari ngnonndi ley bernde mum. <sup>36</sup> Mido wiya on: nannde darngal yimþe kaaltan haalaaji laaliidi di kalnood fuu. <sup>37</sup> Sabi neddo haalaaji mum sarirtee pooccitiido naa jukketeedo.

### No Farisa'en ndaardiri taagumansa

<sup>38</sup> Caggal dum, yoga e dunkee'en Sariya, kajum e Farisa'en mbii Iisaa:

—Moobbo, miden njidi kollaa min taagumansa Laamdo nel maa.

<sup>39</sup> O jaabii 6e, o wii:

—Jamaanujooni bondo cobudo oo ana ndaara holleede taagumansa, kaa taagumansa fuu o hollataake so wanaa taagumansa annabi Yuunusa oo. <sup>40</sup> Sabi, no Yuunusa wadíri balde tati jemma e jalooma ley reedu liingu mawdo oo nii, hono non Bii Neddo wadírtta balde tati jemma e jalooma ley yanaande. <sup>41</sup> Nannde darngal, worþe Niniwe immodoto e yimþe jamaanu jooni 6ee, liþa dum'en. Sabi worþe Niniwe tuubii nde nannoo waaju Yuunusa oo ndee. Haya, þurðo Yuunusa ana doo! <sup>42</sup> Nannde darngal, kaananke debbo leydi 6aleeri oo immodoto e yimþe jamaanu jooni 6ee, liþa dum'en. Sabi o iwriino faa hoore leydi, warde hettindaade haalaaji Suleymaana kebbinaadi hakkilantaaku dii. Haya, þurðo Suleymaana ana doo!

### Haala wirfitagol seydaani

<sup>43</sup> —So seydaani yaltii e neddo, seydaani oo yiiloyto e nokkuuje joorde tewta do ñoottinoo, kaa ñootttere fuu o hebataa. <sup>44</sup> Nden kaa, o wiya: «Mido nii wirfitoo galle am mo eggunoo-mi e mum oo.» So o wirfitike, o tawan galle oo yo 6olo, ana wuuwaa, ana moyyinaa faa woodi. <sup>45</sup> Nden, o wirfitoo, o waddoya seydaani'en njeddón wobbe þurþe mo bonde. Be naata e galle oo, 6e koda e mum. Nii battane oo neddo þurdata arannde mum bonde. Nii yimþe ndee fedde bonnde duu laatoystoo.

### Inna Iisaa e mijiraabe Iisaa

<sup>46</sup> Nde Iisaa haaldanno e jamaa oo ndee, inna makko e mijiraabe makko worþe njottii. Be ndarii sella, eþe njidi yiide mo. <sup>47</sup> Won biido mo:

—Inna maa e mijiraabe maa ana ndarii sella ana njidi yiide ma.

<sup>48</sup> O jaabii oon neddo, o wii dum:

—Homo woni innam? Hoþe ngoni mijiraabe am?

<sup>49</sup> O sappii taalibaabe makko 6ee, o wii:

—Innam e mijiraabe am annii. <sup>50</sup> Sabi mijam naa innam yo neddo gadoowo sago Baabiraado am gondo dow kammu oo.

## 13

### Banndol haala aawoowo

<sup>1</sup> Ley oon jalooma, Iisaa yalti cuudi, joodoyii daande weendu. <sup>2</sup> Jamaa keewdo ana filii mo faa o naatoyi laana, o joodii ley makka. Yimþe 6ee ndarii e daande ndiyam dam. <sup>3</sup> O haalaniri 6e kulle keewde e banndi. Omo wiya:

—Aawoowo yalti aawoyde. <sup>4</sup> E ley sankugol ngol, yoga e aawdi ndii saami e laawol, pooli ngari cuþi dum. <sup>5</sup> Yoga mayri saami e korokaaye do leydi heewaano, fudi don e don sabi aawdi ndii iraaka gasa. <sup>6</sup> Kaa nde naange wulnoo ndee, sumi, yoori saabe walaa dadfi. <sup>7</sup> Yoga mayri saami do kebbe pudata. Ndi fudidi e majje, de cuumi ndi. <sup>8</sup> Yoga mayri saami e leydi lobbiri, fudi, rimi: yoga sowii cowe teemedere, yoga capande jeegom, yoga capantati. <sup>9</sup> Jom nowru fuu yo nanu!

### Ko saabii so Iisaa ana haaldira e yimþe banndi

<sup>10</sup> Oon wakkati, taalibaabe 6ee battii Iisaa lamndii mo, mbii:

—Kodum wadi so afa haaldira e maþþe banndi?

<sup>11</sup> O jaabii 6e, o wii:

—Onon, on ndokkaama faamude goonga teddudo haala Laamu Laamdo oo, kaa kambe, 6e ndokkaaka dum. <sup>12</sup> Sabi jogiido fuu, bedyante faa heewa. Kaa mo walaa oo, fay seeda mo jogii oo teetete. <sup>13</sup> Dum saabii so mido haaldira e maabbe banndi:

«Tawee 6e yeewoobe, 6e njiyataa,

Tawee 6e hettintoobe, 6e nanataa, 6e paamataa.»

<sup>14</sup> Nii ko Laamdo waafunoo e hunduko annabi Esaaya koo tabitiri e maabbe:

«On kettinto faa palon noppa, kaa on paamataa.

On yewan faa puttino gite, kaa on njiyataa.

<sup>15</sup> Sabi yimbe ngol lejol laatike tiidube ko'e:

Be cukkii noppa maabbe,

6e muabbe gite maabbe,

so wanaa dum

gite maabbe njyan,

noppa maabbe nanan,

hakkillaaji maabbe paaman,

6e tuuban, mi sellina 6e.»\*

<sup>16</sup> Kaa onon, on mbelii hoore: gite moodon ana njija, noppa moodon duu ana nana! <sup>17</sup> Mido haalana on goonga: annabaabe heewbe e foocciitiibe heewbe muuyiino yiide ko njiyaton koo, 6e njiyali. Be muuyiino nande ko nanaton koo, 6e nanaali.

#### No Iisaa firtiri banndol aawoowo

<sup>18</sup> —Ndennoo, kettinee maanaa banndol aawoowo ngol. <sup>19</sup> Neddo fuu nando haala Laamu Laamdo tawee faamaali dum, bondo oo waran, doofa ko aawaa e bernde mum koo. Kabaaru oo neddo ana nanndi e laawol do aawdi ndii saami doo. <sup>20</sup> Kabaaru aawdi saamundi e korokaaye ndii, ana nanndi e neddo nanoowo konngol ngol so jaabooroo ngol seyo don e don. <sup>21</sup> Kaa ngol walaa dadi e makko, o nanngan ngol wakkati gooto tan. So dum 6illike naa so o torrike saabe konngol ngol, o yankiran don e don. <sup>22</sup> Kabaaru aawdi saamundi e kebbe ndii, ana nanndi e neddo nanoowo konngol ngol, so sugullaaji aduna e koomti jawdi cuuma ngol, ngol laatoo dimarol. <sup>23</sup> Kaa kabaaru aawdi saamundi e leydi mbelndi ndii, been ngoni nanoobe konngol ngol so paama ngol. Oon wakkati, 6e ndiman 6ibbe: yoga teemedere, yoga capandé jeegom, yoga capantati.

#### Banndol haala hudo bonko ley ngesa alkama

<sup>24</sup> Iisaa haalani 6e banndol gonngol, wii:

—Hono nii Laamu Laamdo oo wa'i: gorko aawi e ngesa mum aawdi lobbiri. <sup>25</sup> Nde yimbe fuu daaninoo, gajo oon gorko wari, aawi hudo bonko e ley gulle dee, witti. <sup>26</sup> Nde aawdi ndii fudi faa rimi, nden hudo bonko koo duu 6anngi. <sup>27</sup> Maccube 6ee njehi mbiyoyi jom ngesa oo: «Kalfaado, wanaa aawdi lobbiri aawu-daa e ngesa maa ngaa naa? Hoto koo hudo bonko iwi?» <sup>28</sup> O jaabii 6e, o wii: «Gajo wadi nii.» Caggal dum, maccube 6ee lamndii mo, mbii: «Min njaha min doofoya hudo bonko koo?» <sup>29</sup> O jaabii 6e, o wii: «Wanaa non, sabi so odon doofa hudo bonko koo, so on ndeentaaki on doofidan hen alkama oo. <sup>30</sup> Accidee di faa kettal. Nden, mi wiyan hettoobe 6ee doofa hudo bonko koo tafon, 6e ngada dum kafe faa duppee. So 6e ngadi dum fuu, 6e ketta alkama oo, nden 6e moo6ta dum ley beembal am.»

#### Banndol haala ngeeyu buyaage

<sup>31</sup> Iisaa haalani 6e banndol gonngol, wii:

—Laamu Laamdo oo ana nanndi e ngeeyu buyaage mo neddo 6ami, so aawi e ngesa mum. <sup>32</sup> Kanko buri geeyi fuu famidufe, kaa so mo fudii, o laatoto lekki mawki sanne faa pooli ngara jiiba cuudi mum'en e case makki.

#### Banndol haala yuufinirdi

<sup>33</sup> O haalani 6e banndol gonngol, o wii:

—Laamu Laamdo oo ana wa'i hono no yuufinirdi seeda ndi debbo jiibi e saawal tati conndi alkama faa ndi fuu ndi yuufi.

<sup>34</sup> Dum fuu, Iisaa haalaniri yimbe 6ee e banndi. O haaldataa e maabbe so wanaa e banndi, <sup>35</sup> yalla haala ka Laamdo yottinirnoo annabaajo oo kaa ana tabita nde oon wii:

«Mi haalaniran 6e banndi,

mi haalaniran 6e kulle cuudaade gila nde aduna tagaa.»†

#### No Iisaa firtiri banndol hudo bonko

<sup>36</sup> Caggal dum, Iisaa yoppiti yimbe 6ee, naati ley suudu. Taalibaa6e makko 6ee battii mo, mbii mo:

—Firritan min banndol hudo bonko ngol.

\* 13:15 Esaaya 6.9-10    † 13:35 Jabuura 73.2

<sup>37</sup> O jaabii 6e, o wii:

—Aawdo aawdi lobbiri ndii oo, oon woni Bii Neddo oo, <sup>38</sup> ngesa ngaa woni aduna oo. Biibbe Laamu Laamdo 6ee ngoni aawdi lobbiri ndii, biibbe bondo oo ngoni hudo bonko koo. <sup>39</sup> Gajo aawdo hudo bonko oo yo Ibiliisa, kettal ngal yo timmoode aduna, hettoobe 6ee yo malaa'ikaen. <sup>40</sup> Hono no hudo bonko itirtee wedee e yiite nii, non timmoode aduna laatortoo. <sup>41</sup> Bii Neddo oo nelan malaa'ika'en mum, ittaa e laamu mum oo wadoobe woobbe e luuttal, kajum e wadoobe ko boni fuu, <sup>42</sup> mbedoo dum'en e yiite jahannama, ton be ngullata, 6e njeryondira, jiiye. <sup>43</sup> Kaa e oon wakkati, fooccitiibe 6ee njalbiran no naange nii e ley Laamu Baabiraado mum'en. Jom nowru fuu, yo nanu!

### *Banndol haala jawdi cuudiindi*

<sup>44</sup> —Laamu Laamdo oo ana wa'i hono no jawdi cuudiindi e ley ngesa, gorko goddo hoocci ndiin jawdi, suusi ndi kasen. E ley seyo makko ngoo, o soottoyi ko o joginoo fuu, o soodi ngesa ngaa.

<sup>45</sup> Laamu Laamdo oo ana wa'i kasen hono no julaajo tewtoowo naaye dime nii. <sup>46</sup> So joomum yii naayre rimre heewnde coggu, soottan ko jogii fuu sooda naayre ndee.

### *Banndol haala liddi*

<sup>47</sup> —Laamu Laamdo oo ana wa'i kasen hono no bubbol bedaangol e gecci, so nanngi sii liddi fuu nii. <sup>48</sup> Faa ngol heewi, summboobe see poofsi ngol faa e danjeere, ana cuba liddi dii. Be ngadi liddi lobbi dii e ley cagijie, be mbedii di nafataa fay huunde dii. <sup>49</sup> Hono non timmoode aduna laatortoo. Malaa'ika'en ngaran ceennda bonbe e moyyube, <sup>50</sup> mbedoo bonbe 6ee e ley yiite jahannama, ton been ngullata 6e njeryondira, jiiye.

### *Banndol haala kulle kese e kiidde*

<sup>51</sup> Iisaa lamndii 6e, o wii:

—On paamii dum fuu naa?

Be njaabii, 6e mbii:

—Min paamii.

<sup>52</sup> Caggal dum, o wii 6e:

—Jannginoowo Sariya fuu laatiido taalibbo Laamu Laamdo, ana wa'i hono no jom galle jaltinoowo e ley ndesaari mum kulle kese e kulle fooyde nii.

### *No Nasaraatunkoobe calorii jabande Iisaa*

<sup>53</sup> Nde Iisaa tilinoo e diin bandi ndee, o iwi ton, <sup>54</sup> o hooti ngeenndi do o mawni doo, omo waajoo e suudu maabbe waajordu. Haaynii yimfe hettintoobe 6ee sanne, ndarii ana mbiya:

—Hoto fuu o hebi ngal anndal? Hono hen o hebi baawde wadude dii kaayeefiji?

<sup>55</sup> Tama o wanaa 6ii cehoovo ledde oo? Tama wanaa Mariyama woni inniko? Tama o wanaa mawnii Yaakuuba e Yuusufu e Simon, kajum e Yahuuda? <sup>56</sup> Tama wanaa enen e banndiraabe makko rewbe koddi? Ndennoo, hoto o hebi dum fuu?

<sup>57</sup> Dum saabanii 6e tippitaade mo. Caggal dum, o wii 6e:

—Annabaajo ana teddinaa e nokkuuje dee fuu, so wanaa ley ngeenndi mum'en, kajum e ley galle mum'en.

<sup>58</sup> Iisaa wadaali don kaayde keewde saabe waasude maabbe goondinde mo.

## 14

### *No Yaayaa maayiri*

<sup>1</sup> E oon wakkati, Hirudus hooreejo leydi Galili oo nani haala Iisaa ana haalee. <sup>2</sup> O wii golloobe makko:

—Dum Yaayaa mo lootagal batisima! O wuurtii. Dum saabii so omo jogii baawde wadude kaayde.

<sup>3</sup> Tawi Hirudus yamiriino Yaayaa nannghee, haabbe, uddee ley kasu, kammari Hirudiya jom suudu mawniiko biyeteedo Filipa. <sup>4</sup> Sabi Yaayaa ana wiyanoo Hirudus:

—Dagantaako ma teetaa Hirudiya, sabi o gen mawna.

<sup>5</sup> Hirudus yidi warde mo kaa suusaano yimbe 6ee, sabi 6e fuu ebe njogorinoo Yaayaa yo annabaajo.

<sup>6</sup> Dum nee, jannnde yiitu-mawuuri rimeede Hirudus, 6ii Hirudiya debbo darii ana woma yeeso nootiiбе mo see. Hirudus weltii sanne, <sup>7</sup> faa hunii hokkan mo huunde fuu ko o jaagii.

<sup>8</sup> Suka debbo oo jokki haala inna mum, wii Hirudus:

—Waddanam doo hoore Yaayaa mo lootagal batisima oo e la'al!

<sup>9</sup> Hirudus yoomi, kaa nde wonnoo hunike yeeso nootiiбе dum 6ee, yamiri oon waddanee nde. <sup>10</sup> Oon wakkati fuu, o yamiri hoore Yaayaa tayoyee ley kasu too. <sup>11</sup> Hoore ndee tayaa tummbaa e la'al, hokkaa suka debbo oo. Oon hokkoyi nde inna mum. <sup>12</sup> Taalibaabe Yaayaa 6ee ngari 6amti tew oo, iroyi. Caggal dum, 6e njehi 6e kaalanoyi Iisaa ko wadi koo.

*No Iisaa namminiri ujunaaji joy neddo*

<sup>13</sup> Nde nanirde ndee warnoo e Iisaa ndee, Iisaa iwi ton naati laana, fa'i nokku teeldö, kajum tan. Yimbe 6ee kumpitii dum, njalti e geelle dee, cawndii daande weendu nduu, njokki e makko. <sup>14</sup> Nde o yalti e laana kaa ndee, o yii jamaa keewdö, o yurmina 6e sanne, heddi omo sellina jaaw6e ma66e. <sup>15</sup> Nde hiiri ndee, taalibaa6e 6ee bättitii Iisaa, mbii dum:

—Jooni hiiri, kasen duu nokku oo yo ladde. Yoppitin jamaa oo, yalla ana coodoya ko naama to geelle too.

<sup>16</sup> O jaabii 6e, o wii:

—Fotaa ko 6e njaha. Onon e ko'e moodon, ndokkee 6e ko 6e jaama!

<sup>17</sup> Be njaabii mo, 6e mbii:

—En ngalaa doo so wanaa buuruuje joy e liiddi didi.

<sup>18</sup> O wii 6e:

—Ngaddanee kam dum gaa.

<sup>19</sup> O yamiri yimbe bee njoodoo e hudo, o 6ami buuruuje joy dee e liiddi didi dii, o tiggiti kammu, o yetti Laamdo. O tayi buuru oo, o hokki taalibaa6e 6ee ndokka jamaa oo. <sup>20</sup> Be fuu 6e jaami faa 6e keddi. Taalibaa6e 6ee ndeentini taye keddiide dee, de kebbini cagijie sappo e didi. <sup>21</sup> Naamnoobe 6ee ana mbaara e ujunaaji joy gorko ko waldaa e rew6e e sukaa6e.

*No Iisaa yaariri koyde dow ndiyam*

<sup>22</sup> Don e don, o naanni taalibaa6e 6ee e laana kaa yalla ana adoo mo lummbude weendu nduu, tawi kanko omo wondi e yoppitinde jamaa oo. <sup>23</sup> Caggal o yoppitii 6e, o njaboyi dow waamnde haayre faa o wada duwaawu kanko tan. Naange yanii, tawi kanko tan woni ton. <sup>24</sup> Laana kaa yehi faa woddii danjeere ndee, tawi bempeeje ana piya ka, sabi ka jaabootooka henndu. <sup>25</sup> Nde fadinoo weetude ndee, o wari e taalibaa6e 6ee, omo yaara koyde dow ndiyam dam. <sup>26</sup> Kaa nde 6e njii mo omo yaha e dow ndiyam dam ndee, kulol manngol nanngi 6e, 6e mbii:

—Dum yo seydaani!

Be ndarii e6e konkina no 6e poti hulde. <sup>27</sup> Don e don Iisaa wii 6e:

—Mbaaltinee hakkillaaji moodon! Dum miin, pati kulee!

<sup>28</sup> Piyeer jaabii mo, wii:

—Moobbo, so dum aan jaati woni doo, yamir mi yaha dow ndiyam dam mi wara to maa.

<sup>29</sup> O jaabii mo, o wii:

—War!

Piyeer yalti laana kaa, hedde ana yaha dow ndiyam dam, fewti Iisaa. <sup>30</sup> Kaa nde mo yiinoo henndu nduu sattii ndee, o huli, o fuddi yorkitaade, o wulli, o wii:

—Moobbo, nootam!

<sup>31</sup> Don e don, Iisaa foocci junngo mum, nanngi mo, wii:

—Nii pamdir-daa hoolaare? Ko saabii so cikkiti-daa?

<sup>32</sup> Be didon fuu, 6e naati laana kaa tan, henndu nduu darii. <sup>33</sup> Taalibaa6e wonnoobe ley laana kaa 6ee cujidani mo, mbii:

—A Bii Laamdo jaati!

*No Iisaa selliniri jaaw6e ley leydi Genesaret*

<sup>34</sup> Be lummbi weendu nduu, 6e panndi leydi Genesaret. <sup>35</sup> Worbe oon nokku annditi mo, kaalani leydi ndii fuu garol makko, o waddanaa jaaw6e 6ee fuu. <sup>36</sup> Be jaagii mo mo acca jaaw6e 6ee mema fay so kommbol saaya makko tan. Haya duu, memdo ngol fuu sellii.

## 15

*Haala neesu njaatiraabe*

<sup>1</sup> Farisa'en e dunkee'en Sariya iwi Urusaliima, ngari e Iisaa lamndii dum, mbii:

<sup>2</sup> —Kodum wadi so taalibaa6e maa 6ee ana koyna neesuujii njaatiraabe meeden dii? Sabi 6e lootataa juude fade ma66e jaamde.\*

<sup>3</sup> O jaabii 6e, o wii:

—Onon nee, kodum wadi so odon luutta yamiroore Laamdo ndee faa njokkon neesu moodon? <sup>4</sup> Sabi Laamdo wii: «Teddin inna maa e baam maa.»<sup>†</sup> O wii kasen: «Kudufu baam mum naa inna mum, wareede laato jukkungo mum.»<sup>‡</sup> <sup>5</sup> Kaa onon, odon mbiya so neddo wii baam mum naa inna mum: «Ko kaannoo-mi wallirde ma koo yo ngedu Laamdo», <sup>6</sup> dum ana heya neddo, fotaa ko teddina saaraa mum kasen. Hono non tosirton konngol Laamdo, faa njokkon neesu moodon! <sup>7</sup> Naafiqi'en! Annabi Esaaya woofaali fey nde sappinoo e moodon so wii:

\* <sup>15:2</sup> Ngol lootugol juude ha66aaki e ittude tuundi, kammari faa joomum fooccitanoo diina wadiraa. <sup>† 15:4</sup> Pergu 20.12; Fillitagal Tawreeta 5.16    ‡ <sup>15:4</sup> Pergu 21.17; Lewinkoo6e 20.9

<sup>8</sup> «Laamdo wii:

Ngol lepol e haala tan teddinirta kam,  
kaa e ley 6erde ma66e ebe ngoddi kam.

<sup>9</sup> Meere 6e ndewata kam,

sabi ko 6e tuugii e ley janngingol ma66e koo yo jamirooje yim6e tan.»<sup>§</sup>

*Haala ko so6inta neddo*

<sup>10</sup> Oon wakkati, Iisaa noddi jamaa oo, wii düm:

—Kettinee, paamee: <sup>11</sup> wanaa ko naatata e hunduko neddo so6inta düm. Ko yaltata e hunduko so6inta neddo.

<sup>12</sup> E oon wakkati, taalibaabe 6ee 6attitii mo, mbii mo:

—Tama a anndii Farisa'en 6ee mettaama e haalaaji maa dii?

<sup>13</sup> O jaabii, o wii:

—Funngo fuu ngo Baabiraado am gondo dow kammu oo aawaali, doofete. <sup>14</sup> Accee 6e, 6e wum6e dowoo6e wum6e! So bumdo 6owii bumdo, 6e difon fuu 6e caaman ley ngaykaare.

<sup>15</sup> Piyeer jaabii, wii mo:

—Firritan min kaa haala.

<sup>16</sup> Iisaa wii:

—Onon duu, faa jooni edum finkinii on naa! <sup>17</sup> On paamaali ko naati e hunduko fuu yahan ley reedu, kasen duu dum yehete ladde? <sup>18</sup> Kaa ko yaltata e hunduko koo e 6ernde iwata, düm jaati so6inta neddo. <sup>19</sup> Sabi e 6ernde neddo miiloji bondi iwata so ndunya düm e jaako'aaku e jeenu e faasigaaku e nguyka e kappi, kajum e mbonka. <sup>20</sup> Dum woni ko so6inta neddo. Kaa jaamde tawee lootaali juude mum no 6e mbii nii so6intaa neddo.

*No debbo Kanaananike goondiniri Iisaa*

<sup>21</sup> Caggal düm, Iisaa iwi don fa'i seraaji Tirus e Sidon. <sup>22</sup> Debbo jeyaado Kanaana kodudo e ndii leydi wari e makko, wulli, wii:

—Moobbo, taanii Daawuuda, yurmam! Biyam debbo ladde ana e mum, ana torra dum sanne!

<sup>23</sup> Kaa o jaabaaki düm fay huunde. Taalibaabe makko 6ee ndaardoyi mo, mbii mo:

—Ribbu mo dee! Omo nii jokki e meeden tan omo wulla.

<sup>24</sup> Iisaa jaabii, wii:

—E baali suudu Israa'ilila majjudi dii tan nelaa-mi.

<sup>25</sup> Nii debbo oo saami yeeso makko, sujidi, wii:

—Moobbo, wallam!

<sup>26</sup> O jaabii, o wii:

—Bamde jaamdu suaka6e so tippoo dawaadi moyyaa.

<sup>27</sup> Debbo oo wii:

—Goonga, Moobbo, kaa fay dawaadi ana jaama jaamdu joomum'en iwooru e la'al so saama nduu.

<sup>28</sup> Nden, Iisaa jaabii mo, wii:

—Debbo, hee goondinal maa ana mawni! Yo a wadane no njidir-daa nii.

E oon wakkati jaati, siyiko debbo oo selli.

*No Iisaa selliniri jawbe heew6e*

<sup>29</sup> Iisaa iwi don, takkii daande weendu Galili, njabbi waamnde haayre, joodii ton. <sup>30</sup> Yim6e heew6e ngari to makko, ngaddi layoo6e e wum6e e 6e terde mum'en mbaati e muumdu6e, kajum e jawbe wobbe heew6e. Be battini 6een yeeso makko, o sellini 6e. <sup>31</sup> Haaynii yim6e 6ee sanne nde njiihoo muumduuno6e ana kaala, 6e terde mum'en mbaati cellii, layanno6e ana njaha faa gasa, wumno6e ana njiya. Hedde ebe njetta Laamdo Israa'ilila oo.

*No Iisaa jaamminiri ujunaaji nay neddo*

<sup>32</sup> Iisaa noddi taalibaabe mum 6ee, wii 6ee:

—Bee yim6e ana njurminii kam, sabi hannde woni balde tati ko 6e ngondi e am, haya duu 6e ngalaa ko 6e jaama. Mi waawaa yoppitinde 6e tawee 6e jaamaali, pati 6e caama yolbere e laawol so ebe koota.

<sup>33</sup> Taalibaabe makko 6ee mbii mo:

—Hoto fuu ke6aten ko jaamminen oo jamaa e ley ndee ladde jeereende?

<sup>34</sup> O lamndii 6e, o wii:

—Hono foti buuruuje njogi-don?

Be njaabii mo, 6e mbii:

—Jeddi, kajum e liikoy seeda min njogii.

<sup>35</sup> Caggal dum, o yamiri jamaa oo joodoo e leydi. <sup>36</sup> O 6ami buuruuje jeddi dee kajum e liikoy koy, o yetti Laamdo, o tayi de, o hokki taalibaabe bee ndokka dum jamaa oo. <sup>37</sup> Be fuu 6e jaami faa 6e keddi. Taalibaabe bee ndeentini kedde dee, de kebbini cagijje jeddi. <sup>38</sup> Naamnoobe bee yo ujunaaji nay gorko, ko waldaa e rewbe e sukaabe. <sup>39</sup> Caggal Iisaa yoppitii yimbe bee, naati laana, fa'i leydi Magadan.

## 16

### No Farisa'en jaagorii kollee haaynde

<sup>1</sup> Farisa'en e Saduki'en ngari ittude koro Iisaa, 6e ndaardi mo o holla 6e taagumansa kaayniido iwoowo dow kammu. <sup>2</sup> O jaaborii 6e nii:

—So on njii kammu ana wojji kiikiide, on mbiyan welan. <sup>3</sup> Beetee law, so on njii kammu ana wojji ana ni6bi, on mbiyan tofan. Odon mbaawi seenndude mbaadi kammu, kaa on mbaawaa seenndude taagumansaaji wakkatiji dii! <sup>4</sup> Jamaanu jooni bondo co6udo oo ana ndaara holleede taagumansa, kaa taagumansa fuu o hollataake, so wanaa taagumansa annabi Yuunusa oo.

Caggal dum, o yoppi 6e don, o witti.

### Haala yuufinirdi Farisa'en e Saduki'en

<sup>5</sup> Nde taalibaabe bee lummbata weendu nduu ndee, njeggit yoogaade jaamdu. <sup>6</sup> Iisaa wii 6e:

—Kakkilee, ndeentee e yuufinirdi Farisa'en e Saduki'en ndii.

<sup>7</sup> Taalibaabe bee ndarii ana mbiyondira:

—Ko en njoobaaki buuru koo o wiiri non.

<sup>8</sup> Iisaa anndi ko 6e kaalata koo, wii 6e:

—Ko wadi so odon kaalda hakkunde moodon on njoobaaki buuru mbiiru-mi non? Onon famdu6e hoolaare! <sup>9</sup> Tama faa jooni on paamaali? Tama on miccitaaki buuruuje joy de njedu-mi e ujunaaji njoyon gorko dee, e cagijje de kebbin-don kedde dee? <sup>10</sup> Tama on miccitaaki kasen buuruuje jeddi de njedu-mi e ujunaaji nay neddo dee, e cagijje de kebbindon kedde dee? <sup>11</sup> Hono wadi on paamaali wanaa haala buuru kaalanan-mi on? Ndeentee e yuufinirdi Farisa'en e Saduki'en ndii.

<sup>12</sup> Oon wakkati, taalibaabe bee paami o wiyaali 6e ndeentoo e ko yuufinta buuru koo, ko o wii dee, 6e ndeentoo e ko Farisa'en e Saduki'en njanginta koo.

### No Piyeer seedorii Iisaa woni Almasihu

<sup>13</sup> Iisaa yehi leydi Kaysariya Filipa. O lamndii taalibaabe makko bee, o wii:

—Homo yimbe mbiyata Bii Neddo oo woni?

<sup>14</sup> Be njaabii, 6e mbiil:

—Won wiyoobe a Yaayaa mo lootagal batisima, won wiyoobe a annabi Iliyaasa, won wiyoobe kasen a annabi Yeremiya naa gooto e annabaabe bee.

<sup>15</sup> O wii 6e:

—Onon nee, homo mbiyatlon ngon-mi?

<sup>16</sup> Simon Piyeer jaabii mo, wii:

—Aan woni Almasihu, Bii Laamdo guurdo oo.

<sup>17</sup> Nden Iisaa wii mo:

—A welii hoore, aan Simon 6ii Yuunusa. Sabi wanaa 6ii-aadama anndin maa dum, Baabiraado am gondo dow kammu oo anndin maa dum. <sup>18</sup> Miin duu, mido wiye Piyeer (dum woni haayre), e dow nden haayre mahen-mi deental am goondinbe ngal. Maayde e heewde semmbe fuu walaa ko waawi e mayre. <sup>19</sup> Mi hokkete cokitirde Laamu Laamdo: huunde fuu ko kaafu-daa e leydi, hadete dow kammu. Ko njabu-daa e leydi, jaabete dow kammu.

<sup>20</sup> Nden, Iisaa daalii taalibaabe mum bee pati kaalana fay gooto kajum woni Almasihu oo.

### No Iisaa sapporii maayde mum e wuurtugol mum

<sup>21</sup> Gila e oon wakkati, Iisaa fuddi anndinde taalibaabe mum bee ana tilsi mo yaha Urusaliima, ton mawbe lejol e hooreebey yottinoobe sadaka e dunkee'en Sariya torran mo sanne, mo waree, kaa mo wuurtan jaannde tatabere. <sup>22</sup> E ley dum, Piyeer sawndintini mo hedde ana njia mo, wii mo:

—Yo Laamdo dannde Moobbo! Dum hebataa ma!

<sup>23</sup> Iisaa yecciti, wii Piyeer:

—Woddam aan Iibiliisa! A fergitere e laawol am, sabi miiloo maa ngoo iwrataa to Laamdo, to yimbe ngo iwrata!

### No Iisaa jokkirtee

<sup>24</sup> Caggal dum, o wii taalibaabe makko 6e:

—Muuydo jokkude kam fuu, njotta yurmaade hoore mum, 6ama leggal mum bardugal\* jokka e am. <sup>25</sup> Sabi muuydo danndude yonki mum, waasan ki. Kaa baasirdo ki sabaabu am, hisinan ki. <sup>26</sup> Kodum hebude aduna oo fuu nafata neddo, so waasi yonki mum? Won ko neddo waawi hokkitirde faa soottitoo yonki mum naa? <sup>27</sup> Sabi Bii Neddo oo wardan e malaa'ika'en mum e ley teddeengal Baabiraado mum. Oon wakkati, o barjoto gooto fuu ko waarata e golle mum. <sup>28</sup> Mido haalana on goonga: yoga e wonbe doo bee maayataa tawee njyaali Bii Neddo oo ana wara e ley laamu mum.

## 17

### No noone Iisaa waylitorii

<sup>1</sup> Balde jeegom caggal mum, Iisaa yaadi e Piyeer e rimdaabe didon Yaakuuba e Yuhanna, o teeldoyi e mum'en dow waamnde haayre toownde. <sup>2</sup> Noone makko waylitii yeeso ma66e. Yeeso makko ana jalba no naange nii, kaddule makko ndawni far hono fooyre. <sup>3</sup> Muusaa e Iliyaasa 6aanngani 6e, ana kaalda e makko. <sup>4</sup> Piyeer wii Iisaa:

—Moobbo, gonal amen doo ana moyyi. Dal mi darna doo buguuji tati: aan wooturu, Muusaa wooturu, Iliyaasa wooturu.

<sup>5</sup> O tilaaki haalde, faa luarde jalboore suddi 6e. Daande iwi ley luurde ndee, wii:

—Oo doo yo Biyam mo korsin-mi, mo cu6ii-mi. Kettindee mo!

<sup>6</sup> Nde taalibaabe bee nani nden daande ndee, 6e caami 6e kippii e leydi, 6e kuli sanne.

<sup>7</sup> Iisaa 6attitii 6e, memi 6e, wii:

—Immee, pati kulee.

<sup>8</sup> E ley dum, 6e kunci gite, 6e njyaali fay gooto so wanaa Iisaa tan.

<sup>9</sup> E ley ko 6e njippotoo waamnde haayre ndee koo, Iisaa daalii 6e, wii:

—Pati kaalanee fay gooto ko njii-don koo faa wakkati nde Bii Neddo oo immitii e hakkunde maay6e fuu.

<sup>10</sup> Caggal dum, taalibaabe bee lamndii mo, mbii:

—Kodum wadi so dunkee'en Sariya bee ana mbiya annabi Iliyaasa haani adaade Almasihu warde?

<sup>11</sup> O jaabii 6e, o wii:

—Goonga, Iliyaasa adotoo warde moyyintina kulle dee fuu. <sup>12</sup> Kaa mido wiya on: Iliyaasa ya66ike, 6e annditaali dum, 6e ngollii dum ko 6e muuyi fuu. Hono non 6e torrirta Bii Neddo oo duu.

<sup>13</sup> Taalibaabe bee paami ko o haalata haala Iliyaasa koo, haala Yaayaa mo lootagal batisima o haalani dum'en.

### No Iisaa selliniri kirikiraado

<sup>14</sup> Nde 6e ngarti e jamaa oo ndee, gorko gooto 6attitii mo, dicci yeeso makko, <sup>15</sup> wii:

—Moobbo, yurma 6iyam gorko! O kirikiraado omo tampi sanne, wakkatiji omo saama e yiite naa e ndiyam. <sup>16</sup> Mi nabii mo to taalibaabe maa bee kaa 6e ndonkii sellinde mo.

<sup>17</sup> O 6attitii, o wii:

—Hey yim6e jamaanu bondo 6e nganaa goondin6e! Faa mande tilotoo-mi e mon? Faa mande keddotoo-mi mujande on? Ngaddanee kam cukalel ngel doo!

<sup>18</sup> O jahii e ladde ndee, nde yalti e suka oo, o selli don e don.

<sup>19</sup> Caggal dum, taalibaabe bee teeldi e makko, lamndii mo, mbii:

—Kodum wadi so min ndonki ittude ndee ladde?

<sup>20</sup> Iisaa jaabii 6e, wii:

—Saabe odon pamdi goondinal wadi dum. Mido haalana on goonga: so goondinal moodon fotii fay no ngeeyu buyaage nii, so on mbii ndee doo waamnde haayre: «Sottu doo, njahaa too», nde sottan. Fay huunde on ndonkataa wadude. [ <sup>21</sup>\* ]

### No Iisaa sapporii kasen maayde mum e wuurtugol mum

<sup>22</sup> No 6e njilortoo e ley Galili nii, Iisaa wii 6e:

—Bii Neddo oo wadete e juude yim6e, <sup>23</sup> 6e mbara mo, kaa e ley jalaande majcum tata6ere, o immitoto.

Taalibaabe bee cu6li sanne.

### Haala yobugol usuru Suudu Dewal Mawndu

<sup>24</sup> Nde Iisaa e taalibaabe mum njottinoo Kafarnahum ndee, nanngoobe usuru Suudu Dewal Mawndu bee 6attii Piyeer, mbii dum:

\* <sup>16:24</sup> Yeew Matta 10.38 \* <sup>17:21</sup> E dereejii 6ooydi dii, yoga ana 6eyda aaya 21:Kaa hono oo seydaani ribbirtaake so wanaa duwaawu e koorka.

—Tama moobbo moodon oo ana yobaa usuru Suudu Dewal Mawndu?

<sup>25</sup> Piyeer jaabii, wii:

—Omo yobaa.

Ko Piyeer naati galle oo koo, fade mum hebude haala, Iisaa wii:

—Simon, kodum woni miilo maa e dum? Kaanankooe aduna bee, homo ee nduujnata?

Homo ee njobinta lampo? Dugule'en naa honaabé?

<sup>26</sup> Piyeer jaabii, wii:

—Honaabé bee.

Iisaa wii mo:

—Ndennoo, dugule'en bee kaanaa yobude. <sup>27</sup> Kaa noo, en njidaa mettinde berde bee yimbe. Yaa to weendu too, tippo-daa yammbuure maa e ley ndiyam dam. Liingu fuu adiido modude nde poodaa, yenjinnaa dum aaraa hunduko mum, a tawan hen kaalisi daneeo kibbinoo wo usuru meeden. Ittaa njobanaa en, enen didon.

## 18

### *Haala burdo teddude ley Laamu Laamdo*

<sup>1</sup> Oon wakkati, taalibaabe bee battitii Iisaa, lamndii dum, mbii:

—Homo buri teddude ley Laamu Laamdo oo?

<sup>2</sup> Iisaa noddi cukalel, darmi ngel yeeso maabe, <sup>3</sup> wii:

—Mido haalana on goonga: so nii on mbaylitaaki faa nanndon e cukaloy, on naatataa e Laamu Laamdo oo abada. <sup>4</sup> Burdo teddude ley Laamu Laamdo yo leydinkiniido faa nanndi e ngel cukalel. <sup>5</sup> Neddo fuu jaabiiido cukalel gootel hono ngel e innde am, miin jaati o jaabii.

### *Haala ko luuttinta yimbe*

<sup>6</sup> —Neddo fuu luuttindo gootel e koy cukaloy goondinkoy kam, ko buri moyyande joomum haayre teddunde haabbee e daande mum, yoolee ley iduru geeci.

<sup>7</sup> Bone woodanii oo aduna saabe kulle gadooe yimbe ley luutti dee! Waajibi kulle dee ngada, kaa bone woodanii laatiido sabaaabu majje! <sup>8</sup> So tawii junngo maa naa koyngal maa luuttinte, tayu dum tippo-daa to woddi. Naataa e nguurndam nduumiidam a jakudo buri moyyande ma diina tippeede e yiite duumiinge a kibbuudo. <sup>9</sup> So tawii yiitere maa luuttinte, sol nde tippo-daa. Sabi naatude maa e nguurndam nduumiidam a dokko, buri moyyande ma diina tippe-daa e yiite jahannama a kibbuudo.

### *Banndol haala mbaalu majjudo*

<sup>10</sup> —Ndeentee e yawde fay gootel e koy cukaloy. Sabi mido wiya on: malaa'ika'en makkoy dow kammu bee, wakkati fuu ana yewaa yeeso Baabiraado am gondo dow kammu oo. [ <sup>11</sup> \* ] <sup>12</sup> Ko miilaton? So neddo ana jogii baali teemedere majjiraama mbaalu gooto, yoppataa capande jeenay e jeenay dii fuu ana ndura ley ferro, tewtoya majjudo oo? <sup>13</sup> Mido haalana on goonga: so o yiittii mo, o seyorto oon faa bura capande jeenay e jeenay di majjaali dii. <sup>14</sup> Hono non Baabiraado moodon gondo dow kammu oo yidaa fay gootel e koy cukaloy majja.

### *Haala jaafondiral hakkunde sakiraabe*

<sup>15</sup> —So sakiike maa toojii ma, yaa to mum kollitaa dum toopanngé mum oo tawee onon tan diidon. So o jabanii ma, a hewtii sakiike maa. <sup>16</sup> Kaa so o jaabaali kollitaa mo yaadu e neddo gooto naa yimbe diidon hono no Binndi dii mbiiri nii: «Huunde fuu ko neddo happaa ana hasindini e seedaaku yimbe diidon naa taton.» <sup>17</sup> So o jaabanaali ma, haalan dum deental goondinbe ngal. So o salike jabande deental goondinbe ngal, jogora mo keefero naa duwaajne. <sup>18</sup> Mido haalana on goonga: huunde fuu ko kadu-don e leydi, hadete dow kammu. Huunde fuu ko njabu-don e leydi, jaabete dow kammu. <sup>19</sup> Mido haalana on kasen: e ley aduna, nde diidon mon kawriti e dow huunde wootere jaaglike Laamdo, ko nde waawi laataade fuu, Baabiraado am gondo dow kammu oo hokkan ee nde. <sup>20</sup> Sabi nde diidon naa taton kawriti e innde am fuu, mido hakkunde mum'en.

### *Banndol haala golloowo caliido yaafaade*

<sup>21</sup> Oon wakkati, Piyeer battitii mo, lamndii mo, wii:

—Moobbo, cili hono foti kaan-mi yaafaade sakiike am mo joottaali toojnude kam? Cili jeddi naa?

<sup>22</sup> Iisaa jaabii mo, wii:

—Mi wiyaali ma cili jeddi, mbii-maa-mi cili capande jeddi faa nde cili jeddi.

<sup>23</sup> Iisaa beydi hen wii:

\* **18:11** E dereeji fooydi dii, yoga ana beyda aaya 11:Sabi hisinde majjuoe waddi Bii Neddo oo.

—Dum Laamu Laamdo nanndi: kaananke gooto anniyii yamtude gollooobé mum namaande.<sup>24</sup> Nde mo fuddi yamtude ndee, o waddanaa gollooowoo gooto mo o rewata miliyooji.<sup>25</sup> Oon gorko walaa ko yobira oon kaalisi. Dum nee, kaananke oo yamiri o soottee, kanko e jom suudu makko e sukaabé makko e ko o jogii fuu, faa yobá namaande ndee.<sup>26</sup> Gollooowoo oo diccií yeeso makko, jaagii mo, wii: «Mujanam, mi yobete fuul!»<sup>27</sup> Kaananke oo yurmii mo, yaafii mo namaande ndee, yoppi mo o witti.

<sup>28</sup> Gollooowoo oo yalti tan, hawri e gollidiido mum mo rewata kaalisi seeda. O te66ii dum, o nanngi daande mum, o wii: «Yobám kaalisi am!»<sup>29</sup> Gollidiido makko oo diccií, jaagii mo, wii: «Mujanam, mi yobete!»<sup>30</sup> Kaa oon jaafaali. O uddoyi dum kasu, faa nde yobí namaande ndee fuu.<sup>31</sup> Nde gollooobé heddiibe bee njii dum ndee, mettaa sanne, njehi kaalanoyi dum kaananke oo.<sup>32</sup> E ley dum, kaananke oo noddi gollooowoo oo, wii dum: «Aan a gollooowoo bondó! Nde jaagi-daa kam, mi yaafe ko ndewan-maa-mi koo ndee, mi yaafike ma.<sup>33</sup> Aan duu, a haanaanoo yurmaade jaado maa oo no njurmori-maa-mi nii naa?»<sup>34</sup> Kaananke oo bilaa sanne, wadi mo e juude jukkoobe bee, faa nde o yobí namaande ndee faa laabi.

Iisaa 6eydi hen wii:

<sup>35</sup> —Hono non Baabiraado am gondo dow kammu oo wadata neddo fuu e moodon mo yaaforaaki sakiike mum 6ernde laabunde.

## 19

### *Haala ko Iisaa wasii dow ceergal*

<sup>1</sup> Nde Iisaa tilli e din waajuuji ndee, iwi Galili fa'i bannge Yahuudiya gondo caggal maayo Urdun oo.<sup>2</sup> Yimbe heewbe njokki e makko, o sellini ton jawbe mum'en.

<sup>3</sup> Yoga e Farisa'en ngari e makko, lamndii mo dum doo faa itta koro makko:

—Tama ana daganii gorko seerdude jom suudu mum dalili tawaado fuu?

<sup>4</sup> O jaabii, o wii:

—Tama on njanngaali ko Binndi dii mbii? E fuddoode Laamdo tagii 6e wadii 6e gorko e debbo,<sup>5</sup> wii: «Dum wadi so gorko yoppan inna mum e baam mum, nanngondira e jom suudu mum, 6e didon fuu 6e laatoo neddo gooto.»<sup>\*</sup><sup>6</sup> Nii woni 6e nganaa didon kasen, 6e neddo gooto. Ndennoo, pati neddo seenndu ko Laamdo reentini.

<sup>7</sup> Be lamndii mo, 6e mbii:

—Ko saabii so Muusaa yamiri gorko hokka jom suudu mum talkuru ceergal nde ana seera dum?

<sup>8</sup> O jaabii 6e, o wii:

—On yoorbe 6erde, dum saabii so Muusaa hokki on no ceerdon rewbe moodon. Kaa e fuddoode, wanaa non worrunoo.<sup>9</sup> Mido wiya on: ceerdudo jom suudu mum ko wanaa fijirde, so 6amii debbo goddo, jeenii.

<sup>10</sup> Taalibaabe makko 6ee mbii mo:

—So nii hakkunde gorko e debbo worri, waasude 6amde 6uri.

<sup>11</sup> Iisaa jaabii 6e, wii:

—Wanaa yimbe fuu mbaawi jaabude kaa haala, 6e Laamdo hokki dum 6ee tan mbaawi jaabude ka.<sup>12</sup> Daliiliji kadooji worbe 6amde ana ngoodi. Sabi won worbe rimetee6e tawa yo waatoraa6e. Won derete6e. Heddiibe bee noo, kajum'en kadi ko'e mum'en 6amde faa ngollana Laamu Laamdo oo. Neddo fuu jarriido ndee tinndinoore, yo jaabu!

### *No Iisaa duwanorii cukaloy*

<sup>13</sup> Caggal dum, won waddan6e Iisaa cukaloy yalla omo fawa e makkoy juude makko o duwanoo koy, kaa taalibaabe see njahii e yimbe 6ee.<sup>14</sup> Nden o wii:

—Accee cukaloy koy ngara e am, pati kadee koy, sabi wa'ube no makkoy nii 6ee njey Laamu Laamdo oo.

<sup>15</sup> O fawi junngo makko dow makkoy, o duwanii koy. Nden o iwi ton.

### *No Iisaa e suka jokolle arsukunte ngaddi*

<sup>16</sup> Gorko gooto 6attitii Iisaa, lamndii mo, wii:

—Moobbo, honde huunde moyyunde kaan-mi wafude faa mi he6a nguurndam ndu-umiidam?

<sup>17</sup> Iisaa wii mo:

—Ko saabii so laamdi-daa kam ko moyyi? Laamdo tan woni moyyo! So ada yidi naatude e nguurndam, jokku sariyaaji dii.

<sup>18</sup> Gorko oo lamndii Iisaa, wii:

—Hodi ngoni sariyaaji dii?

Iisaa jaabii, wii:

\* 19:5 Puddoode 2.24

—Pati naadu hoore, pati jeenu, pati wujju, pati seeda fenaande,<sup>19</sup> teddin inna maa e baam maa, njidiraa tanaa maa no njidir-daa hoore maa nii.

<sup>20</sup>Suka jokolle oo wii mo:

—Mido haybi düm fuu. Kodum heddi?

<sup>21</sup>Iisaa wii mo:

—So tawii ada yidi hibbude, yaa soottoy ko njogi-daa fuu, ndokkaa kaalisi oo misikiina'en. Nden a heban jawdi dow kammu. Caggal dum, ngaraa njokkaa kam.

<sup>22</sup>Nde suka jokolle oo nani diin haalaaji ndee, yaadi e yoomeende, sabi o arsukunte, poldo.

<sup>23</sup>E ley dum, Iisaa wii taalibaabe mum bee:

—Mido haalana on goonga: hee naatugol arsukunte e Laamu Laamdo ana tiidi!<sup>24</sup> Mido haalana on kasen dum doo: ngelooba yabboroo e wuddere mesalal buri newaade diina naatugol arsukunte e Laamu Laamdo.

<sup>25</sup>Haaynii taalibaabe bee sanne nde nani diin haalaaji ndee, 6e mbii:

—Ndennoo, homo woni kisoowo?

<sup>26</sup>O yeewi 6e, o wii:

—Do yimbe dum laatako, kaa walaa fuu ko Laamdo waawaa.

<sup>27</sup>Piyeer 6ami haala, wii mo:

—Minen, min njoppii fuu, min njokkii e maa. Kodum min keboyta?

<sup>28</sup>Iisaa wii 6e:

—Mido haalana on goonga: so Bii Neddo oo joodiima e joodorgal mum laamu teddungal ley aduna keso, onon sappo e didon jokkuue e am bee duu, on njoodoto e dow joodorde kaanankoofe, caron cuudii baaba Israa'iila sappo e didi dii.<sup>29</sup> Neddo fuu joppirdo saabe am galle mum naa sakiraabe mum worbe naa sakiraabe mum rewbe naa inna mum naa baam mum naa sukaabe mum naa gese mum, heban ko buri dum cowe teemedere, kasen duu heban nguurndam nduumiidam.<sup>30</sup> Kaa ardinoobe heewbe laatoto caggalaabe, caggalaabe bee laatoto ardiibe.

## 20

### Bannadol haala golloobe ley ngesa peguuje

<sup>1</sup>—Annii ko Laamu Laamdo nanndi: jom ngesa peguuje yalti beetee law faa hasa golloobe 6e ngolla ngesa mum peguuje. <sup>2</sup>O hefi golloobee, o hawri e maabbe o yoban 6e hono ko woowi: jalooma fuu mbuuudii cardi. O naabi 6e ngesa makko. <sup>3</sup>Wakkati pawlal, o yalti kasen, o tawi wobbe sakoro 6e kebaali golle, <sup>4</sup>o wii 6e: «Njehee onon duu ngolloyon to ngesa am peguuje too, mi yoban on ko haani yobeede koo.» <sup>5</sup>Been duu njehi ton. Jom ngesa oo wadii non kasen hakkunde naange e caggal sallifanaa. <sup>6</sup>Caggal dum, o yalti kasen wakkati laasaraa, o tawi wobbe ana ndarrii to sakoro too, o wii dum'en: «Kodum wadi so jallu-don doo on ngollaali fay huunde?» <sup>7</sup>Be njaabii mo, 6e mbii: «Fay gooto bamaali min golle.» O wii 6e: «Njehee onon duu ngolloyon e ngesa am peguuje ngaa.» <sup>8</sup>Nde hiirnoo ndee, jom ngesa oo wii keyaado mum oo: «Noddu golloobe bee njobaa dum'en. Ardoro-daa sakitiise nanngede 6ee, cakitoro-daa adiibe nanngede 6ee.» <sup>9</sup>Nannganoobe laasaraa bee ngari, gooto e mum'en fuu hokkaa mbuuudu cardi. <sup>10</sup>Adinoobe nanngede 6ee duu ngari, cikki njobete ko buri dum. Kaa gooto e maabbe fuu hokkaa mbuuudu cardi hono no bee too nii. <sup>11</sup>Nde 6e njobaa dum ndee, ebe jermiitoo yaade to jom ngesa too <sup>12</sup>ebe mbiya: «Bee doo golloobe ngollaali kinaa wakkati gooto tan, be ponndaamaa e amen njoobi, minen nee min ngollii jalooma kuurdo ley ngee naange wulngel!» <sup>13</sup>Jom ngesa oo jaabii gooto e maabbe, wii: «Gidam, mi toonaali ma. Tama wanaa aan jabunoo mi nanngire mbuuudu cardi jalooma? <sup>14</sup>Ndennoo, 6am njoobi maa njahaa. Miin muuyi hokkude cakitiido oo hono ko kebu-daa koo. <sup>15</sup>Tama wanaa ko weli kam ngadan-mi e kaalisi am oo? Naa moyyuki am kii waddan maa haasidaade?»

<sup>16</sup>Iisaa wii:

—Hono nii caggalaabe bee laatoto ardiibe, ardiibe bee laatoto caggalaabe.

### No Iisaa sapporii nde tatabere maayde mum e wuurtugol mum

<sup>17</sup>Tawi Iisaa ana njabbita faade Urusaliima, sawndintini taalibaabe sappo e didon 6ee e laawol, wii dum'en:

<sup>18</sup>—Kettinee, eden nii njabbita Urusaliima. Don Bii Neddo oo wadetee e juude hooreebe yottinoobe sadaka e dunkee'en Sariya. Be caran mo waree,<sup>19</sup> 6e ngada mo e juude heefere, been duu njaayran mo, piya mo dorri, pena mo e leggal bardugal faa mo maaya. Kaa jalooma majjum tata6oo mo wuurtan.

### No Inna Yaakuuba e Yuhanna jaagorii Iisaa

<sup>20</sup>Nden, inna 6i66e Jebede 6attini sukaabe mum Iisaa. Inna oo dicci yeeso Iisaa faa jaagoo dum ballal.<sup>21</sup> Iisaa wii mo:

—Kodum njid-daa?  
 Debbo oo jaabii mo, wii:  
 —Mido yidi podaa 6i66e am worfe didon bee njoodoo bannge maa so a laamiima, gooto wona bannge maa jaamo, goddo oo wona bannge maa nano.

<sup>22</sup> Iisaa jaabii, wii:  
 —On anndaa ko jaagoto-don. Odon mbaawi yarde horde mettunde nde njaran-mi ndee naa?

Be njaabii mo, 6e mbii:

—Midén mbaawi.

<sup>23</sup> O wii 6e:

—On njaran nde jaati. Kaa joodagol bannge am jaamo naa nano wanaa miin yamirta dum. Deen joolle, 6e Baabiraado am moyyinani bee njey dum.

<sup>24</sup> Nde taalibaabe sappo heddi6e bee nani dum ndee, mettaa e rimdaabe didon bee. <sup>25</sup> E oon wakkati, Iisaa noddi 6e fuu, wii 6e:

—Odon anndi laamiibe heeferbe ana kawjorii dum'en hawju bondö. Mawbe bee duu ana laamorii 6e laamu bodeejo. <sup>26</sup> Onon kaa, dum wadataa hakkunde moodon. So won jidfo teddeengal hakkunde mon, ana haani laataade golloowo moodon. <sup>27</sup> Kasen so won muuydo ardaade e mon, ana haani laataade maccudo moodon. <sup>28</sup> Dum nee, Bii Neddo wardaali faa gollanee, gollande yimbe wardi, hokkitira yonki mum yalla ana laatoo coottitaari heewbe.

### No Iisaa selliniri wumbe didon

<sup>29</sup> Nde Iisaa e taalibaabe mum njalti Yeriko ndee, jamaa keewdo jokki e makko. <sup>30</sup> Wumbe didon ana njoodinoo e sera laawol ngol, nani ana wiyee Iisaa annii bettoo, puudi wullude ana mbiya:

—Taanii Daawuuda, yurma min!

<sup>31</sup> Jamaa oo darii ana jahoo e maabbe ana wiya 6e ndeyyinoo, kaa 6e seydi wullude e6e mbiya:

—Moobbo, taanii Daawuuda, yurma min!

<sup>32</sup> Iisaa darii, noddi 6e, wii:

—Kodum njid-don mi wadana on?

<sup>33</sup> Be njaabii mo, 6e mbii:

—Moobbo, min mbumta.

<sup>34</sup> Iisaa yurminaa 6e, memi gite maabbe. Don e don 6e mbumti, 6e njokki e makko.

## 21

### No Iisaa naatiri Urusaliima

<sup>1</sup> Nde Iisaa e taalibaabe mum 6adinoo Urusaliima njottii Baytifaaji dow waamnde haayre wiyeteende Jaytun ndee, Iisaa neli taalibaabe didon, <sup>2</sup> wii 6e:

—Njehee naatoyee ngeenndi ngonndi yeeso mon ndii, oon wakkati fuu, on tawan ton ndakiwa e mola mum ana ka66ii. Kumton di ngaddanon kam. <sup>3</sup> So won biido on huunde, njaabo-don dum Moobbo ana haajaa di. Don e don on njoppete ngaddon di.

<sup>4</sup> Dum wadii yalla haala ka Laamdo yottinirnoo annabaajo oo kaa ana tabita nde oon wii:

<sup>5</sup> «Mbiye 6i66e Siyona:

Yeew, kaananke maa annii wara e maa,  
 ana leydinkinii, ana waddii tefeewa,

ana waddii mola tefeewa.» \*

<sup>6</sup> Oon wakkati, taalibaabe bee njehi ngadoyi ko Iisaa yamiri dum'en koo. <sup>7</sup> Be ngaddi ndakiwa ngaa e mola mum, 6e njappi e majji saayaaji maabbe, Iisaa waddii. <sup>8</sup> Ko 6uri heewde e jamaa oo weerti saayaaji mum'en e laawol. Wobbe kelti cafe ledde, mbeerti de e laawol ngol. <sup>9</sup> Ardiife Iisaa bee jaoku6e e caggal makko bee ana ilina ana mbiya:

—Jettooje ngoodanii taanii Daawuuda! Barke woodanii gardoowo e dow innde Joomiraadol! Jettooje ngoodanii Laamdo Toowdo!

<sup>10</sup> Nde o naati Urusaliima ndee, yimbe bee fuu keddi ana caaya ana mbiya:

—Homo woni oo gorko?

<sup>11</sup> Jamaa oo jaabii:

—Dum annabi Iisaa, iwrudo Nasaraatu ley leydi Galili.

### No Iisaa ribbirijaagotoobe ley Suudu Dewal Mawndu

<sup>12</sup> Iisaa naati daalaare Suudu Dewal Mawndu nduu, ribbi soodoobe e soottoobe wonbe ley mayre bee fuu, lisi taabe weccoobe kaalisi e joodorde soottoobe buugaaji. <sup>13</sup> Caggal dum, o wii bee:

—Ley Binndi dii Laamdo wii: «Suudu am noddirte suudu rewrudu Laamdo.»

Iisaa 6eydi hen, wii:

—Kaa onon, on ngadii ndu «suudorde yanoobe!»<sup>‡</sup>

<sup>14</sup> Wumbe e layoobe ngari e makko e ley Suudu Dewal Mawndu nduu, o sellini bee.

<sup>15</sup> Hooreebe yottinoobe sadaka bee e dunkee'en Sariya bee mettaa nde njii kulle kaayniide de o wadata dee, e nde nani sukaabe ana ilina e ley Suudu Dewal Mawndu ana mbiya:

—Jettooje ngoodanii taanii Daawuuda!

<sup>16</sup> Nden bee mbii Iisaa:

—A nanii ko cukaloy koy kaalata koo?

O wii bee:

—Mi nanii. Tama on janngali dum doo abada:

«A wadii fay sukaabe waddube e muynoobe ana njette»<sup>§</sup>

<sup>17</sup> Caggal dum, o seerti e maabbe, o yalti ngalluure ndee, o yehi Baytaniya, o waaloyi ton.

### No Iisaa huđiri ibbi

<sup>18</sup> Beeetee law omo wirfitoo to ngalluure too, tawi omo yolbi. <sup>19</sup> O soynii ibbi e sera laawol ngol, o fanji ki, kaa tawali e makki so wanaa haakolojo. Oon wakkati, o wii ki:

—Pati a rimu abada!

Don e don, ibbi kii yoori kolon. <sup>20</sup> Haaynii taalibaabe bee nde njii dum ndee, bee lamndii mo, bee mbii:

—Hono hen kii ibbi yoordi wakkati gooto tan?

<sup>21</sup> O jaabii bee, o wii:

—Mido haalana on goonga: so tawii odon ngoondini on cikkitaaki, on njawtan wadude ko ngadu-mi kii ibbi koo. On mbaawan wiide fay ndee doo waamnde haayre: «Doofa, saamoy ley maayo geeci», laatoto non. <sup>22</sup> So odon ngoondini, ko jaagi-don e ley duwaawu fuu on njaabante.

### Doyamiroore golle Iisaa iwri

<sup>23</sup> Iisaa naati Suudu Dewal Mawndu nduu. Nde mo waajotoo ndee, hooreebe yottinoobe sadaka bee e mawbe Yahuudiyankoobe bee battii mo, lamndii, mbii:

—Yamiroore hende ngollirtaa ko ngollataa koo? Kasen, dow yamiroore homo?

<sup>24</sup> Iisaa jaabii bee, wii:

—Miin duu, huunde wootere tan lamndotoo-mi on. So on njaabike kam, mi haalanan on jamirdo kam mi golla ko ngellan-mi koo. <sup>25</sup> Homo neli Yaayaa loota yimbe lootogal batisima? Laamdo naa yimbe?

Be ndawridi hakkunde maabbe, bee mbii:

—So en mbii «Laamdo», o wiyan: «Ndennoo, ko saabii so on ngoondinaali Yaayaa?» <sup>26</sup> Kaa so en mbii «yimbe», waajibi kulen jamaa oo, sabi yimbe bee fuu ana njogorii Yaayaa yo annabaajo.

<sup>27</sup> Be njaabii Iisaa, bee mbii:

—Min anndaa.

O jaabittii, o wii bee:

—Haya miin duu, mi haalantaa on yamiroore nde ngolliran-mi ko ngellan-mi koo.

### Bannadol haala rimdaabe didon

<sup>28</sup> Iisaa 6eydi hen wii:

—Kodum miilaton e ngol banndol: gorko gooto ana joginoo 6i6be worbe didon, 6adii arano oo, wii dum: «Bingel am, yaa golloy hannde to ngesa peguuje too.» <sup>29</sup> Biddu oo jaabii, wii yahataa. Kaa caggal mum, oon mimsiti yehi. <sup>30</sup> Baabiraado oo noddi 6iddo didabo oo, wii dum ko wiinoo arano oo koo. Oon duu jaabii, wii: «Moyyi Baaba», kaa yahaali. <sup>31</sup> Homo e maabbe woni jaabando baam mum ko wii koo?

Be njaabii, bee mbii:

—Arano oo.

Nden, Iisaa wii bee:

—Mido haalana on goonga: duwaaje'en bee kajum e bamfaaji dii adoyto on naatude e Laamu Laamdo oo. <sup>32</sup> Sabi Yaayaa warri e moodon, hollii on laawol fooccitaare, on njaabanaali dum. Kaa duwaaje'en bee kajum e bamfaaji dii ngoondinii mo. Haya duu, fay nde njii-don dum ndee, on mimsitaali so sakitii ngoondin-don mo.

### *Banndol haala remooōēe bonōē*

<sup>33</sup>—Kettinee banndol gonngol: nedđo gooto tuti ngesa peguuje, o filtini nga kokowol, o asi ngaykaare foosirde peguujam, o mahi suudu toowndu faa o soynoroo ko warata e ngesa ngaa. Caggal dum, o hasiri nga remooōēe gese peguuje, o dawi. <sup>34</sup> Faa tebugol peguuje yottii, o neli gollooōēe makko to remooōēe bee too, bē ngaddanova mo ngedū makko e bībōē peguuje dee. <sup>35</sup> Kaa remooōēe bee nanngi gollooōēe makko bēe, pii hen gooto, mbari gooto, mbardi gooto kaaye. <sup>36</sup> Jom ngesa oo neli e maābēe gollooōēe būrbe aranndeēēe bēe heewde. Remooōēe bee ngadī bēe no ngadūnood bee too nii. <sup>37</sup> O sakitii nelde bīyīkō gorko to maābēe, o wii: «No laatiifuu, bē njaaagoto bīyīam oo.» <sup>38</sup> Kaa nde remooōēe bee njii bīyīkō oo ndee, mbiyondiri e ko'e mum'en: «Oo woni donoowo mo. Ngaree mbaren mo, keddoro-den ngesa ngaa!» <sup>39</sup> Oon wakkati, bē nanngi mo, bē mbedii mo to caggal ngesa too, bē mbari mo. <sup>40</sup> Jooni nee, so jom ngesa peguuje oo warii, hono o wadata remooōēe bee?

<sup>41</sup> Be njaaabii mo, bē mbi:

— Been bonōēe, o halkiran bēe no boniri. O hasira ngesa ngaa remooōēe wobōē hokkoōēe mo ngedū makko e bībōē magga nde nga tebāa fuu.

<sup>42</sup> Caggal dum, Iisaa wii bē:

— Tama on njanngaali ko winndaa ley Binndi dīi koo?

«Haayre nde mahoōēe bee tippitii ndee,  
kajum laatii haayre būrnnde fuu teentilaade e maadi ndii.

Dum yo golle Joomiraado,

kanjum dum haaynde e jiile meeden!\*

<sup>43</sup> Saabe dum, mido wiya on: Laamu Laamdo oo ittete e mon, hokkee yimbē wadooōēe ko Laamdo yidi. <sup>44</sup> Nedđo fuu caamdo e nden haayre, helan. Nedđo fuu mo nde saami e mum, noyoto.

<sup>45</sup> Nde hooreeēēe yottinoōēe sadaka bēe e Farisa'en bēe nani banndi makko dīi ndee, paamii banndi dīi e mum'en peewti. <sup>46</sup> Eēēe tewta no bēe nanngira mo, kaa bēe kulii yimbē bēe, sabi bēe fuu eēēe njogorii mo annabaajo.

## 22

### *Banndol haala niiri yannge*

<sup>1</sup> Iisaa haaldiri e maābēe banndol kasen, wii bē:

<sup>2</sup> —Laamu Laamdo ana wa'i hono no kaananke kuurtinando bīyūm gorko, so wafani dum yanne. <sup>3</sup> O neli gollooōēe makko noddanova mo jaamoōēe, kaa gansaaēe bēe calii warde. <sup>4</sup> O neli kasen gollooōēe wobōē, o wii dum'en: «Mbiyee gansaaēe bēe niiri yannge ndii moyyinaama faa gasi, mi hirsii ga'i e nälbi paydī, hankasen fuu lanndinaama, bē ngara bē nootoo yanne oo.» <sup>5</sup> Kaa gansaaēe bēe koyni mo, kiinnii haajuuji mum'en: oo ngesa mum, oo jaagu mum. <sup>6</sup> Heddiibēe bēe nanngi gollooōēe bēe, torri bē, mbari bē. <sup>7</sup> Kaananke oo mettaa, neli sordaasi'en mum mbaroyi been jaadubēe ko'e, nduppi ngeenndi mum'en. <sup>8</sup> Caggal dum, o wii gollooōēe makko bēe: «Niiri yanne ndii moyyinaama, kaa gansaaēe bēe kaandaa e jaamde ndi. <sup>9</sup> Dum nee, njehée dow mbeddaajī mawdī dīi, noddon nedđo fuu mo kawru-don wara jaama niiri yanne oo ndii.» <sup>10</sup> Kaadime'en bēe njehée dow mbeddaajī dīi, noddi yimbē bēe tawi ton fuu gila e bonōēe faa e moyyuōēe faa galle dō yanne oo wadata doo heewi yimbē.

<sup>11</sup> Nde kaananke oo naati faa yiya noddaaēe bēe ndee, o soynii gorko mo paraaki. <sup>12</sup> O wii dum: «Gidam, hono naatir-daa foo tawi a paraaki?» Kaa oon deyyinii. <sup>13</sup> E ley dum, kaananke oo wii gollooōēe bēe: «Käbbee juude makko e koyde makko, tippo-don mo e ley nimre sella ndee, ton o wullata o qeryondira piliye.»

<sup>14</sup> Iisaa jokki wiide:

— Noddaaēe ana keewi kaa suħħaaēe ana pamdi.

### *Haala yobugol lampo*

<sup>15</sup> Farisa'en njehi ndawridoyi no tuufiranta Iisaa e ley haala mum. <sup>16</sup> Be neli yoga e taalibaāēe maābēe, kajum e howruuōēe Hirudus mbiya mo:

— Moobbo, minden anndi a goongirante: ada jannginira laawol Laamdo ngol goonga, a hulataa fay gooto, sabi a būrdintaa yimbē. <sup>17</sup> Dum nee, haalan min kodum anndu-dāa e dum doo: ana dagoo min ndokka kaananke Roma mawdō oo lampo naa dagaaki?

<sup>18</sup> Kaa Iisaa ana anndi anniyaajī maābēe bondi dīi. O wii bē:

— Onon naafiqi'en! Kodum wadi so odon tuufana kam? <sup>19</sup> Kollee kam kaalisi jofirteedo lampo oo.

Be ngaddani mo mbuuđu cardi gooto. <sup>20</sup> O lamndii bēe, o wii:

\* 21:42 Jabuura 118.22-23

—Natal homo e innde homo woni doo?

<sup>21</sup> Be njaabii mo, 6e mbii:

—Kaananke Roma.

O wii 6e:

—Ndennoo, ndokkee kaananke Roma oo ko jey, ndokkee Laamdo duu ko jey.

<sup>22</sup> Haaynii 6e nde 6e nani oo jaabu ndee. Be celi mo, 6e mbitti.

### *Haala immital maay6e*

<sup>23</sup> E ley oon jaloomaa jaati, yoga e waaldeSaduki'en ngari e lisaa. Kambe ngoni fennube immital. <sup>24</sup> Be lamndii mo, 6e mbii:

—Moobbo, Muusaa wii: «So neddo maayii he6aali 6iddo, mijum naa mawnum 6amta debbo dalaado oo, yalla ana he6ana dum 6eyngu.» \* <sup>25</sup> Wadiino e bettaade to amen rimdaa6e njeddon wor6e. Arano oo caggal dewlli, maayi he6aali 6iddo. Mijuko gorko 6amtii debbo makko oo, <sup>26</sup> kajum duu maayi he6aali 6iddo. Tata6o oo duu jokki hen faa yottii njedda6o oo. <sup>27</sup> Caggal ma6be 6e fuu, debbo oo duu maayi. <sup>28</sup> Nannde immital nee, homo e njeddon 6ee debbo oo laatotoo jom suudu mum? Sabi 6e fuu 6e bamiino mo.

<sup>29</sup> Lisaa jaabii 6e, wii:

—On majiji, sabi on paamaali Binndi dii, on anndaa baawde Laamdo dee duu. <sup>30</sup> Sabi so maay6e immitike, wor6e 6amataa, rew6e 6amataake, 6e laatoto hono no malaa'ika'en won6e dow kammu 6ee nii. <sup>31</sup> E haala immital maay6e, tama on njanngaali ko Laamdo wii on koo? O wii: <sup>32</sup> «Miin woni Laamdo Ibarahiima, Laamdo Isiyaaka, Laamdo Yaakuuba.» † Laamdo yo Laamdo wuurr6e, wanaa Laamdo maay6e.‡

<sup>33</sup> Waaju makko oo haaynii yimbe hettindotoo6e mo 6ee fuu.

### *Haala yamiroore burnde fuu teentilaade*

<sup>34</sup> Nde Farisa'en 6ee nani o mu66ii kundude Saduki'en 6ee e haala ndee, 6e kawriti.

<sup>35</sup> Gooto e ma6be jannginoow Sariya yidi tuufande mo, lamndii mo, wii:

<sup>36</sup> —Moobbo, honde woni yamiroore burnde fuu teentilaade e ley Tawreeta?

<sup>37</sup> Lisaa jaabii mo, wii:

—Yidir Laamdo Joomiraado maa 6ernde maa fuu e yonki maa fuu e hakkille maa fuu. §

<sup>38</sup> Nden woni yamiroore burnde mawnude, burnde teentilaade. <sup>39</sup> Yamiroore difabere hono mayre annii: «Njidraa tanaa maa no njidir-daa hoore maa nii.» \* <sup>40</sup> Tawreeta Muusaa e dewte annabaab6e dee fuu e deen jamirooje didi pawii.

### *Kabaaru Almasiiihu e Daawuuda*

<sup>41</sup> Nde wonnoo Farisa'en 6ee ana kawriti, lisaa lamndii 6e, wii:

<sup>42</sup> —Kodum miilu-don e Almasiiihu oo? O taanii homo?

Be njaabii, 6e mbii:

—O taanii Daawuuda.

<sup>43</sup> O wii 6e:

—Ndennoo, hono Daawuuda noddirta mo Joomiraado? Ruuhu Laamdo anndini mo dum, saabe majjum o wii:

<sup>44</sup> «Joomiraado wii Joomam:

Jooda jaamo am,

faa mi wada njaa6aa way6e maa.» †

<sup>45</sup> So Daawuuda ana noddira mo «Joomam», ndennoo, hono mo laatortoo taanum tan?

<sup>46</sup> Be fuu 6e ndonki jaabaade mo fay karrol. Gila jannde nden, fay gooto suusaali lamndaade mo lamndi goddi.

## 23

### *No lisaa feliri dunkee'en Sariya e Farisa'en*

<sup>1</sup> Nden, lisaa wii jamaa oo e taalibaab6e mum 6ee:

<sup>2</sup> —Dunkee'en Sariya 6ee e Farisa'en 6ee kajum'en ndokkaa jannginde Sariya Muusaa oo.

<sup>3</sup> Saabe dum, odon kaani jabande 6e, ngadon huunde fuu ko 6e mbii on. Kaa pati piemmbon golleeji ma6be, sabi 6e ngadataa ko 6e mbaajotoo koo. <sup>4</sup> Be ka66an donnege teddude, 6e mbakkina yimbe, kaa 6e njidaa wallirde 6een huncude de fay hoore fedeendu. <sup>5</sup> Huunde fuu ko 6e ngadata, 6e ngadiran dum faa 6e kollinkino. Dum wadi so ebe ka66a talki mawdi, ebe njuitina cilmbi saayaaji ma6be faa ana ndasoo. <sup>6</sup> Ebe njidi joolle burde teddude so 6e nondamaa e yanngheeji, ebe njidi joolle burde yiitinkinaade ley cuudi baajordi. <sup>7</sup> Ko 6e njidi

\* 22:24 Fillitagal Tawreeta 25.5    † 22:32 Pergu 3.6    ‡ 22:32 Gila e jamaanu Muusaa tawi Ibarahiima e Isiyaaka e Yaakuuba maayii gila ko 6oooyi. Ko Laamdo wii yo Laamdo ma6be koo, holli e6e nguuri.    § 22:37 Pergu 6.5    \* 22:39 Lewinkoo6e 19.18    † 22:44 Jabuura 110.1

tan salmineede calminaali teddudi ley luumooji e noddoreede «Moobbo». <sup>8</sup> Kaa onon, pati njabée noddoreede «Moobbo», sabi on fuu on sakiraabé, Moobbo gooto tan njogi-don. <sup>9</sup> Pati mbiyee fay gooto «Baabiraado» e aduna, sabi Baabiraado gooto tan njogi-don, dum woni gondo dow kammu oo. <sup>\*</sup> <sup>10</sup> Pati njabée noddireede «Hooreejo», sabi Hooreejo gooto tan njogi-don, dum woni Almasihu oo. <sup>11</sup> Burdo teddude hakkunde moodon yo laato gollanoowo heddiibé bee. <sup>12</sup> Toownudo hooree mum fuu, leydinte. Leydinkinido fuu toownete.

<sup>13</sup> Bone yanan e mon onon dunkee'en Sariya e Farisa'en, naafigi'en! Odon cokana yimbe damal Laamu Laamđo ngal. On naatataa, on accataa naatoobe naata. [ <sup>14+</sup> ]

<sup>15</sup> Bone yanan e mon, onon dunkee'en Sariya e Farisa'en, naafigi'en! Odon njiiloo e leydeele odon mbanngoo geeci faa kebón tuubudo gooto. So on kebii dum, mbirfito-don kasen, ngadon dum bii jahannama faa sowa on cili didi.

<sup>16</sup> Bone yanan e mon, onon wumbe dwoobe yimbe! Odon mbiya: «So neddo hunorike Suudu Dewal Mawndu nduu yo meere, kaa so hunorike kanjje Suudu Dewal Mawndu oo, hunoore mum nanngan dum.» <sup>17</sup> Majjuše, wumbe! Kodum ūuri teentilaade: kanjje oo naa Suudu laăăinooru kanjje oo nduu? <sup>18</sup> Odon mbiya kasen: «So neddo hunorike ittirde sadaka ndee yo meere, kaa so hunorike sadaka gondo dow mayre oo, hunoore mum nanngan dum.» <sup>19</sup> Wumbe! Kodum hen ūuri teentilaade: sadaka oo naa ittirde sadaka laăăinoore sadaka oo ndee? <sup>20</sup> Ndennoo, neddo fuu kunoriido ittirde sadaka ndee, hunorike nde kayre e huunde fuu ko fawii e mayre. <sup>21</sup> Neddo fuu kunoriido Suudu Dewal Mawndu nduu, hunorike ndu kayru e Laamđo joocido e mayru oo. <sup>22</sup> Neddo fuu kunoriido kammu oo, hunorike joodorgal Laamđo ngal e Joodiido e maggal oo.

<sup>23</sup> Bone yanan e mon, onon dunkee'en Sariya e Farisa'en, naafigi'en! Odon ittana Laamđo jakka naanaa, kajum e haakolooj godđi, kaa odon njeeboo ko ūuri teentilaade e Sariya oo koo, hono fooccitaare e yurmeende e goondinal. Tawee nee, kajum kaanno-don waadude tawee on njeebaaki ko heddi koo. <sup>24</sup> On wumbe dwoobe yimbe! So 6owngu saamii e njaram moodon, on ciiwan itton dum, tawee nee, odon moda ngelooba!

<sup>25</sup> Bone yanan e mon, onon dunkee'en Sariya e Farisa'en, naafigi'en! Odon lawya caggal kore loode e caggal lehoy, tawee nee ley mum'en ana heewi ko wujja e ko yanaa. <sup>26</sup> Farisanke bumđo! Lawyu ley kore loode tafon, nden caggal ngal duu laađan.

<sup>27</sup> Bone yanan e mon, onon dunkee'en Sariya e Farisa'en, naafigi'en! Odon nanndi e janaale dawninaafe, de dow mum'en woodi tawee ley mum'en ana heewi gi'e e ko sođi fuu. <sup>28</sup> Onon duu hono non mbaa-don: e jiile gite odon nanndi e fooccitiibe, kaa ley moodon ana wii pep naafigaaku e ooyaare.

<sup>29</sup> Bone yanan e mon, onon dunkee'en Sariya e Farisa'en, naafigi'en! Odon mahana annabaabe bee cuudi dow janaale mum'en, odon njardina janaale fooccitiibe bee, <sup>30</sup> mbirfito-don mbiyon: «Siindo min kawrii e jamaanu njaatiraabe amen, min ittidataano e maăăe yonkiji annabaabe dii.» <sup>31</sup> Hono non, ceettori-don onon jaati on 6iibbe warannoobe annabaabe bee. <sup>32</sup> Ndennoo, kebbintinee saawal golleeji bondi di njaatiraabe mon pufsunoo dii! <sup>33</sup> Bolle, 6iibbe posoke! Hono fuu miilorto-don waasude wedeede e jahannama? <sup>34</sup> Dum saabii, mido nelda on annabaabe e hakkilanteebe, kajum e jannginoobe. Mbaron yoga, penjon yoga, piyon yoga dorri e ley cuudi mon baajordi, njokkon dum'en ngeenndi e ngeenndi. <sup>35</sup> Yalla yonkiji laăăube ittaadi e aduna oo dii fuu, hakke mum ana fitoo on, gila yonki Haabiila poocciitido oo faa yonki Jakariyaa bii Barakiya mo mbardon hakkunde Suudu Dewal Mawndu e ittirde sadaka oo. <sup>36</sup> Mido haalana on goonga: jukkungo majum dum fuu e yimbe oo jamaanu saamata!

### No Iisaa sujlrani yimbe Urusaliima

<sup>37</sup> —Hay yimbe Urusaliima, on mbarii annabaabe, on mbardii nelaabe e mon kaaye! Cili kuurdii njisu-mi hawrintinde 6iibbe mon no cofal hawrintinirta 6iibbe mum ley biifoole mum nii. Kaa on njabáali. <sup>38</sup> Dum nee, on daldete e Suudu mon Dewal, ndu laatoo saabeere. <sup>39</sup> Mido wiya on: on njiyataa kam gila jooni faa wakkati mo mbiyoyton e mum: «Barke woodanii gardoowo e dow innde Joomiraadol!»

## 24

### Haala taagumansaaji kollooji timmooke aduna

<sup>1</sup> Nde Iisaa yaltunoo Suudu Dewal Mawndu ndee, taalibaabe mum 6attitii dum, kolli dum maadiiji galle mayru dii. <sup>2</sup> O wii 6e:

\* <sup>23:9</sup> Pati mbiyee fay gooto «Baabiraado» e adunawiyaali pati nedđo soowa baaba mum dimđo dum. Ngol haali haala hooreeëe diina fonnduëe ko'e mum'en e baabiraaku Laamđo. † <sup>23:14</sup> Efereeji 6ooydi dii, yoga ana 6eyda aaya 14: Bone yanan e mon, onon dunkee'en Sariya e Farisa'en, naafigi'en! Odon teeta cuudi rewbe 6e worbe mum'en maayi, odon njuutina duwaawuuji moodon yalla odon manee. Saabe majum, on kefan jukkungo 6urngo fuu naawde.

—On njii dum doo fuu naa? Mido haalana on goonga: fay haayre wootere heddataako doo ana fawii dow wonnde, fuu wurjinte.

<sup>3</sup> Nde Iisaa joodinoo dow waamnde haayre wiyyeteende Jaytun ndee, taalibaabe makko ngari e makko kajum'en tan, mbii mo:

—Humpit in min nde dum waadata. Taagumansa homo hollata gartol maa, kajum e timmooke aduna?

<sup>4</sup> O jaabii 6e, o wii:

—Ndeentee pati fay gooto yojna on. <sup>5</sup> Sabi heewbe ngardan innde am, gooto e mum'en fuu wiya: «Miin woni Almasiihu oo.» Be yojnan heewbe. <sup>6</sup> On nanan golowole e kabaaru golowole kaa pati kulee! Ana tilsi dum wada, kaa dum wanaa timmooke tafon. <sup>7</sup> Lepol haaban e lejol, laamu haaban e laamu. Yolbereejii ngadan, leydi dimmboto e nokkuuje yogaaje. <sup>8</sup> Dum kaa fuu hono no puddoode qatawre feynoowo nii.

<sup>9</sup> Nden, yimbe nafan on e caririd yalla odon torree, mbare-don. Leji dii fuu mbajan on saabe am. <sup>10</sup> Oon wakkati, heewbe njoppan goondinal mum'en, ana njammbondira ana mbajondira e ko'e mum'en. <sup>11</sup> Annabaabe peneeb e heewbe banngan, yojna heewbe. <sup>12</sup> Bonanndaaji keewan faa jilli yimbe heewbe buuista. <sup>13</sup> Kaa mujudo faa timmooke, joomum hisinte. <sup>14</sup> Oo doo Kabaaru Lobbo haala Laamu Laamdo oyynete e aduna oo fuu, yalla leji dii fuu ana keba seedaaku oo. Nden, aduna timmata.

### *Haala torra mawdo gadwo*

<sup>15</sup> —Nde njii-don «huunde harmunde bonnde»,<sup>\*</sup> ko annabi Daniyel haalnoo koo ana e nokku ceniido oo<sup>†</sup> (janngudo dum, tiinnoo faama)<sup>16</sup> nden, tawaabe ley Yahuudiya fuu yo ndogu peewa baamle kaaye. <sup>17</sup> Tawaado dow bene, pati wiya baman kaaki ley suudu mum. <sup>18</sup> Tawaado gese, pati wirfoo so wiya bamoowo saaya mum. <sup>19</sup> Bone yanan e haamili'en e muyninoobe ley deen palaade!<sup>20</sup> Naagee Laamdo pati doddu mon laatoo wakkati dabbunde naa jalaande fowteteende. <sup>21</sup> Sabi nden, torra mawdo wadan mo hono mum wadaali gila puddoode aduna, hono makko wadataa abada kasen. <sup>22</sup> Sinndo tawiino deen jalaade ndabbininaaka, fay gooto e 6ibbe aadama hisataano. Kaa Laamdo raabbininirii de sabaabu 6e o subii 6ee. <sup>23</sup> E oon wakkati, so won biido on: «Yeewee! Almasiihu annii doo», naa «Omo naa too», pati ngoondinee. <sup>24</sup> Sabi almasiihu'en peneeb e annabaabe peneeb banngoyan, 6e ngada taagumansaaji mawdi e kaayefiji yalla ebe majjina fay subaab 6ee, so 6e mbaawii. <sup>25</sup> Paamee gasa. Mi haalanii on gila dum waraali. <sup>26</sup> So won biido on: «Yeewee, omo naa to ley cuudi too», pati ngoondinee. <sup>27</sup> Hono no majere foynirta kammu gila funnaange faa hiirnaange nii, hono non Bii Neddo oo wardata. <sup>28</sup> Do jiibe ngoni fuu, don dute kawritata.

### *No Bii Neddo oo wartirta*

<sup>29</sup> —Don e don, caggal torra ley deen jalaade, naange niibban, lewru noottan yaaynude, koode kammu caaman, kulle gonde dow kammu dee ndimmboto.<sup>‡</sup> <sup>30</sup> E oon wakkati, taagumansa Bii Neddo oo banngan e mbeeyu, leji aduna dii fuu ngullan. Be njiyan Bii Neddo oo, ana wara e duule, ana warda baawde mawde e teddeengal. <sup>31</sup> Buututal mangal fuufete, o nela malaa'ika'en makko funnaange e hiirnaange, saahal e baleeri, moobta subaab 6ee gila hoore leydi faa hoore leydi.

<sup>32</sup> Taykitee ibbe: so caabe majje keydfiti, haakolooji majje mbillitti, odon anndi ndunngu badike. <sup>33</sup> Hono non, so on njii dum fuu, anndee wakkati oo 6attiima, omo damal galle. <sup>34</sup> Mido haalana on goonga: oo jamaanu timmataa tawee kudde dee fuu ngadaali. <sup>35</sup> Kammu e leydi timman, kaa haalaaji am dii timmataa abada.

### *Haala timmooke aduna*

<sup>36</sup> —Kaa nden jalaande e oon wakkati fay gooto anndaa dum, wanaa malaa'ika'en wonbe dow kammu, wanaa Biddo oo. Walaa annduso dum so wanaa Baabiraado oo. <sup>37</sup> No jamaanu Nuuhu nii, hono non nanndata so Bii Neddo oo ana wara. <sup>38</sup> E ley deen jalaade fade ilam tuufaanu dam warde, yimbe ana jaama, ana njara, ana ndewla, ana ndewlee, faa jannde Nuuhu naati laana kaa. <sup>39</sup> Be miilaali, 6e njaalaali faa ilam tuufaanu dam wari yooli 6e fuu. Garol Bii Neddo oo hono non nanndata. <sup>40</sup> E oon wakkati, worbe didon undoo6e dow unirde wootere, gooto mum'en nabete, goddo oo yoppee. <sup>41</sup> Rewbe didon undoo6e dow unirde wootere, gooto mum'en nabete, goddo oo yoppee. <sup>42</sup> Ndennoo, njeertee, sabi on anndaa wakkati mo Joomiraado mon warata. <sup>43</sup> Paamee dum doo: sinndo jom galle ana annduno wakkati mo guijjo warata ley jemma, daanataako yoppataa o naata galle mum. <sup>44</sup> Dum nee, onon duu lanndinee, sabi Bii Neddo oo waran e wakkati mo on milaali.

\* <sup>24:15</sup> Daniyel 9.27; 11.31; 12.11    † <sup>24:15</sup> Doo Iisaa haali ko annabi Daniyel sappino: kaanane gooto wattan toor e ley Suudu Dewal Mawndu Yahuudiyanoo. Ko o sappino koo wadii gila Iisaa finaalii. Jooni Iisaa wii hono majjum wortan kasen.    ‡ <sup>24:29</sup> Esaaya 13.10; 34.4, Yo'il 2.10

*Haala golloowo koolniido, kajum e golloowo bondo*

<sup>45</sup> —Ndennoo, homo woni golloowo koolniido, hakkilante? Oon woni mo kalfaado mum halfini dum koreejii mum faa hokka dum'en nguure mum'en e wakkati jidaado. <sup>46</sup> Golloowo mo kalfaado mum warti tawi ana hiinnii golle mum, welii hoore. <sup>47</sup> Mido haalana on goonga: kalfaado oo halfinan mo jawdi mum fuu. <sup>48</sup> Kaa so golloowo oo yo bondö, wii e hoore mum kalfaado mum booyan wartaali, <sup>49</sup> hedde ana fiya waayiraabe mum golloobe 6ee, ana jaamda ana yarda e sigiroobé, <sup>50</sup> nden, kalfaado oo wartiran jalooma mo golloowo oo anndaae e wakkati mo o milaali, <sup>51</sup> jukka mo jukkungo naawngo, watta mo hakkunde naafig'i'en, ton o wullata o ñeryondira jikiye.

## 25

*Banndol haala surbaybe sappo*

<sup>1</sup> —Laamu Laamdo oo nanndan e oo janta: surbaybe sappo 6ambe moottilaaji mum'en so njehi jaaboyaade jommbaajo gorko. <sup>\*</sup> <sup>2</sup> Njoyon bee yoyaa, njoyon woobbe bee ana yoyi. <sup>3</sup> Be yoyaa bee bami moottilaaji tawi njooðaaki bulannga, <sup>4</sup> yoyube bee noo naðori paali bulannga. <sup>5</sup> Nde jommbaajo oo jenngi waraali ndee, 6e fuu 6e ñoñi, 6e daanii. <sup>6</sup> Faa hejjere jemma, wullaango nanaa, wii: «Jommbaajo oo wari! Njaltee! Njaaboyee mol!» <sup>7</sup> Nden 6e fuu 6e pini, ebe moyyina moottilaaji maabbe. <sup>8</sup> Surabaybe 6e yoyaa bee mbii yoyube bee: «Ndokkoree min e bulannga mon mo njooði-don oo, sabi moottilaaji amen annii ñifa.» <sup>9</sup> Yoyube bee mbii: «Huþindaaki, sabi ko min njogii koo hejjataa en, en fuu. Njehee to soottoobe, coodoyon!» <sup>10</sup> E ley no 6e yoyaa bee njaari soodoyde bulannga nii, jommbaajo oo yottii. Lanndininoobe bee naatidi e makko e ley dammbordu nduu, damal ngal uddaa. <sup>11</sup> Faa booyi seeda, surbaybe heddiibe bee ngarti, hedde ana ngulla ana mbiya: «Kalfaado, kalfaado, udditan min!» <sup>12</sup> Kaa o jaabii 6e, o wii: «Mido haalana on goonga: mi anndaa on.»

<sup>13</sup> Iisaa sakitii wiide:

—Njeertee, sabi on anndaa nalaande naa e wakkati mo Bii Neddo warata e mum.

*Banndol haala golloobe taton*

<sup>14</sup> —Laamu Laamdo ana nanndi e gorko lanndinido faa dawa, noddi golloobe mum, halfini dum'en jawdi mum. <sup>15</sup> O halfini gooto maabbe mutakal teemedere joy kanjne, goddo teemedere didi, tataðoo oo teemedere, gooto fuu ko waarata e mum. Caggal dum, o dawi. Don e don, <sup>16</sup> golloowo keþudo mutakal teemedere joy kanjne oo yehi jaagoroyii mo, tinorii mutakal teemedere joy godde. <sup>17</sup> Kalfinaado mutakal teemedere didi kanjne oo duu wadi non, tinorii kapjum duu mutakal teemedere didi godde. <sup>18</sup> Kaa kalfinaado mutakal teemedere kanjne oo yehi asoyi ngayka, iri ton ko kalfaado mum oo hokkunoo dum koo.

<sup>19</sup> Faa booyi caggal mum, kalfaado maabbe oo warti noddi 6e, o yeewi jate maabbe. <sup>20</sup> Kalfinaado mutakal teemedere joy kanjne oo wari, waddi mutakal teemedere joy godde, wii: «Kalfaado am, mutakal teemedere joy kalfin-daa kam, ede nii. Yeew, mi tinorike de mutakal teemedere joy godde.» <sup>21</sup> Kalfaado makko oo wii mo: «Golle maa gasii sanne golloowo lobbo, koolniido. Nde wonnood a hoolnike e ko famdi, mi halfinte ko teentili sanne. War naatu faa ceyodo-den!» <sup>22</sup> Golloowo kalfinaado mutakal teemedere didi kanjne oo wari kapjum duu, wii: «Kalfaado am, mutakal teemedere didi kanjne kalfin-daa kam, ede nii. Yeew, mi tinorike de mutakal teemedere didi godde.» <sup>23</sup> Kalfaado makko oo wii mo: «Golle maa gasii sanne golloowo lobbo, koolniido. Nde wonnood a hoolnike e ko famdi, mi halfinte ko teentili sanne. War naatu faa ceyodo-den!» <sup>24</sup> Kalfinaado mutakal teemedere kanjne oo wari kapjum duu, wii: «Kalfaado am, mido annduno a gorko tiidudo alhaali: ada hetta ko a aawaali, ada mooosta ko a tutaali. <sup>25</sup> Saabe dum, mi hulii, njaa-mi iroy-mi kanjne maa oo. Haya, fii maa anni!» <sup>26</sup> Kalfaado makko jaabii mo, wii: «Golloowo laaliido, nattudo! So tawii ada annduno mido hetta ko mi aawaali, mido mooðta ko mi tutaali, <sup>27</sup> ndennoo, ada haanloo waduge kanjne am oo e banki, yalla ana daya ko tinorii-mi so mi wartyoii. <sup>28</sup> Jooni, teetee mo mutakal teemedere kanjne oo, ndokkon dum jom mutakal teemedere joy kanjne oo. <sup>29</sup> Sabi jogiido fuu beydante faa heewa. Kaa mo walaa, fay seeda mo jogii oo teetete. <sup>30</sup> Golloowo meereejo oo kaa, mbedee dum e ley nimre sella ndee, ton o wullata o ñeryondira jikiye.»

*No Bii Neddo oo sarirtayimbe fuu*

<sup>31</sup> —So Bii Neddo oo warii e teddungal mum, kapjum e malaa'ika'en 6ee fuu, o joodoto e joodorgal makko laamu ngal. <sup>32</sup> Yimbe aduna 6ee fuu moõbtete yeeso makko, o faltoroó 6e no duroovo faltortoo baali e be'i nii: <sup>33</sup> o wadan baali dii e junngo makko jaamo, o wada be'i dii e junngo makko nano. <sup>34</sup> Hono nii, Kaananke oo wiirata wonõe junngo mum

\* **25:1** E neesu Yahuudiyankooõe jommbaajo gorko ana yaadannoo e gidiraabe jom suudu mum, sabi kapjum'en ndammbotoo.

jaamo bee: «Ngaree, onon barkinaabe Baabiraado am, nannghee laamu mo ndesane-don gila e puussoode aduna oo. <sup>35</sup> Sabi mi yolbiino, on jaamminii kam, mi domdiino, on njarnii kam, mi latinoke kodo, on njippinii kam, <sup>36</sup> mi holiino, on koltinii kam, mi jawaiiino, on njandinii kam, mi uddanooma kasu, on yeewoyii kam.» <sup>37</sup> E oon wakkati, fooccitiibe bee njaabootoo mo, mbiya: «Joomiraado, mande min njii maa ada yolbi, min jaammin maa naa ada domdi, min njarnu maa? <sup>38</sup> Mande min njii maa a kodo, min njippin maa naa a koldo, min koltin maa? <sup>39</sup> Mande min njii maa a jawdo naa a uddaado kasu, min ngari yeewde ma?» <sup>40</sup> Kaananke oo jaaboo bee wiya: «Mido haalana on goonga: ko ngadan-don gooto e burdo famdude e sakiraabe am bee, yo miin ngadan-don.»

<sup>41</sup> Caggal dum, o wiyan wonbe junngo makko nano bee: «Ngoddee kam, onon hudaabe Laamfo! Njehee ley yiite duumiinge nge Laamfo resani Ibiliisa e malaa'ika'en mum ngee! <sup>42</sup> Sabi mi yolbiino, on jaamminaali kam, mi domdiino, on njarnaali kam, <sup>43</sup> mi kodo, on njippinaali kam, mi koldo, on koltinaali kam, mi jawdo naa mi uddanooma, on ngaraali yeewde kam.» <sup>44</sup> Nden, be njaaboto mo kambe duu be mbiya: «Joomiraado, mande min njii maa ada yolbi naa ada domdi naa a koldo naa a jawdo naa ada uddaa kasu, min paabaaki ma?» <sup>45</sup> O jaaboto bee o wiya: «Mido haalana on goonga: ko mbaasus-don wadande gooto e bee doo burbe famdude koo, miin woni mo on ngadanaali.» <sup>46</sup> Nden, been njaha e jukkungo duumiingo, fooccitiibe bee keba nguurndam nduumiisdam.

## 26

### No mawbe diina ndawriri faa nannga Iisaa

<sup>1</sup> Nde Iisaa timmini diin waajuuji fuu ndee, wii taalibaabe mum bee:

<sup>2</sup> —Odon anndi balde didi palii en e iidi Paska, Bii Neddo oo hokkitirte tontee e leggal bardugal.

<sup>3</sup> E oon wakkati, hooreeb ee yottinoobe sadaka e mawbe Yahuudiyanchoobee bee kawritoyi galle Jottinoowo Sadaka Mawdo biyeteedo Kayafas. <sup>4</sup> Be fuu be ndawridi faa be njamm-boro Iisaa hiila, be mbara dum. <sup>5</sup> Kaa be mbii:

—Pati ngaden dum ley iidi oo so yimbe bee murta.

### No Iisaa wujiraa nebam uuroojam

<sup>6</sup> Nde wonnoo Iisaa ana Baytaniya do galle Simon ceppaad oo doo, <sup>7</sup> debbo gooto battitii dum ana jogii faandu nebam uurojam, tiidudam coggu sanne. O tawi Iisaa ana jaama, o wuji dam dow hoore mum. <sup>8</sup> Nde taalibaabe bee njii dum ndee, mettaa, ana mbiya:

—Ko woni oo bonannda meere meere? <sup>9</sup> Edam waawnoo sootteeede kaalisi keewdo, kaalisi oo hokkee misikiina'en.

<sup>10</sup> Iisaa faami ko be kaalannoo koo, wii be:

—Ko saabii so odon torra oo debbo? O gollanii kam golle njarfudo. <sup>11</sup> Sabi misikiina'en ana tawdee e mon jaannde fuu. Kaa miin, mi tawdataake e mon jaannde fuu. <sup>12</sup> O wujii terde am nebam uurojam, ko o wadiri dum yalla omo lanndinanoo kam yanaande. <sup>13</sup> Mido haalana on goonga: do Kabaaru Lobbo waajaa e aduna oo fuu, ko oo debbo waci koo jantete, kasen duu o miccitete.

### No Yahuuda jammbari Iisaa

<sup>14</sup> Nden Yahuuda Isikariyota, gooto e taalibaabe sappo e didon bee, yehi to hooreeb ee yottinoobe sadaka, <sup>15</sup> wii dum'en:

—Ko ndokkaton kam so mi waddanii on Iisaa?

Be njakkii buudi capantati cardi, be ndokki mo. <sup>16</sup> Gila nden, omo fiya dabare no o jammibortoo Iisaa.

### No Iisaa hiirtidori e taalibaabe mum hiraande iidi Paska

<sup>17</sup> E jaloomaa arano iidi mo buuru yuufinaaka, taalibaabe bee ngari, lamndii Iisaa, mbii dum:

—Hoto njid-daa min lanndinoyoo hiraande iidi Paska ndee?

<sup>18</sup> O jaabii be, o wii:

—Njehee ngeendii too, naaton galle maani, mbiyon dum: «Moobbo wii, wakkati mum yonii, e galle maa oo wadata iidi Paska oo, kanko e taalibaabe makko.»

<sup>19</sup> Taalibaabe bee ngadi ko Iisaa yamirnoo dum'en koo, lanndinii hiraande ndee.

<sup>20</sup> Hiiri, o joododii e taalibaabe sappo e didon bee faa be kirtoor. <sup>21</sup> Nde be kirtotoo ndee, o wii:

—Mido haalana on goonga: gooto moodon jammiboto kam.

<sup>22</sup> Be cunli sanne, hedde ebe lamndoroo mo gooto gooto, gooto fuu ana wiya:

—Moobbo, kori wanaa miin?

<sup>23</sup> O jaabii, o wii:

—Tummbididdo e am junngo mum e la'al oo, oon jammabootoo kam. <sup>24</sup> Waajibi Bii Neddo dalira aduna no haaliraa ley Biindi dii nii. Kaa bone woodanii jammabootodo Bii Neddo oo! Oon gorko, so rimanooka fey furi moyyande dum.

<sup>25</sup> Yahuuda garoowo jammaade mo oo 6ami haala, lamndii mo, wii:

—Moobbo, kori wanaa miin?

O jaabii dum, o wii:

—Aan haaldi hunduko maa.

<sup>26</sup> Nde 6e jaamata ndee, Isaa 6ami buuru, yetti Laamdo, helti, hokki taalibaafe mum 6ee, wii:

—Nannghee, jaamee, dum yo terde am.

<sup>27</sup> Caggal dum, o 6ami horde peguujam, o yetti Laamdo, o hokki 6e, o wii:

—On fuu, njaree hen. <sup>28</sup> Dum yo yiyyam am, yiyyam tabintinoojam aadi keyri, njuppor-toodam saabe heewbe faa luutti njaafee. <sup>29</sup> Mido wiya on: abada mi yarataa dam peguujam kasen so wanaa nannde njardoy-den peguujam kesam e ley LaamuBaabiraado am.

<sup>30</sup> Caggal 6e njimii Jabuura, \* 6e njalti, 6e njehi waamnde haayre wiyeteende Jaytun.

*No Isaa sapporii Piyeer yankiran dum*

<sup>31</sup> E oon wakkati, Isaa wii 6e:

—E ley oo jemma jaati, on fuu on njoppan kam, sabi ana winndii: «Mi fiyan duroowo oo, mi wara dum, sewre baali ndee saakoo.»<sup>†</sup>

Isaa 6eydi hen, wii:

<sup>32</sup> —Kaa caggal mi wuurtii, mi adoyo on Galili.

<sup>33</sup> Nden Piyeer 6ami haala, wii mo:

—Fay so 6e fuu 6e njoppu maa, miin kaa abada mi yoppataa ma.

<sup>34</sup> Isaa jaabii mo, wii:

—Mido haalane goonga: jemma hannde oo jaati, fade ndontoori jogginde a wiyan a anndaa kam cili tati.

<sup>35</sup> Piyeer wii mo:

—Fay so tilsi mi maaydan e maa, abada mi wiyatataa mi anndaa ma.

Taalibaafe 6ee fuu mbii hono non.

*No Isaa jaagorii Laamdo ley Gecemane*

<sup>36</sup> Caggal dum, Isaa yottodii e ma66e nokku biyeteedo Gecemane, wii 6e:

—Njooddee doo, faa mi wadoya too duwaawu.

<sup>37</sup> O yaadi e Piyeer e 6i66e Jebede didon 6ee, 6ernde makko fusdi maatude yoomeende e ruubu. <sup>38</sup> E ley dum, o wii 6e:

—Yoomeende ana mawni e am sanne faa ana ndaara warde kam. Keddee doo, njeertodee e am pati daano-don.

<sup>39</sup> O wodditiis seeda, o hippii e leydi, omo duwoo, omo wiya:

—Baabiraado, so tawii ana laatoo, woddinam ndee horde bone. Kaa pati laatoroo no njidfir-mi, yo laatoro no njidfir-daa aan.

<sup>40</sup> O warti, o tawi ebe daanii. O wii Piyeer:

—On mbaawaa jeertodaade e am tawee on daanaaki fay wakkati gooto naa? <sup>41</sup> Pati daanee, nduwee, pati on ceyte. Sabi hakkille ana heewi anniya lobbo, kaa terde ana lo'i.

<sup>42</sup> O yehi kasen, o duwii, o wii:

—Baabiraado, so tawii nden horde bone waawaa woddineede so wanaa mi yara dum, yo sago maa wadu!

<sup>43</sup> O warti, o tawi 6e daantike, sabi doydi ana piilii e ma66e. <sup>44</sup> O yehi kasen, o duwii tataferde hono no o duworinoo nii. <sup>45</sup> Caggal dum, o warti e taalibaafe 6ee, o wii dum'en:

—Faa jooni odon daanii odon njootinoo? Yeewee, wakkati oo yottike! Bii Neddo oo wadete e juude luuttoobe. <sup>46</sup> Immee njehen! Yeewee, jammabootodo kam oo annii wara!

*No Isaa nanngiraa*

<sup>47</sup> O tilaaki haalde, faa Yahuuda, gooto e sappo e didon 6ee, yottii ana wondi e yim6e heewbe jogiise kaafaaje e cabbi. Hooreebi yottino6e sadaka 6ee e mawbe Yahuudiyaniko6e 6ee neli 6e. <sup>48</sup> Jammabootodo mo oo hokki be finnde, wii:

—Neddo mo guccii-mi fuu, oo woni kanko. Nannghee dum.

<sup>49</sup> Don e don, Yahuuda battitii Isaa, wii dum:

—Sadi Moobbo!

O guccii dum. <sup>50</sup> Isaa jaabii mo, wii:

—Gidam, wadu ko waddu maa koo.

\* 26:30 Neesu Yahuudiyaniko6e woni yimde jime Jabuura 115-118 e hiraande iidi Paska. † 26:31 Jakariyaa 13.7

E oon wakkati, 6e 6attitii, 6e njani e Iisaa, 6e nanngi dum. <sup>51</sup> Gooto e wondunoobe e Iisaa 6ee soorti kaafaawi mum, soppi golloowo Jottinoowo Sadaka Mawdo tayi nowru mum. <sup>52</sup> Nden, Iisaa wii mo:

—Soornu kaafaawi maa kii e njaru mum, sabi jogotoodo kaafaawi fuu, kaafaawi halkata dum. <sup>53</sup> Naa ada miila jooni mi waawaa noddude Baabiraado am nelda kam ko buri konuuji sappo e didi malaa'ika? <sup>54</sup> Kaa so non laatorii, hono ko winndaa ley Binndi dii koo tabitirka? Sabi di mbii hono non dum laatotoo.

<sup>55</sup> E oon wakkati, o wii jamaa oo:

—Ko ngardu-don e kaafaaje e cabbi faa nanngon kam hono mi janoowo? Ley Suudu Dewal Mawndu nduu ngonannoo-mi nannde fuu mido janngina, on nanngali kam. <sup>56</sup> Kaa dum fuu wadan yalla Binndi annabaabe dii ana tabita.

Nden, taalibaa6 bee fuu njoppi mo, ndogi.

#### *No mawbe diina cariri Iisaa*

<sup>57</sup> Nanngube Iisaa bee nabi dum to Kayafas Jottinoowo Sadaka Mawdo oo, tawi dunkee'en Sariya bee e mawbe lejol bee ana kawritinnoo ton. <sup>58</sup> Piyeer jokkitii mo fali daawre hakkunde ma66e, faa daalaare galle Jottinoowo Sadaka Mawdo oo. O naati ley galle oo, o jooddii di doomoobe bee faa o yiya no dum sakitor too.

<sup>59</sup> Hooree6e yottinoobe sadaka e waalde Saahiio6e ndee fuu ana tewta fenaande nde kappira Iisaa yalla ana waree. <sup>60</sup> Fay so taweede yimbe heewbe ngari seedanaade mo pene, 6e kebaali sabaabu fuu ko waawi warde mo. Ko sakitii koo, worbe didon ngari, <sup>61</sup> mbii:

—Kank wiinoo omo waawi wurjinde Suudu Dewal Laamdo, o mahitoo ndu ley balde tati.

<sup>62</sup> Jottinoowo Sadaka Mawdo oo immii, wii Iisaa:

—A jaabataako fay huunde naa? Tama a nanaali ko 6e mbiyete koo?

<sup>63</sup> Fuu omo deyyinii. Jottinoowo Sadaka Mawdo oo wii mo:

—Mido lamndore saabe Laamdo guurdo oo, haalan min so tawii aan woni AlmasiihuBii Laamdo oo.

<sup>64</sup> O jaabii dum, o wii:

—No mbii-daa nii. Kasen, mido wiya on fuu: gila jooni, on njiyan Bii Neddo ana joodii naamo Jom Baawde oo, ana wara dow duule kammu.

<sup>65</sup> E ley dum, Jottinoowo Sadaka Mawdo oo mettaa faa seeki kaddule mum, wii:

—O bonkike Laamdo! En kaajaaka seedee'en hankasen! On narrii nopp moodon ko o bonkii Laamdo koo. <sup>66</sup> Kodum njii-don hen?

Be njaabii, 6e mbii:

—Omo haani wareede.

<sup>67</sup> Caggal dum, 6e tutti e yeeso makko, 6e culkii mo. Yoga ma66e ana piya mo banaaje <sup>68</sup> ana mbiya:

—Almasiihu! Haalan min piido ma, so a annabaajo.

#### *No Piyeer wadi so yankiri Iisaa*

<sup>69</sup> Piyeer joodii sella e daalaare galle oo. Gooto e horbe bee 6attitii mo, wii:

—Aan, ada wondunoo e Iisaa Galilinke oo.

<sup>70</sup> Nii o yeddi dum hakkunde yimbe fuu, o wii:

—Mi faamataa ko kaalataa koo.

<sup>71</sup> Caggal dum, o fa'i to damal galle too. Kordo goddo yii mo, wii wonbe don bee:

—Oo gorko e Iisaa Nasaraatunke oo wondunoo.

<sup>72</sup> Piyeer yeddi kasen, wii:

—Mi hunike, mi anndaa oo gorko.

<sup>73</sup> Faa booyi seeda, wonbe don bee 6attii Piyeer, mbii dum:

—Tayoral, e ma66e njeye-daa, sabi demngal maa ngal hollii to iw-daa.

<sup>74</sup> E ley dum, Piyeer darii ana hunoo ana huttoo ana wiya:

—Mi anndaa oo gorko!

Oon wakkati fuu, ndontoori joggini, <sup>75</sup> non Piyeer miccitii ko Iisaa wiinoo dum koo: «Fadé ndontoori jogginde, a wiyan a anndaa kam cili tati.» O yalti sella, o darii omo woya faa omo heppiya.

## 27

#### *No Iisaa nabiraa to Pilaatu*

<sup>1</sup> Beetee law, hooree6e yottinoobe sadaka bee e mawbe lejol bee fuu njooddii faa yeewa no mbarda Iisaa. <sup>2</sup> Be ka66i mo, 6e na6i mo to Pilaatu goforneer oo.

*No Yahuuda maayiri*

<sup>3</sup> Nde Yahuuda jammbiido Iisaa oo yiil no o sariraa o bareteedo nii, mimsiti, wartiri buudi capantati cardi dii to hooreebe yottinoobe sadaka e mawbe lejol bee, <sup>4</sup> wii dum'en:

— Mi luuttii ko njammibii-mi mo wiyaali wadaali oo koo!

Nii ee njaabii mo, ee mbii:

— Ko hilli min? Aan anndi!

<sup>5</sup> Yahuuda tippii kaalisi oo ley Suudu Dewal Mawndu nduu. Caggal dum, o 6ami boggol, o wartyii. <sup>6</sup> Hooreebe yottinoobe sadaka bee 6ami kaalisi oo, mbii:

— E sariya meeden daganakki en wattude oo kaalisi e keesu oo, sabi dum diyo.

<sup>7</sup> Caggal ee ndawridii, ee 6ami kaalisi oo, ee coodi dum ngesa e jungeo mahooowo loode faa wadee jenaale joolaa'en. <sup>8</sup> Dum wadi so ngaan ngesa ana wiyee faa jooni «Ngesa Yiyyam».

<sup>9</sup> Nden haala ka Laamdo yottimirnoo annabi Yeremiya kaa tabiti nde oon wii:

«Be 6amii buudi capantati cardi,

coggu mo yimbe Israa'ilila njatorri yonki makko,

<sup>10</sup> ee coodi dum ngesa mahooowo loode,

hono no Joomiraado yamirnoo kam nii.»\*

#### No Pilaatu lamndorii Iisaa

<sup>11</sup> Iisaa darii yeeso goforneer oo, oon lamndii mo, wii:

— Aan woni kaananke Yahuudiyankooobe oo naa?

O jaabii, o wii:

— No mbii-daa nii.

<sup>12</sup> Kaa nde hooreebe yottinoobe sadaka bee e mawbe lejol bee kappi mo ndee, o jaabaaki fay huunde. <sup>13</sup> Dum wadi so Pilaatu wii mo:

— A nanaali ko ee ceettante koo fuu naa?

<sup>14</sup> Kaa o jaabaaki hen fay karrol. Dum haaynii goforneer oo sanne.

#### No Iisaa sariraa yo bareteedo

<sup>15</sup> Iidi Paska fuu, goforneer oo ana hokkanno yimbe bee sufaade e kasunkoobe bee mo njidi yoppitaneede. <sup>16</sup> E oon wakkati, ana woodunoo kasunke jom innde biyeteedo Iisaa Barabas. <sup>17</sup> E ley no jamaao oo moo6torii nii, Pilaatu lamndii ee, wii:

— Homo njid-don mi yoppitana on: Iisaa Barabas naa, naa Iisaa biyeteedo Almasihu oo?

<sup>18</sup> Sabi Pilaatu ana anndunoo haasidaaku wadi so be ndokkitiri Iisaa. <sup>19</sup> Kasen, nde o joodii to sarirde too ndee, jom suudu makko neli e makko, wii:

— Sel e oo gorko pooccitiido, sabi jemma hanken koydi makko tampinii kam sanne.

<sup>20</sup> Hooreebe yottinoobe sadaka bee e mawbe lejol bee ndunyi jamaao oo jaagoo Pilaatu yoppitana ee Barabas, wara Iisaa. <sup>21</sup> Goforneer oo lamnditii ee:

— Homo e diidon bee njid-don mi yoppitana on?

Be njaabii, ee mbii:

— Barabas!

<sup>22</sup> Pilaatu lamndii ee, wii:

— Ndennoo, hono ngadan-mi Iisaa biyeteedo Almasihu oo?

Be fuu ee njaabii, ee mbii:

— Tontu mo e leggal bardugal!

<sup>23</sup> O lamndii ee, o wii:

— Kodum o wadi ko boni?

Be 6eydii dukude semmbe, e6e mbiya:

— Tontu mo e leggal bardugal!

<sup>24</sup> Nden Pilaatu yiil walaa ko waawi hen, tawi duko ngoo duu ana 6eydii sanne, o 6ami ndiyam, o looti juude makko yeeso yimbe bee, o wii ee:

— Mi woytirtaake yonki oo gorko. Dum yo kunkoo mon.

<sup>25</sup> Be fuu ee njaabii, ee mbii:

— Yonki makko ana jonngii dow amen, minen e 6iibbe amen!

<sup>26</sup> E oon wakkati, Pilaatu yoppitani ee Barabas, yamiri Iisaa fiyee dorri, caggal dum, o hokkitiri dum tontoyee e leggal bardugal.

#### No sordaasi'en njaayriri Iisaa

<sup>27</sup> Sordaasi'en goforneer bee naabi Iisaa ley galle to hußeere ndee woni too, fedde sordaasi'en bee fuu pilii mo. <sup>28</sup> Be boorti mo kaddule makko, ee boorni mo burmusuure wodeere.<sup>†</sup> <sup>29</sup> Caggal dum, ee cajni tenngaade gi'e, ee kippi e hoore makko. Be ngadi kasen kalacal e jungeo makko jaamo, ee ndicci yeeso makko, hedde ebe njaayra mo ebe mbiya:

— Sadii, kaananke Yahuudiyankooobe!

\* <sup>27:10</sup> Jakariyaa 11.12-13, Yeremiya 19.1-13; 32.6-15    † <sup>27:28</sup> Wakkati Iisaa, burmusuure wodeere yo saaya ka kaananke boornotoo.

<sup>30</sup> Be tutti e makko, 6e 6ami kalacal ngal efe piya e hoore makko. <sup>31</sup> Nde 6e tilli jaayrude mo ndee, 6e itti burmusuure ndee, 6e foorni mo kaddule makko. Caggal dum, 6e nabi mo faa 6e tontoya mo e leggal bardugal.

#### *No Iisaa tontiraa dow leggal bardugal*

<sup>32</sup> Nde 6e njaltata ngeenndi ndii ndee, 6e kawriti e gorko Sireenanke biyeteedo Simon. Sordaasi'en 6ee ndooldini mo o wakkoo leggal bardugal Iisaa ngal. <sup>33</sup> Be njottii nokku biyeteedo Golgata. (Maanaa Golgata woni nokku laalagal hoore.) <sup>34</sup> Be ndokki Iisaa peguujam njillondiraadam e safaaare haadunde faa o yara. Nde o meedi dum ndee, o salii yerde.

<sup>35</sup> Nde 6e tonti mo e leggal bardugal ndee, 6e pecciri kaddule makko urwa. <sup>36</sup> Caggal dum, 6e njoodfi don efe kayba mo. <sup>37</sup> Be mbinndi daliili ko tonti mo, 6e takki dum do tiimde hoore makko doo. Dum doo 6e mbinndi: OO YO IISAA, KAANANKE YAHUDIYANKOOBE.

<sup>38</sup> E oon wakkati, yanoobe didon tontidaa e makko, gooto naamo makko, goddo oo nano makko. <sup>39</sup> Yimbe yaabootoobe don bee ana njenna mo, ana njinka ko'e mum'en, <sup>40</sup> ana mbiya:

—Aan gurjinoowo Suudu Dewal Mawndu nduu so mahitoo ndu ley balde tati, biltu hoore maa. So a Bii Laamdo, jippa leggal bardugal ngal!

<sup>41</sup> Hono non, hooreebe yottinoobe sadaka 6ee e dunkee'en Sariya 6ee e mawbe lepol 6ee fuu njaa'yirri mo ana mbiya:

<sup>42</sup> —O bilti wobbe, kaa oronkii biltude hoore makko. Kanko o kaananke Israa'iila. Jooni, o jippoo leggal bardugal ngal, faa ngoondinen mo. <sup>43</sup> O fawii fii makko e Laamdo. Yo Laamdo biltu mo jooni, so ana yidi mo. Sabi o wii o Bii Laamdo.

<sup>44</sup> Yanoobe tontaabe sera makko 6ee duu ndarrii ana mbonkoroo mo non.

#### *Haala maayde Iisaa*

<sup>45</sup> Gila hakkunde naange, nimre wadi e leydi ndii fuu faa wakkati yamnde tati kiikiide.

<sup>46</sup> Banngal yamnde tati kiikiide, Iisaa wulli wullaango toowngo, wii:

—Eli, Eli, lama sabaktanii?

(Dum woni: «Laamdo am, Laamdo am! Kodum wadi so njoppu-daa kam?») <sup>47</sup> Yoga e darinooibe ton 6ee nde nanunoo dum ndee, mbii:

—Omo nii nodda annabi Iliyaasa!

<sup>48</sup> Don e don, gooto dogi waddoyi liccere, suuwi dum e biineegiri, ha66i dum e sawru, feewtini hunduko makko yalla omo buuccoo. <sup>49</sup> Kaa heddiibe 6ee mbii:

—Njoppee mo. Yeewen yalla Iliyaasa waran bilti mo.

<sup>50</sup> Caggal dum, Iisaa wulli wullaango toowngo kasen, dali aduna.

<sup>51</sup> Oon wakkati, heedoode faliinde ley Suudu Dewal Mawndu ndee seekii gila dow faa ley, laatii taye didi. Leydi dimmbii, kaaye cekii, <sup>52</sup> janaale udditii, seniibe heewbe maaynoobe nyuurti. <sup>53</sup> Be njalti e janaale dee. Caggal ko Iisaa wuurti koo, 6e naati ngalluure seniinde ndee, yimbe heewbe njii 6e.

<sup>54</sup> Hooreejo sordaasi'en oo e dardinoobe e mum faa kayba Iisaa 6ee njii no leydi ndii dimmborii nii e ko wadi koo fuu, kuli sanne, mbii:

—So goonga nii, oo yo Bii Laamdo!

<sup>55</sup> Rewbe heewbe ana toowti, ana coynoo. Been yo jokkunoobe e makko gila Galili faa ngollana mo. <sup>56</sup> Ana e been rewbe: Mariyama mo Magdala e Mariyama inna Yaakuuba e Yuusufu, kajum e inna 6ibbe Jebede.

#### *No tew Iisaa waadraa eyanaande*

<sup>57</sup> Faa hiiri, gorko arsukunte jeyaado Arimatiya wari. Omo wiye Yuusufu, kanko duu o taalibbo Iisaa. <sup>58</sup> O yehi to Pilaatu, o ndaardi dum tew Iisaa. E oon wakkati, Pilaatu dunjani mo o hokkee dum. <sup>59</sup> O 6ami tew oo, o fiili dum e kasanke keso, <sup>60</sup> o wattii dum e yanaande heyre nde o yamirnoo o asanee e haayre. Caggal dum, o talliti haayre teddunde, o uddiri damal yanaande ndee, o witti. <sup>61</sup> Mariyama mo Magdala e Mariyama goddo oo ana njoodinoo don, ana peewti e yanaande ndee.

#### *No sordaasi'en kaybiri yanaande Iisaa*

<sup>62</sup> Janngo mum yo palaande fowteteende. Hooreebe yottinoobe sadaka e Farisa'en kawriti to Pilaatu, <sup>63</sup> mbii dum:

—Kaananke, min miccitike yojnoowo yimbe oo wiino nde wuuri ndee, wuurtan balde tati caggal maayde mum. <sup>64</sup> Ndennoo, tiinna yamir yanaande ndee doomee faa jalooma tata6o oo yawta, pati taalibaabe makko ngara ngujjita tew makko mbiya yimbe 6ee o immitiido hakkunde maaybe. Nden ngol yojnugol cakiitingol suran aranndeewol ngol bonde.

<sup>65</sup> Pilaatu wii 6e:

—Sordaasi'en haybooobe annii. Njehee ndoomirooyee yanaande ndee no mbaawru-don fuu!

<sup>66</sup> E oon wakkati, 6e njehi hiinnoyaade yanaande ndee: 6e uddi nde faa gasi, 6e meeli nde, 6e ndarni don sordaasi'en hayboobe.

## 28

### No Isaa immintiniraa

<sup>1</sup> Ko palaande fowteteende ndee 6ettii koo, beetee kecco jaannde alan, Mariyama mo Magdala e Mariyama goddo oo njehi yeewtoyaade yanaande ndee. <sup>2</sup> Don, leydi dimmbii semmbe. Malaa'ika Joomiraado jippii iwde dow kammu talliti haayre ndee joodii dow mayre. <sup>3</sup> Omo jalbira hono no majere nii, kaddule makko duu ana ndawni far hono no 6iraadam nii. <sup>4</sup> Doomoobe bee kuli sanne faa ana cijja, 6e laatii hono maay6e nii. <sup>5</sup> Malaa'ika oo wii rew6e bee:

—Pati kulee! Mido anndi Isaa tontanoodo oo tewtaton. <sup>6</sup> O walaa doo, o immitike hono no o wiirunoo nii. Ngaree, yeewee do o lelinoo doo. <sup>7</sup> Njaawnee njehhee, kumpitoyee taalibaabe makko bee o immitike e maayde. Jooni o adoyto on Galili, ton njiyotyon mo. Dum nji6unoomi haalande on.

<sup>8</sup> Rew6e di6on 6ee kejii iwi do yanaande doo, 6e heew6e kulol e seyo manngo, 6e ndogi haalanoyde taalibaabe makko bee oo kabaaru. <sup>9</sup> Don e don, Isaa hawri e ma66e, wii 6e:

—Cad6e!

Be 6attitii mo, 6e nanngi koyde makko, 6e cujidani mo. <sup>10</sup> E oon wakkati, o wii 6e:

—Pati kulee! Njehee mbiyoyee taalibaabe am bee njaha Galili. Ton 6e njiyota kam.

### No hayboobe yanaande Isaa bee njantorii fuu

<sup>11</sup> Rew6e bee ana e laawol, faa yoga e sordaasi'en haybannoobe yanaande nde bee kooti ngeenndi too, kaalani hooreeb6e yottinoobe sadaka bee ko wadi koo fuu. <sup>12</sup> Hooreeb6e yottinoobe sadaka bee kawriti e maw6e bee. Be ndawridi yeenude sordaasi'en haybannoobe yanaande ndee bee kaalisi keew6o, <sup>13</sup> 6e mbii dum'en:

—Mbiyon taalibaabe makko bee ngarri jemma tawi oodon daanii, ngujitii mo. <sup>14</sup> So goforneer oo nanii dum, min kawan dum e haala, min palanoo on e torra fuu.

<sup>15</sup> Sordaasi'en bee nanngi kaalisi oo, ngadiri no mbiyaa nii. Oon kabaaru ana jantee hakkunde Yahuudiyankoo6e faa hannde.

### No Isaa banngirani taalibaabe mum

<sup>16</sup> Taalibaabe sappo e go'o 6ee njehi Galili to dow waamnde haayre nde Isaa tinndinnoo dum'en ndee. <sup>17</sup> Nde 6e njii mo ndee, 6e cujidani mo, kaa yoga e ma66e ana sikkitii. <sup>18</sup> O 6attitii, o wii 6e:

—Mi hokkaama baawde fuu dow kammu e leydi. <sup>19</sup> Ndennoo, njehhee ngadee leni dii fuu taalibaabe am, lootiree 6e lootagal batisima innde Baabiraado e Biddo e Ruuhu Ceniido, <sup>20</sup> njannginee 6e 6e njokka ko njamir-mi on koo fuu. Anndee, mido wondi e moodon jaannde fuu faa aduna timma.

## Linjiila Iisaa Ngeđu Marka

### *No Yaayaa waajorii*

1 Dum woni puđđoode Kabaaru Lobbo haala Iisaa Almasiihu'Bi Laamđo oo. 2 Nii wiindorii e dewtere annabi Esaaya:

«Miin Laamđo, mi ardinante nelaado am moyy'inanoowo ma laawol.\*

3 Neddo ana ooynoo ley ladde jeereende:

Moyyinee laawol Joomiraado ngol,  
ndartinee dati makko.»†

4 Oon nelaado woni Yaayaa lootoowo lootagal batisima oo. O banngi ley ladde jeereende, omo ooynoo omo wiya yimbe tuuba, mbatisee yalla luutti mum'en ana njaafee. 5 Yimbe leydi Yahuudiya e yimbe Urusaliima fuu ngari, njadiri luutti mum'en, Yaayaa looti 6e lootagal batisima ley maayo Urdun. 6 Yaayaa, kaddule deleebi gelooči ūoornotonoo, humoo nguruwol, buureeti e njumri ladde o wuuri. 7 Omo waajoro daande toownde, omo wiya:

—Burdo kam baawde waran caggal am, mi fotaa fay turaade mi humta boggi pađe makko.

8 Miin, ndiyam mbatisir-mi on, kaa kanko, Ruuhu Ceniido o batisirta on.

### *No Iisaa batisraa e no Iibiliisa hordi mo*

9 Ley deen jaalaade, Iisaa iwi ngeenndi Nasaraatu ley leydi Galili, wari, Yaayaabatisi mo ley maayo Urdun. 10 Wakkati o yeentata ndiyam ðam oo, o yii kammu udditike, o yii Ruuhu Ceniido ana jippoo e makko hono no wuugaandu nii. 11 Daande iwnde dow kammu ooynii, wii:

—Aan woni Biyam mo korsin-mi, aan cuđii-mi.

12 Oon wakkati fuu, Ruuhu nađi mo ley ladde jeereende. 13 O wadi ton balde capande nay, Iibiliisa ana tewta seytade mo, omo hakkunde kulle ladde, malaa'ika'en ana ngollana mo.

### *No Iisaa noddiri taalibaabe aranndeebe*

14 Caggal uddeede Yaayaa ley kasu, Iisaa yehi Galili ana waajoo Kabaaru Lobbo haala Laamđo, 15 ana wiya:

—Wakkati oo warii, Laamu Laamđo 6attiima. Tuubee, ngoondinee Kabaaru Lobbo.

16 Iisaa ana yahannoo dow fonngo weendu Galili, non yii Simon e mijum Andire ana tippoo bubbi mum'en ley weendu nduu yo awoođe. 17 Iisaa wii 6e:

—Njokkee kam, mi wada on awoođe yimbe.

18 Don e don 6e njoppi bubbii mađbe dii, 6e njokki e makko. 19 O yehi yeeso seeda, o yii Yaakuuba 6ii Jebede e mijum Yuhanna ley laana mum'en ana moyy'intina bubbii. 20 Oon wakkati fuu, o noddi 6e. Be njoppi baam mađbe Jebede, kajum e hasaađe 6ee ley laana kaa, 6e njokki e makko.

### *No Iisaa ribbirri seydaani*

21 Caggal ðum, 6e njehi ngeenndi mbiyeteendi Kafarnahum, Iisaa naati suudu waajordu, fuddi waajaade. Nannde mum yo fowtetende. 22 Tawaafe don 6ee kaaynaa e waaju makko oo, sabi o waajorii be 6o no jom baawde nii, wanaa no dunkee'en Sariya nii. 23 Gorko laddaado ana e waajordu nduu, wulli, 24 wii:

—Iisaa Nasaraatunke oo, kodum hillu maa e amen? A gardo halkude min naa? Mido anndi ko ngon-daa, a ceniido iwrudo to Laamđo!

25 Iisaa jahii e seydaani oo, wii:

—Deyyu yaltu e makko!

26 Seydaani oo dimmbi gorko oo semmbe, wulli wullaango toowngo, yalti e makko.

27 Jamaa oo fuu haaynaa, hedde ana lamdondira:

—Ko dum woni? Dum anndal kesal koy! Omo yamira fay seydaani'en 6ee, 6e dōwtanto mo.

28 Wakkati gooto kabaaru makko saakii ley leydi Galili fuu.

### *No Iisaa selliniri, jawđe heewđe*

29 Nde 6e njaltunoo waajordu nduu ndee, 6e njehi galle Simon e Andire. Yaakuuba e Yuhanna njaađi e mađbe. 30 Esii Simon debbo ana lelii yo jontaado. Iisaa yottii tan, haalanaa haala makko, 31 battitii mo, nanngi junngo makko, immini mo. Don e don jontere makko selli, o laatanii 6e njaatigi.

\* 1:2 Malakiya 3.1    † 1:3 Esaaya 40.3

<sup>32</sup> Kiikiide caggal janal naange, yimbe ngaddani Iisaa jawbe e laddaafe fuu. <sup>33</sup> Ngeenndi ndii fuu hawriti dow damal ngal. <sup>34</sup> O sellini jawbe heewbe, jawbe jawuuji ci ngaldaa sii. O ribbi seydaani'en heewbe, o accataa seydaani'en bee kaala, sabi ebe anndi ko mo woni jaati.

*No Iisaa waajorii ley Galili*

<sup>35</sup> Janngo mum, Iisaa hujji gila law, yehi nokku teelde ana wada ton duwaawu. <sup>36</sup> Simon e wondiibe mum ndarii ana tewta mo. <sup>37</sup> Nde ee njiiti mo ndee, ee mbii mo:

—Yimbe fuu ana ndaarte.

<sup>38</sup> Iisaa wii ee:

—Njehen ley geelle badiide dee faa mi waajoo ton duu, sabi dum waddi kam.

<sup>39</sup> O yehi ley leydi Galili fuu, omo waajoo ley cuudi baajordi maabe, omo ribba seydaani'en.

*No Iisaa selliniri ceppaado*

<sup>40</sup> Gorko ceppaado wari dicci yeeso makko, ndaardi mo, wii:

—So tawii a jaabii, afa waawi sellinde kam!

<sup>41</sup> Iisaa yurmina, foocci junngo mum, memi mo, wii:

—Mi jaabii, sellu!

<sup>42</sup> Don e don, ceppe dee iwi e gorko oo, o selli. <sup>43</sup> Oon wakkati fuu, Iisaa yoppiti mo, daalii mo, <sup>44</sup> wii:

—Haya koy, pati humpitin fay gooto, yaa holloy hoore maa jottinoowo sadaka, ngadanaa laabugol maa ngol sadaka mo Muusaa yamiri oo faa anndina ee a sellii.

<sup>45</sup> Kaa kanko, o iwi don tan, o darii omo saaka kabaaru oo. Dum wadi so Iisaa ronki naatude geelle, heddi ladde, yimbe ana iwra tatteeji fuu ana ngara e mum.

## 2

*No Iisaa selliniri bonnguujo*

<sup>1</sup> Caggal balde seeda, Iisaa warti ngeenndi Kafarnahum. Yimbe nani omo cuudi. <sup>2</sup> Jamaa keewdo hawriti don faa fay nokkuure heddaaki, wanaa haala yeeso damal ngal, hedde omo waajoo ee konngol Laamdo ngol. <sup>3</sup> Yimbe ngari, ngaddani mo bonnguujo mo worbe nayon ndoondii. <sup>4</sup> Kaa ee ndonkii yottinde mo Iisaa sabaabu jamaa oo. Dum wadi so ee kippiti bene oo foondo makko, ee njippiniri bonnguujo oo e yulannde ndee, tawi ana lelnaa e dengeleewo. <sup>5</sup> Nde Iisaa yiino goondinal maabe ndee, wii bonnguujo oo:

—Gidam, luutti maa njaafaama.

<sup>6</sup> Dunkee'en Sariya jooodinoobe don bee ndarii ana miiloo e berde mum'en: <sup>7</sup> «Hono oo gorko haaldi dum? O bonkike Laamdo! Homo waawi yaafaade luutti so wanaa Laamdo gooto oo?» <sup>8</sup> Iisaa faami don e don miilioji maabe, wii ee:

—Kodum wadi so odon miiloo miilioji baadi nii e berde moodon? <sup>9</sup> Wiide bonnguujo «Luutti maa njaafaama» e wiide dum «Imma, bam dengeleewo maa njahaa», kodum hen buri newaad? <sup>10</sup> Kaa, faa mi anndina on Bii Neddo ana jogii baawde e aduna oo yaafaade luutti...

Nden, o wii bonnguujo oo:

<sup>11</sup> —Mido haalane: imma, bam dengeleewo maa, kootaa suudu maa.

<sup>12</sup> Don e don gorko oo immii, bami dengeleewo mum witti, hedde yimbe fuu ana yeewa dum. Be fuu ee kaaynaa, ee ndarii ebe njetta Laamdo, ebe mbiya:

—Min njiyaali hono dum abada.

*No Iisaa noddiri Lewi*

<sup>13</sup> Iisaa wirfitii to weendu too. Jamaa oo fuu tawoyi mo ton, omo waajoo dum'en. <sup>14</sup> Nde o yahata ndee, o yili Lewi 6ii Alfaa ana joodii e duwaajeere mum, o wii dum:

—Jokku e am!

Lewi immii, jokki e makko. <sup>15</sup> Nde Iisaa naamannoo e ley suudu Lewi ndee, duwaaje'en heewbe e luuttoobe hono mum'en njoodii, ana naamda e makko, kanko e taalibaabe makko. Sabi yimbe heewbe ana njokki e Iisaa. <sup>16</sup> Dunkee'en Sariya jeyaafe e waalde Farisa'en njii Iisaa ana naamda e been yimbe, mbii taalibaabe makko bee:

—Ko saabii so omo naamda e duwaaje'en, kaynum e luuttoobe hono mum'en?

<sup>17</sup> Nde o nani dum ndee, o wii ee:

—Wanaa celludo hasindini e cawroowo, jawdo hasindini e cawroowo. Wanaa noddude fooccitiee waddi kam, noddude luuttoobe woni ko waddi kam.

*Haala koorka*

<sup>18</sup> Taalibaabe Yaayaa e Farisa'en ana koora. E ley dum, yimbe ngari, lamndii Iisaa:

—Ko saabii so taalibaaße Yaayaa e taalibaaße Farisa'en ana koora, kaa 6e maa 6ee koorataa?

<sup>19</sup> O jaabii 6e, o wii:

—Nootiibe kuurtungu ana mbaawi salaade jaamde tawa jommbaajo gorko oo ana wondi e mum'en naa? Mbaawaa. So nii jommbaajo gorko oo ana wondi e ma66e, 6e mbaawaa salaade jaamde. <sup>20</sup> Kaa jalaade ngaran de jommbaajo gorko oo ittetee e hakkunde ma66e. E deen jalaade, 6e kooran. <sup>21</sup> Fay gooto dammbataa fetalaare heyre e kaddungal kiinngal. So dum wadii, fetalaare heyre ndee daamtan kaddungal kiinngal ngal, cekol ngol 6eydoo. <sup>22</sup> Kasen duu fay gooto loowataa peguujam kesam e sumalleiji kiiddi. So dum wadii peguujam dam fusan di, kanjam e sumalleiji dii fuu mursidee. Peguujam kesam e sumalleiji kesi loowetee!

#### *Haala jalaande fowteteende*

<sup>23</sup> Wadino e jalaande fowteteende wootere, Iisaa ana seeka gese, taalibaaße mum ana kelta butaali e laawol ngol. <sup>24</sup> E ley düm, Farisa'en 6ee mbii mo:

—Yew, kodum wadii so taalibaaße maa 6ee ana ngolla ko dagaaki gollude jalaande fowteteende?

<sup>25</sup> O jaabii 6e, o wii:

—Tama on meedaali janngude ko Daawuuda wadii nde yolbi haajaa ko jaametee, kajum e yim6e mum? <sup>26</sup> O naati e ley hukkum ceniido oo e jamaanu Jottinoowo Sadaka Mawdö biyeteedo Abiyataar, o jaami buuru cakkaado oo, o hokki hen yim6e makko. Tawee nee, yottinoobe sadaka tan ndunjanaa jaamde oon buuru.

<sup>27</sup> Iisaa wii 6e kasen:

—Nalaande fowteteende ndee kammari neddo wadiraa, wanaa neddo wadiraa kammari jalaande fowteteende ndee. <sup>28</sup> Ndennoo fay jalaande fowteteende ndee, Bii Neddo woni jooomum.

## 3

#### *No Iisaa selliniri gorko ley jalaande fowteteende*

<sup>1</sup> Iisaa naatti ley suudu waajordu nduu, o tawi ton gorko mo junngo mum waati. <sup>2</sup> Yim6e wonnoobe don 6ee ngattani Iisaa hakkille. Ana yewwa yalla o anniyido sellinde gorko oo e jalaande fowteteende ndee, faa keba wullanaade mo. <sup>3</sup> Iisaa wii mo junngo mum waati oo:

—Imma, dara hakkunde ma66e!

<sup>4</sup> Caggal düm, o lamndii 6e:

—E ley jalaande fowteteende ana dagoo gollude ko moyyi naa gollude ko boni? Dandunde neddo naa warde düm?

Kaa 6e njaabaaki. <sup>5</sup> Iisaa yewri 6e tikkere, tiinndam-hoore ma66e dam woyni yonki makko, o wii gorko oo:

—Fooccu junngo maa!

Oon foocci ngo tan, ngo selli faa ngo warti hono no wonngo ngoo nii. <sup>6</sup> Don e dòn, Farisa'en 6ee njalti, njooddii e howruu6e Hirudus faa ndawrida no mbarda Iisaa.

#### *No yim6e ngariri e Iisaa*

<sup>7</sup> Caggal düm, o iwi don, o fa'i weendu too, kanko e taalibaaße makko. Jamaa keewdo iwdo Galili jokki e makko. <sup>8</sup> Yim6e heew6e, iw6e Yahuudiya e Urusalima e Idumiya e leydi funnaange Urdun e seraaji Tirus e Sidon, nani ko o wadannoo koo, ngari to makko. <sup>9</sup> Iisaa wii taalibaaße mum bee ndaarana düm laana pati jamaa oo 6illa düm. <sup>10</sup> Saabe omo sellinannoo heew6e wadi so jaw6e bee fuu kejanii mo yalla ana mema mo. <sup>11</sup> Wakkati mo seydaanien njii mo fuu, ndiccoto, ngulla:

—Aan a Bii Laamdo!

<sup>12</sup> Omo yagginannoo 6e pati 6e kumpita fay gooto kabaaru makko.

#### *No Iisaa suborii taalibaaße sappo e didon*

<sup>13</sup> Caggal düm, o jabboi dow waamnde haayre, o noddi 6e o muuyi noddude, been ngari e makko. <sup>14</sup> O su6ii hen sappo e didon, yalla ana ngonda e makko, o nela düm'en waajoyaade,

<sup>15</sup> kasen o hokka düm'en baawde ribbude seydaani'en. <sup>16</sup> Bee doo ngoni sappo e didon 6e o su6ii 6ee: Simon mo o innditiri Piyeer oo <sup>17</sup> e Yaakuuba e mijum biyeteedo Yuhanna, 6i66e Jebede 6e o innditiri Bowanerges 6ee (maanaa mum woni «nanndu6e e gidaango») <sup>18</sup> kajum e Andire e Filipa e Bartolome e Matta e Tomaa e Yaakuuba 6ii Alfaa e Tadde e Simon kiranoowo suudu baaba <sup>19</sup> e Yahuuda Isikariyota jammbotoodo mo oo.

#### *No Iisaa fenniri ko happaa koo*

<sup>20</sup> Caggal dum, o hooti cuudi. Jamaa hawriti dow hoore makko kasen faa kanko e taalibaabé makko 6e ndonki hefude no 6e jaamira. <sup>21</sup> Nde sakiraafe makko nani dum ndee, ngarani mo, sabi wiyaama hakkille makko sottii.

<sup>22</sup> Dunkee'en Sariya iwnoobe Ursaliima ngari, mbii:

—Beelsebul woni e makko.

Kasen 6e mbii:

—Oon woni hooreejo seydaani'en mo o ribbirta seydaani'en 6ee.

<sup>23</sup> E ley dum, Iisaa noddi 6e 6e ngara e mum, haalaniri 6e banndol, wii:

—Hono Ibiliisa waawirta ribbude Ibiliisa? <sup>24</sup> So laamu fecciima ana haba e hoore mum, oon laamu waawataa heddaade. <sup>25</sup> Kasen duu so galle fecciima ana haba e hoore mum, oon galle waawataa heddaade. <sup>26</sup> Ndennoo, so Ibiliisa yanii e hoore mum fecciima, waawataa heddaade. Ko laatoto dee, kabaaru mum timman.

<sup>27</sup> Iisaa jokkini hen:

—Fay gooto waawaa naatude e galle gorko jom semmbe yaada e jawdi mum tawa haabéali joomum tafon. Kaa so haabéii joomum faa teenji, ana waawi naabude ko woni e galle mum fuu. <sup>28</sup> Mido haalana on goonga: yimbe ana mbaawi yaafeede luutti mum'en fuu e bonkaaji di 6e mbonkii Laamdo fuu. <sup>29</sup> Kaa bonkiido Ruuhu Ceniido oo hefataa yaafaamuya fey, sabi joomum heddoto e luuttal mum faa abada.

<sup>30</sup> Iisaa haaldii kaa haala saabe ko 6e mbii omo wondi e seydaani koo.

#### *Inna Iisaa e mijiraabe Iisaa*

<sup>31</sup> Inna Iisaa e mijiraabe Iisaa worbe ngari, ndarii caggal galle oo, neli o noddee. <sup>32</sup> Do jamaa oo filii mo doo, wii mo:

—Inna maa e mijiraabe maa ana sella too, ana kaaje maa.

<sup>33</sup> O jaabii, o wii:

—Homo woni innam e mijiraabe am?

<sup>34</sup> O yeewi joodiife so ana pilii mo bee, o wii:

—Innam e mijiraabe am annii. <sup>35</sup> Sabi gadoowo sago Laamdo, kajum woni mijam gorko, kajum woni mijam debbo, kajum woni innam.

## 4

### *Banndol haala aawoowo*

<sup>1</sup> Iisaa ana waajoo dow fonngo weendu nduu kasen. Jamaa keewdo filii mo faa o naati laana, o joodii. Jamaa oo fuu ana dow fonngo ngoo. <sup>2</sup> O darii omo waajoroo 6e gede keewde e banndol, omo wiya 6e:

—Kettinee! Aawoowo yalti aawayode. <sup>4</sup> E ley sankugol ngol, yoga e aawdi ndii saami e laawol: pooli ngari cubi dum. <sup>5</sup> Yoga mayri saami e korokaaye do leydi heewaano, fudi don e don, sabi aawdi ndii suddaaki gasa. <sup>6</sup> Kaa nde naange wulnoo ndee, sumi, yoori saabe walaa dadi. <sup>7</sup> Yoga mayri saami do kebbe pudata. Ndi fudidi e majje, de cuumi ndi, ndi rimaali. <sup>8</sup> Yoga mayri saami e leydi mbelndi, fudi, mawni, rimi: yoga sowii cowe capantati, yoga capande jeegom, yoga teemedere.

<sup>9</sup> Caggal dum, o wii:

—Jom nowru fuu yo nanu!

<sup>10</sup> Nden Iisaa teelti, sappo e didon bee e filinoobe mo bee lamndii mo maanaa banndol ngol. <sup>11</sup> O wii 6e:

—Onon, on ndokkaama faamde goonga teddudo haala Laamu Laamdo oo. Kaa wonbe sella bee, huunde fuu e banndol kaalaniran-mi 6e. <sup>12</sup> Dum wadi so:

«ana yeewa faa gasa tawa njiyatataa,  
ana nana faa laabä pacä tawa paamataa,  
sako 6e tuuba so 6e njaafee.»\*

<sup>13</sup> O wii 6e:

—On paamaali ngol banndol naa? Hono paamirton banndi goddi dii fuu ndennoo?

<sup>14</sup> Aawoowo oo konngol Laamdo o aawata. <sup>15</sup> Yimbe yogaabe ana nanndi e laawol do aawdi ndii saami doo. Be nanan konngol ngol, oon wakkati fuu Ibiliisa warata so itta konngol aawaangol e maabé ngol. <sup>16</sup> Yogaabe ana nanndi e korokaaye de aawdi ndii yuppí e muudud dee. Be nanan konngol ngol, 6e njaaforoo ngol seyo oon wakkati fuu, <sup>17</sup> kaa ngol walaa dadi e maabé, wakkati gooto tan ngol wonata e maabé. Wakkati mo 6illaare naa torra hewti 6e saabe konngol ngol fuu, 6e njankiran. <sup>18</sup> Yogaabe bee ana nanndi e nokku kebbe do aawdi ndii saami doo. Bee ngoni nanbe konngol ngol, <sup>19</sup> kaa sugullaaji aduna e koomti jawdi, kajum e gidaade yonki godde naatan e maabé, cuuma konngol ngol, ngol laatoo dimarol. <sup>20</sup> Kaa do aawdi ndii saami e leydi lobbiri doo, 6ee ngoni nanoobe konngol

\* 4:12 Esaaya 6.9-10

ngol so njaaba ngol. Be ndiman: yoga sowoo cowe capantati, yoga capande jeegom, yoga teemedere.

### *Haala Laamu Laamdo*

<sup>21</sup> Caggal dūm, Iisaa wii 6e:

—Won fuu kuuboowo lampa so hippa hen saawal, naa soorna dūm ley leeso? Wanaa sinndan dūm naa? <sup>22</sup> Walaa fuu ko jooobi ko 6anngintaake, walaa ko suudii ko yaltintaake sella. <sup>23</sup> Jom nowru fuu yo nanu!

<sup>24</sup> O wii 6e kasen:

—Tiidee e no nanirton haalaaji am dīi nii! Sabi no etirton nii, non etirante-don on 6eydante duu. <sup>25</sup> Sabi jogiido fuu 6eydante, kaa mo walaa oo, fay seeda mo jogii oo teetete.

<sup>26</sup> O wii kasen:

—Laamu Laamdo ana wa'i no neddo cankudo aawdi e ngesa mum nii. <sup>27</sup> Caggal mum, daanoo jemma daroo jalooma, no laatii fuu aawdi ndii fudan, mawna, tawa joomum anndaa no ndi mawniri. <sup>28</sup> Leydi ndii e hoore mum fudinta ndi, ndi waada gulle, wutaandu jokka hen, caggal dūm, gabbe njokka hen. <sup>29</sup> So ko aawaa koo 6enndii, o 6aman wawdu makko o hetta, sabi wakkati mum yottike.

<sup>30</sup> O jokkini hen:

—Kodum nanndinten e Laamu Laamdo oo? Banndol hongol mbanndirten mo? <sup>31</sup> Laamu Laamdo ana nanndi e ngeeyu buyaage. Kajum 6uri geeyi dīi fuu famfude. <sup>32</sup> Kaa so mo aawaama, mo mawnan faa mo laatoo lekki mawki sanne, ki wada cabē mawde faa pooli mbaawa piibude cuudi e dowdii makki.

<sup>33</sup> Iisaa haalaniri yimbe see konngol Laamdo ngol e banndi keewdi baadi non, ko waarata e faamu ma66e. <sup>34</sup> O waajortaako so wanaa e banndol. Kaa nde o teeldi e taalibaabe makko bee fuu, o firritanan dūm'en banndi dīi fuu.

### *No Iisaa waaltiniri henndu*

<sup>35</sup> Kiikiide oon jalooma, Iisaa wii taalibaabe mum 6ee:

—Lummbeen, keedoyen ootoo bannge.

<sup>36</sup> Be njoppi jamaa oo, 6e tawti mo e laana ka o wonnood e mum kaa, 6e ndeerti. Laanaaji goddi duu ana njokki e makko. <sup>37</sup> Henndu sattundu immii, bempeeje immii ana piya laana kaa, faa ka hosi heewde ndiyam. <sup>38</sup> Kanko, omo daanii to laaci laana too, omo wawlil mbawlu. Be pinndini mo, 6e mbii mo:

—Moobbo, tama ko min kalkotoo koo wemmbaali ma?

<sup>39</sup> O immii, o jahii e henndu nduu, o wii weendu nduu:

—Deyyina! Wii teen!

Henndu nduu deyyinii, fuu wii teen. <sup>40</sup> Caggal dūm, o wii 6e:

—Ko saabii so kul-don? Faa hannde on ngalaa hoolaare naa?

<sup>41</sup> Be kuli kulol cattungol hedde e6e mbiyondira:

—Homo oo gorko woni faa henndu e ndiyam ana dowtanoo dūm?

## 5

### *No Iisaa selliniri laddaado*

<sup>1</sup> Caggal dūm, 6e njottii oo too bannge e weendu nduu, e leydi Gerasankoo6e. <sup>2</sup> Nde o Iisaa yalti laana kaa ndee, laddaado iwri ley janaale, hawri e makko. <sup>3</sup> Ley janaale dee o joodinoo, fay gooto waawaa ha66ude mo, sabi fay calali ka66ataa mo. <sup>4</sup> Sabi heewii ko o humti tonngoo6e e calali, o tayan calali, o hela geyyelle. Fay gooto waawaa nanngirde mo semmbe. <sup>5</sup> Nannde fuu, jemma e jalooma ley janaale e baamle kaaye o woni, omo wulla omo fitoroo kaaye. <sup>6</sup> O soynti Iisaa, o dogani dūm, o sujidanii dūm, <sup>7</sup> o wulli faa toowi, o wii:

—Iisaa Bii Laamdo Toowdo, kofum njid-daa waafude kam? Mi surdii ma saabe Laamdo, pati torram!

<sup>8</sup> Walaa ko o wiiri non sinaa Iisaa wii mo:

—Seydaani, yaltu e makko.

<sup>9</sup> Iisaa lamndii mo, wii:

—Hono mbiyete-daa?

O jaabii, o wii:

—Mido wiyee jamaa, sabi miden keewi.

<sup>10</sup> O jaagi dūm sanne, o ndaardi dūm pati yaltina seydaani'en 6ee leydi ndii. <sup>11</sup> Sewre girooji mawnde ana durannoo don e hoore waamnde haayre. <sup>12</sup> Seydaani'en 6ee ndaardi mo o dunjanoo dūm'en naata e ley girooji dīi. <sup>13</sup> O dunjanii 6ee dūm. Seydaani'en 6ee njalti, naati e girooji dīi. Sewre ndee fuu diiri iwi daande waamnde haayre too, naatoyi ley weendu nduu, yoolii. Edi poti ujunaaji didi. <sup>14</sup> Duroo6e 6ee ndogi njantanoyii ngeenndi ndii e seraaji mum ko hewtii dūm'en koo. Yimbe 6ee njehi yeewoyde ko wadi koo, <sup>15</sup> 6e ngari

e Iisaa. Nde 6e njii gorko laddanoodo oo ana joodii ana foornii kaddule, yeedditii ndee, kulol nanngi 6e. <sup>16</sup> Tawaabe don 6ee njantani 6e ko hewtinoo laddaado oo e girooji dii.

<sup>17</sup> Be ndaardi Iisaa yalta leydi maabbe ndii.

<sup>18</sup> Nde o naattata laana kaa ndee, laddanoodo oo ndaardi mo o acca jokka e makko. <sup>19</sup> O salanii oon, o wii dum:

—Hootu suudu maa e koreeji maa, kumpitaa 6e ko Joomiraado wadan maa e no o yurmori maa.

<sup>20</sup> O yehi omo haala e leydi ndi geelle sappo ndii ko Iisaa wafani mo. Be fuu 6e kaaynaa.

*No Iisaa wuurtiniri 6ii Jayrus e no selliniri debbo nawdō*

<sup>21</sup> Nde Iisaa naati e laana wirfitii oo too bannge weendu nduu ndee, jamaa keewdo filii mo kasen dow fonngo doo. <sup>22</sup> Nden gooto e hooreebe suudu waajordu biyeteedo Jayrus wari. O yii Iisaa tan, o dicci yeeso mum, <sup>23</sup> o naagii dum o haali faa heewi, o wii:

—Biyan debbo ana habana yonki. War faw junngo maa e makko, yalla omo sella, o wuura!

<sup>24</sup> Iisaa yaadi e makko, jamaa keewdo jokki e mum faa ana 6illa dum.

<sup>25</sup> Debbo mo tuundi mum tayataa ko waarata e duu6i sappo e didi ana wonnoo ton. <sup>26</sup> O tampii hen sanne, o yehii to sawroobe heewbe faa junngo makko laa6i. Ko 6uri dum fuu o yiyaali hen sami, jaw oo feydoto jaati. <sup>27-28</sup> O nani haala Iisaa ana haalee, o naati e jamaa oo. Sabi o miili: «So mi memii saaya makko tan, mi sellan.» O iiri caggal mum, o memi saaya mum. <sup>29</sup> Don e don tuundi makko tayi, o maati e caldi makko o sellii. <sup>30</sup> Oon wakkati fuu, Iisaa maati won semmbe iwi e mum, yeccitii hakkunde jamaa oo, wii:

—Homo memi saaya am?

<sup>31</sup> Taalibaabe makko 6ee mbii mo:

—A yii jamaa annii 6illu maa, ada lamndoo: «Homo memi kam?»

<sup>32</sup> Kaa o daria omo tewta memdo mo oo. <sup>33</sup> Debbo oo ana sijjna no foti hulde sabi ana anndi ko waci, wari, dicci yeeso makko, haalani mo goonga. <sup>34</sup> Iisaa wii mo:

—Banndam debbo, goondinal maa danndii ma. Yaa e jam! A sellii e jaw maa oo!

<sup>35</sup> O tilaaki haalde, faa won iwrubee to suudu Jayrus hooreejo waajordu oo, mbii dum:

—Biya oo heddaaki. Fotaa ko tampilaa Moobbo oo hankasen!

<sup>36</sup> Kaa Iisaa tippiti haala maabbe, wii Jayrus:

—Pati hul, hoolam tan!

<sup>37</sup> O dalaali fay goto yaada e makko so wanaa Piyeer e Yaakuuba e Yuhanna mijii Yaakuuba oo. <sup>38</sup> Be njottii suudu hooreejo waajordu nduu oo. O tawi don dooyoore, yimbe ana mboya, ana konkina semmbe. <sup>39</sup> Nde o naatunoo ndee, o wii fe:

—Ko woni dii bojji e dii jonaali? Suka oo maayaali, o daaniido tan.

<sup>40</sup> Be puuytini haala makko. Non o yaltini be fuu, o naatidi e baaba suka oo e inna mum e taalibaabe taton 6ee suudu to suka oo lelii too. <sup>41</sup> O nanngi junngo mum, o wii:

—Talita kuumi!! (Dum woni: «Suka debbo, imma!»)

<sup>42</sup> Suka oo immii don e don, ana yaha. Duu6i makko yo sappo e didi. Yimbe 6ee kaaynaa sanne. <sup>43</sup> Iisaa yaggini 6e pati 6e anndina dum fay goto. O wii 6e ndokka suka oo ko jaama.

## 6

*No Nasaraatunkoo6e calorii ja6ande Iisaa*

<sup>1</sup> Iisaa iwi e oon nokku, taalibaabe mum njokki e mum, wirfitii ngeenndi mum'en. <sup>2</sup> Nde jalaande fowteteende yottinoo ndee, o fuddi waajaade ley suudu waajordu nduu. Nanbe waaju makko 6ee kaaynaa, hedde ana mbiya:

—Hoto o hebi dum? Hono o hebiri oo hakkill? Yee! Hono neddo waawiri wadirde dii kaayefiji? <sup>3</sup> Tama o wanaa cehoovo ledde, tama o wanaa 6ii Mariyama? Tama o wanaa mawnii Yaakuuba e Yoses e Yahuuda e Simon? Tama wanaa enen e banndiraafe makko rewbe koddi?

Kammari dum wadi so 6e njankiri mo. <sup>4</sup> E oon wakkati, o wii 6e:

—Annabaajo ana teddinaa nokku fuu so wanaa e ley ngeenndi mum'en e hakkunde rimdaabe mum, kapum e ley galle mum'en.

<sup>5</sup> Iisaa hebaali waadue don fay haaynde wootere, so wanaa ko fawi junngo mum e jawbe seeda, sellini dum'en. <sup>6</sup> Kasen duu waasude maabbe goondinde laatanii mo haaynde.

*No Iisaa neliri taalibaabe mum sappo e didon 6ee*

Caggal dum, Iisaa yiili e geelle pililide don dee, ana waajoo. <sup>7</sup> O noddi taalibaabe sappo e didon 6ee, o neliri dum'en didon didon. O hokki 6e baawde ribbude seydaani'en, <sup>8</sup> o wii 6e so e6e ndawa, pati 6e nabora fay huunde, so wanaa sawru. Pati 6e nabora buuru naa mbasu naa kaalisi e ley njiibaaji maabbe. <sup>9</sup> O yamiri 6e 6e boornoo pade, kaa pati 6e nabora saayaaji didi. <sup>10</sup> O wii 6e kasen:

—Galle fuu mo njippi-don e mum, keddo-don don faa nde iw-don e oon nokku fuu. <sup>11</sup> So on ngarii e nokku, yimbe njabbaaki on naa kettinanaaki on, iwon ton, piddon colla koyse moodon faa jeertina 6e ko 6e ngadi koo ana boni.

<sup>12</sup> Be njehi, 6e mbaajii yimbe bee tuuba, <sup>13</sup> 6e ndibbi seydaani'en heewbe, 6e nguji nebam e jaawbe heewbe 6e cellini dum'en.

### No Yaayaa maayiri

<sup>14</sup> Hirudus, kaananke oo, nani haala Iisaa ana haalee, sabi innde Iisaa walaa fuu do yottaaki. Won wiyoofe Yaayaa mo lootagal batisima wuurti, dum wadi so o jogii baawde waafude kaayde. <sup>15</sup> Wobbe ana mbiya o annabi Iliyaasa. Wobbe duu ana mbiya o annabaajo no annabaabe aranndee6e bee nii. <sup>16</sup> Nde Hirudus nani dum ndee, wii:

—Yaayaa mo tayunoo-mi hoore mum oo, kajum wuurti!

<sup>17</sup> Tawi Hirudus yamiriino Yaayaa nanggee, habbee, uddee ley kasu. Saabe Hirudiya jom suudu mawniiko biyeteedo Filipa mo o 6amnoo oo, wadi. <sup>18</sup> Sabi Yaayaa ana wiyanloo mo:

—Dagantaako ma teetaa jom suudu mawna.

<sup>19</sup> Hirudiya mettaa e Yaayaa, yidi o waree, kaa hebaali laawol, <sup>20</sup> sabi Hirudus ana hulan-noo Yaayaa, ana anndunoong o gorko pooccitido, ceniido. Dum wadi so omo haybanno dum. So o hettinike haala mum, hakkille makko jii6oto, haya kasen duu omo yidi hettinaade dum.

<sup>21</sup> Kaa noo, Hirudiya he6i laawol jaannde yiitu-mawuuri rimeede Hirudus. Hirudus wadani howruu6e mum e hooree6e sordaasi'en 6ee e inndee-anndee'en Galili see fuu hiraande. <sup>22</sup> Bii Hirudiya debbo naati ana woma. Dum weli Hirudus e nootii6e dum 6ee fuu. O wii suka debbo oo:

—Haalanam ko njid-daa faa mi wadane.

<sup>23</sup> O hunanii dum, o wii o hokkan dum huunde fuu ko jaagii mo, fay so tawii fecdere laamu makko oo. <sup>24</sup> E ley dum, suka debbo oo yalti, wii inna müm:

—Kodum kaan-mi jaagaade?

Inniraado oo jaabii mo, wii:

—Naaga mo hoore Yaayaa mo lootagal batisima oo!

<sup>25</sup> Suka debbo oo hejii, wirfitii to kaananke oo too, jaagii dum, wii:

—Ko njidu-mi, ngaddanaa kam jooni jooni hoore Yaayaa mo lootagal batisima oo e la'al!

<sup>26</sup> Terde Hirudus mbaati faa wanaa seese, kaa nde wonnoo o hunike yeeso nootii6e mo 6ee, o wajii yaltude e konngol makko ngol. <sup>27</sup> O nelii d6on e don gooto e sordaasi'en doomoo6e mo 6ee, o yamiri d6um yo waddoy hoore Yaayaa. Sordaasi oo wirfitii, naati e ley kasu oo, tayi hoore Yaayaa, <sup>28</sup> tummbi e la'al, waddi, hokki suka debbo oo. Suka debbo oo duu hokki inna müm. <sup>29</sup> Nde taalibaabe Yaayaa see nani dum ndee, ngari 6amti tew makko oo, ngadoyi dum e yanaande.

### No Iisaa jaamminiri ujunaaji joy neddo

<sup>30</sup> Nelaabe 6ee ngarti e Iisaa, njantanii dum ko ngadi koo e ko mbaajii koo fuu. <sup>31</sup> O wii 6e:

—Njehen nokku teel6o, yalla odon ke6a fowtinaade.

Sabi yaha-warta ana heewi, faa kanko e taalibaabe makko see, 6e ndonki he6ude fay no 6e jaamira. <sup>32</sup> Be njehi 6e naatoyi laana, 6e teeli kambe tan e feere ma66e, <sup>33</sup> tawi heewbe njii 6e njaha, annditi to 6e peewi. Yimbe heewbe iwri e geelle dee fuu, kejanii to 6e peewi too, adii 6e yottaade. <sup>34</sup> Nde o yalti e laana kaa ndee, o yii jamaa keewdo. O yurminaa 6e sanne, sabi 6e mba'i no baali di ngalaa duroowo nii. O darii omo waajoo 6e kulle keewde. <sup>35</sup> Nde hiiri ndee, taalibaabe see battitii mo, mbii:

—Jooni hiirii, kasen duu nokku oo yo ladde. <sup>36</sup> Yoppitin jamaa oo saakoo e geelle e daakaaji pilii6i d6ii yalla ana coodoya ko jaama.

<sup>37</sup> O jaabii 6e, o wii:

—Onon e ko'e moodon, ndokkee 6e ko 6e jaama!

Non 6e lamndii mo, 6e mbii:

—Ndennoo ada yidi min 6ama buudi cardi teemedere didi min coodanoya 6e buuru ko 6e jaama?

<sup>38</sup> E oon wakkati, o wii 6e:

—Hono foti buuruuje njogi-don? Njehee yeewoyee!

Nde 6e njehi 6e kumpitoyii ndee, 6e mbii mo:

—Buuruuje joy e liddi didi min njogii.

<sup>39</sup> O yamiri taalibaabe 6ee njoyyinira jamaa oo tunaale-tunaale dow hudo hecco. <sup>40</sup> Be njoo6ii 6e ngadi tunaale-tunaale, yoga teemedere neddo, yoga capande njoyon. <sup>41</sup> O 6ami buuruuje joy dee e liddi didi d6ii, o tiggittii kammu, o yetti Laamdo. O tayi buuru oo, o hokki taalibaabe 6ee njeda yimbe 6ee. Hono non liddi didi d6ii duu. <sup>42</sup> Be fuu 6e jaami faa 6e keddi.

<sup>43</sup> Taalibaabe 6ee ndeentini kedde dee, kebbini cagiije sappo e didi. <sup>44</sup> Ujunaaji joy gorko jaamunoo buuru oo.

*No Iisaa yaariri koyde dow ndiyam*

<sup>45</sup> Don tan, Iisaa yamiri taalibaabé mum naata laana kaa yalla ana adoo dum oo too bannge weendu nduu faade Baytisayda, tawi kanko e hoore makko omo wondi e yoppitinde jamaa oo. <sup>46</sup> Nde o seerti e maabé ndee, o njabboyi dow waamnde haayre faa o wada duwaawu.

<sup>47</sup> Nde jemma wari ndee, tawi laana kaa ana hakkunde weendu too, kanko tan gooto heddi njoorndi. <sup>48</sup> O soynii taalibaabé bee ana ngurfa ko mbaawi fuu, sabi 6e njabbotoobé henndu. Nde 6adinoowheetude ndee, o wari e maabé omo yaara koyde dow ndiyam dam, faa o hosi yaabbaade 6e. <sup>49</sup> Kaa nde 6e njii mo omo yaha e dow ndiyam dam ndee, 6e cikki dum seydaani, 6e ndarrii ebe ngulla, <sup>50</sup> sabi 6e fuu, nde 6e njinoo mo ndee, 6e kulii. Don e don Iisaa wii 6e:

—Mbaaltinee hakkillaaji moodon! Miin, mi Iisaa, pati kule!

<sup>51</sup> O naati laana kaa, o tawti 6e, henndu nduu darii. Be mugaa. <sup>52</sup> Be paamaano haaynde nde Iisaa wadiri buuru oo ndee, sabi 6e wumbe 6erde.

<sup>53</sup> Be lummbi weendu nduu, 6e njottii Genesaret, 6e panndi don. <sup>54</sup> Be njalti e laana kaa tan, yimbe 6ee annditi mo, <sup>55</sup> caakii e seraaji dii fuu, ana pawa jawbe mum'en e dengleeye, ana ngaddana mo nokku fuu do nanaa omo woodi. <sup>56</sup> Kasen duu do Iisaa tawaa fuu, gila e ley gure faa e geelle faa e ladde, yimbe 6ee ngaddan jawbe mum'en e daalaaje, ana jaagoo mo mo acca 6e mema fay so kommbol saaya makko. Kasen duu memdo dum fuu sellii.

## 7

*Haala neesu njaatiraabe*

<sup>1</sup> Farisa'en e yoga e dunkee'en Sariya iwnoo6e Urusaliima pilii Iisaa. <sup>2</sup> Be njii won e taalibaabé makko ana jaamira juude cobude, dum woni tawa lootiraali no tawaangal maabé worri nii. <sup>3</sup> Sabi Farisa'en e Yahuudiyankoo6e fuu jaamataa lootaali juude mum'en faa laaba, neesu njaatiraabe maabé oo 6e njokki. <sup>4</sup> So 6e ngartii luumo, 6e jaamataa so 6e lootaaki. E6e njogii neesuuji goddi keewdi 6i 6e njokki, ko wa'i hono lawyude kore loode e potiije e kaaki jakawalle. <sup>5</sup> E oon wakkati, Farisa'en e dunkee'en Sariya lamndii Iisaa, mbii:

—Kodum wadi so taalibaabé maa 6ee ana mbaasa rewde neesuuji njaatiraafe meeden dii, ana jaamira juude cobude?

<sup>6</sup> O jaabii 6e, o wii:

—Annabi Esaaya woofaali fey nde sappinoo e moodon, onon naafigi'en 6ee, ngol doo konngol:

«Ngol lejol e haala tan teddinirta kam,  
kaa e ley 6erde maabé 6ee ngodci kam.

<sup>7</sup> Meere 6e ndewata kam,  
sabi ko 6e tuugii e ley janngingol maabé koo yo jamirooje yimbe tan.»<sup>†</sup>

<sup>8</sup> Iisaa jokkini hen, wii:

—Odon njoppa jamirooje Laamdo dee, odon njokka neesuuji yimbe dii. <sup>9</sup> Eyyoo! Odon mbaawi salaade yamiroore Laamdo faa loomtinon nde neesu moodon! <sup>10</sup> Sabi Muusaa wii: «Teddin inna maa e baam maa.»<sup>‡</sup> O wii kasen: «Kufudo inna mum naa baam mum, wareede laato jukkungo mum.»<sup>§</sup> <sup>11</sup> Kaa onon, odon mbiya: so neddo wii inna mum naa baam mum: «Ko kaannoo-mi wallirde ma koo yo Korbaan» (dum woni sadaka Laamdo), <sup>12</sup> hankasen fotaa ko o walla inna makko naa baam makko. <sup>13</sup> Hono non tosirton konngol Laamdo neesuuji 6i ndonondirton dii. Kasen duu odon ngada kulle keewde baade non.

<sup>14</sup> Caggal dum, Iisaa nodditi jamaa oo, wii dum:

—Kettinanee kam, on fuu paamee: <sup>15</sup> Fay huunde naatataa e neddo so sobina dum, kaa kudde iwooje e neddo dee, kajum cobinta dum. [ <sup>16</sup>\* ]

<sup>17</sup> Nde Iisaa seertii e jamaa oo so naatoyi ley suudu ndee, taalibaabé mum 6ee lamndii dum maanaa banndol ngol. <sup>18</sup> O wii 6e:

—Onon duu, edum finkinii on naa? On paamaali ko iwata sella so naata e hunduko neddo koo, so6intaa joomum? <sup>19</sup> Sabi dum naataali e fernde joomum, e reedu mum naati, kasen duu dum yaltan.

Dii haalaaji Iisaa daginrii jaamdu fuu. <sup>20</sup> O wii kasen:

—Ko yaltata e fernde koo, dum so6inta neddo. <sup>21</sup> Sabi e fernde neddo miilooji bondi iwata so ndunya dum e faasigaaku e nguyka e jaako'aaku e <sup>22</sup>jeenu e joote e comndam e jammiba

\* 7:2 Ngol lootugol juude ha66aaki e ittude tuundi, kammari faa joomum fooccitanoo diina wadiraa. † 7:7 Esaaya 29.13 ‡ 7:10 Pergu 20.12; Fillitagal Tawreeta 5.16 § 7:10 Pergu 21.17; Lewinkoo6e 20.9 \* 7:16 Edereeji fooydi dii, yoga ana 6eyda aaya 16:Jom nowru fuu yo nanu!

e somburaaku e haasidaaku e mbonka e mawninkinaare, kajum e majjere. <sup>23</sup> Deen gede bonde fuu e 6ernde iwata, kasen duu kajum'en co6inta neddo.

*No debbo mo wanaa Yahuudiyanke goonaniri Iisaa*

<sup>24</sup> Iisaa iwi don fa'i leydi Tirus. O jippii e galle gooto. O yidaano fay gooto humpitoo omo ton, kaa o waawaano suuadae. <sup>25</sup> E ley dum, debbo gooto mo 6inngel mum dewel laddaa, nani haala makko ana haalee, hejanii mo sujidi yeeso makko. <sup>26</sup> Oon debbo wanaa Yahuudiyanke, o lejol Sirifenisi'en. O jaagii Iisaa itta ladde ndee e biyiiko oo. <sup>27</sup> Kaa Iisaa wii mo:

—Accu sukaabe bee kaara tafon. Sabi 6amde jaamdu sukaabe so tippoo dawaadi moyyaa.

<sup>28</sup> Debbo oo jaabii, wii mo:

—Goonga, Moobbo, kaa fay dawaadi minotoodi dii ana jaama jaamdu sukaabe iwooru e la'al so saama nduu.

<sup>29</sup> E oon wakkati, Iisaa wii mo:

—Saabe oo jaabu, hootu, ladde ndee yaltii e 6iya oo.

<sup>30</sup> E ley dum, o hooti, o tawi 6iyiiko oo ana lelili dow leeso, ladde ndee yaltii e mum.

*No Iisaa selliniri gorko paho mo haala mum laabaa*

<sup>31</sup> Iisaa iwi leydi Tirus, wardi leydi Sidon, tacciti leydi ndi geelle sappo ndii, warti weendu Galili. <sup>32</sup> O waddanaa gorko paho mo haala mum laabaa, o naagaa o fawa junngo makko e dow mum. <sup>33</sup> E oon wakkati, Iisaa wo6dintini mo jamaa oo, wadi pefeeli mum e noppi makko, siryi, memiri ciryee dee demngal makko. <sup>34</sup> Caggal dum, o tiggitii kammu, o uumi, o wii paho oo:

—Efata! (Dum woni: «Sukkita!»)

<sup>35</sup> Don e don, noppi gorko oo cukkiti, demngal mum tonngitii, hedde ana haalira no haalirtee nii. <sup>36</sup> Iisaa hadi yimbe bee haalande dum fay gooto. Kaa omo hada 6e dum tan, ebe 6eydoo haalde. <sup>37</sup> Be kaaynaa faa yottii kaaddi, efe mbiya:

—Golle makko fuu ana moyyi. Omo nanina faadubee, omo haalina muumdu6ee.

## 8

*No Iisaa jaamminiri ujunaaji nay neddo*

<sup>1</sup> E oon wakkati, jamaa keewdo hawriti kasen. Nde wonnoo 6e ngala ko 6e jaama, Iisaa noddi taalibaabe mum bee, wii dum'en:

<sup>2</sup> —Bee yimbe ana njurminii kam, sabi hannde woni balde tati ebe ngondi e am, 6e keddoraaki ko 6e jaama. <sup>3</sup> So mi yoppiti be koota tawee 6e jaamaali, 6e mbo66oto yolbere e laawol. Sabi yoga ma6be iwwi to woddi.

<sup>4</sup> Taalibaabe makko bee njabii mo, mbii:

—Hoto fuu kebaten ko jaamminen 6e e ley ndee ladde jeereende?

<sup>5</sup> O lamndii taalibaabe makko bee, o wii:

—Hono foti buuruuje njogi-don?

Be mbii mo:

—Buuruuje jeddi min njogii.

<sup>6</sup> E ley dum, o yamiri jamaa oo joodoo e leydi. O 6ami buuruuje jeddi dee, o yetti Laamdo, o tayi de, o hokki taalibaabe makko bee njeda jamaa oo. Be ngadirri non. <sup>7</sup> Ebe njoginoo kasen liikoy pamaroy seeda. Iisaa yetti Laamdo dow makkoy, wii taalibaabe mum bee njeda koy, kankoy duu. <sup>8</sup> Be jaami faa 6e keddi. Taalibaabe bee ndeentini kedde dee, de kebbini cagiijee jeddi. <sup>9</sup> Ebe poti ujunaaji nay neddo. Caggal dum, Iisaa yoppiti 6e, <sup>10</sup> naatidi e taalibaabe mum laana don e don, fa'i leydi Dalmanuuta.

*No Farisa'en ndaardiri taagumansa*

<sup>11</sup> Farisa'en bee ngari, pu6di huitondirde e Iisaa. Faa itta koro makko, 6e ndaardi mo o holla 6e taagumansa kaayniido iwoowo dow kammu. <sup>12</sup> Iisaa uumi, wii:

—Kodum wadi so oo doo jamaanu ana ndaara holleede taagumansa? Mido haalana on goonga: fay taagumansa gooto mo hebataa!

<sup>13</sup> Caggal dum, o seerti e mabbe, o naatti e laana kaa, o fa'i oo too banngi.

<sup>14</sup> Taalibaabe bee njeggitii yoobaade jaamdu, sabi buuruwal gootal tan heddinoo e ley laana kaa. <sup>15</sup> E oon wakkati, o yaggini 6e, o wii:

—Kakkilee, ndeentee e yuufinirdi Farisa'en ndii e ndi Hirudus ndii.

<sup>16</sup> Taalibaabe bee ndarii ana kaalda ana mbiya ko en njoo6aaki buuru koo o wiiri non.

<sup>17</sup> Iisaa anndi ko 6e kaalata koo, wii 6e:

—Ko wadi so odon kaalda hakkunde moodon on njoo6aaki buuru? Tama faa jooni on paamataa? Naa on wumbe 6erde? <sup>18</sup> Odon njogii gite, on njiyatuaa naa? Odon njogii noppi,

on nanataa naa? Tama on miccitaaki <sup>19</sup> nde njedu-mi ujunaaji njoyon gorko buuruuje joy ndee, cagiije hono foti kebbin-don kedde?

Be njaabii mo, 6e mbii:

—Cagiije sappo e didi.

<sup>20</sup> O lamndii 6e kasen, o wii:

—Nde njedu-mi ujunaaji nay neddo buuruuje jeddi ndee, cagiije hono foti kebbin-don kedde?

Be njaabii mo, 6e mbii:

—Cagiije jeddi.

<sup>21</sup> Nden, o wii 6e:

—Faa jooni on paamataa naa?

*No Iisaa wumtiniri bumdo ley Baytisaya*

<sup>22</sup> Be njottii Baytisaya, Iisaa waddanaa bumdo, o ndaardaa o mema dum. <sup>23</sup> O nanngi bumdo oo, o renni dum ngeenndi ndii. Caggal dum, o siryi e gite mum, o fawi juude makko e mum, o lamndii dum, o wii:

—Won ko njiyataa naa?

<sup>24</sup> Bumdo oo feerti gite mum, wii:

—Mido yiya yimbe, kaa ebe mba'ani kam no ledde jahooje nii.

<sup>25</sup> Iisaa fawi juude mum e gite makko kasen. Nden o tawi o sellii, o wonti yiide no laasiri.

<sup>26</sup> Iisaa wii mo:

—Hootu, kaa pati mbirfito-daa ley ngeenndi ndii.

*No Piyeer wiiri Iisaa woni Almasiihu*

<sup>27</sup> Caggal dum, Iisaa e taalibaabe mum pahi geelle 6adaangal Kaysariya Filipa. O lamndii 6e dum doo e laawol:

—Homo yimbe mbiyata ngon-mi?

<sup>28</sup> Be njaabii mo, 6e mbii:

—Won wiyoobe a Yaaya mo lootagal batisima, won wiyoobe a annabi Iliyasa, won wiyoobe kasen a gooto e annabaabe bee.

<sup>29</sup> O lamndii 6e, o wii:

—Onon nee, homo mbiyatlon ngon-mi?

Piyeer jaabii mo, wii:

—Aan woni Almasiihu.

<sup>30</sup> E ley dum, o daalii 6e daaloore sattunde pati 6e kaalana dum fay gooto.

*No Iisaa sapporii maayde mum e wuurtugol mum*

<sup>31</sup> O fuddi famminde 6e:

—Ana tilsi Bii Neddo torree torraaji keewdi, mawbe bee e hooreebe yottinoobe sadaka e dunkee'en Sariya tippitoto mo. O waree, caggal balde tati o immitoto.

<sup>32</sup> O haalani 6e dum faa laafi, nii Piyeer sawndintini mo, wii pati o haala hono dii haalaaji.

<sup>33</sup> O yeecitti, o yeewi taalibaabe makko bee, o jahii e Piyeer, o wii:

—Woddam aan Ibiliisa! Sabi miilooji maa dii iwrataa to Laamdo, to yimbe di iwrata.

*No Iisaa jokkirtee*

<sup>34</sup> Caggal dum, o noddi jamaa oo e taalibaabe makko bee, o wii dum'en:

—Muuydo jokkude kam fuu, yootta yurmaade hoore mum, 6ama leggal mum bardugal, jokka e am.\* <sup>35</sup> Sabi muuydo danndude yonki mum, waasan ki. Kaa baasirdo ki sabaabu am e sabaabu Kabaaru Lobbo oo, danndan ki. <sup>36</sup> Kodum hebude aduna oo fuu nafata neddo so tawii waasii yonki mum? <sup>37</sup> Won ko neddo waawi hokkitirde faa soottitoo yonki mum naa? <sup>38</sup> Neddo fuu jaannoriido kam miin e haalaaji am dii e ley oo jamaanu cobudo, luuttudo Laamdo, miin, Bii Neddo oo duu, mi yaannorto dum nde mi wardii e malaa'ika'en seniife e ley teddeengal Baabiraado am.

## 9

<sup>1</sup> O wii 6e kasen:

—Mido haalana on goonga: yoga e wonbe doo bee maayataa tawee njiyaali Laamu Laamdo oo ana warda baawde.

*Haala waylitagol noone Iisaa*

<sup>2</sup> Balde jeegom caggal mum, Iisaa yaadi e Piyeer e Yaakuuba e Yuhanna, o teeldoyi e mum'en dow waamnde haayre toownde. Noone makko waylitii yeeso ma6be. <sup>3</sup> Kaddule

\* <sup>8:34</sup> Maanaa 6amde leggal bardugal woni fellisidde mursude yonki mum hono no Iisaa nii.

makko ngatti jalgude, ndawni far faa fay cuuwoowo gooto waawaa rawninierde non e aduna oo.<sup>4</sup> Iliyaasa e Muusaa 6anngani 6e, ana kaalda e Iisaa.<sup>5</sup> E ley düm, Piyeer wii mo:

—Moobbo, gonal amen doo ana moyyi. Dal min ndarna doo buguuji tati: aan wooturu, Muusaa wooturu, Iliyaasa wooturu.

<sup>6</sup> O anndaano ko o haalannoo, sabi kulol manngol naati 6e, kambe taalibaabe 6ee. <sup>7</sup> Luurde wari suddi 6e, daande iwri e ley lurure ndee ana wiya:

—Oo doo yo Biyan mo korsin-mi. Kettindee mo!

<sup>8</sup> Don e don, taalibaabe 6ee tiggiti, njyali fay gooto so wanaa Iisaa tan.

<sup>9</sup> Eley ko 6e njippotoo waamnde haayre ndee koo, o daalii 6e pati 6e kaalana fay gooto ko 6e njii koo faa wakkati nde Bii Neddo oo wuurti e hakkunde maayfe fuu.<sup>10</sup> Be njabii konngol ngol, kaa 6e ndarii e6e lamndondira e ko'e maabbe kodum woni maanaa wuurtude e hakkunde maayfe.

<sup>11</sup> Caggal düm, 6e lamndii mo, 6e mbiit:

—Kodum wadi so dunkee'en Sariya 6ee ana mbiya annabi Iliyaasa haani adaade Almasihu warde?

<sup>12</sup> O jaabii 6e:

—Goonga, Iliyaasa adotoo warde tafon moyyintide kulle dee fuu. Ndennoo ko saabii so Bindii dii mbiit ana tilsi Bii Neddo torree torraaji keewdi, hoynee?<sup>13</sup> Mido haalana on: Iliyaasa warii, 6e ngollii düm kambe duu ko 6e muuyi fuu, hono no haala makko haaliraa e Binndi dii nii.

#### No Iisaa selliniri suka laddaado

<sup>14</sup> Nde 6e ngarti e taalibaabe heddiibe 6ee ndee, 6e njii jamaa keewdo ana filii düm'en, dunkee'en Sariya 6ee ana njeddondira e mum'en.<sup>15</sup> Yimbe 6ee njii Iisaa tan, 6e fuu 6e kaaynaa, 6e ndogi 6e njaaboyii mo.<sup>16</sup> O lamndii 6e, o wii:

—Kodum njeddondirton e maabbe?

<sup>17</sup> Gorko gooto jaabii mo e jamaa oo, wii:

—Moobbo, mi gaddando ma 6iyam gorko mo ladde muumdini.<sup>18</sup> Do ladde ndee immorii mo fuu, li6an mo e leydi, hunduko makko yufa ngufo, o njeryondira jiiye, o yoora kolon. Mi jaagike taalibaabe maa 6ee ndibba nde, kaa 6e ndonkii.

<sup>19</sup> Iisaa wii yimbe see:

—Hey yimbe jamaanu jooni 6e nganaa goondinbe! Faa mande tilotoo-mi e mon? Faa mande keddotoo-mi mujandae on? Ngaddanee kam suka oo!

<sup>20</sup> O waddanaa oon. Nde ladde ndee yii Iisaa ndee, dimmbi suka oo, li6i düm, hedde suka oo ana talloo e leydi, hunduko mum ana yufa ngufo.<sup>21</sup> Iisaa lamndii baaba suka oo, wii:

—Gila mande dum hebi mo?

Baaba oo jaabii, wii:

—Gila omo famdi.<sup>22</sup> Kasen duu wakkati fuu ladde ndee ana li6a mo ley yiite naa ndiyam faa halka mo. Yurma min, mballaa min so tawii ada waawi!

<sup>23</sup> Iisaa wii mo:

—So mido waawi mbii-daa? Huunde fuu ana waawi laatanaade goondindo.

<sup>24</sup> Don e don, baaba suka oo wulli, wii:

—Mi goondinii, kaa wallam, sabi goondinde ana tiidi kam!

<sup>25</sup> Nde Iisaa yii jamaa oo ana doga ana wara ndee, jahii e ladde ndee, wii düm:

—Ladde muumdinore faadinoore, mi yamirii ma yaltu e suka oo, pati naattu e makko abada kasen!

<sup>26</sup> Ladde ndee wulli, dimmbi suka oo semmbe, yalti. O wa'i no maaydo nii, faa ko heewi e wonnoobeé dón 6ee ndarii ana mbiya o maayii.<sup>27</sup> Kaa Iisaa nanngi junngo makko, immini mo tan, o darii.

<sup>28</sup> Nden Iisaa naati suudu, taalibaabe mum 6ee teeldi e mum, lamndii düm, mbiit:

—Kodum wadi so min ndonki ribbude ladde ndee?

<sup>29</sup> O jaabii:

—Ndee ladde, sii mum ribbirtaake so wanaa duwaawu.

#### No Iisaa haaliri didabol maayde mum e wuurtugol mum

<sup>30</sup> Be iwi dón, 6e ceeki leydi Galili. O yidaa fay gooto annda düm,<sup>31</sup> sabi omo waajotonoo taalibaabe makko 6ee, kasen duu omo wiyanloo düm'en:

—Bii Neddo oo wadete e juude yimbe, 6e mbara mo, kaa e ley baldé tati caggal maayde makko, o wuurtan.

<sup>32</sup> Kaa taalibaabe makko 6ee paamaali haala kaa, kulii lamndaade mo.

#### Haala burdo teddude

<sup>33</sup> Be njottii Kafarnahum. Nde 6e njippinoo e galle ndee, o lamndii taalibaabe makko, o wii:

—Kodum njeddondir-don e laawol ngol?

<sup>34</sup> Be ndeyyinii. Ko be njeddondiri e laawol ngol dee, 6urdo teddude. <sup>35</sup> Ndennoo lisaa joodii, noddi taalibaabe sappo e difon see, wii dum'en:

—Muuyodo ardaade fuu, caggal heddiise bee heedata, laatoo golloowo maabbe 6e fuu.

<sup>36</sup> Caggal dum, o nanngi junngo cukalel, o darni ngel yeeso maabbe, o huufi ngel, o wii 6e:

<sup>37</sup> —Neddo fuu jaabbiido cukalel gootelo hono ngel e innde am, miin jaati o jaabbi. Kasen duu jaabbiido kam fuu, wanaa miin tan jaabbi, jaabbiike neldo kam oo duu.

<sup>38</sup> Yuhanna wii mo:

—Moobbo, min njii gorko gooto ana ribbira seydaani'en innde maa. Min kadii mo, sabi o jokkaali e meeden.

<sup>39</sup> Kaa lisaa wii:

—Pati kadee mo dum, sabi fay gooto waawaa wadirde kaayde e innde am, so sakitoo bonkoo kam don e don. <sup>40</sup> Sabi mo honnaaki en fuu, e meeden wondi. <sup>41</sup> Mido haalana on goonga: neddo fuu dokkudo on horde ndiyam kammari on yimbe Almasiihu, o waasataa hebude mbarjaari makko.

<sup>42</sup> Neddo fuu luuttindo gootelo koy cukaloy goondinkoy kam, ko buri moyyande joomum haayre teddunde habbee e daande mum, tippee e geeci. <sup>43</sup> So tawii junngo maa luuttinte, tayu ngo. Naataa e nguurndam nduumiidi a jakudo buri moyyande ma diina naatude e jahannama yiite nge njifataa tawee a kiibudo. [ <sup>44</sup>\* ] <sup>45</sup> So tawii koyngeal maa luuttinte, tayu ngal. Naataa e nguurndam nduumiidi a jakudo buri moyyande ma diina tippeede e jahannama a kiibudo. [ <sup>46</sup>† ] <sup>47</sup> Kasen duu so yitere maa luuttinte, sol nde. Sabi naatude maa e Laamu Laamdo a dokko buri moyyande ma diina tippe-daa e jahannama a kiibudo. <sup>48</sup> Don, «gildi mum mbaatataa, yiite mum duu njifataa.»<sup>‡</sup> <sup>49</sup> Sabi gooto fuu laabbinirte yiite hono no sadakaaji laabbinirtee lammam nii. <sup>50</sup> Lamdam yo huundee lobbere, so lammam njottii lammude, kodum lamminta dum? Ngadee lammam e moodon, moyyondiron.

## 10

### *Haala ceergal*

<sup>1</sup> O iwi don, o feewi leydi Yahuudiya e funnaange maayo Urdun. Yimbe heewbe pilii mo, o darii omo waajoo dum'en kasen, hono no o woownoo nii. <sup>2</sup> Yoga e Farisa'en ngari faa itta koro makko, lamndii mo:

—Tama ana daganii gorko seerde jom suudu mum?

<sup>3</sup> O jaabbi 6e:

—Kodum Muusaa yamiri on?

<sup>4</sup> Be njaabbi, 6e mbii:

—Muusaa yamirii gorko winnda talkuru ceergal nde ana seera jom suudu mum.\*

<sup>5</sup> E ley dum, o wii 6e:

—On yoorbe 6erde, dum saabii so Muusaa winndani on nden yamiroore. <sup>6</sup> Kaa gila e fuddode, «Laamdo tagii 6e wadii 6e gorko e debbo. <sup>7</sup> Dum wadi so gorko yoppan inna mum e baam mum, <sup>8</sup> 6e difon fuu 6e laatoo neddo gooto.»<sup>†</sup> Nii woni 6e nganaa difon kasen, 6e neddo gooto. <sup>9</sup> Ndennoo, pati neddo seenndu ko Laamdo reentini.

<sup>10</sup> Nde 6e koontuno cuudi ndee, taalibaabe makko bee lamndii mo haala majjum. <sup>11</sup> O wii 6e:

—Ceerdo jom suudu mum fuu so 6ami goddo, jeenii, <sup>12</sup> hono non duu, debbo cuutaniido gorum, so gorko goddo 6ami dum, oon debbo jeenii.

### *No lisaa duwanorii cukaloy*

<sup>13</sup> Won waddanee lisaa cukaloy, yalla ana mema koy, non taalibaabe bee njahii e yimbe bee. <sup>14</sup> Nde o yii dum ndee, o berni, o wii taalibaabe bee:

—Accee cukaloy koy ngara e am, pati kadee koy, sabi wa'ube no makkoy nii 6ee njey Laamu Laamdo oo. <sup>15</sup> Mido haalana on goonga: mo jaabiraali Laamu Laamdo oo no cukalel nii fuu, naatataa hen.

<sup>16</sup> Caggal dum, o huufi cukaloy koy, o fawi junngo makko e makkoy, o duwanii koy.

### *No lisaa e gorko arsukunte ngaddi*

\* <sup>9:44</sup> E dereejii booydi dii, yoga ana beyda aaya 44:Don, gildi mum mbaatataa, yiite mum duu njifataa. Yeew aaya 48.

† <sup>9:46</sup> E dereejii booydi dii, yoga ana beyda aaya 46:Don, gildi mum mbaatataa, yiite mum duu njifataa. Yeew aaya 48.

‡ <sup>9:48</sup> Esaaya 66.24 \* <sup>10:4</sup> Fillitagol Tawreeta 24.1 † <sup>10:8</sup> Puddoofe 1.27; 2.24

<sup>17</sup> Nde Iisaa nanngunoo laawol ndee, gorko gooto dogani mo, diccii yeeso makko, lamndii mo, wii:

—Moobbo moyyo, kodum kaan-mi wadude faa mi heba nguurndam nduumiidam?

<sup>18</sup> Iisaa wii mo:

—Ko saabii so ada noddira kam moyyo? Moyyo walaa so wanaa gooto, oo woni Laamdo.

<sup>19</sup> Ada anndi dii doo sariyaaji: «Pati jaadu hoore, pati jeenu, pati wujju, pati seeda fenaande, pati tooju, teddin inna maa e baam maa.»<sup>‡</sup>

<sup>20</sup> Gorko oo jaabii mo, wii:

—Moobbo, mido haybi dum fuu gila e cukaaku am.

<sup>21</sup> Nden Iisaa yeewi mo, yidi mo, wii mo:

—Huunde wootere ana naku maa: yaa soottoy ko njogi-daa koo fuu, ndokkaa kaalisi oo misikiina'en. Nden, a heban jawdi dow kammu. Caggal dum, ngaraa njokkaa kam.

<sup>22</sup> Kaa nde gorko oo nani diin haalaaji ndee, jirfinii, wittidi e metti, sabi o arsukunte noldo. <sup>23</sup> Iisaa yeewi taalibaabe mum bee, wii:

—Hee naatugol arsukunte e Laamu Laamdo ana tiid!

<sup>24</sup> Taalibaabe bee mugaa e diin haalaaji. O beydi hen kasen, o wii be:

—Sukaabe am, hee naatude e Laamu Laamdo ana tiid! <sup>25</sup> Sabi ngelooba yaabboroo e wuddere mesalal buri newaade diina naatugol arsukunte e Laamu Laamdo.

<sup>26</sup> Taalibaabe bee beydi mugeede, hedde ana lamndondira e ko'e mum'en ana mbiya:

—Ndennoo, homo woni kisoowo?

<sup>27</sup> O yeewi be, o wii:

—Do yimbe dum laataaako, kaa edum laatoo to Laamdo. Sabi walaa fuu ko Laamdo waawaan.

<sup>28</sup> Nden, Piyeer darii ana wiya mo:

—Minen, min njoppii fuu min njokkii e maa!

<sup>29</sup> O jaabii dum, o wii:

—Mido haalana on goonga: neddo fuu joppirdo saabe am e saabe Kabaaru Lobbo oo galle mum naa sakiraabe mum worbe naa sakiraabe mum rewbe naa inna mum naa baam mum naa sukaabe mum naa gese mum, <sup>30</sup> heban ko buri dum cowe teemedere e oo doo wakkati mo ngon-den e mum jooni: joomum heban galileeji e sakiraabe worbe e sakiraafse rewbe e inniraabe e sukaabe e gese, torrete duu. E ley wakkati garoyoowoo oo duu, joomum heban nguurndam nduumiidam. <sup>31</sup> Kaa ardinoobe heewbe laatoto caggalaabe, caggalaabe bee laatoto ardiibe.

### No Iisaa sapporii nde tatabere maayde mum e wuurtugol mum

<sup>32</sup> Ee e laawol faa ee njabbita Urusaliima. Iisaa ardiibee, tawi taalibaabe bee ana curli, jokkunoobe e maabbe bee duu yo hulbe. O noddi taalibaabe sappo e didon bee, o darii omo haalana dum'en ko warata hebude mo. <sup>33</sup> O wii be:

—Kettinee, eden nii njabbita Urusaliima, don Bii Neddo oo wadetee e juude hooreebe yottinoobe sadaka e dunkee'en Sariya. Be caran mo waree, be ngada mo e juude heefere. <sup>34</sup> Been njaayran mo, tutta e makko, piya mo dorri, mbara mo. Kaa balde tati caggal mum, o wuurtan.

### No Yaakuuba e Yuhanna jaagorii Iisaa

<sup>35</sup> Caggal dum, Yaakuuba e Yuhanna biibbe Jebede bee ngari e Iisaa, mbii dum:

—Moobbo, won ko min njidi jaagaade ma, minden njidi ngadanaa min dum.

<sup>36</sup> O wii be:

—Kodum njid-don mi wadana on?

<sup>37</sup> Be njaabii mo:

—Ngadanaa min min njoodoo oo banne maa jaamo, oo banne maa nano e ley teddeengal maa.

<sup>38</sup> O jaabii be, o wii:

—On anndaa ko jaagoto-don. Odon mbaawi yarde horde mettunde nde njaran-mi ndee, naa batiseede batisima naawfo mo mbatisetee-mi oo naa?

<sup>39</sup> Be njaabii mo, be mbii:

—Miden mbaawi.

O wii be:

—On njaran horde nde njaran-mi ndee, kebon batisima mo mbatisetee-mi oo. <sup>40</sup> Kaa joodagol banne maa jaamo naa nano wanaa miin yamirta dum. Deen joolle, be Laamdo moyyinani dum'en bee njey dum.

<sup>41</sup> Nde taalibaabe sappo heddiibe 6ee nani dum ndee, mettaa e Yaakuuba e Yuhanna.  
<sup>42</sup> Iisaa noddi 6e fuu, wii:

—Odon anndi jataabe laamii6e heefer6e 6ee, ana kawjorii yim6e mum'en hawju bondo, maw6e 6ee duu ana laamorii laamu bodeejo. <sup>43</sup> Onon kaa, dum waataa hakkunde moodon. So won jiddo teddeengal hakkunde mon, ana haani laataade golloowo moodon.  
<sup>44</sup> Kasen so won muuyod ardaade e mon, ana haani laataade maccud6 moodon, on fuu.  
<sup>45</sup> Sabi fay Bii Neddo wardaali faa gollanee, gollande yim6e wardi, hokkitira yonki mum yalla ana laatoot coottitaari heew6e.

### No Iisaa wumtiniri Bartime

<sup>46</sup> Be njottii Yeriko. Nde Iisaa e taalibaabe mum 6ee njalti ngeenndi ndii ndee, kam6e jamaa keew6o, 6e tawi bumdo biyeteedo Bartime 6ii Time ana joodii ana garbinoo e sera laawol ngol. <sup>47</sup> Nde o nani Iisaa Nasaraatunke oo Bettotoo don ndee, o darii omo wulla omo wiya:

—Iisaa, taanii Daawuuda, yurmam!

<sup>48</sup> Heew6e ndarii ana njahoo e makko ana mbiya o deyyinoo, kaa o 6eydii wullude, omo wiya:

—Taanii Daawuuda, yurmam!

<sup>49</sup> Iisaa darii, wii:

—Noddee mo.

Nden, 6e noddi bumdo oo, 6e mbii dum:

—Seya, imma, o noddii ma.

<sup>50</sup> O gurbitti, o tippii disaare makko, o wari e Iisaa. <sup>51</sup> Iisaa lamndii mo, wii:

—Kodum njid-daa mi wadane?

Bumdo oo jaabii mo, wii:

—Moobbo, mi hewta gite am.

<sup>52</sup> Iisaa wii mo:

—Yaa, goondinal maa danndii ma.

Don e don o wumti, o yaadi e Iisaa jahaangal muudum ngal.

## 11

### No Iisaa naatiri Urusaliima

<sup>1</sup> Nde 6e 6adinoo Urusaliima, 6e njottii Baytifaaji e Baytaniya, dow waamnde haayre wiyyeteende Jaytun, Iisaa neli taalibaabe mum didon, <sup>2</sup> o wii 6e:

—Njehee naatoyee ngeenndi ngonndi yeeso mon ndii. Oon wakkati fuu, on tawan mola ndakiwa nga fay gooto waddaaki abada ana ha66ii. Kumton nga, ngaddon nga doo. <sup>3</sup> So won biido on ko ngatton nga, njaabo-don Moobbo ana haajaa nga. Don e don on njoppete ngaddon nga.

<sup>4</sup> Be njehi, 6e tawi mola ana ha66ii damal sella, 6e kumti dum. <sup>5</sup> Yoga e darinoobe don 6ee lamndii 6e:

—Kofum ngollaton doo? Ko kumtirton mola ngaa?

<sup>6</sup> Be njaaborii been no Iisaa wiirunoo nii. Been njoppi 6e. <sup>7</sup> Be nabani Iisaa mola ngaa, 6e njappi e magga saayaaji ma66e, o waddii. <sup>8</sup> Heew6e mbeerti saayaaji mum'en e laawol, wo66e kelti cafe ledde sera ton, mbeerti de e laawol ngol. <sup>9</sup> Bee ardi mo, 6ee keedi caggal makko e6e ilinoo:

—Jettooje e barke ngoodanii gardoovo e dow innde Joomiraado! <sup>10</sup> Barke woodanii laamu njaati meeden Daawuuda, laamu garoovo oo! Jettooje ngoodanii Laamdo Toowd!

<sup>11</sup> Iisaa njabbiti Urusaliima tan, naatoyi Suudu Dewal Mawndu nduu. Nde o yiino ko woni e mayru fuu ndee, o feewi Baytaniya kanko e sappo e didon 6ee, tawi hiirii.

### No Iisaa hu6ri ibbi

<sup>12</sup> Jaango mum, caggal 6e ndawii Baytaniya, tawi omo yolbi. <sup>13</sup> O soynii ibbi mbillitikki, o yehi yeewoyde yalla omo tawa e makki 6i66e. Nde o yottinoo ki ndee, o tawaali e makki so wanaa haakolooji. Sabi oon wakkati wanaa wakkati rimugol ibbe. <sup>14</sup> O wii ibbi kii:

—Pati fay gooto naamu 6i66e maa abada kasen!

Taalibaabe makko 6ee nani dum.

### No Iisaa ribbirijaagtoobe ley Suudu Dewal Mawndu

<sup>15</sup> Be njottii Urusaliima, Iisaa naati daalaare Suudu Dewal Mawndu nduu, o darii omo ribba soodoobe e soottoobe wonfse ley mayre 6ee. O li6i taabe weccoobe kaalisi e joodorde soottoobe buugaaaji. <sup>16</sup> O dalaali fay gooto seeka daalaare Suudu Dewal Mawndu nduu ana roondii kaaki. <sup>17</sup> O waajii 6e:

\* 11:9 Jabuura 118.25-26

—Tama wanaa ana winndii: «Suudu am nduu noddirte suudu rewrudu leji fuu!»<sup>†</sup> Kaa onon, on ngadii ndu suuforde yanoobe.<sup>‡</sup>

<sup>18</sup> Hooreebe yottinoobe sadaka e dunkee'en Sariya nani dūm, ndaari no masinbinira mo. Be kuli mo, sabi waaju makko oo naatii jamaa oo sanne. <sup>19</sup> Nde hiirnoo ndee, kanko e taalibaabe makko be njalti neenndi ndii.

### *Haala duwaawu gondudo e goondinal*

<sup>20</sup> Janngo mum, beetee law, ebe bettoroo to ibbi kii too, be njii ki yoorii kolon faa yottii dadi. <sup>21</sup> Piyeer miccitii, wii mo:

—Moobbo, yeew! Ibbi kii kuduno-daa kii yoorii.

<sup>22</sup> Isaaa jaabii, wii be:

—Ngoodinee Laamdo! <sup>23</sup> Mido haalana on goonga: neddo fuu biido ndee waamnde haayre: «Doofa, saamoy ley maayo geeci», sikkitaaki ley fernde mum, goondinii ko wii koo wadan, jaabante. <sup>24</sup> Dum saabii so mido wiya on: ko jaagi-don e ley duwaawu fuu, ngoondinee on keebi dūm, nden, on njabante. <sup>25</sup> Nde ndari-don faa ngadon duwaawu fuu, so won gaafunoodo on huunde, njaafee dūm, yalla Baabiraado mon gondo dow kammu oo ana yaafuu on luutti moodon. [ <sup>26</sup> § ]

### *Doyamiroore golle Isaaa iwri*

<sup>27</sup> Be mbirfitii Urusalima kasen. E ley no o yiilortoo ley Suudu Dewal Mawndu nii, hooreebe yottinoobe sadaka e dunkee'en Sariya e mawbe battitii mo <sup>28</sup> lamndii mo:

—Yamiroore hende ngollirtaa ko ngollataa koo? Homo yamir maa ngollaas dūm?

<sup>29</sup> Isaaa wii:

—Huunde wootere tan lamndotoo-mi on. Njaabo-don kam, mi haalanan on jamirdo kam mi golla ko ngollan-mi koo. <sup>30</sup> Lootagal batisima Yaayaa ngal to Laamdo iwri naa to yimbe? Njaabee kam!

<sup>31</sup> Be ndawridi hakkunde maabbe, be mbii:

—So en mbii to Laamdo, o wiyan: «Ndennoo ko saabii so on ngoondinaali Yaayaa?» <sup>32</sup> En miyan «yimbe» naa?

Ebe kula yimbe bee sabi be fuu ebe njogorii Yaayaa yo annabaajo jaati. <sup>33</sup> Be njaabii Isaaa, be mbii:

—Min anndaa.

Isaaa wii be:

—Haya miin duu, mi haalantaa on yamiroore nde ngolliran-mi ko ngollan-mi koo.

## 12

### *Banndol haala remooobe bonbe*

<sup>1</sup> Isaaa fuddi haaldirde e maabbe e banndol, o wii:

—Neddo gooto tuti ngesa peguuje, o filtini nga kokowol, o asi ngaykaare foosirde, o mahi doomirdu. Caggal dūm, o hasiri nga woobbe, o dawi. <sup>2</sup> Nde tebugol yottinoo, o neli golloowo makko to remoobe bee too, be ngaddanoya mo ngedu makko e biibbe peguuje dee. <sup>3</sup> Be nanngi nelaado oo, be pii dūm, be mbirfini dūm juude teete. <sup>4</sup> O neli e maabbe golloowo makko goddo. Be koyni dūm, be eli dūm. <sup>5</sup> Jom ngesa oo neli kasen golloowo mum tataaboo, be mbari dūm. Non be ngadifri woobbe heewbe: be pii yoga, be mbari yoga. <sup>6</sup> Jooni kaa gooto tan o heddirii, biyiiko korsudo oo. Sakitii o neli oo duu e maabbe, o wii: «Be njaagoto siyam oo.» <sup>7</sup> Kaa remoobe bee mbiyondiri e ko'e mum'en: «Oo woni donoovo mo. Ngaree mbaran mo, keddoro-den ngesa ngaal!» <sup>8</sup> Be nanngi biddo oo, be mbari dūm, be mbedii dūm to caggal ngesa too.

<sup>9</sup> Jooni nee, hono jom ngesa oo wadata? O waran, o halka remoobe bee, o hasira ngesa ngaa woobbe. <sup>10</sup> Tama on njangaali ko winndaa ley Binndi dii koo?

«Haayre nde mahooibe bee tippitiit ndee,  
kanjum latattii haayre burnde fuu teentilaade e maadi ndii.

<sup>11</sup> Dum yo golle Joomiraado,

kanjum dūm haaynde e jiile meeden!»\*

<sup>12</sup> Hooreebe Yahuudiyanchoofe tewti no nanngira Isaaa, sabi be paamii ngol banndol e maabbe fewti. Kaa be cuusaano jamaa oo, dūm wadi so be njoppi mo, be mbitti.

### *Haala yobugol lampo*

<sup>13</sup> Be neli e makko yoga e Farisa'en e howruuobe Hirudus yalla ana tuufinira mo konngol makko. <sup>14</sup> Be ngari, be mbii mo:

---

† 11:17 Esaaya 56.7      ‡ 11:17 Yeremiya 7.11      § 11:26 E dereeji 6ooydi dii, yoga ana 6eyda aaya 26:Kaa so on njafataako, Baabiraado mon gondō dow kammu oo yaafataako on onon duu luutti moodon. \* 12:11 Jabuura 118.22-23

—Moobbo, miden anndi a goongirante: a hulataa fay gooto, sabi a gurdintaa yimbe, ada jannginira laawol Laamdo ngol goonga. Ana dagoo min ndokka kaananke Roma mawdo oo lampo naa dagaaki? Min ndokka mo naa pati min ndokka mo?

<sup>15</sup> Nde wonnoo omo anndi naafigaaku maabe, o wii be:

—Kodum wadi so odon tuufana kam? Ngaddanee kam mbuuudu cardi faa mi yiya dum.

<sup>16</sup> Be ngaddani mo. O lamndii fe:

—Natal homo e innde homo woni doo?

Be mbii mo:

—Kaananke Roma.

<sup>17</sup> O jaabii be, o wii:

—Ndennoo ndokkee kaananke Roma ko jey, ndokkee Laamdo duu ko jey.

Be kaaynaa e makko.

#### *Haala immital maabye*

<sup>18</sup> Yoga e Saduki'en ngari e makko. Kambe ngoni fennuue immital. Be lamndii mo, be mbii:

<sup>19</sup> —Moobbo, Muusaa yamirii en so neddo maayii hebaali biddo, mijnum naa mawnun 6amta debbo dalaado oo yalla ana hebana dum beeyngu.<sup>†</sup> <sup>20</sup> Wadiino e bettaade rimdaaabe njeddon. Arano oo 6ami debbo, maayi, hebaali biddo. <sup>21</sup> Didabo oo 6amti debbo oo, kajum duu maayi hebaali biddo. Tatabo oo duu wadi hono non. <sup>22</sup> Hono nii njeddon bee fuu famiri mo, dalaali biddo. Caggal maabe be fuu, debbo oo duu maayi. <sup>23</sup> Ndennoo, jannde immital, homo e maabe debbo oo laatotoo jom suudu mum? Sabi be njeddon fuu be 6amiino mo!

<sup>24</sup> Iisaa jaabii be, wii:

—Hee on majji! On paamaali Binndi dii, on paamaali baawde Laamdo dee. <sup>25</sup> Sabi so maaybe immitike, worbe 6amataa, rewbe 6amataake, be laatoto hono no malaa'ika'en wonbe dow kammu bee nii. <sup>26</sup> Ko maaybe immitoto koo, on njanngaali e dewtere Muusaa haala wuutture, hono Laamdo haaldiri e makko, wii: «Miin woni Laamdo Ibarahiima, Laamdo Isiyaaka, Laamdo Yaakuuba»?<sup>‡</sup> <sup>27</sup> Laamdo yo Laamdo wuurbey, wanaa Laamdo maaybe.<sup>§</sup> On majjuube sanne.

#### *Haala yamiroore burnde teentilaade*

<sup>28</sup> Dunkee Sariya gooto 6attitii Iisaa, nani jeddondiral maabe, nani o jaabike Saduki'en bee faa gasi, lamndii mo:

—Jamirooje dee fuu, honde 6uri teentilaade?

<sup>29</sup> Iisaa jaabii mo:

—Burnde fuu teentilaade e jamirooje dee yo ndee doo: «Hettina Israa'iila, Laamdo Joomiraado meeden oo tan woni Joomiraado.<sup>30</sup> Yidir Laamdo Joomiraado maa 6ernde maa fuu e yonki maa fuu e hakkille maa fuu e semmbe maa fuu.»<sup>\*</sup> <sup>31</sup> Didaberde ndee yo hono mayre, kayre woni: «Njidiraa tanaa maa no njidir-daa hoore maa nii.»<sup>†</sup> Walaa fuu yamiroore burnde dee didi teentilaade.

<sup>32-33</sup> Dunkee Sariya oo wii mo:

—Moobbo! A haalii goonga nde mbii-daa Laamdo tan woni Joomiraado, kasen duu Laamdo goddo walaa so wanaa kanko. E yidirde Laamdo 6ernde fuu e hakkille fuu e semmbe fuu, e yidirde tanaa no hoore mum nii, kanjum 6uri sadakaaji duppamaajii e kirsamaajii fuu! Haala maa ana selli sanne.

<sup>34</sup> Nde Iisaa yii o jaaborike hakkilantaaku ndee, wii mo:

—A woddaa Laamu Laamdo oo.

Caggal dum, fay gooto suusaali lamndaade Iisaa huunde.

#### *Haala Almasiihu e Daawuuda*

<sup>35</sup> Nde Iisaa waajotoo ley Suudu Dewal Mawndu ndee, wii:

—Hono dunkee'en Sariya bee mbaawiri wiirude Almasiihu oo yo taanii Daawuuda tan?

<sup>36</sup> Sabi Daawuuda e hoore mum wiirii Ruuhu Ceniido:

«Joomiraado wii Joomam:

Jooda jaamo am,

faa mi wada njaabeaa waybe maa.»<sup>‡</sup>

<sup>37</sup> Daawuuda e hoore mum «Joomam» noddirta mo. Ndennoo, hono o laatortoo taanum tan?

#### *No Iisaa daalorii jamaa oo banngal dunkee'en Sariya*

Jamaa keewdo ana hettiranoo Iisaa seyo. <sup>38</sup> E ley waajagol makko ngol, o wii be:

<sup>†</sup> 12:19 Fillitagal Tawreeta 25.5    <sup>‡</sup> 12:26 Pergu 3.6,15-16    <sup>§</sup> 12:27 Gila e jamaanu Muusaa tawi Ibarahiima e Isiyaaka e Yaakuuba maayii gila ko 6ooiy. Ko Laamdo wii yo Laamdo maabe koo, holli ebe nguuri.    <sup>\*</sup> 12:30 Fillitagal Tawreeta 6.4-5    <sup>†</sup> 12:31 Lewinkoo6e 19.18    <sup>‡</sup> 12:36 Jabuura 110.1

—Ndeentee e dunkee'en Sariya yidube yiiloraade saayaaji mawdi e jowteede ley luumooji,<sup>39</sup> foodantooße joolle burde teddude e ley cuudi baaajordi e ley yanngjeeji fuu.<sup>40</sup> Ee teeta cuudi rewbe talka'en 6e worbe mum'en maayi, ebe njuutina duwaawuji maabbe faa 6e nanndinkinoo e moyyube. Kambe, jukkungo naawngo burata jippineede e muufum'en.

### *Haala sadaka burdo moyyude*

<sup>41</sup> Iisaa joodii fewti e keesu Suudu Dewal Mawndu nduu, yii no jamaa oo wadirta kaalisi e keesu oo nii. Arsukunte'en heewbe ngadi e makko kaalisi keewdo. <sup>42</sup> Debbo talka mo gorum maayi wari, wadi hen buudi didi. <sup>43</sup> Iisaa noddii taalibaabe mum bee, wii dum'en:

—Mido haalana on goonga: oo debbo talka, ko o wadi e ley keesu oo koo ana buri ko bee too fuu ngadi hen koo. <sup>44</sup> Sabi 6e fuu, ko bonnantaabe huunde tan 6e ngadi hen, kaa kanko debbo oo, ko o hasindini e mum o wadi hen, ko o jogii faa o wuurdha koo fuu.

## 13

### *Haala taagumansaaji kollooji timmoode aduna*

<sup>1</sup> Nde o yalti Suudu Dewal Mawndu nduu ndee, taalibbo makko gooto wii mo:

—Moobbo, yeew! Woy kaaye mawde mahiraade maadi lobbiri!

<sup>2</sup> Iisaa jaabii mo, wii:

—A yii ndii maadi no foti mawnude? Fay haayre wootere heddataako doo ana fawii dow wonnde, fuu wuunjinte.

<sup>3</sup> O joodoyii dow waamnde haayre wiyyeteende Jaytun, o fewti e Suudu Dewal Mawndu nduu. Piyeer e Yaakuuba e Yuhanna e Andire teeldi e makko, lamndii mo, mbi:

—Humpit in min nde dum wadata. Taagumansa homo hollata waafugol kuddde dee fuu?

<sup>5</sup> Nii Iisaa darii ana wiya 6e:

—Ndeentee, pati fay gooto yonna on. <sup>6</sup> Heewbe ngardan innde am, mbiya: «Miin woni kanko.» Be yonnaan heewbe. <sup>7</sup> So on nanii dillere golowole badiide, so on kaalanaama golowole goddude, pati kulee, ana tilsi dum wadan, kaa dum wanaa timmoode tafon. <sup>8</sup> Lejol haban e lejol, laamu haban e laamu, leydi dimmboto e nokkuuje yogaaje, hono non yolbereejii duu. Dum woni puudoode njataware.

<sup>9</sup> Ndeenee ko'e mon, sabi yimbe naban on to carirdi, on piyete ley cuudi baaajordi, 6e ndarna on yeeso saroofe e kaanankoofe saabe am, faa laatano-don kam seedee'en yeeso maabbe. <sup>10</sup> Ana tilsi Kabaaru Lobbo oo waajee lepi dii fuu tafon. <sup>11</sup> Nde 6e nabii on faa 6e ndokkitira on, pati mbemmb-e-don ko kaalaton. Nde wakkati mum wari fuu, on keban ko kaalon. Sabi wanaa onon kaalata, Ruuuhu Ceniido haalata. <sup>12</sup> Neddo hokkitiran sakike mum waree, baabiraado duu siyum. Biibe immanto saaraabe mum'en, piya dabare yalla been ana mbaree. <sup>13</sup> Yimbe fuu mbajan on saabe am. Kaa mujudo faa timmoode, joomum hisinte.

<sup>14</sup> Nde njii-don «huunde harmunde bonnde»<sup>\*</sup> ana woni do haanaa wonde fuu<sup>†</sup> (janngudo dum, tiinnoo faama), nden, 6e dum tawi ley Yahuudiya fuu yo ndogu peewa baamle kaaye.

<sup>15</sup> Tawaado dow bene, pati jippoo Fey so wiya naatan faa bama huunde ley suudu muuđum.

<sup>16</sup> Tawaado gese, pati wirfoo so wiya bamoowo saaya mum. <sup>17</sup> Bone yanan e haamili'en e muyninoobe ley deen palaade!<sup>‡</sup> Naagee Laamdo pati dum wada wakkati dabbunde.

<sup>19</sup> Sabi ley deen jalaade torra wadan mo hono mum wadaali gila fuddoode aduna nde Laamdo tagi tageefu oo warde hannde, mo wattataa kasen duu. <sup>20</sup> Sinndo Joomiraado rabbindinalino deen palaade, fay gooto hisataano, kaa sabaabu subaabbee bee o rabbindiniri de. <sup>21</sup> E oon wakkati, so won biido on: «Almasihu annii doo», naa «Yeewel! Omo naa too», pati ngoondinee. <sup>22</sup> Sabi almasihu'en penneebe e annabaabe penneebe banngoyan, 6e ngada taagumansaaji e kaayefiji yalla ebe majjina subaabbee bee, so 6e mbaawii. <sup>23</sup> Dum nee, so wanaa ndeento-don! Mi haalanii on huunde fuu gila waraali tafon.

### *No Bii Neddo oo wartirta*

<sup>24</sup> —Kaa e ley deen palaade, caggal oon torra, naange niibban, lewru joottan yaaynude, <sup>25</sup> koode kammu caaman, kulle gonde dow kammu dee ndimmboto.<sup>‡</sup> <sup>26</sup> E oon wakkati, Bii Neddo oo yiyete ana wara e duule,<sup>§</sup> ana warda baawde mawde e teddeengal. <sup>27</sup> O nelan malaa'ika'en makko funnaange e hiirnaange, saahal e galeeri, mooosta subaabbee makko bee gila hoore leydi faa hoore leydi.

<sup>28</sup> Taykitee ibbe: so caabe majje keyfiti, haakolooji majje mbillitii, odon anndi ndunngu gadike. <sup>29</sup> Hono non, so on njii deen kulle ana ngada, anndee o battiima, omo damal galle.

\* **13:14** Daniyel 9.27; 11.31; 12.11      † **13:14** Doo Iisaa haali ko annabi Daniyel sappinoo: kaananke gooto wattan toor e ley Suudu Dewal Mawndu Yahuudiyanoo. Ko o sappinoo koo wadii gila Iisaa finali. Jooni Iisaa wii hono majjum wartan kasen.      ‡ **13:25** Esaaya 13.10; 34.4; Yo'ilä 2.10      § **13:26** Daniyel 7.13

<sup>30</sup> Mido haalana on goonga: oo jamaanu timmataa tawee kudde dee fuu ngadaali. <sup>31</sup> Kammu e leydi timman, kaa haalaaji am dii timmataa abada.

<sup>32</sup> Kaa nden palaande e oon wakkati fay gooto anndaa dum. Wanaa malaa'ika'en wonbe dow kammu, wanaa Biddo oo. Walaa anndudo dum so wanaa Baabiraado oo. <sup>33</sup> Ndeentee, njeerto-don, sabi on anndaa wakkati mo o warata. <sup>34</sup> Edum wa'i no gorko lanndiniido faa dawa, yalti suudu mum, hokki gollooбе mum homo fuu golle mum, yamiri doomoowo damal oo yo jeerto. <sup>35</sup> Ndennoo, njeertee, sabi on anndaa nde jom galle oo wartata: ana waawi laataade kiikiye, naa hejjere jemma, naa wakkati nde ndontoori jogginta, naa beetee law. <sup>36</sup> Pati o juha on so o tawa odon daanii! <sup>37</sup> Ko kaalanan-mi on koo, dum kaalanan-mi yimbe fuu: njeertee!

## 14

### No mawbe diina ndawriri faa nannga Iisaa

<sup>1</sup> Balde ciidi hadi iidi Paska e iidi mo buuru yuufinaaka yottaade. Hooreebe yottinoobe sadaka e dunkee'en Sariya tewti molanaade Iisaa faa nannga dum yalla ana mbara dum. <sup>2</sup> Kaa 6e mbii:

—Pati ngadfen dum ley iidi oo so yimbe bee murta.

### No Iisaa wujiraa nebam uuroojam

<sup>3</sup> Nden Iisaa ana Baytaniyu, do galle Simon ceppaado oo doo. O joodii faa o jaama, debbo gooto naati ana jogii faandu nebam laabudam, uuroojam, tiifudam coggu sanne. Debbo oo heli faandu nduu, wuji nebam dam e hoore makko. <sup>4</sup> Yoga e wonnoobe ton bee mettaa, mbyondiri e ko'e mum'en:

—Bonnude dam nebam, kodum nafata? <sup>5</sup> Edam waawnoo sootteede ko 6uri buudi cardi teemedi tati, kaalisi oo hokkee misikiina'en!

Hedde ebe ninja debbo oo. <sup>6</sup> Kaa Iisaa wii:

—Celee e makko! Ko saabii so odon torra mo? Golle makko ijardii sanne. <sup>7</sup> Sabi misikiina'en ana tawdee e mon jaannde fuu, nde muuy-don fuu odon mbaawi wadande dum'en moyyera. Kaa miin, mi tawdataake e mon jaannde fuu. <sup>8</sup> O wadii ko o waawi: ko o wujiri kam nebam uuroojam dam yalla mido lanndinanoo yanaande. <sup>9</sup> Mido haalana on goonga: do Kabaaru Lobbo waajaa e aduna oo fuu, ko oo debbo wadi koo jantete, kasen duu o miccitete.

### No Yahuuda jammbarii Iisaa

<sup>10</sup> Yahuuda Isikariyota, gooto e sappo e didon bee, yehi to hooreebe yottinoobe sadaka faa wada Iisaa e juude mum'en. <sup>11</sup> Nde 6e nani dum ndee, 6e ceyii, 6e podani mo 6e njeenan mo kaalisi. E ley dum, omo fiya dabare no o jammbaroo Iisaa.

### No Iisaa hiirtidori e taalibaabe mum hiraande iidi Paska

<sup>12</sup> Nalooma arano iidi mo buuru yuufinaaka, nde 6e mboownoo hirsude jawdi Paska ndee, taalibaabe Iisaa lamndii dum, mbii:

—Hoto njid-daa min njaha min lanndinanoye hiraande iidi Paska ndee?

<sup>13</sup> O neli taalibaabe makko didon, o wii dum'en:

—Njehee ngeenndi too, on kawran ton e gorko ana roondii mbulku ndiyam, njokkon e mum. <sup>14</sup> Galle mo o naati fuu, mbyion jom galle oo: «Moobbo wii suudu hondu jaamdata e taalibaabe mum bee hiraande iidi Paska?» <sup>15</sup> O hollan on sooro manngo, paraango faa gasi, ton lanndinanto-don en hiraande ndee.

<sup>16</sup> Taalibaabe didon bee njehi, naatoyi ngeenndi ndii, 6e tawri hono no o wii 6e nii, ton 6e lanndinii hiraande Paska ndee.

<sup>17</sup> Hiiri, Iisaa wardi e sappo e didon bee. <sup>18</sup> Nde 6e njoodii ebe jaama ndee, Iisaa wii:

—Mido haalana on goonga: gooto moodon jammbo kam, omo jaamda e am jooni.\*

<sup>19</sup> Dum laatananii 6e sugulla, hedde ebe lamndoroo mo gooto gooto, gooto fuu ana wiya:

—Kori wanaa miin kaa?

<sup>20</sup> O jaabii 6e, o wii:

—Gooto e moodon, onon sappo e didon bee, tummbidoowo e am junngo mum e la'al oo. <sup>21</sup> Waajibi Bii Neddo dalira aduna no haaliraa ley Bindi dii nii. Kaa bone woodanii jammbootodo Bii Neddo oo! Oon gorko, so rimanooka fey furi moyyande dum!

<sup>22</sup> Nde 6e jaamata ndee, Iisaa 6ami buuru, yetti Laamdo, helti, hokki 6e, wii:

—Nannggee, dum yo terde am.

<sup>23</sup> Caggal dum, o 6ami horde peguujam, o yetti Laamdo, o hokki 6e, 6e fuu 6e njari. <sup>24</sup> O wii 6e:

\* 14:18 Jabuura 41.10

—Dum yo yiyyam am, yiyyam tabintinoojam aadi keyri, njupportoodam saabe heewb . 25 Mido haalana on goonga: abada mi yarataa peguujam kasen so wanaa jannde njaroy-mi peguujam kesam e ley Laamu Laam .

26 Caggal  e njimii Jabuura,<sup>†</sup>  e njalti,  e njehi waamnde haayre wiyyeteende Jaytun. 27 Iisaa wii  e:

—On fuu on njoppan kam, sabi ana winndii: «Mi fiyan duroowo oo, mi wara d um, baali d ii caakoo.»<sup>‡</sup> 28 Kaa caggal mi wuurtii, mi adoyto on Galili.

29 Piyeer wii mo:

—Fay so  e fuu  e njoppu maa, miin kaa mi yoppataa ma.

30 Iisaa wii mo:

—Mido haalane goonga: jemma hannde oo jaati, fade ndontoori jogginde cili didi a wiyan a anndaa kam cili tati.

31 Piyeer haali, tekkini, wii:

—Fay so tilsi mi maaydan e maa, abada mi wiyyataa mi anndaa ma.

Taalibaabe  ee fuu mbii hono non.

#### *No Iisaa naagorii Laam o ley Gecemane*

32 Be njottii nokku biyeteedo Gecemane, o wii taalibaabe makko  ee:

—Njoodee doo, faa mi wadoya duwaawu.

33 O yaadi e Piyeer e Yaakuuba e Yuhanna. O fuddi maatude kulol, o ruubi. 34 O wii  e:

—Yoomende ana mawni e am sanne faa ana ndaara warde kam. Keddee doo, njeertee pati daanee.

35 O wodditii seeda, o hippii e leydi, o duwii yalla omo dada e oo wakkati naawdo so ana hu indoo. 36 O wii:

—Abba! Ada waawi huunde fuu, woddinam ndee horde bone. Kaa pati laatoro no njidir-mi, yo laatoro no njidir-daa aan.

37 O warti, o tawi ebe daanii. O wii Piyeer:

—Simon, a daaniido naa? A waawaa jeertaade tawee a daanaaki fay wakkati gooto naa?

38 Pati daanee, nduwhee, pati on ceyte. Sabi hakkille ana heewi anniya lobbo, kaa terde ana lo'i.

39 O yehi kasen, o duworii no arannde nii. 40 O warti, o tawi  e daantike, sabi d oydi ana piili e ma be. Be ndonki anndude ko  e njaabotoo mo. 41 O warti cilol tataabol, o wii  e:

—Faa jooni odon daanii odon njoottinoo naa? Heyii. Wakkati oo warii. Bii Neddo wadete e juude luuttoobe. 42 Immee njehen! Yeewee, jammbotoodo kam oo annii.

#### *No Iisaa nanngiraa*

43 O tilaaki haalde, faa Yahuuda, gooto e sappo e didon  ee, yottii ana wondi e yim e heewb e jogiife kaafaae e cabbi. Hooree e yottinoob e sadaka, dunkee'en Sariya e mawb e, kajun en neli  e. 44 Jammbotoodo mo oo hokki  e finnde, wii:

—Neddo mo buccii-mi fuu, oo woni kanko. Nangee d um, nabon d um kawjo-don d um.

45 Yahuuda yottii tan,  attitii Iisaa, wii d um:

—Moobbo!

O buccii d um. 46 Nii  e njani e Iisaa,  e nanngi d um. 47 Gooto e darinoob e don  ee, soorti kaafaawi mum, soppi golloowo Jottinoowo Sadaka Mawdo, tayi nowru mum. 48 Iisaa wii  e:

—Ko ngardu-d on e kaafaae e cabbi faa nanngon kam hono mi janoowo? 49 Mido wondi e mon jannde fuu ley Suudu Dewal Mawndu nduu mido waajoo, on nanngaali kam. Kaa d um wadan yalla ko Binndi dii mbii koo ana tabita.

50 E ley d um, taalibaabe  ee fuu njoppi mo, ndogi.

51 Jokolle mo boornaaki ko wanaa waandaade disaare, jokki e makko,  e nanngi d um<sup>52</sup> o yoppi disaare ndee, o dogiri  e terde teete.

#### *No mawb e diina cariri Iisaa*

53 Be nab i Iisaa to Jottinoowo Sadaka Mawdo oo, tawi hooree e yottinoob e sadaka e mawb e e dunkee'en Sariya fuu ana moo tii. 54 Piyeer jokkitii mo fali daawre hakkunde ma be, faa naati ley daalaare galle Jottinoowo Sadaka Mawdo. O jooldii e doomooob e, omo yuwloo yiite. 55 Hooree e yottinoob e sadaka e jeyaa e e waalde Saahii e ndee fuu ana tewta ko kappira Iisaa yalla ana waree, kaa  e keb aali. 56 Heewb e ana kappa mo, kaa kam e e hoore ma be, kappi ma be dii ana luuttondiri. 57 Yogaabe kappi mo, mbii:

58 —Min nanji omo wiya: «Mi wurjinan Suudu Dewal Mawndu ndu yim e mahiri juude, e ley balde tati mi maha suudu dewal wonndu ndu mahiraaka juude.»

<sup>†</sup> 14:26 Neesu Yahuudiyankoo e woni yimde jime Jabuura 115-118 e hiraande iidi Paska. <sup>‡</sup> 14:27 Jakariyaa 13.7

<sup>59</sup> Kaa e dum duu, happugol ma  e ngol ana luutondiri. <sup>60</sup> Jottinoowo Sadaka Mawd  oo darii hakkunde jamaa oo, lamndii Iisaa:

—Walaa ko njaaboto-daa naa? Tama a nanaali ko  e mbiyete koo?

<sup>61</sup> Fuu omo deyyinii, o jaabaaki fay huunde. Jottinoowo Sadaka Mawd  oo ana lamndoo mo kasen, ana wiya:

—Aan a Almasiihu,  ii mo jettooje ngoodani oo naa?

<sup>62</sup> O jaabii, o wii:

—Miin woni kanko. On njiyan Bi  Neddo ana joodfi jaamo Jom Baawde oo, <sup>§</sup> ana warda e duule kammu.\*

<sup>63</sup> E ley  um, Jottinoowo Sadaka Mawd  oo mettaa faa seeki kaddule mum, wii:

—En kaajaaka seedee'en hankasen. <sup>64</sup> On narrii noppi moodon ko o bonkii Laamdo koo. Kodum njii-don hen?

Be fuu  e mbii omo haani wareede.

<sup>65</sup> Yoga ma  e fuddi tuttude e makko,  e cuddi yeeso makko, e e culkoo mo, e e mbiya mo:

—Annditin culkiido ma!

Nii doomoo e  ee nanngi mo, ana piya mo banaaje.

*No Piyeer wadi so yankiri Iisaa*

<sup>66</sup> E ley no Piyeer worri e ley daalaare galle oo nii, gooto e hor e Jottinoowo Sadaka Mawd  yottii. <sup>67</sup> Nde o yiinoo Piyeer ana yuwloo ndee, o taykitii  um, o wii:

—Aan, ada wondunoo e Iisaa Nasaraatunke oo.

<sup>68</sup> Nii Piyeer yeddi mo, wii:

—Wanaa miin! Mi faamataa ko kaalataa koo.

Caggal  um, Piyeer yehi naatoyi bolongal galle oo. [Tan ndontoori joggini.]<sup>†</sup> <sup>69</sup> Nde kord  oo yiinoo mo kasen ndee, haaltani darino e don  ee, wii:

—Oo yo gooto ma  !

<sup>70</sup> Piyeer yeddi kasen. Don e don darino e don  ee mbii Piyeer:

—Tayoral, a gooto e ma  e, sabi a Galilinke.

<sup>71</sup> Nii o fuddi hunaaide e huttaade, omo wiya:

—Mi anndaa gorko mo kaalaton haala mum oo Fey!

<sup>72</sup> Ndontoori joggini dida erde, Piyeer miccitii ko Iisaa wiinoo  um koo: «Fade ndontoori jogginde cili didi, a wiyan a anndaa kam cili tati.» O darii omo woya.

## 15

*No Pilaatu lamndorii Iisaa*

<sup>1</sup> Beetee law, hooree e yottino e sadaka e maw e e dunkee'en Sariya e waalde Saahi e ndee, fe  uu  e ndawridi. Be ka  i Iisaa,  e nabi  um to Pilaatu goforneer oo.

<sup>2</sup> Pilaatu lamndii mo, wii:

—Aan woni kaananke Yahuudiyankoo e oo naa?

O jaabii, o wii:

—No mbii-daa nii.

<sup>3</sup> Hooree e yottino e sadaka  ee ana ngullanoroo mo kulle keewde. <sup>4</sup> Pilaatu lamndii mo kasen:

—Walaa ko njaaboto-daa naa? A nanaali ko  e ngullani maa koo fuu naa?

<sup>5</sup> Kaa Iisaa jaabaaki fay huunde, faa  um haaynii Pilaatu.

*No Iisaa sariraa yo bareteedo*

<sup>6</sup> Iidi Paska fuu, goforneer oo ana hokkannoo yim e  ee su  aade e kasunkoo e  ee mo njid  yoppitaneede. <sup>7</sup> Gorko biyeteedo Barabas murtidiino e wo  e faa  e mbari neddo. Oon wakkati,  e e uddanoo kasu saabe ko  e ngadi koo. <sup>8</sup> Jamaa oo  jabboyi to Pilaatu woni too, naati e naagaade  um wadana  e ko woownoo wadande  e koo. <sup>9</sup> O jaabii  e, o wii:

—Od n njidi mi yoppitana on kaananke Yahuudiyankoo e oo naa?

<sup>10</sup> Sabi o anndii hooree e yottino e sadaka  ee haasidaaku wadi so ndokkitiri mo. <sup>11</sup> Kaa  e ndunyi jamaa oo e naagaade Pilaatu yoppitana  e Barabas  urani  e yoppita Iisaa.

<sup>12</sup> Pilaatu jaabii kasen, wii  e:

—Ndennoo, kodum njid-don mi wada mo mbiyatton kaananke Yahuudiyankoo e oo?

<sup>13</sup> Be ngulli:

—Tontu mo e leggal bardugal!

<sup>14</sup> Pilaatu lamndii  e:

—Kodum o wadi ko boni?

Be beydi dukude semmbe:

—Tontu mo e leggal bardugal!

<sup>15</sup> Nde wonnoo Pilaatu ana yidi welnude 6erde jamaa oo, yoppitani dūm'en Barabas. Caggal dūm, o yamiri lisaa fiyee dorri, tontoyee e leggal bardugal.

<sup>16</sup> Sordaasi'en 6ee nabi mo naannoyi mo ley galle to huubeere ndee woni too, moobti fedde sordaasi'en 6ee fuu. <sup>17</sup> Be foorni mo burmusuure wodeere,\* 6e cajni tenngaade gi'e 6e kippi e hoore makko. <sup>18</sup> Be keddi 6ebi calmina mo, ebe mbiya:

—Sadí, kaananke Yahuudiyanchoo6e.

<sup>19</sup> E6e piira hoore makko kalacal, e6e tutta e makko, 6e tuggi koppi ma66e e6e cujidana mo. <sup>20</sup> Nde 6e tili jaayrude mo ndee, 6e itti burmusuure wodeere ndee, 6e foorni mo kaddule makko, 6e nabi mo sella faa 6e tontoya mo e leggal bardugal.

### No lisaa tontiraa dow leggal bardugal

<sup>21</sup> Gorko gooto biyeteedo Simon, jeyaado Sireene, baaba Aleksandere e Rufus, ana gettoroo don iwrudo ley ladde. Sordaasi'en 6ee ndooldini mo o wakkoo leggal bardugal lisaa ngal. <sup>22</sup> Be na6i lisaa nokku biyeteedo Golgata. (Maanaa Golgata woni nokku laagal hoore.) <sup>23</sup> Be ngaddani mo peguujam njillondiraadam e safaae haadunde yalla omo yara, kaa o ja6aali. <sup>24</sup> Be tonti mo e leggal bardugal, 6e pecciri kaddule makko urwa, 6e anndi ko gooto fuu he6ata.<sup>†</sup> <sup>25</sup> Nde 6e tontida mo ndee, wakkati yamnde jeenay beetee. <sup>26</sup> Be mbinndi e alluwal tiimde hoore makko dalili ko tonti mo: KAANANKE YAHUUDIYANKOOBE. <sup>27</sup> Be tontidi mo e yano6e didon, gooto naamo makko, goddo oo nano makko. [ <sup>28</sup>‡ ] <sup>29</sup> Yimbe ya66oto6e don 6ee ana njenna mo, ana njinka ko'e mum'en, ana mbiya:

—Coo! Gurjinoowo Suudu Dewal Mawndu nduu so mahitoo ndu ley balde tati, <sup>30</sup> biltu hoore maa, jippa leggal bardugal ngal!

<sup>31</sup> Hono non, hooree6e yottino6e sadaka 6ee duu njaayriri mo, kajum e dunkee'en Sariya ana mbiyondira e ko'e mum'en:

—O biltii wo66e, kaa o ronkii biltude hoore makko! <sup>32</sup> Kanko Almasiihu kaananke Israa'iila oo, Jooni, o jippoo leggal bardugal ngal, yalla eden njiya ngoondinen!

Yano6e didon 6e o tontidaa 6ee duu ana mbonkoroo mo non.

<sup>33</sup> Wakkati hakkunde naange, nimre wadi e leydi ndii fuu faa wakkati yamnde tati kiikiide. <sup>34</sup> E ley yamnde tati kiikiide ndee, lisaa wulli wullaango toowngo, wii:

—Eloyi, eloyi, lama sabaktanii? (Dum woni: «Laamdo am, Laamdo am! Kodum wadi so njoppu-daa kam?»§)

<sup>35</sup> Yuga e darino6e ton 6ee nde nanunoo dūm ndee, mbii:

—Kettinee, omo nii nodda annabi Iliyaasa!

<sup>36</sup> Nii gooto dogi, suuwoyi liccere ley biineegiri, ha66i dūm e sawru, feewtini hunduko makko yalla omo 6uuccoo, wii:

—Njoppen mo yeewen yalla Iliyaasa waran jippina mo!

<sup>37</sup> Lisaa wulli wullaango toowngo kasen, dali aduna. <sup>38</sup> Heedoode faliinde ley Suudu Dewal Mawndu ndee seekii gila dow faa ley, laatii taye didi. <sup>39</sup> Hooreejo sordaasi'en darinoodo yeeso makko oo yii no o daliri aduna nii, wii:

—So goonga nii, oo neddo yo Bii Laamdo!

<sup>40</sup> Rew6e yogaabe ana toowti, ana coynoo. Ana e ma66e: Mariyama mo Magdala e Salome e Mariyama inna Yaakuuba suka e Yoses. <sup>41</sup> Been njokkanno6e makko ana ngollana mo nde o wonnoo Galili ndee. E rew6e wo66e kasen, njabbidinno6e makko Urusaliima ana ngonnoo don.

### No tew lisaa wadira6e and yanaande

<sup>42</sup> Hiiri, dūm hawri e wakkati lanndinal tawi jalaande fowteteende 6adike fu66ude.

<sup>43</sup> Gooto e waalde Saahii6e, teddu6o, biyeteedo Yuusufu mo Arimatiya, wari. Kanko duu omo doomuno6e banngugol Laamu Laamdo oo. O hulaali yaade to Pilaatu o ndaarda dūm tew lisaa. <sup>44</sup> Pilaatu haaynaa nde nanunoo o maayirii nii tan ndee, noddi hooreejo sordaasi'en, lamndii dūm so tawii yo goonga o maayii. <sup>45</sup> Nde hooreejo sordaasi'en haalani mo dūm ndee, o dujanii Yuusufu 6amta tew oo. <sup>46</sup> Yuusufu soodi kasanke, jippini tew lisaa oo, fiili dūm e kasanke oo, o wattu dūm e yanaande asaande ley haayre. Caggal dūm, o talliti haayre, o uddiri damal yanaande ndee. <sup>47</sup> Mariyama mo Magdala e Mariyama inna Yoses njii to o wadaa too.

\* <sup>15:17</sup> Wakkati lisaa, burmusuure wodeere yo saaya ka kaananke 6oornotoo. † <sup>15:24</sup> Jabuura 22.19 § <sup>15:28</sup> E dereeji fooydi dii, yoga ana 6eyda aaya 28:Dum tabintini Binndi biidi: «o hiisodaama e bon6e.» § <sup>15:34</sup> Jabuura 22.1

**16**

*No Iisaa immintinira*

<sup>1</sup> Nde nalaande fowteteende ndee 6ettinoo ndee, Mariyama mo Magdala e Salome e Mariyama inna Yaakuuba, coodi nebameeji uurooji ngaddi faa nguja e tew makko oo.  
<sup>2</sup> Nannde alan, 6e ngari e yanaande ndee beetee kecco wakkati pudal naange. <sup>3</sup> Be ndarii ebe mbiyondira:

—Homo tallitanta en haayre ndee iwa e damal yanaande ndee?

<sup>4</sup> Kaa nde 6e kunci gite ndee, 6e njii haayre ndee tallitaama. Ende mawni sanne.  
<sup>5</sup> Wakkati 6e naatunoo e yanaande ndee, 6e njii jokolle ana joodii bannge jaamo ana 6oornii saaya ndaneewa, 6e kuli. <sup>6</sup>O wii 6e:

—Pati kulee! Iisaa Nasaraatunke tantonoodo oo tewtaton. O immitike, o walaa doo. Nokku do o waadanoo doo, annii. <sup>7</sup>Jooni kaa, njehee, mbiyoyee taalibaabe makko see e Piyeer o adoyo on Galili. Ton njiyoyton mo, hono no o wiirunoo on nii.

<sup>8</sup> Rewbe 6ee njalti yanaande ndee, 6e ndogi ebe cijjna kulol cattungol. Be kaalanaali fay gooto huunde no 6e poti hulde.

---

<sup>9</sup> Caggal Iisaa wuurtii beetee law jannnde alan, Mariyama mo Magdala mo o ribbani seydaani'en njeddon oo, kajum mo adii 6aanngande. <sup>10</sup>O yehi humpitoyde dum won-dunoobe e Iisaa bee, tawi ebe cunaa ebe mboya. <sup>11</sup>Ko 6e nanunoo o wuurtii koo e ko Mariyama yii mo koo, fuu 6e ngoondinaali dum.

<sup>12</sup>Caggal dum, o 6aanngirani didon ma6be mbaadi ngonndi, 6e nanngi laawol jahooowol ladde. <sup>13</sup>Be ngarti 6e kumpitoyi heddiibe bee, 6e ngoondinaali dum'en kajum'en duu.

<sup>14</sup>Ko sakiti koo o 6anganji taalibaabe sappo e go'o bee tawaabe ana jaama. O jiijiri 6e waasude ma6be goondinde e yoorde ma6be bernde, sabi 6e ngoondinaali yii6e mo caggal immitagol makko 6ee. <sup>15</sup>O wii 6e:

—Njehee ley aduna oo fuu, mbaajo-don tagoore ndee fuu Kabaaru Lobbo oo.  
<sup>16</sup> Goondindo so lootaa lootagal batisima, hisinte. Mo goondinaali jukkete. <sup>17</sup>Dii kaayefiji ana ngoodani goondin6e bee: 6e ndibbiran seydaani'en saabe am, 6e kaalan demle kese,  
<sup>18</sup>6e nanngiran boggi leydii juud6e ma6be. Fay so 6e njarii poson, fay huunde wadataa 6e. Be pawan junngo ma6be e jaw6e, cella.

<sup>19</sup>Caggal Iisaa Joomiraado oo haaldii e ma6be, nabbinaa kammu, joodii jaamo Laamdo.  
<sup>20</sup>Kaa kam6e, 6e njehi ebe mbaajoyoo ley nokkuuje fuu. Joomiraado ana wondi e ma6be, tabintiniri konngol ngol taagumansaaji jaadooji e maggol.\*

## Linjiila Iisaa Ngeſu Luuka

*Ko sabinbini so dewtere ndee winndaa*

<sup>1</sup> Yimbe heewbe kornii jantaade kulle gadufe hakkunde men, <sup>2</sup> hono no seediibe gila puusooode, laatiibe kaadime'en konngol ngol bee, kaalaniri en nii. <sup>3</sup> Tawfilus teddufo, mi widike kulle dee fuu gila arannde, mi tawii ana haani mi winndane dum no wadirii nii, <sup>4</sup> yalla ada heba tayoral jannde nde njangning-daa ndee yo goonga.

*No jibiriilu sapporii pinaade Yaayaa*

<sup>5</sup> E ley jamaanu Hirudus, kaananke Yahuudiya, jottinoowo sadaka biyeteedo Jakariyaa ana woodunoo. Omo jeyaa e waalde Abiya, bii Haaruuna oo. Jom suudu Jakariyaa duu yo iwdi Haaruuna, innde mum yo Elisabet. <sup>6</sup> Be didon fuu be fooccitiibe yeeso Laamdo, ebe njokki jamirooje Joomiraado e sariyaaji mum fuu, nijoore fuu walaa e maabbe. <sup>7</sup> Kaa be kebaalino biddo, sabi Elisabet latinoke dimaro, kaseen duu be didon fuu be naywii.

<sup>8</sup> Nannde wootere, Jakariyaa ana golla golle mum yottingol sadaka yeeso Laamdo, sabi jannde mum yo waalde makko jeyti. <sup>9</sup> Nde wonnoo yottinoobe sadaka ana mboownoo waafude urwa, nii urwa nangi mo faa o naata Suudu Dewal Mawndu nduu, o ura ton uurdi. <sup>10</sup> Jamaa oo fuu darii sella ana duwoo wakkati mo uurdi ndii uretee oo. <sup>11</sup> Oon wakkati, malaa'ika Joomiraado baangnami mo, darii jaamo urirde ndee. <sup>12</sup> Nde Jakariyaa yiinoo malaa'ika oo ndee, tayi, darii ana sijjaa. <sup>13</sup> Malaa'ika oo wii mo:

—Jakariyaa pati hul, sabi duwaawu maa jaabaama. Jom suudu maa Elisabet rimante biddo gorko, inndiraa dum Yaayaa. <sup>14</sup> Oon biddo waddante seyo manngo, heewbe ceyorto pinaade makko, <sup>15</sup> sabi o laatoto teddudo e Joomiraado. O yarataa doro, o yarataa huunde fuu ko sigirta. O heewan Ruuhu Cenido gila e ley reedu inniiko, <sup>16</sup> o wartiran biibbe Israa'ilankoohe heewbe e Laamdo Joomiraado mum'en. <sup>17</sup> O ardoto Joomiraado oo warde, o wonda e ruuhu e baawde of annabi Iliyasa heebunoo, faa o wartira gerde baabiraabe faade e biibbe mum'en, faa o wartira murtube duu e hakkille fooccitiibe, kajum e moyyinande Joomiraado oo lejol lanndimiingol.

<sup>18</sup> Jakariyaa lamndii malaa'ika oo, wii:

—Hono hen anndiran-mi dum goonga? Sabi miin mi naywii, jom suudu am oo duu wadii duu6i.

<sup>19</sup> Malaa'ika oo jaabii mo, wii:

—Miin woni Jibiriilu darotoodo yeeso Laamdo, mi nelaado e maa faa mi haalane oo kabaar lobbo. <sup>20</sup> Ndennoo jooni a muumdan. A haalataas so wanaa wakkati mo dum tabiti, sabi a goondinaali haala am. Haala am kaa tabitoyan so wakkati majjum warii.

<sup>21</sup> E ley dum fuu tawi yimbe bee ana ndoomi Jakariyaa, ana kaaynaa ko fooyni dum ley Suudu Dewal Mawndu too. <sup>22</sup> Nde o yalti ndee, o ronki haaldude e maabbe. Be paami won ko jergii e makko e ley Suudu Dewal Mawndu nduu. O darii omo haalda e maabbe muumankoore, o heddiee e muumaaku. <sup>23</sup> Nde o tilinoo e golle makko ndee, o hooti suudu makko.

<sup>24</sup> Caggal deen balde, Elisabet jom suudu makko oo reedi, dammbii hakke lebbi joy, ana wiya:

—Dum woni ko Joomiraado wadani kam nde wattani kam hakkille, ittani kam dukkuru hakkunde yimbe.

*No jibiriilu sapporii pinaade Iisaa*

<sup>25</sup> E ley lewru Elisabet jeego6urdunuu, Laamdo neli malaa'ika Jibiriilu e ngeenndi mbiyeteendi Nasaraatu ley leydi Galili, <sup>27</sup> faade e surba mo taanii Daawuuda biyeteedo Yuusufu sabbi. Surba oo ana wiyee Mariyama. <sup>28</sup> Malaa'ika oo naati do Mariyama woni doo, wii dum:

—Aan e jam, kebu6o moyyere Laamdo. Joomiraado ana wondi e maa.

<sup>29</sup> Haala kaa juubi hakkille Mariyama, darii ana miila ko ngoo jowtaango waawi laataade. <sup>30</sup> Nii malaa'ika oo wii mo:

—Mariyama pati hul! Sabi a hebbi moyyere iwnde e Laamdo, <sup>31</sup> a reedan, ndimaa biddo gorko, inndiraa dum Iisaa. <sup>32</sup> Oon biddo laatoto teddudo, o noddirte Bii Laamdo Toowdo. Laamdo Joomiraado hokkan mo laamu maamiiko Daawuuda. <sup>33</sup> O laamoto iwdi Yaakuuba, laamu makko timmataa abada.

<sup>34</sup> Mariyama wii malaa'ika oo:

—Hono dum laatortoo, mi anndaa gorko?

<sup>35</sup> Malaa'ika oo jaabii mo, wii:

—Ruuuhu Ceniido jippoto e maa, baawde Laamdo Toowdo oo kuurete no dowdi nii. Saabe dum, biddo mo ndimataa oo noddirte Ceniido, noddirte Bii Laamdo. <sup>36</sup> Haya yeew, sakiike maa Elisabet duu 6amii reedu, taweede mo naywii fuu, mo riman biddo gorko. Ana wiyetenoo mo dimaro, kaa jooni omo woni e lewru makko jeegoburdu, <sup>37</sup> sabi walaa fuu ko Laamdo waawaa.

<sup>38</sup> E oon wakkati, Mariyama wii:

—Miin, mi kordö Joomiraado. Yo laatanoram no mbiiru-daa nii.  
Caggal dum, malaa'ika oo witti, seli e makko.

*No Mariyama yaari to Elisabet*

<sup>39</sup> E ley deen palaade, Mariyama immii law yehi ngeenndi Yahuudiya ngootiri ngonndi dow baamle kaaye. <sup>40</sup> O naati galle Jakariyaa, o jowti Elisabet. <sup>41</sup> Nde Elisabet nannoo jowtaango makko ndee, biddo gondo e reedu mum oo dillinii, Elisabet hebbinaa Ruuhu Ceniido, <sup>42</sup> ilinii, wii:

—A barkinaado hakkunde rewbe, biddo mo caaw-daa oo duu yo barkinaado. <sup>43</sup> Miin, ko ngn-mi faa inna Joomam naata galle am? <sup>44</sup> Nde jowtaango maa tobbinoo e nowru am ndee, biddo gondo e reedu am oo dillinike saabe kuyam. <sup>45</sup> A welii hoore, aan goondindo ko Joomiraado foden maa koo laatoto.

*Yimre Mariyama*

<sup>46</sup> Mariyama wii:

—Yonki am ana yetta Joomiraado,

<sup>47</sup> bernde am ana heewi seyo Laamdo

Kisinoowo kam,

<sup>48</sup> sabi o yurmike kam,

miin, kordö makko lo'udo oo.

Gila jooni jamaanuuji fuu noddiran kam beldö hoore.

<sup>49</sup> Sabi Jom Baawde oo wadanii kam kulle mawde!

Innde makko yo seniinde.

<sup>50</sup> Yurmeende makko herataa e hulbe mo abada.

<sup>51</sup> O gollirii golleeji mawdi junngo makko semmbinngoo,  
o saakii mawninkiniibe.

<sup>52</sup> O boortii kaanankoobe iwde e laamu mum'en,  
o toownii leydube.

<sup>53</sup> O haarnirii yolbuue kulle lobbe,  
o wirfintinii taajiri'en juude 6ole.

<sup>54-55</sup> O faabike Israa'iilankoobe, jiyaaabe makko,  
o yeggitali yurmaade Ibarahiima e iwdi mum faa abada,  
hono no o fodenirnoo njaatiraaabe men nii.

<sup>56</sup> Mariyama faabidi e Elisabet ko waarata e lebbi tati, caggal mum, hooti suudu mum.

*Haala pinaade Yaayaa*

<sup>57</sup> Wakkati beynugol Elisabet yottii, o beyni o hebi biddo gorko. <sup>58</sup> Taakallemme'en makko e sakiraabe makko nani hinnee mawdo mo Joomiraado wadani mo oo, ceyodii e makko.

<sup>59</sup> Nde cukalel ngel hi6binnoo yontere ndee, 6e ngari taadude ngel.\* Be njidiino inndirde ngel baaba maggel Jakariyaa, <sup>60</sup> kaa inna maggel jaabaali, wii ngel inndiree Yaayaa. <sup>61</sup> Be mbii dum:

—Sii maa fuu walaa inndiraado ndee innde.

<sup>62</sup> Be lamndorii baaba maggel muumankoore, homo yidi 6iyum oo inndiree. <sup>63</sup> Jakariyaa lamndii alluwal, winndi e maggal: «Innde maggel yo Yaayaa.» Be fuu 6e kaaynaa. <sup>64</sup> Oon wakkati fuu, hunduko Jakariyaa yoppitaa, demngal mum humtaa, watti haalde e yettude Laamdo. <sup>65</sup> Kulol nanngi ho6ube e seraaji dii 6ee fuu. Kesen duu dum saakii e ley haayre Yahuudiya fuu. <sup>66</sup> Nan6e dum 6ee fuu ndesi dum e hakkillaja i mum'en, ana mbiya: «Kodum ngel cukalel foti laataade?» Sabi 6e njii baawde Joomiraado ana e maggel.

*Yimre Jakariyaa*

<sup>67</sup> Jakariyaa, baaba cukalel ngel, heewi Ruuhu Ceniido, sappii, wii:

<sup>68</sup> —Jettooje ngoodanii Joomiraado, Laamdo Israa'iila,  
sabi faabike yimbe mum, soottitike dum'en.

<sup>69</sup> O waddanii en kisinoowo tedduuo

iwdo e suudu Daawuuda, kaadime makko oo

\* <sup>1:59</sup> Neesu Yahuudiyanoo, so suka gorko rimaama, jaannde inndaa fuu, nden taadetee duu.

<sup>70</sup> hono no o haalirnoo e kundude annabaabe makko seniise gila arannde nii.

<sup>71</sup> O fodii o danndan en e konnee'en men,  
o ittan en e juude waybe men.

<sup>72</sup> O bannginanen en yurmeende nde o bannginani maamiraabe men ndee,  
sabi o miccitike aadi makko ceniindi ndii,

<sup>73</sup> dum yo hunoore nde o hunanii maama men Ibarahiima.

Hunoore ndee woni on hokkan en <sup>74-75</sup> rewirde mo rafi kulol ley nguurndam men fuu  
e ley senaao e foocitaare yeeso makko,  
tawi en ittaabe e juude konnee'en men.

<sup>76</sup> Aan duu binngel am, a noddire annabaajo Laamdo Toowdo,  
sabi a ardoto Joomiraado oo warde faa moyyinanaa mo laawol,

<sup>77</sup> faa anndinaa yimbe makko o hisiniran dum'en yaafaaamuya luutti.

<sup>78</sup> Sabi Laamdo men yo keewdo yurmeende,  
faa o faaboroo en nanndudo e fooyre iwrunde dow,

<sup>79</sup> yalla ana fooynana wonbe e nimre, fooynana wonbe e kulol maayde,  
watta koyde men e laawol jam.

<sup>80</sup> Suka oo ana mawna, hakkiile mum ana beydoo. O joodii ley ladde jeereende faa  
wakkati mo o bannginanaa Israa'iila.

## 2

### *Haala pinaade Isaa Almasiihu*

<sup>1</sup> E ley deen balde, Ogusta kaananke mawdo oo, yamiri limgal waafee e ley laamu Roma  
fuu. <sup>2</sup> Kanngal woni limgal aranal, forri e laamu Kiriniyas ley leydi Siriya. <sup>3</sup> Yimbe fuu njehi  
winndoyaade, gooto fuu e ngeenndi mum'en. <sup>4</sup> Yuusufu duu immii Nasaraatu ley leydi  
Galili, faa yaha ngeenndi Daawuuda mbiyeteendi Baytilaama ley leydi Yahuudiya, sabi e  
lejol Daawuuda jaati mo iwata. <sup>5</sup> O yehi ton winndoyaade, kanko e Mariyama cabbaado  
makko, cowiido. <sup>6</sup> E ley gonal maabbe ton, wakkati beynugol Mariyama yottii, <sup>7</sup> o dikki  
hammadhi makko, o saawi dum e licce, o lelni dum ley akalaawal, sabi be keyaal e jippunde  
ndee.

<sup>8</sup> Duroobe ana mbaalannoo haybude sewre mum'en baali e seraaji *dii*. <sup>9</sup> Malaa'ika  
Joomiraado banngani be, teddeengal Joomiraado filii be hono no fooyre nii. Kulol manngol  
nanngi be. <sup>10</sup> Nii malaa'ika oo wii be:

—Pati kulee! Sabi mi gardo haalande on Kabaaru Lobbo gaddanoowo lejol ngol fuu seyo  
manngo. <sup>11</sup> Hannde on ndimanaama kisinoowo ley ngeenndi Daawuuda ndii, kanko woni  
Almasiihu, kanko woni Joomiraado oo. <sup>12</sup> Finnde majjum annii: on tawan cukalel keccel  
ana saawaa e licce, ana lelnaa ley akalaawal.

<sup>13</sup> Don e don, higgere malaa'ika'en iwi dow kammu, tawti malaa'ika arano oo, naati e  
yettude Laamdo, ana mbiya:

<sup>14</sup> —Teddeengal woodanii Laamdo Toowdo! Jam woodanii yimbe dow leydi, yimbe  
horsube e makko bee.

<sup>15</sup> Nde malaa'ika'en bee ceerti e maabbe ndee, nabbiit kammu. Duroobe bee ndarii ana  
mbiyondira:

—Njehi Baytilaama, yeewen ko wadi, ko Joomiraado anndini en koo.

<sup>16</sup> Be kejii, be njehi, be tawi ton Mariyama e Yuusufu e cukalel keccel ngel engel lelnaa  
ley akalaawal. <sup>17</sup> Nde be njiinoo ngel ndee, be kaalti ko malaa'ika oo haalnoo e maggel koo.

<sup>18</sup> Nanbe haala duroobe bee fuu, kaayde nanngi dum'en. <sup>19</sup> Kaa Mariyama ana resi dum  
fuu e hakkiile mum, o heddi omo miiloo dum. <sup>20</sup> Caggal dum, duroobe bee mbirftii ana  
teddina Laamdo ana njetta dum, saabe ko be nani e ko be njii. Sabi dum fuu dum laatorike  
no malaa'ika oo haalanirnoo be nii.

### *No Isaa taadira e no battiniraa Joomiraado*

<sup>21</sup> Nde jalooma jettaabo pinaade cukalel ngel yottinoo ndee, ngel taadaa,\* ngel inndiraa  
Isaa. Dum woni innnde nde malaa'ika oo haalanirnoo Mariyama gila reedaali ndee.

<sup>22</sup> Nde laafugol Mariyama yottinoo, hono no Sariya Muusaa yamiri nii, be nabi cukalel  
ngel Urusaliima faa be battinaa ngel Joomiraado. <sup>23</sup> Sabi nii winndiraa e Sariya Joomiraado:  
«Biddo gorko hammadiijo fuu, Joomiraado woodani.»<sup>†</sup>

<sup>24</sup> Be ngadi duu sadaka kirsamaajo hono no Joomiraado yamiri nii: 6ibbe buugaaji didi naa  
6ibbe pooli maraadi didi.

\* <sup>2:21</sup> Neesu Yahuudiyankooibe, so suka gorko rimaama, jannde inndaa fuu, nden taadetee duu.    † <sup>2:23</sup> Pergu  
13.2,12,15; Limooje 18.15-16

<sup>25</sup> Gorko gooto ana wonnoo Urusaliima, ana wiyee Simeyon. Ruuhu Ceniido ana e makko, o gorko pooccitiido kuldö Laamđo, omo hedinoo wakkati mo gondi Israa'iila coccetee. <sup>26</sup> Ruuhu Ceniido oo anndinnoo mo e koydöl, o maayataa o yiyaali Almasiihu Joomiraado oo. <sup>27</sup> Jooni Ruuhu naanni mo ley Suudu Dewal Mawndu nduu, wakkati mo saaraaße bee ngaddi cukalel ngel faa ngadana dum ko Sariya oo yamiri koo. <sup>28</sup> Simeyon nanngi ngel, tammbii ngel e juude mum, darii ana yetta Laamđo, ana wiya:

<sup>29</sup> —Joomiraado, fodoore maa ndee tabitii,  
    6amtū maccudo maa e jam.

<sup>30</sup> Sabi mi yiirii gite am kisindam  
    <sup>31</sup> dam lanndinani-daa yimbe fuu.

<sup>32</sup> Kisindam dam yo fooyre yaaynanoore lepi aduna oo fuu,  
    dam fooyre teddinoore lepol maa Israa'iila duu.

<sup>33</sup> Ko haalaa e maggel koo, haaynii inna maggel e baaba maggel. <sup>34</sup> Simeyon duwanii 6e, wii Mariyama, inna maggel:

—Ngel cukalel wardii liñude yogaaße e imminde yogaaße ley Israa'iila. Ngel finnde nde yimbe calotoo. <sup>35</sup> Nii miilooji gondi e yimbe banngirta. Aan e hoore maa, metti suufan bernde maa no kaafaawi nii.

<sup>36</sup> Annabaajo debbo biyeteedo Anna ana don kajum duu. O 6ii Fanu'iila, jeyaado e suudu Asiira. O naywii sanne. O suddaama e surbaaku makko, o waaldii e jom suudu makko duuší jeddi, <sup>37</sup> oon maayi, o heddii o walaa gorko. Jooni duuší makko ana mbaara e capande jetti e nay, o yaltataa Suudu Dewal Mawndu nduu fey, omo rewra Joomiraado koorka e duwaawu, jemma e jalooma fuu. <sup>38</sup> E oon wakkati, o wari kanko duu, o darii omo yetta Laamđo, omo haalaa doomtubē coottitaari Urusaliima bee fuu kabaaru cukalel ngel.

<sup>39</sup> Nde Yuusufu e Mariyama ngaduno huunde fuu ko Sariya Joomiraado yamiri koo ndee, 6e mbirfitii ngeenndi ma66e Nasaraatu ley leydi Galili.

<sup>40</sup> Cukalel ngel ana mawna, ana beydoroo semmbe e hakkille. Korsa Laamđo ana e maggel.

### No Iisaa haaldiri e jannginoobe ley Suudu Dewal Mawndu

<sup>41</sup> Hitaande fuu, saaraaße Iisaa njabban Urusaliima so iidi Paska warii. <sup>42</sup> Nde o he6i duuší sappo e didi ndee, 6e njabbi Urusaliima no 6e mboowrunoo nii, 6e nabori mo. <sup>43</sup> Lidi oo tilii, 6e mbirfitii ke kooti, jika Iisaa heddike Urusaliima, tawi 6e anndaa, <sup>44</sup> 6e cikkuno omo wondi e yaadube ma66e. Be njehi jalooma ki66o. Caggal mum, 6e pu6di tewtude mo hakkunde sakiraaße ma66e e yi66e ma66e. <sup>45</sup> Kaa nde wonnoo 6e njiitali mo ndee, 6e mbirfitii Urusaliima tewtoye mo. <sup>46</sup> Balde tati caggal mum, 6e tawi mo ley Suudu Dewal Mawndu, omo joodii hakkunde jannginoobe, omo hettindii dum'en, omo lamnditoo dum'en. <sup>47</sup> Hettindiibee mo 6ee fuu kaaynaa hakkille makko e jaabuuji makko. <sup>48</sup> Nde saaraaße makko njiiti mo ndee, kaayde nanngi dum'en. Inna makko wii mo:

—Binngel am, ko saabii so ngadu-daa min nii? Miin e baaba maa fuu, min cuñlii e tewtude ma.

<sup>49</sup> O jaabii, o wii:

—Kodum wadi so odon tewta kam? Tama on anndaa ana tilsi mi wona e suudu Baabiraado am?

<sup>50</sup> Kaa 6e paamaali haala ka o haalani 6e kaa. <sup>51</sup> Caggal dum, o regodii e ma66e, 6e kooti Nasaraatu, o dowtanii 6e. Inna makko ana resunoo kulle dee fuu e hakkille mum.

<sup>52</sup> Iisaa ana mawna, hakkille mum ana beydoo. Laamđo e yimbe fuu korsini mo.

## 3

### No Yaayaa waajorii

<sup>1-2</sup> Laamđo loowi Yaayaa 6ii Jakariyaa oo konngol mum ley ladde jeereende. Dum hawrii e hitaande sappo e joyoberde laamu Tibeer kaananke Roma mawdö oo, nde Pontiyu Pilaatu wonnoo goforneer Yahuudiya, Hirudus duu ana laamii Galili, mawnnum Filipa ana laamii leydi Ituriya e Tarankoniti, Lisaniya duu ana laamii leydi Abileen, hawri e nde Annas e Kayafas ngonnoo hooreeße yottinooße sadaka. <sup>3</sup> Yaayaa yiilii e seraaji maayo Urdun fuu ana ooynoo yimbe tuuba, lootee lootogal batistema yalla luutti mum'en ana njaafee. <sup>4</sup> Nii haala mum winndiraa e dewarte annabi Esaaya:

«Neddo ana ooynoo ley ladde jeereende ana wiya:

Moyyinee laawol Joomiraado ngol,

    ndartinee dati makko!

<sup>5</sup> Nadfiire fuu diddete,

    waamnde haayre e toowondireere fuu leydinee,  
laawi ooñidi fuu ndartinee,

laawi bondi fuu moyy/intineel

<sup>6</sup> Neddo fuu yiyan kisindam iwroojam to Laamdo. \*

<sup>7</sup> Yimþe heewþe ana ngarannoo to Yaayaa faa lootee lootagal batisima. Kaa omo wiya þe:  
—Biþþe bolle! Homo jeertini on ndogon jukkungo waroowo? <sup>8</sup> Ngolleji golleeji kawrooji e tuubal. Pati milee e ðerde mon: «Minen, min taaniraabe Ibarahiima.» Sabi mido wiya on: Laamdo ana waawi waylitinde dee kaaye laatoo biþþe Ibarahiima. <sup>9</sup> Jooni jammbere ndee huncaama faa soppa ðadi ledde. Ndennoo, lekki fuu ki rimataa fidde lobbe, soppete, wedee e yiite.

<sup>10</sup> Yimþe bee lamndii mo, mbii:

—Kodum min kaani wafude?

<sup>11</sup> O jaabii þe, o wii:

—Neddo fuu jogiido saayaaji ðidi, yo hokku ngoota kaa mo walaa, neddo fuu jogiido nguure, yo waafu hono non.

<sup>12</sup> Duwaajne'en ngari kajum'en duu faa lootee lootagal batisima, mbii mo:

—Moobbo, kodum min kaani wafude?

<sup>13</sup> O jaabii þe, o wii:

—Pati njooinee yimþe ko yawti sariya.

<sup>14</sup> Sordaasi'en lamndii mo kajum'en duu, mbii:

—Minen nee, kodum min kaani wafude?

O wii þe:

—Pati ngarjhee fay gooto, pati kappee fay gooto fenaande, kejnitoree njøðdi mon.

<sup>15</sup> Tawi yimþe fuu ana ndenngii Almasihu, gooto e maßþe fuu ana miila e ðernde mum yalla wanaa Yaayaa woni Almasihu ya? <sup>16</sup> Yaayaa jaabii þe fuu, wii:

—Miin, ndiyam mbatisiran-mi on. Kaa 6urðo kam baawde ana wara. Mi fotaa fay humtude boggi paade makko. Kanko, Ruuhu Ceniido e yiite o batisirta on. <sup>17</sup> O lanndinike faa o hennoo ñamri makko faa laaþa. O moøta ñamri ndii ley beembal makko, kaa jaande nee o dupperan dum yiite nge ñifataa.

<sup>18</sup> Tawi Yaayaa bannginanii yimþe kabaaru Laamdo, o waajorike þe kulle keewde. <sup>19</sup> Kaa Hirudus kaananke oo, o felino dum saabe tayii Hirudiya jom suudu mawnum, kajum e kulle godde bonde fuu de wadannoo. <sup>20</sup> Hirudus yowi hen bonnde wonnde kasen, o uddii Yaayaa e kasu.

#### No Iisaa lootiraa lootagal batisima

<sup>21</sup> Do yimþe fuu lootaa lootagal batisima doo, doo Iisaa duu lootaa. Wakkati mo o duwotoo oo, kammu udditi, <sup>22</sup> Ruuhu Ceniido jipporii e makko mbaadi wuugaandu. Daande ooynii iwde dow kammu, wii:

—Aan woni Biyam mo korsin-mi, aan cuþii-mi.

#### Haala dammbe Iisaa

<sup>23</sup> Nde Iisaa fuddata golle mum ndee, duuþi mum ana njaara e capantati. E ley jate yimþe, Iisaa yo 6ii Yuusufu.

Yuusufu yo 6ii Eli, <sup>24</sup> Eli 6ii Matat,  
Matat 6ii Lewi, Lewi 6ii Melki,  
Melki 6ii Yannaayi, Yannaayi 6ii Yuusufu,  
<sup>25</sup> Yuusufu 6ii Matatiya, Matatiya 6ii Amos,  
Amos 6ii Nahum, Nahum 6ii Hesili,  
Hesili 6ii Naggaayi, <sup>26</sup> Naggaayi 6ii Maata,  
Maata 6ii Matatiya, Matatiya 6ii Semeyin,  
Semeyin 6ii Yuseka, Yuseka 6ii Yoda,  
<sup>27</sup> Yoda 6ii Yohana, Yohana 6ii Resa,  
Resa 6ii Jorobaabel, Jorobaabel 6ii Salaatiyel,  
Salaatiyel 6ii Neeri, <sup>28</sup> Neeri 6ii Melki,  
Melki 6ii Addi, Addi 6ii Kusama,  
Kusama 6ii Almadama, Almadama 6ii Eri,  
<sup>29</sup> Eri 6ii Iisaa, Iisaa 6ii Eliyeseer,  
Eliyeseer 6ii Yorima, Yorima 6ii Matat,  
Matat 6ii Lewi, <sup>30</sup> Lewi 6ii Simeyon,  
Simeyon 6ii Yahuuda, Yahuuda 6ii Yuusufu,  
Yuusufu 6ii Yonam, Yonam 6ii Eliyakim,  
<sup>31</sup> Eliyakim 6ii Malaya, Malaya 6ii Menna,  
Menna 6ii Mattata, Mattata 6ii Natana,

\* **3:6** Esaaya 40.3-5

Natana 6ii Daawuuda,<sup>32</sup> Daawuuda 6ii Yessa,  
 Yessa 6ii Obed, Obed 6ii Bo'es,  
 Bo'es 6ii Sala, Sala 6ii Nasuuna,  
<sup>33</sup> Nasuuna 6ii Aminadaabu, Aminadaabu 6ii Adamin,  
 Adamin 6ii Arni, Arni 6ii Hisuruuna,  
 Hisuruuna 6ii Fares, Fares 6ii Yahuuda,  
<sup>34</sup> Yahuuda 6ii Yaakuuba, Yaakuuba 6ii Isiyaaka,  
 Isiyaaka 6ii Ibarahiima, Ibarahiima 6ii Taraha,  
 Taraha 6ii Nahor,<sup>35</sup> Nahor 6ii Saruku,  
 Saruku 6ii Ragawu, Ragawu 6ii Faleka,  
 Faleka 6ii Eber, Eber 6ii Sala,  
<sup>36</sup> Sala 6ii Kaynam, Kaynam 6ii Arfasada,  
 Arfasada 6ii Samu, Samu 6ii Nuuhu,  
 Nuuhu 6ii Lamaka,<sup>37</sup> Lamaka 6ii Matusala,  
 Matusala 6ii Henok, Henok 6ii Yarada,  
 Yarada 6ii Maleliyel, Maleliyel 6ii Kaynam,  
<sup>38</sup> Kaynam 6ii Enos, Enos 6ii Setu,  
 Setu 6ii Aadama, Aadama 6ii Laamdo.

## 4

*No Ibiliisa ndaardi seytoraade Iisaa*

<sup>1</sup> Iisaa iwi maayo Urdun yo keewdoo Ruuhu Ceniido. Ruuhu oo naabi mo ley ladde jereende. <sup>2</sup> To ley jeereende too, Ibiliisa waddi e makko balde capande nay ana tewta seytade mo. Fay huunde o jaamaali ley den jalaade fuu. Ko sakitii koo, o yolbi. <sup>3</sup> Ibiliisa wii mo:

—So a Bii Laamdo, yamir ndee haayre laatoo jaamdu.

<sup>4</sup> Iisaa jaabii mo, wii:

—Ana winndii: «Wanaa jaamdu tan neddo wuurdata.»\*

<sup>5</sup> Ibiliisa naabi mo nokku toowdo, holli mo wakkati gooto laamuuj aduna oo dii fuu,<sup>6</sup> wii mo:

—Mi hokkete baawde dow dum fuu, kajum e teddungal mum. Sabi miin hokkaa dum, mido waawi hokkude mo muuy-mi. <sup>7</sup> So a sujidanii kam, dum fuu yo aan jey.

<sup>8</sup> Iisaa jaabii mo, wii:

—Ana winndii: «Joomiraado maa Laamdo tan kaan-daa sujidande, kanko tan kaan-daa rewde.»†

<sup>9</sup> Kasen Ibiliisa naabi mo Urusaliima, darni mo dow lenje-lenje Suudu Dewal Mawndu, wii mo:

—So a Bii Laamdo, suur njippo-daa e leydi,<sup>10</sup> sabi ana winndii:

«O yamiran malaa'ika'en makko ndeene.»

<sup>11</sup> Ana winndii kasen:

«Be njaa66ete, pati koyngal maa gaajoo e haayre.»‡

<sup>12</sup> Iisaa jaabii mo, wii:

—Ana winndii: «Pati ittu koro Laamdo, Joomiraado maa.»§

<sup>13</sup> Nde Ibiliisa ronkunoo seytade mo ndee, seli e makko seeda.

*No Nasaraatunkoobe calorii jaabande Iisaa*

<sup>14</sup> Iisaa wirfitii leydi Galili, semmbe Ruuhu ana e mum, kabaaru makko saakii e leydi ndii fuu.<sup>15</sup> Omo waajoo ley cuudi baajordi Yahuudiyankoo6e, yimbe fuu ana teddini mo.

<sup>16</sup> O yehi Nasaraatu do o mawni doo, o naati e ley suudu waajordu jalaande fowteteende no o woowiri nii. O immii faa o jaangga,<sup>17</sup> o hokkaa dewtere annabi Esaaya, o udditi nde, o forri e nokku binndiraadó hono nii:

<sup>18</sup> «Ruuhu Joomiraado ana e am,

sabi o su6ike kam faa mi anndina misikiina'en Kabaaru Lobbo.

O nelii kam faa mi ooynanoo nanngaa6e yoppiteede mum'en,

e wumbe wumtineede mum'en,

e torraafe yoppiteede mum'en,

<sup>19</sup> faa mi ooynoo hitaande nde Joomiraado hollata moyyere mum ndee warii.»\*

<sup>20</sup> Caggal dum, o uddi dewtere ndee, o totti nde golloowo ley suudu waajordu nduu oo, o joodii. Wonnoob6e ton bee fuu, puttini mo gite.<sup>21</sup> O darii omo wiya 6e:

\* 4:4 Fillitagol Tawreeta 8.3 † 4:8 Fillitagol Tawreeta 6.13 ‡ 4:11 Jabuura 91.11-12 § 4:12 Fillitagol Tawreeta

6.16 \* 4:19 Esaaya 61.1-2

—Ko winndii koo, hannde dūm tabitii do nan-don dūm doo.

<sup>22</sup> Be fuu ebe kaala haala makko lobba, kased duu konngi lobbi jaltudi e hunduko makko dii ana kaaynoo 6e. Be ndarii ebe mbiya:

—Wanaa oo woni 6ii Yuusufu oo naa?

<sup>23</sup> O wii 6e:

—Mido anndi on kaalanan kam ngol banndol: «Cawroowo, sawru hoore maa. Ko min nani a wadii Kafarnahum koo, waadu dūm ngeenndi maa doo duu.»

<sup>24</sup> O wii kased:

—Mido haalana on goonga: annabaajo fay gooto jaabantaake e ngeenndi mum'en. <sup>25</sup> Mido haalana on, rewbe misikiina'en be worbe mum'en maayi ana keewnoo Israa'iila e jamaanu annabi Iliyaasa, wakkati nde waadere kammu saamaali e leydi ndii duubi tati e lebbi jeegom. Nden yolbere mawnde waadiino e leydi ndii fuu. <sup>26</sup> Kaa annabi Iliyaasa nelaaka e fay gooto e maabbe, so wanaa e debbo gooto mo gorum maayi, jeyaado Sarepta leydi Sidon. <sup>27</sup> Kasen duu, seppaaabe ana keewnoo Israa'iila e jamaanu annabi Eliisa, kaa fay gooto e maabbe sellinaaka, so wanaa Naaman jeyaado e leydi Siriya.

<sup>28</sup> Nde yimbe wonbe e ley suudu waajordu nduu nannoo kaa haala ndee, mettaa sanne, <sup>29</sup> immii, ndibbi lisaa faa caggal ngeenndi, ngaddi dūm faa sera waamnde haayre do ngeenndi maabbe ndii woni doo, faa mbedoo mo ley. <sup>30</sup> Kaa o seeki hakkunde maabbe, o witti.

*No Iisaa selliniri gorko laddaado*

<sup>31</sup> Iisaa yehi Kafarnahum ley leydi Galili, omo waajoo yimbe e ley palaande fowteteende.

<sup>32</sup> Be kaaynaa e waaju makko oo, sabi omo waajoroo be baawde.

<sup>33</sup> Gorko mo seydaani woni e mum ana ley waajordu nduu, wulli faa toowi, wii:

<sup>34</sup> —Iisaa Nasaraatunke oo, kodum hillu maa e amen? A gardo halkude min naa? Mido anndi ko ngon-daa, a ceniido iwrudo to Laamdo!

<sup>35</sup> Iisaa jahii e seydaani oo, wii:

—Deyyu yaltu e makko!

Seydaani oo libi neddo oo hakkunde yimbe fuu yalti e mum, tawi dūm wadaali neddo oo fay huunde. <sup>36</sup> Be fuu be kaaynaa, hedde ebe lamndondira hakkunde maabbe:

—Ko kaa haala woni? Seydaani'en 6ee, omo yamira be semmbe e doole be njaltan!

<sup>37</sup> Innde Iisaa nanaa e seraaji dii fuu.

*No Iisaa selliniri jawbe heewbe*

<sup>38</sup> Nde o yalti suudu waajordu nduu ndee, o naati galle taalibbo makko biyeteedo Simon. Esii Simon debbo ana wondunoo e jontere naawnde, be ndaardi mo o walla dum. <sup>39</sup> O darii sera daddo mum, o jahii e jontere ndee, non jontere ndee yoppi debbo oo, o selli. Debbo oo immiif don e don, laatanib 6e njaatigi.

<sup>40</sup> Nde naange mutunoo, jogiido jawdo fuu waddi dūm e makko. Nawbe jawuuji ko di tawaa fuu ngaddaa, o fawii junngo makko e maabbe be fuu gooto gooto, o sellini be.

<sup>41</sup> Seydaani'en ana njalta e yimbe heewbe ana ngulla, ana mbiya:

—Aan woni Bii Laamdo!

Omo jahoo e maabbe, omo wiya be ndeyya, sabi ebe anndi kanko woni Almasiihu.

*No Iisaa waajori haala Laamu Laamdo*

<sup>42</sup> Nde weetunoo ndee, Iisaa yalti, yehi nokku teeldoo. Jamaa oo tewti mo faa yiiti mo, nanngi mo pati o seerta e mum. <sup>43</sup> Kaa o wii 6e:

—Ana tilsi mi 6anngina Kabaaru Lobbo haala Laamu Laamdo oo e geelle godde. Sabi kammari majjum neliraa-mi.

<sup>44</sup> O yehi, hedde omo waajoo ley cuudi baajordi leydi Yahuudiya.

## 5

*No Iisaa noddiri taalibaabe aranndeebe*

<sup>1</sup> Nannee wootere Iisaa ana darii dow fonngo weendu Genesareeti, hedde jamaa ana 6illondira sera makko faa hettindoo konngol Laamdo ngol. <sup>2</sup> O yii laanaaji didi ana panndi e danjeere weendu nduu. Awoo6e yaltube e majji 6ee, ana lalla bubbi mum'en. <sup>3</sup> O naati ngoota e laanaaji dii, ka Simon kaa, o ndaardi dum deerta ka seeda, ka iwa e njoorndi ndii. O joodii e laana kaa, omo waajoo jamaa oo. <sup>4</sup> Nde mo tilii waajaade ndee, mo wii Simon:

—Njehee to luggidi, tippo-don bubbi mon, awon.

<sup>5</sup> Simon jaabii, wii:

—Moobbo, min mbaalii mides awa, min kebaali fay huunde. Kaa so non mbii-daa, mi tippoto bubbi dii.

<sup>6</sup> Nde be tippoi dii ndee, be nanngi liddi faa heewi, faa bubbi maabbe kosi seekaade. <sup>7</sup> Be noddi wondiibe maabbe wonbe e laana ngokka kaa 6ee, ngara mballa 6e. Been ngari, 6e

kebbini laanaaji didi dii fuu, faa di kosi mutude. <sup>8</sup> Nde Simon Piyeer yii dūm ndee, dicci yeeso Iisaa, wii dum:

—Moobbo, wodditam, sabi mi neddo luuttudo.

<sup>9</sup> Ko saabii so o wii dum dee, kanko e wondiibē makko bee fuu, bē kaaynaama saabe keewal liddi di bē nanngi dii. <sup>10</sup> Hono non Yaakuuba e Yuhanna bībē Jebede reentube e Simon see duu kaayniraa. Kaa Iisaa wii Simon:

—Pati hul, gila jooni a laatoto awoowo yimbe.

<sup>11</sup> Nii bē paanndi laanaaji maābē dii, bē njoppi fuu, bē njokki e Iisaa.

#### *No Iisaa selliniri ceppaado*

<sup>12</sup> Nden Iisaa ana wonnoo e ngeenndi ngootiri, faa gorko ceppaado yii dūm, dicci yeeso mum, wii:

—Moobbo, so tawii a jaāii, ada waawi sellinde kam.

<sup>13</sup> Iisaa foocci junngo mum, memi mo, wii:

—Mi jaāii, sellu!

Don e don ceppe dee iwi e makko. <sup>14</sup> Caggal dūm, Iisaa daalii mo pati mo haalana dūm fay gooto, kaa wii mo:

—Yaa holloy hoore maa jottinoovo sadaka, ngadanaa laabugol maa ngol sadaka mo Muusaa yamiri oo, faa anndina bē a sellii.

<sup>15</sup> Non innde Iisaa bēydi naneede. Jamaa keewdō wari, hawriti do makko faa hettindanoo mo, sellinee e jawuuji mum'en, <sup>16</sup> kaa o serindii e nokkuuje teelde, omo wada duawaawu.

#### *No Iisaa selliniri bonnguujo*

<sup>17</sup> Nannde wootere Iisaa ana waajoo. Farisa'en e jannginoobē Sariya Muusaa, iwruōe geelle Galili e Yahuudiya, kajum e Urusalima fuu, ana njoodii. Joomiraado ana 6anngina baawde mum e makko, omo sellina jawuuji. <sup>18</sup> Non yogaabē ngaddi gorko bonnguujo ana lelnaa e dengeleewo, ana tewta naannude dūm faa lelna dūm yeeso makko. <sup>19</sup> Kaa nde bē ndonkunoo naannude mo sabaabu jamaa oo, bē njabbinoyi mo dow bene oo, bē kippiti dūm, bē njippini bonnguujo o e dengeleewo mum fuu hakkunde yimbe bee yeeso Iisaa. <sup>20</sup> Nde o yiinoo goondinal maābē ndee, o wii bonnguujo oo:

—Gidam, luutti maa njaaafaama.

<sup>21</sup> Dunkee'en Sariya bee e Farisa'en keddi miilde ana mbiya e ko'e mum'en: «Oo homo bonkotoo Laamdo? Homo waawi yaafaade luutti so wanaa Laamdo gooto oo?» <sup>22</sup> Iisaa faami miilooji maābē, jaabii bē, wii:

—Kodum wadi so odon miiloo miilooji baadi nii e berde mon? <sup>23</sup> Wiide: «Luutti maa njaaafaama» e wiide: «Imma yaa», kodum hen būri newaade? <sup>24</sup> Kaa faa mi anndina on Bii Neddo ana jogii baawde e aduna oo yaafaade luutti...

Nden o wii bonnguujo oo:

—Mido haalane: imma, bām dengeleewo maa, njahaa suudu maa.

<sup>25</sup> Don e don, bonnguujo oo immii yeeso yimbe fuu, bāmti dengeleewo mum, hooti suudu mum ana yetta Laamdo. <sup>26</sup> Be fuu bē kaaynaa, hedde ebe njetta Laamdo. Kulol nanngi bē, bē mbii:

—Hannde njii-dēn kaayeefiji.

#### *No Iisaa noddiri Lewi*

<sup>27</sup> Caggal dūm, Iisaa yalti, yii duwaajne gooto ana wiyee Lewi ana joodii e duwaajneere mum. O wii dum:

—Jokku e am!

<sup>28</sup> Lewi yoppi fuu, immii, jokki e makko.

<sup>29</sup> Lewi nabi mo galie mum, hoocci mo kodu mawdo, duwaajne'en heewbē e yimbe wobbe ana jaamda and maābē. <sup>30</sup> Farisa'en e dunkee'en Sariya mum'en keddi ana njurjurtia, ana mbiya taalibaabē makko bee:

—Ko saabii so odon jaamda odon njarda e duwaajne'en, kajum e luuttoobē hono mum'en?

<sup>31</sup> Iisaa jaabii bē, wii:

—Wanaa celludo hasindini e cawroowo, jawdo hasindini e cawroowo. <sup>32</sup> Wanaa noddude fooccitiibē waddi kam, noddude luuttoobē faa tuuba woni ko waddi kam.

#### *Haala koorka*

<sup>33</sup> Be mbii mo:

—Taalibaabē Yaayaa ana koora ana ngada duwaawu wakkati fuu, hono non taalibaabē Farisa'en bee duu ngadata. Kaa bē maa bē, ana jaama ana njara.

<sup>34</sup> O wii bē:

—Odon mbaawi hoorinde nootiiþe kuurtungu, tawa jommbaajo gorko ana wondi e mum'en naa? <sup>35</sup> Kaa jalaade ngaran ðe jommbaajo gorko oo ittetee e hakkunde maþþe. E deen jalaade ðe kooran.

<sup>36</sup> O haalanî ðe banndol kasen:

—Fay gooto ittataa e kaddungal kesal fetalaare, faa ðammbira kiinngal. So dum wadii, joomum bonnan kesal ngal, tawee fetalaare ittaande hen ndee yaadataa e kiinngal ngal.

<sup>37</sup> Kasen duu, fay gooto loowataa peguujam kesam e sumalleiji kiiddi. So dum wadii, peguujam kesam ðam fusan ði, yuppo, ði mursee. <sup>38</sup> Peguujam kesam e sumalleiji kesi loowetee. <sup>39</sup> Fay gooto muuyataa peguujam kesam so yarii kiiddam, sabi wiyan kiiddam ðam buri welde.

## 6

### *Haala jalaande fowteteende*

<sup>1</sup> Wadiino e jalaande fowteteende wootere, Iisaa ana seeka gese. Taalibaabe makko ana kelta butaali, ana ngoroo ana yakka. <sup>2</sup> Kaa yoga e Farisa'en mbii ðe:

—Ko saabii so odon ngolla ko dagaaki gollude jalaande fowteteende?

<sup>3</sup> Iisaa jaabii ðe, wii:

—Tama on njannaali ko Daawuuda wadi nde yolbi, kajum e yimþe mum? <sup>4</sup> O naati e ley hukkum ceniido oo, o naami buuru cakkaado oo, o hokki hen yimþe makko. Tawee nee, yottinoóe sadaka tan ndunjanaa jaamde oon buuru.

<sup>5</sup> O wii ðe kasen:

—Bii Nedðo jey jalaande fowteteende.

<sup>6</sup> Nalaande fowteteende wonnde, o naati suudu waajordu omo waajoo. Gorko mo junngo mum jaamo waati ana tawaa ton. <sup>7</sup> Dunkee'en Sariya e Farisa'en ana ngattani Iisaa hakkile. Ana yeewa yalla o anniyyido sellinde gorko oo e ley jalaande fowteteende ndee, faa keþa wullanaade mo. <sup>8</sup> Kaa nde wonnoo omo andni miilooji maþþe, o wii mo junngo mum waati oo:

—Imma, dara hakkunde yimþe!

Gorko oo immii, darii. <sup>9</sup> Caggal dum, Iisaa wii ðe:

—Mido lamndoo on: e ley jalaande fowteteende ana dagoo gollude ko moyyi naa gollude ko boni? Danndude nedðo naa halkude dum?

<sup>10</sup> E oon wakkati, o yeewi ðe fuu, o wii mo junngo mum waati oo:

—Fooccu junngo maa!

Oon foocci ngo tan, ngo selli faa warti hono no wonngo ngoo nii. <sup>11</sup> Dum metti ðe sanne, hedde eþe piya dabare no ðe kaani waðude Iisaa.

### *No Iisaa suborii nelaabe sappo e didon*

<sup>12</sup> E ley deen palaade, Iisaa yalti, yehi dow waamnde haayre faa wada duwaawu. O waali waðude duwaawu. <sup>13</sup> Nde weetunoo ndee, o noddi taalibaabe makko ðee, o suñii hen sappo e didon, o inndiri dum'en nelaabe. <sup>14</sup> Kamþe ngoni: Simon mo o innditiri Piyeer e Andire mijnum e Yaakuuba e Yuhanna e Filipa e Bartolome <sup>15</sup> e Matta e Tomaa e Yaakuuba <sup>16</sup> ii Alfaa e Simon noddirteedo Kiranoowo suudu baaba <sup>16</sup> e Yahuuda <sup>16</sup> ii Yaakuuba e Yahuuda Isikariyota jammbotoodo mo oo.

### *No Iisaa waajorii e no selliniri yimþe*

<sup>17</sup> O jippodii e maþþe, o darii e nokku jaajudo, kanko e heewþe e taalibaabe makko. Jamaa keewdo iwri e ley leydi Yahuudiya fuu e Urusaliima e gure tiimude maayo geeci gila Tirus faa Sidon. <sup>18</sup> Be ngari hettindanaade mo e sellineede e pawuuji maþþe. Be ladde torrunoo cellinaama. <sup>19</sup> Yimþe ðee fuu ana njidi memde mo, sabi baawde ana njalta e makko cellina dum'en fuu.

### *Haala welþe hoore e mettuþe hoore*

<sup>20</sup> E oon wakkati fuu, o hunci gite makko o yeewi taalibaabe makko ðee, o wii:

—Onon misikiina'en, on mbeli hoore,  
sabi onon njey Laamu Laamdo oo.

<sup>21</sup> Onon yolbuþe jooni, on mbeli hoore,  
sabi on kaaran.

Onon woyooþe jooni, on mbeli hoore,  
sabi on njalan.

<sup>22</sup> On mbeli hoore so yimþe mbajii on,  
ndibbi on, njennii on,  
mbonnii inde mon saabe Bii Nedðo.

<sup>23</sup> Nannee mum, ceyee, ilino-don, sabi mbarjaari mawndi ana doomi on dow kammu. Hono non 6e ngadunoo annabaabe aranndeefé see.

<sup>24</sup> Kaa bone woodanii on, onon arsukunte'en,  
    sabi on kebii neema mon.

<sup>25</sup> Bone woodanii on, onon haarsee jooni,  
    sabi on njolban.

Bone woodanii on, onon jalooße jooni,  
    sabi on cuplan, on mboyan.

<sup>26</sup> Bone woodanii on, so yimbe fuu manii on,  
sabi hono non 6e ngadunoo annabaabe peneebe 6ee duu.

### *Haala yidugol konnee'en*

<sup>27</sup> —Kaa onon hettindantooße kam see, mido wiya on: njidee konnee'en mon, tikkanöe on ngadanon dum'en moyyere. <sup>28</sup> Nduwanee hudooße on, torrooße on duu, jaagano-don dum'en Laamdo. <sup>29</sup> So won piido ma banaawo, accu dum fiye banngé goddo oo duu. So won teetudo ma dolloke maa, pati haafu dum forgo oo duu. <sup>30</sup> Neddo fuu jaagiido ma, ndokkaa dum. Teetudo ma jawdi maa, njoppiraa dum. <sup>31</sup> Ngadiranee yimbe no njid-don 6e ngadirana on nii.

<sup>32</sup> So yidubé on tan njidaton, bural hongal kebaton? Fay luuttooße ana njidi yidubé dum'en. <sup>33</sup> So wadanoobe on moyyere tan ngadanton moyyere, bural hongal kebaton? Fay luuttooße 6ee hono non ngadata. <sup>34</sup> So 6e miil-don hebude e mum tan jamloto-don, bural hongal kebaton? Fay luuttooße 6ee ana jaamloo luuttooße hono mum'en, yalla ana njobee jaamaande mum'en. <sup>35</sup> Kaa onon, njidee konnee'en mon, ngadon moyyere tawa on daminaaki hen fay huunde. Nden, on kefan mbarjaari mawndi, on laatoto 6iibbe Laamdo Toowdo oo, sabi oon ana neemina bonnoobe moyyere ana neemina bonbe duu. <sup>36</sup> Laatee yurmotoobe, no Baabiraado mon oo laatorii jurmotoodo nii.

### *Haala njijondiral*

<sup>37</sup> —Pati njijee, on njijataake. Pati njukkee, on njukkataake. Njaafee, on njaafete. <sup>38</sup> Ndokkee, on ndokkete. So on ndokkii, on cowirante saawal lobbal, kebbinaangal faa ana yuppoo, sabi ko etiranton wöbbe koo, dum etirante-don.

<sup>39</sup> O feydani 6e hen banndol gonngol, o wii:

—Bumdo ana waawi dowie bumdo hono mum naa? So dum wadii, wanaa 6e fidon fuu, 6e caaman ley ngaykaare naa? <sup>40</sup> Taalibbo 6urataa moobbo mum, taalibbo ki66udo laatoto hono moobbo mum. <sup>41</sup> Ko saabii so ada yiya kudol ley yitere sakiike maa, tawee aan nee, a yiayataa leggal gonngal e ley nde maa ndee? <sup>42</sup> Hono mbaawru-daa wiide sakiike maa: «Sakiike, dal mi ittane kudol gonngol e yitere maa ngol», tawee aan nee, a maatataa leggal gonngal e ley nde maa ndee? Naafiqi, ittu leggal gonngal e yitere maa ngal tafon, nden jiile maa laabata, faa kefaa no ittiraa kudol gonngol e yitere sakiike maa ngol.

### *Haala lekki e bidde mum*

<sup>43</sup> —Lekki lobbi rimataa bidde bonde, lekki ki woodaa rimataa bidde lobbe. <sup>44</sup> Sabi lekki fuu ana annditiree fidde mum. Ibbe tebataake e kebbe, peguuje tebataake e gi'e. <sup>45</sup> Neddo moyyo, ko moyyi iwata e ndesaari ngonndi ley bernde mum. Neddo bondö, ko boni iwata e ndesaari ngonndi ley bernde mum. Sabi ko woni e bernde, dum yaltata e hunduko.

### *Banndol haala suudu diidaandu dow haayre*

<sup>46</sup> —Ko saabii so ofon noddira kam «Moobbo», kaa on ngadataa ko mbii-mi? <sup>47</sup> Neddo fuu gardo e am so hettindii haalaaji am so jokki di, mi hollan on mo nanndi: <sup>48</sup> Joomum ana nanndi e neddo mahudo suudu, so asi leydi ndii faa yottii haayre, diidi ndu dow mayre. Nde yiwoonde to6unoo faa ilaali mbuuwi, ronki fay dimmbude ndu, sabi dow haayre ndu mahaa. <sup>49</sup> Kaa nando haalaaji am so jokkaali, ana wa'i hono mahudo suudu dow njaareendi, mo asanaali dum diidol. Nde ilaali mbuuwnoo, ndu wurji e leydi don e don, ndu boni.

## 7

### *No Iisaa selliniri kaadime hooreejo sordaasi'en*

<sup>1</sup> Nde Iisaa tillii waajaade hettindotoobe 6ee ndee, yehi Kafarnahum. <sup>2</sup> Hooreejo sordaasi'en gooto, kaadime mum korsudo jawi faa ana habana yonki. <sup>3</sup> Hooreejo oo nani haala Iisaa ana haalee, neli e makko mawbe Yahuudiyanooße, o wara o dannda kaadime mum oo. <sup>4</sup> Be ngari e Iisaa, 6e ndaardi dum sanne sanne, ebe mbiya:

—Omo haani wadaneede dum, <sup>5</sup> sabi omo yidi lejol men ngol, kasen duu kanko mahi suudu men waajordu nduu.

<sup>6</sup> Iisaa yaadi e maābe. Kaa nde 6e 6adinoo galle oo ndee, hooreejo sordaasi'en oo neli yimbe mum e makko, wii mo:

—Moobbo, pati tampin hoore maa, sabi miin, mi wanaa fay huunde, fotaa ko ngaraa galle am. <sup>7</sup> Dum saabii mi taykike miin e hoore am, mi haanaa yaade to maa. Kaa dana ko kaal-daa tan, kaadime am oo sellan. <sup>8</sup> Miin e hoore am, mi laamaado, miin duu mido laamii sordaasi'en. So mi yamirii gooto yaha, yahan, so mi wii goddo wara, waran, so mi wii kaadime am wada huunde, wadan.

<sup>9</sup> Nde Iisaa nani kaa haala ndee, haaynaa e hooreejo sordaasi'en oo, yeeyii yimbe jokkuue e mum 6ee, wii:

—Mido haalana on, mi yiyaali hono ngal goondinal e sellude fay e Israa'ilanke.

<sup>10</sup> Nde nelaabe 6ee mbirfitti galle too ndee, tawi kaadime oo sellii.

#### *No Iisaa wuurtiniri 6ii debbo mo gorum maayi*

<sup>11</sup> Janngo mum, o yehi ngeenndi mbiyeteendi Nayin, kanko e taalibaabe makko e yimbe heewbe. <sup>12</sup> Nde o 6adinoo damal ngeenndi ndii ndee, o hawri e mahiidi suka gorko. Oon yo bajjo, abba mum maayii, inna mum famaaka kased. Yimbe ngeenndi ndii heewbe ana njokki e inniraado oo. <sup>13</sup> Nde Iisaa yii inniraado oo ndee, yurmii dum, wii:

—Pati woy!

<sup>14</sup> Iisaa 6adii, memi leggal naāigal ngal. Roondinoobe 6ee ndarii, o wii:

—Suka jokolle, mido wiye: imma!

<sup>15</sup> Nii maaydo oo immii joodii, ana haala. Iisaa totti mo inniiko. <sup>16</sup> Kulol nanngi yimbe 6ee fuu, hedde e6e njetta Laamdo, e6e mbiya:

—Annabaajo mawdo 6anngii e ley men! Laamdo warii faabaade yimbe mum!

<sup>17</sup> Oo kabaaru saakii e leydi Yahuudiya e seraaji mum fuu.

#### *Haala nelal ngal Yaayaa neli e Iisaa*

<sup>18</sup> Ko wadi koo fuu, Yaayaa narrii dum taalibaabe mum, noddi didon maābe, <sup>19</sup> neli dum'en to Iisaa, 6e lamndo dum yalla kajum woni garoovo oo, naa 6e ndooman goddo? <sup>20</sup> Been worēe didon ngari e Iisaa, mbii dum:

—Yaayaa mo lootogal batisima neli min e maa, min lamnde yalla aan woni kaando warde oo, naa min ndooma goddo?

<sup>21</sup> E oon wakkati, omo sellina yimbe heewbe pawuuji di ngaldaa sii, omo ribba seydaani'en, omo wumtina wumbe heewbe. <sup>22</sup> O jaabii 6e, o wii:

—Njehee njantanoyee Yaayaa ko njii-don e ko nan-don: wumbe ana mbumta, layannoobe ana njabba faa gasa, seppaae ana cellinee, faadube ana paadita, maaybe ana nguerta. Misikina'en duu kaalanaama Kabaaru Lobbo oo. <sup>23</sup> Oon mo salaaki goondinde kam, welii hoore.

<sup>24</sup> Nde nelaabe 6ee kooti ndee, Iisaa fuddi haalande jamaa oo haala Yaayaa, o wii:

—Kodum yeewyno-don to ladde jeereende too? Kudol dimmbotoongol e henndu naa?

<sup>25</sup> Kodum yeewyno-don? Neddo pariido naa? Boornotoobe kaddule lobbe so nguura nguurndam lobbam 6ee, e cuudi kaanankooibe tawetee. <sup>26</sup> Kodum yeewyno-don ndennoo? Annabaajo naa? Goonga! Mido haalana on, omo 6uri annabaajo. <sup>27</sup> Kanko woni mo Biinndi 6ii mbii e mum:

«Miin Laamdo, mi ardinante nelaado am moyyinanooow ma laawol.»\*

<sup>28</sup> Mido haalana on, bammabaade bammbaali 6urdo Yaayaa, tawee nee, 6urdo lo'ude e Laamu Laamdo oo 6uri mo teddude. <sup>29</sup> Yimbe hettindiibe mo 6ee fuu, fay duwaaje'en 6ee, njabii konngol Laamdo ngol ko Yaayaa looti dum'en lootogal batisima koo. <sup>30</sup> Kaa Farisa'en e jannginoobe Sariya mberriike faandaa Laamdo ko 6e calii looteede e junngo Yaayaa koo.

<sup>31</sup> Ndennoo, kodum nanndinan-mi e yimbe oo jamaanu? Hobē 6e nanndi? <sup>32</sup> E6e mba'i hono sukaabe joodiibe e luumo, ana noddondira, ana mbiya:

«Min piyanii on cereeli,

on mbamaali.

Min mboyanii on woondu yurminiindu,

on mboyaali.»

<sup>33</sup> Sabi Yaayaa mo lootogal batisima warii, naamataa 6ii jalo, yarataa doro, on mbii yo laddaado. <sup>34</sup> Kaa Bii Neddo oo warii, ana jaama ana yara, on mbii jaamde e yarde tan woni e hakkille mum, o gido duwaaje'en e luuttoobe hono mum'en. <sup>35</sup> Kaa Laamdo hakkilante oo, jaabube dum 6ee fuu njijyan goonga mum.

#### *No Iisaa yaaforii debbo pijoowo*

<sup>36</sup> Gooto e Farisa'en 6ee noddii mo bottaari. O naati galle joomum, omo jaamda e mum.

<sup>37</sup> Debbo pijoowo ana e ngeenndi ndii. Ko o nani Iisaa ana wottoo to galle Farisanke oo

\* 7:27 Malakiya 3.1

koo, o waddi faandu nebam uuroojam, <sup>38</sup> o heedi caggal mum sera koyde mum, omo woya, omo leefinira koyde mum dee gondi makko, omo soccira de sukundu makko, omo uurnoo de, omo wuja e majje nebam dam. <sup>39</sup> Nde Farisanke noddudo mo oo yii dum ndee, wii e ley becce mum: «Sinndo oo yo annabaajo, o anndan debbo memoowo mo oo, o annditan oon yo pijoowo.» <sup>40</sup> Iisaa haaldi e Simon Farisanke oo, wii:

—Simon, mifo haalane huunde wootere.

O jaabii:

—Haal, Moobbo!

<sup>41</sup> Iisaa wii:

—Namlotoodo gooto ana rewannoo yimbe didon, gooto oo buudi cardi teemedo joy, goddo oo buudi cardi capande joy. <sup>42</sup> Kaa nde mo anndunoo 6e ngala ko 6e njobira mo ndee, o yaafii be didon fuu. Jooni, homo e ma66e buri yifude mo?

<sup>43</sup> Simon jaabii:

—Mido miila mo o yaafii kaalisi keewdo oo.

Iisaa wii mo:

—A haalii goonga!

<sup>44</sup> Caggal dum, o yeeyii debbo oo, o wii Simon:

—A yii oo doo debbo naa? Mi naatii galle maa, fay ndiyam ko mi semmbira koyde am a hokkaali kam. Kaa kanko, gondi makko o leefiniri koyde am, o socciri de sukundu makko. <sup>45</sup> Aan, a buuccaaki kam, kaa kanko, gila naatu-mi, o njottaali buuccaade koyde am. <sup>46</sup> A wujaali hoore am nebam, kaa kanko, o wujii e koyde am nebam uuroojam. <sup>47</sup> Dum saabii so mido wiye: luutti makko e heewde fuu njaaftama, ndennoo jilli makko ana mawni. Kaa jaafaado seeda, jilli seeda hollata.

<sup>48</sup> Caggal dum, o wii debbo oo:

—Luutti maa njaaftama.

<sup>49</sup> Naamannoobe e makko 6ee ana mbiya e ko'e mum'en: «Homo woni oo gorko jaafotoodo fay luutti?»

<sup>50</sup> Non o wii debbo oo:

—Goondinal maa hisinii ma. Yaa e jam.

## 8

### No rewbe dowlanirii Iisaa

<sup>1</sup> Caggal dum, Iisaa ana yiiloo e geelle e gure fuu, ana oyynoo Kabaaru Lobbo haala Laamu Laamdo. Taalibaa6e makko sappo e didon 6ee ana ngondi e makko, <sup>2</sup> kajnum e rewbe yogaabe be seydaani'en mum'en ndibbaa, jawuuji mum'en cellinaa. Kambe ngoni Mariyama annditirteedo mo Magdala, mo seydaani'en njedfon ndibbanoo iwde e mum, <sup>3</sup> e Yowanna jom suudu howruujo Hirudus biyeteedo Huja, kajnum e Susaana e rewbe wobbe heewbe wallirannoobe 6e jawle mum'en.

### Banndol haala aawoowo

<sup>4</sup> Yimbe iwi e geelle dee fuu, ngari e makko. Jamaa keewdo filii mo, o haalani 6e ngol banndol:

<sup>5</sup> —Aawoowo yalti sankoyde. E ley sankugol ngol, yoga e aawdi ndii saami e laawol, yaabaa, pooli ngari cu6i dum. <sup>6</sup> Yoga mayri saami e korokaaye, fudi, yoori, sabi nokku oo darnataa ndiyam. <sup>7</sup> Yoga mayri saami do kebbe pudata, kebbe dee cuumi ndi. <sup>8</sup> Yoga mayri saami e leydi mbelindi, fudi, rimi, wabbere fuu sowii cowe teemedere.

Nde o haalnoo dum ndee, o toowni daande makko, o wii:

—Jom nowru fuu yo nanu.

<sup>9</sup> Taalibaa6e makko 6ee lamndii mo:

—Kodum ngol banndol firritata?

<sup>10</sup> O wii 6e:

—Onon, on ndokkaama faamde goonga tedduudo haala Laamu Laamdo oo. Kaa wobbe 6ee e banndi 6e kaalanirtee, yalla:

«ebe yeewa, tawa 6e njiyataa,

6e nana, tawa 6e paamataa.» \*

<sup>11</sup> Maanaa banndol ngol annii: aawdi ndii yo konngol Laamdo. <sup>12</sup> Yimbe yogaabe ana nanndi e laawol. So 6e nanii konngol ngol fuu, Iibiliisa waran itta ngol e 6erde ma66e pati 6e ngoondina, sako 6e kisa. <sup>13</sup> Yogaabe ana nanndi e korokaaye. Be nanan konngol ngol, 6e njabboroo ngol seyo. Kaa ngol walaa dadf e ma66e, wakkati gooto tan 6e ngoondinta. Nde soobee oo wari fuu, 6e njoppan. <sup>14</sup> Yogaabe ana nanndi e nokku kebbe do aawdi ndii saami doo. So 6e nanii konngol ngol tan, 6e mbittan, sabi sugullaaji aduna e joote jawdi e gidaade

\* **8:10** Esaaya 6.9

yonki cuuman ngol ngol waasa 6enndude. <sup>15</sup> Kaa do aawdi ndii saami e leydi mbelndi doo, been ngoni naniroofe konngol ngol 6erde belde, laabude, so kayba ngol faa ngol rima.

*Banndol haala lampa*

<sup>16</sup>—Fay gooto hubbataa lampa so hippa hen la'al naa soorna dum ley leeso. Ko wadata dee, sinndan dum, yalla eka yaaynana naatoofe. <sup>17</sup> Sabi walaa fuu ko joobi ko 6anngintaake, walaa ko suudii ko annditataake faa yaltinee sella. <sup>18</sup> Ndennoo, tiidee e no nanir-don nii, sabi jogiido fuu, 6eydante. Kaa mo walaa oo, fay ko miilata ana jogii koo teetete.

*Inna Iisaa e mijiraabe Iisaa*

<sup>19</sup> Inniiko e mijiraabe makko worbe ngari e makko, kaa 6e ke6aali yottaade mo saabe jamaa. <sup>20</sup> O haalanaa inna makko e mijiraabe makko ana ndarii sella ana njidi yiide mo. <sup>21</sup> Nii o jaabii, o wii:

—Innam e mijiraabe am yo nanoofe konngol Laamdo ngol so ngollira dum 6ee.

*No Iisaa waaltiniri henndu*

<sup>22</sup> Nannde wootere Iisaa e taalibaabe mum naati laana. O wii 6e:

—Lummben weendu nduu.

Be ndeerti. <sup>23</sup> E ley lummbugol ngol, mo daanii. Oon wakkati fuu, henndu mawndu immui, laana kaa heewi ndiyam, ka hosi mutude. <sup>24</sup> Be 6adii, ebe pinndina mo efe mbyia:

—Moobbo, Moobbo, misen nii kalkkoo!

O fini, o jahii e henndu nduu e bempeeje dee, non fuu wii teen! <sup>25</sup> Caggal dum, o wii 6e:

—Hoto hoolaare mon woni?

Be kuli, fe curji, ebe mbiyondira e ko'e maaf6e:

—Ko oo gorko woni? Omo yamira fay henndu e ndiyam, di dowtanto mo.

*No Iisaa selliniri laddaado tuddiido janaale*

<sup>26</sup> Caggal dum, 6e panndoyi leydi Gerasankoo6e, peewtondirndi e leydi Galili. <sup>27</sup> Nde o yeenti ndee, gorko laddaado, jeyaado e ngeenndi ndii, joppudo kaddule ko 6ooyi so tuddoyi janaale, wari e makko. <sup>28</sup> Nde o yii Iisaa ndee, o wulli, o dicci yeeso mum, o haali faa toowi, o wii:

—Iisaa, Bii Laamdo Toowdo, ko njid-daa wafude kam? Mido jaage, pati torram.

<sup>29</sup> Walaa ko o wiiri non, sinaa Iisaa yamirii seydaani oo yalta e neddo oo. Oo seydaani ana war-wartannoo e makko cili keewdi. Oon ana geyyetenoo juude e koyde fuu, geyyiree calali, kaa o tayan dum fuu, seydaani oo regina mo ngeenndi, naaba mo ley ladde jeereende.

<sup>30</sup> Iisaa lamndii mo, wii:

—Hono mbiyete-daa?

O jaabii:

—Mido wiye «Jamaa».

O wii dum non, sabi seydaani'en heewbe ana ngondi e makko. <sup>31</sup> Be ndarii ebe ndaarda Iisaa pati o yamira 6e 6e naatoya e iduru. <sup>32</sup> Sewre girooji mawnde ana durannoo don e hoore waamnde haayre. Seydaani'en 6ee ndaardi mo o dunjanoo dum'en naatoya e ley girooji dii. O dunjanii 6e. <sup>33</sup> Be njalti e neddo oo, 6e naati e ley girooji dii. Sewre ndee fuu diiri, iwi hoore waamnde haayre too, naatoyi e ley weendu nduu, yoolii.

<sup>34</sup> Nde duroo6e 6ee njii dum ndee, 6e ndogi, 6e njantanoyii dum yimbe ngeenndi ndii e seraaji mum. <sup>35</sup> Been ngari yeewde ko wadi koo. Nde 6e njottii Iisaa ndee, 6e tawi laddanoodo oo ana joocii bannge makko, ana 6oornii kaddule, yeeddfiti. Nii kulol nanngi 6e. <sup>36</sup> Yiinoobe dum bee njantanii yimbe no laddanoodo oo selliniraa. <sup>37</sup> Yimbe leydi Geresa fuu ndaardi Iisaa yoppana dum'en leydi mum'en, sabi kulol manngol nanngi dum'en. O naati laana, o witti. <sup>38</sup> Mo seydaani mum ribbaa oo, ndaardi Iisaa acca o jokka e mum. Kaa Iisaa wirfintini mo, wii:

—Hootu suudu maa, kumpitaa yimbe maa ko Laamdo wadan maa.

O yehi, o oyenni e ngeenndi ndii fuu ko Iisaa wadani mo koo.

*No Iisaa wuurtiniri 6ii Jayrus e no selliniri debbo nawdo*

<sup>40</sup> Nde Iisaa wartunoo ndee, jamaa oo ja66ii dum, sabi yimbe fuu ana ndoomunoo dum.

<sup>41</sup> Non gorko biyeteedo Jayrus, hooreejo suudu waajordu, wari e makko, dicci yeeso makko, ndaardi mo o wara galle mum, <sup>42</sup> sabi biyum debbo bajjo, mo duubi mum mbaarata e sappo e dici, ana haabana yonki.

E ley yaadu Iisaa ton nduu, yimbe 6illi dum sanne. <sup>43</sup> Debbo gooto, mo tuundi mum tayataa ko waarata e duubi sappo e dici, ana tawaa ton. Ko mo joginoo fuu mo sawrorike faa laafi, kaa fay gooto hefsaali sellinde mo. <sup>44</sup> Mo iwri caggal Iisaa, mo memi kommbol saaya mum. Don e don yiyyam dam tayi. <sup>45</sup> Iisaa wii:

—Homo memi kam?

Kaa nde wonnoo fay gooto jaabaaki, Piyeer wii:

—Moobbo, hakkunde yimbe yngon-daa, ebe 6illu maa.

<sup>46</sup> Iisaa wii:

—Won memdo kam, sabi mi maatii won semmbe iwdo e am.

<sup>47</sup> Nde debbo oo annditinnoo dum suudataako ndee, wari ana sijna, diccii yeeso makko, haali hakkunde yimbe fuu ko saabii so memi mo e no selliri don e don. <sup>48</sup> Iisaa wii mo:

—Banndam debbo, goondinal maa danndii ma. Yaa e jam.

<sup>49</sup> Iisaa tilaka haalde, faa won iwrudo to hooreejo suudu waajordu oo too, wii Jayrus:

—Biya oo heddaaki, fota ko tampinaa moobbo oo hankasen.

<sup>50</sup> Kaa nde wonnood Iisaa nanii dum, wii hooreejo suudu waajordu oo:

—Pati hul, hoolam tan, biya oo daafan.

<sup>51</sup> Nde o yottii galle Jayrus ndee, o dalaali fay gooto naadda e makko, so wanaa Piyeer e Yuhanna e Yaakuuba e baaba suka oo e inna mum. <sup>52</sup> Yimbe 6ee fuu ndarrii ana mboya suka oo, ana conkina semmbe. O wii be:

—Pati mboyee! O maayaali, o daaniido tan.

<sup>53</sup> Kaa 6e puuytini haala makko, sabi ebe anndi o maayii. <sup>54</sup> Iisaa nanngi junngo suka oo, toowni daande, wii:

—Suka, imma!

<sup>55</sup> Yonki makko warti e makko, o immii don e don. Iisaa yamiri 6e ndokka mo ko o jaama.

<sup>56</sup> Saaraabe suka oo kaaynaa. O daalii 6e pati 6e kaalana fay gooto ko wadi koo.

## 9

*No Iisaa neliri taalibaabe mum sappo e didon bee*

<sup>1</sup> Iisaa noddi taalibaabe sappo e didon bee, hokki dum'en semmbe, hokki dum'en baawde ribbugol seydaani'en e sellingol jawuuji. <sup>2</sup> O nelii 6e 6e ooynoo Kabaaru Lobbo haala Laamu Laamdo oo, 6e cellina jawbe. <sup>3</sup> O wii 6e:

—Pati naboree fay huunde e laawol ngol, wanaa sawru, wanaa mbasu, wanaa nguure, wanaa kaalisi. Kasem duu pati naboroon saayaaji didi. <sup>4</sup> Galle mo njippi-don e mum fuu, keddo-don don faa nde iw-don don. <sup>5</sup> Ngeenndi fuu ndi yimbe mum nja66aaki on, njalton dum, piddon colla koyde mon, faa jeertina 6e ko 6e ngadi koo ana boni.

<sup>6</sup> Be mbitti, ebe ngada ngeenndi e ngeenndi, ebe mbaajoo Kabaaru Lobbo oo, ebe cellina jawbe wonfie e nokkuuje dee fuu.

*No kabaaru Iisaa jiibiri hakkiile Hirudus*

<sup>7</sup> Hirudus, hooreejo leydi oo, nde nannoo haala Iisaa ana haalee, hakkiile mum jiibii. Sabi won wiyanoo6e Yaayaa mo lootagal batisima oo wuurti, <sup>8</sup> wo66e ana mbiya annabi Ilyasaas 6anngi, wo66e kasen ana mbiya gooto e annabaabe arannde6e 6ee wuurti. <sup>9</sup> Kaa Hirudus wii:

—Mi tayii hoore Yaayaa. Homo woni oo mo nanan-mi baado hono nii?

Omo tewta yiide dum.

*No Iisaa jamminiri ujunaaji joy gorko*

<sup>10</sup> Nelaabe 6ee ngarti. Be njantani Iisaa ko 6e ngadi koo fuu. O nabi 6e hedde ngeenndi mbiyeteendi Baytisayda, o teeldi e ma66e. <sup>11</sup> Jamaa oo nani dum, jokki e makko, o ja66ii 6e, hedde omo haalana 6e haala 6anngugol Laamu Laamdo oo, o sellini e ma66e hasindin6e e sellineede 6ee. <sup>12</sup> Nde hiiri ndee, sappo e didon bee battitii mo, mbii mo:

—Yoppitin jamaa oo yaha e geelle e daakaaji pilidi yalla ana kefa do njippoo jaama, sabi oo nokku yo ladde.

<sup>13</sup> O wii 6e:

—Onon e ko'e mon, ndokkee 6e ko 6e jaama!

Be mbii mo:

—Buuruuje joy e liddi didi tan min njogii, naa so wanaa min coodanoyan 6ee yimbe fuu ko jaama dee.

<sup>14</sup> Tawi yimbe 6ee ana njaha e ujunaaji joy gorko. O wii taalibaabe makko 6ee:

—Njoyiniree 6e tunaale-tunaale, wootere fuu capande njoyon.

<sup>15</sup> Be ngadiri non, 6e njoyyini 6een fuu. <sup>16</sup> O 6ami buuruuje joy dee e liddi didi dii, o tiggiti kammu, o yetti Laamdo. O tayi buuru oo e liddi dii, o hokki taalibaabe makko 6ee njeda jamaa oo. <sup>17</sup> Be fuu 6e jaami faa 6e keddi. Taalibaabe 6ee ndeentini taye keddidiise dee, kebbini cagiji sappo e didi.

*No Piyeer seedorii Iisaa woni Almasiihu*

<sup>18</sup> Nannde wootere omo teeldi e taalibaabe makko, omo wada duwaawu, kanko tan. O lamndii 6e, o wii:

—Homo yimbe mbiyata ngon-mi?

<sup>19</sup> Be njaabii mo, 6e mbii:

—Won wiyoobe a Yaaya mo lootogal batisima, won wiyoobe a annabi Iliyaasa, won wiyoobe kasen gooto e annabaabe aranndeebe bee wuurti.

<sup>20</sup> O lamndii 6e:

—Onon nee, homo mbiyatlon ngon-mi?

Piyeer jaabii mo, wii:

—A Almasiihu Laamdo!

<sup>21</sup> O yaggini 6e pati 6e kaalana dum fay gooto.

*No Iisaa bannginiri maayde mum e wuurtugol mum*

<sup>22</sup> O beydi hen kasen, o wii:

—Ana tilsi Bii Neddo torree torraajji keewdi, mawbe 6ee e hooreebe yottinoobe sadaka e dunkee'en Sariya tippitoto mo, o waree, kaa mo wuurtan jannde tataabere.

<sup>23</sup> Caggal dum, o wii 6e fuu:

—Muuydo jokkude kam fuu, njotta yurmaade hoore mum, 6ama leggal mum bardugal\* jannnde fuu, jokka e am. <sup>24</sup> Sabi muuydo danndude yonki mum, waasan ki. Kaa baasirdo ki sabaabu am, danndan ki. <sup>25</sup> Kodum he6ude aduna oo fuu nafata neddo so halkii yonki mum naa mursii hoore mum? <sup>26</sup> Jaannoriido kam muin e haalaaji am dii fuu, miin Bii Neddo oo duu, mi yaannorto dum nde mi wardii e malaa'ika'en seniibe ley teddeengal am e ley teddeengal Baabiraado am. <sup>27</sup> Mido haalana on goonga: yoga e wonbe doo 6ee maayataa, tawee njiyaali Laamu Laamdo oo banngii.

*No noone Iisaa waylitorii*

<sup>28</sup> Ko waarata e balde jetti caggal ko o haali dii haalaaji koo, o njabboyi dow waamnde haayre faa o wada duwaawu, o yaadi e Piyeer e Yuhanna e Yaakuuba. <sup>29</sup> Nde mo duwotoo ndee, yeeso makko waylitii, kaddule makko ndawni faa ana njalba. <sup>30</sup> Non worbe didon 6anngi, ana kaalda e makko, dum Muusaa e Iliyaasa. <sup>31</sup> Be fanngidi e teddeengal, e6e kaala haala laawol makko tabitoyoowol Urusaliima ngol. <sup>32</sup> Piyeer e wondiibe mum 6ee yo daaninoobe doyngol teddungol, 6e pini, 6e njii teddeengal makko, 6e njii worbe didon wonduse e makko 6ee. <sup>33</sup> Nde yimbe didon see ngari faa ceerta e Iisaa ndee, Piyeer wii mo:

—Moobbo, gonal amen doo ana moyyi. Dal min ndarna doo buguujitati: aan wooturu, Muusaa wooturu, Iliyaasa wooturu.

Kanko e hoore makko, o anndaano ko o haalannoo. <sup>34</sup> O tilaaki haalde, faa luurde war, suddi 6e. Taalibaabe 6ee kuli sanne nde luurde ndee suddi 6e ndee. <sup>35</sup> Daande iwri e ley luurde ndee, wii:

—Oo doo yo Biyam mo cubii-mi. Kettindee mo!

<sup>36</sup> Ko daande ndee nanaa koo, Iisaa kajum tan gooto tawaa ton. Taalibaabe 6ee cuudi kabaaru oo. E ley deen jalaade, 6e kaalanaali fay gooto ko 6e njii koo.

*No Iisaa selliniri suka laddaado*

<sup>37</sup> Janngo mum, ko 6e njippii waamnde haayre ndee koo, higgere jamaa ja66ii mo. <sup>38</sup> E ley jamaa oo, gorko gooto eewnii, wii:

—Moobbo, mido jaage, tiinna yeewanam biyam gorko, sabi kanko tan njogii-mi. <sup>39</sup> Ladde ana nanngaa mo, o wulla, o sijnya faa hunduko makko yufa ngufo. Nde yoppataa mo so wanaa caldi makko fuu taya. <sup>40</sup> Mi jaagike taalibaabe maa 6ee ndibba nde, kaa 6e ndonkii.

<sup>41</sup> Iisaa jaabii, wii:

—Hey yimbe jamaanu bondo 6e nganaa goondin6e. Faa mande tilotoo-mi e mon? Faa mande keddotoo-mi mujandae on? Battin biya oo doo!

<sup>42</sup> Nde suka oo fadinoo Iisaa ndee, ladde ndee li6i dum e leydi, hedde ana dimmba dum. Nii Iisaa jahii e ladde ndee, sellini suka oo, totti dum baaba mum. <sup>43</sup> Yimbe fuu kaaynaa saabe baawade Laamdo mawde dee.

*No Iisaa bannginiri kasen maayde mum e wuurtugol mum*

E ley ko jamaa oo fuu haaynaa e golleeji Iisaa dii koo, o wii taalibaabe makko 6ee:

<sup>44</sup> —Onon, piddee noppi mon, nanon ko kaalan-mi: Bii Neddo oo wadete e juude yimbe.

<sup>45</sup> Kaa 6e paamaali haala kaa, maanaa makka ana suudanii 6e, faa 6e mbaasi annditinde ka. Be kulii lamnditaade mo duu.

*Haala 6urdo teddude*

<sup>46</sup> Non taalibaabe 6ee ndarii ana njeddondira 6urdo teddude hakkunde mum'en. <sup>47</sup> Nde wonnoo omo anndi ko woni e 6erde ma66e, o nanngi junngo cukale, o darni ngel bannge makko, <sup>48</sup> o wii 6e:

\* <sup>9:23</sup> Maanaa famde leggal mum bardugal woni fellisidde mursude yonki mum hono no Iisaa nii.

—Neddo fuu jaăbiiđo ngel cukalel e innde am, miin jaati o jaăbii. Kasen duu, jaăbiiđo kam, jaăbikе nelđo kam oo. Sabi ńurđo lo'ude hakkunde mon fuu, kajum woni teddudo.

*Haala mo yeddaali en fuu, e men wondi*

<sup>49</sup> Yuhanna haali, wii:

—Moobbo, min njii gorko gooto ana ribbirä seydaani'en innde maa, min kadii mo, sabi o waldaa e men.

<sup>50</sup> Iisaa wii mo:

—Pati kadee mo düm, sabi mo honnaaki on fuu, e mon wondi.

<sup>51</sup> Nde wakkati mo Laamđo ńabbintinta Iisaa dow kammu ńadinoo, Iisaa e hoore mum fellisi yahan Urusalimiä, <sup>52</sup> neli nelaaăe arđoo düm. Been nelaafe naati e ngeenndi Samariyankoođe ngootiri faa ndaartana mo jippunde. <sup>53</sup> Kaa ndiin ngeenndi jaăbaaki mo, sabi Urusalimiä o fa'i. <sup>54</sup> Nde Yaakuuba e Yuhanna njiiđo düm ndee, mbii:

—Kalfaado, ada yidi min njamira yiite iwa dow kammu duppa 6e naa?

<sup>55</sup> Nii o yeecitii 6e, o inji 6e. <sup>56</sup> Caggal mum, 6e njehi ngeenndi ngonndi.

*No yimbe mbiiri njokkan e Iisaa*

<sup>57</sup> E ley yaadu maăbe nduu, nedđo gooto wii mo:

—Mi jokkete to njahataa fuu.

<sup>58</sup> Iisaa wii mo:

—Doldolđe ana njogii gayđe, pooli duu ana njogii cuudi, kaa Bii Nedđo oo walaa fay do soppinoō sakoo faa lelna hoore mum fowtinoo.

<sup>59</sup> O wii nedđo godđo:

—Jokkam!

Oon jaabii mo, wii:

—Accu mi iroya baabam tafon.

<sup>60</sup> Iisaa wii mo:

—Dal maayće ira maayće mum'en. Aan kaa, waajoya haala Laamu Laamđo oo.

<sup>61</sup> Godđo kasen wii mo:

—Mi jokkan e maa, Moobbo, kaa accu mi waynøyoo galle am tafon.

<sup>62</sup> Iisaa jaabii mo, wii:

—Nedđo fuu nanngudo jalo sari nde yeeyii, walaa ko nafata e Laamu Laamđo oo.

## 10

*No Iisaa neliri taalibaăe mum capande njedđon e didon*

<sup>1</sup> Caggal düm, Iisaa suđii e ley taalibaăe mum capande njedđon e didon, neliri 6e didon didon, 6e arđoo düm e ngeenndi fuu e nokku fuu do o haannoo yaade, kanko e hoore makko.

<sup>2</sup> O wii 6e:

—Gese ńennduđe ana keewi, kaa hettoobę keewaa. Ndennoo, jaagee Jom kettal oo nelda hettoobę to hettantee too. <sup>3</sup> Njehee, mi nelii on no baali hakkunde pobbi nii. <sup>4</sup> Pati naboree fay huunde, wanaa dangga, wanaa mbasu, wanaa pade. Pati njowtee fay gooto e dow laawol. <sup>5</sup> Galle mo naataton fuu, njowton jooomen'tafon, mbiyon: «Yo jam wonu e oo galle!» <sup>6</sup> So nedđo jom jam won don, duwaawu mon hewtan düm. Kaa so walaa, duwaawu mon oo wartan e mon. <sup>7</sup> Njippo-don e oon galle. Ko 6e ndokki on fuu jaamon, njaron, sabi golloowo ana haandi e njođi mum. Pati ngaddee naata-yalta e ley galleji. <sup>8</sup> Ngeenndi fuu ndi naatu-don, so on njabbaama, ko ngaddane-don fuu jaamon. <sup>9</sup> Cellinon jawbe 6e tawdon don fuu, mbiyon yimbe ngeenndi ndii: «Laamu Laamđo battiima on.» <sup>10</sup> Ngeenndi fuu ndi naatu-don, so on njabbaaka e mum, njalton e mbeddaajii mum, mbiyon: <sup>11</sup> «Min pidđii e mon fay colla ngeenndi mom takkinooka e koyde amen. Kaa düm e taweede, annde Laamu Laamđo battiima.» <sup>12</sup> Mido haalana on: jannde darngal, jukkungo ndiin ngeenndi ńuran ngo Sodooma\* ngoo naawde.

<sup>13</sup> Bone woodanii ma, aan Korasin! Bone woodanii ma, aan Baytisayda! Sabi so kaayđe gadanoode e ley mon dee ngadanooma Tirus e Sidon, nden, hodđe ton bee tuubanno law, tawete 6e boornike licce caakuuji, 6e njoodike e ndoondi, faa 6e kollita tuubugol maăbe. <sup>14</sup> Saabe düm, jannde darngal, jukkungo mon ńuran ngo Tirus e Sidon ngoo naawde. <sup>15</sup> Aan duu Kafarnahum, ada miila a toownete faa dow kammu naa? A leydinte faa keedaa ley maayće.

<sup>16</sup> O haalani taalibaăe makko kasen:

—Kettindaniido on fuu, miin hettindanii. Calaniido on fuu, miin salanii. Calaniido kam fuu, salanike nelđo kam oo duu.

\* <sup>10:12</sup> Sodooma yo ngootiri e geelle didi de Laamđo halki saabe heewgol majje luutti. Yeew Puddoođe 19.1-29

<sup>17</sup> Capande njeddon e didon bee ngartidi e seyo, mbii:

—Kalfaado, fay seydaani'en bee dowtanike min saabe innde maa.

<sup>18</sup> O wii fe:

—Mi yii Ibiliisa ana iwa dow kammu, ana saamira no suraango nii. <sup>19</sup> Mi hokkii on baawde yaabude bolle e jahe, mi hokkii on jaalaade konnee fuu. Fay huunde torrataa on abada. <sup>20</sup> Kaa noo, pati ceyoree ko seydaani'en downtanii on koo. Ceyoree ko inde mon mbinndaa dow kammu koo.

*Haala seyo Iisaa*

<sup>21</sup> Oon wakkati fuu, Ruuhu Ceniodo hebbini Iisaa seyo. Iisaa wii:

—Baabiraado jom kammu e leydi, mi yetti ma, sabi a suudif dee kulle hakkilanteebe e anndube, fanngin-an-daa dum cukaloy. Jaati, Baabiraado, hono non worri, sabi dum wel maa. <sup>22</sup> Baabiraado am tummbii huunde fuu e jungeo am. Fay gooto anndaa Bajjo oo so wanaa Baabiraado, fay gooto anndaa Baabiraado oo so wanaa Bajjo oo, kajum e mo Bajjo oo muuyi fannginande dum fuu.

<sup>23</sup> Caggal düm, Iisaa yecciti taalibaaße bee, gunndii düm'en, wii:

—Gite jiyoje ko njiyaton koo, mbelii hoore! <sup>24</sup> Sabi mido wiya on: annabaabe heewbe e kaanankooße heewbe njidiino yiide ko njiyaton koo, njiyaali, njidiino nande ko nanaton koo, nanaali.

*Banndol haala Samariyanke moyyo*

<sup>25</sup> Non, jannginoowo Sariya gooto immii faa hora mo, wii:

—Moobbo, hono kaan-mi wadufe faa mi hefa nguurndam nduumiidam?

<sup>26</sup> Iisaa jaabii mo, wii:

—Kodum winndii e Sariya? Kodum njanngu-daa ton?

<sup>27</sup> Jannginoowo Sariya oo jaabii, wii:

—Yidir Laamdo Joomiraado maa 6ernde maa fuu e yonki maa fuu e semmbe maa fuu e hakkille maa fuu. Njidiraa tanaa maa no njidir-daa hoore maa nii.<sup>†</sup>

<sup>28</sup> Iisaa wii mo:

—Jaabu maa moyyi. So a wadii non, a hefan nguurndam dam!

<sup>29</sup> Kaa jannginoowo Sariya oo ana yidi heedude e goonga, wii mo:

—Homo woni tanaa am?

<sup>30</sup> Iisaa jaabii mo, wii:

—Nannee wootere gorko gooto iwi Urusaliima, ana fa'i Yeriko. E ley yaadu makko nduu, o hawri e yanoobe, be boli mo, be pii mo faa be njoppi mo wanaa guurdo mo wanaa maaydo.

<sup>31</sup> Forri e jottinoowo sadaka gooto ana warannoo e laawol ngol. Nde o yiino janaado oo ana lelii ndee, o woorti dum, o yabbi. <sup>32</sup> Lewinke<sup>‡</sup> gooto, kajum duu wari tawi mo don, yii mo, woorti mo, yabbi. <sup>33</sup> Samariyanke dawdo wari e makko, yii mo, yurminaa, <sup>34</sup> fadii mo, sawriri barme makko nebam e peguujam, fiili hen licce. Caggal düm, o waddini düm daabaa makko, o naabi düm e jippunde hoobbe, o hinnii düm. <sup>35</sup> Janngo mum, o itti buudi cardi didi, o hokki njaatigi mum oo, o wii dum: «Hinna mo. So almusadda makko burii düm, so mi wartii, mi tottete.»

<sup>36</sup> Nde Iisaa tilii banndol ngol ndee, wii:

—E miilo maa, homo e taton bee laatii tanaa janaado oo?

<sup>37</sup> Jannginoowo Sariya oo jaabii, wii:

—Jurmuiido mo oo.

Iisaa wii mo:

—Aan duu, yaa, wadoy hono non!

*No Iisaa jippanorii Marta e Mariyama*

<sup>38</sup> E laawol maabé ngol, Iisaa fanji ngeenndi ngootiri, debbo biyeteedo Marta jippini mo.

<sup>39</sup> Marta ana jogii mijiraado biyeteedo Mariyama. Oon ana joodii sera koyde Iisaa, ana nana haala mum. <sup>40</sup> Kaa Marta, no golleeji dii keewiri nii tan woni e hakkille mum, wari, wii:

—Moobbo, a hillaka ko mijnam oo faldi kam golle oo koo naa? Wii mo o immoo, o walla kam!

<sup>41</sup> Moobbo oo jaabii mo, wii:

—Marta, Marta, ada tampina hoore maa kulle keewde, ada jiiña hakkille maa. <sup>42</sup> Kaa huunde wootere tan woni ko neddo hasindini e mum. Mariyama subike ko moyyi koo, o teetataake dum duu.

<sup>†</sup> 10:27 Fillitagol Tawreeta 6.5, Lewinkooße 19.18    <sup>‡</sup> 10:32 Yimée lejol Lewi ngonnoo humaniiße golle dewal Laamdo gila e jamaanu Muusaa.

## 11

*No Iisaa jannginiri taalibaabe mum no duwortee*

<sup>1</sup> Namnde wootere, Iisaa ana wada duwaawu e nokku gooto. Nde o tilinoo ndee, gooto e taalibaabe makko 6ee wii mo:

—Moobbo, janngin min no min nduwortoo, hono no Yaayaan jannginiri taalibaabe mum nii.

<sup>2</sup> O wii 6e:

—So odon nduwoo, nii mbiyatoo:

Baabiraado,

    yo innde maa teddine.

Yo Laamu maa war.

<sup>3</sup> Hokku min jaannde fuu jaamdu heyooru min.

<sup>4</sup> Yaafa min luutti amen,

    sabi miden njaafuu toojube min fuu.

Pati accu min ceytee.

<sup>5</sup> O wii 6e kasen:

—So gooto mon yehii to gido mum hejjere jemma, wii dum: «Gidam, namlam buuruuje tati, <sup>6</sup> mi hefii kodo jooni, mi walaa ko mi holla dum», <sup>7</sup> yalla gido maa oo ana jaabe to ley galle too, wiye: «Pati torram, sabi damal ngal cokaangal, sukaabe am duu yo lelii6e, mi waawaa immaade faa mi hokke fay huundee? <sup>8</sup> Mido wiya on: fay so o immaaki o hokkire saabe a gido makko, waajibi mo immoo, mo hokke hakke ko kasindin-daa e mum fuu, kammari ko tekkin-daa naagunde maa ndee koo. <sup>9</sup> Miin, mido wiya on: jaagee, on keban, tewtee, on njiiitan, calminee gila odon damal galle, on udditante. <sup>10</sup> Sabi jaagiido fuu, heban, tewtuudo fuu, yiitan, calmindoo fuu, udditante. <sup>11</sup> Homo woni e mon baabiraado mo biyuu naagotoo liingu so hokka dum mboddi? <sup>12</sup> Naa naagoo dum boccoonde, hokka dum yaare? <sup>13</sup> No mbonir-dor fuu, odon ndokka 6iib6e mon kulle lobbe, sako Baabiraado mon gondo dow kammu oo. Naagiido mo Ruuhu Ceniido fuu, o hokkan dum mo.

*No Iisaa fenniri ko happaa koo*

<sup>14</sup> Nannde wootere, Iisaa ana ribbana neddo gooto seydaani muumdfinnoodo dum. Nde seydaani oo yalti ndee, muumdfunoodo oo watti haalde. Jamaa oo haaynaa. <sup>15</sup> Kaa yoga e maab6e ana wiya:

—«Beelsebul», hooreejo seydaani'en oo o ribbirta seydaani'en 6ee!

<sup>16</sup> Wob6e ndaardi mo taagumansa kaayniido iwoowo dow kammu faa itta koro makko.

<sup>17</sup> Nde wonnoo omo anndi miilooji maab6e, o wii 6e:

—Laamu fuu pecciido ana haaba e hoore mum, bonan, maadiiji mum fuu ngurjan e leydi.

<sup>18</sup> So Iibiliisa e hoore mum feccima, hono laamu mum heddortoo? Nde wonnoo on mbii «Beelsebul» ndibbiran-mi seydaani'en 6ee. <sup>19</sup> So tawii «Beelsebul» ndibbiran-mi seydaani'en, yim6e mon 6ee nee, homo ndibbirta 6e? Yim6e mon 6ee jaati kollata on ngalaal e goonga! <sup>20</sup> Kaa so baawde Laamdo ndibbiran-mi seydaani'en, dum ana holla Laamu Laamdo warii e mon. <sup>21</sup> Gorko jom semmbe jogiido kaafaawi, so haybii galle mum, jawdi mum reenoto. <sup>22</sup> Kaa so burdo dum semmbe yanii e mum, jaalike dum, teetan joomum kaafaawi ki fawnoo hoolaare e mum kii, fecca jawdi mum ndii e wob6e. <sup>23</sup> Mo waldaa e am fuu yo gajo am. Mo mooftidataa e am fuu yo caakooowo.

<sup>24</sup> So seydaani yaltii e neddo, seydaani oo yiiloyto e nokkuuje joorde, tewta do joottinoo. So mo hebaali, mo wiyan: «Mido nii wirfitoo galle am mo eggunoo-mi e mum oo.» <sup>25</sup> So mo wirfitike, mo tawan galle oo ana wuuwaa, ana moyyinaa ana paraa faa woodi. <sup>26</sup> Nden, mo wirfitoo, mo waddoya seydaani'en njeddon 6ur6e mo bonde, 6e naata e galle oo, 6e koda e mum. Nii battane oo neddo burdata arannde mum bonde.

<sup>27</sup> Nde o haalata dum ndee, debbo gooto ana hakkunde jamaa oo, toowni daande mum, wii:

—Debbo caawdo ma so muynin maa, welii hoore!

<sup>28</sup> Non Iisaa jaabii, wii:

—Wel6e hoore dee, nanoose konngol Laamdo so njokka ngol 6ee!

*No jamaa ndaardiri taagumansa*

<sup>29</sup> Nde wonnoo jamaa oo ana 6illondira e makko sanne, o fuddi wiide:

—Yim6e jamaanu jooni yo yim6e bon6e. E6e ndaara holleede taagumansa, kaa 6e kollataake so wanaa taagumansa annabi Yuunusa oo. <sup>30</sup> Sabi no Yuunusa laatanorii Niniwenkoo6e taagumansa nii, hono non Bii Neddo oo duu laatanortoo yim6e oo jamaanu taagumansa. <sup>31</sup> Nannde dargal, kaananke debbo leydi 6aleeri oo immodoto e yim6e jamaanu jooni 6ee, liba dum'en. Sabi o iwriino faa hoore leydi, warde hettindaade haalaaji

Suleymaana kebbinaadi hakkilantaaku dii. Haya, burdo Suleymaana won doo! <sup>32</sup> Nannde dargal, yimbe Niniwe duu immodoto e yimbe jamaanu jooni bee, liba dum'en. Sabi be tuubii gila nde be nannoo waajuu annabi Yuunusa ndee. Haya, burdo Yuunusa won doo!

### *Haala fooyre caldi*

<sup>33</sup> Iisaa wii kasen:

—Fay gooto hubbataa lampa so suuda dum naa hippa e mum kaakol. So lampa hubbaama, sinndete, yalla ana yaaynana naatoobe. <sup>34</sup> Gite maa ngoni lampa caldi maa. So gite maa ana moyyi, caldi maa fuu pooynan. Kaa so de moyyaa, caldi maa fuu niibban. <sup>35</sup> Ndennoo, haybu pati fooyre wonnde e maa ndee niibba. <sup>36</sup> Sabi so caldi maa fuu keewii fooyre, tawa walaa fuu salndu maa wonndu e nimre, di fuu di pooyniran no lampa fooynirante nii.

### *No Iisaa feliri Farisa'en e jannginoobe Sariya*

<sup>37</sup> E ley ko Iisaa waajootoo koo, Farisanke gooto noddi dum bottaari. O nootoyii dum galle mum, o joodii faa o jaamaa. <sup>38</sup> Farisanke oo haaynaa nde yiinoo o lootaali juude fade makko jaamde. \* <sup>39</sup> E ley dum, Iisaa wii mo:

—Onon Farisa'en, odon lawya caggal kore loode e caggal lehoy, tawee nee, berde mon ana caawi nguykaaji e boneej! <sup>40</sup> Jaahil'en! Tama wanaa Tagudo dow oo tagi ley oo duu? <sup>41</sup> Itiree sadakaaji mon dii berde laabude. Nden, ko heddi koo fuu daganto on.

<sup>42</sup> Bone yanan e mon, onon Farisa'en. Sabi odon ittana Laamdo jakka naanana, odon ittana dum jakka danndi e ko tutaton fuu. Kaa odon njeebii fooccitaare, odon njeebii yiifude Laamdo. Tawee nee, kajum kaanno-don wadufe tawee on njeebaaki ko heddi koo. <sup>43</sup> Bone yanan e mon, onon Farisa'en! Sabi odon njidi joolle lobbe e ley cuudi baajordi, odon njidi salmineede calminaali teddungal e luumooji. <sup>44</sup> Bone yanan e mon. Sabi odon nanndi e janaale de ngalaa maande, de yimbe njahata e mum, tawee anndaa.

<sup>45</sup> Gooto e jannginoobe Sariya jaabii Iisaa, wii:

—Moobbo, no kaalirtaa nii, ada hoyna min minen duu.

<sup>46</sup> Iisaa jaabii, wii:

—Onon jannginoobe Sariya bee duu, bone yanan e mon! Sabi odon ndonndina yimbe donnge teddude, tawee onon e ko'e mon, on memirtaa de fay hoore fedeendu mon.

<sup>47</sup> Bone yanan e mon, sabi odon maha janaale annabaabe fe njaatiraabe mon mbari bee. <sup>48</sup> Ndennoo, onon, on ceettima golle maabbe oo ana weli on. Sabi kambe, fe mbarii annabaabe, onon, odon maha janaale mum'en! <sup>49</sup> Dum nee, Laamdo hakkilante oo wii: «Mi neldan fe annabaabe e nelaabe, fe mbara yoga, fe torra yoga.» <sup>50</sup> Dum wadi so yiyyam annabaabe njuppaadam gila e puddoode aduna oo dam, ana yoobtee e yimbe oo jamaanu. <sup>51</sup> So goonga dee, mido wiya on: yiyyam gila Haabiila faa Jakariyaa baraado hakkunde ittirde sadaka ndee e suudu Laamdo nduu, dum fuu dum yobete e oo jamaanu. <sup>52</sup> Bone yanan e mon, onon jannginoobe Sariya! Sabi on teetii cokitirgal anndal, on naataali onon e ko'e mon, kasen duu on kadii naatoobe bee naatude.

<sup>53</sup> Nde Iisaa iwi don ndee, dunkee'en Sariya e Farisa'en ana mettaa e mum sanne sanne. Ana lamndoo mo kulle keewde, <sup>54</sup> hedde efe tuufana mo faa fe kefa e makko haala ka fe nannginira mo.

## 12

### *Haala kulol Laamdo*

<sup>1</sup> Ko foti ujunaaji ujunaaji yimbe kawriti faa ana njaaabondira. Nden Iisaa wii taalibaabe mum bee:

—Ndeentee e yuufinirdi Farisa'en, dum woni fe naafigi'en. <sup>2</sup> Walaa fuu ko suudii ko banngintaake, walaa sirri mo saakataake. <sup>3</sup> Dum saabii huunde fuu ko kaal-don ley nimre nantete ley fooyre. Kasen duu ko ngunndi-don ley cuudi fuu, ooynete dow beneeji.

<sup>4</sup> Mido haalana on, onon gidiraabe am: pati kulee warooibe yimbe fe ngalaa fuu ko mbaawi caggal majjum bee. <sup>5</sup> Mi hollan on mo kaan-don hulde: kulee baroowo neddo baawdo tippaade dum ley jahannama. So goonga dee, mido wiya on: oon kaan-don hulde! <sup>6</sup> Tama biiwuujii joy coottataake buudi didi? Laamdo yeggitataa fay gootel e majji. <sup>7</sup> Onon, fay leebi ko'e mon fuu ko limaa faa laabi. Ndennoo, pati kulee, sabi onon buri biiwuujii keewdi teentilaade.

<sup>8</sup> Mido wiya on: ceettaniido kam hakkunde yimbe fuu, miin Bii Neddo oo duu, mi seettanto dum yeeso malaa'ika'en Laamdo. <sup>9</sup> Kaa calaniido kam hakkunde yimbe, salante yeeso malaa'ika'en Laamdo. <sup>10</sup> Neddo fuu kaaldo ko boni e Bii Neddo, ana waawi yaafeede. Kaa bonkiido Ruuhu Ceniido oo yaafataake. <sup>11</sup> So on nabaamaa e cuudi baajordi naa yeeso

\* <sup>11:38</sup> Ngol lootugol juude haabbaaki e ittude tuundi, kammari faa joomum fooccitanoo diina wadifraa.

hooreeþe naa kaanankooþe, pati mbemmbé-don ko njaaboto-don, naa ko kaalaton, <sup>12</sup> sabi Ruuhu Ceniido oo anndinan on oon wakkati fuu ko kaan-don haalde.

*Banndol haala arsukunte pamaro hakkille*

<sup>13</sup> Won biido e ley jamaa oo:

—Moobbo, wii mawnam oo hokka kam ngedu am e ndonu amen oo.

<sup>14</sup> Iisaa jaabii mo, wii:

—Hey aan! Homo wadi kam caroowo mon naa peccoowo jawdi mon?

<sup>15</sup> O wii jamaa oo:

—Ndeentee e joote, sabi wanaa jawdi wuurnata neddo fay so tawaa mo arsukunte.

<sup>16</sup> O haalani 6e banndol, o wii:

—Arsukunte gooto, gese mum moyyunoo faa sanne. <sup>17</sup> O milii e hoore makko: «Hono ngadan-mi? Sabi mi walaa fuu do mi moopta jaamri am ndii. <sup>18</sup> Eyyoo! Miwurjinan beembe am dee, mi maha godde burde de manngu, mi mooþta hen jaamri am ndii e ngalu am fuu, <sup>19</sup> mi wiya hoore am: A he6ii ngalu baawdo jugaade ma duuþi kuurdi, hankasen fowtu, jaammaa, njaraa, mbelto-daa.» <sup>20</sup> Kaa Laamdo wii mo: «Pamaro hakkille! Yonki maa ittete e oo doo jemma. Homo heettata e ko paggiti-daa koo?» <sup>21</sup> Nii woni sifa neddo fuu paggitaniido hoore mum jawdi aduna, wanaa galo yeeso Laamdo.

*Haala ndaartugol Laamu Laamdo*

<sup>22</sup> Caggal dum, o wii taalibaafe makko 6ee:

—Dum saabii so mido wiya on: pati cuunlanee e ley nguurndam mon ko jaamaton e ko 6oornoto-don. <sup>23</sup> Sabi nguurndam buri nguure, terde buri koltal. <sup>24</sup> Yeewee daawle dee: de aawataa, de kettataa, de ngalaa caakuji, de ngalaa beembe, kaa Laamdo ana jaammina de. Onon, odon buri pooli dii teentilaade do woddi! <sup>25</sup> Homo e mon waawi beydude e balde mum fay jaalooma gooto kammarigullu mum? Walaa. <sup>26</sup> Ndennoo, so tawii on mbaawaa waduge Fey hono dum e famcude, ko saabii so odon cuunlana ko heddi koo? <sup>27</sup> Yeewee piindijji no peertirta. Di tampataa, di mottataa. Haya mido wiya on: Suleymaana e ngalu mum fuu paroraaki no gootel e majji nii. <sup>28</sup> Laamdo ana holtina leggiri taweteendi ley ngesa hannde, tippeteendi e yiite janngo, sako onon, onon famfuuþe hoolaare! <sup>29</sup> Pati kiinnee ndaartude jaamdu e yardu, pati mbemmbé-don! <sup>30</sup> Sabi dee kulle fuu yimþe aduna tan ndaaratada dum. Kaa Baabiraado mon ana anndi odon kasindini e majjum. <sup>31</sup> Ko kaandon waduge dee, ndaartee Laamu Laamdo. Ko heddi koo, on beydante dum.

<sup>32</sup> Pati kulee, onon sewre famarde, sabi Baabiraado mon ana seyori hokkude on Laamu oo. <sup>33</sup> Coottee jawdi mon fuu, cakkod-on. Mooyinanee ko'e mon danngaaji di mbonataa, njogo-don jawdi ngonndi dow kammu ndi timmataa, ndi gujjo 6adataako, mooyu duu bonnataa. <sup>34</sup> Sabi do jawdi maa woni fuu, don yonki maa duu woni.

*Banndol haala lanndiniibe ja66aade kalfaado mum'en*

<sup>35</sup> —Kumee, ku66ee lampaaaji mon. <sup>36</sup> Laatee hono yimþe lanndinaniibe ja66aade kalfaado mum'en nde wartata kuurtungu, faa udditana dum don e don so salminii. <sup>37</sup> Kaadime'en 6e kalfaado mum'en tawi daanaaki, mbelii hoore. Mido haalana on goonga: o humoto, o joyyina 6e faa 6e jaama, o wara o gollana 6e. <sup>38</sup> So o wartirii didabere jemma naa so tatabere jemma, 6e o tawri non 6ee, mbelii hoore.

<sup>39</sup> Paamee dum doo: sinndo jom galle ana anndunoo wakkati mo guijo warata, yoppataa o naata galle mum. <sup>40</sup> Onon duu, lanndinee, sabi Bii Neddo oo waran e wakkati mo on miilaali.

<sup>41</sup> Piyeer wii mo:

—Kalfaado, ngol banndol, minen tan kaaldu-daa naa yimþe fuu?

<sup>42</sup> Iisaa jaabii, wii:

—Homo woni golloovo koolniido, hakkilante, mo kalfaado mum halfinta maccube mum hokka dum'en nguure mum'en? <sup>43</sup> Oon golloovo mo kalfaado mum warti so tawi ana golla golle mo halfinää oo, welii hoore. <sup>44</sup> Mido haalana on goonga: kalfaado oo halfinän mo jawdi mum fuu. <sup>45</sup> Kaa so golloovo oo wii e hoore mum kalfaado mum oo booyii wartaali, hedde ana fiya maccube e horþe, ana jaama ana yara ana sigira, <sup>46</sup> nden, kalfaado oo wartiran jaalooma mo golloovo oo anndaa e wakkati mo o miilaali, jukka mo jukkungo naawngo, watta mo hakkunde 6e nganaa hoolniibe. <sup>47</sup> Golloovo anndudo ko kalfaado mum yidi, mo lanndinaaki fay huunde, mo gollaali ko kalfaado mum yidi, fiyete boggi keewdi. <sup>48</sup> Kaa golloovo mo anndaa ko kalfaado mum yidi, so wadii ko fiyata dum, fiyete boggi seeda. Dokkaado ko heewi, lamndete ko heewi. Kalfinaado ko heewi, lamndete ko buri heewde.

*No Iisaa laatorii sabaabu ceeraagu yimþe*

<sup>49</sup> —Mi wardii wedaade yiite e leydi ndii. Mido heppi nge hu66aali! <sup>50</sup> Won lootagal batisima naawngal ngal loottetee-mi. Mido heppi dum wadaali. <sup>51</sup> Odon miila jam ngardumi e leydi ndii naa? Wanaa! Mido wiya on: seenndude yim6e ngardu-mi. <sup>52</sup> Gila jooni yim6e njoyon ley galle gooto ceeran, taton bee ka6a e didon bee, didon bee ka6a e taton bee. <sup>53</sup> Baabiraado haban e 6iyum gorko, 6iddo gorko haban e baaba mum, inniraado haban e 6iyum debbo, 6iddo debbo haban e inna mum, debbo 6amaado haban e esum debbo.

### *Haala seenndude mbaadiji*

<sup>54</sup> Iisaa wii jamaa oo kasen:

—So on njii luarde ana iwnraange tan, on mbiyan nde to6an. Laatorto hono non duu. <sup>55</sup> So henndu 6aleeri wibbi, on mbiyan wulan taw. Hono non laatortoo duu. <sup>56</sup> Onon naafiqi'en! Odon mbaawi seenndude mbaadi leydi e kammu, ko wadi so on mbaawaa seenndude mbaadi oo doo jamaanu?

<sup>57</sup> Ko saabii so on mbaawaa anndande ko'e mon ko woni fooccitaare? <sup>58</sup> So ada yaada e mo ka6u-daa faa cardoyon, ndaartu rewritinde e makko gila e laawol, pati o na6e to caroowo, so caroowo oo hokke kayboowo kasu, kayboowo kasu oo duu udde. <sup>59</sup> Mido haalane: abada a yaltataa, so a y6aali ko ndewete-daa koo faa laa6a.

## 13

### *Haala tuubugol e halkagol*

<sup>1</sup> E oon wakkati, won warbe so kumpiti Iisaa ko hewtii Galilinkoo6e yogaabe. Be mbii Pilaatu\* jillondiriino yiiyam ma66e e yiiyam sadakaaji ma66e. <sup>2</sup> Iisaa jaabii 6e, wii:

—Odon miila bee Galilinkoo6e torraabe 6uri luuttude diina Galilinkoo6e heddiibe 6ee naa? <sup>3</sup> Mido haalana on: wanaa non. Kaa so on tuubaali, on fuu hono non kalkorto-don. <sup>4</sup> Naa odon miccitoo sappo e njetton 6e suudu Silowam toowindu nduu saami e mum'en faa maayi 6ee? Odon miila kambe 6uri Urusaliima fuu junuu6u naa? <sup>5</sup> Mido haalana on: wanaa non. Kaa so on tuubaali, on fuu hono non kalkorto-don.

<sup>6</sup> Caggal dum, o wadani 6e ngol banndol:

—Neddo gooto tutiino ibbi ley ngesa mum. O wari te6ude ki, kaa o tawaali e makki fay huunde. <sup>7</sup> Non o wii golloovo ngesa oo: «Hikka woni duu6i tati, hitaande fuu mi waran faa mi te6a ki, mi tawa ki rimaali. Feyyu ki! So walaa ko ki nafata, ko saabii so eki itta semmbe leydi ndii?» <sup>8</sup> Golloovo oo wii mo: «Kalfaa6o, yoppu ki doo faa mawuuri. Doo e nden, mi gaawtoto foomre makki, mi wada hen birgi. <sup>9</sup> Ana moyya ki rima doo e mawuuri. So ki rimaali, peyyaa ki.»

### *No Iisaa selliniri debbo ley, jalaande fowteteende*

<sup>10</sup> Wadiino e jalaande fowteteende wootere, Iisaa ana darii ana waajoo ley suudu waajordu wooturu. <sup>11</sup> Debbo gooto mo ladde jawni duu6i sappo e jetti ana tawaa don. O turiido tan, o waawaa dartaade fey. <sup>12</sup> Nde Iisaa yiinoo mo ndee, noddi mo, wii mo:

—Banndam debbo, a dadii e jaw maa oo.

<sup>13</sup> Iisaa fawi juude mum dow makko, non o dartii cot! Hedde omo yetta Laamdo. <sup>14</sup> Jaka hooreejo suudu waajordu oo mettaama ko Iisaa sellini neddo ley jalaande fowteteende koo, wii yim6e 6ee:

—Balde jeegom kaande golleede ana ngoodi. E deen balde kaan-don warde sellineede, wanaa e jalaande fowteteende.

<sup>15</sup> Iisaa jaabii mo, wii:

—Naafiqi'en! Wanaa homo e mon fuu ana humta nagge mum naa ndakiwa mum jalaande fowteteende yarnoya dum naa? <sup>16</sup> Oo debbo taanii Ibarahiima, mo Ibiliisa ha66iri duu6i sappo e jetti, haanaa humteede jalaande fowteteende naa?

<sup>17</sup> Nde Iisaa haalnoo dum ndee, waybe mum bee fuu njaagii faa walaa seese. Kaa jamaa oo fuu ana seyii e dow kaayefijji di o wadata dii.

### *Banndi haala Laamu Laamdo*

<sup>18</sup> Iisaa wii:

—Hono Laamu Laamdo wa'i? Kodum nanndinan-moo-mi? <sup>19</sup> Laamu Laamdo ana nanndi e ngeeyu buyaage mo neddo 6ami, aawi e sardiye mum. Ngeeyu oo fudi, lati6i lekki faa pooli ana ni6a cuudi e cafe mum.

<sup>20</sup> O wii kasen:

—Kodum nanndinan-mi e Laamu Laamdo oo? <sup>21</sup> Omo nanndi e yuufinirdi ndi debbo 6ami, so jii6i e saawal tati conndi alkama faa ndi fuu ndi yuufi.

### *Haala damal paadungal*

\* **13:1** Pilaatu yo hooreejo leydi Yahuudiya.

<sup>22</sup> Iisaa ana fa'i Urusaliima, ana fanja geelle e gure fuu, ana waajoo. <sup>23</sup> Neddo gooto lamndii mo:

—Moobbo, yimbe seeda tan kisata naa?

O wii 6e:

<sup>24</sup> —Tiiinne naatiron damal paadungal ngal, sabi mido wiya on: heewbe njidan naatude, ndonka. <sup>25</sup> So jom galle oo immiima sokki damal ngal, onon on keedii sella odon calmina, odon mbiya: «Kalfaado, udditan min!» o jaaboto on: «Mi anndaa to njeye-don!» <sup>26</sup> Nden, on ndaroda odon mbiya: «Min jaamddii e maa, min njardii e maa, a waajike e daalaaje amen.» <sup>27</sup> Mo jaaboto on: «Mi anndaa to njeye-don. Ngoddee kam, onon oojniifel!» <sup>28</sup> On njiyian Ibarahiima e Isiyaaka e Yaakuuba, kajum e annabaabe fuu ley Laamu Laamdo, tawa onon odon mbedaa sella. Nannde nden on mboyan, on neryondiran niyiye kammari mimsee mon. <sup>29</sup> Yimbe iwran funnaange e hiirnaange, saahal e baleeri, njoodoo jaamda ley Laamu Laamdo. <sup>30</sup> Nden yoga e caggalaabe laatoto ardiibe, yoga e ardiibe laatoto caggalaabe.

#### *No Iisaa sujilirani yimbe Urusaliima*

<sup>31</sup> E oon wakkati fuu, yoga e Farisa'en ngari, mbii mo:

—Iw doo, njahaa e laawol maa, sabi Hirudus kaananke oo ana tewta no warde.

<sup>32</sup> O wii 6e:

—Njehee mbiyoyee ndoobu oo: «Miin, mi ribban laddeeki, mi sellinan jawbe hannde e janngo. Nalooma tatabo oo mi timminan golle am fuu. <sup>33</sup> Kaa ana tilsi mi yaha hannde e janngo e faaggi-janngo, sabi annabaajo haanaa maayde so wanaa ley Urusaliima.»

<sup>34</sup> Hay yimbe Urusaliima, on mbarii annabaabe, on mbardii nelaabe e mon kaaye! Cili kuurdii njidu-mi hawrintinde biibee mon no cofal hawrintintirta biibee mum ley biifoole mum nii. Kaa on njaabaali. <sup>35</sup> Dum nee, on daldete e Suudu mon Dewal, ndu laatoo saabeere. Mido wiya on: on njiyatua kam so wanaa faa wakkati mo mbiyatun e mum: «Barke woodanii gardoowo e dow innde Joomiraado!»<sup>†</sup>

## 14

#### *No Iisaa selliniri gorko uppuudo*

<sup>1</sup> Wadiino e ley jalaande fowteteende wootere, Iisaa ana wonnoo e galle hooreejoo Farisa'en gooto faa jaama. Tawanoobe ton bee ngattani mo hakkille <sup>2</sup> kammari neddo uppuudo ana tawanoor don. <sup>3</sup> Iisaa haaldi e jannginoobe Sariya e Farisa'en, wii:

—Sellinde jawdo ley jalaande fowteteende, ana dagii naa dagaaki?

<sup>4</sup> Be fuu, 6e mbii teen. E oon wakkati, o memi jawdo oo, o sellini dum, o yoppiti dum. <sup>5</sup> Caggal dum, o wii 6e:

—Homo e mon biyum naa ngaari mum saamata e bunndu waasa yaltinde dum don e don, fay so dum jalaande fowteteende?

<sup>6</sup> Be ndonki jaabaade mo e majjum.

#### *Haala subaade joolle e noddude yimbe*

<sup>7</sup> Nde Iisaa yiinoo noddaabe bee ana cuboo joolle burde teddude ndee, o waajii 6e, o wii:

<sup>8</sup> —So a noddaama kuurtungu, pati jooda e joonnde burnde teddude. Sabi burdo ma teddude ana waawi warde, <sup>9</sup> noddudo on oo wara, wiye: «Hokku oo doo joonnde ndee!» Nden, a yaagoto joodoyaade e joonnde burnde leyfude ndee. <sup>10</sup> So a noddaama kuurtungu, joodoya caggal, yalla noddudo ma oo ana wara, wiye: «Gido, heettu yeeso gaa!» Nden, dum laatante teddungal yeeso noddaabe bee fuu. <sup>11</sup> Sabi mawninkiniido fuu, leyfinte, leyfinkiniido teddinte.

<sup>12</sup> O wii noddudo mo oo duu:

—So ada nodda yimbe bottaari naa hiraande, pati noddii gidiraabe naa banndiraabe naa sakiraabe naa taakallelme'en maa tawaabe yo arsukunte'en. So 6e noddite, dum laatoo mbarjaari maa. <sup>13</sup> So a wadii waliima, noddii misikiina'en e wooye e bonnguuube e wumbe.

<sup>14</sup> Nden, a welan hoore, sabi been ngalaa ko njobire, a yobete jannde immital fooccitiibe.

#### *Banndol haala waliima*

<sup>15</sup> Gooto e jaamoobe 6ee, nde nani haala kaa ndee, wii mo:

—Naamoyoovo ley Laamu Laamdo, welii hoore.

<sup>16</sup> Iisaa wii mo:

—Gorko gooto wadiino waliima, noddii yimbe faa heewi. <sup>17</sup> Nde jaamdu nduu tilinoo ndee, o neli kaadime makko to yimbe 6ee, wiya: «ngaree, waliima oo lanndinike.» <sup>18</sup> Be fuu, gooto gooto, 6e puddi ujaade. Gooto wii: «Mi soodii ngesa, ana tilsi mi yaha mi yiyoja nga, njaafoda-daa kam.» <sup>19</sup> Goddo wii: «Mi soodii ga'i demojo sappo e jale sari joy. Mido yidi horneyde di, njaafoda-daa kam.» <sup>20</sup> Goddo kasen wii: «Mi jommabaajo, dum saabii so mi

<sup>†</sup> 13:35 Jabuura 118.26

hebataa warde.»<sup>21</sup> Kaadime oo warti, haaltani dum kalfaado mum. Oon bilaa, wii mo: «Yaa law ley boli e dinngirajji ngeenndi ndii, noddoyaa misikiina'en e wooyse e wumbe e bonnguuube.»<sup>22</sup> Kaadime oo warti, wii: «Kalfaado, ko mbii-daa koo fuu wadaama, kaa faa jooni yolannde ana heddi.»<sup>23</sup> Kalfaado oo wii kaadime oo: «Yaa dow dati jaajudi e paafudi. Mo kebu-daa fuu, ndooldinaa dum wara naata, yalla suudu am nduu ana huuña.»<sup>24</sup> Sabi mido wiya on: fay gooto e 6e noddunoo-mi 6ee meedataa jaamdu am.»

### *No neddo laatortoo taalibbo Iisaa*

<sup>25</sup> Yimbé heewbē ana njaada e Iisaa. O yeecctii, o wii 6e:

<sup>26</sup> Gardo e am fuu, sinaa mi burana dum inna mum e baam mum e jom suudu mum e sukaabe mum e mijiraabe mum e mawniraabe mum, mi burana dum fay kajum e hoore mum. So wanaa dum, joomum waawaa laataade taalibbo am.<sup>27</sup> Kasen duu, mo 6amaali leggal mum bardugal jokka e am fuu, waawaa laataade taalibbo am.<sup>28</sup> So won muuyfō e mon mahude suudu toowndu, wanaa joomum joodfō tafon, hiisoo ko hasindini e mum, yeewa so ana jogii ko biltata dum naa?<sup>29</sup> So wanaa dum, so joomum diidii tajjnaali, jiido mo fuu jalan mo,<sup>30</sup> wiya: «Yeewee oo neddo diidii, ronkii tajjnuude.»<sup>31</sup> Kasen, so kaananke yehii faa haboya e kaananke goddo, o miilataako tafon yalla worbe ujunaaji sappo ana mbaawi jaabbaade worbe ujunaaji noogay faa kabā e mum?<sup>32</sup> So mo waawaa jaabbaade dum, o wadan e mum nelaaabe gila yottaaki fadaaki, faa jam wada hakkunde maabbe.<sup>33</sup> Hono non, fay gooto e mon waawaa laataade taalibbo am so yoppaali ko jogii fuu.

<sup>34</sup> Lamdam ana moyyi, kaa so dam njoottii lammude, kodum lamminta dam kasen?  
<sup>35</sup> Walaa fuu do dam waawata naftoreede, wanaa e leydi, wanaa e birgi. Dam tippete sella.

Jom nowru fuu yo nanu.

## 15

### *Banndol haala mbaalu majjudo*

<sup>1</sup> Duwaaje'en e luuttoobē hono mum'en fuu ana 6adinoo mo faa kettindanoo mo.

<sup>2</sup> Farisa'en e dunkee'en Sariya ana 7jurjurtta, ana mbyia:

—Oo ana jaabbaa luuttoobē ana jaamda e mum'en!

<sup>3</sup> E ley dum, o wadani 6e ngol banndol, o wii:

<sup>4</sup> —So gooto mon ana jogii baali teemedere, majjiraama mbaalu gooto, wanaa yoppan capande jeenay e jeenay dii fuu ley ladde tewtaya majjudo oo faa yiita dum naa?<sup>5</sup> So o yiitii mo, o towiran dum seyo.<sup>6</sup> Nde o warti galle makko fuu, o hawrintinan gidiraabe makko e taakallelme'en makko, o wiya dum'en: «Ceyodee e am, sabi mi yiitii mbaalu am majjunoodo oo.»<sup>7</sup> Mido haalana on: hono non seyo laatortoo dow kammu so luuttoowo gooto tuubii. Engo 6uri seyo capande njeenayon e njeenayon fooccitiibē 6e kasindinaa e tuubal.

### *Banndol haala mbuudu cardi majjudo*

<sup>8</sup> —Naa, so debbo ana jogii buudi cardi sappo, majjiraama hen gooto, hubbataa lampa, wuuwa galle oo, tewtira mbuudu oo hakkille faa yiita dum naa?<sup>9</sup> So o yiitii mo, o hawrintinan gidiraabe makko e taakallelme'en makko, o wiya: «Ceyodee e am, sabi mi yiitii mbuudu am majjunoodo oo.»<sup>10</sup> Mido haalana on: hono non malaa'ika'en Laamdo ceyortoo so luuttoowo gooto tuubii.

### *Banndol haala 6iddo kalkiido*

<sup>11</sup> Iisaa wii kasen:

—Gorko gooto ana joginoo 6iibbe worbe didon.<sup>12</sup> Mijiraado oo wii baam mum: «Baaba, hokkam ngedu am e jawdi ndii.» Ndennoo, baabiraado oo fecci jawdi mum ndii hakkunde maabbe.<sup>13</sup> Wadi baldē seeda, mijiraado oo reentini ko jogii fuu, dawi, yehi leydi ngoddfundi. Ton o bonniri ngedu makko oo fuu e fijirde.<sup>14</sup> Nde o timminnoo ndee, yolbere bonnde wadi e ndiin leydi, o fuddi tampude.<sup>15</sup> O yehi o takkoyii e gorko jeyaado e ndiin leydi. Oon neldi mo gese mum faa mo duranoya dum girooji.<sup>16</sup> Omo muuyannoo fay jaamde jaamdu girooji dii, kaa fay gooto hokkaali mo.<sup>17</sup> Nde hakkille makko wartunoo ndee, o wii hoore makko: «Gollanoobe baabam jaaman faa njoppa, miin mido maaya doo yolbere.<sup>18</sup> Mi immoto, mi hoota galle baabam, mi wiya dum: Baaba, mi tooppii Laamdo, mi tooppii ma,<sup>19</sup> mi haanaa fay wiyeede 6iya. Ndennoo, jogoram no gooto e gollooobe maa 6ee niil!»<sup>20</sup> Oon wakkatti fuu, o immii o fa'i to baabiiko. Baaba oo soynii mo to woddi, bernde mum heccidi, dogi maabii mo.<sup>21</sup> Biddo oo wii mo: «Baaba, mi tooppii Laamdo, mi tooppii ma, mi haanaa fay wiyeede 6iya.»<sup>22</sup> Non baaba oo wii gollooobe mum: «Njaawnee, ngaddoyee saaya burka fuu moyyude boornon mo, ngadānon mo felfelde e fedeendu makko, ngadon pade e koyde makko.<sup>23</sup> Ngaddon ngaari njarnaandi faa fayi ndii duu, kirson dum faa jaamen,

mbelto-den. <sup>24</sup> Sabi 6iyam oo, o maaynoodo o wuurtii, o kalkinoodo o hewtaama.» Nii 6e pudi Welataare.

<sup>25</sup> E ley dum, 6iddo hammadiijo oo iwri gese. Nde o badinoo yottaade galle oo ndee, o nani bawdi e dippande. <sup>26</sup> O noddi gooto e golloo6e bee, o lamndii dum ko ndee dillere woni? <sup>27</sup> Oon wii mo: «Mija oo warti e jam, baam maa hirsanii mo ngaari payndi ndii.» <sup>28</sup> Nii mawniraado oo tikki, salii naatude galle oo. Baaba oo yalti, suri mo yalla omo naata. <sup>29</sup> O jaabii baabiiko, o wii: «Annii, duubi kuurdii mido gallane, fay nde wootere mi salaaki yamiroore maa. Kaa dum e tweede, abada a hokkaali kam fay damngel faa miin e gidiraabe am, min mbeltoroo. <sup>30</sup> Kaa 6iya jaamdo jawdi maa fuu e fugaaji so warti oo, a hirsanii dum ngaari payndi ndii.» <sup>31</sup> Baabiiko wii mo: «Binngel am, enen ngondi abada, ko njey-mi fuu, aan jey. <sup>32</sup> Ana haani ceyo-den, mbelto-den. Sabi mijna oo, o maaynoodo o wuurtii, o kalkinoodo o hewtaama.»

## 16

### *Bandol haala howruujo yoyudo*

<sup>1</sup> Isaaa wii taalibaabe mum 6ee kasen:

—Arsukunte gooto halfiniino howruujo mum jawdi. O haalanaa howruujo oo ana bonna jawdi makko. <sup>2</sup> O noddi dum, o wii: «Ko nanu-mi e maa koo, ko woni? War, hiisa ko kalfine-daa koo, sabi hankasen a waawaa halfineede.» <sup>3</sup> Howruujo oo wii e hoore mum: «Hono ngadan-mi? Sabi kalfaado am yoppan kam golle. Mi walaa doole remde, mido yaagoo jaagaade. <sup>4</sup> Ooho! Mi anndii no ngadan-mi, yalla ana daja jaabbiibe kam e ley cuudi mum'en, so mi boortaama.» <sup>5</sup> Oon wakkati, o noddiri be kalfaado makko rewata bee, gooto gooto. O wii arano oo: «Hono foti kalfaado am oo rewete?» <sup>6</sup> Oon wii mo: «Bidojaaji teemedere nebam ndewetee-mi.» Howruujo oo wii mo: «Bam dewtere maa jamaale, yaawnu, jooda mbinndaa capande joy.» <sup>7</sup> O wii goddo kasen: «Aan nee, hono foti ndewetee-daa?» Oon wii mo: «Caakuji teemedere gawri ndewetee-mi.» O wii oon: «Bam dewtere maa jamaale, mbinndaa caakuji capande jetti.» <sup>8</sup> Kalfaado oo mani howruujo oojiiido oo saabe yoyre mum. Sabi yimbe adunankoo6e bee 6uri yimbe jeyaabe e fooyre Laamdo bee yoyande yimbe hono mum'en. <sup>9</sup> Min, mido wiya on: tewtnee gidiraabe, tewtiree 6e jawdi aduna yalla so ndi timmii, odon njabbitee e ley nguurndam nduumiidi.

<sup>10</sup> Isaaa 6eydi hen, wii:

—Koolniido e kulle pamare, hollan hoolaare e kulle teentiliide. Jammbiido e kulle pamare, jambboto e kulle teentiliide duu. <sup>11</sup> Ndennoo, so on kollaali hoolaare e jawdi adunankoori ndii, homoo fuu halfinta on jawdi ngoongaraari ndii? <sup>12</sup> Kasen duu so on kollaali hoolaare e jawdi jananni, hono ndokkirte-don ko njey-don koo? <sup>13</sup> Golloo6o fay gooto waawaa gollande halfaabe didon, sabi naa joomum wajii gooto, yidii keddiido oo, naa nanngondirii e gooto oo, yoppii keddiido oo. On mbaawaa gollidande Laamdo e jawdi.

<sup>14</sup> Farisa'en 6ee ana kettindoo dum fuu. Nde wonnoo 6e yiib6e kaalisi, e6e njala mo. <sup>15</sup> O wii 6e:

—Onon, odon cenna ko'e mon yeeso yimbe, kaa Laamdo ana humpitii 6erde mon. Sabi ko yimbe teddinta koo, ana harmi to Laamdo.

<sup>16</sup> Sariya oo e annabaabe ana ngoodunoo faa e jamaanu Yaaya. Gila e Yaaya Kabaaru Lobbo haala Laamu Laamdo oo ana baanginnee. Gooto fuu ana haabanoo naatude e makko.

<sup>17</sup> Timmugol kammu e leydi 6uri newaade diina ittude to6bere wootere e ley Sariya oo.

<sup>18</sup> Ceerdo jom suudu mum so 6ami goddo fuu, jeenii. Kasen duu neddo fuu 6amdo debbo ceeraado, jeenii.

### *Bandol haala arsukunte e Laajaru*

<sup>19</sup> —Wadiino e gettaade, gorko arsukunte gooto parortonoodo burmusuuje bodeeje daatude, duuminoodo e neema e welataare. <sup>20</sup> Gorko uubaado mo walaa fay huunde, biyeteedo Laajaru, ana lelinoo damal galle makko. <sup>21</sup> Ana yiduno6o jaamde kedde makko, fay dawaadi ana ngarannoo ana mettoo uube makko dee. <sup>22</sup> Misikiino oo maayi, malaa'ika'en nabi dum faa to Ibarahiima. Arsukunte oo maayi kajnum duu, iraa, <sup>23</sup> naati yiite. E ley jukkungo makko ngoo, o hunci gite makko, o soynii Ibarahiima to woddi, Laajaru ana dow koyde mum. <sup>24</sup> O eewnii o wii: «Maamam Ibarahiima, yurmam, nel Laajaru suuuwa hoore fedeendu mum ley ndiyam, yalla ana guumna demngal am. Sabi mi torrike sanne ley ngee yiite.» <sup>25</sup> Kaa Ibarahiima wii: «Binngel am, miccita a he6ii neema maa e ley nguurndam maa, Laajaru kaa bone he6i. Joomi, kanko mo heban hinnee, aan torro-daa. <sup>26</sup> Ko 6uri dum fuu, ngaykaare mawnde woni hakkunde amen e mon. Ndennoo so won yidub6e iwde to mon ngara ga amen, naa iwde ga amen njaha to mon, tawan mbaawaa.» <sup>27</sup> Arsukunte oo wii: «Ndennoo maama, mido jaage, nel Laajaru galle baabam, <sup>28</sup> sabi mi dalii ton mijiraabe am njoyon wor6e, faa o jeertina 6e pati 6e ngara e oo nokku torra.»

<sup>29</sup> Kaa Ibarahiima wii mo: «Ee njogii dewtere Muusaa e dewte annabaabe bee, yo 6e kettindano den.» <sup>30</sup> O jaabii dum: «Wanaa non, maamam Ibarahiima! Kaa so won iwdo hakkunde maaybe yehi to ma66e, 6e tuuban.» <sup>31</sup> Ibarahiima wii mo: «So 6e kettindanaaki Muusaa e annabaabe, fay iwdo e hakkunde maaybe waadataa so 6e ngoondina.»

## 17

### *Haala luuttude e yaafeede*

<sup>1</sup> Isaa wii taalibaa6e mum bee:

—Ko fergitata yimbe faa luutta waasataa hebeede, kaa bone woodanii laatiido sabaabu majjum. <sup>2</sup> Haayre teddunde habbee e daande joomum tippee ley geeci buri moyyande dum, diina luuttinde gootel e koy doo cukaloy. <sup>3</sup> Kaybee ko'e mon: so sakiike maa luuttii, ninja dum. So tuuibii, njaafoda dum. <sup>4</sup> So o toojii ma cili jeddi e ley jalooma gooto, o warti e maa cili jeddi omo tuubane, njaafoda mo.

### *Haala goondinal e dowtaare*

<sup>5</sup> Nelaabe bee mbii Moobbo oo:

—Beydan min goondinal.

<sup>6</sup> Isaa jaabii, wii:

—So goondinal mon famfiriino no ngeeyu buyaage nii, so on mbiino kii doo lekki ruggitoo, daroyoo ley geeci, ki dwtanto on.

<sup>7</sup> Homo e mon maccudo mum demoowo naa duroovo mum wartata ladde so wiya dum jaamdu mum annii oon wakkati fuu? <sup>8</sup> Walaa! A wiyan mo moyyinane jaamdu, o lanndinoo yalla omo gollane faa jaamaa njaraa. Caggal mum, o jaama kanko duu. Wanaa non worri naa? <sup>9</sup> Yalla a yettan maccudo oo saabe wadii ko njamir-daa dum koo? <sup>10</sup> Onon duu hono non. So on ngadii huunde fuu ko njamire-don, mbiyee: «Min maccoy tan, ko min kaani waafude nii min ngadi.»

### *No Isaa selliniri seppaabe sappo*

<sup>11</sup> Nde Isaa yahannoo Ursaliima ndee, ya6borii hakkunde leyde Samariya e Galili. <sup>12</sup> O wari faa o naata ngeenndi ngootiri, non seppaabe sappo wor6e peewti mo, ndarii to toowti, <sup>13</sup> eewnii, mbii:

—Moobbo Isaa, yurma min!

<sup>14</sup> Nde o yiinoo 6e ndee, o wii 6e:

—Njehee, kolloyee ko'e mon yottinoobe sadaka bee.

E ley yaadu ma66e nduu, 6e cellinaa. <sup>15</sup> Gooto ma66e, nde yiinoo sellii ndee, wirfitii ana yetta Laamdo e daande toownde. <sup>16</sup> O dicci yeeso Isaa, o yetti dum. Oon yo Samariyanke.

<sup>17</sup> Isaa jaabittii, wii:

—Tama wanaa sappo bee fuu cellinaama? Hoto njeenayon bee nee ngoni? <sup>18</sup> Walaa miilido wirfitaade yetta Laamdo so wanaa janano oo naa?

<sup>19</sup> Caggal dum, o wii gorko oo:

—Imma yaa e laawol maa, sabi goondinal maa danndii ma.

### *No Laamu Laamdo wardata*

<sup>20</sup> Nden Farisa'en bee lamndii Isaa mande Laamu Laamdo oo warata? O jaabii 6e, o wii:

—No Laamu Laamdo wardata nii, yiyyataake. <sup>21</sup> Fay gooto waawaa wiide omo nii naa omo naa. Anndee, Laamu Laamdo ana hakkunde mon.

<sup>22</sup> Caggal dum, o wii taalibaa6e makko bee:

—Wakkati waran mo muuyaton e mum yiide jalaade Bii Neddo oo, fay so jannnde wootere, kaa on njiyataa. <sup>23</sup> On mbiyete: «Omo too», naa «Omo gaa», pati njehee, pati njokkee 6e. <sup>24</sup> Sabi no majere foonyirta kammu fuu nii, hono non Bii Neddo laatortoo jannnde gartol mum. <sup>25</sup> Kaa ko adii dum, ana tilsi o torree torraaji keewdi, yimbe oo doo jamaanu tippitoo mo. <sup>26</sup> No wa'unoo e wakkati Nuuhu nii, hono non kasen wa'ata e jalaade Bii Neddo: <sup>27</sup> yimbe ana jaama, ana njara, ana ndewla, ana ndewlee, faa jannnde Nuuhu naati laana kaa. Nii ilam tuufaanu dam wari, halkiri 6e fuu. <sup>28</sup> Wa'an hono no wakkati Luudu nii, yimbe ana jaama, ana njara, ana cooda, ana cootta, ana ndema, ana maha.

<sup>29</sup> Kaa nde Luudu yaltunno Soodooma ndee, Laamdo tomni yiite e sitti, halki 6e fuu. <sup>30</sup> Hono non jannnde baangugol Bii Neddo oo duu wa'ata. <sup>31</sup> Nannde nden, mo dum tawi dow bene, tawi kaaki mum ana ley suudu, pati wiya jippanto di. Mo dum tawi gese, pati hoota cuudi.

<sup>32</sup> Miccitee jom suudu Luudu oo. <sup>33</sup> Neddo fuu tewtuuo danndude yonki mum, waasan ki, kaa neddo fuu baasud6o ki, danndan ki. <sup>34</sup> Mido haalana on: e oon jemma, yimbe didon

leldiiše e daddo wooto, gooto mařbe nabete, goddo oo yoppee. <sup>35</sup> Rewbe didon undoobē, gooto mum'en nabete, goddo oo yoppee. [ <sup>36</sup>\* ]

<sup>37</sup> Taalibaabē 6ee njabōitii, mbii mo:

—Kalfaado, hoto dum wađata?

O wii 6e:

—Do jiibe ngori fuu, don dute kawritata.

## 18

### *Banndol haala caroowo ooniido*

<sup>1</sup> Iisaa wadani 6e banndol faa hollita 6e ana tilsi 6e nduumoo e duwaawu, pati 6e njeeboo.

<sup>2</sup> O wii:

—Caroowo gooto mo hulataa Laamdo, yaagataako fay gooto, ana wonnood e ngeenndi ngoottiri. <sup>3</sup> Debbo mo gorum maayi ana ley ndiin ngeenndi. Ana warannoo e caroowo oo, wiya: «Wallam faa mi hewta goonga hakkunde am e kađo am oo.» <sup>4</sup> Caroowo oo deyyinii faa 6ooyi. Kaa sakiitii o wii hoore makko: «Fay so taweede mi hulataa Laamdo mi yaagataako fay gooto duu, <sup>5</sup> mi wallan debbo oo faa o hewta goonga makko, sabi omo torra kam, yalla omo sukkita noppam.»

<sup>6</sup> Caggal dum, Iisaa wii:

—On nani ko caroowo oojiido oo wii naa? <sup>7</sup> Laamdo nee wallataa subaabē mum wullitoobe dum jemma e nalooma 6ee fuu faa 6e kewta goonga mařbe naa? Mo jaabantaako 6e law naa? <sup>8</sup> Mido haalana on: o wallan 6e law. Kaa so Bii Neddo waroyii, omo tawa goondinbe mo e leydi ndii naa?

### *Banndol haala Farisanke e duwaaje*

<sup>9</sup> Yimbe jogoriiše ko'e mum'en yo fooccitiise, njataaki wořbe, 6een o wadani ngol banndol:

<sup>10</sup> —Worbe didon naati ley Suudu Dewal Mawndu nduu, faa ngada duwaawu. Gooto oo Farisanke, goddo oo duwaaje. <sup>11</sup> Farisanke oo darii ana duworoo ley bernde mum hono nii: «Laamdo, mi yettiiri ma ko mi nanndaali e yimbe heddiise 6ee, dum woni wuybe e oojiise e jeenoobe, e ko mi nanndaali e oo doo duwaaje koo. <sup>12</sup> Mido hoora yontere fuu cili didi, mido itta jakka e huunde fuu ko kebu-mi.» <sup>13</sup> Duwaaje oo nee darii to toowti, huli fay tiggitaade kammu, jurginii, ana wiya: «Laamdo yurmam, mi luuttoowo.» <sup>14</sup> Haya, mido wiya on: oo hooti yo nanngiraado pooccitiido, wanaa oo too. Sabi mawninkiniido fuu leydinte, leydinkiniido fuu toownete.

### *No Iisaa duwanorii cukaloy*

<sup>15</sup> Won waddanbe Iisaa cukaloy keccoy, yalla omo mema koy. Kaa nde taalibaabē 6ee njiinoo dum ndee, ndarii ana njahoo e yimbe 6ee. <sup>16</sup> Non Iisaa noddi taalibaabē 6ee, wii dum'en:

—Accee cukaloy koy ngara e am, pati kadee koy, sabi wa'ube no makkoy nii 6ee njey Laamu Laamdo oo. <sup>17</sup> Mido haalana on goonga: mo jařiraali Laamu Laamdo oo no cukalel nii fuu, naatataa hen!

### *No Iisaa e gorko arsukunte ngaddi*

<sup>18</sup> Gooto e hooree6e Yahuudiyankoo6e lamndii mo, wii:

—Moobbo moyyo, kodum kaan-mi wađude faa mi heba nguurndam nduumiidam?

<sup>19</sup> Iisaa wii mo:

—Ko saabii so ada noddira kam moyyo? Moyyo walaa so wanaa gooto, oo woni Laamdo.

<sup>20</sup> Ada anndii dii foo sariyaaji: «Pati jeenu, pati jaadu hoore, pati wujju, pati seeda fenaande, teddin inna maa e baam maa.» \*

<sup>21</sup> Hooreejoo oo jaabii mo, wii:

—Mido haybi dum fuu gila e cukaaku am.

<sup>22</sup> Nde Iisaa nanunoo dum ndee, wii mo:

—Ada jaakoraa huunde wootere: soottu ko njogi-daa koo fuu, ndokkaa kaalisi oo misiki-in-a'en. Nden, a heban jawdi dow kammu. Caggal dum, ngaraa, njokkaa kam.

<sup>23</sup> Kaa nde mo nanunoo dum ndee, mo jirbinii, sabi o arsukunte joldo. <sup>24</sup> Iisaa yeewi mo, wii:

—Hee naatugol arsukunte e Laamu Laamdo ana tiid! <sup>25</sup> Sabi yařboraade ngelooba e wuddere mesalal buri newaade, diina naatugol arsukunte e Laamu Laamdo.

<sup>26</sup> Hettindantoo6e mo bee mbii:

\* <sup>17:36</sup> Edereeji 6ooydi dii, yoga ana 6eyda aaya 36:Worbe didon wonbe e ngesa ngoota, gooto mum'en nabete, goddo oo yoppee. \* <sup>18:20</sup> Pergu 20.12-16; Fillitagol Tawreeta 5.16-20

—Ndennoo, homo woni kisoowo?

<sup>27</sup>Iisaa jaabii:

—Do yimbe dum laatataako, kaa edum laatoo to Laamdo.

<sup>28</sup>Piyeer jaäätitii, wii:

—Minen, min njoppii ko min njogii fuu, min njokkii e maa.

<sup>29</sup>O wii 6e:

—Mido haalana on goonga: neddo fuu joppirdo galle mum naa jom suudu mum naa sakiraäbe mum naa saaraäbe mum naa sukaäbe mum saabe Laamu Laamdo,<sup>30</sup> heän cewe keewde e oo doo wakkati mo ngon-den e mum jooni, heäba nguurndam nduumiidam e wakkati garoyoovo oo duu.

*No Iisaa sapporii nde tatabere maayde mum e wuurtugol mum*

<sup>31</sup>Iisaa noddi taalibaäbe muum sappo e didon bee, wii dum'en:

—Kettinee, eden nii njabbita Urusaliima. Ko annabaäbe mbinnunduno haala Bii Neddo koo fuu, tabitan.<sup>32</sup>Sabi o wadete e juude heeferbe, 6e njaayra mo, 6e torra mo, 6e tutta e makko,

<sup>33</sup>6e piya mo dorri, 6e mbara mo. Kaa jaalooma tataäbo oo, mo wuurtan.

<sup>34</sup>Taalibaäbe bee paamaali haala kaa. Maanaa makka suudanike 6e, 6e anndaa ko o yidi wiide.

*No Iisaa wumtiniri bumdo*

<sup>35</sup>Nde Iisaa 6adinoo Yeriko ndee, tawi bumdo ana joodii sera laawol ngol, ana garbinoo.

<sup>36</sup>Oon maati jamaa ana yaä6oo, lamndii ko dum woni?<sup>37</sup>Be mbii mo:

—Iisaa Nasaraatunke oo bettotoo doo.

<sup>38</sup>O wulli, o wii:

—Iisaa, taanii Daawuuda, yurmam!

<sup>39</sup>Ardiibee bee ndarii ana njahoo e makko, ana mbiya o deyyinoo. Kaa o 6eydii wullude, omo wiya:

—Taanii Daawuuda, yurmam!

<sup>40</sup>Iisaa darii yamiri 6e ngadda mo e mum. Nde mo 6adinoo ndee, Iisaa lamndii mo, wii:

<sup>41</sup>—Kodum njid-daa mi wadane?

O wii:

—Moobbo, mi hewta gite am!

<sup>42</sup>Iisaa wii mo:

—Wumtu, goondinal maa danndii ma.

<sup>43</sup>Don e don o wumti, o jokki e mum, omo yetta Laamdo. Nde yimbe bee njiinoo dum ndee, ndarii ana njetta Laamdo.

## 19

*No Jakayus goondiniri Iisaa*

<sup>1</sup>Iisaa naati Yeriko, ana seeka ngeenndi ndii. <sup>2</sup>Gorko biyeteedo Jakayus ana wonnood ton. O hooreejo duwaajne'en, o arsukunte duu. <sup>3</sup>Omo yidunoo yiide Iisaa faa o anndaa ko woni, kaa o ronkii saabe 6illondiral, nde wonnood mo daä6o. <sup>4</sup>O dogi, o arditii, o njabbi lekki do Iisaa yaä6ortoo doo faa o yiya dum. <sup>5</sup>Nde Iisaa yottinoo nokku oo ndee, tiggiti, yii mo, wii:

—Jakayus, yaawnu jippa, sabi ana haani mi jippoo galle maa hannde.

<sup>6</sup>Jakayus yaawni jippii, jaä6orii mo seyo. <sup>7</sup>Yiibe dum 6ee fuu keddii ana njurjurta, ana mbiya:

—O jippanoyike luuttoowo.

<sup>8</sup>Kaa Jakayus darii yeeso Iisaa, wii:

—Moobbo, mi hokkan fecdere jawdi am fuu misikiina'en. So won mo teetu-mi huunde, mi yo6an dum cowe nay.

<sup>9</sup>Iisaa wii mo:

—Hannde, kisindam naatii e oo galle, sabi oo duu yo taanii Ibarahiima!<sup>10</sup>Sabi Bii Neddo warii tewtude majju6e faa hisina dum'en.

*Banndol haala mutakal*

<sup>11</sup>Yimbe ana ngondi e hettilandaade haala Iisaa, faa o fawi hen banndol gonngol. Sabi o 6adike Urusaliima, kasen duu yimbe miilii Laamu Laamdo 6angan jooni temmbu.<sup>12</sup>O wii:

—Gorko dimo dor yehi leydi ngoddundi faa lamminee, caggal dum, warta.<sup>13</sup>O noddi kaadime'en makko sappo, o hokki gooto maä6e fuu mutakal karjne, o wii 6e: «Njaagoree faa mi warta.»<sup>14</sup>Kaa nde wonnood yimbe ngeenndi makko njidaa mo, 6e immini nelaaäbe caggal makko, 6e mbii: «Min njidaa o laamoo min.»<sup>15</sup>Nde mo lamminaa so mo warti ndee, mo yamiri mo noddanee kaadime'en 6e mo halfini jawdi 6ee, faa mo anndaa ko gooto maä6e fuu

tinorii jaagu mum oo. <sup>16</sup> Arano oo wari, wii: «Kalfaado, mutakal maa ngal tinike mutakal sappo.» <sup>17</sup> O wii dum: «Golle maa gasii sanne kaadime lobbo. Nde wonnoo a hoolniike e ko famdi, mi lamminii ma geelle sappo.» <sup>18</sup> Didabo oo wari, wii: «Kalfaado, mutakal maa ngal tinike mutakal joy.» <sup>19</sup> O wii: «Aan duu, mi lamminii ma geelle joy.» <sup>20</sup> Caggal dum, goddo kasen wari, wii: «Kalfaado, annii mutakal maa, mi piibunoodo ngal e fetalaare <sup>21</sup> sabi mido hule. Sabi a gorko naadudo, ada 6ama ko a resaali, ada hetta do a aawaali.» <sup>22</sup> O wii dum: «Dara! Haalaaji maa jaati cariran-maa-mi, aan kaadime laaliido. Ada anndi mi gorko naadudo, mi 6aman ko mi resaali, mi hettan do mi aawaali.» <sup>23</sup> Ko saabii so a wadaali jawdi am ndii e ley banki, yalla ana dajna ko kebu-mi hen so mi wartoyii?» <sup>24</sup> Caggal dum, kalfaado oo wii kaadime'en mum bee: «Teetee mo mutakal ngal, ndokkon ngal jogiido mutakal sappo oo.» <sup>25</sup> Be mbii mo: «Kalfaado, kanko, omo jogii mutakal sappo.» <sup>26</sup> O wii: «Mido haalana on, jogiido fuu beydante, kaa mo walaa, fay seeda mo jogii oo teetete.» <sup>27</sup> Kaa waybe am be njidaa mu laamoo dum'en bee, ngaddee be doo, mbaron be yeeso am.»

#### *No Iisaa naatiri Urusaliima*

<sup>28</sup> Nde Iisaa tilinoo haalde dum ndee, ardi wobbe bee, nabbiti fa'i Urusaliima. <sup>29</sup> Nde o 6adinoo Baytifaaji e Baytaniya hedde waamnde haayre wiyyeteende Jaytun, o neli taalibaabe makko diidon, <sup>30</sup> o wii fe:

—Njehee, naatoyee e ngeenndi ngnondi yeoso mon ndii, on tawan mola ndakiwa nga fay gooto waddaaki abada ana haabii. Kumton nga, ngaddon nga doo. <sup>31</sup> So won biido on, «Ko saabii so odon kumta nga?» mbiyon dum hono nii: «Moobbo ana haajaa nga.»

<sup>32</sup> Nelaabe bee njehi, tawri no o wiiri dum'en nii. <sup>33</sup> E ley humtugol maabbe mola ngaa, jeybe mola ngaa bee mbii:

—Ko kumtirton mola ngaa?

<sup>34</sup> Be njaabii, be mbii:

—Moobbo ana haajaa nga.

<sup>35</sup> Nii be naabani Iisaa mola ngaa, be njappi e magga saayaaji maabbe, o waddii. <sup>36</sup> No o yaarata nii, be mbeerti saayaaji maabbe dow laawol ngol. <sup>37</sup> Nde o faandii Urusaliima ndee, hedde jipporde waamnde haayre wiyyeteende Jaytun, tawi taalibaabe bee fuu ana keewi seyo, ndarii ana njetta Laamdo e daande toownde, saabe deental kaayde de be njinoo dee. <sup>38</sup> Ebe mbiya:

—Barke woodanii kaananke gardoowo e dow innde Joomiraado!\* Jam dow kammu. Teddeengal woodanii Laamdo Toowdo!

<sup>39</sup> Yoga e Farisa'en tawaabe jamaa oo bee mbii mo:

—Moobbo, haja taalibaabe maa bee!

<sup>40</sup> O jaabii be, o wii:

—Mido haalana on, so kambe be ndeyyii, kaaye dee ngattata wullude!

#### *No Iisaa woyirani Urusaliima*

<sup>41</sup> Nde o 6adinoo, so o yii ngeenndi ndii ndee, o woyi ndi, <sup>42</sup> o wii:

—So aan duu, ada anndunoo hannde ko hokkete jam...! Kaa jooni, dum suudaama e gite maa. <sup>43</sup> Nalaade ngaran nde waybe maa moyyinta cuudorde, pile, 6ille, <sup>44</sup> ngurjine, kalke aan e 6ilbe maa fuu. Be njoppataa e maa fay haayre wootere ana fawii dow wonnde, sabi a annditali wakkati mo Laamdo wari faabaade ma oo.

#### *No Iisaa ribbirijaagotoobe ley Suudu Dewal Mawndu*

<sup>45</sup> Caggal dum, o naati daalaare Suudu Dewal Mawndu nduu, o darii omo ribba jaago-toobe, <sup>46</sup> omo wiya dum'en:

—Ana winndii: «Suudu am laatoto rewrudu Laamdo»,<sup>†</sup> kaa onon, on ngadii ndu suudorde yanooibe.

<sup>47</sup> Iisaa ana waajoo nannde fuu ley Suudu Dewal Mawndu nduu. Hooreeb be yottinoobe sadaka e dunkee'en Sariya e mawbe lejol ngol bee ana ndaara no masinbinira mo, <sup>48</sup> kaa be ndonkii hebude laawol, sabi yimbe bee ana ngattani haalaaji makko dii hakkille faa sanne.

## 20

#### *Do yamiroore golle Iisaa iwri*

<sup>1</sup> Nannde wootere Iisaa ana jaangina yimbe ley daalaare Suudu Dewal Mawndu nduu. E ley no o jaanginirta be Kabaaru Lobbo oo nii, mawbe bee e hooreeb be yottinoobe sadaka e dunkee'en Sariya ngari e makko, <sup>2</sup> mbii mo:

—Yamiroore hende ngollirtaa ko ngollataa koo? Homo yamir maa ngollaa dum?

<sup>3</sup> Iisaa jaabii be, wii:

—Miin duu, huunde wootere tan lamndotoo-mi on. Njaabo-don kam dum: <sup>4</sup> lootogal batisima Yaayaa ngal, to Laamdo iwhi naa to yimbe?

<sup>5</sup> Be ndawridi hakkunde maabbe, be mbii:

—So en mbii to Laamdo, o wiyan: «Ndennoo ko saabii so on ngoondinaali Yaayaa?» <sup>6</sup> Kaa so en mbii «yimbe», jamaa oo wedoto en kaaye, sabi be fuu ebe taylori Yaayaa yo annabaajo.

<sup>7</sup> Non be njaabii be anndaa to lootogal batisima Yaayaa iwhi. <sup>8</sup> Iisaa wii be:

—Haya miin duu, mi haalantaa on yamiroore nde ngolliran-mi ko ngollan-mi koo.

#### *Bannadol haala remooobe bonbe*

<sup>9</sup> Iisaa fuddi haalande yimbe ngol bannadol, wii:

—Neddo gooto tuti ngesa peguuje, hasiri nga remooobe, dawi. O fooyi e dawol makko ngol. <sup>10</sup> Nde tebung yottinoo, o neli golloowo makko to remooobe bee too, be ngaddanoya mo ngeedu makko e biibbe peguuje dee. Kaa remooobe bee pii nelaado oo, mbirfini dum juude teete. <sup>11</sup> O neli e maabbe golloowo goddo, be pii oon duu, be koyni dum, be mbirfini dum juude teete. <sup>12</sup> O neli kasen golloowo tatabo, be mbarmini oon, be ndibbi dum. <sup>13</sup> E oon wakkati, jom ngesa oo wii: «Hono ngadan-mi? Ooho, mi nelan biyam gorko korsudo oo, yaama be njaagoo mo!» <sup>14</sup> Kaa nde remooobe bee njiinoo biddo oo ndee, mbiyondiri hakkunde mum'en: «Oo woni donoowo mo, mbaren mo, keddoro-den ngesa ngaa!» <sup>15</sup> Be mbedii mo to caggal ngesa too, be mbari mo. Jooni nee, hono jom ngesa oo wadata e maabbe? <sup>16</sup> O waran, o halka remooobe bee, o hasira ngesa ngaa woobbe.

Nde yimbe bee nannoo dum ndee, mbii:

—Pati hono majjum laato!

<sup>17</sup> Iisaa yeewi be, wii:

—Ndennoo, kodum woni maanaa ko winndii koo:

«Haayre nde mahooobe bee tippitii ndee,

kajum laatii haayre burnde fuu teentilaade e maadi ndii?\*

<sup>18</sup> Neddo fuu caamdo e nden haayre, helan. Neddo fuu mo nde saami e mum, noyoto.

<sup>19</sup> Dunkee'en Sariya e hooreeb e yottinoobe sadaka paamii bannadol ngol e mum'en fewti. Be njisiino nanngude mo don e don, kaa be kulii yimbe.

#### *Haala yobugol lampo*

<sup>20</sup> Dunkee'en Sariya e hooreeb e yottinoobe sadaka ngattani Iisaa hakkille, neli horooibe nanndinkiniibe e moyyuube, yalla ana keba e haala makko laawol, ngada mo e juude goforneer laamiido leydi ndii oo, sara dum. <sup>21</sup> Been lamndii mo:

—Moobbo, miden anndi ko kaalataa koo e ko mbaajoto-daa koo yo goonga, miden anndi a bürdintaa yimbe, ada jaangniraa laawol Laamdo ngol goonga. <sup>22</sup> Minen nee, ana dagoo min ndokka kaananke Roma mawdo oo lampo naa dagaaki?

<sup>23</sup> Nde wonnoo o faamii hiila maabbe kaa, o wii be:

<sup>24</sup> —Kolleek kam mbuuudu card! Natal homo e innde homo woni doo?

Be mbii:

—Kaananke Roma.

<sup>25</sup> Caggal dum, o wii be:

—Ndennoo ndokkee kaananke Roma oo ko jey, ndokkee Laamdo duu ko jey.

<sup>26</sup> Be ndonki hebude laawol e ko mo haalata yeeso yimbe koo, jaabu makko oo haaynii be, be ndeyyinii.

#### *Haala immitagol maaybe*

<sup>27</sup> Yoga e waalde Saduki'en ngari e Iisaa. Kambe ngoni fennube immital. Be lamndii mo, be mbii:

<sup>28</sup> —Moobbo, Muusaa yamirii en, so neddo bamii debbo, maayii, hebaali biddo, mijum naa mawnnum bamta debbo oo, yalla ana hefana maaydo oo beyngu. <sup>29</sup> Wadiino e bettaade rimdaabe njeddon. Arano oo bami debbo, maayi, hebaali biddo. <sup>30</sup> Didabo oo bamti debbo oo, maayi, <sup>31</sup> tatabo oo jokki hen. Hono nii njeddon bee fuu bamiri mo, dalaali biddo. <sup>32</sup> Caggal maabbe be fuu, debbo oo duu maayi. <sup>33</sup> Ndennoo, jannende immital, homo e maabbe debbo oo laatotoo jom suudu mum? Sabi be njeddon fuu be bamiino mo.

<sup>34</sup> Iisaa jaabii be, wii:

—Yimbe oo jamaanu ana bama, ana bamee. <sup>35</sup> Kaa haandinaabe e nguurndam janngo, kajum e immitagol bee, bamataa, bamataake, <sup>36</sup> sabi be mbaawaa maayde kasen. Be laatoto no malaa'ika'en nii, be biibbe Laamdo, sabi be immitike e maayde. <sup>37</sup> Kaa ko maaybe immitoto koo, fay Muusaa sappike dum e ley haala wuutuure. Sabi ton o noddiri

\* 20:17 Jabuura 118.22

Joomiraado oo «Laamdo Ibarahiima e Laamdo Isiyaaka e Laamdo Yaakuuba.»<sup>†</sup> <sup>38</sup> Laamdo yo Laamdo wuurse, wanaa Laamdo maayse.<sup>‡</sup> Sabi banngal makko yimbe fuu yo wuurse!

<sup>39</sup> Yoga e dunkee'en Sariya mbii:

—Moobbo, a haalii goonga.

<sup>40</sup> Caggal dum, 6e cuusaali lamndaade mo fay huunde.

### *Kabaaru Almasiihu e Daawuuda*

<sup>41</sup> Iisaa wii 6e:

—Hono fe mbaawiri wiide Almasiihu yo taanii Daawuuda? <sup>42</sup> Daawuuda e hoore mum wii e ley dertere mum Jabuura:

«Joomiraado wii Joomam:

Jooda jaamo am,

<sup>43</sup> faa mi wada njaaftaa wayse maa.»<sup>§</sup>

<sup>44</sup> Daawuuda «Joomam» noddirta mo, ndennoo, hono mo laatortoo taanum tan?

### *No Iisaa feliri dunkee'en Sariya*

<sup>45</sup> Nde wonnoo yimbe 6ee fuu ana kettindanoo mo, o wii taalibaabe makko 6ee:

<sup>46</sup> —Ndeentee e dunkee'en Sariya yidube yiiloraade saayaaji mawdi e jowteede ley luumooji, foodantoobe joolle burde teddude e ley cuudi baajordi e ley yanngjeeji fuu. <sup>47</sup> E6e teeta cuudi rewse talka'en 6e worse mum'en maayi, 6ee njuttina duwaawuuji maabbe faa 6e nanndinkinoo e moyyuue. Kambe, jukkungo naawngo burata jippineede e maabbe.

## 21

### *Haala sadaka burdo moyyude*

<sup>1</sup> Iisaa hunci gite, yii arsukunte'en ana ngada sadakaaji mum'en e keesu sadaka oo. <sup>2</sup> Mo yii debbo misikiino mo gorum maayi, kajum diu ana wada hen buudi didi. <sup>3</sup> E ley dum, o wii:

—Mido haalana on goonga: oo debbo misikiino, ko o wadi e ley keesu oo koo, buri ko 6ee too fuu ngadi hen koo. <sup>4</sup> Sabi 6e fuu, ko bonnanta 6e huunde tan 6e ngadi hen, kaa kanko debbo oo, ko o hasindini e mum o wadi hen, ko o jogii faa o wuurdha koo fuu.

### *Haala taagumansaaji kollooji timmoodde aduna*

<sup>5</sup> Won yogaabe ana kaala haala Suudu Dewal Mawndu nduu, no ndu qardiniraa kaaye e kulle cakkaaade. Nden Iisaa wii:

<sup>6</sup> —Ko njiyaton koo, wakkati waran nde fay haayre wootere heddataako doo ana fawii dow wonnde, fuu wurjinte.

<sup>7</sup> Be lamndii mo, 6e mbii:

—Moobbo, humpitin min nde dum wadata. Taagumansa homo hollata waafugol kudde dee fuu?

<sup>8</sup> O wii:

—Ndeentee pati on yojne. Heewse ngardan innde am, mbiya: «Miin woni kanko», «Wakkati oo badike». Pati njokkee 6e. <sup>9</sup> So on nanii golowole e murtereeji, pati kulee. Ana tilsii dum wada tafon, kaa dum wanaa timmoodde don e don.

<sup>10</sup> O jokki wiide:

—Lejol haaban e lejol, laamu haaban e laamu, <sup>11</sup> dimmbande leydi mawde e yolbereesi ngadan, jawuuji bondi ngaran e nokkuuje yogaaje, kulle kulsooniide e taagumansaaji mawdi banngan dow kammu. <sup>12</sup> Kaa gila dum fuu dum wadaali, yimbe nanngan on, torra on cara on ley cuudi baajordi, mbede-don e kasu, nabe-don yeeso kaanankoobe e saroobe saabe am. <sup>13</sup> Dum hokkan on seettanaade kam. <sup>14</sup> Pi6ee anniya e berde mon mbaason lanndinanaade no ndanndirton ko'e mon, <sup>15</sup> sabi mi hokkan on waawde haala, mi hokkan on hakkilantaaku ko wayse mon 6ee fuu mbaawaa salaade naa yeddude. <sup>16</sup> Saaraabe mon e sakiraabe mon e koreeji mon e gidiraabe mon, kajum'en njammbotoo on, mbara yoga e mon. <sup>17</sup> Yimbe fuu mbajan on saabe am, <sup>18</sup> kaa fay leembol ko'e mon majjataa. <sup>19</sup> Mujal mon ndanndirton yonkiiji mon.

### *No Urusaliima halkirtee e no Bii Neddo oo wartirta*

<sup>20</sup> —Nde njii-don Urusaliima ana filaa konuji fuu, anndee helde mum badike. <sup>21</sup> Oon wakkati, 6e dum tawi Yahuudiya fuu, yo ndogu peewa baamle kaaye, 6e dum tawi e ley ngeenndi ndii fuu, yo njaltu e mayri, tawaabe ladde duu, pati naattu ngeenndi ndii.

<sup>22</sup> Sabi deen jalaade yo nalaade yobtagol, faka oo winndii koo fuu tabita. <sup>23</sup> Bone woodanii haamili'en e muyninoobe ley deen jalaade! Sabi torraaji mawdi njanan e leydi ndii,

<sup>†</sup> 20:37 Pergu 3.6    <sup>‡</sup> 20:38 Gila e jamaanu Muusaa tawi Ibarahiima e Isiyaaka e Yaakuuba maayii gila ko booyi. Ko Laamdo wii yo Laamdo maabbe koo, holli e6e nguuri.    <sup>§</sup> 20:43 Jabuura 110.1

jukkungo jippoo e lejol ngol.<sup>24</sup> Be camminirte kaafaawi, 6e nanngee, 6e nahee hakkunde heefere. Been ndippan e Urusaliima faa nde wakkati mum'en timmi.

<sup>25</sup> Taagumansaa ji ngadan e naange e lewru e koode. Kulol wadan e leydi ndii, faa lepi dii fuu mbemmbree saabe dillere gecci e bempeeje mom. <sup>26</sup> Yimbe modoto saabe kulol so miilike albalaawujippotoodo e aduna oo, sabi fay kulle gondee dow kammu dee ndimmboto. <sup>27</sup> E oon wakkati, Bii Neddo oo yiyyete, ana wara e duule, ana warda baawde e teddeengal manngal. <sup>28</sup> Onon, so dum fuddii wadude, ceyo-don, njoonndoro-don soottiteede mon gadike.

### *Bannadol haala ibbe*

<sup>29</sup> Caggal dum, o haalan 6e ngol bannadol:

—Taykitee ibbe e ledde godde dee fuu. <sup>30</sup> So on njii de mbillitii, odon anndi onon e ko'e mon, ndunngu gadike. <sup>31</sup> Hono non, so on njii deen kulle ana ngada, anndee Laamu Laamdo oo gadike. <sup>32</sup> Mido haalana on goonga: oo jamaanu timmataa, tawee kudde dee fuu ngadaali. <sup>33</sup> Kammu e leydi timman, kaa haalaaji am dii timmataa abada.

### *Haala jeertanagol gartol Almasiihu*

<sup>34</sup> Ndeenee ko'e mon pati berde mon metta, so kebbinoro-don yaraawo faa cigiron, so cuunlon aduna, so nannde gartol Almasiihu ndee juhira on <sup>35</sup> no piccal nii. Sabi ende wara dow yimbe aduna fuu. <sup>36</sup> Ndennoo, njeerto-don wakkati fuu, nduwo-don, yalla odon keba dadufe e deen kulle gadooje fuu, mbaawon daraade yeeso Bii Neddo oo.

<sup>37</sup> Nalooma, Iisaa ana waajoo ley Suudu Dewal Mawndu nduu, jemma, o yaltan, o waaloya dow waamnde haayre wiyyeteende Jaytun. <sup>38</sup> Yimbe fuu ana immoo, ana njaha to Suudu Dewal Mawndu too gila beetee kecco faa kettindanoo mo.

## 22

### *No hooreebé ndawriri faa nannga Iisaa*

<sup>1</sup> Wakkati iidi mo buuru yuufinaaka biyeteedo Paska oo gadike. <sup>2</sup> Hooreebé yottinoobe sadaka e dunkee'en Sariya bee ana tewta no mbarda Iisaa, kaa ebe kula yimbe bee.

<sup>3</sup> Nden Ibiliisa naati e Yahuuda annditirteedo Isikariyota, jeyaado e sappo e didon bee. <sup>4</sup> Yahuuda yehi haaldoyi e hooreebé yottinoobe sadaka e hayboobe Suudu Dewal Mawndu nduu no o wadira Iisaa e juude mum'en. <sup>5</sup> Be ceyii, 6e podani mo 6e njeenan mo kaalisi. <sup>6</sup> O jaabi, omo fiya dabare no o jammbortoo Iisaa tawa yimbe bee kumpitaaki.

### *Haala lanndinanaade hiraande iidi Paska*

<sup>7</sup> Iidi mo buuru yuufinaaka, nde 6e mboownoo hirsude jawdi Paska ndee, yottii. <sup>8</sup> Nden Iisaa nelii Piyeer e Yuhanne, wii dum'en:

—Njehee lanndinanee en hiraande iidi Paska faa jaamen.

<sup>9</sup> Be lamndii mo:

—Hoto njid-daa min lanndinoyoo nde?

<sup>10</sup> O wii 6e:

—Yewee, so on naatii ngeenndi ndii, on kawran ton e gorko, ana roondii mbulku ndiyam. Njokkee e makko faa e galle do mo naatata doo, <sup>11</sup> mbiyon jom galle oo: «Moobbo wii suudu hondu jaamdata e taalibaabe mum 6ee hiraande iidi Paska?» <sup>12</sup> O hollan on sooro manngo paraango, ton lanndinanto-don en dum.

<sup>13</sup> Be njehi, 6e tawri hono no o wii 6e nii, 6e lanndinii hiraande Paska ndee.

### *No Iisaa hiirtorii e taalibaabe mum hiraande iidi Paska*

<sup>14</sup> Nde wakkati oo yottinoo ndee, o joodii kanko e sappo e didon 6ee. <sup>15</sup> O wii 6e:

—Mido yidi jaamduude e mon sanne hiraande Paska ndee, gila mi torraaka. <sup>16</sup> Sabi mido wiya on: mi hiirtataako nde kasen faa nannde nde nde tabiti ley Laamu Laamdo.

<sup>17</sup> O 6ami horde, o yetti Laamdo, o wii:

—Nanng ee dum, peccee dum e hakkunde mon <sup>18</sup> sabi mido wiya on: mi yarataa peguujam kasen faa nde Laamu Laamdo waroyi.

<sup>19</sup> Kasen, o 6ami buuru, o yetti Laamdo, o helti, o hokki 6e, o wii:

—Dum yo terde am cakkiraade kammari mon, ngadee dum faa miccito-don kam.

<sup>20</sup> Hono non duu, nde 6e tilii hiraande ndee, o 6ami horde peguujam, o hokki 6e, o wii:

—Ndee doo horde woni aadi keyri. Aadi ndii tabintiniraama yiyyam am njupportoodam saabe mon. <sup>21</sup> Kaa jammbotoodo kam oo ana naamda e am e la'al gootal. <sup>22</sup> Waajibi Bii Neddo falira aduna no fodiranaa nii. Kaa bone woodanii jammbotoodo mo oo!

<sup>23</sup> Hedde ebe lamndondira hakkunde ma66e homo e ma66e gollata oo golle.

### *No Iisaa waynorii taalibaabe mum 6ee*

<sup>24</sup> Nii taalibaafé 6ee ndarii ana njeddondira hakkunde mum'en homo 6uri teddude.  
<sup>25</sup> Iisaa wii 6e:

—Kaanankooße ana ndonna laamu mum'en dow leji mum'en. Jom'en doole e maßbe 6ee duu ana njidi noddireede sooninkooße. <sup>26</sup> Kaa onon, wanaa non ñum laatortoo hakkunde mon. Ko kaan-don laataade dee, 6urdo teddude e mon yo laato hono cukalel, ardiido laatoo hono golloowo. <sup>27</sup> Homo 6uri teddude, joodiido faa jaama naa 6attinoowo jaamdu? Wanaa jaamoowo oo naa? Kaa miin, mido wa'i hakkunde mon no 6attinoowo jaamdu nii.

<sup>28</sup> Onon ngoni wondubé e am e ley ko koro am itteteet koo fuu. <sup>29</sup> Kammari ñum, miin duu, mi hokkii on laamu no Baabiraado am hokkiri kam laamu nii, <sup>30</sup> faa jaamden, njarden e la'al am ley laamu am, njoodo-don e dow joodorde kaanankooße, caron cuudi baaba Israa'iila sappo e didi dii.

<sup>31</sup> Simon, Simon, Iibiliisa jaagike faa seda on no alkama sedirtee nii. <sup>32</sup> Kaa mi jaaganike ma pati goondinal maa mursee. Aan, so a wartii e am, ngadaa e sakiraabe maa bee semmbe.

<sup>33</sup> Piyeer wii mo:

—Kalfaado, mi lanndinike na6deede e maa kasu e wardeede e maa!

<sup>34</sup> Kaa Iisaa wii:

—Piyeer, mido haalane: fade ndontoori jogginde hannde a wiyan a anndaa kam cili tati.

<sup>35</sup> O wii 6e kasen:

—Nde nelunoo-mi on rafi dannga e mbasu e padé, won ko jaki on naa?

Be mbii:

—Walaa!

<sup>36</sup> O wii 6e:

—Jooni kaa, jogiido dannga 6ama, jogiido mbasu nabora, mo walaa kaafaawi, sootta saaya mum sooda ngooti. <sup>37</sup> Sabi ana winndii mi hiisodete e bonfe.\* Mido wiya on: ana tilsi dum hewtoo kam. Ko cappanaa-mi koo fuu goondan.

<sup>38</sup> Be mbii:

—Kalfaado, kaafaaje didi anniil!

O wii 6e:

—Heyii!

#### *No Iisaa naagorii Laamdo dow waamnde haayre Jaytun*

<sup>39</sup> Iisaa yalti, fa'i waamnde haayre wiyeteende Jaytun no o woowiri nii. Taalibaafé makko bee njokki e makko. <sup>40</sup> Nde o yottinoo ndee, o wii 6e:

—Nduwee pati on ceyte.

<sup>41</sup> Caggal dum, o tootwiri 6e ko waarata e wedannde haayre, o dicci, omo duwoo, <sup>42</sup> omo wiya:

—Baaba, so a muuyii, woofdinam ndee horde bone. Kaa pati laatoo sago am, laatoo sago maa aan!

<sup>43</sup> Oon wakkati fuu, malaa'ika iwruđo dow kammu 6anngani mo, hokki mo semmbe. <sup>44</sup> O ruubi faa walaa seese, o 6eydii tekkinde duwaawu makko, nguli makko ana to66a e leydi no to66e yiyyam nii. <sup>45</sup> Nde o tilii duwaade ndee, o wirfitii e taalibaafé makko bee, o tawi efe daanii saabe terde baatude. <sup>46</sup> O wii 6e:

—Kodum daanoto-don? Immee nduwo-don, pati on ceyte!

#### *No Iisaa nanngiraa*

<sup>47</sup> Omo e haala kaa faa jamaa wari. Biyeteedo Yahuuda, gooto e sappo e didon bee, ardi 6e. Yahuuda 6attitii Iisaa faa buuccoo dum. <sup>48</sup> Iisaa wii mo:

—Yahuuda, 6uccaango njammborto-daa Bii Neddo oo naa?

<sup>49</sup> Nde wondubé e Iisaa bee njii ko waafata koo ndee, mbii:

—Kalfaado, min coppa 6e kaafaaje naa?

<sup>50</sup> Non gooto maßbe soppi golloowo Jottinoowo Sadaka Mawdo tayi nowru mum jaamuru. <sup>51</sup> Iisaa jaabii, wii:

—Daldee nii!

O memi nowru kaadime oo, o sellini ñum. <sup>52</sup> Iisaa haalani warþe nanngude dum 6ee, mawþe bee e hooreeþe yottinoóbe sadaka e hayboóbe Suudu Dewal Mawndu bee, wii:

—Ko ngardu-don e kaafaaje e cabbi faa nanngon kam hono mi janoowo? <sup>53</sup> Nannde fuu mifoo wonduno e mon ley Suudu Dewal Mawndu nduu, on paawali e am junngo. Kaa jooni yo wakkati mon, jooni yo wakkati mo nimre laamtoo.

#### *No Piyeer waadi so yankiri Iisaa*

<sup>54</sup> Be nanngi Iisaa, 6e ngusi dum faa ley galle Jottinoowo Sadaka Mawdo. Piyeer jokkitie mo fali daawre hakkunde maßbe. <sup>55</sup> Yiite hu66anooma hakkunde daalaare galle oo, Piyeer

wari jooddii e jooddiib ton 6ee. <sup>56</sup> Kordo gooto yii omo fewti e fooyre ndee, taykitii mo faa gasi, wii:

—Oo duu e makko wondunoo.

<sup>57</sup> Nii Piyeer yeddi mo, wii:

—Banndam debbo, mi anndaa mo fey.

<sup>58</sup> Nde booynoo seeda, goddo yii mo, wii:

—Aan duu e maabbe njeye-daa!

Piyeer wii oon:

—Gido, mi jeyaaka e maabbe!

<sup>59</sup> Faa wadi leer caggal mum, goddo kasen immini haala kaa, wii:

—Tayoral, kanko duu omo wondunoo e makko, sabi o Galilinke.

<sup>60</sup> Piyeer jaabii, wii:

—Gido, mi faamataa ko kaalataa koo!

O tilaaki haalde, faa ndontoori joggini. <sup>61</sup> Nden Iisaa yeecctii, yeewi Piyeer. Non Piyeer miccitii konngol ngol Iisaa haalanoo dum ngol: «Fade ndontoori jogginde hannde, a wiyan a anndaa kam cili tati.» <sup>62</sup> O yalti sella, o darii omo woya faa omo heppiya.

### *No mawbe diina cariri Iisaa*

<sup>63</sup> Yimbe nanngube Iisaa bee ndarii ana njaayra dum, ana piya dum. <sup>64</sup> Be cuddi yeeso makko, ebe lamndoo mo, ebe mbiya:

—Annditit homi fii maa!

<sup>65</sup> Hedde ebe mbiya mo bihiile bonde.

<sup>66</sup> Nde weetunoo ndee, waalde Saahiiib nee hawriti, dum woni mawbe lejol ngol e hooreebe yottinoobe sadaka e dunkee'en Sariya. Iisaa waddaa yeeso maabbe. <sup>67</sup> Be mbii dum:

—So aan woni Almasiihu oo, haalan min.

O wii 6e:

—Fay so mi wii on non, on njaabataa. <sup>68</sup> So mi lamndike on duu, on njaabataako. <sup>69</sup> Kaa gila jooni, Bii Neddo oo joodoyto jaamo Laamdo, Jom Baawde oo.

<sup>70</sup> Be fuu 6e mbii:

—Ndennoo a Bii Laamdo naa?

O wii 6e:

—No mbii-don nii.

<sup>71</sup> Be mbii:

—En kaajaaka seedee hankasen, nde wonnou o haaldii hunduko makko, en fuu en nani!

## 23

### *No Pilaatu lamndorii Iisaa*

<sup>1</sup> Caggal dum, waalde Saahiiib nee fuu immii, nabi Iisaa to Pilaatu goforneer oo. <sup>2</sup> Be ndarii ebe ngullanoo mo, ebe mbiya:

—Min tawii oo ana jirkita lejol amen, ana hada dum yobude kaananke Roma oo lampo, ana wiya hoore mum yo Almasiihu, dum woni kaananke.

<sup>3</sup> Pilaatu lamndii mo, wii:

—Aan woni kaananke Yahuudiyankoobe oo naa?

O jaabii, o wii:

—No mbii-daa nii.

<sup>4</sup> Pilaatu jaabbe, wii hooreebe yottinoobe sadaka e jamaa oo fuu:

—Mi yiyaali e makko daliili fuu ko jukkata mo.

<sup>5</sup> Kaa 6e cattini e haala maabbe faa sanne, ebe mbiya:

—Ko o waajotoo koo ana murtina yimbe ley leydi Yahuudiya fuu, gila Galili to o fuddiri too faa doo.

<sup>6</sup> Nde Pilaatu nanunoo dum ndee, lamndii yalla o Galilinke naa? <sup>7</sup> O faami Iisaa e laamu Hirudus iwata, o neldi dum Hirudus. Sabi e ley den jalaade tawi Hirudus ana Urusalima.

<sup>8</sup> Nde Hirudus yii Iisaa ndee, weltii hen sanne, sabi booyii omo yidi yiide dum saabe ko mo nannoo e mum koo. Kasen duu omo yeloo yiide dum ana wada kaayde. <sup>9</sup> O lamndii dum lamndi keewdi, kaa Iisaa jaabaaki fay huunde. <sup>10</sup> Hooreebe yottinoobe sadaka e dunkee'en Sariya ndarii don, ana ngullanoo mo ko mbaawi fuu. <sup>11</sup> Hirudus duu hoyni mo, jaayri mo, kajum e sordaasi'en mum, boorni mo saaya lobba, neltiri mo Pilaatu. <sup>12</sup> Nannde mum Pilaatu e Hirudus laatii gidiraabe, arannde 6e honnondirnoobe.

### *No Iisaa sariraa yo bareeteedo*

<sup>13</sup> Pilaatu noddi hooreebe yottinoobe sadaka e mawbe 6ee e yimbe fuu, <sup>14</sup> wii dum'en:

—On ngaddanii kam oo neddo jirkitoowo yimbe. Mi lamndike mo yeeso mon, kaa ko ngullaniri-don mo koo fuu, mi yiyaali hen daliili ko jukkata mo. <sup>15</sup> Hirudus duu yiyaali e makko fay huunde, sabi o neltirii en mo. Anndee, oo gorko wadaali fay huunde ko warata dum. <sup>16</sup> Ndennoo, mi fiyan mo, mi yoppita mo. [ <sup>17\*</sup> ]

<sup>18</sup> Be fuu 6e ngullidi daande wootere, 6e mbiit:

—War mo, njoppitanaa min Barabas!

<sup>19</sup> Barabas nee yo uddiranoodo kasu saabe murtere waafunoonde e ngeenndi ndii, e saabe war-hoore. <sup>20</sup> Pilaatu haaldi e ma66e cilol didafol dow yiidude yoppitinde Iisaa, <sup>21</sup> kaa 6e ndarrii e6e ngulla, e6e mbiya:

—Tontu mo! Tontu mo e leggal bardugal!

<sup>22</sup> Pilaatu wii 6e tatafol:

—Kodum o wadi ka boni? Mi yiyaali e makko daliili fuu ko haani warde mo! Ndennoo, mi fiyan mo, mi yoppita mo.

<sup>23</sup> Kaa 6e 6eydii wullude gullaali mawdi, e6e mbiya o tontee. Gullaali ma66e dii njaalii Pilaatu, <sup>24</sup> o fellisi wadande ke 6e jaagii koo. <sup>25</sup> O yoppitani 6e mo 6e jaagii yoppitee oo, oon yo uddiranoodo kasu saabe murtere e war-hoore. Kaa Iisaa, o wadi dum e juude ma66e, faa 6e ngada dum ko weli 6e.

#### *No Iisaa tontiraa dow leggal bardugal*

<sup>26</sup> Nde 6e naabata mo ndee, 6e naangi gorko Sireenanke biyeteedo Simon, iwrudo ley ladde. Be mbakkini dum leggal bardugal ngal faa jokka e caggal Iisaa. <sup>27</sup> Yimbe heew6e njokki hen. Rew6e duu ana hakkunde ma66e, ana mboya no dum foti mettude dum'en.

<sup>28</sup> Iisaa yeccitii rew6e 6ee, wii dum'en:

—Rew6e Urusaliima, pati mboyee kam, mboyee ko'e mon e 6i66e mon! <sup>29</sup> Sabi jalaade ngaran nde yimbe mbiyatia: «Rew6e rimar6e e deedi di caawaali abada e endi di muyninaali, mbelii hoore!» <sup>30</sup> Nden, yimbe mbiyan baamle kaaye caama dow mum'en, mbiya tule cudda dum'en. <sup>31</sup> Sabi so 6e ngadii nii gila ca6al ngal keccal, hono laatotoo so ngal yoorii?

<sup>32</sup> Be naabidi e Iisaa yimbe didon yanoo6e. Been duu yo waretee6e. <sup>33</sup> Nde 6e njottinoo nokku biyeteedo Laalagal Hoore ndee, 6e tonti mo e leggal bardugal, kanko e yanoo6e didon 6ee, gooto jaamo makko, goddo oo nano makko. <sup>34</sup> O wii:

—Baaba, yaafa 6e sabi 6e anndaa ko 6e ngadata.

Nii 6e pecciri kaddule makko urwa. <sup>35</sup> Yimbe ndarrii don ana yeewa. Hooree6e see duu ndarrii ana njaayra mo, ana mbiya:

—O bilti wo66e, o biltaa hoore makko so o Almasiihu, Cu6aadlo Laamdo oo!

<sup>36</sup> Sordaasi'en 6ee duu njaayri mo, ngaddani mo biineegiri, <sup>37</sup> ana mbiya:

—So aan woni kaananke Yahuudiyanoo6e oo, biltu hoore maa!

<sup>38</sup> Tawi ana winndii e tiimde hoore makko: OO YO KAANANKE YAHUUDIYANKOO'BE.

<sup>39</sup> Gooto e yanoo6e didon tontidaabe e makko 6ee ana jiin mo, ana wiya:

—Wanaa aan woni Almasiihu naa? Biltu hoore maa, mbiltaa min minen duu!

<sup>40</sup> Kaa goddo oo jahii e oo too, wii:

—A hulataa Laamdo naa? Aan e makko fuu, on potu jukkungo. <sup>41</sup> Enen, en ke6ii ko kaandu-den, jukkeede men yo goonga jaati, sabi ko ngollu-den tan njobete-den. Kaa kanko, o wadaali fay huunde ko dagaaki.

<sup>42</sup> Caggal dum, o wii:

—Iisaa, miccito-daa kam so a laatitike kaananke.

<sup>43</sup> Iisaa wii mo:

—Mido haalane goonga: hannde jaati a wondoyan e am ley alienne.

#### *Haala maayde Iisaa*

<sup>44</sup> Wakkati hakkunde naange, nimre wadi e leydi ndii fuu faa wakkati yamnde tati kikiide, <sup>45</sup> naange ni66i, heedooode faliinde ley Suudu Dewal Mawndu ndee seekii, laatii taye didi. <sup>46</sup> Iisaa wulli wullaango manngo, wii:

—Baaba, mi tummbii yonki am kii e junngo maa.

O haali dum tan, o dali aduna. <sup>47</sup> Nde hooreejo sordaasi'en oo yii ko wadi koo ndee, yetti Laamdo, wii:

—So goonga nii, oo neddo yo poocciitido!

<sup>48</sup> Jamaa garnoodo yeewde oo fuu, nde yiinoo ko wadi koo ndee, wirfitii terde mum ana mbaati. <sup>49</sup> Kaa annduu6e mo 6ee fuu, ndarrii to toowti ana yeewa. Rew6e jokkuno6e e makko gila leydi Galili 6ee ana e ma66e.

#### *No tew Iisaa waafraa e yanaande*

\* <sup>23:17</sup> Edereejii booydi dii, yoga ana 6eyda aaya 17:Nde wonnnoo ana tilsi e Pilaatu iidi Paska fuu yoppitana 6e kasunke gooto.

50-51 Gorko gooto ana jeyaa e waalde Saahiife ndee, ana wiyee Yuusufu. Omo iwa Arimatiya, ngootiri e geelle leydi Yahuudiya. O gorko moyyo, pooccitiido, omo doomunoo 6anngugol Laamu Laamdo oo. O tawdaaka e waalde Saahiife ndee haala e golle.<sup>52</sup> O yehi to Pilaatu, o ndaardi düm tew Iisaa,<sup>53</sup> o jippini düm leggal bardugal ngal, o filli düm e kasanke, o wattii düm e yanaande asaande ley haayre, do fay gooto meedaali watteede.<sup>54</sup> Dum hawri e nannde lanndinal tawi nalaande fowteteende 6adike fuuddue.

<sup>55</sup> Rewbë wondunoobë e Iisaa gila Galili 6ee njokki e Yuusufu, njii yanaande ndee e no o wattiraa ley mayre,<sup>56</sup> kooti, moyyinoyi nebameeji uurooji.

Caggal dum, 6e powti nalaande fowteteende no yamiroore ndee wiiri nii.

## 24

### No Iisaa immintiniraa

1 Beetee law nannde alan, 6e pahi to yanaande too, tawi 6e naaborii nebameeji uurooji di 6e moyyinnoo dii. 2 Be tawi haayre ndee tallitaama, ittaama e damal yanaande ndee, 3kaa nde 6e naatunoor ndee, 6e tawaali ton tew Iisaa, Moobbo oo. 4 E ley no hakkille ma66e jirkitorii nii, worbë didon ndarri yeeso ma66e, ana foornii kaddule jalboojie. 5 Nii kulol nanngi 6e, 6e tuggi tiide ma66e e leydi. Oon wakkati worbë bee mbii 6e:

—Ko saabii so odon tewta guurdo hakkunde maaybë? 6 O walaa doo, o immitike. Miccitee ko o haalannoo on leydi Galili koo<sup>7</sup> nde o wii: «Ana tilsi Bii Neddo oo wadée e juude luuttooobë, tontee e leggal bardugal, immitoo nannde tataabere.»

8 Nii 6e miccitii haala Iisaa kaa. 9 Be iwi to yanaande too, 6e mbirfitii 6e kaalanoyi dum sappo e go'o bee e wobbe bee fuu. 10 Been rewbe ngoni: Mariyama mo Magdala e Yowanna e Mariyama inna Yaakuuba. Kambe e rewbe wondunoobë e ma66e bee kaalani dum nelaabe bee. 11 Nelaabe 6ee njogorii haala ma66e kaa yo meere, calii goondinde 6e, 12 kaa Piyeer immii, dogani yanaande ndee. Nde o yuurninoo ndee, kasanke oo tan o yi. Caggal dum, o hooti galle ma66e, o bemmabaado saabe ko wadi koo.

### No Iisaa 6anngirani taalibaabe mum didon dow laawol Emmayus

13 Eoon jaalooma jaati, didon e taalibaabe 6ee nanngi laawol wuro wiyyeteengo Emmayus. Hakkunde ngoon wuro e Urusaliima ana waara e kilooji sappo e go'o. 14 E6e ngaajodoo ko wadi koo fuu. 15 E ley gaajaate ma66e dee e6e ndokkondira hakkillaaji, nii Iisaa e hoore mum hewtii 6e, waddi e ma66e jaadal. 16 Kaa heedoode wadaa e gite ma66e pati 6e anndita mo. 17 O wii 6e:

—Kodum ngaajoto-don e laawol mon ngol?

Non 6e ndarri, terde ma66e mbaati. 18 Gooto e ma66e biyeteedo Kiliyopas jaabii mo, wii:

—Aan tan gooto woni kodo ley Urusaliima mo anndaa ko wadi e ley nalaadee dee koo naa?

19 O wii 6e:

—Kodum?

Be mbii mo:

—Ko wadi e Iisaa Nasaraatunke oo koo. O annabaajo, jom baawde ley haala makko e golle makko yeeso Laamdo e yimbe fuu. 20 Kaa hooreebë yottinoobë sadaka e mawbe men ngadi mo e juude laamu yalla omo jukkee jukkungo maayde, tonti mo e leggal bardugal. 21 Miden njikkunoo kanko soottitotoo Israa'iila. Hannde woni jaalooma tataab6o ko dum wadi. 22 Kasen, yoga e rewbe amen kaaynii min. Be njehi to yanaande too beetee law,<sup>23</sup> 6e tawaali ton tew makko, 6e ngarti, 6e mbii malaa'ika'en 6annganii 6e, mbii omo wuuuri. 24 Caggal dum, yoga e wondiibë amen njaabe to yanaande too 6ee, tawri no rewbe 6ee mbiiri nii, kaa kanko e hoore makko, 6e njyaali mo.

25 Oon wakkati Iisaa wii 6e:

—Hey onon famarëe hakkille! Booyii on ngoondinaali haala annabaabe!<sup>26</sup> Wanaa ana tilis Almasiihu torree, naata e teddungal mum naa?

27 Nden o famminii 6e ko Binndi dii fuu kaali haala makko, gila e Tawreeta Muusaa faa e dewte annabaabe 6ee.

28 Nde 6e paandii wuro ngo 6e immanii ngoo ndee, Iisaa wadi hono o anniido 6ettaade nii. 29 Nii 6e jaagii mo, 6e mbii:

—Heddoda e amen, sabi hiirii, jemma warii.

O jokki e ma66e, o jippanii 6e.<sup>30</sup> Nde 6e njoodinoo e6e naama ndee, o 6ami buuru, o yetti Laamdo, o helti buuru oo, o hokki 6e.<sup>31</sup> Non gite ma66e peerti, 6e annditi mo. Don e don o iwi e gite ma66e.<sup>32</sup> Gooto fuu darii ana wiya goddo:

—Nde o haaldata e men e laawol ngol omo fammina en Binndi dii ndee, wanaa 6erde men 6uu6ii naa?

33 Don e don, 6e immii 6e mbirfitii Urusaliima, 6e tawtoyi ton sappo e go'o 6ee e wondiibë mum'en ana kawriti. 34 Been mbii:

—Goonga, Kalfaado men lisaa wuurtii, o 6annganii Simon.

<sup>35</sup> Didon bee duu njantanii 6e ko wadunoo e laawol mum'en, e no annditiri mo nde o helti buuru ndee.

*No Iisaa banngirani taalibaabe mum sappo e go'o bee*

<sup>36</sup> Be tilaaki haalde, faa Iisaa e hoore mum darii hakkunde ma66e, wii 6e:

—Onon e jam!

<sup>37</sup> Be kuli, 6e demyii, 6e miili ko 6e njii koo yo mbeelu. <sup>38</sup> Non o wii 6e:

—Ko hulbinii on? Ko saabii so odon miila dii miilooji e ferde mon? <sup>39</sup> Yeewee juude am e koyde am, dum miin jaati. Memee kam, yeewon. Sabi mbeelu walaa tew, walaa gi'e no am ni.

<sup>40</sup> Nde o haalata dum ndee, o holli 6e juude makko e koyde makko. <sup>41</sup> Nde wonnood 6e ndonkii goondinde saabe seyo e kaayde, o wii 6e:

—Odon njogii doo ko jaametee naa?

<sup>42</sup> Be ngaddani mo tayre liingu cahaado, <sup>43</sup> o nanngi nde, o jaami yeeso ma66e.

<sup>44</sup> Caggal dum, o wii 6e:

—Ko Tawreeta Muusaa e dewte annabaabe e Jabuura cappii e am koo fuu, ana tilsi dum goonda. Dum jaati woni ko kaalannoo-mi on nde ngondunoo-mi e mon ndee.

<sup>45</sup> Oon wakkati, o udditi hakkillaaji ma66e, yalla e6e paama Binndi dii. <sup>46</sup> O wii 6e:

—Ana winndii Almasiihu oo torrete faa maaya, immitoto hakkunde maay6e jalooma tata6o. <sup>47</sup> Ana winndii kasen: saabe makko lepi dii fuu ooynante faa tuuba, ke6a yaafaamuya luutti. Dum ana fudda gila Urusalima. <sup>48</sup> Onon ngoni seettotoob6e kulle dee!

<sup>49</sup> Miin, mi neldan on ko Baabiraado am fodi koo fuu. Kaa keddee e ngallure ndee, faa nde baawde gondee dow dee njippii e mon fuu.

*No Iisaa njabbiniraa dow kammu*

<sup>50</sup> Iisaa na6i 6e faa hedde Baytaniya, hunci juude, duwanii 6e. <sup>51</sup> Do o duwantoo 6e doo, o seerti e ma66e, o njabbinaa dow kammu. <sup>52</sup> Be cujidani mo, caggal dum, 6e mbirfodii Urusalima e seyo manngo. <sup>53</sup> Wakkati fuu e6e tawee ley Suudu Dewal Mawndu nduu, e6e njetta Laamdo.

## Linjiila Iisaa Ngedu Yuhanna

### *No Konngol Laamdo laatorii nedđo*

<sup>1</sup> E puddoode biyeteedo Konngol ana woodi. Biyeteedo Konngol oo ana wondi e Laamdo, o Laamdo. <sup>2</sup> Omo wondi e Laamdo gila puddoode. <sup>3</sup> E makko Laamdo tagiri huunde fuu. Fay huunde e ko woodi koo, tagaaka so wanaa e makko. <sup>4</sup> E makko nguurndam woni, dam nguurndam laatanii yimbe fooyre. <sup>5</sup> Fooyre ndee ana yaayna ley nimre. Nimre ndee waawaa nifude nde.

<sup>6</sup> Wadiino e wakkati, Laamdo nelii nedđo biyeteedo Yaayaa. <sup>7</sup> O seedee gardo haalde haala ndeen fooyre oo, yalla yimbe fuu ana ngoondinira saabe haala makko kaa. <sup>8</sup> Wanaa kanko woni fooyre ndee, kaa o seedee gardo haalde haala mayre oo. <sup>9</sup> Kayre woni fooyre goongaraare warnde ley aduna faa yaaynana yimbe fuu.

<sup>10</sup> Biyeteedo Konngol oo ana ley aduna, kanko woni tagudo aduna oo, kaa aduna oo annditali mo. <sup>11</sup> Mo warii e lejol makko, kaa lejol makko jaabaaaki mo. <sup>12</sup> Kaa jaabiiñe mo so ngoondini mo 6ee, o hokkii dum'en baawde laataade 6ibbe Laamdo. <sup>13</sup> Been yo rimraabe ko wanaa muuyo terde, ko wanaa muuyo gorko, kambe 6e rimraabe iwrude to Laamdo.

<sup>14</sup> Konngol ngol laattii nedđo. Oon hodidi e meeden, o keewdo hinnee e goonga. Min njii teddeengal makko, teddeengal hono ngal Bajjo hebatu e baam mum.

<sup>15</sup> Yaayaa seettanike mo, eewnii, wii:

—Kanko woni mo kaalannoo-mi on haala mum oo, mbii-mi: «Caggal am ardiido kam waran, sabi omo woodi gila mi tagaaka.»

<sup>16</sup> No hinnee makko foti heewde, en fuu en ke6ii, hinnee dow hinnee. <sup>17</sup> Saabe Muusaa kebir-den Sariya, kaa hinnee e goonga saabe Iisaa Almasiihu hefiraa. <sup>18</sup> Fay gooto yiyaali Laamdo abada. Jonnoo, Biddo bajjo gondudo e Baabiraado oo, kajum humpiti en mo.

### *No Yaayaa waajorii*

<sup>19</sup> Yahuudiyankoo6e Urusaliima neli Lewinkoo6e \* e yottinoobe sadaka to Yaayaa lamndo kajum woni homo. <sup>20</sup> O jaabii 6e ko selli:

—Miin, mi wanaa Almasiihu.

<sup>21</sup> Be lamndii mo, 6e mbii:

—Aan, a homo? A annabi Iliyaasa naa?

O wii:

—Mi wanaa.

Be mbii:

—A Annabaajo oo naa?

O jaabii:

—Mi wanaa!

<sup>22</sup> Be mbii mo:

—A homo ndennoo? Haalan min ko min kaaltanoya nelube min 6ee. Ko njogori-daa hoore maa?

<sup>23</sup> O jaabii, o wii:

—Miin woni «ooynotoodo ley ladde jeereende so ana wiya: moyyintinee laawol Joomiraado»,<sup>†</sup> hono no annabi Esaaya wiiri nii.

<sup>24</sup> Nelaabe 6ee to Farisa'en iwrri. <sup>25</sup> Be lamndii mo:

—Ko saabii so ada loota yimbe lootogal batisima, tawi a wanaa Almasiihu a wanaa Iliyaasa a wanaa Annabaajo oo?

<sup>26</sup> Yaayaa jaabii 6e, wii:

—Miin, mido batisira ndiyam, kaa won dariido hakkunde mon mo on anndaa. <sup>27</sup> Kanko, o waran caggal am. Miin, mi fotaa fay e humtude foggi paade makko.

<sup>28</sup> Dum wadii Baytaniya ootoo bannge maayo Urdun, do Yaayaa batisanloo doo.

<sup>29</sup> Janngo mum, Yaayaa yii Iisaa ana wara e mum, wii:

—Anii, njawdiri Laamdo ndoondotoondi luutti aduna. <sup>30</sup> Dum woni ko mbiinoo-mi e makko: «Nedđo waran caggal am, ardiido kam, sabi omo woodi gila mi tagaaka.» <sup>31</sup> Miin, mi anndaano mo, kaa mi warii mido batisira ndiyam yalla omo 6anngana Israa'iilankoo6e.

<sup>32</sup> Yaayaa seetti, wii:

—Mi yii Ruuhu hono wuugaandu ana jippoo iwde dow kammu faa hodi dow makko.

<sup>33</sup> Miin, mi anndaano mo. Kaa neldo kam mi batisira ndiyam oo, kajum wii kam: «Oon

\* **1:19** Yimbe lejol Lewi ngonnoo humaniiñe golle dewal Laamdo gila e jamaanu Muusaa. † **1:23** Esaaya 40.3

mo njiyataa Ruuhu ana jippoo dow mum oo, kajum woni batisiroowo Ruuhu Ceniido.»  
 34 Miin, mi yi, mi seettike kanko woni Bii Laamdo.

*No Iisaa suborii taalibaaše mum aranndeeše*

35 Janngo mum kasen Yaayaa ana dardii e taalibaaše mum didon. 36 O yii Iisaa ana 6ettoo, o wii:

—Annii, njawdiri Laamdo!

37 Taalibaaše didon 6ee nani ko o haali koo, njokkitii Iisaa. 38 Iisaa yeccitii, yii e6e njokki e mum, wii 6e:

—Kodum tewtaton?

Be njaabii, 6e mbii:

—Rabbii (dum woni «Moobbo»), hoto njoodoto-daa?

39 O wii 6e:

—Ngaree yeewee!

Nden 6e ngari, 6e njii do o joodotoo doo. Be ngondi e makko oon jalooma. Dum wadii wakkati kiikiide.

40 Andire mijii Simon Piyeer oo yo gooto e didon nan6e haala Yaayaa so njokkitii Iisaa 6ee. 41 Mawniiko Simon o adii fuu hawrude, o wii dum:

—Min njii Almasiihu.

(Dum woni Cu6aadö.)

42 O na6i dum to Iisaa. Iisaa yeewi Simon, wii dum:

—Aan, Simon 6ii Yuhanna mbiyete-daa, caggal jooni a innditirte Kefas.

(Kefas e Piyeer fuu gootum. Maanaa majjum yo haayre.)

43 Janngo mum, Iisaa anniyii yaade Galili. O hawri e Filipa, o wii dum:

—Jokkam!

44 Filipa ana jeyaa Baytisayda, ngalluure nde Andire e Piyeer fuu njeyaa e mum ndee. 45 Filipa hawri e Natanayel, wii dum:

—Min tawii mo haala mum winndaa ley Tawreeta Muusaa e ley dewte annabaabe oo. O Iisaa Nasaraatunke 6ii Yuusufu oo.

46 Natanayel wii mo:

—Ko moyyi ana waawi iwrude Nasaraatu naa?

Filipa jaabii mo:

—War yeew!

47 Iisaa yii Natanayel ana feewi dum, wii:

—Oo yo Israa'iilanke jaati, kutee fuu walaa e makko.

48 Natanayel wii mo:

—Hoto anndu-daa kam?

Iisaa jaabii mo, wii:

—Mi yii ma ley ibbi gila Filipa noddaali ma.

49 Natanayel jaabii, wii:

—Moobbo, a Bii Laamdo, a kaananke Israa'iila.

50 Iisaa jaabii mo, wii:

—Saabe mi wii mi yii ma ley ibbi koo tan ngoondinir-daa naa? A yiyan ko 6uri dum haaynaade.

51 Nden o wii Natanayel:

—Mido haalana on goonga: on njiyian kammu ana udditoo, on njiyian malaa'ika'en Laamdo ana njabba ana njippoo dow Bii Neddo.

## 2

*No Iisaa wadiri haaynde ley kuurtungu*

1 Balde didi caggal mum, kuurtungu wadi ley ngalluure wiyyeteende Kaana ley leydi Galili. Inna Iisaa ana tawanoo ton. 2 Iisaa e taalibaaše mum duu noddaama ngara kawra e kuurtungu oo. 3 Nde peguujam ma6be timmunoo ndee, inna Iisaa wii:

—Be ngalaa peguujam.

4 Iisaa jaabii mo, wii:

—Tama aan haalanta kam ko kaan-mi wafude? Wakkati am yonaali tafon.

5 Inniiko wii golloo6e 6ee:

—Ko o yamiri on fuu, ngadon.

6 Kaaye jeegom, asiide faa laatii hono pakaaje mawde do Yahuudiyankee lootetee faa lab6inee banngal diina, ana ngonnoo ton. Honde fuu ana naanna bulki sappo ndiyam.

7 Iisaa wii 6e:

—Kebbinee pakaaje dee ndiyam.

Be kebbini de faa de keewi.<sup>8</sup> O wii 6e:

—Jooni kaa, nedee naabanee hooreejo kuurtungoo.

Be nabi.<sup>9</sup> Nde hooreejo oo meedunoo ndiyam mbaylitaad dam peguujam dam ndee, annditaali to dam ittaa. Kaa gollooobe nedube ndiyam dam bee ana anndi. O noddi jommbaajo gorko oo,<sup>10</sup> o wii dum:

—Yimbe fuu peguujam mbeldam mboowii adoraade. Nde yimbe cigirii, nden dam welaa dam yaretee. Kaa aan, ada resi mbeldam dam faa jooni.

<sup>11</sup> Nii Isaa golliri haaynde mum aranndeere ley ngallure Kaana ley leydi Galili. O ganngini baawde makko, taalibaabe makko see ngoondini mo.<sup>12</sup> Caggal dum, o iwi Kaana, o yehi ngallure wiyyeteende Kafarnahum, kanko e inniiko e mijiraabe makko e taalibaabe makko. Be paabbi ton balde seeda.

### No Isaa ribbir jaagotoobe ley Suudu Dewal Mawndu

<sup>13</sup> Nde iidi Yahuudiyankoobe biyeteedo Paska oo badinoo ndee, Isaa nabbi Urusaliima.

<sup>14</sup> O tawi ley daalaare Suudu Dewal Mawndu nduu julaabe ga'i e baali e soottoobe buugaaji, kajum e weoccoobe kaalisi ana njoodii.<sup>15</sup> O nanngi foggi, o sowi, o ribbi 6e fuu 6e njalta Suudu Dewal Mawndu nduu, kambe e ga'i maabbe e baali maabbe. O sankiti kaalisi weoccoobe, o hippi taabe maabbe.<sup>16</sup> O wii soottoobe buugaaji 6ee:

—Ittee dum doo, pati ngadfee suudu Baabiraado am nduu soottirdu.

<sup>17</sup> Taalibaabe makko 6ee miccitii ko Binndi dii mbii koo:

«Jilli suudu maa laatanike kam sugulla.»\*

<sup>18</sup> Nden hooreebe Yahuudiyankoobe mbii mo:

—Haaynde honde kollataa min ada foti waafude ko ngad-daa koo?

<sup>19</sup> Isaa jaabii 6e, wii:

—Ngurjinee Suudu Dewal nduu. So on ngurjinii ndu, on njijan mido mahitoo ndu ley balde tati.

<sup>20</sup> Be njaabii mo:

—Nduu suudu mahiraama duubi capande nay e jeegom. Dee aan, a mahitoto ndu ley balde tati naa?

<sup>21</sup> Kaa Isaa hooree mum wappiri suudu nduu.<sup>22</sup> Nde Isaa wuurtunoo ndee, taalibaabe mum 6ee miccitii o haaliino dum. Be ngoondini ko Binndi dii mbii koo e konngol o haalnoo ngol.

<sup>23</sup> Nde Isaa faaboynoo Urusaliima iidi Paska ndee, heewbe ngoondini mo saabe njii kaayde de o wadi dee.<sup>24</sup> Kaa Isaa hoolaaki 6e faa hokkita 6e hooree mum, sabi omo anndi 6e fuu.<sup>25</sup> O hasindinaa fay gooto seettanoo mo ko woni e yimbe, nde wonnou omo humpitii ko woni e 6ii-aadama.

## 3

### No Isaa haaldiri e Nikodemus

<sup>1</sup> Won gorko Farisanke biyeteedo Nikodemus, gooto e hooreebe Yahuudiyankoobe.<sup>2</sup> Oon gorko yehi to Isaa jemma, wii dum:

—Moobbo, minden anndi a jannginoowo iwrudo to Laamdo, sabi fay gooto waawaa waafude hono kaayde de ngadataa dee so Laamdo wondaa e mum.

<sup>3</sup> Isaa jaabii mo, wii:

—Mido haalane goonga: fay gooto waawaa yiide Laamu Laamdo tawee rimtaaka kasen.

<sup>4</sup> Nikodemus wii mo:

—Hono mawdo waawiri rimtireede? Omo waawi naattude e reedu inniiko, o rimtee kasen naa?

<sup>5</sup> Isaa jaabii:

—Mido haalane goonga: so wanaa neddo rimtiree ndiyam e Ruuhu so heba naatude e Laamu Laamdo.<sup>6</sup> Ko 6ii-aadama rimata koo yo 6ii-aadama. Ko Ruuhu oo rimata koo yo ruuhu.<sup>7</sup> Pati dum haayne saabe mi wii ma kinaa ndimte-don kasen.<sup>8</sup> Henndu ana wibba do muuyiri fuu. Ada nana dillere mayru, kaa a anndaa to ndu iwri, a anndaa to ndu yahata. Hono non oon dimraado Ruuhu oo worri.

<sup>9</sup> Nikodemus wii mo:

—Hono hen dum laatortoo?

<sup>10</sup> Isaa jaabii mo:

—Aan, jannginoowo ley Israa'iila oo fuu, a anndaa dum naa?<sup>11</sup> Mido haalane goonga: minen, ko min anndi min kaalata, ko min njii min ceettotoo, kaa onon, on njabataa seedaaku amen.<sup>12</sup> On ngoondinaali nde kaalan-mi on haala kulle leydi ndee. Hono ngoondinirton so mi haalanii on haala kulle dow kammu?<sup>13</sup> Fay gooto njabbaali dow

\* 2:17 Jabuura 69.10

kammu, so wanaa oon iwrudo dow kammu oo, dum woni Bii Neddo.<sup>14</sup> Hono no Muusaa toowniri mboddi jakawalle ley ladde jeereende nii, so wanaa Bii Neddo oo duu toowniree hono non,<sup>15</sup> yalla goondindo mo fuu ana he&a ngeurndam nduumiidam.

<sup>16</sup> Sabi Laamdo 6amii ana yida aduna oo faa hokkitiri Biyum bajjo, yalla goondindo Bajjo oo fuu ana waasa naatude yiite, he&a ngeurndam nduumiidam.

<sup>17</sup> Laamdo neliraali Biyum oo e aduna faa Biyum oo saroo aduna oo. Ko mo neliraaldee, faa aduna oo hisira saabe makko.<sup>18</sup> Goondindo mo fuu sarataake. Mo goondinaali fuu tilike sareede, sabi goondinaali Bii Laamdo bajjo oo.

<sup>19</sup> Sariya oo annii: fooyre warii e aduna, kaa yimbe, nimre cu&ii dow fooyre saabe golleeji mum'en bondi.<sup>20</sup> Bondo tagu yidaa fooyre, warataa e mayre, hulde pati golleeji mum bondi ganngu.<sup>21</sup> Kaa goongirante waran e fooyre yalla golleeji di wadiri saabe Laamdo dii ana gannga.

#### *No Yaayaa seettoriik kabaaru Iisaa*

<sup>22</sup> Caggal mum, Iisaa yaadi e taalibaabe mum leydi Yahuudiya. O fabbidi e maabbe ton, omo loota yimbe lootagal batisima.<sup>23</sup> Yaayaa duu ana batisa to Aynon too bannge Salim, sabi cewle ana keewi ton. Yimbe ana ngara ana mbatisee.<sup>24</sup> Tawi Yaayaa nannganooka tafon.

<sup>25</sup> Taalibaabe Yaayaa bee njeddondiri e Yahuudiyanke haala laa&al. <sup>26</sup> Be njehi to Yaayaa, ee mbii dum:

—Moobbo, gorko gondunoodo e maa ootoo bannge maayo Urdun mo ceettani-daa oo, kanko duu omo batisa, yimbe fuu ana njaha to makko.

<sup>27</sup> Yaayaa jaabii fe, wii:

—Neddo waawaa he&b#252;de fay huunde so wanaa ko Laamdo hokki dum.<sup>28</sup> Onon e ko'e mon, on seeedee'en am mi wii mi wanaa Almasiihu, kaa mido adii mo neleede.

<sup>29</sup> Gaddanaado jommbaajo debbo, kajum woni jommbaajo gorko. Dammbidii&do gorko oo ana darii, ana hettindii. So o nanii daande jommbaajo gorko oo, o seyoto sanne. Nii seyo am ngoo hi&66;iri.<sup>30</sup> So wanaa kanko o toowa, so miin mi leyda.

<sup>31</sup> Oon iwrudo dow, kajum tiimti yimbe fuu. Iwdo e leydi yo leydinke. Haalaaji mum duu yo haalaaji leydinkooji. Oon iwrudo dow kammu, kajum tiimti yimbe fuu.<sup>32</sup> Ko o yii e ko o nani o seettoo, kaa fay gooto jaabataa seedaaku makko.<sup>33</sup> Oon jaabudo seedaaku makko, sellinii Laamdo yo goongirante.<sup>34</sup> Oon mo Laamdo neli, ko Laamdo haali haaltada, sabi Laamdo hokkii mo Ruuhu mo walaa do haadi.<sup>35</sup> Baabiraado oo ana yidi Biddo oo faa wadi huunde fuu e junngo makko.<sup>36</sup> Goondindo Biddo oo, he&b#252;ii ngeurndam nduumiidam. Mo goondinaali Biddo oo, he&b#252;ataa dam, tikkere Laamdo duu ana woodani dum.

## 4

#### *No Iisaa haaldiri e Samariyanke debbo*

<sup>1</sup> Farisa'en nanii wiyaama lisaa ana loota lootagal batisima ana heba taalibaabe faa 6uri Yaayaa.<sup>2</sup> Tawi Iisaa e hoore mum kaa batasaali fay goto. Taalibaabe makko bee tan mbatisanno.<sup>3</sup> Nde Iisaa nannoo ko haalanoo e mum koo ndee, iwi leydi Yahuudiya, wiriftii leydi Galili,<sup>4</sup> kinaa o seeka leydi Samariya.<sup>5</sup> O wari e ngalluure Samariya wiyyeteende Sikar bannge ngesa nga Yaakuuba hokkunoo Biyum Yuusufu ngaa.<sup>6</sup> Don 6unndu Yaakuuba nduu woni. Iisaa joodii daande 6unndu nduu faa &ojottinoo. Dum forrii e wakkati hakkunde naange.<sup>7</sup> Samariyanke debbo wari yoogude. Iisaa wii mo:

—Hokkam ndiyam, mi yara no!

<sup>8</sup> Tawi taalibaabe makko bee njehii to ngeenndi too soodoyde jaamdu.<sup>9</sup> Debbo oo wii Iisaa:

—Haa! Hono aan, Yahuudiyanke, jaagorto-daa kam miin, Samariyanke, ndiyam njaraa?  
(Sabi Yahuudiyan&oo&e e Samariyan&oo&e yo harmondir&ee.)

<sup>10</sup> Iisaa jaabii mo:

—Sinndo afa anndunoo no dokke Laamdo poti e oon biido ma ndokkaa dum ndiyam yara oo, a jaagotonoo mo, o hokke ndiyam ngeurndam njaraa.

<sup>11</sup> Debbo oo wii mo:

—Gido, a walaa cafirgal. Bunndu nduu ana luggidi. Hoto ke&b#252;tataa dam ndiyam ngeurndam?<sup>12</sup> Aan, ada 6uri njaatigi amen Yaakuuba dokkudo min 6unndu nduu oo teddude naa? Kanko e 6il&be makko e daabaaji makko fuu, bee njarii e mayru.

<sup>13</sup> Iisaa jaabii mo:

—Neddo fuu jardo dam ndiyam domdan kasen,<sup>14</sup> kaa jardo ndiyam dam ndokkan-mi dum dam fuu, domdataa abada. Sabi ndiyam ndokkan-mi dum dam laatanto dum ndiyam iloojam ngeurnoojam dum ngeurndam nduumiidam.

<sup>15</sup> Debbo oo wii:

—Gido, hokkam dam ndiyam pati mi domda kasen, sako mi warta yoogude doo kasen.

<sup>16</sup> Iisaa wii mo:

—Yaa noddoy jom suudu maa, ngardon!

<sup>17</sup> Debbo oo jaabii mo:

—Mi walaa jom suudu.

Iisaa wii mo:

—A haalii goonga ko mbii-daa a walaa jom suudu koo. <sup>18</sup> A 6amanooma worōe njoyon. Gorko ngonduu-daa jooni oo duu, wanaa jom suudu maa. A haalii goonga.

<sup>19</sup> Debbo oo wii mo:

—Moobbo, laabani kam a annabaajo. <sup>20</sup> Njaatiraabe amen ndewii Laamdo e ndee waamnde haayre, kaa onon Yahuudiyankooōe, odon mbiya to Urusaliima too Laamdo haani reweede.

<sup>21</sup> Iisaa wii mo:

—Banndam debbo, jaāu ko kaalanan-maa-mi koo: wakkati waran, mo ndewaton Baabiraado tawee wanaa e ndee waamnde haayre, wanaa e Urusaliima. <sup>22</sup> Onon Samariyankooōe, odon ndewa ko on anndaa, kaa minen Yahuudiyankooōe, ko min anndi min ndewata, sabi kisindam to Yahuudiyankooōe iwrata. <sup>23</sup> Wakkati ana wara, mo yottike jaati, nde rewiroōe Laamdo goonga 6ee ndewirta dūm Ruuhu e goonga. Hono 6ee rewoōe Baabiraado ndaarti. <sup>24</sup> Laamdo yo Ruuhu. Rewoōe mo fee kinaa ndewira mo ruuhu e goonga.

<sup>25</sup> Debbo oo wii:

—Mido anndi Cuubaado biyeteedo Almasiihu oo yo garoowo. Nde o warii, o humpitan min kulle fuu.

<sup>26</sup> Iisaa wii mo:

—Miin kaaldoowo e maa oo woni kanko.

*No Samariyankooōe heewōe ngoondiniri Iisaa*

<sup>27</sup> E dow dūm taalibaabe makko 6ee njottii. Ko Iisaa haaldata e debbo oo koo haaynii 6e, kaa fay gooto e maābe wiyaali dūm: «Ko ndaartataa? Ko kaaldataa e makko?» <sup>28</sup> Nden debbo oo yoppi mbulku mum ton, wirfitii ngeenndi haalanoyi yim6e, wii:

<sup>29</sup> —Ngaree yeewee gorko kaaltando kam ko ngannoo-mi fuu annii, yalla wanaa kanko woni Almasiihu?

<sup>30</sup> Be njehi yeewoyde mo.

<sup>31</sup> Oon wakkati, taalibaabe 6ee ndaardi mo, ana mbiya:

—Moobbo, tiinna jaamu!

<sup>32</sup> O jaabii 6e:

—Mido jogii ko mi jaama ko on anndaa.

<sup>33</sup> Taalibaabe 6ee ana lamndondira:

—Dum nee, won gaddando mo ko jaametee naa?

<sup>34</sup> Iisaa wii 6e:

—Naamdu am yo wadude sago neldo kam oo e timminde golle makko. <sup>35</sup> Onon, odon mbiya: «Faa hannde lebbi nay so kettal wara.» Kaa miin, mido wiya on: tippee gite mon, yeewee gese dee fuu 6enndii, de njonii hetteede. <sup>36</sup> Kettudo he6an ngeenaari, moo6tana namri ndii nguurndam nduumiidam, yalla aawudo e kettudo ana ceyodoo. <sup>37</sup> Dum tabintinta banndol biyoowol: «Gooto ana aawa, godfø ana hetta.» <sup>38</sup> Mi nelii on kettoyon naga on tampanala. Wo6be tampi. Onon, on ndaamitike e tamperc maābe.

<sup>39</sup> Samariyankooōe heewōe ley ndee ngallure ngoondiniri Iisaa saabe haala debbo ceettiido so wii: «O haaltanii kam ko ngadunoo-mi fuu.» <sup>40</sup> Nde Samariyankooōe 6ee njottinoo Iisaa ndee, ndaardi mo o fa6bana dūm'en. O wadi dōn balde didi. <sup>41</sup> Yim6e heewōe ngoondini mo kasen faa 6uri no arannde nii saabe konngol makko ngol. <sup>42</sup> Be mbii debbo oo:

—Jooni, wanaa saabe haalaaji maa dii tan min ngoondiniri. Ko min ngoondiniri dee, minen e ko'e amen, min nanii konngol makko, min anndi kanko jaati woni kisinoowo aduna oo.

*No Iisaa selliniri 6ii howruujo kaananke*

<sup>43</sup> Caggal balde didi dee, o iwi ton, o yehi Galili. <sup>44</sup> Kanko e hoore makko o seettinoke: «Annabaajo teddintaaake e ley suudu baam mum.» <sup>45</sup> Nde o yottinoo Galili ndee, Galilinkooōe njab6forii mo juude didi, sabi kam6e duu 6e njehiino iidi Urusaliima, 6e njiimo ko o gollunoo ley iidi oo koo.

<sup>46</sup> Nden Iisaa warti Kaana ley leydi Galili, dō mo waylitinnoo ndiyam o wadi dam peguujam doo. Howruujo kaananke mo 6iyum sellaa ana ley Kafarnahum. <sup>47</sup> Nde

howruujo oo nannoo Iisaa iwrii Yahuudiya wartii Galili ndee, yehi to Iisaa, ndaardi dum jippoo sellinoya 6iyiko kabanoowo yonki.<sup>48</sup> Iisaa wii mo:

—So on kebaali finnde, on njiyaali kaayde, on ngoondintaa.

<sup>49</sup> Howruujo kaananke oo wii mo:

—Moobbo, njehen gila 6iyam oo maayaali.

<sup>50</sup> Iisaa wii mo:

—Hootu, 6iya oo sellii.

Gorko oo goondini ko Iisaa wii dum koo, hooti.<sup>51</sup> Golloo6e makko kawriti e makko e laawol, kumpiti mo, mbii:

—Biya oo dadii.

<sup>52</sup> O lamndii 6e wakkati homo suka o samtanaa. Be mbii mo:

—Sallifanaa keejen jonte dee njoppiti mo.

<sup>53</sup> Baaba suka oo annditi oon wakkati jaati Iisaa wiinoo dum: «Biya oo sellii!» Nii kanko e koreeji makko fuu 6e ngoondiniri Iisaa.<sup>54</sup> Dum woni haaynde diidabere nde Iisaa golli kasen leydi Galili nde iwnoo Yahuudiya.

## 5

### No Iisaa selliniri bonnguijo

<sup>1</sup> Caggal majjum, iidi Yahuudiyancho6e ana wada. Iisaa nabboyi Urusaliima.<sup>2</sup> To Urusaliima too, bannge dammbugal biyeteengal Dammbugal Baali ngal, luggal ndiyam ana ton. Engal wiye Baytijata e ibaraninkoore. Dande joy ana pilii ngal.<sup>3</sup> Nawbe heewbe ana lelii ley deen dande: wumbe e wooybe e be terde mum'en fuu mbaati. [4\*]<sup>5</sup> Gorko jawdo duusi capantati e jetti ana wonnoo don.<sup>6</sup> Iisaa yii omo lelii, anndi o booydii e naw, lamndii mo:

—Ada yidi sellude naa?

<sup>7</sup> Nawdo oo jaabii mo, wii:

—Moobbo, mi walaa fay gooto balloovo kam regaade e luggal ngal nde ndiyam dam jirkitike. Do mbiyan-mi mi regike fuu, a tawan won adiido kam jolde.

<sup>8</sup> Iisaa wii mo:

—Imma, 6amtu daddo maa, yaa!

<sup>9</sup> Don e don gorko oo sellii, 6amti daddo mum fudditi yaade.

Dum hawrii e jalaande fowteteende,<sup>10</sup> saabe majjum hooree6e Yahuudiyancho6e mbii cellinaado oo:

—Hannde yo jalaande fowteteende, dagantaako ma ndoondo-daa daddo maa.

<sup>11</sup> O jaabii 6e:

—Cellindo kam oo, kajum wii kam: «Bamtu daddo maa, yaa!»

<sup>12</sup> Be lamndii mo:

—Homo woni oo neddo biido ma 6amtu daddo maa, yaa?

<sup>13</sup> Kaa cellinaado oo anndaano mo, sabi Iisaa iwii don sabi yimbe ana keewnoo e oon nokku.<sup>14</sup> Caggal dum, Iisaa hawriti e makko ley Suudu Dewal Mawndu nduu, wii mo:

—Yeew, jooni kaa, a sellii, pati luuttu kasen so ko 6uri dum bonde hebe.

<sup>15</sup> Gorko oo yehi haalanoyi hooree6e Yahuudiyancho6e 6ee Iisaa woni cellindo dum oo.

### Kabaaru Baabiraado oo e Bidde oo

<sup>16</sup> Nden hooree6e Yahuudiyancho6e puddy torrude Iisaa sabi o wadii dum e jalaande fowteteende.<sup>17</sup> Iisaa wii 6e:

—Baabiraado am ana golla faa jooni, miin duu, mido golla.

<sup>18</sup> Nden hooree6e Yahuudiyancho6e 6eydi tewtude warde mo, wanaa saabe ko o bonnii jalaande fowteteende ndee koo tan, ko o wii kasen Laamdo yo baam makko koo. O fonndii hoore makko e Laamdo.

<sup>19</sup> Iisaa wii 6e:

—Mido haalana on goonga: Bidde waawaa gollude fay huunde kajum tan, kinaa ko yii Baabiraado ana golla. Sabi ko Baabiraado oo gollata koo, dum Bidde oo duu gollata.

<sup>20</sup> Sabi Baabiraado oo ana yidi Bidde oo, ana holla dum huunde fuu ko gollata. O hollan dum golleeji bursi dii doo fuu teentilaade faa kaayne-don.<sup>21</sup> Sabi hono no Baabiraado oo immintinirta maaybe so hokka dum'en nguurndam nii, non Bidde oo duu hokkirta nguurndam mo muuyi hokkude.<sup>22</sup> Baabiraado oo, kajum kaa sarataa fay gooto, o wadii sariya kaa fuu e junngo Bidde oo,<sup>23</sup> yalla yimbe fuu ana teddinira Bidde oo hono no

\* <sup>5:4</sup> E dereeji 6ooydi dii, yoga ana 6eyda aaya 4:E6e ndoomi faa ndiyam dam jirkitoo, sabi malaa'ika Joomiraado ana jippoo e luggal ngal saatu e saatu ana jirkita ndiyam dam. Nawdo adiido fuu regaade e ndiyam dam nde dam jirkittii ndee, sellan ko naw mum oo tawaa fuu.

teddiniri Baabiraado oo nii. Neddo fuu mo teddinaali Biddo oo, teddinaali Baabiraado neldo mo oo.

<sup>24</sup> Mido haalana on goonga: nando haala am so goondini neldo kam oo hepii nguurndam nduumiidam. Mo sarataake, mo diwii maayde, mo naatii e nguurndam. <sup>25</sup> Mido haalana on goonga: wakkati ana wara, o yottike jaati, wakkati mo maaybe nanata daande Bii Laamdo oo. Nanbe bee nguuran. <sup>26</sup> Hono no Baabiraado oo wuuri e hoore mum nii, hono non o hokkiri Biddo oo duu baawde wuuri e hoore mum. <sup>27</sup> O hokkii oon baawde sarde, sabi oon yo Bii Neddo. <sup>28</sup> Pati dum haayno on. Wakkati waran mo maaybe wonbe ley janaale fuu nanata daande makkoo, <sup>29</sup> njalta. Gollube golleeji lobbi immitanoo nguurndam, gollube golleeji bondi immitanoo sariya. <sup>30</sup> Miin, walaa fuu ko mbaaw-mi gollirde hiini hoore am. Ko nanu-mi koo cariran-mi. Sariya am ana dartii, sabi mi jokkataa sago am, sago neldo kam oo njokku-mi.

#### No Laamdo seettirantoo Isaa

<sup>31</sup> So mi seettanike hoore am, seedaaku am sellataa. <sup>32</sup> Won goddo ceettantoodo kam. Mido anndi seedaaku mo seettantoo kam oo yo goonga. <sup>33</sup> Onon, on nelii e Yaayaa, o seettike goonga. <sup>34</sup> Miin, mi hasindinnaa e seedaaku bii-aadama, walaa ko mbiiru-mi seedaaku Yaayaa oo so wanaa faa kison. <sup>35</sup> Yaayaa laatikae lampaa ku66oowa, njaaynoowa. On njaabii weltaade wakkati gooto e fooyre makko. <sup>36</sup> Miin, mido jogii seedaaku burdo mo Yaayaa oo teentilaade: golleeji di Baabiraado yamiri kam mi golla dii, kajum jaati ceettantoo kam Baabiraado neli kam. <sup>37</sup> Kasen duu, Baabiraado neldo kam oo hoore seettantoo kam. Abada on nanaali daande makkoo, abada on rjyaali mo, <sup>38</sup> haala makko deembilaaki e mon, sabi on ngoondinaali mo o neli oo. <sup>39</sup> Odon mbiditoo Binndi dii sabi on milli on kefan e majji nguurndam nduumiidam. Kanji jaati ceettantoo kam. <sup>40</sup> Kaa on njaabaali warde e am faa kebon nguurndam.

<sup>41</sup> Wanaa teddeengal yimbe tewtan-mi. <sup>42</sup> Kaa miin, mido anndi on, mido anndi jilli Laamdo ngalaa e mon. <sup>43</sup> Miin, mi wardii saabe Baabiraado am, on njaabbaki kam. Kaa so goddo wardii saabe hoore mum, on njaabboto dum. <sup>44</sup> Odon tottontdira teddeengal, on tewtataa teddeengal iwrungal to Laamdo gooto, hono mbaawru-don goondinirde? <sup>45</sup> Pati miilee miin wullantoo on to Baabiraado. Muusaa, mo pawu-don jikke mon dow mum oo, kajum wullantoo on. <sup>46</sup> So nii on ngoondinaa Muusaa, on ngoondinanno kam miin duu, sabi miin o sappino e binndi makko. <sup>47</sup> Kaa so on ngoondinaali ko o winndi koo, hono ngoondinirton haala am?

## 6

#### No Isaa jammminiri ujunaaji joy gorko

<sup>1</sup> Caggal dum, Isaa lummbi weendu Galili, wiyyeteendu Tiberiyas. <sup>2</sup> Jamaa keewdo ana jokki e makko sabi ee njii kaaaye de o waafunoo nde o sellinnoo jaawbe bee ndee. <sup>3</sup> Isaa njabbi dow waamnde haayre, jooddii ton e taalibaabe mum. <sup>4</sup> Tawi iidi Yahuudiyankoobe biyeteedo Paska oo 6adike. <sup>5</sup> Isaa hunci hoore, soyntii jamaa keewdo ana fa'i dum. O wii Filipa:

—Hoto coodaten jaamdu ko jamminta bee fuu?

<sup>6</sup> Tawi o biirudo non tan faa o nana ko Filipa jaabotoo, sabi omo anndi ko o faandii gollude. <sup>7</sup> Filipa jaabii mo:

—Buuru teemedi didi cardi heyataa ee faa gooto e maabbe fuu hefa hen seeda.

<sup>8</sup> Taalibbo makko goddo, biyeteedo Andire mijii Simon Piyeer, wii mo:

<sup>9</sup> —Annii, suka gorko gooto ana jogii buuruuje joy e lidfi didi, kodum dum nafirta yimbe heewbe hono bee?

<sup>10</sup> Isaa wii:

—Mbiyee ee njoodoo!

Nde wonnoodo nokku oo ana heewi hufo, ee njoodii. Ebe poti e ujunaaji joy gorko. <sup>11</sup> Isaa 6ami buuruuje dee, yetti Laamdo, hokki taalibaabe bee. Been ndokki joodiibe bee. Hono non lidfi dii duu. Gooto fuu heeo ko haajaa. <sup>12</sup> Nde ee kaarnoo ndee, Isaa wii taalibaabe mum:

—Ndeentinee kedde dee pati fay huunde mursee.

<sup>13</sup> Be kawrini kedde taye buuruuje joy de jaamnoobe bee keddi dee, de kebbini cagijje sappo e didi. <sup>14</sup> Nde yimbe bee njinoo haaynde nde Isaa golli ndee, mbii:

—Kanko jaati woni Annabaajo cappanoodo ana wara e aduna oo.

<sup>15</sup> Nde Isaa annditinnoo ee njarroo nanngirde dum junngo ee ngada dum kaananke ndee, iwi don njabbi do waamnde haayre kajum tan.

#### No Isaa yaariri koyde dow ndiyam

<sup>16</sup> Nde hiirnoo ndee, taalibaabe Iisaa bee ndegii e weendu nduu. <sup>17</sup> Be naati laana faa 6e lummba, yaade Kafarnahum. Jemma naatii, tawi Iisaa hewtaaki 6e. <sup>18</sup> Henndu mawndu ana wibba, bempeeje immike. <sup>19</sup> Be ngurfi laana kaa faa 6e kebi hono kilooji joy naa jeegom. Nden 6e coynii Iisaa ana warda koyde dow weendu nduu, ana fewti 6e. Be kuli.

<sup>20</sup> Iisaa wii 6e:

—Dum miin. Pati kulee!

<sup>21</sup> Be ndaardi mo o naata laana kaa. Don e don 6e panndi do 6e pa'unoo doo.

<sup>22</sup> Janngo mum, jamaa keddinoodo oo too bannge weendu nduu oo ana annduno laana ngoroota tan wonnoo ton. Be njii Iisaa naatidaali e taalibaabe mum laana kaa. Be njii duu taalibaabe 6ee tan ngonnoro e makka, ndeerti, mbitti. <sup>23</sup> Laanaaji iwrudi Tiberiyas ngarii bannge do Iisaa yettunoo Laamdo so 6e jaami buuru doo. <sup>24</sup> Nde jamaa oo yiino Iisaa e taalibaabe mum fuu ngalaa don ndee, naati laanaaji dii, peewti Kafarnahum tewtoye Iisaa.

*No Iisaa wiiri kapum woni jaamdu wuurnooru*

<sup>25</sup> Nde 6e tawnoo Iisaa oo too bannge weendu nduu ndee, 6e mbii dum:

—Moobbo, mande ngar-daa doo?

<sup>26</sup> Iisaa jaabii 6e:

—Mido haalana on goonga: wanaa saabe on njii kaayde tewtirton kam. Ko tewtirton kam dee, saabe on jaamii buuru on kaarii. <sup>27</sup> Pati tampanee jaamdu murseteendu. Ko kaandon tampande dee, jaamdu heddotoondu wuurnoru yimbe nguurndam nduumiidam. Nduun jaamdu Bii Neddo hokkata on. Sabi Laamdo Baabiraado oo wadii maande mum e makko.

<sup>28</sup> Nden 6e lamndii mo:

—Kodum min ngadata faa min ngolla golleeji di Laamdo yidi?

<sup>29</sup> Iisaa jaabii 6e:

—Golle mo Laamdo yidi oo woni ngoondinon mo o neli oo.

<sup>30</sup> Be njaabii mo:

—Haaynde honde ngadataa faa min njiya, min ngoondine? Kodum ngollataa?

<sup>31</sup> Njaatiraabe amen jaamii jaamdu wiyyeteendu «maanu» ley ladde jeereende, hono no winndiraa nii: «o hokkii 6e jaamdu iwrundu dow kammu faa 6e jaama.»\*

<sup>32</sup> Iisaa jaabii 6e:

—Mido haalana on goonga: wanaa Muusaa hokki on jaamdu iwrundu dow kammu. Ko selli hen dee, Baabiraado am kapum woni dokkoowo on jaamdu goongaraaru iwrundu dow kammu. <sup>33</sup> Sabi jaamdu ndu Laamdo hokkata nduu woni iwrooru dow kammu, hokkooru aduna oo nguurndam.

<sup>34</sup> Be mbii mo:

—Moobbo, hokku min jannde fuu nduun jaamdu.

<sup>35</sup> Iisaa wii 6e:

—Miin woni jaamdu wuurnoru. Gardo e am fuu, yolbataa abada. Goondindo kam fuu domdataan abada. <sup>36</sup> Mi wii on: on njii kam, kaa on ngoondinaali. <sup>37</sup> Mo Baabiraado hokki kam fuu, waran e am. Gardo e am fuu, mi ribbataa dum. <sup>38</sup> Sabi wanaa faa mi wada sago am iwrupi dow kammu, faa mi wada sago neldo kam oo. <sup>39</sup> Annii sago neldo kam oo: pati fay gooto e 6e o hokki kam bee majja, mi immintinan 6e jalaande sakitotoonde. <sup>40</sup> Annii sago Baabiraado am oo: neddo fuu jiido Biddo oo so goondini dum heban nguurndam nduumiidam, mi immintinan dum jalaande sakitotoonde.

<sup>41</sup> Hooreefee Yahuudiyankoobe 6ee ana njermitoo haala makko sabi o wii «Miin woni jaamdu iwrundu dow kammu nduu.» <sup>42</sup> Be mbii:

—Oo, wanaa Iisaa bii Yuusufu mo anndu-den inna mum e baam mum oo naa? Hono o wiiratsa dow kammu o iwrri?

<sup>43</sup> Iisaa wii 6e:

—Pati njermitie hakkunde mon! <sup>44</sup> Fay gooto waawaa warde e am so Baabiraado neldo kam oo foodaali dum. Gardo e am fuu, mi immintinan dum jalaande sakitotoonde. <sup>45</sup> Ana winndii ley dewte annabaabe: «Be fuu, Laamdo anndinan 6e.»<sup>†</sup> Neddo fuu kettindiido Baabiraado oo so faami, waran e am. <sup>46</sup> Fay gooto yiyaali Baabiraado, so wanaa iwrudo to makko oo. Kanko tan yii Baabiraado. <sup>47</sup> Mido haalana on goonga: goondindo kam, heffii nguurndam nduumiidam. <sup>48</sup> Miin woni jaamdu wuurnoru. <sup>49</sup> Njaatiraabe moodon jaamii «maanu» ley ladde jeereende. Dum e taweede hadaali fe maayde. <sup>50</sup> Kaa dum doo jooni yo jaamdu iwrundu dow kammu, yalla so neddo jaamii ndu ana waasa maayde.

<sup>51</sup> Miin woni jaamdu wuurnooro iwrundu dow kammu. So nedđo jaamii nduu jaamdu, wuuran faa abada. Naamdu ndu ndokkiran-mi saabe nguurndam aduna nduu yo terde am.

<sup>52</sup> Dow dum Yahuudiyankoođe ana ndukida ko mbaawi fuu, ana mbiya:

—Hono o waawiri hokkude en terde makko faa jaamen?

<sup>53</sup> Iisaa jaabii 6e:

—Mido haalana on goonga: so on jaamaali terde Bii Nedđo, on njaraali yiyyam mum, nguurndam walanaa on. <sup>54</sup> Nedđo fuu jaamdo terde am so yari yiyyam am heđii nguurndam nduumiidam. Miin duu mi immintinan dum jalaanda sakitotoonde. <sup>55</sup> Sabi terde am yo jaamdu jaati, yiyyam duu yo njaram jaati. <sup>56</sup> Nedđo fuu jaamdo tew am so yari yiyyam am, jiibii e am, mi jiibii e mum. <sup>57</sup> Baabiraado neldo kam oo yo guurdo. E makko nguurumi. Hono non jaamdo kam fuu wuuriita e am. <sup>58</sup> Kayru woni jaamdu iwrundu dow kammu: ndu waldaa e ndu njaatiraabe mon jaamunoo so maayii nduu. Jaamdo nduu jaamdu, wuuran faa abada.

<sup>59</sup> Dii waajuuji Iisaa waajinoo ley waajordu Kafarnahum.

<sup>60</sup> Nde be nanno ci ndee, heewbe e taalibaabe makko mbii:

—Dii waajuuji njoorii sanne. Homo waawi hettinaade di?

<sup>61</sup> Iisaa humpitii ley becce mum taalibaabe mum bee ana ñermitoo e majjum, wii 6e:

—Dum huđindanaaki on naa? <sup>62</sup> Ndennoo so on njii Bii Nedđo ñabbitii to wonnoo too, hono ngadaton? <sup>63</sup> Ruuhu, kajum hokkata nguurndam, kaa terde öii-aadama nafataa fay huunde. Haalaaji di kaalanan-mi on ci, kajum woni ruuhu, kajum woni nguurndam. <sup>64</sup> Ana e mon 6e ngoondintaa.

Nde wonnoo Iisaa ana anndi gila e puddoode 6e ngoondintaa dum 6ee, kajum e jammbootoodo dum oo. <sup>65</sup> O seydi hen:

—Dum saabii so mbii-mi on: fay gooto waawaa warde e am so Baabiraado hokkaali dum no warda.

<sup>66</sup> Caggal dum, heewbe e taalibaabe makko 6ee mbitti, ñootti jokkude e makko. <sup>67</sup> Nden Iisaa wii sappo e ñidon bee:

—Onon duu, odon njidi wittude naa?

<sup>68</sup> Simon Piyeer jaabii mo:

—Moobbo, to homo min njahata? Do maa doo haalaaji guurnooji nedđo nguurndam nduumiidam ngoni. <sup>69</sup> Min ngoondini, minden anndi a Cenilo Laamdo.

<sup>70</sup> Iisaa wii:

—Onon sappo e ñidon 6ee, wanaa miin subii on naa? Kaa gooto moodon yo seyfaani.

<sup>71</sup> Haala Yahuuda öii Simon Isikariyota o haalannoo. Oo woni jammbotoodo mo oo, haya o gooto e sappo e ñidón 6ee nee.

## 7

### No Iisaa yaari iidi Buguuji

<sup>1</sup> Caggal mum, Iisaa wonti yiilaade ley Galili. Omo teedii yiilaade ley Yahuudiya sabi hooreebe Yahuudiyankoođe ana tewta no mbarda mo. <sup>2</sup> Tawi iidi Yahuudiyankoođe biyeteedo iidi Buguuji oo badike. <sup>3</sup> Mijiraabe Iisaa worbe mbii dum:

—Eggu, njahaa Yahuudiya yalla taalibaabe maa bee ana njija golleeji di ngollataa dii.

<sup>4</sup> Fay gooto suudataa ko gollata so ana yidi anndeede. So ada golla dii golleeji, bannginan yimbe hoore maa.

<sup>5</sup> Tawi fay mijiraabe makko bee duu ngoondinali mo. <sup>6</sup> Iisaa wii 6e:

—Wakkati am waraali tafon, kaa onon, wakkati fuu yo wakkati mon. <sup>7</sup> Yimbe aduna mbaawaa wajjude on, kaa miin ebe mbajni kam, sabi mido seedii golleeji mađbe dii moyyaa.

<sup>8</sup> Onon, njehee kawroyee e oon iidi. Miin, miyahataa hawroyde e oon iidi sabi wakkati am yottaaki tafon.

<sup>9</sup> O haalani 6e dum tan, o heddi Galili.

<sup>10</sup> Nde mijiraabe Iisaa bee njahunoo hawroyde e iidi oo ndee, Iisaa duu yehii ton, kaa o bannginali hoore makko, o suudi. <sup>11</sup> Hooreebe Yahuudiyankoođe ana tewta mo ley jamaa iidi oo, ana mbiya:

—Hoto o woni?

<sup>12</sup> Yimbe heewbe ana liddondira haala makko. Yoga ana wiya:

—O nedđo lobbo!

Wođbe ana mbiya:

—Wanaa dee, o majjinoowo yimbe.

<sup>13</sup> Kaa fay gooto suusaali haalde haala makko faa nanee, sabi ebe kula hooreebe Yahuudiyankoođe.

<sup>14</sup> Nde iidi oo feccirta, tawi Iisaa fuddi waajaade ley Suudu Dewal Mawndu nduu.  
<sup>15</sup> Yahuudiyanchoobé kaaynaa sanne, 6e mbii:

—Hono o waawiri dewte, kanko mo janngaali?  
<sup>16</sup> Iisaa jaabii 6e:

—Waaju mo mbaajotoo-mi oo, iwataa e am. To neldo kam oo mo iwranta kam. <sup>17</sup> So neddo muuyii gollude sago makko, annditan so konngi am dii to Laamdo iwri, naa so waajuuji am dii e am iwi. <sup>18</sup> Oon baajortoodo hiini hoore mum, hoore mum teddinta. Kaa oon teddinoowo neldo dum, goonga haalata, oonaare walaa e mum. <sup>19</sup> Wanaa Muusaa hokken on Sariya naa? Kaa fay gooto e mon jokkaali Sariya. Ko saabii so odon tewta warde kam?

<sup>20</sup> Yimbe 6ee njaabii mo:

—Aan, a laddaado. Homo ndaarata warde ma?

<sup>21</sup> Iisaa jaabii 6e:

—Golle gooto tan ngollu-mi, on fuu, on kaaynaama. <sup>22</sup> Muusaa yamiri on taadagol. Taweede to njaatiraabe moodon dum iwrii fuu, wanaa to Muusaa. Odon taada neddo fay jalaande fowteteende. <sup>23</sup> So nii neddo ana taadee jalaande fowteteende pati on luuttu Sariya Muusaa, kodum tikkiranton kam saabe mi sellinii neddo kuurdo jalaande fowteteende? <sup>24</sup> Pati carilee no njiiro-don, carilee goonga.

*No yimbe lamndorii yalla Iisaa woni Almasiihu*

<sup>25</sup> Yoga e yimbe Urusaliima mbii:

—Wanaa oo woni mo 6e tewtata warde oo naa? <sup>26</sup> Omo nii darii, omo waajoo hakkunde jamaa oo. Be mbiyaali mo fay huunde. Tama mawbe 6ee cellinii kanko woni Almasiihu oo jaati? <sup>27</sup> Oo doo kaa, eden anndi do iwata, kaa nde Almasiihu oo ana wara, fay gooto anndataa to iwrata.

<sup>28</sup> Tawi Iisaa ana waajoo ley Suudu Dewal Mawndu nduu. O haali faa toowi, o wii:

—Odon anndi kam, odon anndi do iwan-mi? Wanaa miin waddi hoore am. Neldo kam oo yo goongaraajo. Onon, on anndaa mo. <sup>29</sup> Kaa miin, mido anndi mo sabi to makko iw-mi. Kanko neli kam.

<sup>30</sup> Nden 6e ndaari nanngude mo, kaa fay gooto junngo mum fawaaki e makko, sabi wakkati makko waraalino tafon. <sup>31</sup> Heewbe e ley jamaa oo ngoondinii mo, mbii:

—So Almasiihu oo warii, gollan kaayde burde de oo gorko golli dee naa?

*No hayboobe Suudu Dewal Mawndu neliraa nannga Iisaa*

<sup>32</sup> Farisa'en nani ko yimbe see ngunndondirta e haala Iisaa koo. Hooreebé yottinoobé sadaka e Farisa'en neli hayboobe Suudu Dewal Mawndu nduu nannga mo. <sup>33</sup> Non Iisaa wii:

—Miin, mido wondi e moodon seeda tafon. Caggal mum, mi wirfitoto to neldo kam oo.

<sup>34</sup> On tewtan kam, kaa on njiiataa kam, sabi on mbaawaa yaade to ngonan-mi too.

<sup>35</sup> Yahuudiyanchoobé lamndondiri:

—Hoto o yahata faa tawee en mbaawaa yiitude mo? O tawtoyan yimbe men ferbe to Yunaninkooobé, o waajoo dum'en naa? <sup>36</sup> O wii en tewtan mo, en njiiataa mo, sabi en mbaawaa yaade to mo tawetee too. Kodum woni maanaa kaa haala?

*No Iisaa wiiri goondindo dum fuu domdataa*

<sup>37</sup> Nalaande sakitootee deddunde e iidi, Iisaa darii, haali faa toowi, wii:

—Neddo fuu domduo wara e am, yara. <sup>38</sup> Neddo fuu goondindo kam, calludi ndiyam nguurnoojam ilan iwde e bernde mum, hono no winndiraa e Binndi dii nii.

<sup>39</sup> Tawi dum o haali haala Ruuhu mo goondindo mo fuu hebata oo. Nden Ruuhu waraali, sabi Iisaa njabitaali e teddeengal Laamdo tafon.

*No yimbe luurriri saabe Iisaa*

<sup>40</sup> Nde heewbe e jamaa oo nanunoo kaa haala ndee, mbii:

—Kanko jaati woni Annabaajo oo.

<sup>41</sup> Yogaabe mbii:

—Kanko woni Almasiihu oo.

Wobbe kasen mbii:

—Almasiihu, Galili iwrata naa? <sup>42</sup> Binndi dii mbii e lejol Daawuuda Almasiihu iwata, e ngeenndi Baytilaama ndi Daawuuda iwata e mum ndii.

<sup>43</sup> Jamaa oo fecciaabe makko. <sup>44</sup> Won yiibbe nanngude mo e ma6be, kaa fay gooto junngo mum fawaaki e makko.

*No mawbe Yahuudiyanchoobé calorii goondinde Iisaa*

<sup>45</sup> Non hayboobe Suudu Dewal Mawndu 6ee ngarti to hooreebé yottinoobé sadaka e Farisa'en. Been mbii 6e:

—Ko saabii so on ngaddaali mo?

<sup>46</sup> Haybooþe 6ee njaabii:

—Abada fay gooto waajoraaki no oo gorko nii.

<sup>47</sup> Farisa'en njaabii 6e:

—Onon duu on majjinaama naa? <sup>48</sup> Won fuu e hooree6e 6ee naa e Farisa'en goondindo mo naa? <sup>49</sup> Bee yimþe paamataa Sariya Muusaa, 6e hudaabe.

<sup>50</sup> Gooto e Farisa'en biyeteedo Nikodemus, jahunoodo to Iisaa jemma oo, wii 6e:

<sup>51</sup> —Sariya meedan ana sara neddo tawee nanaaka ko haali, anndaaka ko golli naa?

<sup>52</sup> Be njaabii mo:

—Aan duu, a Galilinke naa? Widita Binndi dii, a yiyan annabaajo fuu iwrataa Galili.

*No Iisaa waddi e debbo maþþaado e jeenu*

<sup>53</sup> Caggal mum, gooto fuu hooti suudu mum.

## 8

<sup>1</sup> Nden Iisaa nabboyi waamnde haayre wiyyeteende Jaytun. <sup>2</sup> Beetee kecco o warti ley Suudu Dewal Mawndu. Jamaa oo fuu wari. O joodii, omo waajoo 6e. <sup>3</sup> Dunkee'en Sariya e Farisa'en ngaddani mo debbo maþþaado e jeenu. Be ndarni dum hakkunde jamaa oo. <sup>4</sup> Be mbii Iisaa:

—Moobbo, oo debbo yo maþþaado ana jeena. <sup>5</sup> Muusaa yamirii min ley Sariya min mbarda hono 6ee rewþe kaaye. Aan nee, ko mbiyat�aa?

<sup>6</sup> Be kaaldi nii faa 6e tuufana mo, yalla eþe keba ko 6e kappira mo. Iisaa noo turii, ana diidira fedeendu mum leydi. <sup>7</sup> Nde wonnou 6ee njokki e lamndaade mo ndee, Iisaa hunci hoore, wii 6e:

—Gooto mon mo luuttaali abada yo ardo wedaade mo haayre.

<sup>8</sup> O turii kasen, omo diida e leydi. <sup>9</sup> Nde 6e nannoo dum ndee, 6e mbittiri gooto gooto. Nayee6e 6ee fuu adii wittude faa heddiI Iisaa tan e debbo oo. <sup>10</sup> Iisaa hunci hoore, wii mo:

—Banndam debbo, hoto wullani6e ma 6ee ngoni? Fay gooto jukkaali ma naa?

<sup>11</sup> O jaabii:

—Moobbo, fay gooto.

Iisaa wii mo:

—Miin duu, mi jukkataa ma. Yaa, pati luuttaa kasen.\*

*No Iisaa wiiri kyanum woni fooyre aduna*

<sup>12</sup> Iisaa waajii 6e kasen, wii:

—Miin woni fooyre aduna oo. Jokkuðo kam fuu heþan fooyre nguurndam, yahataa ley nimre.

<sup>13</sup> Nden Farisa'en mbii mo:

—Ada seettanoo hoore maa, seedaaku maa sellataa.

<sup>14</sup> Iisaa jaabii 6e:

—Fay so mi seettanike hoore am, seedaaku am ana sella, sabi mido anndi do iwru-mi, mido anndi to njahan-mi. Kaa onon, on anndaa do iwru-mi, on anndaa to njahan-mi.

<sup>15</sup> Onon, no njiiru-don yimþe cardaton dum'en, kaa miin, mi sarataa fay gooto. <sup>16</sup> Fay so mido sara, sariya am ana sella, sabi mi sarataa miin tan, Baabiraado neldo kam oo ana wondi e am. <sup>17</sup> Warii e Sariya moodon: seedaaku yimþe didon ana sella. <sup>18</sup> Miin, mido seettanoo hoore am. Baabiraado neldo kam oo duu, ana seettanoo kam.

<sup>19</sup> Be mbii mo:

—Hoto Baabiraado maa oo woni?

Iisaa jaabii:

—On anndaa kam miin, sako Baabiraado am. Sinndo odon anndunoo kam, maa on annduno Baabiraado am oo duu.

<sup>20</sup> Iisaa haali dii haalaaji nde waajotonoo ley Suudu Dewal Mawndu, nokku do keesuwal sadakaaji ngal woni doo. Fay gooto nanngaali mo, sabi wakkati makko yottaaki tafon.

<sup>21</sup> Iisaa wii 6e kasen:

—Mido nii yaha, on tewtan kam, on maaydan e luutti mon. On mbaawaa yaade to njahan-mi too.

<sup>22</sup> Non Yahuudiyan6e mbii:

—Dum nee, o bartoytoodo so o wii en mbaawaa yaade to o yahata too naa?

<sup>23</sup> Iisaa wii 6e:

\* **8:11** Aaya 7.53 yaade 8.11 tawaaka e dæreeji þurdi fuu 6ooyde dii.

—Onon, ley njeye-don, kaa miin, dow njeyaa-mi. Onon, e aduna njeye-don, kaa miin, mi jeyaaka e makko. <sup>24</sup>Dum saabii so mbiit-mi on: on maaydan e luutti mon. Sabi so on ngoondinaali miin woni mo ngon-mi oo, on maaydan e luutti mon.

<sup>25</sup>Be mbii mo:

—Aan homo?

Iisaa jaabii:

—Ko mbiinoo-mi on gila arannde koo ngon-mi. <sup>26</sup>Mido joganii on ko heewi ko haaletaa e ko saretee. Haya neldo kam oo yo goongirante. Ko narru-moo-mi kaalanan-mi aduna oo.

<sup>27</sup>Be paamaali haala Baabiraado o haalanta 6e. <sup>28</sup>Nden Iisaa wii 6e:

—Nde Bii Neddo toownaa fuu, nden paamaton miin woni mo ngon-mi oo. Mi wadirtaa fay huunde hiini hoore am, mi haalan ko Baabiraado anndini kam koo. <sup>29</sup>Neldo kam oo ana wondi e am, o yoppaali kam mi teeldo, sabi ko weli mo tan ngadan-mi wakkati fuu.

### *Haala rimbe e maccube*

<sup>30</sup>Nde Iisaa haaldunoo nii ndee, heewbe ngoondini mo. <sup>31</sup>Non Iisaa wii Yahuudiyankoo6e goondin6e dum 6ee:

—So on jii6ii e konngol am, on taaliba6e am jaati. <sup>32</sup>Nden anndaton goonga. Goonga oo rimdinan on.

<sup>33</sup>Be njaabii mo:

—Minen, min iwdi Ibarahiima, abada fay gooto maraali min. Hono mbiirataa min ndimdan?

<sup>34</sup>Iisaa jaabii 6e:

—Mido haalana on goonga: luuttoowo fuu yo maccudo luutti. <sup>35</sup>Abada maccudo heddataako e galle, kaa 6iddo ana heddo faa abada. <sup>36</sup>So Biddo rimfinii on, on laatoto rimbe dor. <sup>37</sup>Mido anndi on iwdi Ibarahiima, kaa odon tewta warde kam sabi waaju am naatali on. <sup>38</sup>Miin, ko njiiru-mi Baabiraado am mbaajootoo-mi. Onon, ko narru-don baaba mon ngadaton.

<sup>39</sup>Be njaabii mo:

—Ibarahiima woni baaba amen.

Iisaa wii 6e:

—Sinndo on iwdi Ibarahiima, maa on ngolluno golleeji Ibarahiima. <sup>40</sup>Kaa jooni odon tewta warde kam, miin kaalandoo on goonga mo narru-mi Laamdo oo. Dum Ibarahiima wadaali. <sup>41</sup>Onon, golleeji baaba mon ngollaton.

Be mbii mo:

—Minen, min nganaa 6ib6e haram, baaba gooto min njogii, oo woni Laamdo.

<sup>42</sup>Iisaa wii 6e:

—Sinndo Laamdo wonnoo baam mon jaati, maa on njidam, sabi to Laamdo iwru-mi, so ngar-mi. Mi wardaali hiini hoore am, kanko neli kam. <sup>43</sup>Ko saabii so on paamataa haala am? Saabe on nanataa ko kaalan-mi koo. <sup>44</sup>Onon, Ibiliisa woni baam mon. Gidaade baam mon ngollaton. O jaadii hoore gila pu6doode. O walaa e goonga sabi goonga walaa e makko. So o fenii, gikkii makko tan o wadi, sabi mo penoowo, mo inna pene. <sup>45</sup>Kaa miin, saabe mido haala goonga woni ko on ngoondiniraali kam. <sup>46</sup>Homo e moodon waawi felirde kam luutti? So mi haalii goonga, ko saabii so on ngoondintaa kam? <sup>47</sup>Neddo Laamdo hettintoo haala Laamdo. Onon nee, on kettintaako sabi on nganaa yim6e Laamdo.

### *No Iisaa burdi Ibarahiima*

<sup>48</sup>Yahuudiyankoo6e mbii mo:

—Min kaalaalino goonga nde min mbiinoo a Samariyanke, a laddaado ndee naa?

<sup>49</sup>Iisaa jaabii:

—Mi wanaa laddaado, mido teddina Baabiraado am. Onon, odon koyna kam. <sup>50</sup>Miin, mi tewtanta hoore am teddeengal. Ana woodi tewtanoowo kam ngal. Oon woni caroowo.

<sup>51</sup>Mido haalana on goonga: neddo fuu jokkudo konngol am maayataa abada.

<sup>52</sup>Yahuudiyankoo6e mbii mo:

—Jooni fuu tabitani min a laddaado. Ibarahiima e annaba6e fuu maayii, kaa aan, ada wiya neddo fuu jokkudo konngol maa, meedataa deddere maayde. <sup>53</sup>Tama ada 6uri baaba amen Ibarahiima teentilaade? Oon maayii, annaba6e duu maayii. Kodum cikku-daa ngon-daa?

<sup>54</sup>Iisaa jaabii 6e:

—Miin, so hoore am teddina-mi, teddeengal am yo meere. Baabiraado am mo mbiyatton Laamdo mon oo teddinta kam. <sup>55</sup>On anndaa mo. Kaa miin, mido anndi mo. So mi wii mi anndaa mo, naa mi laato penoowo hono mon. Mido anndi mo, mido jokki konngol makko.

<sup>56</sup>Baaba mon Ibarahiima ana seyortonoo yiide jalaande am. O yii nde, o seyike.

<sup>57</sup>Yahuudiyankoo6e mbii mo:

—Fay duuči capande joy a hečaali tafon, kaa a yii Ibarahiima?

<sup>58</sup> Isaa jaabii 6e:

—Mido haalana on goonga: gila Ibarahiima tagaaka, miin, mido woodi.

<sup>59</sup> Non, 6e cuči kaaye faa 6e mbedoo mo. Nden Isaa mooltii, yalti Suudu Dewal Mawndu nduu.

## 9

*No Isaa wumtiniri pindudo e mbumndam*

<sup>1</sup> Nden Isaa ana yahannoo faa yii gorko pindudo e mbumndam. <sup>2</sup> Taalibaabe makko lamndii mo:

—Moobbo, homo luutti so mo findi e mbumndam, kanko naa saaraabe makko?

<sup>3</sup> Isaa jaabii:

—Wanaa kanko luutti, wanaa saaraabe makko. Dum wadii yalla baawde Laamdo ana 6annga e makko. <sup>4</sup> So nii palooma ana heddii, ana haani no ngollen golleeji neldo kam oo, sabi jemma waran nde fay gooto waawaa gollude. <sup>5</sup> So nii mido heddii e aduna oo, miin woni fooyre makko.

<sup>6</sup> Nde o haalnoodum ndee, o tutti e leydi, o jiičiri tuttaade dee loope, o wuji e gite bumdo oo. <sup>7</sup> O wii dum:

—Yaa sulmoya luggal biyeteengal Silowam.

(Maanaa majjum yo «nelaado».)

O sulmoyii, o warti omo yiya. <sup>8</sup> Hoddiiče makko, kajum e yiyanooče mo omo garbinoo, mbii:

—Tama wanaa oo woni joodinoodo ana garbinoo oo?

<sup>9</sup> Bee mbii:

—Dum kanko!

Bee mbii:

—Wanaa! Nanndoore makko!

Gorko oo e hoore mum wii:

—Dum miin jaati!

<sup>10</sup> Bee mbii mo:

—Hono mbumtir-daa?

<sup>11</sup> O jaabii:

—Gorko biyeteedo Isaa oo jiiči loope, wuji e gite am, wii kam mi yaha luggal Silowam, mi sulmoyoo. Culmoyii-mi, mbumtu-mi.

<sup>12</sup> Bee mbii mo:

—Hoto gorko oo woni?

O wii:

—Mi anndaa!

*No Farisa'en lamndorii bumtinaado oo*

<sup>13</sup> Nden 6e nači bumnoodo oo to Farisa'en. <sup>14</sup> Nde Isaa jiičunoo loope so wumtini mo ndee, yo jalaande fowteteende. <sup>15</sup> Non Farisa'en duu lamndii mo:

—Hono mbumtir-daa?

O jaabii 6e:

—O wuji loope e gite am, culmii-mi, mbumtu-mi.

<sup>16</sup> Yoga e Farisa'en mbii:

—Gorko oo iwraali to Laamdo sabi o jokkaali sariya jalaande fowteteende.

Wočče mbii:

—Hono neddo luuttudo waawiri wadirde hono dee kaayde?

Dow dum 6e luurri, 6e ceeri. <sup>17</sup> Farisa'en see lamndii bumnoodo oo kasen:

—Aan nee, ko mbiyatataa e bumtindo ma oo?

O jaabii:

—O annabaajo.

<sup>18</sup> Dum fuu e taweede hooreebé Yahuudiyanooče njabaali mo bumnoodo so mo wumtinaa faa 6e noddi saaraabe makko. <sup>19</sup> Be lamndii seen:

—Oo doo yo 6ii moodon naa? Mbii-don e mbumndam mo findi naa? Ndennoo hono mo wumtiri jooni?

<sup>20</sup> Saaraabe 6ee njaabii:

—Midén anndi mo 6ii amen, e mbumndam mo findi. <sup>21</sup> Kaa no o wumtiri jooni, min anndaa. Min anndaa duu homo wumtini mo. Kanko duu o mawdo, lamndee mo! Omo waawi jaabanaade hoore makko.

<sup>22</sup> Walaa ko saaraabe makko mbiiri nii so wanaa kammar i ebe kula hooreebe Yahuudiyanikoobe. Saabe been kawrii: neddo fuu cellindo Iisaa woni Almasiihu oo, ee ndibban dum yalta waajordu. <sup>23</sup> Dum saabii so saaraabe makko bee mbii: «O mawdo, lamndee mo!»

<sup>24</sup> Farisa'en nodditi bumnoodo oo, mbii mo:

—Haalu hakkunde maa e Laamdo! Minen kaa miden anndi oo gorko yo luuttudo.

<sup>25</sup> O jaabii 6e:

—So o luuttudo duu, miin kaa, mi anndaa. Gootel tan anndu-mi: mi bumnoodo, jooni mi wumtii.

<sup>26</sup> Be mbii mo:

—Kodum o wadi e maa? Hono o wumtinir ma?

<sup>27</sup> O jaabii 6e:

—Mi haalaniino on dum, kaa on njabaali. Ko saabii so odon njidi nantude dum kasen? Tama onon duu, odon njidi laataade taalibaabe makko?

<sup>28</sup> Been njenni mo, mbii mo:

—Aan woni taalibbo makko! Minen, min taalibaabe Muusaa. <sup>29</sup> Minen, miden anndi Laamdo haaldii e Muusaa, kaa kanko, min anndaa fay to mo iwata.

<sup>30</sup> Gorko oo jaabii, wii 6e:

—Hee, ko haaynii! O wumtinii kam. Onon, odon mbiya on anndaa to mo iwata! <sup>31</sup> Eden anndi Laamdo jaabantaako luuttoobe, kaa omo jaabanoo kuldo mo, gadoowo sago makko.

<sup>32</sup> Abada nanaaka bumtindo pindudo e mbumndam. <sup>33</sup> Sinndo wanaa to Laamdo oo gorko iwri, o waawataa wadufe fay huunde.

<sup>34</sup> Be njaaabii mo:

—Aan, a fuu ley luutti pinu-daa! Aan waajotoo min minen naa?

Be njaltini mo sella.

### *Haala mbumndam 6erde*

<sup>35</sup> Iisaa nani ee njaltinii mo, yiiti mo, lamndii mo:

—Aan nee, ada goondini Bii Neddo oo naa?

<sup>36</sup> O jaabii:

—Moobbo, homo woni kanko faa mi goondina mo?

<sup>37</sup> Iisaa wii mo:

—A yii mo. Kaaldoowo e maa oo woni kanko.

<sup>38</sup> O jaabii:

—Moobbo, mido goondini.

O sujidani dum. <sup>39</sup> Nden Iisaa wii mo:

—Sarde waddi kam e oo aduna, faa wumbe njiya, yiyoobe mbuma.

<sup>40</sup> Farisa'en tawanoobe don 6ee, nani haala kaa, lamndii mo:

—Minen nee, min wumbe naa?

<sup>41</sup> Iisaa jaabii 6e:

—Sinndo on wumbe, on luuttataano. Kaa no mbii-don jooni odon njiya nii, luutti moodon keddiike.

## 10

### *Haala duroowo lobbo*

<sup>1</sup> —Mido haalana on goonga: neddo fuu naatoowo hoggo baali mo naatiraali damal, kajum woni gujjo, kajum woni janoowo. <sup>2</sup> Kaa naatiroovo damal oo, kajum woni duroowo baali. <sup>3</sup> Kayboowo damal oo udditinan mo, baali dii nana daande makko. O noddira baali makko dii, hongu fuu innde mum, o yaltina di. <sup>4</sup> Nde o yaltini di fuu, o ardoto di njokka e makko, sabi edii anndi daande makko. <sup>5</sup> Di njokkataa kodo, ko jaasi dum fuu, di ndogan mo sabi di annditataa daande ho66e.

<sup>6</sup> Iisaa haalani ee ngol tinndinol, kaa ee paamaali ko o muuyiri dum.

### *No Iisaa wiiri kajum woni duroowo lobbo oo*

<sup>7</sup> Iisaa wii 6e kasen:

—Mido haalana on goonga, miin woni damal hoggo baali. <sup>8</sup> Adii6e kam warde 6ee fuu yo wuybe nii e yanoobe, baali dii nanataa daade ma66e. <sup>9</sup> Miin woni damal. Neddo fuu naatirido kam, hisan, naatan, yaltan, hefan durdude. <sup>10</sup> Gujjo wardataa so wanaa faa wujja, hirsia, bona. Kaa miin, mi wardii faa yimbe nguura nguurndam lobbam. <sup>11</sup> Miin woni duroowo lobbo. Duroowo lobbo woni dokkitiroovo yonki mum saabe baali mum.

<sup>12</sup> Kaa kasaado mo wanaa dunkee durngol, mo walaa ko wonani dum e dammuli dii, nde yii jnanngiri fuu, yoppan di doga, jnanngiri' ndii nannga ko nanngata, keddiidi fiil caakoo.

<sup>13</sup> Kasaado oo dogan yoppa di sabi o kasaado tan, walaa ko wonani mo e majji. <sup>14-15</sup> Miin woni duroowo lobbo. Hono no Baabiraado oo anndiri kam so anndir-mi dum nii, hono

non anndir-mi baali am so baali am anndi kam. Non mido hokkitira yonki am saabe majji. <sup>16</sup> Mido jogii baali goddi kasen di ngalaal ley ngoo hoggo. Diin duu kinaa mi wadda di. Di nana daande am, di laatoo sewre wootere, duroowo gooto. <sup>17</sup> Baabiraado ana yidi kam saabe mido hokkitira yonki am faa mi hewta ki kasen. <sup>18</sup> Fay gooto ittataa kam ki. Miin e hoore am hokkitirde ki. Mido jogii baawde hokkitirde ki. Mido jogii baawde wartirde ki. E Baabiraado am kebu-mi ndee yamiroore.

<sup>19</sup> Dii haalaaji bseydi waddondirde Yahuudiyankooōe. <sup>20</sup> Heewbē maābē ana mbiya:

—O laddaado o kaahaango. Ko saabii so odon kettindoo mo?

<sup>21</sup> Kaa yogaabē mbii:

—Dii waajuuji nganaa waajuuji laddaado. Laddaado ana waawi wumtinde bumdo naa?

*No Yahuudiyankooōe calorii goondinde Iisaa*

<sup>22</sup> Yiit muuuri heydintingol Suudu Dewal Mawndu nduu wadii Urusaliima. Dum hawrii e dabbunde. <sup>23</sup> Do Suudu Dewal Mawndu doo, Iisaa ana wada yaha warta ley ndanki Suleymaana kii. <sup>24</sup> Nden Yahuudiyankooōe pilii mo, mbii mo:

—Faa mande keddoto-daa aāa yoppi min e wemmbere? Haalan min faa laabā, aan woni Almasiīh oo naa?

<sup>25</sup> Iisaa jaabii 6e:

—Mi haalanii on, on ngoondinaali. Golleeji di ngollir-mi e innde Baabiraado am dii, kanji ceettantoo kam. <sup>26</sup> Kaa onon, on ngoondinaali sabi on nganaa baali am. <sup>27</sup> Baali am ana nana daande am. Mido anndi di, edi njokka e am. <sup>28</sup> Mido hokka di nguurndam nduumiidam, di mbaatataa abada. Fay gooto ittataa di e junngo am. <sup>29</sup> Baabiraado dokkudo kam di oo buri huunde fuu teddude. Fay gooto waawaa ittude di e junngo Baabiraado am oo. <sup>30</sup> Miin e Baabiraado, min gooto.

<sup>31</sup> Yahuudiyankooōe cubi kaaye kasen faa mbedoo mo. <sup>32</sup> Iisaa wii 6e:

—Mi gollirii baawde Baabiraado golleeji lobbi keewdī yeeso mon. E ley dii golleeji, saabe homo e majji mbedorto-don kam kaaye?

<sup>33</sup> Yahuudiyankooōe njaabii mo:

—Wanaa saabe golle lobbo min mbedorte kaaye, ko min mbedorte kaaye dee, saabe aāa bonkoo Laamdo. Aan a neddo, a wadfi hoore maa a Laamdo.

<sup>34</sup> Iisaa jaabii 6e:

—Tama wiimdaaka ley Sariya mon too: Laamdo wii «onon on laamdo'en?» <sup>35</sup> Laamdo noddirii laamdo'en been 6e o haaldi. Ko Binndi dii mbii koo sottataa. <sup>36</sup> Mo Baabiraado suūii so neli e aduna oo, hono mbiiraton mo bonkike Laamdo saabe mi wii mi Bii Laamdo? <sup>37</sup> So mi gollaali golleeji Baabiraado am, pati ngoondinee kam. <sup>38</sup> Kaa so mido golla di, fay so on ngoondintaa kam, ngoondinee golleeji dii yalla odon annda, ngoondinon mido e Baabiraado, Baabiraado ana e am.

<sup>39</sup> Be tewti nanngude mo kasen. O sobbitorii 6e.

<sup>40</sup> O yehi ootoo bannge maayo Urdun nokku do Yaayaa lootannoo lootagal batistema arannde doo kasen, o fabbi ton. <sup>41</sup> Yimbe heewbē ngari e makko, mbii:

—Yaayaa wadaali haaynde fay wootere. Kaa ko o haali e gorko oo koo fuu goondii.

<sup>42</sup> Heewbē ngoondini Iisaa ton.

## 11

*Haala maayde Laajaru*

<sup>1</sup> Gorko jawdo biyeteedo Laajaru ana Baytaniya, kapum e banndiraabē mum rewbe Mariyama e Marta. <sup>2</sup> Tawi Mariyama woni gujudo Moobbo oo nebam uuroojam so soccir koyde makko sukundu muudum. Laajaru jawdo oo yo mijniko gorko. <sup>3</sup> Banndiraabē rewbe bee neli e Iisaa, mbii:

—Moobbo, gido maa mo korsin-daa oo jawii.

<sup>4</sup> Nde Iisaa nanunoo dum ndee, wii:

—Oo jaw wanaa jaw saate. Mo jaw tabintinoowo teddeengal Laamdo, yalla Bii Laamdo oo ana teddiniree mo.

<sup>5</sup> Iisaa ana horsini Laajaru e banndiraabē mum rewbe, Marta e Mariyama, <sup>6</sup> taweede o nani Laajaru sellaa fuu, hadaali mo fabbude ton balde didi godse. <sup>7</sup> Caggal dum, o wii taalibaabē makko:

—Mbirkito-den Yahuudiya!

<sup>8</sup> Taalibaabē bee njaabii:

—Moobbo, gooyaa fey ko Yahuudiyankooōe ndaari wardude ma kaaye, laatoo ton mbirkito-daa kasen naa?

<sup>9</sup> Iisaa jaabii:

—Wanaa wakkatiji sappo e didi ngori ley jaalooma naa? Jahoowo jaalooma fergataako sabi omo yiya fooyre aduna oo. <sup>10</sup> Kaa jahoowo jemma fergoto sabi fooyre walaa e muudum.

<sup>11</sup> Caggal o haalii dii haalaaji, o wii 6e:

—Gido men Laajaru daanike, mi yahan mi finndinoya mo.

<sup>12</sup> Taalibaabe bee mbii:

—Moobbo, so tawii o daaniido, ndennoo o dadii.

<sup>13</sup> Haala maayde Laajaru o haalannoo. Kamfee 6e miilii haala doyngol o haali. <sup>14</sup> Iisaa laabbinani 6e:

—Laajaru heddiataki! <sup>15</sup> Mi seyorike saabe moodon ko mi tawaaka ton koo yalla odon ngoondina. Kaa jonnoo, njehem to makko.

<sup>16</sup> Nden Tomaa noddirteedo Funeeru oo wii taalibaabe wobbe 6ee:

—Njehem enen duu yalla eden maayda e makko.

*No Iisaa wiiri kayum woni immital e nguurndam*

<sup>17</sup> Nde Iisaa yottinoo ndee, tawi wadii balde nay ko Laajaru iriraa. <sup>18</sup> Nde wonnood hakkunde Baytaniya e Urusaliima buraa hono kilooji tati, <sup>19</sup> Yahuudiyan koo6e heew6e ngarii to Mariyama e Marta duwaaru Laajaru, efe koomta dum'en e maayde mijii6e gorko.

<sup>20</sup> Nde Marta nannoo Iisaa warii ndee, yehi sakkitoyii mo. Mariyama kaa heddi cuudi.

<sup>21</sup> Marta wii Iisaa:

—Moobbo, sinndo ada wonnoodoo, mijnam gorko oo maayataano. <sup>22</sup> Kaa fay jooni mido anndi huunde fuu ko ndaardu-daa Laamdo, wadante.

<sup>23</sup> Iisaa wii mo:

—Mijna gorko oo immitoto.

<sup>24</sup> Marta wii:

—Mido anndi o immitoto jannnde immital, jalaande sakitotoonde.

<sup>25</sup> Iisaa wii mo:

—Miin woni immital, miin woni nguurndam. Neddo fuu goondindo kam, fay so maayi, wuuran. <sup>26</sup> Guurdo fuu goondindo kam, maayataa abada. Ada goondini dum naa?

<sup>27</sup> O jaabii:

—Sanne Moobbo! Mido goondini aan woni AlmasiihuBii Laamdo garoovo e aduna oo.

<sup>28</sup> E dow dum, o yehi noddoyde mijiiiko Mariyama, o gunndii dum:

—Moobbo oo warii, omo nodde.

<sup>29</sup> Nde Mariyama nanunoo dum ndee, henji law, nootoyii. <sup>30</sup> Tawi fuu Iisaa naatalino ngeenndi ndii tafon. Omo heddi do Marta hawrunoo e makko doo. <sup>31</sup> Yahuudiyan koo6e ana ngondunoo e Mariyama ley galle, ana koomtannoo dum. Be njii o gurbitike, o yaltii. Be njokkitii mo, 6e miili o woyoyan dow yanaande too. <sup>32</sup> Mariyama yottii do Iisaa woni doo, yi dum tan, dicci yeeso muudum, wii dum:

—Moobbo, sinndo ada wonnoodoo, mijnam gorko oo maayataano.

<sup>33</sup> Nde Iisaa yiinoo Mariyama e Yahuudiyan koo6e wondube e mum 6ee ana mboya ndee, yonki makko jawi, hakkiile makko immii. <sup>34</sup> O wii:

—Hoto ndesu-don mo?

Be njaabii:

—Moobbo, war yeew!

<sup>35</sup> Nii Iisaa woyi. <sup>36</sup> Yahuudiyan koo6e 6ee mbii:

—Yeewee no o foti horsinde dum.

<sup>37</sup> Yoga e maabbe wii:

—Bumtindo bumdo waawaano hadfude Laajaru maayde naa?

*No Iisaa wuurtiniri Laajaru*

<sup>38</sup> Yonki Iisaa beydi jawde, o yehi tiimoyde yanaande ndee. Yanaande ndee yo loowol uddiraangol haayre. <sup>39</sup> Iisaa wii:

—Ittee haayre ndee!

Marta, banndii debbo maaydo oo, wii mo:

—Moobbo, ana haani ko tawee henndu makko waylitike, sabi hannde woni bald6e makko nay.

<sup>40</sup> Iisaa jaabii mo:

—Tama mi wiyaali ma, so a goondini, a yiyan teddeengal Laamdo?

<sup>41</sup> Be itti haayre ndee. Iisaa tiggiti, wii:

—Baabiraado, mido yettiere ko njaabani-daa kam koo. <sup>42</sup> Miin kaa, mido anndi jannnde fuu ada jaabanoo kam. Kaa mi haaldirii nii saabe yim6e filii6e kam 6ee, yalla e6e ngoondina aan neli kam.

<sup>43</sup> Caggal dii haalaaji, o duki semmbe, o wii:

—Laajaru, yaltu sella!

<sup>44</sup> Maaydo oo yalti, juude mum e koyde mum ana piilaa leppi, yeeso mum ana suddii. Iisaa wii 6e:

—Kumtee mo, njoppon mo o yaha!

*No waalde Saahiibe dawriri faa nannga Iisaa*

<sup>45</sup> Heewbe e Yahuudiyankoobe warnoobe to Mariyama 6ee njii ko Iisaa wadi koo, ngoondini dum. <sup>46</sup> Kaa yogaabe njehi to Farisa'en, kaaltani dum'en ko Iisaa wadi koo.

<sup>47</sup> Nden Farisa'en e hooreebe yottinoobe sadaka moothi waalde Saahiibe ndee, mbii:

—Oo gorko ana wada kaayde keewde. Hono ngadaten? <sup>48</sup> So en njoppirii mo nii, jamaa oo fuu goondinan mo. Nden kaa, Romankoobe ngaran mbonna nokku men ceniido oo e lejol men ngol.

<sup>49</sup> Gooto maabbe biyeteedo Kayafas, laatinoodo Jottinoowo Sadaka Mawdo e nden hitaande, wii 6e:

—Onon, on anndaa fay huunde. <sup>50</sup> On anndaa neddo gooto maayana yimbe fuu buri moyyande en diina lejol meeden fuu halkoo.

<sup>51</sup> Tawi wanaa hiini hoore makko o haaldi kaa haala, kaa nde wonnoo o Jottinoowo Sadaka Mawdo nden hitaande, o sappike Iisaa maayanan lejol ngol. <sup>52</sup> Kaa wanaa lejol ngol tan o maayanta, ko o maayanta dee, faa o mootha 6ibbe Laamdo saakiibe 6ee fuu e fedde wootere. <sup>53</sup> Gila oon jalooma, 6e ndawridi faa 6e mbara mo.

<sup>54</sup> Dum wadi so Iisaa njotti saccude hakkunde Yahuudiyankoobe. O iwi do o wonnoo doo, o yehi ngallure wiyyeteende Efrayim heettunde e ladde jeereende. O joododii ton e taalibaabe makko.

<sup>55</sup> Tawi iidi Yahuudiyankoobe biyeteedo Paska oo 6adike. Heewbe e yimbe leydi ndii njehi Urusaliima faa cenna ko'e mum'en gila iidi oo yottaaki. <sup>56</sup> Ebe tewta Iisaa. Ebe ndarii ley Suudu Dewal Mawndu nduu, ebe kaalda:

—Odon miila o wara e iidi oo naa on miilaali?

<sup>57</sup> Tawi hooreebe yottinoobe sadaka e Farisa'en njamiriino neddo fuu anndudo to mo woni yo haalu faa mo nannghee.

## 12

*No Mariyama wujiri koyde Iisaa nebam*

<sup>1</sup> Balde jeegom fade iidi Paska yottaade, Iisaa yehi Baytaniya do Laajaru mo o wuurtinnoo oo jeyaa doo. <sup>2</sup> Don 6e nedefani mo jaamdu. Marta feccani 6e, Laajaru yo gooto e jaamdoobe e Iisaa bee. <sup>3</sup> Nden Mariyama 6ami feccitere liituru nebam laabudam, uuroojam, tiifudam coggu, wuji dam e koyde Iisaa, soccir de sukundu mum. Suudu nduu fuu ukkiti. <sup>4</sup> Gooto e taalibaabe Iisaa bee, dum woni Yahuuda Isikariyota jammbotoodo mo oo, wii:

—Ko saabii so dam nebam soottaaka buudi teemeede tati cardii,\* hokkee misikiina'en?

<sup>6</sup> Walaa ko o wiiri non so wanaa o gujjo, wanaa yurmeeende misikiina'en. Kanko woni kawjootodo jawdi maabbe, omo woowi wujigitidde hen. <sup>7</sup> Iisaa wii:

—Celee e debbo oo. O resirii dam jannnde iretee-mi. <sup>8</sup> Sabi misikiina'en ana tawdee e mon jannnde fuu. Kaa miin, mi tawdataaake e mon jannnde fuu.

*No hooreebe yottinoobe sadaka anniyorii warde Laajaru*

<sup>9</sup> Yahuudiyankoobe heewbe anndi Iisaa ana Baytaniya, njehi ton. Wanaa saabe Iisaa tan waddi 6e, yalla ebe njija Laajaru guurtinaado oo duu. <sup>10</sup> Non hooreebe yottinoobe sadaka ndawridi mbaran Laajaru duu, <sup>11</sup> sabi Yahuudiyankoobe heewbe ana njoppa 6e ngoondinoya Iisaa saabe Laajaru.

*No Iisaa naatiri Urusaliima*

<sup>12</sup> Janngo mum, jamaa keewdo gardo hawrude e iidi oo nani Iisaa garoovo Urusaliima.

<sup>13</sup> Be 6ami caabe tamarooje, 6e cakkitoysi mo. Ebe kuljina, ebe mbiya:

—Jettooje e barke ngoodanii gardoowo e dow innde Joomiraado oo!† Jettooje ngoodanii mo, kanko kaananke Israa'ilila!

<sup>14</sup> Iisaa hebi mola ndakiwa, waddii, hono no Binndi dii mbiiri dum nii:

<sup>15</sup> «Yimbé ngalluure Siyona, pati kulee!\*

Yeew, kaananke mon ana wara,

ana wadffii mola ndakiwa.»‡

<sup>16</sup> Nden taalibaabe makko 6ee paamaalino ko dum woni. Kaa caggal Iisaa teddinaama, 6e miccitii ko mo sappananoо koo 6e ngadi mo. <sup>17</sup> Jamaa tawdanoodo e makko nde o wuurtinnoo Laajaru, o noddi dum iwde e yanaande ndee, kajum'en duu ana ceettii. <sup>18</sup> Dum

\* 12:5 Buudi teemeede tati cardii ana mbaara e njo6di neddo hitaande. † 12:13 Jabuura 118.25-26 ‡ 12:15 Jakariyaa 9.9

wadi so yimbe heewbe njehi cakkityoii mo sabi 6e nanii o wadii ndee haaynde. <sup>19</sup> Non Farisa'en mbyondiri:

—On njii, walaa fuu ko mbaawan-den mo, aduna oo fuu annii jokki e makko.

<sup>20</sup> Won Yunaninkooobe tawaa6e hakkunde warbe Urusaliima faa ndewa ley jalaade iidi dee. <sup>21</sup> Be 6atitii Filipa jeyaado Baytisayda ley leydi Galili, 6e mbii dum:

—Moobbo, miden njidi yiide Iisaa.

<sup>22</sup> Filipa yehi haalanoyi Andire. Be njottinoyi haala kaa Iisaa. <sup>23</sup> Iisaa jaabii 6e:

—Wakkati mo Laamdo hollata teddeengal Bii Neddo oo yottike. <sup>24</sup> Mido haalana on goonga: so wabbere alkama yooraali aawaama e leydi, heddotu yo wabbere wooter. Kaa so nde yoorii nde aawaa fuu, nde riman faa heewa. <sup>25</sup> Neddo fuu jiddu yonki mum, mursan ki, kaa jeebiido yonki mum e aduna oo, damman ki, heban nguurndam nduumiidad. <sup>26</sup> So won muuydo gollande kam, yo jokku e am. Do ngon-mi fuu, doo golloowo am duu wonata. Baabiraado teddin gollanoowo kam.

#### *No Iisaa sapporii maayde mum*

<sup>27</sup> —Jooni mi wemmbaama. Kodum mbiyan-mi? Mi wiya Abba hisinam e oo wakkati naa? Mi waawaa wiide dum sabi kammari wakkati oo ngardu-mi. <sup>28</sup> Abba, teddin innde maa.

Daande nanaa iwrude dow kammu:

—Mi teddini nde, mi teddinan nde kasen.

<sup>29</sup> Nde yimbe darinoobe ton 6ee nanunoo nden daande ndee, mbii dum riggaango kammu. Wo66e mbii:

—Malaa'ika haaldi e makko!

<sup>30</sup> Iisaa wii 6e:

—Wanaa saabe am daande ndee wardi, saabe moodon. <sup>31</sup> Jooni woni sariya aduna oo. Jooni kaananke oo doo aduna tippete sella. <sup>32</sup> Miin, so mi toownaama iwde e leydi ndii, mi foodan yimbe fuu warde e am.

<sup>33</sup> Tawi dhi haalaaji o sapporii no mo maayrata nii. <sup>34</sup> Yimbe 6ee njaabii mo:

—Sariya oo anndinii min Almasiihu yo duumotoodo. Hono aan mbiirataa kinaa Bii Neddo oo toownee? Homo woni oo Bii Neddo?

<sup>35</sup> Iisaa jaabii 6e:

—Fooyre ana wondi e mon wakkati seeda tafon. Njahon gila fooyre ana heddi e mon, pati nimre hippoo on. Jahoovo ley nimre anndaa do yahata. <sup>36</sup> Ngoondinee fooyre gila ende e mon yalla odon laatoo yimbe fooyre.

#### *No yimbe calorii goondinde Iisaa*

Iisaa haalu dum tan, yehi suudoyii 6e. <sup>37</sup> Kaayde de o wadi yeeso ma66e dee fuu, wadaali so 6e ngoondini mo, <sup>38</sup> yalla haala annabi Esaaya kaa ana tabita:

«Joomiraado, homo goondini waaju amen oo?

Homo 6annginanaa baawde Joomiraado?»<sup>§</sup>

<sup>39</sup> Be mbaawaano goondinde, sabi Esaaya wii kasen:

<sup>40</sup> «O wumnni gite ma66e,

    o helii hakkillaaji ma66e,

pati gite ma66e njiya,

    pati hakkillaaji ma66e paama

    sako 6e tuuba, so mi sellina 6e.»\*

<sup>41</sup> Dum Esaaya wii nde yiinoo teddeengal Iisaa, so haali haala makko ndee.

<sup>42</sup> Kaa dum fuu e taweede, hooree6e Yahuudiyankee heewbe ngoondinii Iisaa. Kaa saabe Farisa'en, 6e kulii yaadirde pati 6e njaltinee waajordu. <sup>43</sup> Dum woni teddineede yimbe burani 6e teddineede Laamdo.

<sup>44</sup> Iisaa haali faa toowi, wii:

—Goondindo kam, wanaa miin tan o goondini, neldo kam oo duu o goondinii dum. <sup>45</sup> Neddo fuu jiddu kam, yii neldo kam oo. <sup>46</sup> Miin, mi warii mi fooyre aduna oo, faa goondindo kam fuu pati heddooye ley nimre. <sup>47</sup> So won nando waaju am jokkaali dum, miin, mi sarataa dum. Sabi mi waradaali sarde aduna oo, faa mi hisina mo ngardu-mi.

<sup>48</sup> Oon calaniido kam, so jaabaali waajuuji am, ana jogii caroowo. Konngol ngol kaal-mi ngol sarataa dum jalaande sakitoonde. <sup>49</sup> Sabi miin, mi haaldaali hiini hoore am. Baabiraado neldo kam oo hokki kam yamiroore ko kaalan-mi e ko mbaajotoo-mi. <sup>50</sup> Miin, mido annidi yamiroore makko, kajum woni nguurndam nduumiidad. Ko kaal-mi koo, no Baabiraado haalaniri kam nii kaaltir-mi.

**13**

*No Iisaa lootiri koyde taalibaabe mum*

<sup>1</sup> Gila iidi Paska yottaaki, Iisaa ana anndi wakkati mo iwata e aduna so hootana Baabi-raado oo warii. Ga aduna gaa omo yidi yimbe makko, omo yidi ee kaaddi jilli. <sup>2</sup> Wakkati mo ee kirtotoo oo, Ibiliisa wadi e bernde Yahuuda 6ii Simon Isikariyota jammabaade mo. <sup>3</sup> Iisaa e hoore mum ana anndi to Laamdo iwri to Laamdo hootata. Laamdo wadii huunde fuu e junngo makko. <sup>4</sup> O immii e hiraande ndee, o foortii saaya makko, o bami disawel, o filii e makko. <sup>5</sup> Non o wayli ndiyam e feere lootorde, o naati e lootude koyde taalibaabe makko, omo soccira de disawel o filii ngel. <sup>6</sup> Nde o yottinoo Simon Piyeer ndee, oon wii mo:

—Moobbo, aan lootata koyde am naa?

<sup>7</sup> Iisaa jaabii mo:

—A faamaali ko ngadan-mi koo tafon, kaa a faamoyan caggal jooni.

<sup>8</sup> Piyeer wii mo:

—A lootataa koyde am abada!

Iisaa jaabii mo:

—So mi lootanaali ma, a walaa ngedu e am.

<sup>9</sup> Simon Piyeer wii mo:

—Moobbo! So non, pati haadu e koyde am tan, lootu juude am e hoore am duu.

<sup>10</sup> Iisaa wii mo:

—Lootiido fuu yo laabudo. Mo hasindinaa e lootaneede kinaa koyde tan. Onon on laabube, kaa wanaa on fuu.

<sup>11</sup> Tawi omo anndi jammbotoodo mo oo. Dum wadi so o wii wanaa on fuu ngoni laabbe.

<sup>12</sup> Nde Iisaa lootunoo koyde maabbe ndee, gamti saaya muudum, joottii, wii fe:

—On paamii ko ngaafu-mi on koo naa? <sup>13</sup> Odon noddira kam «Moobbo» odon noddira kam «Kalfaado». Ko mbiyatlon koo ana moyyi, sabi düm ngon-mi. <sup>14</sup> Ndennoo, miin Kalfaado, miin Moobbo, mi lootii koyde mon, waajibi onon duu gooto fuu lootana goddo koyde mum. <sup>15</sup> Ko ngadu-mi on koo yo tinndinol yalla onon duu, odon ngadondira hono ko ngadu-mi on koo. <sup>16</sup> Mido haalana on goonga: maccudo furataa kalfaado mum teddude, nelaado duu furataa neldo dum. <sup>17</sup> Nde wonnoo on anndii dum jooni, so nii on njokkirii non, on mbelan hoore. <sup>18</sup> Wanaa haala mon on fuu kaal-mi. Mido anndi been ee cuubii-mi, kaa kinaa ko Biindi dii mbii koo tabita: «Naamdufo e am latiri kam teppere muudum.» <sup>19</sup> Gila jooni mido haalana on düm, fade majjuum yottaade, yalla nde dum yottii fuu, odon ngoondina miin woni mo ngon-mi. <sup>20</sup> Mido haalana on goonga: neddo fuu jaabbiido nelaado am, jaabbiike kam. Neddo fuu jaabbiido kam, jaabbiike neldo kam oo duu.

*No Yahuuda jammborii Iisaa*

<sup>21</sup> Nde o haalnoodum ndee, yonki makko jawni, o wii:

—Mido haalana on goonga: gooto moodon jammboto kam.

<sup>22</sup> Taalibaabe bee yeewondiri. Be anndaa mo o haalata haala mum. <sup>23</sup> Gooto e taalibaabe fee, mo Iisaa horsini oo, ana joodinoor banngi mum. <sup>24</sup> Simon Piyeer himyi mo gite mo lamndo Iisaa homo o haalata haala mum. <sup>25</sup> Non taalibbo oo naayorii hedde Iisaa, wii:

—Moobbo, dum homo?

<sup>26</sup> Iisaa jaabii:

—Mo ndokkan-mi lonngere nde cuuwan-mi ndee oo.

O suuwi lonngere, o hokki Yahuuda 6ii Simon Isikariyota oo. <sup>27</sup> Caggal lonngere ndee, Ibiliisa naati e Yahuuda. Iisaa wii mo:

—Wadu ko ngadataa koo law!

<sup>28</sup> Tawi fay gooto e joodiife don bee faamaali ko Iisaa haalani mo koo. <sup>29</sup> Nde wonnoo Yahuuda woni kawjotoodo jawdi maabbe, yoga miilii Iisaa wii mo somonoyoo iidi, naa daja ko o hokki misikiina'en. <sup>30</sup> Yahuuda nanngu lonngere ndee tan, yalti oon wakkati fuu. Dum jemma.

*Haala yamiroore heyre*

<sup>31</sup> Nde Yahuuda yaltunoo ndee, Iisaa wii:

—Jooni Bii Neddo teddinaama, Laamdo duu teddiniraama saabe makko. <sup>32</sup> So Laamdo teddiniraama saabe makko,<sup>†</sup> kajum duu teddinan mo e hoore mum, teddinan mo law.

<sup>33</sup> Sukaabe am, mido wondi e mon seeda tafon. On tewtan kam. Mido wiya on jooni hono ko mbiinoo-mi Yahuudiyankee bettaade: on mbaawaa yaade to njahan-mi too. <sup>34</sup> Mido hokka on yamiroore heyre: njidondiree! Hono no njidir-mi on nii, onon duu njidondiron hono non! <sup>35</sup> So on njidondirii, yimbe fuu annditan on taalibaabe am.

\* <sup>13:18</sup> Jabaara 41.10    † <sup>13:32</sup> Puddoode aaya 32, «So Laamdo teddiniraama saabe makko», tawaaka e dereeji burdi fuu booyde dii.

*No Iisaa holliri Piyeer yankiran dum*

<sup>36</sup> Simon Piyeer wii mo:

—Moobbo, hoto njahataa?

Iisaa jaabii mo:

—To njahan-mi jooni too, a waawaa jokkude e am. Kaa caggal jooni a jokkan e am!

<sup>37</sup> Piyeer wii mo:

—Moobbo, ko saabii so mi waawaa jokkude e maa jooni? Mido hokkitira yonki am saabe maa.

<sup>38</sup> Iisaa jaabii mo:

—Goonga fuu, a hokkitiran yonki maa saabe am naa? Mido haalane goonga: fade ndontoori jogginde hannde a wiyan a anndaa kam cili tati.

## 14

*No Iisaa wiiri kajum woni laawol ngol*

<sup>1</sup> Iisaa wii taalibaae mum bee:

—Pati imminee hakkille mon. Ngoondinee Laamdo, ngoondinee kam. <sup>2</sup> Cuudi keewdi ana ley galle Baabiraado am. So walaano, mi wiyan no on. Mi yahan, mi moyyinano ya on ton nokku. <sup>3</sup> Ndennoo, so mi moyyinano yii on nokku, mi wartan kasen mi 6amta on faa onon duu ngeonor to ngeonan-mi too. <sup>4</sup> Odon anndi to njahan-mi too, odon anndi laawol mum.

<sup>5</sup> Tomaa wii mo:

—Moobbo, min anndaa to njahataa, hono min anndirta laawol mum?

<sup>6</sup> Iisaa jaabii mo:

—Miin woni laawol ngol, miin woni goonga oo, miin woni nguurndam dam. So wanaa saabe am fay gooto waawaa yaade to Baabiraado. <sup>7</sup> Sinndo odon anndunoo kam, maa on anndu Baabiraado am oo duu. Gila jooni on anndii mo, on njii mo.

<sup>8</sup> Filipa wii mo:

—Moobbo, hollu min Baabiraado, dum tan ana hey min.

<sup>9</sup> Iisaa wii mo:

—No ngondir-mi e moodon faa 6ooyi nii fuu, Filipa, a anndaali kam naa? Jidoo kam, yi Baabiraado. Hono mbiirataa: «Hollu min Baabiraado?» <sup>10</sup> A goondinaali mido e ley Baabiraado, Baabiraado ana e am naa? Waajuuji di mbaajii-mi on dii fuu, mi waa jortaako dii hiini hoore am. Baabiraado gondo e am oo gollata golleeji mum. <sup>11</sup> Ngoondinee kam so mi wii mido e Baabiraado, Baabiraado ana e ley am. Fay so on ngoondinaali dum, ngoondiniron kam saabe golleeji dii. <sup>12</sup> Mido haalana on goonga: neddo fuu goondindo kam, gollan kajum duu golleeji dii ngollan-mi dii, gollan ko buri di, sabi mi kootoowo to Baabiraado am. <sup>13</sup> Mi wadan on huunde fuu ko jaagori-don Laamdo saabe am. Mi wadan dum yalla Baabiraado oo ana teddiniree saabe Biddo oo. <sup>14</sup> So won ko jaagori-don Laamdo saabe am, mi wadan on.

*No Iisaa fodiri neldan Ruuhu Ceniido*

<sup>15</sup> —So odon njidi kam, on njokkan jamirooje am. <sup>16-17</sup> Mi jaagoto Baabiraado hokka on Balloovo goddo, oo woni Ruuhu goonga, yalla omo wonda e mon faa abada. Aduna oo waawaa jaabaae mo, sabi yiyataa mo, anndaa mo. Kaa onon, odon anndi mo sabi omo wondi e mon, omo e mon. <sup>18</sup> Mi yoppataa on atiime'en, mi wartan e mon. <sup>19</sup> So 6ooyii seeda aduna oo yiyataa kam kasen. Kaa onon, on njiiyan kam, sabi mi guurdo, onon duu on nguuran. <sup>20</sup> Nannde nden on paaman mido e ley Baabiraado, odon e am, mido e ley mon. <sup>21</sup> Neddo fuu anndudo jamirooje am so jokki de, kajum woni jiddo kam. Jidoo kam, Baabiraado am yidan dum. Miin duu, mi yidan dum, mi 6annginanum dum hoore am.

<sup>22</sup> Yahuuda, mo wanaa Yahuuda Isikariyota, jaabii mo:

—Moobbo, hono 6annginirantaa min hoore maa, tawee a 6annganaali aduna oo?

<sup>23</sup> Iisaa jaabii mo:

—So neddo ana yidi kam, jokkan konngol am, Baabiraado am yidan dum. Miin e Baabiraado am oo min ngaran to mum min njooddoo e mum. <sup>24</sup> Neddo fuu mo yidaa kam, jokkataa kongol am. Haala ka nanaton kaa, ka wanaa ka am, ka haala Baabiraado neldo kam oo. <sup>25</sup> Dum kaalanum-mi on gila mido tawdaa e mon. <sup>26</sup> Ruuhu Ceniido, Balloovo on mo Baabiraado neldirta on saabe am oo, kajum anndinta on kulle fuu. O miccintinan on kombaajino-mi on koo fuu.

<sup>27</sup> Jam njoppidan-mi on, jam am ndokkan-mi on. Miin, mi hokkirtaa on no aduna oo hokkirta on nii. Pati imminee hakkille mon, pati kulee. <sup>28</sup> On nanii ko mbii-mi on: «mi yahan, caggal mum mi warta e mon.» Sinndo odon njidunoo kam, maa on ceyoroo mi jahoowo to Baabiraado, sabi Baabiraado buri kam teddude. <sup>29</sup> Mi haalanii on jooni gila dum waraali, yalla so dum warii, odon ngoondina. <sup>30</sup> Haala am e moodon heewataa kasen,

sabi kaananke oo aduna ana wara. Fay huunde o waawaa e am.<sup>31</sup> No Baabiraado yamiri kam nii, non ngaciran-mi, faa aduna oo faama miso yidi Baabiraado. Immee njehen, iwen doo.

## 15

### *No Iisaa wiiri kajum woni peguuwi ngoongaraawi*

<sup>1</sup>—Miin woni peguuwi ngoongaraawi, Baabiraado woni jom ngesa peguuje.<sup>2</sup> Cabal am dimaral fuu o feyyan dum, cabal dimoowal fuu, o saltoto dum yalla engal 6eydoo rimde.<sup>3</sup> Onon, jooni on laabubé saabe waaju mo mbaajii-mi on oo.<sup>4</sup> Niibee e am. So on jiiibii e am, miin duu mi jiiiban e mon! Hono no cabal peguuwi waawaa rimde e hoore mum kinaa tawee engal jiiibii e peguuwi nii, hono non onon duu, on mbaawaa rimde so on jiiibaali e am.<sup>5</sup> Miin woni peguuwi, onon ngoni cabé. Neddo fuu jiiibudo e am, mi jiiibii e mum, riman duu faa heewa. On mbaawaa wadude fay huunde so on ngaldaa e am.<sup>6</sup> Neddo fuu mo jiiibaali e am, tippete sella hono no cabal peyyaangal nii, yoora. Cabé joorde dee moobtete, tippee ley yiite, de ku66a.<sup>7</sup> So on jiiibii e am, waaju am jiiibii e mon, nden kaa jaagee Laamdo ko muuy-don fuu, on keban.<sup>8</sup> So on ndimii faa heewii, dum hollititta on laatike taalibaabe am, nden yimbe njiyata teddeengal Baabiraado am.<sup>9</sup> Hono no Baabiraado yifiri kam nii, miin duu hono non njidir-mi on. Niibee e jilli am.<sup>10</sup> So on njokkii jamirooje am, on jiiiban e jilli am, hono no njokkir-mi jamirooje Baabiraado am so jiiibuu-mi e jilli mum nii.

<sup>11</sup> Mi waajike on dum yalla seyo am ana jiiiba e mon, seyo mon hi66a.<sup>12</sup> Annii yamiroore am: njidondiree hono no njidir-mi on nii.<sup>13</sup> Huunde fuu buraa dii doo jilli mawnude: neddo hokkitira yonki mum saabe yi66e mum.<sup>14</sup> Onon ngoni yi66e am, so on ngollieko no njamir-mi on koo.<sup>15</sup> Mi wiyatataa on maccubé kasen sabi maccudo anndaa ko kalfaado mum gollata. Mido wiya on yi66e, sabi ko narru-mi Baabiraado am koo fuu, mi anndinii on.<sup>16</sup> Wanaa onon cubii kam, miin su66i on so yamiri on njahon ndimoyon 6i66e, 6i66e mon nduumoo, yalla Baabiraado ana hokka on huunde fuu ko jaagori-don saabe am.<sup>17</sup> Njidondiree! Dum njamir-mi on.

### *No aduna oo wajiri Iisaa e taalibaabe mum fuu*

<sup>18</sup>—So aduna oo ana wajiri on, anndeet, miin o adii wajude.<sup>19</sup> Sinndo on laatinoke adunankoo6e, maa aduna oo yifu on. Kaa on nganaa adunankoo6e. Mi subike on mi seenndii on e aduna oo. Dum saabanii mo wajude on.<sup>20</sup> Miccitee ko mbiinoo-mi on koo: «Maccudo burataa kalfaado mum.» So 6e torrii kam, 6e torran on, onon duu. So 6e njokkii konngol am, 6e njokkan ngol mon ngol duu.<sup>21</sup> Be ngadiran on dum fuu saabe am, sabi 6e anndaa neldo kam oo.<sup>22</sup> So mi waraalino, mi waajanooki 6e, 6e jinjataakeno. Kaa jooni mi warii, mi waajike 6e, 6e ngalanaa luutti ma66e dii ujuuru fuu.<sup>23</sup> Neddo fuu bajudo kam, wajii Baabiraado am oo duu.<sup>24</sup> Sindo mi gollaalino dii golleeji dii fay gooto meedaaли gollude yeeso ma66e, 6e jinjataakeno. Kaa jooni 6e njii dii fuu, 6e keddi wajude kam, miin e Baabiraado am.<sup>25</sup> Dum wadii faa tabintina ko winndaa ley Sariya ma66e: «Be mbajirii kam dow meere.»\*

<sup>26</sup> Ruuhu goonga iwroowo to Baabiraado, Ballooovo on mo neldan-mi on oo, nde warii, kajum seettantoo kam.<sup>27</sup> Onon duu, on ceettanto kam sabi odon ngondi e am gila pufsoode.

## 16

<sup>1</sup>—Mi waajike on dum pati on njoppu goondinal.<sup>2</sup> Be njaltinan on cuudi baajordi. Wakkati waroyan nde bardo on fuu miilata rewii Laamdo.<sup>3</sup> Be ngadan dum sabi 6e anndaa Baabiraado oo, 6e anndaa kam miin duu.<sup>4</sup> Mi waajike on dum, yalla so wakkati oo warii, odon miccitoo mi haalaniino on dum.

### *Haala golle Ruuhu Ceniiido*

—Mi haalanaali on gila arannde sabi mido wondi e mon.<sup>5</sup> Jooni mido nii hootana neldo kam oo, kaa fay gooto e mon lamndaaki kam hoto njahan-mi.<sup>6</sup> On cunaama sanne saabe ko kaalan-mi on dum koo.<sup>7</sup> Dum fuu e taweede, mido haalana on goonga: yaadu am buri moyyande on. Sabi so mi yahaali, Ballooovo on oo warataa. Kaa so mi yehii, mi neldan on mo.<sup>8</sup> So o warii, o jinjan aduna oo banngal luutti e fooccitaare e sariya.<sup>9</sup> Banngal luutti, sabi 6e ngoondinaali kam.<sup>10</sup> Banngal fooccitaare, sabi mido hoota to Baabiraado oo, on njiyatataa kam kasen.<sup>11</sup> Banngal sariya, sabi kaananke oo doo aduna saraama.

<sup>12</sup> Mido jogii ko heewi kasen ko mi waajoo on, kaa on mbaawataa dum jooni.<sup>13</sup> Nde Ruuhu goonga oo warii fuu, dowan on faade e goonga fuu. Sabi o haaldataa hiini hoore makko, o haalan on ko o nani fuu, o humpitan on ko waroyta.<sup>14</sup> Kanko, o teddinan kam,

\* 15:25 Jabaara 35.19; 69.5

sabi o 6aman ko njey-mi koo, o humpitira on.<sup>15</sup> Ko Baabiraado oo jogii fuu, miin jey. Dum saabii mbii-mi o humpitan on ko o hebi e am koo.

#### No sunu waylitortoo seyo

<sup>16</sup> —So 6ooyii seeda, on njiyatataa kam, so 6ooyii seeda kasen, njiyon kam.

<sup>17</sup> Yoga e taalibaa6e makko see lamndondiri, mbii:

—Kodum woni maanaa haala makko so o wii «so 6ooyii seeda, on njiyatataa kam e so 6ooyii seeda kasen, njiyon kam», o wii kasen «sabi mi jahoowo to Baabiraado»?

<sup>18</sup> Be mbii:

—«So 6ooyii seeda», kodum düm firritata? Min paamaali ko o wii koo.

<sup>19</sup> Nde Isaaa anndunoo ebe njidi lamndaade düm ndee, wii 6e:

—Odon lamndondira maanaa haala am kaa: «So 6ooyii seeda on njiyatataa kam, so 6ooyii seeda kasen, njiyon kam.»<sup>20</sup> Mido haalana on goonga: onon, on mboyan, on mboytoto, tawee aduna oo ana seyii. On cujlan, kaa sunu mon waylitoto seyo.<sup>21</sup> So debbo ana njaywa, mo sunjan sabi wakkati makko warii. Kaa so cukalel ngel rimaama, o miccitataako naawalla njatware makko, no seyo makko foti heewde dow aduna oo hebi kodo.<sup>22</sup> Onon duu hono non cujlr-don jooni, kaa mi yiitan on kasen, on ceyoto, fay gooto waawaa bonnude seyo mon.<sup>23</sup> Nannde nden, on lamndataako kam fay huunde. Mido haalana on goonga: huunde fuu ko jaagi-don Baabiraado oo, hokkiran on saabe am.<sup>24</sup> Faa jooni, walaa fuu ko jaagori-don saabe am. Naagee, on keban, yalla seyo mon ana hi66a.

#### No Isaaa jaalorii aduna

<sup>25</sup> —Ko kaalan-mi on jooni koo yo haala hippaka. Wakkati waran, wakkati mo mi hippataa haala. Nden kaa mi haalanan on haala Baabiraado faa laa6a.<sup>26</sup> Nannde nden on jaagorto Laamdo saabe am. Mi wiyaali mido jaaganoo on Baabiraado,<sup>27</sup> sabi Baabiraado e hoore mum ana yidi on. O yidirii on saabe odon njidi kam, on ngoondinii to Laamdo iwru-mi.<sup>28</sup> Mi iwii to Baabiraado, mi warii e aduna. Jooni mido dala aduna oo, mi hootana Baabiraado.

<sup>29</sup> Taalibaa6e makko mbii mo:

—Jooni kaa, a haalii faa laa6i, walaa fuu ko kippu-daa hen.<sup>30</sup> Jooni kaa, min anndii walaa fuu ko a anndaa, fay gooto hasindinaa e lamndaade ma. Dum saabii so min ngoondini a iwodo to Laamdo.

<sup>31</sup> Isaaa jaabii 6e:

—Jooni, on ngoondinii naa?<sup>32</sup> Wakkati oo ana wara, o warii jooni, do on fuu caakotodon, homo fuu hoota suudu mum, njoppon kam mi teeldo. Kaa mi wanaa teeldo, sabi Baabiraado oo ana wondi e am.<sup>33</sup> Mi haalanii on düm, yalla odon kemra jam e am. Odon ngondi e torra ley aduna oo. Kaa ceyo-don, miin, mi jaalike aduna oo!

## 17

#### No Isaaa duworii saabe taalibaa6e mum

<sup>1</sup> Nde Isaaa waajinoo waajuuji dii ndee, tiggiti kammu, wii:

—Baabiraado, wakkati oo warii, teddin Biya, yalla 'Biya oo diu ana teddine.<sup>2</sup> Sabi a hokkii mo baawde dow neddo fuu, yalla omo hokka been fe ndokku-daa mo 6ee fuu nguurndam nduumiidam.<sup>3</sup> Nguurndam nduumiidam woni 6e annde, aan Laamdo goongaraajo gooto oo, 6e annda Isaaa Almasihu mo nel-daa oo.<sup>4</sup> Mi teddini ma e dow leydi ndii, mi yottinii golle mo ndokku-daa kam mi golla oo.<sup>5</sup> Jooni kaa, Baabiraado, teddininam teddeengal ngal njoginoo-mi do maa doo gila aduna oo tagaaka ngal.

<sup>6</sup> Yim6e fe ndokku-daa kam e aduna oo bee, mi 6annginanii dum'en innde maa. Aan jey 6e, a hokkii kam 6e, ebe njokki konngol maa.<sup>7</sup> Jooni kaa, 6e anndii ko ndokku-daa kam koo fuu to maa iwi,<sup>8</sup> sabi mi haaltanii 6e haalaaji di kaalan-daa kam dii, 6e njabi di. Be kefii tayoral to maadaa iwru-mi, fe ngoondinii aan nelii kam.<sup>9</sup> Mido jaagore saabe ma66e. Mi jaagortaako saabe aduna oo, mido jaagoro saabe 6e ndokku-daa kam 6ee, sabi aan jey 6e.<sup>10</sup> Be njey-mi fuu, aan jey, 6e njey-daa fuu, miin jey. Mi teddininiraama saabe ma66e.<sup>11</sup> Kam6e, 6e keddoto e aduna oo, kaa miin, mi heddataako e makko. To maa njahan-mi. Aan Baabiraado Ceniido, reenir 6e baawde maada de ndokku-daa kam dee, yalla ebe laatoo gooto hono no men nii.<sup>12</sup> Nde ngondunoo-mi e ma66e ley aduna oo ndee, mi reenirii 6e baawde maa de ndokku-daa kam dee, mi tiidii e ma66e. Fay gooto majjaali so wanaa yiitenke oo, yalla ko sappaa e Binndi dii koo ana tabita.<sup>13</sup> Jooni kaa mido wara to maa. Mido haala dii haalaaji gila mido heddi e aduna oo tafon, yalla seyo am ana hi66a e ma66e.<sup>14</sup> Mi yottinii 6e konngol maa. Aduna oo wajii 6e, sabi 6e njeyaaka e makko, hono no miin duu mi jeyiraaka e makko nii.<sup>15</sup> Mi jaagaaki ittaa 6e aduna oo, kaa mido jaage ndeena 6e e Iibiliisa.<sup>16</sup> Be njeyaaka e aduna oo, hono no miin duu mi jeyiraaka e makko nii.<sup>17</sup> Sennir 6e goonga maa. Konngol maa woni goonga.<sup>18</sup> Hono no nelir-daa kam e oo aduna nii, miin

duu non nelir-mi 6e e makko.<sup>19</sup> Mido sennira hoore am saabe ma66e, yalla kam6e duu e6e laatoo senniraafe goonga.

<sup>20</sup> Wanaa saabe ma66e tan jaagorto-maa-mi. Mido jaagoroo duu saabe 6een goondinir6e kam waajuuji ma66e,<sup>21</sup> yalla 6e fuu e6e laatoo gooto. Hono no aan Baabiraado laatori-daa e am, miin duu mido e maa nii, yalla kam6e duu e6e laatoo gooto e men, yalla aduna oo ana goondinaa aan neli kam.<sup>22</sup> Mi wadaniit 6e teddeengal ngal ngadan-daa kam ngal, yalla e6e laatoo gooto, hono no laatori-den gooto nii.<sup>23</sup> Miin mido e ma66e, aan ada e am, yalla ngootummaaku ma66e ana hi66a, yalla aduna oo ana annadaa aan neli kam, mo annadaa duu ada yidi 6e hono no njidir-daa kam nii.<sup>24</sup> Baabiraado, mido yidi 6e ndokku-daa kam 6ee ngonda e am nokku fuu do tawaa-mi, yalla e6e njiya teddeengal ngal ngadan-daa kam ngal sabi a yidii kam gila aduna oo diidaaka.

<sup>25</sup> Baabiraado pooccitiido, aduna oo anndaa ma, kaa miin noo mido anndu maa, 6ee doo ana anndi aan neli kam.<sup>26</sup> Mi anndinii 6e ko ngon-daa, mi beydan anndinde 6e, yalla jilli njid-daa kam dii ana tawee e ma66e, miin duu mi tawee e ma66e.

## 18

### No Iisaa nanngiraa

<sup>1</sup> Nde Iisaa duworinoo nii ndee, yaadi e taalibaafe mum ootoo bannge callugol biyeteengol Kedoron. Be naati ton e nokku keewdö ledde.<sup>2</sup> Yahuuda jammbootoodö mo oo ana anndi nokku oo, sabi Iisaa e taalibaafe mum ana mo6totonoo ton sanne.<sup>3</sup> Yahuuda ardii oorngal sordaasi'en e golloo6e iwru6e to hooree6e yottino6e sadaka e Farisa'en. Be ngari ton, e6e njogii cunkume ku66ooje e lampaaji e kaborde.<sup>4</sup> Nde wonnood Iisaa ana anndi ko fa'i warde e mum fuu, sakkittii 6e, wii:

—Homo tewtaton?

<sup>5</sup> Be njaabii mo:

—Iisaa Nasaraatunke oo.

O wii 6e:

—Miin woni kanko!

Yahuuda jammbootodo mo oo duu ana dardii e ma66e.<sup>6</sup> Nde Iisaa wiinoo «Miin woni kanko» ndee, 6e njaari cagga-caggarde 6e caami e leydi.<sup>7</sup> Iisaa lamndii 6e kasen:

—Homo tewtaton?

Be njaabii:

—Iisaa Nasaraatunke oo.

<sup>8</sup> Iisaa wii 6e:

—Mbii-mi on, miin woni kanko! So miin tewtaton, accee 6ee kaa njaha.

<sup>9</sup> Non dum laatori, yalla haala Iisaa kaa ana tabita: «Mi majjoraaka fay gooto e 6e ndokku-daa kam bee.»<sup>10</sup> Simon Piyeer ana joginoo kaafaawi, soorti ki, soppi golloo6o Jottinoowo Sadaka Mawdo e nowru jaamru faa ndu tayi. Golloo6o oo ana wiyee Malkus.  
<sup>11</sup> Nden Iisaa wii Piyeer:

—Soornu kaafaawi maa kii e 6aro mum. Ada miili mi yarataa horde bone nde Baabiraado hokki kam ndee naa?

<sup>12</sup> Don sordaasi'en e kaananke mum e gollano6e hooree6e Yahuudiyankoo6e nanngi Iisaa, ka66i dum.<sup>13</sup> Be nabi mo to Annas tafon. Annas yo esii Kayafas laatiido Jottinoowo Sadaka Mawdo ley nden hitaande.<sup>14</sup> Kanko Kayafas oo dawrannoo hooree6e Yahuudiyankoo6e dabare, wii: ko 6uri moyyude e yim6e lejol ngol, ned6o gooto maayana 6e.\*

### No Piyeer wadi so yankiri Iisaa

<sup>15</sup> Simon Piyeer e taalibbo god6o njokkitii Iisaa. Taalibbo oo ana anndondiri e Jottinoowo Sadaka Mawdo oo, dum wadi so o he6i naaddude e Iisaa galle mawdö hooree6e yottino6e sadaka oo.<sup>16</sup> Piyeer kaa, darii damal sella too. Taalibbo anndondirdö e Jottinoowo Sadaka Mawdo oo, yalti haaldi e debbo doomoowo damal ngal oo, naanni Piyeer.<sup>17</sup> Kordso doomoowo damal oo lamndii Piyeer:

—Aan nee, a wanaa gooto e taalibaafe gorko oo naa?

Piyeer jaabii mo:

—Mi wanaa!

<sup>18</sup> Nde wonnood jaangol ana heewi, golloo6e e doomo6e ku66iino yiite ana yuwloo. Piyeer duu dardii e ma66e ana yuwloo.

### No maw6e diina cariri Iisaa

\* **18:14** Yuhanna 11.49-50

<sup>19</sup> Nden Jottinoowo Sadaka Mawdō oo lamndii Iisaa haala taalibaaēe mum e waaju mum.  
<sup>20</sup> Iisaa jaabii mo:

—Mi 6annginani aduna oo waaju am. Wakkati fuu mido waajoo ley cuudi baajordi e ley Suudu Dewal Mawndu to Yahuudiyankooēe fuu kawrititta too. Walaa fuu ko kaaldu-mi cuucuukka. <sup>21</sup> Ko lamndorto-daa kam? Lamnda been hettindiiēe kam. Kambe kaa, eēe anndi ko mbaajii-mi koo.

<sup>22</sup> Nde Iisaa haalnoo dum ndee, gooto e doomoobēe bee fii mo banaawo, wii:

—Nii jaaborto-daa Jottinoowo Sadaka Mawdō oo naa?

<sup>23</sup> Iisaa jaabii mo, wii:

—So ko boni mbii-mi, haalanam ko boni e majjum. So tawii ko moyyi mbii-mi, ko saabii so pii-daa kam?

<sup>24</sup> Nden Annas neldi mo to Kayafas Jottinoowo Sadaka Mawdō oo, omo ha66ii.

*No Piyeer wadi so yankiri Iisaa kasen*

<sup>25</sup> Simon Piyeer ana darinoo ton ana yuwloo. Faa 6e mbii mo:

—Aan, a wanaa gooto e taalibaaēe makko 6ee naa?

O yeddi, o wii:

—Mi wanaa!

<sup>26</sup> Gooto e gollanoobēe Jottinoowo Sadaka Mawdō oo, sakiike mo Piyeer tayunoo nowru muudum oo, wii:

—Mi yiidaalino ma e makko ley nokku keewdō ledde too naa?

<sup>27</sup> Piyeer yeddi kasen, e oon wakkati fuu, ndontoori joggini.

*No Iisaa sariraayeeso Pilaatu*

<sup>28</sup> Caggal dum, 6e itti Iisaa to Kayafas gila beetee kecco, 6e na6i mo to hu6eere goforneer oo. Na6u6e mo 6ee naataali hu6eere ndee, sabi so 6e naatii nde, 6e so6an, 6e jaamataa ndeendi iidi Paska ndii. <sup>29</sup> Pilaatu, goforneer oo, tawoyi 6e sella too, wii:

—Kodum ngullaniri-don oo gorko?

<sup>30</sup> Be njaabii mo:

—Sinndo o gollaalino ko boni, min ngaddataano mo ga maa.

<sup>31</sup> Nden Pilaatu wii 6e:

—Na6ee mo, cardon mo sariya moodon.

Yahuudiyankooēe bee njaabii:

—Min ndunjanaaka warde fay gooto.

<sup>32</sup> Nii haala ka Iisaa haalnoo haala maayde mum kaa tabitiri. <sup>33</sup> Pilaatu naatti galle mum, noddi Iisaa, wii dum:

—Aan woni kaananke Yahuudiyankooēe oo naa?

<sup>34</sup> Iisaa jaabii mo:

—Aan e hoore maa wii non naa wo66e narru-daa?

<sup>35</sup> Pilaatu jaabii mo:

—Miin, mi Yahuudiyanke naa? Ko ngadu-daa so lepol maa e hooreebēe yottinoobēe sadaka ngaddu maa ga am?

<sup>36</sup> Iisaa jaabii:

—Laamu am jeyaaka e oo aduna. Sinndo omo jeyanoo e oo aduna, gollooobēe am kabotono pati mi naata juude hooreebēe Yahuudiyankooēe. Kaa jooni laamu am oo wanaa mo doo.

<sup>37</sup> Nden Pilaatu wii mo:

—Ndennoo, a kaananke?

Iisaa jaabii:

—No mbii-daa nii, mi kaananke. Walaa fuu ko ndimira-6i so ngar-mi ley aduna oo so wanaa faa mi seettoo goonga. Neddo fuu jiddō goonga, ana nana daande am.

<sup>38</sup> Pilaatu wii mo:

—Goonga? Kodum woni goonga?

Nde o haalnoo dum ndee, o yalti kasen, o tawtoyi Yahuudiyankooēe bee to sella too, o wii 6e:

—Mi he6aali feloore fay wootere e makko. <sup>39</sup> Kaa ley aada moodon, iidi Paska fuu mido yoppitana on kasunke gooto. Odon njidi mi yoppitana on kaananke Yahuudiyankooēe oo naa?

<sup>40</sup> Be fuu 6e ngulli, 6e mbii:

—Wanaa oo, Barabas min njidi.

Barabas nee yo janooowo.

**19**

<sup>1</sup> Nden Pilaatu nanngi Iisaa, yamiri fiyee dorri. <sup>2</sup> Sordaasi'en 6ee caji tenngaade gi'e, kippi e hoore makko, foorni mo burmusuure wodeere.\* <sup>3</sup> Be fattitii mo, efe mbiya:

—Sadi, kaananke Yahuudiyankoo6e!

E6e piya mo banaaje. <sup>4</sup> Pilaatu yalti kasen, wii Yahuudiyankoo6e 6ee:

—Mi yaltinan mo faa anndon mi he6aali feloore fay wootere e makko.

<sup>5</sup> Non Iisaa yaltinaa ana hippii tenngaade gi'e ndee, ana foornii saaya mbodeewa kaa.

Pilaatu wii 6e:

—Gorko oo annii!

<sup>6</sup> Nde hooreeb6e yottinoob6e sadaka e doomoob6e 6ee njiinoo mo ndee, ngulli mbii:

—Tontu mo e leggal bardugal! Tontu mo e leggal bardugal!

Pilaatu wii 6e:

—Nanngee mo onon tonton mo, sabi miin kaa, mi he6aali feloore e makko.

<sup>7</sup> Yahuudiyankoo6e njaabii mo:

—O luuttii sariya amen. E ley sariya amen oo kaa waajibi o waree, sabi o wadii hoore makko o Bii Laamdo.

<sup>8</sup> Nde Pilaatu nanno kaa haala ndee, kulol mum 6eydii. <sup>9</sup> O naatti hu6eere ndee kasen o wii Iisaa:

—Aan, hoto iwataa?

Iisaa jaabaaki mo fay huunde. <sup>10</sup> Nden Pilaatu wii mo:

—Miin muroto-daa naa? Tama a anndaa mido waawi yoppitidde ma, mido waawi tontude ma?

<sup>11</sup> Iisaa jaabii mo:

—So wanaa Laamdo hokku maa baawde, a waawaano e am fay huunde. Dum saabii so gattudo kam e junngo maa oo 6ur maa jinjinaade.

<sup>12</sup> Gila nden Pilaatu ana ndaara yoppitinde mo. Dum saabii so Yahuudiyankoo6e ana ngulla, ana mbiya:

—So nii a yoppitii mo, a wanaa gido kaananke Roma mawdo oo. Neddo fuu gadudo hoore mum kaananke yo gajo kaananke Roma.

<sup>13</sup> Nde Pilaatu nanno dii haalaaji ndee, yaltini Iisaa, joodii dow joodorgal sariya, nokku biyeteedo Dinngira Kaaye (e ibaraninkoore omo wiyee Gabbata). <sup>14</sup> Nden yo jannde lanndinal iidi Paska, wakkati hakkunde naange. Pilaatu wii Yahuudiyankoo6e:

—Kaananke moodon anniil!

<sup>15</sup> Be nduki semmbe:

—War mo! War mo! Tontu mo e leggal bardugal!

Pilaatu jaabii:

—Mi tonta kaananke moodon oo naa?

Hooreeb6e yottinoob6e sadaka 6ee mbii:

—Min ngalaa kaananke ko wanaa kaananke Roma mawdo oo.

<sup>16</sup> Nden o hokki 6e Iisaa faa 6e tontoya dum.

*No Iisaa tontiraa dow leggal bardugal*

Nii 6e nanngi Iisaa, 6e na6i dum. <sup>17</sup> Iisaa yalti ana roondii leggal mum bardugal faa yottii nokku biyeteedo Laagal Hoore (e ibaraninkoore omo wiyee Golgata). <sup>18</sup> Don 6e tontidi mo e didon wob6e: oo nano, oo jaamo, Iisaa ana lommbii. <sup>19</sup> Pilaatu winndi e alluwal: IISAA NASARAATUNKE OO, KAANANKE YAHUUDIYANKOOBE. O yamiri ngal takkee e leggal bardugal ngal. <sup>20</sup> Yahuudiyankoo6e heew6e njanngii binndi dii sabi d6 Iisaa tontaa doo woddaa ngalluure ndee. Alluwal ngal winndaama e ibaraninkoore e yunaninkoore e romankoore. <sup>21</sup> Nden hooreeb6e yottinoob6e sadaka 6ee mbii Pilaatu:

—Pati winndu: «Kaananke Yahuudiyankoo6e», winndu: «o wii kanko woni kaananke Yahuudiyankoo6e».

<sup>22</sup> Pilaatu jaabii:

—Ko mbinndu-mi koo winndaama, tilike.

<sup>23</sup> Nde sordaasi'en 6ee tilinoo tontude Iisaa ndee, pecci kaddule makko pecce nay. Homo fuu 6ami feccere mum. Be 6ami saaya makko duu. Saaya kaa walaa joootol. Ka fuu ka lefol gootol. <sup>24</sup> Sordaasi'en 6ee kaaldi:

—Pati ceeken saaya kaa. Ngaden ka urwa, yeewen ke6ooowo ka.

Dum wadi, yalla ko sappaa e Binndi dii koo ana tabita:

«Be peccii kaddule am hakkunde ma66e,

6e ngadii saaya am urwa.»†

\* **19:2** Wakkati Iisaa, burmusuure wodeere yo saaya ka kaananke foornotoo. † **19:24** Jabuura 22.19

Dum sordaasi'en 6ee ngadi.

<sup>25</sup> Inna Iisaa, e sakiilke mum debbo, Mariyama jom suudu Kolopa, e Mariyama mo Magdala ana ndarii bannge leggal ngal Iisaa tontaa e mum ngal. <sup>26</sup> Iisaa yii inna mum e taalibbo mum korsudo oo ana ndarodii, wii inna mum:

—Inna, 6iya annii!

<sup>27</sup> Nden o wii taalibbo oo:

—Inna maa, annii.

Gila nden taalibbo oo naõi Mariyama galle mum.

### *Haala maayde Iisaa*

<sup>28</sup> Caggal dum, Iisaa anndi walaa fuu ko heddii. Yalla ko Binndi dii mbii koo ana tabita, o wii:

—Mi domdii!<sup>‡</sup>

<sup>29</sup> Mbulku keewdo biineegiri ana wonnoodon. Be cuuwi liccere e biineegiri oo, 6e kabbi e loocol hisopiyawol, 6e cukki e hunduko makko. <sup>30</sup> Nde Iisaa buuccinoo biineegiri oo ndee, wii:

—Tilike!

O turi hoore, o dali aduna. <sup>31</sup> Nden yo jaannde lanndinal iidi. Hooree6e Yahuudiyanchoobe ndaardi Pilaatu yalla korre tontaabe bee ana kelee, 6eem 6amtee, pati terde dee keddo e ledde dee jalaande fowteteende. Sabi jalaande ndee yo teddunde. <sup>32</sup> Non sordaasi'en 6ee ngari, keli korre worbe fidon tontidanoobe e Iisaa see. <sup>33</sup> Kaa nde 6e njottinoo Iisaa ndee, 6e tawi mo maayii. Dum saabii 6e kelaali korre makko. <sup>34</sup> Kaa gooto e sordaasi'en bee yuwi Iisaa labbo e wutkuldu. Don yiiyam e ndiyam mbaacii. <sup>35</sup> Neddo ceettiido dum oo yii dum. Seedaaku makko duu ana sella. Kaaldo oo ana anndi haalii goonga, yalla onon duu, odon ngoondina. <sup>36</sup> Dum fuu wadii, yalla ko Binndi dii mbii koo ana tabita:

«Fay gootal e gi'e makko helataake.»<sup>§</sup>

<sup>37</sup> Di mbii kasen:

«Be njiitan oon mo 6e njuwnoo oo.»\*

### *No tew Iisaa wadifraa e yanaande*

<sup>38</sup> Caggal mum, Yuusufu Arimatiyanke ndaardi Pilaatu yalla omo 6amta tew Iisaa oo. Pilaatu jaabanii mo. O 6amti oon. Tawi Yuusufu oo yo taalibbo Iisaa e cuucuukka, sabi omo hulannoo hooree6e Yahuudiyanchoobe. <sup>39</sup> Nikodemus jaanoodo to Iisaa jemma oo duu wari, o jillondiri uurdijii mbiyeteedi miiri e alo'e o waddori. Edum yaha e kilooji capantati e didi. <sup>40</sup> Non 6e 6amti tew Iisaa, 6e nguji mo uurdii ndii, 6e ngadi mo e kasanke hono no Yahuudiyanchoobe mboowiri wadude fade mum'en irde maaydo nii. <sup>41</sup> Nokku keewdo ledde ana wonnoodo Iisaa tontanoo doo. Yanaande heyre ana ley nokku oo, do fay gooto meedaali watteede. <sup>42</sup> Dum hawri e wakkati lanndinal Yahuudiyanchoobe, tawi yanaande ndee ana 6adii, dum wadi so 6e ndesi Iisaa don.

## 20

### *No Iisaa immintiniraa*

<sup>1</sup> Nannde alan, Mariyama mo Magdala hujji, yehi to yanaande too. O tawi haayre uddiranoonde yanaande ndee tallitaama. <sup>2</sup> O dogi, o yehi to Simon Piyeer e taalibbo mo Iisaa horsinnoo oo, o wii 6e:

—Be ittii Moobbo oo e yanaande ndee, mi anndaa fuu do 6e ngadi mo.

<sup>3</sup> Piyeer e taalibbo oo njalti, njehi to yanaande too. <sup>4</sup> E6e ndoga ko 6e mbaawi fuu. Taalibbo oo dacii Piyeer, adii dum e yanaande ndee. <sup>5</sup> O yuurnii, o yii kasanke oo yo 6olo, kaa o naataali. <sup>6</sup> Simon Piyeer, kajum kaa yottii fuu, naati, tawi kasanke oo ana joodii. <sup>7</sup> Pilkol pilkanoongol e hoore Iisaa ngol tawdaaka e kasanke oo, ngol tawaama engol sowii feere maggol. <sup>8</sup> Nden taalibbo ardinoodo warde oo, kajum duu naati, yii, goondini. <sup>9</sup> Tawi 6e paamaano tafon ko Binndi dii mbii koo, Iisaa yo immitintoodo. <sup>10</sup> Caggal mum, taalibaafe fidon bee kooti to mum'en.

### *No Iisaa banngirani Mariyama mo Magdala*

<sup>11</sup> Kaa Mariyama ana darii do damal yanaande doo, ana woya. O turii, o yuurnii ley yanaande ndee. <sup>12</sup> O yii malaa'ika'en didon 6e kaddule daneeje ana njoodii do tew Iisaa oo resanoo doo, gooto do hoore doo, goddo oo to koyde too. <sup>13</sup> Malaa'ika'en 6ee mbii mo:

—Banndam debbo, kocum mboyataa?

O jaabii 6e:

—Be ittii Moobbo am doo, mi anndaa fuu to 6e ndesi dum.

<sup>14</sup> Nde o haalnood kaa haala ndee, o yeecctii, o yii Iisaa ana darii, kaa o annditaali dūm.

<sup>15</sup> Iisaa wii mo:

—Banndam debbo, kodum mboyataa? Homo tewtataa?

Mariyama miili golloowo nokku oo haaldata e mum, wii oon:

—Gido, so aan itti mo doo, haalanam do ndesu-daa mo, faa mi 6amta mo.

<sup>16</sup> Iisaa wii mo:

—Mariyama!

O yeecctii, o wii e ibaraninkoore:

—Rabbunii!

(Dum woni «Moobbo».)

<sup>17</sup> Iisaa wii mo:

—Pati memam, sabi mi njabbitaali to Baabiraado am tafon. Yaa to sakiraa6e am, mbiyaa 6e mi njabbitan to Baabiraado am, Baabiraado mon, Laamdo am, Laamdo mon.

<sup>18</sup> Mariyama mo Magdala martinoyi taaliba6e bee kumpa, wii 6e:

—Mi yii Moobbo oo.

O haaltani 6e ko Iisaa haalani mo koo fuu.

#### *No Iisaa 6anngirani taaliba6e mum*

<sup>19</sup> Nde kiikiide alān warnoo ndee, taaliba6e Iisaa coki baafal dow hoore mum'en nokku 6e kawriti doo, saabe kulol hooree6e Yahuudiyankoo6e. Nden Iisaa wari darii hakkunde ma66e, wii 6e:

—Onon e jam!

<sup>20</sup> Nde o jowtunoo 6e ndee, o holli 6e nebbe juude makko e wutulguldu makko. Taaliba6e bee ceyii nde njii Joomiraado oo ndee. <sup>21</sup> Nden Iisaa wii 6e kasen:

—Onon e jam! Hono no Baabiraado neliri kam nii, neliran-mi on.

<sup>22</sup> Nde o haalnood dii haalaaji ndee, o fuufi e ma66e, o wii:

—Nja66ee Ruuhu Ceniido! <sup>23</sup> Mo njaaifi-don luutti mum, yaafaama di, mo on njaafaaki luutti mum, yaafataake.

#### *No Iisaa 6anngirani Tomaa*

<sup>24</sup> Kaa Tomaa noddirteedo Funeeru, gooto e sappo e diidon 6ee, walaano don nde Iisaa 6anngunoo hakkunde ma66e ndee. <sup>25</sup> Taaliba6e bee mbii mo:

—Min njii Moobbo men!

O jaabii 6e:

—So mi yiyaali batte tontande dee e nebbe makko, mi wada fedeendu am e majje, mi wada junngo am e wutulguldu makko, abada mi goondintaa.

<sup>26</sup> Yontere wootere caggal mum, taaliba6e bee kawriti kasen. Tomaa ana wondi e ma66e. Baafe dee fuu ana cokii. Iisaa 6anngi, darii hakkunde ma66e, wii:

—Onon e jam!

<sup>27</sup> O wii Tomaa:

—Waddu doo fedeendu maa, yeew juude am, waddu junngo maa, wadu ngo e wutulguldu am. Sel sikkitaade, goondin tan.

<sup>28</sup> Tomaa jaabii, wii mo:

—Joomiraado am, Laamdo am.

<sup>29</sup> Iisaa wii mo:

—Saabe a yii kam ngoondinir-daa. Been 6e njiyaali kam so ngoondini, mbelii hoore.

#### *Haala faandaa dewtere ndee*

<sup>30</sup> Iisaa wadii yeeso taaliba6e mum kaayde godde keewde de mbinndaaka ley ndee dewtere. <sup>31</sup> Dee doo mbinndaama, yalla odon ngoondina Iisaa woni AlmasiiluBii Laamdo oo, yalla so on ngoondinii, odon ke6ira nguurndam saabe makko.

## 21

#### *No Iisaa 6anngirani taaliba6e mum njeddon*

<sup>1</sup> Caggal dūm, Iisaa 6annganii taaliba6e mum 6ee kasen sera weendu Tiberiyas. Annii no mo 6anngiri: <sup>2</sup> Simon Piyeer e Tomaa noddirteedo Funeeru oo e Natanyel mo Kaana leydi Galili e 6i66e Jebede worbe 6ee e taaliba6e diidon wo66e, 6e fuu e6e tawdanoo ton.

<sup>3</sup> Simon Piyeer wii 6e:

—Mi yahan awgal.

Be mbii mo:

—Minen duu, min njaaadan e maa.

Don e don 6e njalti, 6e naatoyi laana. Oon jemma, 6e ke6aali fay huunde. <sup>4</sup> Nde fajiri feccii ndee, Iisaa darii dow danjereere ndee, kaa taaliba6e bee annditaali dūm Iisaa. <sup>5</sup> O wii 6e:

—Sukaabé, odon jogii ko jaametee naa?

Be mbií:

—Min ngalaa!

6 O wii bée:

—Tippee bubbol ngol bannge jaamo laana kaa, on keéan.

Non bée tippii ngol. Be keéi liddí faa bée ndonki suutude ngol. <sup>7</sup> Taalibbo mo Iisaa horsini oo wii Piyeer:

—Dum Moobbo men!

Nde Simon Piyeer nannoo dum moobbo mum'en ndee, 6oornii saaya mum, sabi mo foortinoodo ka, mo fiyii e ndiyam ðam. <sup>8</sup> Taalibaabé heddiise bée ngaddi laana kaa, ana ndaasa bubbol keewngol liddí ngol. Be ngoddoraaki danjeere ndee kinaa ko waaraata e meeturuuji teemedere. <sup>9</sup> Nde bée yeentunoo ndee, bée njii liddí ana pawii dow yulbée yiite, bée njii buuru duu. <sup>10</sup> Iisaa wii bée:

—Ngaddee yoga e liddí dí nanngu-don jooni díi.

<sup>11</sup> Simon Piyeer naati laana kaa, foodi bubbol ngol, yenjini. Ngol keewngol liddí mawdfi. Liddí díi yo teemedere e capande joy e tati. No díi poti heewde nii fuu, bubbol ngol seekaaki.

<sup>12</sup> Iisaa wii bée:

—Ngaree, jaamee!

Nde wonnoo bée fuu bée anndii dum Joomiraado, fay gooto e taalibaabé bée lamndaaki mo «Aan homo?» <sup>13</sup> Nden Iisaa wari, 6ami buuru e liddí, hokki bée. <sup>14</sup> Ngol woni cilol tataþol ko Iisaa 6anngani taalibaabé mum caggal immitagol mum.

#### *No Iisaa haaldiri e Piyeer*

<sup>15</sup> Nde bée tayunoo kooyol ndee, Iisaa wii Simon Piyeer:

—Simon bii Yuhanna, a 6uraa bée doo yidüde kam naa?

O jaabii:

—Goonga, Moobbo, ada anndi midó yidü maa.

Iisaa wii mo:

—Tiidü e baaloy am!

<sup>16</sup> Iisaa wii mo kasen:

—Simon, bii Yuhanna, ada yidi kam naa?

O jaabii:

—Sanne, Moobbo, ada anndi midó yidü maa!

Iisaa wii mo:

—Tiidü e baali am!

<sup>17</sup> Iisaa wii mo kasen:

—Simon, bii Yuhanna, ada yidi kam naa?

Piyeer sunaa sabi jooni woni cilol tataþol ko Iisaa wii mo «Ada yidi kam naa?» Piyeer wii mo:

—Joomiraado, ada humpitii huunde fuu, ada anndi midó yidü maa.

Iisaa wii mo:

—Tiidü e baali am! <sup>18</sup> Midó haalane goonga, e njokollaaku maa a 6oornike kaddule maa, a yehii to njid-daa fuu. Kaa nde a naywii, a fooccan juude maa, godðó 6oorne ðe, naðe to a yidaa.

<sup>19</sup> E díi haalaají Iisaa sapporii no Piyeer maayrata e no teddinirta Laamðo. Nde o haalnoo dum ndee, o wii dum:

—Jokkam!

#### *No Iisaa haaliri haala taalibbo mum korsudo oo*

<sup>20</sup> Piyeer yeccitii, yii taalibbo mo Iisaa horsini oo ana jokki e mum'en. Kajum woni naayinoodo e Iisaa nde bée kirtotonoo ndee, so wii: «Moobbo, homo woni jammbotoodo ma oo?»

<sup>21</sup> Nde Piyeer yiinoo korsudo oo ndee, wii Iisaa:

—Moobbo, hono oo nee wattinirta?

<sup>22</sup> Iisaa jaabii mo:

—So midó muuyani mo nguurndam faa nde ngartu-mi, kodum hillu maa hen? Aan kaa, jokkam tan.

<sup>23</sup> Ngol konngol saakii hakkunde goondinfe Iisaa fuu: «Taalibbo oo maayataa.» Kaa Iisaa wiyaali mo maayataa, ko o wii dee: «So midó muuyani mo nguurndam faa nde ngartu-mi, kodum hillu maa hen?»

<sup>24</sup> Oo taalibbo seettii dee kulle so winndi ðe, eden anndi duu seedaaku makko oo yo goonga.

*Timmoođe dewtere ndee*

<sup>25</sup> Iisaa wadii kudde godde keewde kasen. So de mbinndiranooma gootel gootel, mido miila dee dewte mbaawataano heyude e aduna oo.

## Golle Nelaabé

<sup>1</sup> Waayam Tawfilus, e ley dewtere am aranndeere ndee, mi winndii hen ko Iisaa fuddiri gollude e wajaade fuu, <sup>2</sup> faa jaannde nde mo jaabbinaa ndee, caggal o wasike nelaabé 6e o suforii Ruuhu Cenido bee.

<sup>3</sup> Caggal nde o torraa ndee, o jaanninani 6e hoore makko, o hollirii 6e e daliilaaji keewdi omo wuuri. O wondi e ma6be balde capande nay, omo waajoo 6e haala Laamu Laamdo.

<sup>4</sup> Jaannde wootere omo jaamda e ma6be, o wasii 6e pati 6e ngoddo Urusaliima, 6e kettoo fodoore Baabiraado nde 6e naniri mo ndee.

O wii:

<sup>5</sup> — Yaayaabatisirannoo ndiyam, kaa e ley balde seeda, onon, on mbatisirte Ruuhu Cenido.

<sup>6</sup> Be fuu 6e kawri, 6e lamndii mo, 6e mbii:

— Joomiraado, e oo wakkati ngartirtaa laamu Israa'iila naa?

<sup>7</sup> Iisaa jaabii 6e, wii:

— On mbaawaa anndude jamaanuuji e wakkatiji di Baabiraado wadiri baawde mum.

<sup>8</sup> Kaa so Ruuhu Cenido oo jippike e moodon, on keban baawde, on laatoto seedee'en am ley Urusaliima e ley leydi Yahuudiya fuu, kajum e Samariya, faa to leydi haadi.

<sup>9</sup> Nde o haalnoodum ndee, o jaabbinaa. Be tiggiti, e6e yeewa faa luurde suddi mo.

<sup>10</sup> Do 6e tiggiti kammu oo tawi omo jaabbinee doo, worbe didon 6e kaddule daneeje ngari ndardii e ma6be, <sup>11</sup> mbii:

— Galilinkoo6e, ko saabii so ndari-don, odon yeewa kammu? Iisaa ittaado e mon so jaabbintinaa dow kammu oo wartiran hono no njiiuru-don omo jaabbitira dow kammu nii.

<sup>12</sup> Nde 6e iwnoo to waamnde haayre wiyyeteende Jaytun ndee, 6e mbirfitii Urusaliima. Ton e Urusaliima ana waara e kilon gooto. <sup>13</sup> Nde 6e njottii ndee, 6e jaaboyi suudu dowuuru ndu 6e mboownoo mooftaade e mum nduu. Nelaabé 6ee ngoni: Piyeer e Yuuhanna e Yaakuuba e Andire e Filipa e Tomaa e Bartolome e Matta e Yaakuuba 6ii Alfaa e Simon kiranoowo suudu baaba e Yahuuda 6ii Yaakuuba. <sup>14</sup> Be fuu 6e laatii daande wootere, e6e tidi e duwaawu, kambe e mijiraabe Iisaa e Mariyama inna Iisaa e rewbe wo6be.

### No Mattiyas loomtorii Yahuuda

<sup>15</sup> Ley deen jalaade, goondin6e ko waarata e teemedere e noogay kawri. Piyeer immii, darii hakkunde ma6be, wii:

<sup>16</sup> — Sakiraabe, ko Ruuhu Cenido haaliri e hunduko Daawuuda, ko woni e Binndi dii koo, tabitirii no haaniri nii: o haalino haala Yahuuda, kolludo nanngu6e Iisaa 6ee laawol oo. <sup>17</sup> E meeden Yahuuda hiiseteno, o he6ii ngedu makko e golle e nelal. <sup>18</sup> (Kaalisi mo o yeenanoo e golle makko bondo oo, o soodi dum ngesa, o yehi o wartoyii ley magga, reedu makko seekii, teketi makko fuu mbaylii e leydi. <sup>19</sup> Yim6e Urusaliima fuu nanii dum. Dum waadi so 6e inndiri ngesa ngaa Akeldama. E ley demngal ma6be dum woni «Ngesa Yiijamaawa».) <sup>20</sup> Sabi dum winndii e ley dewtere Jabuura:

«Yole makko laato saabeere,  
pati fay gooto ho6u hen.

Yo goddo darto darnde makko.»\*

<sup>21</sup> Haya, worbe yogaabe njaadii e men ko juuti gila nde Joomiraado men Iisaa wondi e men ndee, <sup>22</sup> iwde e wakkati mo Yaayaabatisirannoo lootagal batisima yaade e jalaande nde o gamtaa faade e kammu ndee. Joonnoo, ana tilsi gooto e ma6be laatidoo e men seedee immitagol Iisaa.

<sup>23</sup> Be ndarni worbe didon: Yuusufu noddirteedo Barasaba coowirteedo Yustus, kajum e Mattiyas. <sup>24</sup> Be nduwii, 6e mbii:

— Joomiraado, aan anndudo 6erde yim6e fuu, fammin min mo cu6i-daa e 6ee doo didon 25 faa roondoo golle e nelal, loomtoo Yahuuda joppudo dum so yehi to nokku mo haandi e mun oo.

<sup>26</sup> Be ngadi urwa ma6be. Urwa oo hawri e Mattiyas. O hiisodaa e nelaabé sappo e go'o 6ee.

## 2

### No Ruuhu Cenido jipporii dow goondin6e

<sup>1</sup> Nde iidi biyeteedo Pantekot warnoo ndee, goondin6e Iisaa 6ee fuu moofstii e nokku gooto. <sup>2</sup> Oon wakkati fuu, dillere wa'unde no henndu mawndu nii iwri dow kammu,

\* 1:20 Jabuura 69.26; 109.8

hebbini suudu do 6e njoodii doo fuu.<sup>3</sup> Ko wa'i no demde yiite nii 6anngani 6e. De peccii, de pawii e gooto maabé fuu.<sup>4</sup> Be fuu 6e keewi Ruuhu Ceniido, 6e puusdi haalde demde janane no Ruuhu oo hokkiri 6e 6e kaala nii.

<sup>5</sup> Worbe Yahuudiyankoo6e hulbe Laamdo iwoobé e tatteeji dii fuu ana njoodii Urusaliima.<sup>6</sup> Nde dillere ndee wadunoo ndee, jamaa oo fuu hawriti, wemmbaa, sabi gooto fuu nanii demngal mum ana haalee.<sup>7</sup> Be fuu 6e mbemmbaa, be kaaynaa, 6e mbiyondiri:

—Bee haaloobe fuu nganaa Galilinkoo6e naa?<sup>8</sup> Dum nee, hono hen gooto e meeden fuu nanirta ko 6e kaalata e demngal ngal muyni?<sup>9</sup> En Partiyankoo6e e Mediyankoo6e e Elamiyankoo6e, en joodiibé Mesopotamiya, kajum e Yahuudiya e Kappadokiya e Ponta e Asiya<sup>10</sup> e Firigiya e Pamfiliya e Misira e leyde sera Libya hedde Sireene. Yoga e meeden iwii e Roma,<sup>11</sup> en Yahuudiyankoo6e kajum e naatubé e diina Yahuudiyankoo6e. Yoga kasen iwii Kereta, yoga iwii leydi Arabiya. Kaa dum e taweede fuu, en fuu eden nii nana ebe kaala e demde meeden gollejii mawdi di Laamdo wadi di!

<sup>12</sup> Be fuu 6e mbemmbaa, be cikkitii, 6e mbiyondiri:

—Kodum dum foti laataade?

<sup>13</sup> Wobbe ana njayra goondinbe 6ee, ana mbiya:

—Be haarbé doro so ebe cigira!

*No Piyeer waajorii jamaa oo*

<sup>14</sup> Piyeer dardii e sappo e go'o 6ee, toowni daande muudum, wii jamaa oo:

—Onon Yahuudiyankoo6e e onon joodiibé Urusaliima fuu, kettinee haala am yalla odon paama kabaaru gadudo oo.<sup>15</sup> Bee yimbe nganaa sigir6e hono no onon miildaton nii, sabi jooni yo jawlal tan.<sup>16</sup> Dum woni ko annabi Yo'ilä wii:

<sup>17</sup> «Laamdo wii:

E ley jalaade cakitotoode dee

mi saakan Ruuhu am e dow tagaabe fuu.

Bibbe moodon worbe e rewbe

kaaliran hono no annabaabe nii,

jokol6e moodon njyian ko yellitii e mum'en,

nayeebe moodon koydinte.

<sup>18</sup> Fay golloobe am worbe e golloobe am rewbe,

mi saakan Ruuhu am dow muudum'en e ley deen jalaade,

6e kaaltan konngol ngol loow-mi e maabé ngol.

<sup>19</sup> Mi wadan kaayde dow kammu,

mi wadan taagumansaaji dow leydi,

di laatoo yiyam e yiite e cuurki.

<sup>20</sup> Fadde jannide gartol Joomiraado mawnde teddunde ndee warde,

naange niibban,

lewru wojjan hono no yiyam nii.

<sup>21</sup> Nden, neddo fuu noddudo innde Joomiraado hisinte.»\*

<sup>22</sup> Piyeer wii kasen:

—Isra'a'ilankoo6e, kettinee dii haalaaji: Iisaa Nasaraatunke oo yo neddo mo Laamdo subanii on. Laamdo hokki dum baawde, o hokki dum waafude kaayde e taagumansaaji hakkunde mon, no onon e ko'e mon anndir-don nii.<sup>23</sup> On ngadii oon neddo e juude bonbe, on tontii mo e leggal bardugal, on mbaririi mo no Laamdo muuyrunoo dum laatoo gila arannde nii.<sup>24</sup> Kaa Laamdo wuurtinii mo, itti mo e naawalla maayde, sabi maayde ndee waawaanoo heddoraade mo.<sup>25</sup> Sabi Daawuuda ana haala haala makko nde wii:

«Wakkati fuu mido yiya Joomiraado,

sabi omo jaamo am, pati mi yeryerta.

<sup>26</sup> Saabe majjum 6ernde am seyii,

demngal am jaarii

faa terde am duu mbaaltoo dow jikke,

<sup>27</sup> sabi a yoppataa yonki am hakkunde maaybe,

a accataa Ceniido maa oo jola.

<sup>28</sup> A anndinii kam laawi nguurndam,

mido seyii sabi ada wondi e am.»†

<sup>29</sup> Piyeer jokkini hen:

—Sakiraabe, mido haalana on ko laabi haala njatti meeden Daawuuda: o maayii, o iraama, yanaande makko ndee ana do meeden doo faa hannde.<sup>30</sup> O annabaajo, omo anndi Laamdo hunanike mo gooto e taaniraabe makko joottoto e bimmbeere makko laamu.<sup>31</sup> O adii o yii o haali haala immitagol Almasiihu, kajum yonki muudum accaaka hakkunde

\* 2:21 Yo'ilä 3.1-5    † 2:28 Jabuura 16.8-11

maaybē, terde muudum nolaali. <sup>32</sup> Oo woni Iisaa mo Laamdo immintini, min fuu minden cedii. <sup>33</sup> Laamdo toowni mo, heedini mo jaamo muudum, mo hebī e Baabiraado Ruuhu Ceniido podananoodo en oo, o saaki dum. Jooni odon njiyā dum, odon nana dum. <sup>34</sup> Sabi Daawuuda meedaali njabbude dow kammu, kaa wii:

«Joomiraado wii Joomam:

Jooda jaamo am,

<sup>35</sup> faa mi wada njaabaa waybē maa.»<sup>‡</sup>

<sup>36</sup> Yo suudu baaba Israa'iila fuu taylor Laamdo wadii Iisaa mo tontu-don e leggal bardugal oo Joomiraado, wadii dum Almasiihu.

### *Haala deental adiibē goondinē*

<sup>37</sup> Nde 6e nannoo kaa haala ndee, 6e tayi sanne, 6e mbii Piyeer e nelaabé heddiibē bēe:

—Sakiraabé, kodum min ngadata?

<sup>38</sup> Piyeer jaabibē 6e, wii:

—Tuubee, gooto e moodon fuu lootiree lootogal batisima e innde Iisaa Almasiihu, yalla odon kebā yaafeede luutti. Nden on ndokkete Ruuhu Ceniido. <sup>39</sup> Sabi fodoore ana woodani on, onon e biibē moodon e woddufē fuu. Ende woodani neddo mo Joomiraado Laamdo meeden noddi fuu.

<sup>40</sup> Caggal dum, Piyeer seedanike 6e haalaaji goddi keewdi, ana waajoo 6e, ana wiya:

—Celee e ndee fedde bonnde yalla odon kisa.

<sup>41</sup> Jabubē haala makko 6ee lootaa lootogal batisima. Nannde nden, ana foti ujunaaji tati neddo ko naati e deental goondinbē ngal.

<sup>42</sup> Eēe njokki waaju nelaabé bēe, eēe nanngondiri e deental maabē ngal, eēe taya buuru, <sup>§</sup> kasen eēe ngadida duwaawuji. <sup>43</sup> Kulol naatti e gooto fuu, sabi nelaabé bēe kajum'en duu ana ngadannoo kaayde e taagumansaa ji keewdi. <sup>44</sup> Goondinbē bēe fuu yo daande wootere, 6e ngadī fii maabē fuu foroba. <sup>45</sup> Be cootti jawleele maabē, 6e ndokki gooto fuu ko hasindini e muudum. <sup>46</sup> Nannde fuu 6e kawritan ley Suudu Dewal Mawndu nduu, 6e laatii daande wootere, eēe taya buuru, eēe jaamda ley cuudi maabē ley weltaare e seyo. <sup>47</sup> Eēe njetta Laamdo, yimbē fuu ana njidi 6e. Nannde fuu Joomiraado ana bēydana deental ngal hisooōē.

## 3

### *No Piyeer selliniri bonnguujo e no waajorii yimbē*

<sup>1</sup> Piyeer e Yuhanna naaddi ley Suudu Dewal Mawndu nduu wakkati sallifanaa. <sup>2</sup> Tawi gorko bonnguujo pindudo e bonnguuwaaku ana joodii damal Suudu Dewal Mawndu mbiyeteengal Damal Lobbal. Nannde fuu yimbē makko njoyyinan mo don faa o garbinoo naatoobē Suudu Dewal Mawndu bēe sadaka. <sup>3</sup> Nde o yii Piyeer e Yuhanna ana naata ndee, o garbinii dum'en. <sup>4</sup> Be taykitii mo, non Piyeer wii:

—Yeew min!

<sup>5</sup> O yeewi 6e, sabi omo miilii hebūde e maabē huunde. <sup>6</sup> Piyeer wii:

—Mi walaa kaalisi, mi walaa kajnje, kaa mi hokkete ko njogii-mi koo: saabe Iisaa Almasiihu Nasaraatunke oo, imma yaa!

<sup>7</sup> O nanngi junngi muudum jaamo, o darni dum. Don e don koyde muudum teenji e leydi, <sup>8</sup> gurbitii, darii, ana yiiloo. O naatidi e maabē ley Suudu Dewal Mawndu nduu, omo yiiloo, omo fitta, omo yetta Laamdo. <sup>9</sup> Yimbē bēe fuu njii mo, omo yiiloo, omo yetta Laamdo. <sup>10</sup> Be annditi mo, kanko woni joodotonoodo e Damal Lobbal ngal so ana garbinoo oo. Kaayde e wemmbere nanngi 6e sanne saabe ko o hebī koo.

<sup>11</sup> Do o jokkondirnoo e Piyeer e Yuhanna doo, yimbē bēe fuu ndogi kawriti e maabē to ndanki mbiyeteeki ndanki Suleymaana too no poti haayneede. <sup>12</sup> Nde Piyeer yinoo dum ndee, wii yimbē bēe:

—Israa'iilankooōē, ko wadi so odon kaaynee dum doo? Ko wadi so odon puttina min gite, hono baawde amen naa kulol amen Laamdo wadi so oo gorko ana yaha e koyde muudum? <sup>13</sup> Laamdo Ibarahiima e Isiyaaka e Yaakuuba, Laamdo njaatiraabē meeden, teddini kaadime muudum Iisaa. Kaa onon on ngadii mo e juude laamu, on njankirii mo yeeso Pilaatu, fay so taweede Pilaatu ana yidunoo yoppitinde mo. <sup>14</sup> Kaa onon, on njankirii Ceniido Poocictiido oo, on ndaartii yoppitaneede bardō hoore. <sup>15</sup> Gaddoowo nguurndam nduumiidam oo, oon mbar-don. Kaa Laamdo wuurtinii mo e maayde. Midēn cedii dum. <sup>16</sup> Gorko mo njiyaton mo anndu-don oo, ko mo goondini Iisaa koo sellini mo yeeso moodon on fuu.

<sup>17</sup> Haya, sakiraabé, hono ko onon e hooreebē moodon ngadū-don Almasiihu koo, mifo anndi yo majjere tan. <sup>18</sup> Kaa hono nii Laamdo tabintiniri ko annabaabē muudum fuu kaali

koo: Almasiihu torroto. <sup>19</sup> Ndennoo tuubee, ngarton, yalla luutti moodon ana tosee, <sup>20</sup> yalla Joomiraado ana waddana on wakkatiji ceyniid, nelda on Iisaa Almasiihu cubananoodo on gila arannde oo. <sup>21</sup> Ana tilsi oon heddo dow kammu faa nde Laamđo heydintini kulle dee fuu, no annabaabe seniibe bee kaaldunoo haala muudum gila arannde nii.

<sup>22</sup> Sabi Muusaa wii: «Joomiraado Laamđo moodon nelan e mon annabaajo hono am, sakiike mon. Njabon huunde fuu ko o haalanta on. <sup>23</sup> Nedđo fuu mo jaħanaali annabaajo oo, yaltinte e suudu baaba, halkete.»\*

<sup>24</sup> Gila e Samuyila faa e annabaabe jokkuše e muudum, 6e fuu ebe kaalannoo haala dee jħalaade. <sup>25</sup> Onon ngoni ronoobe annabaabe 6ee, onon ngoni ronoobe aadi ndi Laamđo nanngani njaatiraabe men 6ee nde wii Ibarahiima: «E iwdi maa, cuudi baaba aduna oo fuu keġirta barke.»†

<sup>26</sup> Nde Laamđo immintinnoo Iisaa kaadime muudum oo ndee, e moodon o adii nelde dum, faa o wada e mon barke e ley ko o wartirta homo e mon fuu e makko so njoppon golle mon bondo.

## 4

### Kabaaru Piyeer e Yuhanna yeeso waalde Saahiiħe

<sup>1</sup> Nde Piyeer e Yuhanna kaaldata e yimbe 6ee ndee, yottinoobe sadaka e mawđo hayboobe Suudu Dewal Mawdu oo, kajum e Saduki'en ngari e maħħe. <sup>2</sup> Ebe mettaa sabi Piyeer e Yuhanna ana njanngina yimbe 6ee haala immital maayħe, ko 6e mbii Iisaa wuurtii koo.

<sup>3</sup> Be nanġi 6een, 6e uddi dum'en e kasu faa janngo muudum, sabi tawii hiiriino. <sup>4</sup> Kaa heewħe e nanħe waaju oo 6ee ngoondini, faa 6e laatii ko foti ujunaaji joy gorko.

<sup>5</sup> Janno muudum, hooreeb ħażżeen maħħe e mawħe e dunkee'en Sariya kawritoyi Urusaliima. <sup>6</sup> Annas Jottinoowo Sadaka Mawđo oo e Kayafas e Yuhanna e Aleksandere iwdi hooreeb ħażżeen yottinoobe sadaka ndii fuu ana ton. <sup>7</sup> Be ndarni Piyeer e Yuhanna yeeso maħħe, 6e lamndii dum'en e dow dabar honde naa alħorma homo e celliniri bonnugju oo.

<sup>8</sup> Nden, Piyeer keewđo Ruuhu Ceniido oo wii 6e:

—Hooreeb ħażżeen mawħe, <sup>9</sup> so on lamndike min hannde moyyere nde min ngadani bonnugju oo ndee, on lamndike min no o selliri, <sup>10</sup> odon kaani anndineede dum, onon e Israa'ilankooħe 6ee fuu. Saabe Iisaa Almasiihu Nasaraatunke mo tontuno-don e leggal bardugal so Laamđo wuurtini dum oo, kajum darni mo yeeso mon so sellini mo. <sup>11</sup> Iisaa woni:

«haayre nde onon mahooħe tippiti-don,

laatiinde haayre 6urnde fuu teentilaade e maadi ndii.»\*

<sup>12</sup> Kisindam heġħirtaake e godđo fey, innde wonnde duu walaa ley aduna oo fuu nde Laamđo hokki yimbe nde kaan-den hisinireede.

<sup>13</sup> Nde waalde Saahiiħe 6ee njiinoo cuusal Piyeer e Yuhanna ndee, 6e kaaynaa, sabi ebe anndi been njannginaaka, 6e baadiyankoħe. Be annditi been ana ngondunoo e Iisaa.

<sup>14</sup> Kaa nde 6e njiinoo gorko cellinaado oo ana dardii e maħħe, walaa fuu ko 6e mbaawi yeddude. <sup>15</sup> Be njamiri yo been njaltu sarirde ndee, ebe ndawrida, <sup>16</sup> ebe miya:

—Kodum ngadaten 6ee doo worje didon? Tabitanii hoċċiħe Urusaliima fuu, 6e ngadii doo haaynde maanundie, kasen duu e mbaawwa yeddude dum. <sup>17</sup> Kaa ndaaloo-den 6e, kaden 6e haalande fay gooto innde Iisaa ndee pati dum saakoo e ley yimbe 6ee.

<sup>18</sup> Nden 6e nodditi seen kasen, 6e njaggini dum'en pati mbaajoo, pati njanngina innde Iisaa. <sup>19</sup> Kaa Piyeer e Yuhanna njaabii 6e, mbii:

—Onon e ko'e moodon, yeewee yalla dowtanaade on luutta Laamđo woni goonga. <sup>20</sup> Minen kaa, min mbaawwa qottude haalde ko min njiiri gite amen e ko min naniri noppo amen.

<sup>21</sup> Be ndaalii 6een kasen. Caggal dum, 6e njoppli dum'en, tawi 6e keħāali fay huunde ko 6e njukkira dum'en saabe yimbe 6ee. Sabi yimbe fuu ana njetta Laamđo dow ko wadī koo.

<sup>22</sup> Celliniraado haaynde ndee oo, duuħi muudum ana 6uri capande nay.

<sup>23</sup> Nde 6e njoppli 6ee, Piyeer e Yuhanna mbirfittii to yimbe muudum'en, njantanii dum ko hooreeb ħażżeen yottinoobe sadaka e mawħe mbii dum'en koo fuu. <sup>24</sup> Nde 6een nani dum ndee, 6e fuu 6e laatii daađe wootere, 6e eewni Laamđo, 6e mbii:

—Laamđo, tagħod kammu e leydi e gecci e ko woni e muudum'en fuu, <sup>25</sup> aan kaalirđo dow baawde Ruuhu Ceniido e hunduko njaati amen Daawuuda kaadime maa nde oon wii:  
«Ko saabanii lejji jirkitaade?

Ko saabanii yimbe miilde miiloji boli?

<sup>26</sup> Kaanankooħe aduna ndari,

\* 3:23 Fillitagog Tawreeta 18.15,18,19

† 3:25 Puddfoode 12.3

\* 4:11 Jabuura 118.22

ardiiñe mooþtondiri faa kaþa  
e Joomiraado e Almasiihu muudum.»<sup>†</sup>

<sup>27</sup> Tayoral, e ley ndee ngalluure Hirudus e Pontiyu Pilaatu nanngondirii e Israa'iilankoobe e leji goddi faa kaþa e Iisaa, kaadime maa ceniido mo cuþi-daa oo, <sup>28</sup> yalla eþe ngolla ko koddirno-daa baawde maa e muuyde maa fuu. <sup>29</sup> Jooni Joomiraado, yeew gidi maþþe dii, ndokkaa golloobé maa waajoraade haala maa fuu cuusal, <sup>30</sup> ganngin baawde maa, sellin jawþe, wadu taagumansaaji e kaayðe saabe Iisaa, kaadime maa ceniido oo.

<sup>31</sup> Nde þe tilinoor jaagaade Laamðo ndee, nokku do þe kawritinnoo doo dimmbii. Be fuu ðe kebbinaa Ruuhu Ceniido, eþe mbaajoroo konngol Laamðo ngol cuusal.

### No goondinþe bee nguurdii

<sup>32</sup> Jamaa goondinþe oo fuu yo daande wootere yo hakkille gooto. Be ngadi ko ðe njogii fuu foroba, fay gooto e maþþe wiyantaa jawdi muuðum fay huunde. <sup>33</sup> Baawde mawde nelaabe ðee ceettortonoo immitagol Iisaa Joomiraado, kasen duu moyyere mawnde ana e maþþe ðe fuu. <sup>34</sup> Fay gooto e maþþe hasindinaa, sabi jogiïþe gese e galleyji fuu coottan, ngadda kaalisi oo, <sup>35</sup> tummba dûm e juude nelaabe ðee. Nden homo e maþþe fuu hokkee ko hasindini e muudum.

<sup>36</sup> Iwðo e lejol Lewi<sup>‡</sup> biyeteedo Yuusufu, mo nelaabe bee coowirannoo Barnabas (dûm woni 6ii koomtoowo), pindo Kiprus, <sup>37</sup> ana joginoo ngesa, sootti nga, waddi kaalisi oo, tummbi dûm e juude nelaabe ðee.

## 5

### No Ananiyas e Safiira penirani Ruuhu Ceniido

<sup>1</sup> Gorko biyeteedo Ananiyas ana wondi e jom suudu muudum Safiira. O sootti ngesa makko. <sup>2</sup> O suudi fecdere e kaalisi oo, jom suudu makko oo ana anndani. O naþi ko heddi koo, o hokki nelaabe ðee. <sup>3</sup> Piyeer wii:

—Ananiyas, ko saabii so accu-daa Ibiliisa naata e þernde maa faa penanaa Ruuhu Ceniido, cuudaa yoga e coggu ngesa ngaa? <sup>4</sup> Tama wanaa aan e hoore maa jeynno nga? Tama nde coottu-daa nga ndee, a waawaano nawtoraade kaalisi oo? Ko hewti maa so ngad-daa nii? Wanaa yimþe penan-daa, Laamðo penan-daa.

<sup>5</sup> Nde Ananiyas nani kaa haala ndee, tayi, saami, maayi. Dum laatanii nanþe dûm ðee fuu kulol manngol. <sup>6</sup> Sukaabé jokolþe immii, ngadi mo e kasanke, ndoondii mo, njalti sella, iri mo.

<sup>7</sup> Caggal muudum, ko waarata e leeruuji tati, jom suudu makko naati, tawi nanaali ko wadi koo. <sup>8</sup> Piyeer wii mo:

—Haalanam so tawii dûm jaati coottu-don ngesa moodon ngaa?

O wii:

—Ooho, dûm jaati min cootti.

<sup>9</sup> Nden Piyeer wii mo:

—Hono aan e jom suudu maa kawrir-don faa itton koro Ruuhu Joomiraado? Muju, iroynoobe jom suudu maa ana ngara, naa ðe naþe, aan duu!

<sup>10</sup> Oon wakkati fuu, kanko duu o tayi, o saami yeeso Piyeer, o maayi. Jokolþe ðee naati, tawi o maayii, ðe ndoondii mo, ðe njalti sella, ðe iri mo bannge jom suudu makko. <sup>11</sup> Kulol manngol nanngi deental goondinþe ðee e nanþe dûm ðee fuu.

### No nelaabe bee ngolliri taagumansaaji e kaayðe

<sup>12</sup> Nelaabe ðee ana ngadannoo taagumansaaji e kaayðe keewde hakkunde yimþe ðee. Goondinþe ðee fuu ana kawrita ley ndanki Suleymaana kii, ðe fuu ðe daande wootere.

<sup>13</sup> Fay gooto e wobþe ðee suusaa takkaade e maþþe. Kaa dûm e tweede yimþe ðee ana teddina ðe. <sup>14</sup> Goondinþe Joomiraado ðee ana þeydoroo yimþe heewþe, jamaa worþe e rewþe, <sup>15</sup> faa ðe ndoondii jawþe, ðe njaltini dûm'en dow mbeddaaji, eþe lelna dûm'en e dow leese e daage, yalla so Piyeer warii, mbeelu muudum ana mema yoga maþþe. <sup>16</sup> Yimþe heewþe iwri e geelle piliide Urusaliima ðee, ngaddi þawþe e laddaaþe. Been fuu cellinaa.

### No nelaabe bee torriðaa

<sup>17</sup> Ndennoo, Jottinooru Sadaka Mawðo oo e tawdaaþe e muudum hakkille ðee, dûm woni Saduki'en, haasidaaku naati e maþþe. <sup>18</sup> Be nanngi nelaabe ðee, ðe uddi dûm'en ley kasu.

<sup>19</sup> Kaa e oon jemma, malaa'ika Joomiraado udditi dame kasu oo dee, yaltini ðe, wii:

<sup>20</sup> —Njehee ndaroyee ley Suudu Dewal Mawndu too, mbaajo-don yimþe haalaaji dokkooji nぐurndam kesam dii fuu.

<sup>†</sup> 4:26 Jabuura 2.1-2    <sup>‡</sup> 4:36 Yimþe lejol Lewi ngonnoo humaniiþe golle dewal Laamðo gila e jamaanu Muusaa.

<sup>21</sup> Nde 6e nannoo dum ndee, 6e naatoyi e Suudu Dewal Mawndu nduu gila beetee, e6e njanngina.

Non Jottinoowo Sadaka Mawdo oo e battaa'en mum noddi waalde Saahiibe e mawbe Israa'ilila fuu batu. Be njamiri nelaabe 6ee ittoyee to kasu too, ngaddee. <sup>22</sup> Kaa nde doomoobe 6ee njottinoob nnde, tawaali 6een e ley kasu oo. Be mbirfitii, 6e kaaltani waalde Saahiibe 6ee, 6e mbii:

<sup>23</sup> —Min tawii kasu oo ana uddii ana sokii, doomoobe 6ee ana ndarii sella ana pewtondiri e dame dee, kaa nde min udditinnoo nnde, min tawaali fay gooto ley too.

<sup>24</sup> Nde mawdo doomoobe Suudu Dewal Mawndu oo e hooreebe yottinoobe sadaka 6ee nani dum nnde, 6e mbemmbaa ko dum foti laataade. <sup>25</sup> Nden neddo gooto wari, humpiti 6e, wii:

—Worbe 6e udduno-don kasu 6ee, annii ndarii ley Suudu Dewal Mawndu too, ana njanngina yimbe!

<sup>26</sup> Nden, mawdo doomoobe oo yaadi e doomoobe, ngartiri nelaabe 6ee. Kaa 6e ngadiraali dum doole sabi 6e kula pati yimbe mbedoo 6e kaaye.

<sup>27</sup> Nde 6e ngartiri 6een nnde, 6e ndarni dum'en yeeso waalde Saahiibe 6ee. Jottinoowo Sadaka Mawdo oo lamndii 6e, <sup>28</sup> wii:

—Min ndaalinoke on daaloore sattunde, pati njannginon haala gorko oo. Kaa onon on caakii waaju moodon oo ley Urusalima. Kasen duu, oson njidi min ngoytiree gorko oo.

<sup>29</sup> Piyeer e nelaabe 6ee njaabii, mbii:

—Neddo ana haani dowtanaade Laamdo faa 6ura no dowtirantoo yimbe nii. <sup>30</sup> Laamdo njaatiraa6e meeden wuurtinii Isaa mo tontu-don e leggal so mbar-don dum oo. <sup>31</sup> Kank Laamdo teddini so toowni, so joyyini banngi muudum jaamo, wadi mo hooreejo, wadi mo kisinoowo faa o hokka Israa'ilankoo6e no tuubira, yalla ana kefa yaafeede luutti. <sup>32</sup> Minen ngoni seedee'en kabaaruuji dii, minen e Ruuhu Ceniido mo Laamdo hokki 6een dowtaniibe dum.

<sup>33</sup> Nde 6e nani dum nnde, 6e mbilaa sanne, 6e ndawridi no 6e mbarda 6een. <sup>34</sup> Gorko jeyaado e waalde Farisa'en biyeteedo Gamaliyel, jannginoowo Sariya Muusaa, teddudo e yimbe fuu, immii darii hakkunde waalde Saahiibe 6ee, yamiri nelaabe 6ee njaltinee seeda.

<sup>35</sup> Caggal dum, o wii 6e:

—Israa'ilankoo6e, ndeenee ko'e mon e bee yimbe e ko anniysi-don waafude koo. <sup>36</sup> Tewdas 6anngiino ko 6ooyaali. Omo jogorinoo hoore makko won no o foti. Ko waaraata e yimbe teemeede nayon ana njokkunoo e makko. O waraama, jokkunoobe e makko 6ee fuu caakike, fay gooto heddaaki. <sup>37</sup> Caggal makko, Yahuuda Galilinke oo warino wakkati limgal, yimbe heewbe njokkii e makko. O halkike kanko duu, jokkunoobe e makko 6ee fuu caakike. <sup>38</sup> Joomi, mido haalana on: ngoortee bee yimbe, celon e maabbe. Sabi so anniyaaji maabbe e golle maabbe to yimbe iwri, firritoto. <sup>39</sup> Kaa so nii tawii to Laamdo iwri, on mbaawaa sakkaade dum. Kaybee, pati on luutti Laamdo!

<sup>40</sup> Waalde Saahiibe 6ee njabi dabare makko. Be nodditi nelaabe 6ee, 6e pii dum'en, 6e ndaalii dum'en pati kaala haala innde Isaa kasen, 6e njoppiti dum'en. <sup>41</sup> Nelaabe 6ee iwi yeoso waalde Saahiibe 6ee. Be ceyii sabi Laamdo ana teddini 6e, ko yimbe koyni 6e saabe Isaa koo. <sup>42</sup> Gila dum wadi, 6e keraali e waajaade e jannginde Kabaaru Lobbo haala Isaa Almasiihu ley Suudu Dewal Mawndu nduu e ley galjeesi.

## 6

### No worbe njeddon cubiraa faa mballa nelaabe 6ee

<sup>1</sup> E deen balde, tawi taalibaabe 6ee ana beydoo heewde, Yahuudiyankoo6e haalo6e yunaninkoore ngullanii Yahuudiyankoo6e haalo6e ibaraninkoore, sabi rewbe mum'en talka'en 6e worbe mum'en maayi 6ee njakkantaake hiraande so yimbe fuu ana njakkane.

<sup>2</sup> Nelaabe sappo e didon 6ee noddi jamaa goondinbe oo fuu, mbii:

—Minen, yoppude konngol Laamdo, min kiinnoo jakkaade hiraande, sellantaa min.

<sup>3</sup> Sakiraabe, cubee hakkunde moodon worbe njeddon anndiraa6e gikku lobbo, heewbe Ruuhu Ceniido e caahu, faa min keettina dum'en e oon golle. <sup>4</sup> Minen kaa, accon min kiinnoo waafude duwaawu e waajaade konngol Laamdo.

<sup>5</sup> Haala kaa weli goondinbe 6ee fuu. Nden 6e cubii Eciyen, gorko goondindo keewdo Ruuhu Ceniido oo, kapum e Filipa e Porokor e Nikanor e Timon e Parmenas e Nikolas, jeyaado Antiyokiya naatudo e diina Yahuudiyankoo6e oo. <sup>6</sup> Be ndarnaa yeeso nelaabe 6ee. Been pawi juude muudum'en e dow maabbe, nduwani 6e.

<sup>7</sup> Konngol Laamdo ana yaaja yaade, taalibaabe ana beydoo heewde sanne e ley Urusalima. Yottinoobe sadaka heewbe ngoondini Isaa.

### No Eciyen nanngiraa

<sup>8</sup> Eciyen, keewdo moyyere e baawde Laamdo oo, ana wadannoo kaayde e taagumansaaji mawdi hakkunde yimbe. <sup>9</sup> Kaa won yoga e jeyaabe e waajordu wiyeteendu waajordu rimdinaabe, kajum i iwbe Sireene e Aleksandiri e Silisi e Asiya, immaniiibe mo ana ndukida e makko, <sup>10</sup> kaa 6e ndonki jaalaade mo saabe omo haaldira e maabbe hakkilantaaku e Ruuhu. <sup>11</sup> Nden 6e kaaldi e yimbe yalla ana mbiya nanii omo yenna Muusaa e Laamdo. <sup>12</sup> Nii 6e njirkitiri jamaa oo e mawbe bee e dunkee'en Sariya bee. Nden, 6e nanngi Eciyen, 6e naabi dum to waalde Saahiiibe too, <sup>13</sup> 6e ngaddi seedee'en peneebe, ana mbiya:

—Oo gorko joottali yennude Suudu Dewal Mawndu nduu, o joottali yennude Sariya Muusaa. <sup>14</sup> Min nanii omo wiya lisaa Nasaraatunke oo wurjinan suudu nduu, waylita aadaaji di Muusaa daldi en dii.

<sup>15</sup> Saahiiibe joodiibe ton bee fuu puttini Eciyen gite, njii yeeso makko ana wa'i no yeeso malaa'ika nii.

## 7

### No Eciyen waajorii

<sup>1</sup> Nden Jottinoowo Sadaka Mawdo oo lamndii:

—Ko 6e mbiib koo, hono non worri naa?

<sup>2</sup> Eciyen jaabii, wii:

—Sakiraabe e baabiraabe, accee hakke, kettinee! Laamdo teddudo oo 6anganii njaati meeden Ibarahiima nde wonnoo leydi Mesopotamiya, fade muufum hodoyde Haran,<sup>3</sup> wii dum: «Eggu e leydi maa e suudu baam maa, njahaa e leydi ndi kollan-maa-mi ndii.»<sup>4</sup> Nden Ibarahiima iwi leydi Kaldiya, yehi hodoyi Haran. Caggal maayde baam mum, Laamdo eggini dum don, waddi dum e ndii doo leydi, ndi kodu-don e muufum joonin ndii.<sup>5</sup> Laamdo hokkali mo e leydi ndii fay taa6annde, kaa fodii hokkude mo ndi, ndi laatoo halal makko, kanko e iwdi makko, fay so taweede o walaa 6iddo tafon.<sup>6</sup> Annii ko Laamdo wii: «Iwdi maa feran joodoyoo leydi jananndi, maree, torree duubi teemede nay.<sup>7</sup> Kaa lejol marngol 6e ngol, mi jukkan dum'en. Caggal dum, 6e njaltan, 6e ndewa kam e oo doo nokku.»<sup>8</sup>

<sup>8</sup> Nden Laamdo nanngondiri e Ibarahiima aadi. Taadagol laatii finnde aadi ndii. Hono non, Ibarahiima hebi Isiyaaka, taadi dum nde hebunoo balde jetti. Hono non Isiyaaka taadiri Yaakuuba, hono non Yaakuuba duu taadiri 6i6be muudum sappo e difon, laatii6e njaatiraabe leji sappo e difi bee.

<sup>9</sup> Njaatiraabe bee kaasidii Yuusufu, cootti dum Misira. Kaa Laamdo ana wondi e makko, <sup>10</sup> hinnii mo e torraaji makko fuu, hokki mo moyyere e hakkilantaaku yeoso Fira'awna kaananke Misira oo. Oon wadi mo o dawranoowo galle muudum e Misira fuu. <sup>11</sup> Nden yolbere wadi ley Misira e Kanaana fuu. Billare mawni faa njaatiraabe meeden ndonki nguure. <sup>12</sup> Nde Yaakuuba nannoo jaamri ana Misira ndee, neli ton njaatiraabe meeden. Be ngarti, 6e njehi kasen. <sup>13</sup> Nden Yuusufu anndintini sakiraabe muudum bee hoore mum. Suudu baaba Yuusufu duu 6anganii Fira'awna. <sup>14</sup> Nden Yuusufu neli noddanee baam mum Yaakuuba e koreejii muudum fuu, 6e capande njeddon e njoyon neddo. <sup>15</sup> Yaakuuba nootoyii Yuusufu Misira. O maayi ton, kanko e njaatiraabe meeden bee. <sup>16</sup> Be nabtaa Sikem, 6e iraa e yanaande nde Ibarahiima soodunoo e 6i6be Hamor to Sikem too kaalisi cardi.

<sup>17</sup> Nde fodoore nde Laamdo fodanoo Ibarahiima badinoo yottaade ndee, Ibaraninkoo6e keewi ley Misira. <sup>18</sup> Oon wakkati, kaananke goddo mo anndaano Yuusufu laamii Misira. <sup>19</sup> Oon kaananke hilii lejol meeden, torri njaatiraabe meeden faa tilsi 6e 6e njoppa cukaloy maabbe yalla ana maaya. <sup>20</sup> Ley oon wakkati, Muusaa fini, laatii moy-naro sanne. O muyninaa lebbi tati e galle baam makko. <sup>21</sup> Nde o tippaan ndee, 6ii Fira'awna debbo hoocciti mo, jogorii mo 6iyum. <sup>22</sup> Hono non Muusaa jaangiri annde Misirankoo6e fuu, o laatii barksaani haalaaji e golleeji.

<sup>23</sup> Nde Muusaa hebunoo duubi capande nay ndee, anniyii faabaade sakiraabe muudum 6i6be Israa'lila, <sup>24</sup> O yii Misiranke ana tooja gooto maabbe, o yo6tii ko ne6do makko oo tooja koo, o fi Misiranke oo, o warii dum. <sup>25</sup> O sikkuno sakiraabe makko bee paaman Laamdo ana hisinira dum'en saabe makko, kaa bee paamaali. <sup>26</sup> Janngo muudum o forri e difon maabbe ana ka6a. O yidi rewrintinde 6e, o wii: «Gidiraabe am, onon, on sakiraabe! Ko waddondiri on?» <sup>27</sup> Non toojudo tanaa muudum oo dunyi mo, wii: «Homo wadu maa hooreejo naa caroowo amen? <sup>28</sup> Dum nee a muuydo warde kam no mbaraduno-daa Misiranke oo keejen nii?»<sup>‡</sup> <sup>29</sup> Muusaa dogiri saabe konngol ngol, fери, yehi leydi Madiyan. O hebi ton 6i6be worbe difon.

<sup>30</sup> Nde mo hi66innoo ton duubi capande nay ndee, malaa'ika 6anganii mo e ley metangal wuutuure hub6oore ley ladde jeereende bange waamnde haayre wiyeteende Siinaayi.

<sup>31</sup> Nde Muusaa yii dum ndee, haaynaa e ko yii koo. Omo battitoo faa mo yeewa, nii

daande Joomiraado wii: <sup>32</sup> «Miin woni Laamđo njaatiraabe maa, Ibarahiima e Isiyaaka e Yaakuuba.» Muusaa darii ana sijjna, huli yeewde. <sup>33</sup> Joomiraado wii mo: «Boorta pađe maa, sabi nokku do ndari-daa doo yo leydi seniindi. <sup>34</sup> Mi yii torra kewtiido yimbe am bee to Misira, no dum foti naawde, mi nanii boytaali mađbe, mi jippiima faa mi tonngita be. Joonin, war mi nele Misira.»<sup>§</sup>

<sup>35</sup> Muusaa mo be calanii so be mbii: «Homo wadu maa hooreejo naa caroowo?» oo Laamđo neli, so wadi dum ardiido e kisinoovo, saabe malaa'ika banngannoodo dum e ley wuutture oo. <sup>36</sup> Kanko yaltini be, o wadi kaayde e taagumansaaji ley leydi Misira e ley maayo Maaliya e ley ladde jeereende duuđi capande nay. <sup>37</sup> Oo woni Muusaa biido biđbe Israa'iila: «Laamđo nelan e mon annabaajo hono am, sakiike mon.» <sup>38</sup> Kanko wondi e malaa'ika kaaldunoodo e makko to waamnde haayre wiyyeteende Siinaayi, kanko wondi e njaatiraabe meeden nde be moođtinoo ley ladde jeereende ndee, kanko hebi konngi guurnooji faa o hokka en.

<sup>39</sup> Kaa njaatiraabe meeden njabaali dowlanaade mo. Be calanii mo, hakkillaaji mađbe mbirfii Misira, <sup>40</sup> be mbii Haaruuna: «Wadan en tooruujii ardotoodi en, sabi en andaa ko hewtii Muusaa jaltinnoodo en leydi Misira oo.»<sup>\*</sup> <sup>41</sup> E ley deen nalaade be tafi tooru suuriindu suura gahel, be ngafani ndu sadaka, be ceyorii golle juude mađbe. <sup>42</sup> Laamđo duurtii be, yoppiri be rewde koode kammu, hono no winndiraa e dewtere annabaabe nii: «Hey suudu baaba Israa'iila!

Duuđi capande nay di ngadu-don ley ladde jeereende dii,  
on ngadani kam sadakaaji kirsamaaji naa?

<sup>43</sup> On ngadaali. On ndoondiima hukkum tooru Moloko,  
kajum e hoodere tooru moodon Refan,  
nate de moyyin-don faa cujidanon dum'en!

Dum wadi so mido eggina on,  
faa nađe-don caggal Baabila.»<sup>†</sup>

<sup>44</sup> Eciyen jokkini hen:

—Njaatiraabe meeden bee ana njoginoo hukkum seedaaku ley ladde jeereende. Oon hukkum moyyiniraama hono no Laamđo tinndiniri Muusaa nii. <sup>45</sup> Njaatiraabe meeden ndoni hukkum oo. Be eggidi e makko wakkati mo Yosuwa ardiib be, be naanni mo leydi ndi be teeti leji di Laamđo ribbi dii. Dum worri non faa jamaanu Daawuuda. <sup>46</sup> Daawuuda hefii moyyere Laamđo, o naagii dum yalla omo yarranee mo mahana Laamđo Yaakuuba hodorde. O hebaali. <sup>47</sup> Suleymaana, kajum mahi ndu. <sup>48</sup> Kaa Laamđo Toowdo oo joodataako e cuudi di yimbe ngolli, hono no annabaajo wiiri nii:

<sup>49</sup> «Joomiraado wii:

Kammu yo joodorgal am,  
leydi yo njaabirki koyde am.

Suudu hondu mahanton kam?  
E nokku homo powtintoo-mi?

<sup>50</sup> Tama wanaa miin tagiri kulle dee fuu baawde am?»<sup>‡</sup>

<sup>51</sup> Eciyen jokkini hen, wii:

—Onon tiidube ko'e, yoorge berde, pahinkiniibe, abada odon calanii Ruuhu Ceniiđo oo hono no njaatiraabe moodon bee nii. <sup>52</sup> Homo woni annabaajo mo njaatiraabe moodon torraali dum? Be mbarii ardinoofe haalde haala garol Pooccitiido, mo onon e ko'e mon njammbi-don, so mbar-don dum jooni oo, <sup>53</sup> onon hebuđe Sariya Muusaa mo malaa'ika'en njippini so njokkaali dum bee.

#### No Eciyen wardiraa kaaye

<sup>54</sup> Nde Saahiiđe bee nannoo dii haalaaji ndee, be tikki faa be ndarii ebe ḥattanoo mo ebe picca pedeeli. <sup>55</sup> Kaa kanko kebbinaado Ruuhu Ceniiđo oo, o tiggitti kammu, o yii teddeengal Laamđo, o yii lisaa ana darii jaamo Laamđo. <sup>56</sup> O wii:

—Yeewee! Mido yiya kammu ana udditii, Bii Nedđo ana darii jaamo Laamđo!

<sup>57</sup> Be fuu be ngulli semmbe, be cukki noppo mađbe, be ndirani mo, <sup>58</sup> be njaltini mo ngalluure ndee, be mbedii mo kaaye. Seedee'en bee foortii saayaaji muudum'en, njoyyini banngi koyde jokolle biyeteedo Sool. <sup>59</sup> Ebe mbedoo Eciyen kaaye forri omo jaagoo Laamđo omo wiya:

—Iisaa Joomiraado, jađđa yonki am!

<sup>60</sup> Ndennoo, o dicci, o wulli faa toowi, o wii:

—Joomiraado, pati rewta be e dii luutti!

Nde o haalnoo dum ndee, o maayi.

## 8

<sup>1</sup> Sool ana yarrii ko 6e mbari Eciyen koo.

Oon jhalooma, torra mawdō hewtii deental goondinbe to Urusaliima too. Be fuu 6e caakii ley leyde Yahuudiya e Samariya, so wanaa nelaabe bee. <sup>2</sup> Worē hulbe Laamdo iri Eciyen, mboyi dum bojji mawdi sanne. <sup>3</sup> Kaa Sool tewtiim minde deental goondinbe ngal. Omo naata cuudi, o nannga worbe e rewbe, o daasa dum'en, o uddoya dum'en kasu. <sup>4</sup> Kaa saakinooibe bee naati e yiilaade ana mbaajoo Kabaaru Lobbo oo.

*No Filipa waajorii Kabaaru Lobbo oo ley leydi Samariya*

<sup>5</sup> Filipa yehi e ngalluure wonnde ley leydi Samariya, waajii 6e haala Almasiihu. <sup>6</sup> Be fuu 6e kettinii ko Filipa waajotoo koo faa gasi, be njii taagumansaaji dī o wadi dī. <sup>7</sup> Sabi laddaabé heewbe, seydaani'en muudum'en njaltiri gullaali mawdi. Bonnguu6e heewbe e layoo6e cellii. <sup>8</sup> Dum laatanii ngalluure ndee seyo manngo.

<sup>9</sup> Gorko biyeteedo Simon ana wonnood e ngalluure ndee. Omo gollannoo ndaggadaaku, omo haaydinannoo Samariyankoo6e sanne, omo jogorinoo hoore makko won no o foti.

<sup>10</sup> Be fuu ebe njarranii mo, gila suka faa mawdō, 6e mbii:

—O gorko woni mo Laamdo lu6ii baawde biyeteedo «Baawde mawde».

<sup>11</sup> Be njokkii mo ko fooyi saabe omo haaydinannoo 6e e bidiga makko. <sup>12</sup> Kaa nde Filipa waajino6e Kabaaru Lobbo haala Laamu Laamdo e haala lisaa Almasiihu ndee, 6e ngoondini, worbe e rewbe fuu lootaa lootagal batisima. <sup>13</sup> Simon e hoore muudum goondini, kajum duu. Nde o batisaa ndee, o takkondiri e Filipa, o haaynaa nde o yiinoo taagumansaaji e kaayde mawde gadaade dee.

<sup>14</sup> Nelaabe wonbe Urusaliima bee nani Samariyankoo6e ngoondinii konngol Laamdo. Be nelii e muudum'en Piyeer e Yuhanna. <sup>15</sup> Nde been njottinoo ndee, nduwaniib 6e yalla ebe keba Ruuhu Ceniido, <sup>16</sup> sabi Ruuhu Ceniido jippaaki e fay gooto e maab6e tafon. Saabe lisaa Joomiraado oo tan 6e mbatisira. <sup>17</sup> Nden Piyeer e Yuhanna pawi juude muudum'en dow maab6e so fe kebi Ruuhu Ceniido.

<sup>18</sup> Nde Simon yii Piyeer e Yuhanna ana pawi juude muudum'en dow maab6e ana ndokka 6e Ruuhu Ceniido ndee, waddani 6e kaalisi, <sup>19</sup> wii:

—Ndokkee kam miin duu deen baawde yalla mo paw-mi juude am e dow muudum fuu ana hefa Ruuhu Ceniido.

<sup>20</sup> Nii Piyeer jaabii mo, wii:

—Yo Laamdo halke, aan e kaalisi maa, sabi a miili dokke Laamdo ana coottitiree kaalisi!

<sup>21</sup> A walaa gedal, a walaa yolannde e ley haala kaa, sabi fernde maa fooccitanaaki Laamdo.

<sup>22</sup> Tuubu, iw e bonannda maa oo, jaago-daa Joomiraado yaafe ko miilataa koo. <sup>23</sup> Sabi miyii ma a 6aleejo yonki, bonannda maa jaalike ma.

<sup>24</sup> Simon jaabii, wii:

—Naaganee kam Joomiraado pati fay huunde e ko mbii-don koo hewtoo kam.

<sup>25</sup> Caggal ko 6e ceettii so 6e mbaajii konngol Joomiraado ngol koo, Piyeer e Yuhanna mbirfittii Urusaliima. E laawol ngol, 6e mbaajii Kabaaru Lobbo oo e geelle Samariya keewde.

*No Filipa batisiri howruujo kaananke Ecopii*

<sup>26</sup> Malaa'ika Joomiraado wii Filipa:

—Imma, yaaru 6aleeri, laawol iwrungol Urusaliima so ana fa'i Gaaja, kann gol ngol jeevnugol.

<sup>27</sup> O immii, o yehi. Nden o tawi gorko Ecopiyanke, howruujo kaananke debbo Ecopii biyeteedo Kandaake, yehiino Urusaliima juuroyaade. Kanko haybata beembal jawdi kaananke debbo oo. <sup>28</sup> Nde o wirfitinoo ndee, omo joodii e wotoro makko, omo jannga ley dewtere annabi Esaaya. <sup>29</sup> Ruuhu wii Filipa:

—Batta, sawnda wotoro oo.

<sup>30</sup> Filipa dogi hewtii mo, nani omo jannga dewtere annabi Esaaya, wii mo:

—Ada faama ko njanngataa koo naa?

<sup>31</sup> Gorko oo jaabii, wii:

—Hono paamiran-mi so fay gooto firritanaali kam?

O ndaardi Filipa njappa jooddoo e makko. <sup>32</sup> Dee aayaaje o janngannoo e dewtere ndee: «O na6iraa hono no mbaalu kirsoyeedo nii.

E no njawdiri deyyirta yeeso kesoowo dum nii,  
hono non o deyyiri.

<sup>33</sup> Leydfinkinaare makko bonni sareede makko.

Homo waawi jantaade janta iwdi makko?

Sabi o mursinanaama yonki makko ga aduna gaa.»\*

<sup>34</sup> Howruujo oo wii Filipa:

—Mido ndaarde, haalanam homo annabaajo oo haalata haala muudum, hoore muudum naa goddo?

<sup>35</sup> Non Filipa jaabii, yeewi binndi dii, waajii mo Kabaaru Lobbo haala Iisaa. <sup>36</sup> Ee njokki laawol maabbe ngol faa ee njii ndiyam. Howruujo oo wii:

—Ndiyam annii! Ko hadata kam looteede lootogal batisima? [ <sup>37</sup> † ]

<sup>38</sup> O yamiri wotoro oo daroo. Be difon fuu ee njippi, ee ndegii e ndiyam dam. Filipa batisi mo. <sup>39</sup> Nde ee yeentunoo ndiyam dam ndee, Ruuhu Joomiraado diwtii Filipa. Howruujo oo yiitaali mo kasen, jokkiri laawol muudum seyo. <sup>40</sup> Filipa tawoyaa Ajootus. Gila don faa Kaysariya, ngeenndi fuu ndi mo wari e muudum, o waajoto Kabaaru Lobbo oo.

## 9

### No Sool tuubiri

<sup>1</sup> Sool ana heddi e gidoraade taalibaabe Joomiraado bee waran ee. O yehi to Jotinoowo Sadaka Mawdo. <sup>2</sup> O ndaardi dum talki yamiroore naannooji mo cuudi baa-jordi Yahuudiyankoobe gondi Damas, yalla so o tawii ton yimbe jokkuue laawol Iisaa, worbe naa rewbe, o nanga dum'en, o habba, o naba Urusaliima. <sup>3</sup> Nde o yahunoo faa o badii Damas ndee, wakkati gooto fooyer iwri dow kammu filii mo. <sup>4</sup> O saami e leydi, o nani daande ana wiya mo:

—Sool, Sool, ko saabii so afa torra kam?

<sup>5</sup> O lamndii:

—Aan homo, gido Laamdo?

Jaabu wari e makko:

—Miin Iisaa mo torru-daa oo. <sup>6</sup> Imma naatu e ley ngalluure ndee. Be kaalante ko kaandaa wadufe.

<sup>7</sup> Worbe wondube e makko see, nani daande ndee kaa njyaali fay gooto. Be ndarii, ee mugaa. <sup>8</sup> Sool immii e leydi, darii ana futtini gite muudum, kaa yiylataa fay huunde. Nden o dowaa, o naannaa Damas. <sup>9</sup> O wadi balde tati o bumdo, o jaamaali o yaraali.

<sup>10</sup> Taalibbo biyeteedo Ananiyas ana wonnoo Damas. Joomiraado noddi dum ley koydol, wii dum:

—Ananiyas!

O jaabii, o wii:

—Haa, Joomiraado.

<sup>11</sup> Joomiraado wii mo:

—Imma yaaru Bolol Dartiingol, naataa galle Yahuuda, ndaartaa gorko biyeteedo Sool, jeyado Tarsus, sabi jooni omo wondi e wadufe duwaawu. <sup>12</sup> O yii e ley koydol gorko biyeteedo Ananiyas ana naata, ana fawa juude muudum e makko, yalla omo wumta.

<sup>13</sup> Ananiyas jaabii, wii:

—Joomiraado, mi narrii yimbe heewbe haala oo gorko e torraaji keewdi o wadi seniise maa wonbe Urusaliima bee. <sup>14</sup> O wardii doo e yamiroore hooreebey yottinoobe sadaka, faa o haabba noddooobe innde maa fuu.

<sup>15</sup> Joomiraado wii mo:

—Yaa wadyo no mbii-mi nii, sabi oo gorko cubii-mi faa anndina yimbe innde am. O waajoo dum leji e kaanankoofe, kajum e biibee Israa'ilila. <sup>16</sup> Mi hollan mo no tilsiри mo torriree torraaji keewdi saabe am.

<sup>17</sup> Nden, Ananiyas yehi, naatoyi suudu nduu, fawi juude muudum e makko, wii:

—Sakiike am Sool, Joomiraado men Iisaa banngannoodo ma e laawol ngardanno-daa ngol oo, nelii kam faa mbumtaa, keewaa Ruuhu Ceniido.

<sup>18</sup> Oon wakkati fuu, huunde wa'unde no koobaaaje nii hoobbitii e gite Sool, o wumti, o immii, o lootaa lootogal batisima. <sup>19</sup> O jaami, o warti e noone makko. O heddodii e taalibaabe wonbe Damas bee balde seeda.

### No Sool waajorii kabaaru Iisaa ley Damas

<sup>20</sup> Sool hepii law fuddi waajaade haala Iisaa ley cuudi baajordi. O wii kajum jaati woni Bii Laamdo. <sup>21</sup> Hettintonoobe mo bee fuu kaaynaa, mbii:

—Wanaa kanko wonnoo torrannoodo goondinbe Iisaa wonbe ley Urusaliima bee naa? Wanaa faa o haabba goondinbe o naabaa dum'en to hooreebey yottinoobe sadaka waddi mo doo naa?

† <sup>8:37</sup> E dereeji booydi dii, yoga ana 6eyda aaya 37:Filipa wii: —So tawii ada goondiniri 6ernde laa6unde, walaa ko hadete batiseede. O jaabii, o wii: —Midoo goondini Iisaa Almasiihu woni Bii Laamdo.

<sup>22</sup> Ana gooya fuu Sool ana býedoroo soobee e ley waaju mum oo, faa dum wemmbi Yahuudiyanikoóbe wonbé Damas bee fuu, o laabéinani 6e Iisaa woni Almasiihu oo.

<sup>23</sup> Nalaade njehi, ngarti, Yahuudiyanikoóbe ndawridi faa mbara Sool. <sup>24</sup> Sool humpitii dabare maabé oo. Jemma e nalooma ebe kayba dame ngalluure ndee pati o yalta, yalla ebe keba no 6e mbarda mo. <sup>25</sup> Jemma gooto taalibaabé makko 6ami mo, ngatti mo e saguire, kabbi hen boggol, njawtini mo tatawol piliingol ngalluure ndee ngol.

#### No taalibaabé wonbé Urusaliima kebiri hoolaade Sool

<sup>26</sup> Nde Sool warnoo Urusaliima ndee, yidi takkaade e taalibaabé Iisaa bee, kaa 6e fuu ebe kula mo, 6e koolaaki yalla o laatiike taalibbo lisaa jaati jaati. <sup>27</sup> Nden Barnabas naabi mo to nelaabé bee too, haalani dum'en no o yiiri Joomiraado oo ana haalda e makko e laawol ngol, e no o waajorii haala Iisaa to Damas too e cuusal. <sup>28</sup> Caggal dum, Sool wondi e maabé, ana naata ana yalta ley galjeeli maabé Urusaliima, ana waajoroo haala Joomiraado kaa cuusal. <sup>29</sup> Omo haalda e Yahuudiyanikoóbe haalanoo6e yunaninkoore bee, omo yeddondira e maabé, jaka been ana tewtannoo no mbarda mo. <sup>30</sup> Nde deental goondinbé ngal annditinnoo dum ndee, naabi Sool Kaysariya. Caggal dum, 6e neli mo Tarsus. Ceniido.

#### No Piyeer golliri kaayde ley geelle biyeteede Lidda e Yoppe

<sup>32</sup> Piyeer ana yilotonoo e ley leydi ndii fuu, o jippanii seniibé wonbé Lidda bee duu. <sup>33</sup> O tawi ton gorko jawdo mo terde muudum fuu mbaati, biyeteedo Ayneyas. Wadii duubi jetti ana leelii. <sup>34</sup> Piyeer wii mo:

—Ayneyas, Iisaa Almasiihu sellinii ma! Imma, moyyintin lelnde maa!  
Oon wakkati fuu o immii. <sup>35</sup> Wonbé Lidda e feeyo Saron fuu njii mo, tuubani Joomiraado.

<sup>36</sup> Taalibbo debbo biyeteedo Tabita ana wonnood Yoppe. Tabita woni Dorkas e yunganinkoore, maanaa mum yo lewla. Omo golla galjeeli lobbi, omo wadana misikiina'en moyyere. <sup>37</sup> E deen balde o jawni, o maayi, o lootaa, o lelnaa dow sooro tafon. <sup>38</sup> Nde wonnood Yoppe woddondiraa e Lidda, taalibaabé bee nani Piyeer ana ton, neli worbé didon ndarda mo o yottoo dum'en law. <sup>39</sup> Piyeer immii, yaadi e maabé. Nde yottinoo ndee, 6e njabbini dum dow sooro too. Rewbé talka'en bee worbé mum'en maayi bee fuu battii dum ndarrii ana mboya, ana kolla dum forgooji e dollokaaji dí Dorkas no'uno nde wondunoo e muudum'en ndee. <sup>40</sup> Piyeer yaltini yimbé bee fuu, diccii, ana duwoo. Caggal dum, yeccitii e maaydó oo, wii:

—Tabita, imma!

Non Tabita feerti gite muudum, yii Piyeer, joodii. <sup>41</sup> Piyeer nanngi junngo makko, immini mo. Caggal dum, o noddi seniibé bee e rewbe talka'en bee, o holli dum'en Tabita yo guurdo.

<sup>42</sup> Dum nanaa e ley Yoppe fuu, heewbé ngoondini Joomiraado. <sup>43</sup> Piyeer faabbi Yoppe baldé kuurde e galle jobboowo guri biyeteedo Simon.

## 10

#### No Piyeer noddiraa to suudu Korneliyus too

<sup>1</sup> Gorko biyeteedo Korneliyus ana wonnood Kaysariya. O hooreejo konu biyeteedo Italiyanke. <sup>2</sup> O kuppidiido e diina, kanko e koreejii makko fuu 6e hulbé Laamdo. Omo sakkoo Yahuudiyanikoóbe sadakaaji keewdii, omo jaagoo Laamdo wakkati fuu. <sup>3</sup> Kiikiidé gooto hono wakkati salifanaa fuubudo, o hebii holleede, o yii malaa'ika ana naata ley suudu makko ana wiya mo:

—Korneliyus!

<sup>4</sup> O huli faa gite makko paapii, o wii dum:

—Gido Laamdo, kori jam?

Malaa'ika oo wii mo:

—Laamdo jaabaniike ma duwaawuuji maa e sadakaaji maa. <sup>5</sup> Nel jooni worbé to ngeenndi Yoppe, noddia biyeteedo Simon, noddirteedo Piyeer. <sup>6</sup> Omo jippii galle jobboowo guri biyeteedo Simon, mo galle muudum heedi e maayo geeci.

<sup>7</sup> Nde malaa'ika kaaldannoodo e makko oo wittunoo ndee, o noddi golloo6e makko didon e sordaasi gooto kuldo Laamdo jeyaado e howruu6e makko. <sup>8</sup> O haalani 6e ko malaa'ika oo wii koo fuu, o neli 6e Yoppe.

<sup>9</sup> Janngoo muudum, ebe e laawol. Nde worbé taton bee battii ngeenndi ndii ndee, tawi Piyeer njabbii dow bene muudum wakkati hakkunde naange faa wada duwaawu. <sup>10</sup> O yolbi faa sanne, omo yidi jaamde. Nde 6e moyyinanta mo jaamdu ndee, Laamdo holli mo, <sup>11</sup> o yii kammu udditike, huunde wa'unde no daddamaare mawnde, nde co6buli muudum nay

fuu kaăbaa, ana rennee faade e leydi. <sup>12</sup> Sii daabaaji fuu, di koyde nay e njarooji, kajum e sii pooli fuu ana e mayre. <sup>13</sup> Daande wii mo:

—Piyeer, imma, hirsu, jaam!

<sup>14</sup> Piyeer wii:

—Sawra Joomiraado! Abada mi jaamaali ko harmi naa ko so6i.

<sup>15</sup> Daande ndee wii mo kasen:

—Pati harmin ko Laamdo senni.

<sup>16</sup> Dum wadi non cili tati. Nden daddamaare ndee njabbintinaa dow kammu.

<sup>17</sup> Ko Piyeer holaa koo, omo miiłoo no dum waawi laatoraade. Tawi e oon wakkati, worbe 6e Korneliyus nelnoo 6ee, lamndike galle Simon. Be ngari, 6e ndarii e damal ngal.

<sup>18</sup> Be noddi, 6e lamndii yalla Simon noddirteedo Piyeer don jippii. <sup>19</sup> Piyeer ana heddie muilde ko yii koo, faa Ruuhu wii dum:

—Worbe taton ana tewte. <sup>20</sup> Imma, jippa, njaadaa e ma6be tawa a sikkitaaki, sabi miin neli 6e.

<sup>21</sup> Piyeer jippii, wii worbe 6ee:

—Mido nii, miin woni mo tewtaton oo. Kori jam waddi on?

<sup>22</sup> Be njaabii, 6e mbii:

—Korneliyus hooreejo konu neli min. O gorko dartiido, kuldo Laamdo, mo lejol Yahuudiyankoo6e fuu seettanii moyyere. Malaa'ika ceniido yamirii mo min nodde, ngaraa suudu makko, yalla omo nana waaju maa.

<sup>23</sup> Piyeer noddi 6e, silmini 6e, jippini 6e galle muudum.

Janngu muudum, o immii, o yaadi e ma6be. Yoga e sakiraabe jeyaa6e Yoppe njaadi e makko. <sup>24</sup> Fa66i-janngu muudum 6e njottii Kaysariya. Korneliyus ana tijinoo 6e, noddi sakiraabe muudum e yi6be muudum 6adii6e. <sup>25</sup> Nde Piyeer naatannoo ndee, Korneliyus ja66ii dum, sujidani dum. <sup>26</sup> Piyeer itti mo e sujuudu nduu, wii:

—Imma, sabi miin duu mi neddo tan.

<sup>27</sup> Piyeer ana haalda e makko, faa 6e naati galle oo, tawi ton yimbe heewbe ana moobtii. <sup>28</sup> O wii 6e:

—Odon anndi dagantaako Yahuudiyanke jokkondira e mo wanaa Yahuudiyanke, naa naatude suudu muudum. Kaa Laamdo hollii kam pati mi nanngira fay gooto karmudo naa cobudo. <sup>29</sup> Dum wadi nde nelan-don kam ndee, mi warii, mi ujaaki. Dum nee, kaalanee kam, saabe kocdum noddir-don kam?

<sup>30</sup> Korneliyus jaabii, wii:

—Hannde woni balde nay, mido wada duwaawu ley suudu am e oo doo wakkati, faa gorko mo kaddule jalbooe wari, darii yeeso am, <sup>31</sup> wii: «Korneliyus, Laamdo jaabanike ma duwaawuui maa e sadakaaji maa. <sup>32</sup> Jooni, nel e ngeenndi mbiyeteendi Yoppe, noddane-daa gorko biyeteedo Simon, noddirteedo Piyeer. Omo jippii galle njabboowo guri biyeteedo Simon, mo galle muudum heedi e maaayo geeci.» <sup>33</sup> Dum wadi so nel-mi noddoye-daa oon wakkati fuu. Ko ngar-daa koo gasii sanne. Jooni min fuu minden nii yeeso Laamdo faa min kettino ko Joomiraado yamir maa mbaajo-daa fuu.

<sup>34</sup> Nden Piyeer fuddi waajaade, wii:

—Jooni mi yii goonga jaati Laamdo gurdintaa yimbe. <sup>35</sup> Neddo kuloowo mo, gadoowo ko fooccitii, o yidan dum ko lejol muudum tawaa fuu. <sup>36</sup> Odon anndi konngol ngol Laamdo neldi 6i66e Israa'ilila ngol, ngol ceynriowol jam he6iraama saabe Iisaa Almasihu, kajum woni Joomiraado yimbe fuu. <sup>37</sup> Odon anndi ngol konngol kuubungol leydi Yahuudiyu fuu, puddirngol gila Galili, caggal Yaayaa waajike yo yimbe loote batisima. <sup>38</sup> Odon anndi no Laamdo sufiorii Iisaa Nasaraatunke oo, no jippiniri e muudum Ruuhu Ceniido e baawde. Odon anndi no Iisaa yiiliorii e nokkuuje fuu ana golla golleeji lobbi, ana sellina wonnoobe e marginal Ibilisa fuu sabi Laamdo ana wondi e muudum. <sup>39</sup> Minen min seedee'en ko o gollu Yahuudiya e ko o gollu Urusalima fuu. Be bili mo e leggal bardugal, 6e mbari mo, <sup>40</sup> kaa Laamdo wuurtinii mo jannide tatafare, 6annigintini mo hakkunde amen. <sup>41</sup> Kaa wanaa yimbe fuu o 6annganii. O 6annganii seedee'en ee Laamdo adii sufaade 6ee, minen jaamduue e makko so njardi e makko caggal wuurtugol makko 6ee. <sup>42</sup> O yamirii min mbaajoo yimbe, min ceettoo kanko woni mo Laamdo wadi caranoowo wuurb6e e maay6e. <sup>43</sup> Annabaabe fuu ceettanike mo, mbii goondindo mo fuu heban yaafeede luutti muudum saabe makko.

<sup>44</sup> Nde Piyeer waajtoto waaju oo ndee, Ruuhu Ceniido jippii e hettinto6e 6ee fuu.

<sup>45</sup> Yahuudiyankoo6e goondin6e warduno6e e Piyeer 6ee fuu kaaynaa, no dokkal Ruuhu Ceniido ngal saakorii e yimbe 6e nganaa Yahuudiyankoo6e nii. <sup>46</sup> Sabi ebe nanannoo been yimbe ana kaala e demde janane ana njetta Laamdo. Nden, Piyeer jaabii, wii:

<sup>47</sup> —Yimbe 6ee ke6ii Ruuhu Ceniido hono no meeden nii. Homo waawi hadude 6e looteede lootogal batisima?

<sup>48</sup> O yamiri 6e mbatisiree e innde Iisaa Almasiihu. Caggal dum, 6e ndaardi mo o fa66ana 6e balde.

## 11

### No Piyeer jaaborii deental goondin6e gonngal Urusaliima

<sup>1</sup> Nelaabé 6ee e sakiraabé wonnoo6e Yahuudiya 6ee nani yim6e 6e nganaa Yahuudiyan6oo6e 6ee duu ke6ii konngol Laamdo. <sup>2</sup> Nde Piyeer 6abbunoo Urusaliima ndee, goondin6e tilsin6e taadagol 6ee peli dum, 3 mbi:

—A jippike e yim6e 6e taadaaki, a jaamddii e muudum'en!

<sup>4</sup> Nden Piyeer haalani 6e ko wadi koo gila e puuddoode faa e timmoode, wii:

<sup>5</sup> —Ngeenndi Yoppe ngonnoo-mi, mido duwoo faa njii-mi huunde yellitike e am. Huunde wa'unde no daddamaare mawnde nde co66uli muudum nay fuu kab6aa, ana rennee iwde e kammu faade e am. <sup>6</sup> Taykitii-mi nde faa gasi, njii-mi daabaaji fuu, di koyde nay e kulle ladde e jaaroji e sii pooli fuu. <sup>7</sup> Nanu-mi daande ana wiya kam: «Piyeer, imma, hirsu, jaam!» <sup>8</sup> Mbi-mi: «Sawra Joomiraado! Abada mi jaamaali ko harmi naa ko sobi.» <sup>9</sup> Daande dow kammu ndee jaabitii kam kasen, wii: «Pati harmin ko Laamdo senni.» <sup>10</sup> Dum wadi non cili tati. Caggal mum, kulle dee fuu 6abbintinaa dow kammu. <sup>11</sup> E oon wakkati, wor6e taton nelaabé e am iwde Kaysariya ngari e suudu do min ngonnoo doo. <sup>12</sup> Ruuhu Ceniido wii kam mi yaada e ma66e pati mi sikkito fay huunde. Bee doo sakiraabé njeegom njaadi e am, min naaddi suudu Kornelyus. <sup>13</sup> O haalani min no o yiiri malaa'ika darinoodo suudu makko ana wiya mo: «Nel e ngeenndi mbiyeteendi Yoppe noddane-daa Simon noddirteedo Piyeer. <sup>14</sup> O waajete waaju kisinoowa ma, aan e koreejii maa fuu.» <sup>15</sup> Nde pu6fu-mi waajaade ndee, Ruuhu Ceniido jippii e ma66e hono no jipporinoo e meeden arannde nii. <sup>16</sup> Nden, miccitii-mi ngol doo konngol ngol Joomiraado wiinoo: «Yaayaabatisirannoo ndiyam, kaa onon, on mbatisirte Ruuhu Ceniido.» <sup>17</sup> So Laamdo fonndii en e ma66e, hokkii 6e ko hokkunoo en koo nde ngoondinno-den Joommen Iisaa Almasiihu ndee, ndennoo miin, ko ngon-mi so mi hada Laamdo?

<sup>18</sup> Nde 6e nannoo dum ndee, 6e ndeyyinii, e6e njetta Laamdo, e6e mbiya:

—Laamdo tuubinii yim6e 6e nganaa Yahuudiyan6oo6e duu yalla ana ke6a nguurndam ngoongaraajam.

### No Kabaaru Lobbo waajiraa ley Antiyokiya

<sup>19</sup> Yoga e saakii6e saabe torraaji gadudi caggal maayde Eciyen 6ee, njehi faa Finikiya e Kiprus e Antiyokiya. Be mbaajaaki konngol ngol so wanaa Yahuudiyan6oo6e. <sup>20</sup> Kaa yoga e goondin6e iwoobe Kiprus e Sireene naati Antiyokiya ana mbaajoo Kabaaru Lobbo haala Iisaa Joomiraado oo hakkunde Yunaninkoo6e. <sup>21</sup> Baawde Joomiraado ana e ma66e. Yim6e heew6e ngoondini, tuubi, ngarti e Joomiraado.

<sup>22</sup> Deental goondin6e won6e Urusaliima 6ee nani kabaaru gadudo Antiyokiya oo, neli ton Barnabas. <sup>23</sup> Nde oon yottinoo so yii e ma66e moyyere Laamdo ndee, seyii, waajii 6e fuu 6e tiinnoo 6e tabita e Joomiraado 6ernnde laabunde. <sup>24</sup> Barnabas yo gorko moyyo, kebbinaado Ruuhu Ceniido e goondinal. Jamaa keewod goondini Joomiraado saabe makko.

<sup>25</sup> Caggal dum, Barnabas yehi Tarsus faa tewtoya Sool. <sup>26</sup> Nde o yiiti dum ndee, o na6i dum Antiyokiya. Be ngondii e deental goondin6e won6e ton bee hitaande hiibbere, 6e njannginii yim6e heew6e. Taalibaabé won6e Antiyokiya 6ee adii fuu wiyeede yim6e Iisaa.

<sup>27</sup> E deen balde, yim6e loowaase konngol Laamdo iwrube Urusaliima ngari Antiyokiya. <sup>28</sup> Gooto e ma66e biyeteedo Agabus, immii, darii, sapporii saabe Ruuhu yolbere mawnde wadan ley laamu Roma fuu. Nde wadi e laamu kaananke mawdo biyeteedo Kalawdiyus.\* <sup>29</sup> Taalibaabé 6ee anniyii hawrintinde gooto fuu ko waawi, faa 6e nelda sakiraabé ma66e won6e Yahuudiya 6ee paabitoroo. <sup>30</sup> Be ngadi dum, 6e neldi ballal ngal Barnabas e Sool tummmaa e juude mawbe deental ton.

## 12

### No goondin6e torrira

<sup>1</sup> Oon wakkati, kaananke biyeteedo Hirudus fuddi torrude yoga e deental goondin6e ngal. <sup>2</sup> O yamiri Yaakuuba sakiike Yuhanna oo wardee kaafaawi. <sup>3</sup> Nde o yiinoo edum weli Yahuudiyan6oo6e ndee, o nannngi Piyeer duu. Dum hawri e wakkati iidi mo buuru yuufinaaka. <sup>4</sup> Nde o nanngunoo Piyeer ndee, o uddi dum, o yamiri pelle nay sordaasi'en loomtondira e haybugol mum, fedde fuu yim6e nayon. O anniyike na6ude dum yeeso

\* <sup>11:28</sup> Kalawdiyus yo kaananke Roma mawdo joya6o. O laamike hakkunde duu6i 41 e 54 caggal pinaade Iisaa. Taariki oon jamaanu ana holla yolbere mawnde wadiino ley laamu Roma fuu hakkunde duu6i 46 e 48 caggal pinaade Iisaa.

yimbe fuu, so iidi Paska oo yaabéike.<sup>5</sup> Dum wadi so Piyeer haybaa e ley kasu oo, kaa deental goondinbe ngal njoottalaal naaganaade mo Laamdo.

<sup>6</sup> Nde Hirudus anniyinoo naabude mo ndee, oon jemma omo daaninoo hakkunde sorasai'en didon, omo haabéeraa calali didi. Hayboobe damal kasu oo bee duu ana kayba.<sup>7</sup> Nii malaa'ika Joomiraado wari e makko, suudu nduu fuu fooyni, memi mo, finndini mo, wii:

—Hena law, imma!

Non calali dii kumtii, iwi e juude makko, caami.<sup>8</sup> Malaa'ika oo wii mo:

—Huma kumorgol maa, boorna pade maa.

Piyeer wadiri non. Malaa'ika oo wii mo:

—Waanda suddamaare maa, njokkaae e am.

<sup>9</sup> Piyeer yalti, jokki e makko. O anndaa ko malaa'ika oo wadata, ana wa'ani mo hono no koydol nii, kaa dum goonga jaati.<sup>10</sup> Be betti kayboowo arano oo, kapum e didaabo oo, be njottii damal njamndi pewtungal e ngalluree ndee ngal. Ngal udditi hoore maggall yeeso maabé, be njalti, be njokki e laawol ngol. Oon wakkati, malaa'ika oo seerti e makko.

<sup>11</sup> Hakille Piyeer warti, o wii:

—Jooni mi tayori Joomiraado neli malaa'ika muudum, faa hisina kam e junngo Hirudus e ko Yahuudiyankoobe njoondorinoo mi wafete fuu.

<sup>12</sup> Nde hakille makko jippitino ndee, o yehi galle Mariyama, inna Yuhanna nodirteedo Marka, ton yimbe heewbe moobtotonoo ana ngada duwaawu.<sup>13</sup> Nde Piyeer tappunoo damal galle too ndee, golloovo debbo biyeteedo Rode wari e damal ngal faa humpitoo.<sup>14</sup> Nde o annditinnoo daande Piyeer ndee, o yeggit udditinde damal ngal no o foti seyaade, o dogi o naatoyi, o humpiti be Piyeer darii damal sella too.<sup>15</sup> Be mbii mo:

—A kaahaango!

Kaa omo heddi nanngude dum Piyeer. Be mbii kasen:

—Dum yo malaa'ika makko.

<sup>16</sup> Kaa dum fuu Piyeer ana heddi tappude. Nde be udditinnoo so be njii mo ndee, be kaaynaa sanne.<sup>17</sup> O huncani be junngo yalla ebe ndeyyinoo, o jantanii be no Joomiraado yaltiniri mo kasu, o wii:

—Kaalanee dum Yaakuuba, kapum e sakiraabe wobbe bee.

Caggal muudum, o yalti, o yehi nokku goddo.

<sup>18</sup> Nde finnoo beetee ndee, sordaasi'en bee ana lamndondira hoto Piyeer woni, be mbemmbaa faa hakkillaaji maabé keli.<sup>19</sup> Nde Hirudus ndaarnoo faa nannga mo, so hebaali mo ndee, lamndii hayboobe bee no laatii, yamiri be mbaree. Caggal dum, Hirudus regii Yahuudiya, yehi Kaysariya joodoyii ton.

### No Hirudus maayiri maayde bonnde

<sup>20</sup> Hirudus tikkani yimbe Tirus e Sidon. Been kaaldi, kawri, ngari e makko. Be adorii Bilastus howruujo makko oo, be kebi hakille muudum, be jaagii yalla dewral ana wada hakkunde maabé, sabi leydi maabé ndii e leydi Hirudus etata.

<sup>21</sup> Sarti maabé oo yottii, Hirudus boornii kaddule kaananke, joodii dow bimmbeere laamu, haaldi e maabé.<sup>22</sup> Yimbe bee ngulli, mbii:

—Dum daande laamdo, wanaa daande neddo!

<sup>23</sup> Oon wakkati fuu, malaa'ika Joomiraado fi Hirudus, sabi o jaabii teddinireede o Laamdo, tawi o wanaa. O yumi gildi, o maayi.

<sup>24</sup> Kaa konngol Laamdo ngol ana yaara yeeso, ana feydo saakaade.<sup>25</sup> Nde Barnabas e Sool tilinoo e golle muudum'en Urusaliima ndee, be mbirfodii e Yuhanna noddirteedo Marka.

## Dawol Pool aranol

### 13

#### No Barnabas e Pool cuubraa so nelaa faa ngolla golle Laamdo

<sup>1</sup> Annabaabe e jannginoobe ana e ley deental goondinbe gonngal Antiyokiya ngal. Kambe ngoni Barnabas e Simeyon noddirteedo Baleeo e Lukiyus mo Sireene e Manahen, bammbidanoodo e Hirudus hooreejo leydi oo, kapum e Sool.<sup>2</sup> Nannde wootere ebe ndewa Joomiraado tawi ebe ngoni e koorka, faa Ruuhu Ceniido wii be:

—Keertanee kam Barnabas e Sool saabe golle mo noddir-mi be oo.

<sup>3</sup> Caggal be koorii, be nduwike, be pawii juude maabé e dow been, be njoppiti dum'en ndawi.

<sup>4</sup> Nii Ruuhu Ceniido neliri be, be ndegii e Selewkiya, be naati laana geeci be peewi Kiprus.<sup>5</sup> Nde be njottino Salamis ndee, be mbaajji konngol Laamdo ngol ley cuudi baajordi Yahuudiyankoobe. Ebe ngondi e Yuhanna (noddirteedo Marka) ana faaboo be.<sup>6</sup> Nde be taccunoo ruunde ndee so be njottii Pafos ndee, be tawi ton daggada Yahuudiyanke

biyeteedo Bar-Iisaa, jaaroowo yo annabaajo,<sup>7</sup> howruujo Segiyus Pool. Oon yo kaananke hakkilante, caahiiđo. O noddi Barnabas e Sool sabi ana yidi nande konngol Laamdo ngol.<sup>8</sup> Kaa Elimas daggada oo yo calaniido 6e, omo tewta bonnitidde goonfinal kaananke oo. (Maanaa Elimas woni daggada.)<sup>9</sup> E ley dum, Sool biyeteedo kasen Pool kebbinaado Ruuhu Ceniido oo futtini mo gite,<sup>10</sup> wii:

—Bii Ibilisa! Aan keewdo jammaa e njiiđdu, gajo ko moyyi fuu! A seerataa e oojuude laawi Joomiraado pooccitiidí díi naa?<sup>11</sup> Jooni jukkungo Joomiraado saaman e maa, a wuman, a yiylataa naangne faa sarti cartaado oo yottoo.

Oon wakkati fuu, gite makko ngadi mbummbaaloo, de niđđi, omo wummbiloo, omo tewta dowoowo.<sup>12</sup> Nde kaananke oo yiino ko wadi koo ndee, goondini Iisaa, haaynaa e ko nani haala Joomiraado kaa koo.

*No Pool waajorii ley ngallure Antiyokiya ley leydi Pisidiya*

<sup>13</sup> Pool e yaaduđe e muudum naati laana geeci ngallure wiyeteende Pafos, peewi Perge ley leydi Pamfiliya. Don Yuhanna Marka seerti e mađđe, wifitii Urusalima.<sup>14</sup> Be yađđii Perge, 6e ngari Antiyokiya ley leydi Pisidiya. Be naati waajordunalaande fowteteende, 6e njoodii.<sup>15</sup> Caggal janungeede Sariya Muusaa e annabaabe, hooree 6e waajordu nduu 6ee neli e mađđe, mbi:

—Sakiraabe, so won ko mbaajoto-don yimbe 6ee, kaalee.

<sup>16</sup> Pool immii, hunci junngo muudum, wii:

—Israa'iilankoođe e hulđe Laamdo wođđe, kettinee: <sup>17</sup> Laamdo Israa'iilankoođe oo subiima njaatiraabe meeden, teddinii lejol mađđe nde ngol hodoyi leydi Misira ndee, kasen yaltiniri 6e ton baawde muudum.<sup>18</sup> O mujanii\* 6e ko foti duuđi capande nay e ley ladde jeeereende.<sup>19</sup> Caggal o halkii leji jeddi e ley leydi Kanaana, o hokki ndi yimbe makko ndona ndi.<sup>20</sup> Edsum waara e duuđi teemede nay e capande joy. Caggal dum, o hokki 6e saroođe faa jamaanu annabi Samuyila.<sup>21</sup> Nde dum betti ndee, 6e jaagii Laamdo hokka 6e kaananke. Laamdo hokki 6e Sawul 6ii Kis iwđo e lejol Benjamin. Oon laamii 6e duuđi capande nay.

<sup>22</sup> Nden Laamdo boorti Sawul, lammini Daawuuda, mo o haali haala muudum so o wii: «Mi heđđi Daawuuda 6ii Yessa gorko buuđinoowo fernde am, gafoowo sago am.»<sup>23</sup> E iwdi makko Laamdo yaltini Iisaa, kisinoowo Israa'iila no fodirnoo nii.<sup>24</sup> Fade Iisaa warde, Yaayaa waajinoke lejol Israa'iila fuu yo tuubu, lootee lootogal batisima.<sup>25</sup> Kasen, nde Yaayaa timmiinta golle muudum ndee, wiino: «Mi wanaa mo miilaton ngon-mi oo. Kaa mo mi fotaa fay e humtude foggi padë muudum ana wara caggal am.»

<sup>26</sup> Sakiraabe, onon iwdi Ibarahiima e been hulđe Laamdo wonđđe hakkunde mon! Onon neldaa oo kabaaru kisinoowo.<sup>27</sup> Sabi wonđđe Urusalima 6ee e hooree 6e muudum'en fuu annditaali Iisaa. Kasen duu 6e paamaali haalaaji annabaabe jangetenoodi jalaande fowteteende fuu dii. Kaa 6e njottinii diin haalaaji nde 6e carunoo mo ndee.<sup>28</sup> Fay so taweede be kebaali feloore fay wootore nde 6e pelira mo yalla omo maaya, 6e ndaardii Pilaatu o waree.<sup>29</sup> Nde 6e ngollki ko Binndi dii mbiinoo e makko koo faa hiđđi ndee, 6e njippini mo leggal bardugal ngal, 6e ngaci mo e yanaande.<sup>30</sup> Kaa Laamdo wuurtinii mo.<sup>31</sup> Balde kuurde o banngani wondunođđe e makko 6ee gila Galili faa Urusalima. Been ngoni seettantoođe mo yeeso yimbe jooni.<sup>32</sup> Minen, minden ceynira on fodoore nde njaatiraabe meeden podanaa ndee,<sup>33</sup> Laamdo hiđđinanii e dum, enen 6iđđe mađđe, nde wuurtinoo Iisaa ndee. No winndiraa kasen e jimol Jabuura didađabol:

«Aan, a 6iyam, hannde ndimu-maa-mi.»†

<sup>34</sup> Kasen, haala immitagol makko e hakkunde maay6e e waasugol makko nolde, nii Laamdo wii:

«Mi tabintinanen on podooje ceniide de mbontataa,  
de podannoo-mi Daawuuda dee.»‡

<sup>35</sup> Dum wadi so o wii e nokku goddo:

«A accataa Ceniido maa nola.»§

<sup>36</sup> Daawuuda wadii sago Laamdo e jamaanu muudum. Caggal dum, o maayi, o moođtidaa e njaatiraabe makko, o noli.<sup>37</sup> Kaa mo Laamdo wuurtini oo nolaali.<sup>38</sup> Sakiraabe, anndee saabe makko mbaajore-don yaafeede luutti.<sup>39</sup> Sariya Muusaa waawaa wadude nedđo pooccitiido, kaa kanko, goondindo mo fuu, o nanngiran dum pooccitiido.<sup>40</sup> Dum nee, kaybee pati ko annabaabe cappinoo koo hewto on:

<sup>41</sup> «Onon hoynufe,

yo on kaayne yo on kalko!

Sabi mido nii golla golle e ley wakkati moodon,

\* **13:18** Won binndande biideo jamminii 6e. † **13:33** Jabuura 2.7. ‡ **13:34** Esaaya 55.3. § **13:35** Jabuura 16.10.

golle mo on ngoondintaa so nedđo haalaniino on.»\*

<sup>42</sup> Caggal Pool e Barnabas njaltii waajordu nduu, jamaa oo ndaardi 6e yo 6e ngartu fowteteende waroore, yalla ebe njokka e waaju ma66e oo. <sup>43</sup> Caggal moo6tagol ngol, Yahuudiyanko6e heew6e e naatu6e e diina ma66e njokki e Pool e Barnabas. Been diidun duu ana kaalda e ma66e ana mbaajoo 6e yo 6e njiis u moyyere Laamdo.

<sup>44</sup> Fowteteende jokkunde hen ndee, ngalluure ndee fuu moo6tii yalla ana hettinoo konngol Laamdo. <sup>45</sup> Kaa nde Yahuudiyanko6e bee njiinoo o jamaa ndee, haasidaaku naati e muudum'en, ebe njedda ko Pool waajotoo koo, ebe njenna dum. <sup>46</sup> Nden Pool e Barnabas kaalaniri 6e cuusal, mbii:

—Waajibi min adoo haalande on konngol Laamdo ngol, kaa ko tippiti-don ngol so car-don ko'e moodon on kaandaa e nguurdam nduumiidam koo, min njahan to yim6e 6e nganaa Yahuudiyanko6e. <sup>47</sup> Sabi ko Joomiraado yamiri en koo annii:

«Mi darmii ma yalla ada laataano leji dii fooyre,  
faa kisinaa aduna oo fuu.»†

<sup>48</sup> Nde yim6e leji goddi dii nannoo dii haalaaji ndee, ceyii, teddini konngol Joomiraado ngol. Be Laamdo subanii nguurndam nduumiidam bee fuu ngoondini.

<sup>49</sup> Konngol Joomiraado ngol saakii e leydi ndii fuu. <sup>50</sup> Kaa Yahuudiyanko6e bee loofi rew6e rewoo6e Laamdo saahii6e, kajum e maw6e ngalluure ndee 6ee. Be ndoo6i torra dow Pool e Barnabas, 6e njaltini dum'en leydi ma66e. <sup>51</sup> Been duu piddi e ma66e colla koyde muudum'en, peewti Ikoniya. <sup>52</sup> Taalibaabe bee kebbinaa seyo e Ruuhu Ceniido.

## 14

### No Pool e Barnabas mbaajorii ley ngeenndi Ikoniya

<sup>1</sup> Ley Ikoniya duu Pool e Barnabas naati e ley waajordu Yahuudiyanko6e. Ebe mbaajoo faa Yahuudiyanko6e e yim6e leji goddi heew6e ngoondini. <sup>2</sup> Kaa Yahuudiyanko6e saliise goondinde bee loofi leji goddi dii, mbonni berde muudum'en yalla ana mbaja sakiraabe 6ee. <sup>3</sup> Dum e taweede hadaali 6e booyde ton, ebe pawi jikke ma66e e Joomiraado, ebe mbaajoroo cuusal. Joomiraado seettii konngol hinnee muudum, nde hokkunoo 6e baawde wadude taagumansaja e kaayde dogooje e juude ma66e. <sup>4</sup> Yim6e ngeenndi ndii 6ee peccii: yoga heedani Yahuudiyanko6e bee, yoga heedani nelaabe 6ee.

<sup>5</sup> Yim6e leji goddi e Yahuudiyanko6e e ardiib6e muudum'en anniyii torruude 6e e wardude 6e kaaye. <sup>6</sup> Nde 6e maatuno dum ndee, 6e ndogani Listara e Derbe e geelle seraaji muudum'en ley leydi Likoniya, <sup>7</sup> ebe mbaajoo ton Kabaaru Lobbo oo.

### No Pool e Barnabas mbaajorii ley ngeenndi Listara

<sup>8</sup> Gorko bonnguujo, dimdaado e bonnguwaaku, mo meedaali daraade e koyde muudum, ana wonnoo Listara. <sup>9</sup> Omo hettinoo waaju Pool. Pool yeewi mo, yii goondinal makko sellinta mo, <sup>10</sup> haaldi semmbe, wii:

—Imma, dara e koyde maa!

Gorko oo gurbitti, darii, ana yaha. <sup>11</sup> Nde yim6e 6ee njii ko Pool wadi koo ndee, ngulliri gullaali likonyankoore, mbii:

—Laamdo'en nanndinkinike e yim6e, njippiima e meeden!

<sup>12</sup> Be inndiri Barnabas «Jewus», 6e inndiri Pool «Hermes», \* sabi Pool wonnoo kaaloowo.

<sup>13</sup> Galle do Jewus rewetee ana wonnoo to naatirde ngeenndi too. Jottinoowo sadaka oo waddi ga'i pariraadi piindi e dame dee. Omo yidi wadude sadaka, kanko e yim6e 6ee. <sup>14</sup> Kaa nde Barnabas e Pool nannoo dum ndee, ceeki kaddule muudum'en, kejanii jamaa oo ana ngulla, <sup>15</sup> ana mbiya:

—Worbe, kodum ngadaton doo? Minen duu min yim6e hono moodon. Miden mbaajoo Kabaaru Lobbo oo faa tuubon, iwon e dii golleeji laaliidi, ngarton e Laamdo guurdo, tagudo kammu e leydi e geeci e ko woni e muudum'en fuu. <sup>16</sup> E jamaanuuji jawtuudi dii o yoppii leji dii fuu njokka laawi muudum'en. <sup>17</sup> Dum e taweede, omo golla ko moyyi faa dum seettanoo mo, omo hokka on to6o kammu, omo benndinana on namri e wakkati muudum, omo waaltinira hakkillaaji mon nguure e seyo.

<sup>18</sup> Ko 6e mbaajii koo fuu, semmbe 6e kadiri jamaa oo hokkude 6e sadaka.

<sup>19</sup> Caggal dum, Yahuudiyanko6e iwi Antiyokiya e Ikoniya. Be kefi hakkillaaji yim6e 6ee, 6een mbedii Pool kaaye, ndaasi dum faa na6i dum caggal ngeenndi ndii, sabi miilii mo maaydo. <sup>20</sup> Kaa nde taalibaabe bee ngari pilii mo ndee, o immii, o naatti e ley ngeenndi ndii.

### No Pool e Barnabas mbirfitorii Antiyokiya

\* **13:41** Habaakuk 1.5    † **13:47** Esaaya 49.6    \* **14:12** E ley diina Yunaninko6e Jewus woni hooreejo tooruudi, Hermes woni nelaado majji.

Janngó muudum, o yaadi e Barnabas ngeenndi mbiyeteendi Derbe. <sup>21</sup> Be mbaajii ton Kabaaru Lobbo oo, 6e kebi taalibaabe faa keewi. Caggal muudum, 6e mbirfitii Listara e Ikoniyá, kajum e Antiyokiya. <sup>22</sup> Ebe cuusina yonkijji taalibaabe, ebe mbaajoo dum'en yo jiiúu e goondinal, ebe mbiya:

—Kínaa tampen tampereejí keewdi so naaten e Laamu Laamdo.

<sup>23</sup> E ley deente goondinbe fuu, 6e cubanii dum'en hooreebe. Caggal dum, 6e koori, 6e nduwii, 6e kalfini dum'en Joomiraado mo 6e ngoondini oo.

<sup>24</sup> Nde 6e ceekunoo Pisidiya ndee, 6e ngari Pamfiliya. <sup>25</sup> Be mbaajii konngol ngol ley ngeenndi Perge. Caggal muudum, 6e njippoyii Attaliya. <sup>26</sup> Ton 6e naati laana geeci, 6e mbirfii Antiyokiya do 6e kalfinanoo moyyere Laamdo faa 6e ngolla golle mo 6e tilii jooni oo.

<sup>27</sup> Nde 6e njottinoo ndee, 6e moostti deental goondinbe ngal, 6e kaalani ngal ko Laamdo wadidi e maabé fuu, no o udditirani yimbe 6e nganaa Yahuudiyanikoobe damal goondinal.

<sup>28</sup> Be ngondi don e taalibaabe 6ee faa fooyi.

## 15

### *Haala kawrital gadaangal Urusalima*

<sup>1</sup> Yimbe yogaabe iwi Yahuudiya ngari Antiyokiya, ana njanngina sakiraabe 6ee, ana mbiya:

—So on taadiraaka no Muusaa wiiri nii, on kisataa.

<sup>2</sup> Pool e Barnabas poofondiri e maabé, nduddi e maabé faa naawi. Dum wadi so 6e tabintini nelde Pool e Barnabas e yimbe wobbe faa Urusalima, faade e nelaabe 6ee e hooreebe 6ee, saabe haala kaa. <sup>3</sup> Dum saabii so deental goondinbe ngal neli 6e. Be ceeki Finikiya e Samariya, ebe kaalana dum'en haala tuubugol yimbe 6e nganaa Yahuudiyanikoobe. Dum laatanii sakiraabe 6ee fuu seyo manngo. <sup>4</sup> Nde 6e njottinoo Urusalima ndee, deental goondinbe ngal e nelaabe 6ee e hooreebe 6ee njabbii 6e. Be kaalani dum'en ko Laamdo wadani 6e fuu.

<sup>5</sup> Kaa yoga e goondinbe jeyaaabe e fedde Farisa'en immii, mbii:

—Waajibi 6e taadee, 6e njamiree jokkude Sariya Muusaa oo.

<sup>6</sup> Nelaabe 6ee e mawbe 6ee kawriti faa yeewa haala kaa. <sup>7</sup> Caggal haali-haalti keewdo, Piyeer immii, wii 6ee:

—Sakiraabe, odon anndi Laamdo subike kam e ley moodon gila ko fooyi, faa mi waajoo Kabaaru Lobbo oo hakkunde yimbe 6e nganaa Yahuudiyanikoobe, yalla ebe nana 6e ngoondina. <sup>8</sup> Laamdo anndudo berde oo holli jaabanii 6e, nde hokki 6e Ruuhu Ceniido oo hono no meeden nii. <sup>9</sup> Walaa fuu ko o seenndiri en e maabé, nde wonnoo o labbinirii berde maabé goondinal. <sup>10</sup> Jooni, ko saabii so odon itta koro Laamdo? Odon pawa e taalibaabe 6ee donngal, ngal enen e maamiraabe meeden en mbaawaa roondaade. <sup>11</sup> E moyyere Joomiraado men lisaa ngoondinir-den so kisu-den, hono non kambe duu.

<sup>12</sup> Deental ngal fuu deyyinii teen, ana hettinoo Barnabas e Pool ana njantoo no Laamdo wadiri taagumansaaji e kaayde hakkunde lepi goddi. <sup>13</sup> Caggal 6e ndeyyinike, Yaakuuba jaabittii, wii:

—Sakiraabe, kettinanee kam! <sup>14</sup> Simon humpitii en no Laamdo suborii gila e puussoode yimbe 6e nganaa Yahuudiyanikoobe, faa wada dum'en yimbe muudum. <sup>15</sup> Dum hawri e haalaaji annabaabe dii, hono no winndiraa nii:

<sup>16</sup> «Joomiraado wii:

Caggal dum, mi wartan,

mi mahitoo suudu Daawuuda saamundu nduu,

mi reentinan taye tuufeeje dee,

mi darna ndu kasen,

<sup>17</sup> yalla yimbe heddiibe 6ee ana tewta Joomiraado.

Dum woni, lepi di innde am noddaa e muudum'en dii.

Joomiraado tabintindo deen kulle

<sup>18</sup> anndaade gila huunde fuu tagaaka,

wii non.»\*

<sup>19</sup> Dum saabii miin kaa ko njii-mi, pati tiidinanen yimbe lepi goddi tuubube so ngarti e Laamdo 6ee. <sup>20</sup> Kaa ko haani hen, nelen e maabé 6e nantoo e ko tooruji cobini e jeenu e jaamde jiibe e jaamde yiyyam. <sup>21</sup> Gila e jamaanuuji fooyid, Sariya Muusaa ana jannginee ley geelle dee fuu, ebe njannga mo jalaande fowteteende fuu ley cuudi baajordi.

*Haala bataaki faade e goondinbe 6e nganaa Yahuudiyanikoobe*

<sup>22</sup>Dum wadi so nelaabé bee kajum e hooreebe bee e deental goondinbe ngal fuu ndawridi faa cuboo worbe e ley muudum'en faa nela dum'en Antiyokiya, be tawta Pool e Barnabas. Be cuñii hooreebe didon ley sakiraabe bee, Yahuuda noddirteedo Barasaba, kajum e Silas.

<sup>23</sup>Be ndokki dum'en oo doo bataaki:

Minen sakiraabe moodon, nelaabé kajum e hooreebe, misen njowta on, onon sakiraabe amen lepi goddi wonbe Antiyokiya e Siriya e Silisi.

<sup>24</sup>Min nanii yimbe iwii ga amen giryinirii on haalaaji, njiibii hakkillaaji mon. Minen nee, min njamiraali be. <sup>25</sup>Min ndawridii, min kawrii, min cuñike worbe faa min nela dum'en e moodon, be tawta yiõõe amen Barnabas e Pool, <sup>26</sup>yeebiõõe yonkijii muudum'en saabe Joommeni Isaa Almasiihu. <sup>27</sup>Dum wadi so min neli Yahuuda e Silas, pamma on ko min mbinndi e mon koo hunduko e hunduko. <sup>28</sup>Minen e Ruuhu Ceniido, min kawrii pati min njappa on ko teddi so wanaa ko tilsi koo: <sup>29</sup>nanto-don e kirsanaadi tooruui e yiyi e jibudj e jeenu. So on ndeenii ko'e mon e majji, on ngadii ko moyyi. Yo Laamdo faabo en!

<sup>30</sup>Be ndokkaa laawol, be njehi Antiyokiya. Nde be njottinoo ndee, be mooõti deental goondinbe ngal, be ndokki ngal bataaki oo. <sup>31</sup>Nde been janngunoo mo ndee, ceyii sabi haalaaji dii ndokki dum'en semmbe. <sup>32</sup>Yahuuda e Silas, Laamdo loowi e mum'en konngol mum faa be mbaajii sakiraabe waajuuji keewfi, cuusini dum'en. <sup>33</sup>Caggal be paõõii ton, be ceerti e sakiraabe bee e dow jam, be mbirfitii to nelnoõõe bee too. [ <sup>34</sup>† ]

<sup>35</sup>Pool e Barnabas njoodii ley Antiyokiya ana njanngina ana mbaajoo konngol Joomiraado. Woõõe heewbe ana mballa be.

## Dawol Pool didabol

### *No Pool e Barnabas ceertiri*

<sup>36</sup>Caggal balde seeda, Pool wii Barnabas:

—Mbirfo-den e geelle de mbaajino-den konngol Joomiraado ngol dee fuu, njippano-den sakiraabe meeden bee, yeewen no be ngorri.

<sup>37</sup>Barnabas ana yidunoo be njaada e Yuhanna noddirteedo Marka. <sup>38</sup>Kaa dum welaali Pool sabi oon seeriino e maõõe Pamfiliya yaadaali e maõõe faa gollida e maõõe. <sup>39</sup>Barnabas e Pool mettendiri faa ceerti. Homo e maõõe fuu subii neddo godõõ. Barnabas yaadi e Marka, naati laana geeci feewi Kiprus. <sup>40</sup>Pool subii Silas, yaadi e muudum caggal sakiraabe bee kalfinii dum e hinnee Joomiraado. <sup>41</sup>O seeki Siriya e Silisi, omo yaha omo hokka deente goondinbe dee semmbe.

## 16

### *No Timote yaadiri e Pool e Silas*

<sup>1</sup>Pool wari Derbe, caggal dum, o yottii Listara. Goondindo biyeteedo Timote ana wonnoodon. Inniiko yo Yahuudiyanke goondindo, kaa baam makko yo Yunaninke. <sup>2</sup>Sakiraabe wonbe Listara e Ikoniyi bee ana njetta mo. <sup>3</sup>Pool yidi naforde mo, taadi mo, nde wonnood Yahuudiyankooõe hoduse e deen leyde bee fuu ana anndi baam makko yo Yunaninke. <sup>4</sup>Ley geelle de be ceeki dee, ebe njottina goondinbe bee sariya mo nelaabé e mawbe wonbe Urusaliima bee bami oo, ebe njamira been yo njokku mo. <sup>5</sup>Hono non, deente goondinbe dee ana beydoroo semmbe banngal goondinal, ana bee yedoo heewde jaannde fuu.

### *No Pool noddiraa Makedoniya*

<sup>6</sup>Ruuhu Ceniido hadi be waajaade konngol ngol ley Asiya, saabe majjum be ceeki leydi Firigiya e leydi Galaatiya. <sup>7</sup>Nde be ngarnoo keerol Misiya ndee, be tewti yaade Bitiniya, kaa Ruuhu Isaa yarranaaki be be naata. <sup>8</sup>E ley dum, be yaõõii Misiya, be ndegii e ngeenndi mbiyeteendi Torowas. <sup>9</sup>E ley jemmaaku muudum won ko yellitii e Pool. O yili gorko Makedonyanke ana darii, ana ndaarda mo ana wiya:

—Lummbo, ngaraa Makedoniya paabo-daa min!

<sup>10</sup>Nde Pool yiino won ko yellitii e mum ndee, oon wakkati fuu min ndaari yaade Makedoniya, min tayori Laamdo noddi min faa min mbaajoo be Kabaaru Lobbo oo.

### *No Lidiya goondiniri waaju Pool ley Filipa*

<sup>11</sup>Hono non, min naati laana geeci iwde Torowas, min paati ruunde Samotaras. Janngo muudum, min pahi Neyapolis. <sup>12</sup>Min iwi don, min pahi Filipa, ngeenndi õurndi fuu teentilaade e leydi Makedoniya ndi Romankooõe kumanii. Min ngadii don balde. <sup>13</sup>Nalaande fwteteende, min njaltiri ngeenndi ndii hedde daande maayo, ton Yahuudiyankooõe mboownoo wadufe duwaawu. Min tawi don rewbe ana mooõtii, min njoodii, min mbaajii be. <sup>14</sup>Debbo dewoowo Laamdo, biyeteedo Lidiya, coottoowo kaddule bodeeje, jeyaado

† 15:34 E dereeji ſooydi dii, yoga ana beyda aaya 34:Kaa Silas, kajum kaa, heddiin ton.

ngalluure wiyyeteende Tiyatira, ana hettinoo. Joomiraado udditi fernde makko yalla omo goondina ko Pool waajotoo koo.<sup>15</sup> Kanko e koreeji makko fuu 6e lootaa lootagal batisima. Caggal dum, o jaagii min, o wii:

—So odon njogorii kam mi goondindo Joomiraado, njippee suudu am.  
O tilsi min njippaano mo.

*No Pool e Silas ngattiraa ley kasu*

<sup>16</sup> Nannde wootere miden njahannoo to nokkuure wadirde duwaawu. Kordó debbo bataado anndudo ko warata hawriti e amen. Halfaabe makko paggike kaalisi keewdo e ndaggadaaku makko oo.<sup>17</sup> Mo jokki e amen, minen e Pool, omo wulla, omo wiya:

—Bee yimbe yo gollanoobe Laamdo Toowdo o! E6e mbaajoo on laawol kisindam.

<sup>18</sup> Balde kuurde omo wada non faa Pool mettaa, yeecitii, wii ladde ndee:

—Saabe lisaa Almasiihu, yaltu e makko!

Ladde ndee yalti oon wakkati fuu.<sup>19</sup> Nde halfaabe bee anndunoo jikke muudum'en iwii e faggitoraade kordo oo ndee, nanngi Pool e Silas, ndaasi dum'en faa sakoro to saroobe.

<sup>20</sup> Non 6e nabi been to hooreebe ngeenndi ndii, mbii:

—Bee worbe didon 6e Yahuudiyanikoobe, ebe nii ngadda baasi e ngeenndi meeden ndii.

<sup>21</sup> E6e mbaajoo aadaajii di ngagantaako en njaben naa ngollen, enen Romankoo6e.

<sup>22</sup> Jamaa oo diirani 6e. Hooreebe bee njamiri kaddule ma6be ceekee, 6e piyee.<sup>23</sup> Be piyaa faa naawi, 6e uddaa ley kasu. Hooreebe bee njamiri kayboowo kasu oo hayba 6e faa gasa.

<sup>24</sup> Oon nee, gila he6i ndee yamiroore, naanni 6e e ley suudu kasu hakkundeeru, o geyyii koyde ma6be geyyelle ledde.

<sup>25</sup> Nde hejjere jemma warnoo ndee, Pool e Silas ana ndewa Laamdo, ebe njaarao dum. Kasunkoo6e wo6be bee ana kettinanoo 6e.<sup>26</sup> Oon wakkati fuu, leydi dimmbii dimmbagol manngol faa poobee kasu dee njergi. Dame dee fuu udditi, geyyelle kasunkoo6e dee fuu kumtii.<sup>27</sup> Nde kayboowo oo finnoo so yii dame kasu dee ana udditi ndee, soorti kaafaawi muudum faa wartoo, mili kasunkoo6e bee ndogii.<sup>28</sup> Pool wulli faa toowi, wii mo:

—Pati wadu hoore maa fay huunde ko boni, min fuu miden doo!

<sup>29</sup> Nde o hebunoo fooyre ndee, o dogani kasu to Pool e Silas ngoni too, o sujidi, hedde omo sijna.<sup>30</sup> Caggal dum, o yaltini 6e, o wii 6e:

—Baabiraabe, hono fuu kaan-mi wadude yalla mido hisa?

<sup>31</sup> Be njaabii mo, 6e mbi:

—Goondin lisaa Joomiraado oo faa kisaa, aan e koreeji maa.

<sup>32</sup> Be mbaajii mo konngol Joomiraado ngol, kanko e koreeji makko fuu.<sup>33</sup> Oon jemma fuu o na6i 6e, o lootoyi barme ma6be. Oon wakkati fuu o lootaa lootagal batisima, kanko e koreeji makko fuu.

<sup>34</sup> O naanni Pool e Silas suudu makko, o hokki dum'en jaamdu. Kanko e koreeji makko fuu 6e ceyii sabi 6e ke6ii goondinde Laamdo.<sup>35</sup> Nde weetunoo ndee, hooreebe Romankoo6e bee nelii laamunkoo6e mbiya kayboowo oo yoppa worbe didon 6ee.<sup>36</sup> Kayboowo oo haalanoyi dum Pool, wii:

—Hooreebe bee nelii njoppite-don. Njalton jooni, yo on njottoyo e jam.

<sup>37</sup> Pool jaabii, wii:

—Be njamirii min piyee yimbe tawee min caraaka, 6e naanni min e kasu. Minen worbe didon 6ee, min fuu min Romankoo6e. Jooni 6e yaltiniroobe min cuucuukka naa? Patti, dum waawaa laataade. Kinaa kambe e ko'e ma6be, 6e ngara 6e njaltina min!

<sup>38</sup> Laamunkoo6e bee kaaltani hooreebe Romankoo6e bee haala kaa. Been kuli nde nannoo Pool e Silas yo Romankoo6e ndee.<sup>39</sup> Be njehi, 6e curoyi been, 6e njaltini dum'en kasu oo. Be ndaardi dum'en njaltana 6e ngeenndi ndii.<sup>40</sup> Nde Pool e Silas njaltunoo e kasu oo ndee, naati galle Lidiya. Be njii sakiraabe 6ee, 6e mbaaltini hakkillaaji mum'en. Caggal dum, 6e mbitti.

## 17

*No Pool e Silas mbaajorii ley Tesaloniiiki*

<sup>1</sup> Pool e Silas ceeki Amfipolis e Apolloni, njottii Tesaloniiiki, toon duu waajordu Yahuudiyanikoobe won.<sup>2</sup> Pool wadi no woowri nii, naati e ley waajordu nduu. Nalaade powteteede tati omo liddondira e ma6be omo dallinoroor Biindi dii.<sup>3</sup> O famminii 6e, o holli 6e ana tilsi Almasiihu oo torree, immintinee e maayede. O wii 6e:

—Lisaa mo mbaajotoo-mi on haala muudum oo, kajnum woni Almasiihu.

<sup>4</sup> Yoga e ma6be tayori dum goonga, njokki e Pool e Silas, kajnum e Yunaninkoo6e rewoobe Laamdo heew6e e rew6e saahii6e yon6e.<sup>5</sup> Yahuudiyanikoobe 6e nganaa goondin6e bee konnii Pool e Silas, nanngi yimbe laali6e yiilotoobe ley sakoro, ndeentini dum'en. Be njirkiti ngalluure ndee fuu. Be naati e galle Yason, ebe tewta Pool e Silas faa 6e na6a dum'en

to yimbe 6ee too. <sup>6</sup> Nde 6e ndonki yiitudo been ndee, 6e ndaasi Yason e yoga e sakiraabé 6ee faa to saranoobé ngallure ndee, e6e ngulla e6e mbiya:

—Yimbe imminoobé baasi e aduna oo fuu ngarii doo, <sup>7</sup> Yason jippinii düm'en! Be fuu ko 6e ngadata koo ana luutondiri e sariya kaananke Roma mawdó oo, e6e mbiya ana woodi kaananke goddo biyeteedo Iisaa.

<sup>8</sup> Dii haalaaji njirkiti jamaa oo e saranoobé ngallure ndee 6ee. <sup>9</sup> Yason e sakiraabé 6ee njo6i kaalisi, caggal muudum fe njoppita.

#### No yimbe Bereya njaabborii Kabaaru Lobbo oo soobee

<sup>10</sup> Oon wakkati fuu e ley jemmaaku muudum, sakiraabé 6ee neli Pool e Silas Bereya. Nde 6e njottii ndee, 6e njehi to waajordu Yahuudiyanikoobé too. <sup>11</sup> Been 6uri Yahuudiyanikoobé wonbe Tesaloniki bee laabude 6ernde. Be njabborii konngol ngol soobee, e6e mbidoo Binndi dii jaannde fuu faa 6e yeewa yalla ko Pool waajji koo yo goonga. <sup>12</sup> Heewbe e maabé ngoondini, kajum e rew6e Yunaninkoo6e saahii6e e wor6e Yunaninkoo6e heewbe. <sup>13</sup> Nde Yahuudiyanikoobé Tesaloniki bee anndunoo Pool waajike konngol Laamdo ngol ley Bereya ndee, 6e ngari ton, 6e njii6i jamaa oo. <sup>14</sup> Oon wakkati fuu, sakiraabé 6ee neli Pool faa maayo geeci, Silas e Timote keddiid don. <sup>15</sup> Liwndii6e Pool 6ee njaadi e muudum faa Ateena. Be ngarti, 6e ngaddani Silas e Timote nelal ngara to Pool law.

#### No Pool waajorii ley ngallure wiyetende Ateena

<sup>16</sup> Nde Pool doomannoo 6e Ateena fade maabé warde ndee, yonki muudum jaawi sanne ko yii no ngallure ndee foti heewde tooruugi nii. <sup>17</sup> Dum wadi so o haaldi e Yahuudiyanikoobé e rewoobé Laamdo wob6e ley waajordu nduu, omo haalda e 6e o hawrannoo e mum jaannde fuu ley sakoro 6ee duu. <sup>18</sup> Yoga e mijotoobé wiyetee6e Epikuri'en e Sitoyko'en njaabondiri e makko. Yogaase ana mbiya:

—Kodum oo ndoryoovo haalata?

Wo6be duu ana mbiya:

—Omo nanndi e baajotoodo haala tooruugi janani.

Walaa ko 6e mbiiri non so wanaa haala Iisaa kajum e immital maay6e o waajinoo 6e.

<sup>19</sup> Nden 6e 6ami Pool 6e na6i düm waamnde haayre wiyetende Areyopagus,\* 6e mbii düm:

—Miden njidi anndude diina keso mo mbaajoto-daa oo. <sup>20</sup> Sabi a to66ii e noppi amen haalaaji di min mboowaa nande. Miden njidi anndude maanaa majji.

<sup>21</sup> Tawi Ateenankoo6e e hob6e joodiibé ton 6ee ngollataa huunde fuu so wanaa haalde huunde heyre nde 6e nani.

<sup>22</sup> Nden Pool darii hakkunde Areyopagus, wii:

—Ateenankoo6e, mi yii e mon on diinankoo6e sanne, <sup>23</sup> sabi nde njilinoo-mi e ngallure moodon ndee, mi yii cuudi moodon dewirdi, mi tawii ana winndaa e ittirde sadaka wootere: «laamdo mo anndaaka».† Ndennoo, ko ndewaton ko on anndaa koo, dum mbaajotoo-mi on e muudum. <sup>24</sup> Laamdo tagudo aduna e ko woni e muudum fuu oo, kajum woni Jom kammu e leydi, o jodataako ley cuudi mahiraaci juude. <sup>25</sup> O hasindinaa e yimbe ngollana mo fay huunde, sabi kanko hokkata tageefu oo fuu nguurndam e yonki e foofaango e huunde fuu. <sup>26</sup> E neddo gooto Laamdo yaltini leji dii fuu, joyyini dum'en e aduna oo. Gila dum wadaali, o darnani dum'en jamaanuuji e keeri hakkunde kodorde muudum'en, <sup>27</sup> yalla ebe tewta Laamdo, 6e momoom faa 6e njita dum. Dum e taweede o woddaaki fay gooto e meeden. <sup>28</sup> «Nguurndam e dillinaade e goodal, saabe makko kebir-den.» No yoga e yimoobé moodon mbi: «Enen duu, en iwdi makko.»

<sup>29</sup> Nde wonnoo en iwdi makko, en kaanaa mijiaade omo nanndi e tooru moyyiniraandu kanje naa kaalisi naa haayre sehaande, nde neddo moyyinirajeejal e hakkille. <sup>30</sup> Laamdo rewtaaki yimbe nde ngonnoo e majjere ndee. Jooni, o yamirii yimbe fuu tuuba do tawaa fuu, <sup>31</sup> sabi o sartike wakkati mo o sarirta aduna oo e fooccitaare, o sarira dum neddo mo o subii oo. O hollii yimbe fuu dum yo goonga nde o immintini oon neddo e maayde.

<sup>32</sup> Nde 6e nannoo Pool ana waajoo haala immital maay6e ndee, yoga ana uyyoo mo, yoga ana wiya:

—Min kettinante oo waaju jaannde wonnde.

<sup>33</sup> Non Pool iwi hakkunde maabé. <sup>34</sup> Yoga jokkii e makko, goondinii. Ana jeyaa e 6een biyeteedo Diyonisiyus, jeyaado e deental Areyopagus, kajum e debbo biyeteedo Damaris, e wo6be kasen.

\* <sup>17:19</sup> Areyopagus yo deental 6urngal toowde deentinoowal ardiibé ngallure Ateena. † <sup>17:23</sup> Ateenankoo6e ngadi e rewrude innde laamdo mo anndaaka, yalla tooru fuu mo 6e njegitti ana waasa mettinde.

## 18

*No Pool golliri ley ngalluure wiyyeteende Korintu*

<sup>1</sup> Caggal düm, Pool iwi Ateena, yehi Korintu. <sup>2</sup> O tawi ton Yahuudiyanke biyeteedo Akilas, pindo leydi mbiyyeteendi Ponta. Booyaali ko oon e jom suudu muudum biyeteedo Piriskilla iwi Italiya, sabi Kalawdiyus kaananke mawdo oo yamiriino Yahuudiyankooße fuu njalta Roma.\* <sup>3</sup> Pool yehi yeewoyde 6e. <sup>3</sup> O woni don, omo gollida e maabbe sabi o moyyinoowo hukkummaaji no maabbe nii. <sup>4</sup> Nalaande fowteteende fuu, Pool ana liddondira e Yahuudiyankooße e Yunaninkooße ley waajordu, yalla omo heba hakkillajai maabbe.

<sup>5</sup> Nde Silas e Timote iwuno Makedoniya njottii Korintu ndee, Pool wattihakkille muudum fuu e waajaade, ana seettanoo Yahuudiyankooße bee Iisaa woni Almasiihu oo. <sup>6</sup> Kaa nde wonnou ebe calanii mo, ebe njennannoo mo, o fiddi kaddule makko, o wii 6e:

— Yo diina mon fito on! Mi walaa hen hannde, mi walaa hen janngo. Gila jooni mi yahan to be nganaa Yahuudiyankooße.

<sup>7</sup> O iwi don, o yehi to gorko dewoowo Laamdo, biyeteedo Titus Yustus, mo galle muudum takkii e waajordu nduu. <sup>8</sup> Kirispus, hooreejo waajordu nduu oo, kajum e koreeji muudum fuu ngoondini Joomiraado. Heewbe e Korintunkooße hettintonooße bee ngoondini, lootaa lootogal batismi.

<sup>9</sup> Jemma gooto Joomiraado yellintini e Pool, wii:

— Pati hul, pati deyyina, waaja. <sup>10</sup> Mido wondi e maa. Fay gooto waawaa torrude ma, sabi yimbe am ana keewi ley ndee ngalluure.

<sup>11</sup> Pool joodii hakkunde maabbe hitaande e feccere, ana janngina 6e konngol Laamdo ngol.

<sup>12</sup> Nde Galliyon laaminoo leydi Akaya ndee, Yahuudiyankooße kaaldi, kawri, nanngi Pool, naabi dum sarirde, <sup>13</sup> kappi dum, mbiit:

— Oo gorko yo yonyoowo yimbe yalla ana ndewra Laamdo ko waldaa e sariya oo.

<sup>14</sup> Pool anniyii faa haala, forri Galliyon wii Yahuudiyankooße bee:

— Yahuudiyankooße, so tawii toojanngae naa golle bonfo, mi jaaban an ko ngullani-don mo koo, <sup>15</sup> kaa nde wonnou dum jeddi dow haalaaji diina moodon e inde, kajum e sariya moodon onon tan, dum onon e ko'e moodon carata. Miin, mi sarataa dee kudde!

<sup>16</sup> O yaltini 6e sarirde ndee. <sup>17</sup> Nden, 6e fuu 6e nanngi Sosteni, hooreejo waajordu nduu oo, 6e pii dum do yeeso sarirde doo. Kaa fuu Galliyon bilaaki hen fey.

*No Pool wirfitorii Antiyokiya*

<sup>18</sup> Pool faabbi don balde kuurde. Caggal düm, o waynondiri e sakiraabe 6ee, o naati laana, o feewi Siriya, kanko e Piriskilla e Akilas. Fade makko naatude, tawi o lafiit hoore makko nokku biyeteedo Kankiriya sabi o fodiino fodoore. <sup>19</sup> Be njottii Efeesu, Pool yoppi don Piriskilla e Akilas, kajum naati waajordu ana liddondira e Yahuudiyankooße 6ee. <sup>20</sup> Be ndaardi mo o faabbaana 6e, kaa o jaabaali. <sup>21</sup> Nde o waynondirta e maabbe ndee, o wii:

— Mi wartan e moodon so Laamdo jaabii.

O naati laana, o iwi Efeesu, <sup>22</sup> o yottii Kaysariya, o njabbiti Urusalima faa o jowta deental goondinbe ngal. Caggal düm, o yehi Antiyokiya.

## Dawol Pool tatabol

<sup>23</sup> Caggal Pool wadii ton wakkati, o witti. O seeki leydi Galaatiya e leydi Firigiya, omo yaha omo beydana taalibaabe cuusal.

*No Apollos waajorii ley Efeesu e Korintu*

<sup>24</sup> Yahuudiyanke biyeteedo Apollos, pindo Aleksandiri, wari Efeesu. O gorko fasilante haala, baawdo Binndi dii, <sup>25</sup> anndudo laawol Joomiraado. Omo waajoroo soobirantaaku e seyo, diina Iisaa kaa pay o jannginta. Kaa o annduda so wanaa lootogal batismi Yaayaa ngal. <sup>26</sup> Omo waajoroo cuusal e ley waajordu nduu. Nde Piriskilla e Akilas kettinaninoo mo ndee, 6e naabi mo, 6e pirritani mo laawol Laamdo ngol faa buri no arannde nii laa6ude. <sup>27</sup> Nde Apollos anniyinoo yaade leydi Akaya ndee, sakiraabe 6ee mballi mo, 6e mbinni e taalibaabe wonbe ton bee bataaki njab6oo mo faa gasa. Nde o yottii ton ndee, o walli goondinbe 6ee e dow moyyere Laamdo sanne. <sup>28</sup> Sabi o li6ii Yahuudiyankooße 6ee ngattu naawdo hakkunde yimbe, omo dallinoroo Binndi dii, omo tabintina Iisaa woni Almasiihu.

## 19

*No Pool hawrintiniri taalibaabe Yaayaa ley Efeesu*

<sup>1</sup> Nde Apollos wonnou Korintu ndee, Pool jokki laawol haayre, yehi Efeesu. O tawi ton taalibaabe, <sup>2</sup> o lamndii dum'en, o wii:

— Yalla on kebiino Ruuhu Ceniido oo nde ngoondin-don ndee naa?

\* <sup>18:2</sup> Yamiroore Kalawdiyus ribbunde Yahuudiyankooße Roma ndee darnamaa hitaande 49 naa 50 caggal pinaade Iisaa.

Be njaabii mo:

—Min nanaali Ruuhu Ceniido ana woodi duu, sako min keba.

<sup>3</sup> O lamndii 6e, o wii:

—Ndennoo, lootagal batisima hongal kebu-don?

Be njaabii, 6e mbi:

—Lootagal batisima Yaayaa ngal.

<sup>4</sup> Pool wii:

—Yaayaa batisima tuubugol batisanloo, ana wiya yimbe 6ee yo ngoondin garoowo caggal muudum oo, dum woni Iisaa.

<sup>5</sup> Nde 6e nannoo dum ndee, 6e mbatisiraa saabe Iisaa Joomiraado oo. <sup>6</sup> Nde Pool fawnoo juude muudum e ma66e ndee, Ruuhu Ceniido jippii e ma66e, e6e kaala e demde janane, e6e kaalta ko Laamdo loowi e ma66e koo. <sup>7</sup> E6e mbaara e yimbe sappo e didon.

<sup>8</sup> Pool naati e ley waajordu nduu, ana waajoroo 6e cuusal hakke lebbi tati, omo haalda e ma66e, omo liddondira e ma66e, omo habanoo fanniminde 6e haala Laamu Laamdo. <sup>9</sup> Kaa tiiduf6e ko'e ngon e ma66e, calii goondinde, ana mbonnita laawol Joomiraado ngol yeeso yimbe fuu. Dum wadi so Pool seerti e ma66e, na6i taalibaa6e 6ee feere, ana waajoo dum'en pannde fuu e ley janngirde neddo biyeteedo Tirannus. <sup>10</sup> O worri non faa hi66i duu6i didi, faa hodunoobe e Asiya 6ee fuu, gila e Yahuudiyankoo6e faa e Yunaninkoo6e, nani konngol Joomiraado ngol.

<sup>11</sup> Laamdo wadiri juude Pool kaayde mawde, <sup>12</sup> fay e sarbetiji e kaddule memnoode terde makko ana naab6e pawee e naw6e, pawuuji muudum'en cella, seydaani'en njalta e muudum'en. <sup>13</sup> Yoga e Yahuudiyankoo6e yiiloto6e faa ndibba seydaani'en, ndaarii ribbirde dum'en innde Iisaa, mbi:

—Alhorma Iisaa mo Pool waajotoo haala muudum oo, njaltee!

<sup>14</sup> Gooto e hooreeb6e yottino6e sadaka, Yahuudiyanke biyeteedo Sikewas, 6i66e muudum wor6e njeddon ngadii non, <sup>15</sup> faa seydaani jaabii dum'en, wii:

—Mido anndi Iisaa, mido anndi Pool, kaa onon, on ho6e?

<sup>16</sup> Neddo laddaado oo ha6i e ma66e, jaalii 6e, torri 6e faa 6e ndogi, 6e njaltiri galle oo terde teete e barme. <sup>17</sup> Kabaaru majjum saakii hakkunde Yahuudiyankoo6e e Yunaninkoo6e joodi6e Efreesu. Kulol nanngi 6e fuu, innde Iisaa Joomiraado oo teddinaa. <sup>18</sup> Heew6e e goondinf6e 6ee ngari njaadiri, kaalti golleji 6i ngadunoo. <sup>19</sup> Bonjobii'en heew6e ndeentini dewte muudum'en, nduppi de yeeso yimbe fuu. Be kiisii coggu majje, 6e tawi ana foti ujunaaji capande joy kaalisi daneeo.\* <sup>20</sup> Hono nii, haala Joomiraado kaa b6eydorii saakaade e heewde semmbe.

*No fitina mawdo wadiri ley Efreesu saabe laawol Joomiraado*

<sup>21</sup> Caggal dum, Pool fellisi seekude Makedoniya e Akaya faade Urusaliima. O wii:

—So mi tilike ton, waajibi mi yaha Roma duu.

<sup>22</sup> O neli gollidoobe makko didon, Timote e Erasta, njaha Makedoniya. Kanko, o fa66i Asiya. <sup>23</sup> E oon wakkati, fitina mawdo wadi sabaabu laawol Joomiraado ngol. <sup>24</sup> Baylo ndaneeri biyeteedo Demeteriyus ana tafa cuuroy kaalisi nanndukoy e rewrudu tooru biyeteedo Artemis. Omo heba hen tino heewngo, kanko e golloo6e makko. <sup>25</sup> O reentini been e wob6e 6e nanndi golle, o wii dum'en:

—Yi66e, odon anndi e oo doo golle kebal meeden ngal fawii. <sup>26</sup> Odon njiya, odon nana Pool majjinii yimbe heew6e, wanaa ley Efreesu doo tan, ley leyde Asiya fuu. O haalani 6e kulle deweteede de yimbe moyyiniri juude mum'en dee nganaa deweteede. <sup>27</sup> So jokkii nii, yimbe mbonnan golle meeden. Wanaa dum tan, yimbe joottan teddinde rewrudu Artemis nduu duu, tooru men mawdo mo hodu6e Asiya e aduna oo fuu ndewataa oo.

<sup>28</sup> Nde 6e nani diin haalaaji ndee, 6e mettaa sanne, hedde e6e ngulla, e6e mbiya:

—Artemis Efreesunkoo6e yo mawdo! Artemis Efreesunkoo6e yo mawdo!

<sup>29</sup> Ngalluuure ndee fuu jiibii. Gooto fuu dogani boowal manngal ngal. Be ndaasi Gayus e Aristarka Makedoniyan6e, yaadube Pool 6ee. <sup>30</sup> Pool ana yidi naatude hakkunde jamaa oo, kaa taalibaa6e 6ee kadi mo dum. <sup>31</sup> Yoga e hooreeb6e leydi Asiya, yi66e makko, neli e makko ana ndaarda mo pati o naata booval too. <sup>32</sup> E oon wakkati, jamaa oo ana jiibii sanne. Bee ana ngullana dum doo, bee too ana ngullana dum gaa. Ko buri heew6e e yimbe 6ee anndaa fay ko hawrintini dum'en. <sup>33</sup> Yoga e jamaa oo kaaltani haala kaa gorko biyeteedo Aleksandere mo Yahuudiyankoo6e 6ee ngadi kaaloowoo muudum'en oo. Aleksandere huncani 6e junngoo faa jinngana yimbe muudum 6ee. <sup>34</sup> Kaa nde 6e annditinnoo o Yahuudiyanke ndee, 6e fuu e6e ngulla ko waarata e leeruuji didi, e6e mbiya:

—Artemis Efreesunkoo6e yo mawdo!

\* **19:19** Dum hawrata e golle jokolle duu6i teemedere e capande joy.

<sup>35</sup> Nden binndoowo ngalluure ndee deyyini jamaa oo, wii:

—Onon Efeesunkoobe, homo woni mo anndaa ngalluure Efeesu ndee woni hayboore rewrudu Artemis deweteedo mawdo oo, kajum e natal muudum iwrungal dow kammu ngal? <sup>36</sup> Nde wonnoo fay gooto waawaa yeddude dum, odon kaani jippinde hakkillaaji moodon pati ngolliron fay huunde e hejaare. <sup>37</sup> Worbe 6e ngaddu-don 6ee, nganaa wujjoobe kulle rewrudu, nganaa yennoobe deweteedo meeden oo. <sup>38</sup> So tawii Demeteriyus e gollooobe wondube e muudum 6ee won mo njidi wullanaade, jalaade careeteede ana ndarnaa, kaanankooibe sarooibe ana ngoodi, yo 6e noddondir! <sup>39</sup> Kaa so tawii won goddum ko ndaartaton, to deental saahii6e dum saroytee. <sup>40</sup> Eden mbaawi felireede murtere wadunde hannde ndee, sabi fitina baado nii walaa fay daliili gooto.

<sup>41</sup> Caggal dii haalaaji, o firriti jamaa oo.

## 20

### No Pool dawiriyaade leyde Makedoniya e Yuunan

<sup>1</sup> Nde fitina oo yawti ndee, Pool moo6tii taalibaabe 6ee, waajii dum'en. Caggal dum, waynii dum'en, feewi Makedoniya. <sup>2</sup> O seeki ndiin leydi, omo waajoo yimbe 6ee haalaaji keewdi. Caggal dum, o yehi Yuunan. <sup>3</sup> O wadi ton lebbi tati. O lanndinii faa o naata laana faade Siriya. Kaa caggal nde Yahuudiyanikoobe ndawridi faa njamboo mo, o anniyii wifitoraade laawol Makedoniya. <sup>4</sup> Bee doo dowtunoo mo: Sopater 6ii Pirrus jeyaado Bereya, e Aristarka e Sekundus jeyaabe Tesaloniki, e Gayus jeyaado Derbe e Timote e Tikikus e Torofim jeyaabe leydi Asiya. <sup>5</sup> Been ardi min, ndoomoyi min Torowas. <sup>6</sup> Minen, min naati laana faade Filipa caggal iidi mo buuru yuufinaaka. E ley balde joy min kewtii 6e Torowas, min ngadi don yontere.

### No Pool wuurtiniri Ewtikus

<sup>7</sup> Nannde aranndeere e yontere, tawi misen moo6tii faa min taya buuru.\* Pool ana waajoo yimbe 6ee, nde wonnoo omo anniyii wittude janngo mum. O jokki e waajuu oo faa hejjere jemma. <sup>8</sup> Lampaaji keewdi ana ngonnoo e ley suudu dowuuru ndu min moo6tinoo e muudum nduu. <sup>9</sup> Suka jokolle biyeteedo Ewtikus ana joodii dow falanteere. Ko Pool juutini waajuu muudum oo koo, Ewtikus daanii doyngol teddungol. O saami iwde e falanteere sooro tata6o ngoo. Nde 6e 6amtii mo ndee, tawi o maayii. <sup>10</sup> Kaa Pool jippii, hippii e makko, 6ami mo e juude muudum, wii:

—Mbaalte! Yonki makko wartii e makko!

<sup>11</sup> Nii Pool jaabbi, tayi buuru, jaami. Caggal dum, o jokki waajuu makko faa weenndoogo, o witti. <sup>12</sup> Suka jokolle oo naftaa ana wuuri. Dum 6uubini 6erde maabbe sanne.

### No Pool waynorii hooree6e goondinbe won6e Efeesu

<sup>13</sup> Minen, min adii wifitaade, min naati laana faade Assos do min kaani naatinde Pool, sabi o anniyiido yaarude ton koyde. <sup>14</sup> Nde min tawondiri Assos ndee, min naanni mo laana, min peewi Mitilene. <sup>15</sup> Min iwi don e laana, min njottoyii janngo mum yeeso ruunde Kiyos. Fa6bi-janngo mum min ya6borii bannge ruunde Samos, fa6biti-janngo mum min njottii Miletus. <sup>16</sup> Pool fellisii ya6borraade Efeesu, sabi o yidaa neeptude e leydi Asiya ndii, omo hejnoo yottaade Urusalima pannde iidi Pantekot so tawii ana laatoo.

<sup>17</sup> Nde Pool wonnoo Miletus ndee, nelani hooree6e deental goondinbe Efeesu 6ee. <sup>18</sup> Nde 6e ngari ndee, o wii 6e:

—Odon anndi no ngorr沐-mi e moodon gila pannde koyngal am adii naatude e leydi Asiya ndii faa hannde. <sup>19</sup> Mi golliranii Joomiraado leydinkinaare fuu, kajum e gondi keewdi e torraaji Yahuudiyanikoobe kewtiidi kam dii. <sup>20</sup> Odon anndi mi suudaali on huunde fuu ko nafata on, mi waajike on, mi jannginii on hakkunde yimbe kajum e ley galjeeji moodon. <sup>21</sup> Mi tinndinii Yahuudiyanikoobe e Yunaninkooibe fuu tuubana Laamdo, ngoondina Joomiraado meeden Isaa. <sup>22</sup> Jooni, mido nii jokki e Ruuhu Ceniido, mido yaha Urusalima, mi anndaa ko hewtootyo kam ton, <sup>23</sup> so wanaa ko Ruuhu Ceniido oo Hollata kam: ley geelle dee fuu ana wiya kam geyyelle e torra ana ndoomi kam. <sup>24</sup> Kaa miin, mi jataaki nguurdam am e maayde am fuu so mi hebii yottinirde golle mo Iisaa Joomiraado halfini kam oo seyo. Oon golle woni seettaade Kabaaru Lobbo haala hinnee Laamdo.

<sup>25</sup> Jooni, mido anndi on njiitataa kam kasen, onon 6e ngondunoo-mi so mido waajoo dum'en haala Laamu Laamdo oo 6ee. <sup>26</sup> Dum wadi so mido seettanoo on hannde dum doo: so tawii gooto e moodon halkiima, wanaa sabaabu am. <sup>27</sup> Sabi mi waajike on anniyaji Laamdo fuu, mi suudaali on fay huunde. <sup>28</sup> Ndeenee ko'e moodon, ndeenon sewre nde Ruuhu Ceniido oo daldi on ndee, laato-don duroobe deental goondinbe Laamdo ngal, sabi yiyyam makko o soottitorii ngal. <sup>29</sup> Miin, mido anndi caggal am yimbe bon6e cooroto e ley

\* 20:7 Tayude buuru ana firrita rewrilde Laamdo hiraande seniinde.

moodon hono no pobbi nii, kasen duu di njokkan e sewre ndee.<sup>30</sup> Fay e ley moodon dajan worbe immiibé ana mbaajoo waajuuji peneeji faa pooda taalibaabé bee njokka caggal muudum'en.<sup>31</sup> Dum nee, njerteet! Miccito-don duubí tati, jemma e jalooma, mi njoottaali waajoraade gooto e moodon fuu gondi.

<sup>32</sup> Jooni, mi halfinii on Laamdo, kajum e konngol hinnee muudum baawngol naabude on yeeso e ley goondinal, hokka on ko resani sennaabé bee fuu.<sup>33</sup> Abada mi muuyaali fay huunde e mon, wanaa kaalisi, wanaa kanjje, wanaa kaddule.<sup>34</sup> Onon e ko'e moodon, odon anndi juude am dee kumti haajuuji am e haajuuji wonduúe am.<sup>35</sup> Mi hollii on e kabaaruujii dii fuu, kinaa ngolliron non, mballon lo'ube tawa odon miccitoor dii doo haalaaji di Joomiraado men Iisaa haali kajum e hoore muudum: «Hokkude buri mbelko'aaku diina hokkoreede.»

<sup>36</sup> Nde Pool tilinoo haalde dum ndee, kajum e maabée fuu 6e ndicci, 6e nduwii.<sup>37</sup> Be fuu 6e mboiyi bojji mawdi, 6e kippili e Pool, 6e cabbindii dum.<sup>38</sup> Ko beydi sunjlinde 6e ko o wii 6e njitataa mo kasen koo. Caggal dum, 6e liwndii mo faa to laana too.

## 21

### No Pool njabbiti Urusaliima

<sup>1</sup> Nde min ceerti e maabée ndee, min naati laana geeci, min peewi ruunde Kos. Janngo mum, min njottii ruunde Rodusa, min iwi don, min peewi ngeenndi Patara.<sup>2</sup> Min keéi laana lummboowa yaade Finikiya, min naati hen, min bettii.<sup>3</sup> Nde min njahunoo faa min coynorii Kiprus bannge amen nano, min peewi Siriya, min njottoyii Tirus.

Don laana kaa jippinta kaaki muudum.<sup>4</sup> Min tawi don taalibaabé, min ngoni don balde jeddi. Ebe mbiira Pool ley Ruuhu Ceniido pati njabbiti Urusaliima.<sup>5</sup> Nde yontere ndee hiibunoo ndee, min mbitti. Be fuu 6e liwendii min faa min njalti ngeenndi ndii, kambe e rewbe e sukaabe. Min ndicci dow fonngo maayo geeci, min nduwii.<sup>6</sup> Nde min mbaynondirnoo ndee, minen min naati laana, kambe 6e mbirfitii cuudi maabée.

<sup>7</sup> Nde min naati laana Tirus ndee, min njottoyii Potolemayis. Min njowti sakiraabé, min nallani 6e, min mbaali.<sup>8</sup> Janngo mum, min ndawii, min njottii Kaysariya, min naati suudu Filipa baajotoodo Kabaaru Lobbo oo, min njippaanii dum. Kanko omo jeyaa e njeddon subaabé Urusaliima bee.<sup>9</sup> Omo jogii 6ibbe rewbe nayon 6e bamaaka, haaltoobe ko Laamdo loowi e mum'en koo.<sup>10</sup> Nde min paabunoo don ndee, gorko loowaado konngol Laamdo biyeteedo Agabus iwri Yahuudiya.<sup>11</sup> O wari e amen, o bami kumorgol Pool, o haabéi juude makko e koyde makko, o wii:

—Ruuhu Ceniido wii: nii Yahuudiyankoo6e wonbe Urusaliima 6ee kabéirta jeydo ngol kumorgol oo, ngada dum e juude heeferée.

<sup>12</sup> Nde min nani dum ndee, minen e jeyaabe don 6ee fuu, min ndaardi Pool pati njabba Urusaliima.<sup>13</sup> Pool jaabii, wii:

—Kodum wadi so odon mboya, odon taya 6ernde am? Miin, mido lanndinanii ko wanaa habbeede tan, mido lanndinanii fay maayde Urusaliima saabe innde Iisaa Joomiraado oo.

<sup>14</sup> Nde min ndonkunoo waylitinde mo ndee, min celi e makko, min mbii:

—Yo muuyde Joomiraado laato!

### No Pool yottorii Urusaliima e no hawritiri e Yaakuuba

<sup>15</sup> Caggal deen balde, min lanndinii, min njabbiti Urusaliima.<sup>16</sup> Yoga e taalibaabé Kaysariyankoo6e njaadi e amen, naabí min galle gorko biyeteedo Manason, jeyaado Kiprus, laattiida taalibbo gila ko booyi, yalla miden jippaanii dum.

<sup>17</sup> Nde min njottii Urusaliima ndee, sakiraabé bee njaaboorii min weltaare.<sup>18</sup> Janngo mum, min njaadi e Pool to Yaakuuba. Hooree6e deental goondin6e bee fuu ana tawanoon ton.

<sup>19</sup> Caggal ko o joutii 6e koo, o haalanii 6e huunde fuu ko Laamdo wadáni yimbe 6e nganaga Yahuudiyankoo6e saabe golle makko.<sup>20</sup> Nde 6e nani dum ndee, 6e njetti Laamdo. Be mbii Pool:

—Sakiike, hono foti ujunaaji Yahuudiyankoo6e njii-daa ko ngoondini, haya faa hannde ebe tiinnii e jokkude Sariya Muusaa oo.<sup>21</sup> Be kaalanaama ada janngina Yahuudiyankoo6e wonbe hakkunde leji goddi njoppa Sariya Muusaa, mbiid-daa pati taada sukaabe muudum'en kasen, pati njokka neesuuji dii kasen.<sup>22</sup> Ndennoo, hono ngadaten? Sabi min taylorii 6e nanan a warii.<sup>23</sup> Wadu ko min kaalante koo. Miden njogii doo worbe nayon bamanbe Laamdo fodoore.<sup>24</sup> Nabu 6e cennidaa hoore maa e maabée, njobaa ko 6e kaani yobude koo, yalla ebe mbaawa labeede. Yimbe fuu anndan ko haaletenoo e maa koo fuu wanaa goonga, 6e anndan kasen aan e hoore maa, ada jokki Sariya Muusaa.

\* 21:8 Golle Nelaabé 6.1-6; 8.5

<sup>25</sup> Goondinbē iwē e lepi goddi 6ee, min mbinndii e mum'en ndeentoo e ko hirsanaa tooruui e yiyyam e jiibudi, kajum e jeenu.

<sup>26</sup> Pool 6ami nabi worbe 6ee, yaadi e mum'en. Janngo mum, 6e cennidaa. O naati Suudu Dewal Mawndu nduu, o haalani yottinoobe sadaka jalaade sennugol dee ki6bii, faa gooto e ma6be fuu wadanee sadaka.

#### *No Pool nanngiraa ley Suudu Dewal Mawndu*

<sup>27</sup> Nde balde jeddi dee 6adinoo hi6bude ndee, yoga e Yahuudiyankoo6e leydi Asiya njii Pool e ley Suudu Dewal Mawndu nduu, 6e njirkiti yimbe 6ee fuu, 6e nanngi mo. <sup>28</sup> E6e ngulla, e6e mbiya:

—Israa'iilanko6e, paabee min! Oo woni gorko jannginoowo yimbe e ley nokkuuje dee fuu ana bekkisoo yimbe lejol meeden, ana bekkisoo sariya meeden oo, ana bekkisoo nokku ceniido oo. Jooni kaa, o waddii fay Yunaninkoo6e e ley Suudu Dewal Mawndu nduu. O sobinii oo nokku ceniido!

<sup>29</sup> Walaa ko 6e mbiiri non so wanaa 6e njii Torofim Efreesunke oo ana wondi e Pool ley ngalluure ndee. Be cikkiino Pool naanniino mo e ley Suudu Dewal Mawndu nduu.

<sup>30</sup> Jirkitagol ngol huubi6i ngalluure ndee. Yimbe ana njaltira tatteeji dii fuu. Be nanngi Pool, 6e ndaaas dum faa 6e njaltini dum Suudu Dewal Mawndu nduu, 6e uddi dame dee oon wakkati fuu. <sup>31</sup> Nde 6e tewti faa 6e mbara Pool ndee, tawi hooreejo sordaasi'en oo humpitike Urusaliima fuu ana darorii koyngal gootal. <sup>32</sup> Don e don, o 6ami sordaasi'en e mawbe muufsum'en, o dogani 6ee. Nde yimbe 6ee njii mo kanko e sordaasi'en 6ee ndee, nootti fide Pool. <sup>33</sup> O 6attii Pool, o yamiri Pool nannggee, o wii ha6biree calali didi, o lamndii kajum yo homo e kodum wadi? <sup>34</sup> Jamaa oo ana wulla. Bee ana ngulla gedel, 6ee too ana ngulla gonngel. Nde wonnoo jirkitaare ndee hadii mo faamde, o yamiri Pool nabee to hu6eere too. <sup>35</sup> Nde Pool warii faa njabba kalikali hu6eere oo ndee, sordaasi'en 6ee ndoondii mo saabe jirkitaare jamaa oo, <sup>36</sup> sabi yimbe heewbe ana njokki e makko ana ngulla, ana mbiya:

—War mo!

#### *No Pool jaaborii Urusaliimankoo6e*

<sup>37</sup> Nde 6e ngari faa 6e naanna mo e damal hu6eere ngal ndee, Pool wii hooreejo oo:

—Ana daganoo kam mi haalda e maa naa?

Oon wii mo:

—Ee? Ada waawi yunaninkoore naa? <sup>38</sup> Ndennoo wanaa aan woni Misiranke gadudo murtere ko 6ooyaali, wardi e waroo6e ko'e ujunaaji nayon, na6i dum'en ley ladde jeereende oo?

<sup>39</sup> Pool jaabii, wii:

—Miin, mi Yahuudiyanke pindo Tarsus ley leydi Silisi, e ndee ngalluure nde wanaa noobunde njeyaa-mi. Mido jaage ndujano-daa kam mi haalda e yimbe 6ee.

<sup>40</sup> O dunjanii dum. Pool darii e dow njabbirde ndee, huncani yimbe 6ee junngo. Nde 6e ndeyyininoo ndee, o haali e ibaraninkoore, o wii:

## 22

<sup>1</sup> —Sakiraabe e baabiraabe, kettinee jooni faa mi fammina on mi wadaali ko boni.

<sup>2</sup> Nde 6e nani ibaraninkoore o haaldata e ma6be ndee, 6e ndeyyininii teen. O wii:

<sup>3</sup> —Mi Yahuudiyanke pindo Tarsus ley leydi Silisi. Kaa do Urusaliima doo mawnu-mi. Gamaliel wonnoo moobbo am. Kanko janngini kam sariya njaatiraabe meeden oo faa paamu-mi. Mido jootunoo e Laamdo hono no on fuu ngorru-don hannde nii. <sup>4</sup> Mi torrii jokku6e ngol doo Laawol 6ee faa maayi. Mi nanngii worbe e rewbe, mi uddii dum'en kasu. <sup>5</sup> Jottinoovo Sadaka Mawdo e waalde Saahii6e 6ee fuu ana ceettanoo kam kajum'en duu. Ke6u-mi e ma6be kasen talki faa mi holla sakiraabe ma6be wonbe Damas 6ee, njaa-mi ha6beyde jokku6e laawol Iisaa wonbe ton 6ee, faa mi wadda dum'en Urusaliima yalla ana caree.

<sup>6</sup> Njaa-mi faa 6adii-mi Damas, wakkati hakkunde naange, fooyre mawnde iwi dow kammu, yaayni, filii kam. <sup>7</sup> Caamu-mi e leydi, nan-mi daande ana wiya kam: «Sool, Sool, ko saabii so ada torra kam?» <sup>8</sup> Njaabii-mi, mbii-mi: «Aan homo, gido Laamdo?» O wii kam: «Miin, Iisaa Nasaraatunke mo torru-daa oo.» <sup>9</sup> Wondube e am 6ee njii fooyre ndee, kaa 6e nanaali daande kaaldudo e am oo. <sup>10</sup> Nden, mbii-mi: «Joomiraado, kodum ngadan-mi?» Joomiraado wii kam: «Imma, yaa Damas, a haalante ton ko njamire-daa ngadaa koo fuu.» <sup>11</sup> Wondube e am 6ee dowi kam faa ley Damas, sabi fooyre ndee wumniino kam no nde sattiri yaaynude.

<sup>12</sup> Ananiyas yo gorko kuld6o Laamdo, jokkudo Sariya Muusaa, mo Yahuudiyankoo6e hodub6e ton fuu ceettii moyyo oo, <sup>13</sup> wari, darii yeeso am, wii kam: «Sool, sakiike, wumtu!» Don e don njii-moo-mi. <sup>14</sup> O wii: «Laamdo njaatiraabe meeden oo subike ma yalla ada annnda

sago muudum, njiyaa Pooccitiido oo, nanaa haala muudum. <sup>15</sup> Sabi aan seettantoo mo yeeso yimbe fuu ko njii-daa e ko nan-daa. <sup>16</sup> Jooni, kodum ndoomataa? Imma, loote-daa lootogal batisima, njaafire-daa luutti maa e noddude innde Joomiraado.»

<sup>17</sup> Caggal mi wirfitike Urusaliima, mido rewa Laamdo ley Suudu Dewal Mawndu nduu, faa won ko yellitii e am, <sup>18</sup> nden njii-mi Joomiraado, wii kam: «Heja law, yaltu Urusaliima, sabi be njabataa seedaaku mo ceettanto-daa kam oo.» <sup>19</sup> Njaabii-mi, mbii-mi: «Joomiraado, ebe anndi mido yahannoo ley cuudi baajordi dii fuu, mido uddannoo mido fiyannoo goondinbe 6ee. <sup>20</sup> Nde yiyyam Eciyen seede maa oo yuppetee ndee, mido darii, edum weli kam ko o waraa koo, miin haybannoo kaddule warbee mo 6ee.» <sup>21</sup> Joomiraado jaabii kam, wii: «Yaa, mi nelete to woddi to yimbe be nganaa Yahuudiyankoo6e.»

### No Pool wiiri yo Romanke

<sup>22</sup> E6e kettinanii mo faa o haali ngol konngol. Nden 6e ngulli, 6e mbii:

—Ittu mo e leydi ndii! Hono oo haanaa wurde!

<sup>23</sup> E6e ngulla, e6e mbeeynaa saayaaji ma66e, e6e immina colla. <sup>24</sup> Hooreejo oo yamiri Pool na6ee to ley hubeere too, lamndoree piide faa be annda ko saabii so jamaa oo ana wulla e makko hono nii. <sup>25</sup> Nde be ka66i mo faa be piya mo ndee, o wii mawdo gondo don oo:

—Ana daganoo on piyon Romanke sako mo saraaka naa?

<sup>26</sup> Nde mawdo oo nani dum ndee, haalanoyi hooreejo oo, wii:

—Ada anndi ko kosu-daa faa ngadaa naa? Gorko oo yo Romanke non!

<sup>27</sup> Nden hooreejo oo yehi to Pool, lamndii dum, wii:

—Haalanam, soobee fuu a Romanke naa?

Pool jaabii, wii:

—Kajum!

<sup>28</sup> Hooreejo oo jaabii, wii:

—Miin, so wanaa njo6u-mi kaalisi keewdö nde ke6u-mi laataade Romanke.

Pool wii mo:

—Miin, mi finii mi tawii mi kajum.

<sup>29</sup> Don e don anniyiibe fiide mo faa tilsina mo haaltude 6ee njalti. Hooreejo oo huli, sabi anndii Pool yo Romanke, ha66iino dum.

### No Pool na6iraayeeso waalde Saahiibe

<sup>30</sup> Janngo mum, kammarri hooreejo oo ana yidunoo tayorde ko Yahuudiyankoo6e 6ee ngullanirii Pool, humti dum, yamiri hooree6e yottino6e sadaka e waalde Saahiibe ndee fuu kawrita. Caggal dum, o waddi Pool, o darni dum yeeso ma66e.

## 23

<sup>1</sup> Pool yeewi waalde Saahiibe 6ee, wii:

—Sakiraafe, hakkille baaltiido nguurdu-mi yeeso Joomiraado gila pinu-mi faa yottaade jaloomaan handne oo.

<sup>2</sup> Nii Ananiyas, Jottinoowo Sadaka Mawdo oo, yamiri darino6e banngé makko 6ee piya mo e hunduko. <sup>3</sup> Nden, Pool wii mo:

—Laamdo fiyete, aan kokowol dawninaangol! A joodoto faa cariraa kam Sariya Muusaa, ko njamir-daa mi fiyee koo a luuttii Sariya Muusaa.

<sup>4</sup> Darino6e don 6ee mbii Pool:

—A yennan Jottinoowo Sadaka Mawdo mo Laamdo subii oo naa?

<sup>5</sup> Pool jaabii, wii:

—Sakiraafe, mi anndaa o Jottinoowo Sadaka Mawdo, sabi mido anndi ana winndii: «Pati yennu hooreejo lejol maa!»\*

<sup>6</sup> Nde wonnoo Pool ana anndi yoga e Saahiibe 6ee yo Saduki'en, yoga mum'en yo Farisa'en, duki semmbe, wii:

—Sakiraafe, miin mi Farisanke, 6ii Farisanke. Saabe fawgol jikke e immital maay6e caritree-mi.

<sup>7</sup> Nde o haalnoodum ndee, Farisa'en 6ee e Saduki'en 6ee njeddondiri, deental ngal feccii.

<sup>8</sup> Tawi Saduki'en ana mbiya immital walaa, malaa'ika'en ngalaa, ruuhuji ngalaa, kaa Farisa'en ana ngoondini dum fuu. <sup>9</sup> Duko ngoo 6eydii mawnude. Yoga e dunkee'en Sariya heedan6e Farisa'en 6ee ndarii, immini duko manngo, ana mbiya:

—Walaa fuu ko boni ko min njii e oo gorko. Ana waawi taweede ruuhu naa malaa'ika haaldi e makko!

<sup>10</sup> Jeddii dii mawni faa hooreejo sordaasi'en oo huli pati Pool seekee. Dum wadi so o yamiri sordaasi'en njippoo to deental too, itta Pool e juude yimbe 6ee, nafta dum to hubeere too.

\* 23:5 Pergu 22.27

<sup>11</sup> Jemma jokkudo hen oo, Joomiraado darii yeeso Pool, wii dum:

—Pati hul! No ceettanori-daa kam ley Urusaliima nii, ana haani ceettanoro-daa kam non Roma duu.

*No Yahuudiyanooēe ngadiri gaddal faa mbara Pool*

<sup>12</sup> Nde weetunoo ndee, Yahuudiyanooēe see ngadi gaddal, kunii jaamataa njarataa gila doo faa mbara Pool. <sup>13</sup> Wannoōēe ngal gaddal see ana buri capande nayon gorko. <sup>14</sup> Be njehi to hooreeēēe yottinoōēe sadaka e mawbē, 6e mbii:

—Min kuniike hunoore fay huunde min jaamataa min njarataa gila doo faa min mbara Pool. <sup>15</sup> Jooni, onon e waalde Saahiibē see, mbiyee hooreejo sordaasi'en oo waddana on Pool, mbiyon odon njidi faamtindaade ko o haalannoo koo. Minen, miden lanndinii faa min mbara mo gila mo yottaaki.

<sup>16</sup> Baadii Pool gorko nani haala gaddal ngal, yehi to hubeere too, naati, humpiti Pool.

<sup>17</sup> Pool noddi gooto e mawbē sordaasi'en 6ee, wii dum:

—Naābu oo suka gorko to hooreejo too, sabi won ko o yidi haalande fum.

<sup>18</sup> Mawdō sordaasi'en oo naābi mo to hooreejo muudum too, wii dum:

—Nanngaado biyeteedo Pool oo noddi kam, jaagii kam mi wadda oo suka gorko to maa, sabi won ko oon yidi haalande ma.

<sup>19</sup> Hooreejo oo nanngi junngo makko, sawdintini mo, wii:

—Kofum kaalantaa kam?

<sup>20</sup> O wii dum:

—Yahuudiyanooēe kaaldii, kawrii, ndaardete janngo yalla afa waddana fum'en Pool yeeso waalde Saahiibē 6ee, 6e nanndinkinoo e yiibē faamtindaade ko o haalannoo koo.

<sup>21</sup> Pati njabanaa 6e! Sabi ko buri worbe capande nayon e maābe ana njugganii mo, kuniike jaamataa njarataa so mbaraali mo. Be lanndinike, e6e ndoomi yamiroore maa.

<sup>22</sup> Hooreejo oo wii suka gorko oo:

—Pati haalan fay gooto a haalanii kam dum.

O yoppi dum witti.

*No Pool neldiraa Kaysariya*

<sup>23</sup> Caggal dum, o noddi mawbē sordaasi'en makko didon, o wii dum'en:

—Mooōtee worbe teemede didon e waddiibē pucci capande njeddon, kapum e teemede didon jom'en gaawe. On fuu, lanndinee yaade Kaysariya wakkati jeenabō jemma. <sup>24</sup> Kabbee pucci faa nabiron Pool e dow jam, to Filikus goforneer oo too.

<sup>25</sup> Hooreejo oo winndi oo bataaki:

<sup>26</sup> Miin, Kalawdiyus Lisiyas, mido jowte, aan Filikus goforneer teddudo oo.

<sup>27</sup> Gorko mo neldu-maa-mi oo, Yahuudiyanooēe nanngunoo dum, anniyii warde dum. Nde kumpitinoō-mi o Romanke ndee, naatu-mi hen, miin e fedde sordaasi'en ndee, mbiltu-moo-mi. <sup>28</sup> Nde wonnoo mido yidi faamde ko 6e ngullanirii mo ndee, ngaddumoo-mi yeeso waalde Saahiibē maābe. <sup>29</sup> Taw-mi banngal sariya maābe tan 6e ngullanirii mo, kaa ko o wullanaa e muudum koo, waawaa waddande mo wareede naa uddeede.

<sup>30</sup> Caggal dum, martu-mi kumpa Yahuudiyanooēe ndawridii faa nannga mo. Dum wadi so neldu-maa-mi mo don e don, njamir-mi wullaniibē mo 6ee duu njaha to maa.

<sup>31</sup> Sordaasi'en 6ee ngadi ko njamiraan koo, 6ami Pool ley jemmaaku, naābi dum faa Antibatiris. <sup>32</sup> Janngi mum, sordaasi'en yaarannoōēe koydē bee mbirfitii to hubeere too, daldi Pool waddiibē pucci bee njottinoya dum. <sup>33</sup> Nde been njottinoo Kaysariya ndee, ndokki goforneer oo bataaki oo, kolli dum Pool. <sup>34</sup> Nde kaananke oo janngi bataaki oo ndee, lamndii hoto o jeyaa. Nde o nani Silisi Pool jeyaa ndee, <sup>35</sup> o wii dum:

—So wullaniife ma bee ngarii, mi nanan haala maa.

O yamiri oon mooōtooyee to suudu laamordu Hirudus too.

## 24

*No Pool wulliranaa to Filikus*

<sup>1</sup> Balde joy caggal muudum, Ananiyas Jottinoowo Sadaka Mawdo oo yottii Kaysariya ana wondi e yoga e mawbē 6ee, kapum e dunkee sariya Romankoōēe biyeteedo Tartulus. Be ngullanii Pool to goforneer oo. <sup>2</sup> Nde Pool noddanee ndee, Tartulus fuddi wullanaade mo yeeso kaananke oo, wii:

—Filikus kaananke tedduđo, laamu maa waddanii min jam 6ooydo, kasen neejal maa waylitii lejol ngol sanne. <sup>3</sup> Dum fuu saabe maa min keeōrii tatteeji fuu, min njettii ma sanne. <sup>4</sup> Mi yidāa joonnde ndee juuta, kaa mido ndaarde saabe moyyuki maa, kettinandoaa min seeda. <sup>5</sup> Min tawii oo doo gorko yo bondo sanne, gaddoovo fitina hakkunde

Yahuudiyanikoobe wonbe e aduna oo bee fuu. O hooreejo diina Nasaraatunkooobe oo. <sup>6</sup> O naatii e soobinde Suudu Dewal Mawndu nduu, dum nee min nanngii mo. [ <sup>7\*</sup> ] <sup>8</sup> Aan e hoore maa, lamndo-daa mo, paamaa ko min ngullanirii mo koo fuu.

<sup>9</sup> Yahuudiyanikoobe tawdaabe e makko bee mbii non jaati worri.

<sup>10</sup> Nde goforneer oo hokkunoo Pool haala ndee, jaabii:

—Mido anndi wadii duubi ada sara ngol lejol. Dum wadi so mido seyoro liddi am dii. <sup>11</sup> Buraa balde sappo e didi ko ngar-mi Urusaliima faa mi rewaa Laamdo. So a taykiima, aan e hoore maa, a tawan hono non worri. <sup>12</sup> Fay gooto tawaali kam mido huitondira e neddo naa mido jirkita jamaa, wanaa e ley Suudu Dewal Mawndu nduu, wanaa e ley cuudi baajordi, wanaa e ley ngalluree ndee. <sup>13</sup> Be mbaawaa tabintinde ko 6e ngullanirii kam e muudum jooni koo. <sup>14</sup> Kaa mido jaasi yeeso maa: mido rewri Laamdo njaatiraabe meeden oo diina mo 6e mbiyata diina peneejo oo. Mido goondini ko winndaa e Tawreeta Muusaa koo e ko winndaa e dewte annabaabe koo fuu. <sup>15</sup> Kasen duu mido fawi jikke am e Laamdo mo 6e pawi jikke maabbe e muudum kambe duu oo, o wuurtinan fooccitiibe e 6e pooccitaaki fuu. <sup>16</sup> Dum saabii so tiinnitii-mi yalla ana laatanoo kam hakkille baaltiido jaannde fuu ko waldaa e feloore yeeso Laamdo e yeeso yimbe.

<sup>17</sup> Caggal duubi keewdi, ngartu-mi faa mi wadana yimbe am dokke, mi itta sadakaaji. <sup>18</sup> E ley majjum 6e tawi kam e ley Suudu Dewal Mawndu nduu caggal mi sennaama, mi waldaa e jamaa, mi waldaa e dillere. <sup>19</sup> Yoga e Yahuudiyanikoobe leydi Asiya wonnoobe don, been kaannoo warde wullanaade kam yeeso maa, so tawii won ko 6e ngullantoo kam. <sup>20</sup> Naa 6ee doo, kaajum e hoore mum'en kaala boofi di njii e am nde ndarinoo-mi yeoso waalde Saahiibe ndee, <sup>21</sup> so wanaa konngol gootol ngol ndarii-mi so ngullu-mi, mbii-mi: «Saabe immitl maaybe carirton kam hannde!»

<sup>22</sup> Nde Filikus nannoo dum ndee, riiwti 6e e dow no mo anndiri diina oo. O wii:

—So Lisiyas hooreejo oo warii, mi saran haala moodon kaa.

<sup>23</sup> O yamiri mawdo sordaasi'en oo hayba Pool, wadana dum mosolaa, pati hada fay gooto e yiibbe muudum bee gollande dum naa warde e muudum.

<sup>24</sup> Balde seeda caggal muudum, Filikus wardi e jom suudu muudum Yahuudiyanke biyeteedo Durusilla. O neli Pool waddoyee, o nanii ana haala haala goondinal Iisaa Almasiihu. <sup>25</sup> Kaa nde Pool haalannoo haala fooccitaare e nantaare e sariya garoowo ndee, Filikus huli, wii:

—Jooni kaa, gasii, yaa! Nde kebindii-mi fuu, mi nodditite.

<sup>26</sup> O miilii Pool hokkan mo kaalisi. Dum saabii so omo noddha dum cili keewdi faa 6e ngaajodoo.

<sup>27</sup> Kaa nde dum hebunoo duubi didi ndee, Porsiyus Festus loomtii Filikus, laatii kaananke. Nde wonnoo Filikus ana yidi seynude Yahuudiyanikoobe bee, yoppi Pool e ley kasu oo.

## 25

*No Pool jaagorii sariya mum naabeet to kaananke Roma*

<sup>1</sup> Balde tati caggal ko Festus wari e ley leydi ndii koo, iwi Kaysariya, yehi Urusaliima.

<sup>2</sup> Don, hooreebe yottinoobe sadaka e mawbe Yahuudiyanikoobe ngari to makko ngullitanii Pool. Be ndaardi mo soobee <sup>3</sup> o hokka 6e Pool, 6e ngadda dum Urusaliima, sabi ebe tewta no 6e njanira mo, 6e mbara mo. <sup>4</sup> Festus wii Pool ana uddii kasu Kaysariya too, kankoo e hoore makko o birfitotoodo ton law. <sup>5</sup> O wii:

—Mawbe moodon ngara njaada e am Kaysariya, ngullanoo gorko oo so tawii won ko wadi.

<sup>6</sup> Festus faabidaali e maabbe ko buri balde jetti naa sappo, caggal dum, o regii o feewi Kaysariya. Janngo mum, o joodoyii to sarirde too, o yamiri Pool waddee. <sup>7</sup> Nde Pool yottii ndee, Yahuudiyanikoobe iwbe Urusaliima bee pilii dum, kappi dum kuddde bonde keewde, de ngalaa daliili. <sup>8</sup> Pool jaabii, ana wiya:

—Mi meedaali toojude, wanaa sariya Yahuudiyanikoobe oo, wanaa Suudu Dewal Mawndu nduu, wanaa kaananke Roma mawdo oo.

<sup>9</sup> Nde wonnoo Festus ana yidi seynude Yahuudiyanikoobe bee, lamndii Pool, wii:

—Ada jaabaa yaade Urusaliima faa miin e hoore am mi saroya ton kabaaru maa oo naa?

<sup>10</sup> Pool wii:

—E sarirde kaananke Roma mawdo ngon-mi, do kaan-mi sareede doo. Mi toojiali Yahuudiyanikoobe bee, no aan e hoore maa anndir-daa dum nii. <sup>11</sup> So tawii miin tooji, mi wadii ko foti warde kam, mi salataako wareede. Kaa so fay huunde e ko 6e kappi kam koo

\* <sup>24:7</sup> E dereeji fooydi dii, yoga ana feyda aaya 7: Miden njidi sarde mo sariya amen, tawi Lisiyas hooreejo sordaasi'en oo ittirii mo e juude amen semmbe, yamiri wullaniibe mo bee ngara yeeso maa.

wanaa goonga, fay gooto waawaa wattude kam e juude maabé. Sariya am bettinee, yaha to kaananke Roma mawdo oo.

<sup>12</sup> Caggal nde Festus haaldi e howruuþe muudum, jaabii, wii:

—Sariya maa bettinee to kaananke Roma mawdo njid-daa, dum nee, a bettinte yaade to kaananke Roma mawdo!

### No Pool waddiraa yeeso Agirippa e Barniki

<sup>13</sup> Balde seeda caggal muudum, Agirippa kaananke oo e Barniki ngari Kaysariya jowtude Festus. <sup>14</sup> Nde 6e paabunoo don balde seeda ndee, Festus haalani kaananke oo haala Pool, wii:

—Won gorko mo Filikus yoppi doo e kasu. <sup>15</sup> Nde njaa-mi Urusaliima ndee, hooreebé yottinoobé sadaka e mawþe Yahuudiyanchoobé kaalanii kam haala makko, jaagiima mi sara mo. <sup>16</sup> Njaabii-mi 6e: Romankooþe neesoraaki sarde neddo tawee jooodaaki e happuþe dum 6ee, jaaboo dum'en. <sup>17</sup> Nde 6e mooftinoo so 6e ngari doo ndee, miin nee, mi neemtinaali fay huunde. Janngo mum, njooodoyii-mi to sarirde too, njamir-mi gorko oo waddee. <sup>18</sup> Nde wullaniiþe mo 6ee ndarii bannge makko ndee, ngaddaali fay feloore wootere e ko miilannoo-mi koo. <sup>19</sup> Be ngaddi e makko haalaaji baangal diina maabé, kajum e gooto biyeteed Iisaa maaydo, mo Pool wiwaya ana wuuri oo. <sup>20</sup> Miin nii, haala wa'uka nii ana wemmbi kam, dum wadi so lamndi-moo-mi yalla omo jaþa saroyeede Urusaliima naa? <sup>21</sup> Kaa o naagiima kabaaru makko wattee e juude kaananke mawdo oo, ndennoo njamir-mi o haybee doo faa mi heþa neldunde mo kaananke Roma mawdo oo.

<sup>22</sup> Agirippa wii Festus:

—Mido yidi hettinaade oo gorko, miin e hoore am.

Festus wii:

—A hettinto mo janngo.

<sup>23</sup> Janngo mum, Agirippa e Barniki ngardi e fuukinaare mawnde, naati e ley sarirdu nduu, kamþe e hooreebé sordaasi'en 6ee e mawþe ngalluure ndee. Festus yamiri Pool waddee. <sup>24</sup> Festus wii:

—Agirippa kaananke e deental tawaabe doo! On njii oo gorko. Yahuudiyanchoobé fuu ngullanike mo ga am ley Urusaliima e doo fuu, eþe ngulla eþe mbiya o haanaa yoppeede o wuura. <sup>25</sup> Miin e hoore am, mi tawii o wadaali fay huunde ko haani warde mo. Kaa nde wonnoo kanko e hoore makko o jaagiima sariya makko bettinee, naþee to kaananke Roma mawdo oo, mi fellisi neldunde mo ton. <sup>26</sup> Mi walaa tayoral fuu e makko ko kaan-mi winndude e kaananke oo. Dum wadi so ndarnu-moo-mi yeeso moodon on fuu, faa dum teenja e maa, aan Agirippa kaananke oo, yalla so en kettinike haala makko, mido heþa ko mi winnda. <sup>27</sup> Sabi dum gasataa no kasunke neldirtee kaananke mawdo oo tawee ko nanngiraa koo holliataaka faa laaþa.

## 26

<sup>1</sup> Agirippa wii Pool:

—A hokkaama haala, haal haala maa.

Nden, Pool hunci junngo, jaabii, wii:

<sup>2</sup> —Agirippa kaananke, mi seyorike hujjaade yeeso maa hannde ko Yahuudiyanchoobé ngullanirii kam koo fuu. <sup>3</sup> Sabi ada anndi neesuji Yahuudiyanchoobé e haalaaji muudum'en fuu. Saabe majjum mido naage, muñaa, kettinano-daa kam.

<sup>4</sup> Yahuudiyanchoobé fuu ana anndi no nguurdumi gila mi cukalel tusukel. Eþe anndi no ngorrungoo-mi e ley suudu baaba am e ley Urusaliima fuu. <sup>5</sup> Eþe anndi gila arannde, so 6e njaabii seettaade: mido jokki laawol diina amen bürngol tiidude ngol, mido hiisodaa e Farisa'en. <sup>6</sup> Jooni, mi darike faa mi saree saabe mi fawii jikke am dow fodoore nde Laamdo wadani njaatiraabe meeden ndee. <sup>7</sup> Leji meeden sappo e didi dii ana pawi jikke muudum e tabital fodoore ndee, ana ndewira soobee jemma e jalooma. Kaananke, saabe oo jikke Yahuudiyanchoobé ngullanorii kam! <sup>8</sup> Ko saabii so onon Yahuudiyanchoobé miil-don Laamdo waawaa immitinde maayþe?

<sup>9</sup> Miin e hoore am, e bettaade mi tayoriino mido haani bonnude innde Iisaa Nasaraatunke oo, no laatorii fuu. <sup>10</sup> Dum woni ko ngadu-mi Urusaliima. Hooreebé yottinoobé sadaka 6ee njarraninoo kam mi udda seniibé heewþe e kasu. Nde 6e caranoo 6e wareteeþe ndee, mido yarrii dum. <sup>11</sup> Mi torrii 6e cili keewdi e cuudi baajordi dii fuu, mi tilsinii 6e mbonkoo Joomiraado. Torra am e maabé ana mawnunoo sanne faa mido tawoyannoo 6e ley geelle janane.

<sup>12</sup> Hono non njaaru-mi Damas nde hooreebé yottinoobé sadaka 6ee njarranii kam ndee.

<sup>13</sup> Kaananke, mido e laawol wakkati hakkunde naange, njii-mi fooyre ana iwa dow kammu ana filoo kam, miin e yaaduþe e am 6ee fuu. Fooyre ndee ana 6uri naange jalbude. <sup>14</sup> Min

fuu, min caami e leydi, nan-mi daande ana wiya kam e ley ibaraninkoore: «Sool, Sool, ko saabii so ada torra kam? So ndemoori wii saloto ko nanggudo ginol mum wadata fuu, belydan naawnaade.»<sup>15</sup> Njaabii-mi, mbii-mi: «Aan homo, gitdo Laamdo?» Joomiraado wii: «Miin, Iisaa mo torru-daa oo. <sup>16</sup> Imma dara, sabi mi bannganii ma mi subike ma faa ngollanaa kam, ceedano-daa kam ley ko njii-daa koo e ko anniyii-mi bannginanoyde ma caggal hannde. <sup>17</sup> Mi reenete e Yahuudiyanikoobe e yimbe lenji goddi, be nelan-maa-mi e muudum jooni 6ee, <sup>18</sup> yalla ada feerta gite maabbe, be iwa e nimre, be ngarta e fooyre, be iwa e juningo Ibiliisa, be ngarta e Laamdo, be keba yaafeede luutti, be ndonida e sennaabe bee saabe ko be goondini kam koo.»

<sup>19</sup> Kaananke Agirippa, dum wadi so mi salaaki dowlanaade ko njii-mi, ko iwrani kam dow kammu koo. <sup>20</sup> Be mido adoo waajaade fuu yo yimbe Damas e yimbe Urusaliima e piilol Yahuudiya fuu. Caggal dum, njokkin-mi hen yimbe lenji goddi tuuba, ngarta e Laamdo, ngolla golleeji kolitooji be tubbi. <sup>21</sup> Saabe dum Yahuudiyanikoobe nanngiri kam ley Suudu Dewal Mawndu nduu, tewti warde kam. <sup>22</sup> Kaa faa hannde, Laamdo ana reeni kam. Mido seettanoo tedduue e lo'ube. Mi waajatako fay huunde so wanaa ko annabaabe e Sariya Muusaa kaali waroyan koo: <sup>23</sup> Almasihiu torroto, adoo maaybe immitaade. Caggal dum, o waajoto fooyre, ko wanaa yimbe meeden tan, o waajoto lenji goddi duu.

<sup>24</sup> Nde Pool haalata dum ndee, Festus jahii jahaango manngo, wii:

—Pool, a haandii! Heewgol maa anndal ngol haandinii ma!

<sup>25</sup> Pool jaabii, wii:

—Teddudo, mi haandaali. Ko kaalan-mi koo yo haalaaji goondudi, jogiidii maanaa.

<sup>26</sup> Agirippa kaananke oo ana anndi kudde dee. Dum wadi so mido hoolii haalde dum yeeso makko. Sabi mido tayori fay huunde joobanaali mo hen, sabi dum wadaali e cuucukka.

<sup>27</sup> Kaananke! Ada goondini annabaabe naa? Mido anndi ada goondini!

<sup>28</sup> Agirippa wii Pool:

—Seeda tan hadete wadude kam neddo Iisaa.

<sup>29</sup> Pool jaabii, wii:

—Yaawi taadi fuu, mi jaagoto Laamdo faa aan e hettintoobe kam jooni 6ee fuu laato-don ko ngon-mi koo, tawee boggal e calali ngalaal e mon.

<sup>30</sup> Kaananke oo e goforneer oo e Barniki e joddinoobe e muudum'en 6ee fuu immii. <sup>31</sup> Nde be njalti suudu nduu ndee, e6e mbiyondira:

—O wadaali ko haani warde mo naa ko haani uddude mo kasu.

<sup>32</sup> Agirippa wii Festus:

—Omo waawnoo yoppiteede so o wiyalino sariya makko 6ettinee nabee to kaananke Roma mawdo oo.

## 27

### No Pool neldiraa Roma

<sup>1</sup> Nde yaarugol amen Italiya laana tabitinnoo ndee, Pool e kasunkoo6e wo66e ngadaa e junngo mawdo sordaasi'en biyeteedo Yulyus, jeyaado e fedde sordaasi'en kaananke Roma mawdo oo. <sup>2</sup> Min naati laana geeci iwna Adaramatiya njahoowa so ana fajaa ley leydi Asiya, min ndeerti. Miden ngondi e Aristarka gorko Makedoniyanke iwoowo Tesaloniki. <sup>3</sup> Janngo mum, min njottii Sidon. Yulyus wadani Pool mosolaa, dunjanii dum yaha to y66e mum yalla ana paaboroo dum ko hasindini e mum. <sup>4</sup> Nde min iwi don ndee, min battitii fonngo ruunde Kiprus, sabi e henndu min peewtuno. <sup>5</sup> Min lummbiri maayo geeci n6oo hedde Silisi e Pamfiliya, min njottii Mira ley leydi Lisiya. <sup>6</sup> Don, mawdo sordaasi'en oo hebani min laana iwka Aleksandiri ana fa'i Italiya, naanni min hen.

<sup>7</sup> Balde kurde laana amen kaa wadi ana yaara seese. Semmbe e doole min njotorii danjereer Kinidus. Nde wonnoo henndu nduu hadii min yawtude ndee, min lummbiri Salmoone. Gila don min takkii e fonngo ruunde Kereta. <sup>8</sup> Nde min ya6borinoo don semmbe e doole ndee, min ngari e nokku biyeteedo Hodorere Lobbere nde wodfaa e ngeenndi Lasiya.

<sup>9</sup> Nde wonnoo min pa66ii sanne ndee, dawirde laana geeci hul6iniima sabi jaannde hooreeteende 6ettike, jaangol ngol duu fuddii. Pool ana jeertina 6e, <sup>10</sup> ana wiya:

—Sakiraabe, mi yi ngol doo dawol yo keewoowol kunkooji e mursee, wanaa laana kaa e kaaki dii tan, ana waawi laataade yonkiiji men duu.

<sup>11</sup> Kaa mawdo sordaasi'en oo, haala mawdo laana oo kajum e joomiika 6uri hoolaade, diina ko Pool hali koo. <sup>12</sup> Danjereere nde be ngoni e muudum ndee, welaa dabbunde, dum wadi so 6urbe heewde e won6e e laana 6ee mbii 6e njaha be tewta yottaade Feniksa, danjereer Kereta fewtunde e so66undu hiirnaange 6aleeri e so66undu hiirnaange saahal, yalla e6e ndabba ton.

<sup>13</sup> Nde henndu iwrundu 6aleeri fuddi mooyde ndee, 6e cikki 6e mbaawan yottinde faandaare maabbe ndee. Be 6abbini torooje dee, 6e takkii e fonngo Kereta, 6e mbirftii. <sup>14</sup> Kaa

caggal dum seeda, henndu mawndu wiyyeteendu henndu funnaange saahal iwu to ruunde too, jippii.<sup>15</sup> Laana kaa hayti, min ndonki hadfude henndu nduu naabude ka. Dum wadi so min acci ka doya.<sup>16</sup> Nde min bettotoo duungel tusukel biyyeteengel Kawda ndee, duungel ngel huuri min seeda e henndu, min cippiri don e laanawel tusukel ngel, min kewti ngel.<sup>17</sup> Nde be 6am tunoo ngel ndee, be 6ami boggi, be cacci e laana mawka kaa. Ko be kuli pati be njanoy e so6bundu Sirta koo, be jippini wiir oo, be njoppi eka doya.<sup>18</sup> Henndu nduu wibbi semmbe. Dum wadi so janngo mum be pu6di tippaade donngal laana kaa.<sup>19</sup> E jaalooma tata6o oo, be mbodori juude ma6be kaaki laana dii.<sup>20</sup> Balde kuurde naange e koode fuu njiyataake. No henndu nduu foti mawnude, min tayi jikke amen fuu e hisude.

<sup>21</sup> Nde wonnoo yimbe bee pa66ii kebaali ko jaama, Pool darii hakkunde ma6be, wii:

—So on njaabiino haala am on iwaalino Kereta, dii kunkooji e oo mursee hewtataakono en.<sup>22</sup> Jooni, mido haalana on: ceyee, sabi fay gooto e moodon yonki muudum mursataake, laana kaa tan mursetee.<sup>23</sup> Jemma hanken, malaa'ika iwrii to Laamdo mo ndewan-mi oo warii e am,<sup>24</sup> wii kam: «Pool, pati hul, a daroto yeeso kaananke Roma mawdo oo, Laamdo reenete aan e dawdu6e e maa fee fuu.»<sup>25</sup> Ndennoo, tiinnee, sabi mido hoolii ko Laamdo haalani kam koo, hono non jaati worrata,<sup>26</sup> kaa waajibi en njanoyan e ruunde.

<sup>27</sup> E ley jemma sappo e naya6o oo, nde min ndoydata e geeci Adiriyatiki ndee, wakkati hejjere jemma donno6e laana kaa bee cikki badike fanndude.<sup>28</sup> Be tippii boggol ka66aangol ko teddi, be tawi luggeendi ndii yo hakke dardé noogay. Be njehi yeeso seeda, be tippii kasen, be tawi luggeendi ndii yo hakke dardé sappo e joy.<sup>29</sup> Ko be kuli pati be njanoy e kaaye koo, be njippini torooje nay caggal laana kaa, e6e ndoomi beetee.<sup>30</sup> Nde wonnoo donno6e laana kaa bee ana njiduno6 so6bidaade, be njippini laanawel pamarel ngel e ndiyam, be mbii ebe njiboya torooje to yeeso laana kaa too.<sup>31</sup> Pool wii mawdo oo e sordaasi'en bee:

—So yimbe bee keddaaki e ley laana kaa, onon, on ndadat�aa.

<sup>32</sup> Nden sordaasi'en bee tayi boggi nanngunoodi laanawel pamarel ngel dii, njoppi ngel doyi.

<sup>33</sup> Nde badinoo weetude ndee, Pool ndaardi be fuu be jaama, wii:

—Hannde woni balde sappo e nay odon kettii on jaamaali fay huunde.<sup>34</sup> Dum wadi so mido ndaarda on jaamon, yalla odon ndada, sabi fay gooto e moodon leebol hoore muudum solataa so saama.

<sup>35</sup> Nde o haalnoo dum ndee, o 6ami buuru, o yetti Laamdo yeoso ma6be be fuu, o helti, o fuddi jaamde.<sup>36</sup> Nden be fuu be ceyii, kambe duu be 6ami be jaami.<sup>37</sup> Minen wonbe ley laana kaa bee, min yimbe teemedi fidion e capande njeddon e njeegom.<sup>38</sup> Nde be jaamnoo faa be kaari ndee, be 6ami caakuuji alkama gondi e laana kaa dii, be tippii di ley geeci yalla edum hoyfina ka.

<sup>39</sup> Nde weetunoo ndee, be coynii leydi, kaa be annditaali ndi. Be njii so6bundu e fonngo muudum. Be kawri be naaban ton laana kaa so be mbaawii.<sup>40</sup> Be tayi torooje dee, be njoppi de ley ndiyam dam, be njornjini boggi kummbeeje gurfirde dee. Caggal dum, be piilti wiir oo, be njabbini dum to hoore laana too, yalla henndu nduu ana dunyira ka yeoso. Be peewi fonngo ngoo.<sup>41</sup> Be porri e siwre, laana kaa higgi. Becce makka jibii e ley njaareendi ndii faa ka ronki dillinaade, bempeeje keli laaci makka.

<sup>42</sup> Sordaasi'en bee anniyii warde kasunkoo6e bee pati fay gooto e ma6be yinoo so doga.<sup>43</sup> Kaa nde wonnoo mawdo sordaasi'en oo ana yidi danndude Pool, hadi be waafude anniya ma6be oo, yamiri waawbe yinaade bee adoo fiyaade e ndiyam yeentoya,<sup>44</sup> heddi6e bee, yoga muudum'en nanngi bamuuje laana kaa, yoga nanngi taye makka. Hono nii be fuu be njottorii njoordi e jam.

## 28

<sup>1</sup> Nde min ndadi ndee, min nani ruunde ndee Malta wiyyetee.<sup>2</sup> Hodufse don bee njabborii min caahu mawdo. Nde wonnoo oon wakkati kammu ana to6a jaangol ana woodi, be ku66i yiite, be njab6ii min faa min yuwloo.<sup>3</sup> Pool moo6i ledde, wedii e yiite ngee. Nguleefi kii yaltini e majje mboddi, ndi soppi junngo makko.<sup>4</sup> Nde hodufse don bee njii mboddi ndii ana weelta e junngo Pool ndee, mbiyondiri e ko'e muudum'en:

—Tayoral oo gorko yo bardo hoore, taweede o dadii to geeci too fuu, hakkeeji makko dii accataa mo wuura.

<sup>5</sup> O ficci mboddi ndii e yiite ngee, dum torraali mo fay huunde.<sup>6</sup> Be miili o 6uutan naa o saama don e don o maya. Kaa nde be kettinoo faa 6ooyi ndee, be njii dum torraali mo fay huunde, hakkillaja ji ma6be mbaylitii e makko, be mbii o gooto e laamdo'en bee.

<sup>7</sup> Publiyus, hooreejo ruunde ndee oo, ngesa muudum ana e sera nokkuure ndee. O ja66iima min faa gasi, o jippini min, o saahii e amen, min ngadi to makko balde tati.<sup>8</sup> Hawri baaba Publiyus ana lel6i sellaa, jontaado, reedu muudum ana doga yiyyam. Pool yehi to

makko, duwii, fawi juude muufum e makko, sellini mo. <sup>9</sup>Nde dum waafunoo ndee, yawbe wonbe e ruunde ndee bee ngari, cellinaa. <sup>10</sup>Be teddini min teddeengal manngal. Nde min njahata ndee, bee njooobini min ko min kasindini e mum fuu.

*No Pool dawiri iwde Malta yaade Roma*

<sup>11</sup>Caggal lebbi tati, min naati e laana iwka Aleksandiri, ndabbunooka e ruunde ndee kaa, min mbitti. Eka neepaa nejugol Tooruuj Puneeji.\* <sup>12</sup>Min njottii ngeenndi mbiyeteendi Sirakusa, min ngadi don balde tati. <sup>13</sup>Min naati don, min takkii e fonng geeci faa Regiyus. Janngo mum, henndu 6aleeri wifi. E ley balde didi min njottii Potiyoli. <sup>14</sup>Min tawi ton sakiraabe, ndaardi min paabana dum'en yontere. Hono nii min njottori Roma. <sup>15</sup>Nde wonnoo sakiraabe wonbe Roma bee nanii garol amen, ngarii faa sakoro Abiya e nokku biyeteedi Jippule Tati sakkitaade min. Nde Pool yiinoo bee ndee, yetti Laamdo, beydorii cuusal. <sup>16</sup>Nde min njottii Roma ndee, Pool dunjanaa jipoo feere muufum, kajum e sordaasi kayboowo dum oo.

*No Pool waajorii ley Roma*

<sup>17</sup>Balde tati caggal muudum, Pool noddi mawbe Yahuudiyankoo6e. Nde bee moo6tinoo ndee, o wii bee:

—Sakiraabe! Mi wadaali fay huunde ko luutondirta kam e yimbe meeden bee naa aadaaji njaatiraabe meeden dii, kaa mi nanngaama Urusalima, mi wattamaa e juude Romankoo6e. <sup>18</sup>Nde been yeewi kabaaru am ndee, njidiino yoppude kam, sabi bee tawaali e am fay dalili gooto kaando warde kam. <sup>19</sup>Kaa kammari Yahuudiyankoo6e bee caliima mi yoppitee, dum waddani kam jaagaade sariya am bettinee naabee to kaananke Roma mawdo oo, tawee mi happaali lejol am ngol fay huunde. <sup>20</sup>Dum wadi so noddu-mi on yalla mido yiya on mi haalana on. Mido haabborii dii calali saabe mo Israa'iilankoo6e pawi jikke e muudum oo.

<sup>21</sup>Be mbii mo:

—Min ke6aali bataaki iwdo Yahuudiya kaaloowo haala maa. Kasen duu fay gooto e sakiraabe bee waraalii humpita min naa haala ko boni ko ngad-daa. <sup>22</sup>Kaa miden njidi kaalanaa min ko njii-daa e hakkille maa, sabi miden anndi diina mo njokku-daa oo ana luurraa ley nokkuuje dee fuu.

<sup>23</sup>Be cartanii mo nde bee ngartata. Nalaande ndee yottii, heewbe ngari kawriti to jippunde makko too. Gila beeteet kecco faa caggal kiraade omo waajoo bee, omo fammina bee haala Laamu Laamdo. Omo dallinoroo Tawreeta Muusaa e dewte annabaabe haala Iisaa. <sup>24</sup>Yoga e maabbe jaabi ko o haali koo, yogaabe njabaali. <sup>25</sup>Nde bee caaktoot, tawi bee nganaa hawruube ndee, Pool beydi hen konngol gootol, wii:

—Ruuhu Ceniido haalii goonga nde yottiniri haala annabi Esaaya, nde oon wii njaati-raabe moodon:

<sup>26</sup>«Yaa to ngol lejol mbiyaa dum:

On kettinto faa palon noppi, kaa on paamataa.

On yeewan faa puttinon gite, kaa on njiyatua.

<sup>27</sup>Sabi ngol lejol 6ernde mum yoorii.

Be cukkii noppi maabbe, bee mbumniit gite maabbe,  
pati gite maabbe njiya, pati noppi maabbe nana,

pati hakkillaji maabbe paama,

sako bee ngarta mi sellina bee.»<sup>†</sup>

<sup>28</sup>Pool jokkini hen, wii:

—Anndee, kisindam Laamdo neldaama bee nganaa Yahuudiyankoo6e. Kambe bee kettinto!

[<sup>29</sup>‡]

<sup>30</sup>Pool wadii duubi didi ki6bi e ley suudu hasunoo nduu. Don o silminannoo warannoobee yeewde mo bee fuu, <sup>31</sup>omo waajoo Laamu Laamdo, omo jannginira cuusal kabaaru Iisaa Almasiihu Joomiraado oo, walaa kaafudo mo.

\* <sup>28:11</sup> E oon jamaanu, summbo6e laanaaji mbii kanji ndeenata dum'en. † <sup>28:27</sup> Esaaya 6.9-10 ‡ <sup>28:29</sup> E dereeji 6ooydi dii, yoga ana 6eyda aaya 29:Nde Pool haalnoo dii haalaaji ndee, Yahuudiyankoo6e bee mbitti ana ndukida hakkunde mum'en semmbe.

## Bataaki Pool faade e Romankoobe

<sup>1</sup> Oo bataaki ga am iwri, miin Pool. Mi maccudo Iisaa Almasiihu, mi noddaado faa mi laatoo nellaado mum, mi cu6aado faa mi yottina Kabaaru Laamdo Lobbo oo. <sup>2</sup> Oon Kabaaru Lobbo, Laamdo fodiriino mo gila arannde annabaabe mum e ley Binnadi ceniidi dii. <sup>3</sup> Kabaaru oo haala Biyiko haalata, iwd e Daawuuda banngal 6ii-aadamaaku mum, <sup>4</sup>banngal Ruuhu Ceniido oo holliraa mo Bii Laamdo Jom Baawde ko o immitii e maayde koo. Kanko woni Joomiraado men Iisaa Almasiihu, <sup>5</sup> saabe makko kefir-mi moyyere laataade nellaado faa goondinbe dowtaniise mo kebee ley lepi dii fuu, yalla innde makko ndee ana teddinee. <sup>6</sup> Onon wonbe Roma bee duu, odon njeyaa e maabbe, onon 6e Laamdo noddi faa kaab6o-don e Iisaa Almasiihu bee. <sup>7</sup> Mido jowta on fuu, onon 6e Laamdo horsini, onon 6e Laamdo noddi faa laato-don seniibe. Yo on kebu moyyere e jam iwde e Baabiraado men Laamdo e Joomiraado men Iisaa Almasiihu.

### No Pool yiidiri yiide goondinbe wonbe Roma bee

<sup>8</sup> Ko adii fuu, mido yetta Laamdo e innde Iisaa Almasiihu saabe moodon on fuu, sabi haala goondinal mon haalaama e aduna oo fuu. <sup>9</sup> Laamdo mo ndewiran-mi 6ernde laabund e ley ko njottinan-mi Kabaaru Lobbo haala Biyiko oo koo, o seede mido miccitoo on wakkati fuu <sup>10</sup> e ley duwaawuuji am fuu. Mido jaagoo Laamdo newnana kam laawol e ley muuyde muudum no mi warda to mon. <sup>11</sup> Sabi mido yidi yiide on sanne, yalla ana daja ko njottin-mi on e dokkal ngal Ruuhu hokkata ngal faa niibina on. <sup>12</sup> Mi beyda hen: yalla goondinal ngal ndeentu-den e mum ngal ana hokka en fuu semmbe. <sup>13</sup> Sakiraabe, mido yidi anndon: cili kuurdi nga6u-mi anniya mi waran to mon, yalla ana daja 6e kebu-mi hakkunde mon no kefir-mi yimbe hakkunde lepi goddi dii nii, kaa faa jooni mi hebaali warde. <sup>14</sup> Waajibi mi yaha to yimbe fuu, joodiibe e fer6e, janngube e 6e njanngala. <sup>15</sup> Dum saabanii kam yidude yottinde on, onon Romankoobe bee duu Kabaaru Lobbo haala Almasiihu oo.

### Haala baawde Kabaaru Lobbo oo

<sup>16</sup> Mi yaagortaako Kabaaru Lobbo oo, sabi o baawde Laamdo, omo waawi hisinde goondindo mo fuu: Yahuudiyankoo6e tafon, caggal dum, lepi goddi dii duu. <sup>17</sup> Sabi Kabaaru Lobbo oo 6annginta no Laamdo nanngirta neddo pooccitiido yeeso mum - goondinal tan wadata dum, iwde e fuddoode yaade e timmoode, no Binnadi dii mbiiri nii: «Pooccitiido uuwardan goondinal.»\*

### Haala tikker Laamdo faade e yeddu6e

<sup>18</sup> Tikkere Laamdo ana 6annga iwde dow kammu ana jippoo e yeddu6e e oojii6e fuu 6e oojaaare mum'en deddata goonga oo bee, <sup>19</sup> sabi ko neddo waawi anndude e Laamdo koo ana laabani 6e, Laamdo jaati 6annginani 6e dum. <sup>20</sup> Sabi gila Laamdo tagi aduna oo faa hannde, golle mum ana 6anngina sifa mum mo yiyataake oo faa laabaa, dum woni baawde makko faa abada dee e allankaaku makko oo. Saabe dum, yeddu6e mo 6ee ngalaa dadfirlag fey. <sup>21</sup> Fay so taweede e6e anndi Laamdo, 6e tediniraali dum no foti tedinireede nii, 6e njettaali mo duu. Millooji maabbe dii laatike 6oli, fay ko 6e anndi seeda koo duu ni66ii. <sup>22</sup> E6e njaara 6e hakkilante'en, kaa 6e kaandii. <sup>23</sup> Be loomtinirii teddeengal Laamdo duumiido oo tooruuii nanndu6i e yimbe maayoob6e e pooli e daabaaji dii koyde nay e foggi leydi.

<sup>24</sup> Saabe dum, Laamdo daldi 6e e cob6e no yonkiji maabbe dii njisiri nii faa 6e koyni terde maabbe, kambe e ko'e maabbe. <sup>25</sup> Be loomtinirii Laamdo goongaraajo oo fenaande, 6e tedinii ko tagaa 6e ndewii dum, 6e njoppii Tagudo oo. Yo jetto6e ngoodan mo faa abada! Aamiina. <sup>26</sup> Saabe dum, Laamdo daldi 6e e gidaade yonki maabbe kersiniide. Rew6e maabbe 6ee njoppii lelde wor6e mum'en dee, ndeentii e rew6e hono mum'en faa woortondiri e no Laamdo muuyrunoo dum nii. <sup>27</sup> Hono non wor6e 6ee duu njoppii waaldude e rew6e faa ngatti muuyondirde. Wor6e ana ngafondira ko hersinii. Be njukkaama kambe e ko'e maabbe jaati hakke majjere maabbe.

<sup>28</sup> Saabe ko 6e mijjino6 anndude Laamdo walaa ko nafata koo, Laamdo daldi 6e e majjere maabbe, faa 6e ngadi ko neddo haanaa wafude. <sup>29</sup> Be oojii6e, 6e balee6e yonki, e6e keewi joote e comndam fuu, kajum e haasidaaku e war-hoore e poodondiral e jammiba e anniya bondo. Be no'oo6e yimbe, <sup>30</sup> 6e njoo6e yimbe, 6e wajub6e Laamdo, 6e hoynoo6e yimbe, 6e mawninkini6e, 6e mantotoob6e, 6e seebanbe ko boni, 6e murtir6e saaraabe maabbe, <sup>31</sup> 6e ngalaa hakkillie, 6e nganaa hoolni6e, 6e yoor6e gerde, 6e ngalaa yurmeende. <sup>32</sup> Fay so

taweede ebe anndi Laamdo yamirii gadoowo hono dee kulle fuu ana haandi e maayde, 6e kaadataa e waafude de tan, ebe njabani duu gadoowo de fuu.

## 2

### *Haala jukkungo Laamdo*

<sup>1</sup> Ndennoo, aan peloowo wobbe oo, ko mbaaw-daa laataade fuu a walaa dadirgal. Sabi so a felii wobbe tawi golle moodon yo gooto, a libii hoore maa. <sup>2</sup> Efen anndi Laamdo ana sarira golliroofe hono dii golleeji bee ko waarata e goonga oo. <sup>3</sup> Hey! Aan peloowo gollooofe hono dii golleeji bee tawee hono non ngollirtaa, tama ada sikki a dadan sarri jukkungo Laamdo ngoo? <sup>4</sup> Naa a jawdo moyyuki Laamdo mawki kii, kapum e mujal mum e sawraare mum? Tama a anndaa Laamdo ana holle moyyuki mum yalla ada tuuba? <sup>5</sup> Kaa ko a joordo bernde a caliido tuubude koo, ada waddana hoore maa tikkere Laamdo hannde Laamdo bannginta tikkere mum e sariya mum pooccitiido oo. <sup>6</sup> Sabi Laamdo barjoto gooto fuu golle mum. <sup>7</sup> Tewtooße darja e teddeengal e ko duumotoo, tewtiroofe dum mujal ley golle lobbo bee kefan nguurndam nduumiidam. <sup>8</sup> Kaa haasidi'en saliibé goonga so ana kabbii e bonannda bee, jukkungo naawngo kebata. <sup>9</sup> Torra e wemmbere ngooodanii gadoowo ko boni fuu: Yahuudiyankoobe tafon, leji goddi njokka hen. <sup>10</sup> Darja e teddeengal e jam ngooodanii gadoowo ko moyyi fuu, Yahuudiyankoobe tafon, leji goddi njokka hen. <sup>11</sup> Sabi Laamdo gurdintaa yimbe.

<sup>12</sup> Laamdo jukkan luuttoobe 6e nganaa Yahuudiyankoobe, fay so 6e anndaa Sariya Muusaa oo. Kasen duu luuttoobe so tawi ana anndi Sariya Muusaa oo, carirte Sariya oo. <sup>13</sup> Neddo nanngirtaake pooccitiido yeeso Laamdo e hettinaade Sariya tan, jokkude Sariya oo wadata so nanngiree pooccitiido. <sup>14</sup> Be nganaa Yahuudiyankoobe bee, kambe e waasude anndude Sariya Muusaa oo fuu, so 6e ngadiriil no Sariya Muusaa oo wiiri nii, 6e kollii ebe njogii sariya e ley hakkillaaji maabbe kambe e ko'e maabbe fay so 6e ngalaa Sariya Muusaa oo. <sup>15</sup> Be kollii ko Sariya Muusaa oo yamir koo ana wiinndaa e berde maabbe. Hakkillaaji maabbe ceediima dum, wakkatiji ebe anndi ley miilooji maabbe 6e ngadii ko boni, wakkatiji ebe anndi 6e ngadii ko moyyi. <sup>16</sup> Dum woni ko gangoya jannde Laamdo yamirta lisaai Almasihu sara ko suufii ley berse koo, sarira dum no Kabaaru Lobbo mo mbaajootoo-mi oo wiiri nii.

### *No Yahuudiyankoobe ngorri e Sariya Muusaa*

<sup>17</sup> Aan, so a wii a Yahuudiyanke, a tuugike Sariya Muusaa oo, a mantorike Laamdo, <sup>18</sup> ada anndi sago Laamdo, a jannginaado Sariya Muusaa oo faa mbaaw-daa subaade ko moyyi, <sup>19</sup> a taylorii a dowooowo wumbe, a fooyre wonbe e nimre bee, <sup>20</sup> ada waajoo 6e njanngaali bee, ada janngina sukaabe saabe ko njogi-daa anndal e goonga faa hiibbi e ley Sariya Muusaa oo koo - <sup>21</sup> ada tinndina wobbe, ndennoo a tinndintaa hoore maa naa? Ada waajoo pati wujjee, a wujjataa naa? <sup>22</sup> Ada wiya pati jeenee, a jeenataa naa? Ada harmina tooruuji, a wujjataa ley to di ndewetee too naa? <sup>23</sup> Aan mantortoodo Sariya Muusaa oo, a luuttataa mo koynaa innde Laamdo ndee naa? <sup>24</sup> Dum wadi so Binndi dii mbii: «Onon ngadi so 6e nganaa Yahuudiyankoobe bee ana mbonkoo innde Laamdo ndee.»\*

<sup>25</sup> Sabi taadagol ana waawi nafude ma so ada haybi Sariya Muusaa oo, kaa so a yaabii Sariya Muusaa oo, a laatike hono mo taadaaki nii. <sup>26</sup> So mo taadaaki haybii jamirooje Sariya Muusaa dee, yalla waasude taadaade makko hiiisataake no o taadiido nii naa? <sup>27</sup> Mo taadaaki kaybudo Sariya Muusaa oo ana sare aan luuttudo Sariya oo, fay so a taadiido anndudo Binndi dii. <sup>28</sup> Sabi wanaa ko yiyyetee koo wadata neddo Yahuudiyanke jaati, wanaa ko golletee e terde koo woni taadagol. <sup>29</sup> Ko yiyyataake koo wadata neddo Yahuudiyanke jaati, taadagol duu ley bernde neddo tawetee. E Ruuhoo oo dum fawii, wanaa e binndi dii. Neddo baado non, wanaa yimbe njettata dum, Laamdo yettata dum.

## 3

<sup>1</sup> Ndennoo, kodum Yahuudiyanke gurdi leji goddi dii? Kodum woni nafaa taadagol? <sup>2</sup> Nafaa taadagol ana heewi e alhaalijji dii fuu. Ko adii fuu, Yahuudiyankoobe kalfinaa konngol Laamdo ngol. <sup>3</sup> Kaa so yoga maabbe nganaa hoolniibe, dum ana waawi bonnude ko Laamdo yo koolniido koo naa? <sup>4</sup> Waawaa! Fay so yimbe fuu yo fenoobe, Laamdo kaa yo goongirante. Sabi nii winndorii:

«Fooccitaare maa ana annditee  
e ko kaalataa koo,  
so a sardaama a liban.»\*

\* 2:24 Esaaya 52.5 \* 3:4 Jabuura 51.6

<sup>5</sup> Doo mido haalda no yimbe nii: so oojaa men ana beyda 6annginde fooccitaare Laamdo ndee, dum ana wada so mbiyen Laamdo yo oopiido so jippinii e men tikkere mum naa?  
<sup>6</sup> Fes! Sabi so Laamdo yo oopiido, hono o sarirta aduna oo? <sup>7</sup> So tawii fenaande am ana beyda 6annginde goonga Laamdo oo edum teddina mo, saabe kodum carirtee-mi mi luuttoowo? <sup>8</sup> Won no'oobe en wiyoobe eden mbiya: «Ngaden ko boni yalla ko moyyi ana funta hen.» Been yimbe, jukkungo mum'en ana foti e golleeji mum'en.

#### No yimbe fuu ndonkiri laataade fooccitiibe

<sup>9</sup> Ndennoo, enen Yahuudiyankoobe bee, eden furi heddiibe bee naa? En suraa. Sabi mi holpii Yahuudiyanke e mo wanaa Yahuudiyanke fuu e ley luutti ngoni,<sup>10</sup> no Binndi dii mbiiri nii:

«Walaa fuu pooccitiido, fay goto,

<sup>11</sup> fay goto walaa faamu,  
fay goto tewtataa Laamdo.

<sup>12</sup> Yimbe fuu yo majjuube, fuu yo bonbe,  
walaa fuu gadoowo ko moyyi, fay goto.»<sup>†</sup>

<sup>13</sup> «Kundude maabbe ana mba'i no janaale udititiide nii,  
demde maabbe ana mbowla pene bonde.

Toni maabbe ana caawi tooke posoke.»<sup>‡</sup>

<sup>14</sup> «Haala maabbe fuu yo kuddi e konngi mettudi.»<sup>§</sup>

<sup>15</sup> «Koyde maabbe ana njaawani yuppude yiyyam,

<sup>16</sup> bonannda e kunkoo ana jokki e maabbe to 6e njahata fuu,

<sup>17</sup> 6e anndaa laawol jam.»<sup>\*</sup>

<sup>18</sup> «Kulol Laamdo walaa e 6erde maabbe fey.»<sup>†</sup>

<sup>19</sup> Eden anndi huunde fuu ko Sariya Muusaa oo wii, wonbe e ley mum 6ee haaldi, yalla kundude fuu ana mu6soo, yimbe aduna fuu paama potii e jukkungo Laamdo. <sup>20</sup> Sabi fay goto nanngirtaake pooccitiido yeeso Laamdo saabe haybude mum Sariya Muusaa oo, sabi walaa ko Sariya Muusaa oo waawi so wanaa anndinde yimbe ko woni luuttal.

#### No yimbe laatortoo fooccitiibe yeeso Laamdo

<sup>21</sup> Kaa jooni Laamdo 6annginii no nanngirtaake yimbe fooccitiibe ko wanaa haybude mum'en Sariya Muusaa - no Sariya oo e dewte annabaabe dee ceedorii nii: <sup>22</sup> o nanngiran goondinbe bee fuu fooccitiibe saabe goondinal mum'en lisaa Almasiihu. Sabi walaa ko burdini yimbe: <sup>23</sup> yimbe fuu luutti, ngalaa ngedu e annoora Laamdo. <sup>24</sup> Kaa Laamdo nanngirii 6e fooccitiibe meere meere kammari hinnee mum. O wadii dum saabe lisaa Almasiihu coottitiido 6e oo. <sup>25</sup> Oon Laamdo fodi hokkitirde yonki mum faa yaafuu luutti goondinbe dum, saabe yiyyam mum dam. Hono non Laamdo hollii fooccitaare mum, fay so jukkaalino luuttoobe arannde <sup>26</sup> saabe mujal mum. O wadirii dum faa o 6anngina fooccitaare makko wakkati mo ngen-den e mum oo, yalla omo holla o pooccitiido, kasen neddo fuu goonfindo lisaa, o nanngiran dum pooccitiido.

<sup>27</sup> Ndennoo, kodum fuu woni daliili wasu mo neddo heddoi? Fay goto! Haybude Sariya Muusaa oo saabii dum naa? Wanaa! Goondinal tan saabii dum! <sup>28</sup> Sabi miden anndi neddo goondinal mum nanngirtee pooccitiido, wanaa saabe haybugol mum Sariya Muusaa oo. <sup>29</sup> Naa Laamdo yo Laamdo Yahuudiyankoobe tan? Wanaa kanko woni Laamdo lejni goddi dii duu naa? Kanko jaati woni Laamdo lejni goddi dii duu, <sup>30</sup> sabi Laamdo gooto woodi, nanngiroovo taadiibe bee fooccitiibe saabe goondinal mum'en, 6e taadaaki bee duu o nanngiran dum'en fooccitiibe saabe goondinal mum'en. <sup>31</sup> Ndennoo, min ittiroobe Sariya Muusaa oo goondinal naa? Fes! Min ittaali mo, min tabintinbe mo!

## 4

#### Haala goondinal Ibarahiima

<sup>1</sup> Kodum mbiyaten e Ibarahiima njaati men oo? <sup>2</sup> So tawiino nii mo laatike pooccitiido saabe golleeji makko dii, nden omo waawi mantaade. Kaa mo waawaaw mantaade yeeso Laamdo. <sup>3</sup> Sabi Binndi dii mbii: «Ibarahiima goondinii Laamdo, Laamdo jatorike mo saabe majjum mo pooccitiido.»<sup>\*</sup> <sup>4</sup> Golloowo, njo6di mum jatortaake wadaneede moyyre, dum tilsudum. <sup>5</sup> Kaa mo fawataa jikke mum e golleeji mum lobbi, pawoowo jikke oo e goondinde Laamdo baawdo nanngirde yeddube fooccitiibe oo, kanko, Laamdo jatorto mo saabe goondinal makko ngal mo pooccitiido. <sup>6</sup> Nii Daawuuda siforii mbelko'aaku neddo mo Laamdo jatorii pooccitiido tawi walaa golleeji lobbi:

<sup>7</sup> «Be boofi mum'en njaafaa,

<sup>†</sup> 3:12 Jabuura 14.1-3; 53.2-4    <sup>‡</sup> 3:13 Jabuura 5.10    <sup>§</sup> 3:14 Jabuura 10.7    <sup>\*</sup> 3:17 Esaaya 59.7-8    <sup>†</sup> 3:18 Jabuura 36.2    <sup>4:3</sup> Puddooode 15.6

6e luutti mum'en tosaa,  
mbelii hoore.

<sup>8</sup> Neddo mo Joomiraado hiisaaki luutti mum,  
welii hoore.»<sup>†</sup>

<sup>9</sup> Tama taadiiße 6ee tan njey oon mbelko'aaku? Tama 6e taadaaki 6ee ngalaa hen? Tama wanaa saabe goondinal Laamdo jatorii Ibarahiima yo pooccitiido? <sup>10</sup> Ndennoo, hono Ibarahiima worrunoo nde nanngiraa pooccitiido ndee? O taadiido naa o wanaa? O nanngiraama o pooccitiido gila o taadaaki. <sup>11</sup> Taadagol makko duu yo maande holloore fooccitaare makko ndee saabe goondinal o hebiri gila o taadaaki. Hono non, o laatorii njaati goondinße 6e taadaaki 6ee fuu, yalla 6een duu ana njateree yo fooccitiife. <sup>12</sup> Kasen kanko woni baaba taadiiße 6e kaadaali e taadagol tan, jokkuuße laawol makko, kanko baaba men Ibarahiima goondindo Laamdo gila taadaaki oo.

### *Haala ko Laamdo fodani Ibarahiima*

<sup>13</sup> Laamdo fodanii hokkude Ibarahiima e iwdi mum aduna oo. Wanaa kammari Ibarahiima ana jokki Sariya oo Laamdo fodiri dum, o fodirii dum kammari fooccitaare nde o hokkiri Ibarahiima saabe goondinal mum ndee. <sup>14</sup> Sabi so tawii jokkude Sariya ana hey a neddo faa hokkee ko fodaan koo, goondinal laatik meere, fodoore ndee duu nafataa. <sup>15</sup> Sabi Sariya oo jukkungo Laamdo waddata, kaa do sariya walaa, boofi duu ngalaa.

<sup>16</sup> Ndennoo, fodoore Laamdo ndee e goondinal fawii, yalla ende laatoo moyyere makko, nde tabitana iwdi Ibarahiima fuu, wanaa jokkuuße Sariya see tan, nde tabitana goondinirbē no Ibarahiima goondiniri nii 6ee fuu. Kanko woni njaati meeden en fuu <sup>17</sup> yeeso Laamdo, no winndorii nii: «Mi wadii ma baaba lepi keewdfi.»<sup>‡</sup> Ibarahiima goondinii Laamdo guurtinoowo maaybē, biyoowo ko woodaa yo laato. <sup>18</sup> Do Ibarahiima haannoo tayude jikke doo, don fawi jikke goondini, nii laatorii baaba lepi keewdfi no Laamdo wiirunoo mo nii: «Hono nii iwdi maa fotata.»<sup>§</sup> <sup>19</sup> Ibarahiima duubi mum ana mbaara e teemedere, kaa goondinal makko lo'aali nde o yiinoo terde makko naywii. Saaratu jom suudu makko oo duu naywii yawtii rimde. <sup>20</sup> O sikkitaaki fodoore Laamdo ndee, ko laatii dee, goondinal makko heydii hebude semmbe, mo teddini Laamdo, <sup>21</sup> sabi o taylorii Laamdo ana waawi tabintinde fodoore mum. <sup>22</sup> Saabe dum, «Laamdo jatorii mo o pooccitiido.» <sup>23</sup> Ko Binndi dii mbii «Laamdo jatorii mo o pooccitiido» koo, wanaa kammari makko tan winndorii, <sup>24</sup> ana winndorii kammari meeden enen duu, enen warooße jatoreede en fooccitiife, goondinße Laamdo guurtindo Joomiraado men lisaa e hakkunde maaybē oo, <sup>25</sup> oon bardaado saabe luutti men, guurtiniraado yalla eden nanngiree en fooccitiife.

## 5

### *Haala jam hakkunde men e Laamdo*

<sup>1</sup> Nde wonnoo en nanngiraama fooccitiife saabe goondinal, jam wadii hakkunde men e Laamdo kammari Joomiraado men lisaa Almasiihu. <sup>2</sup> Kanko udditani en damal hinnee Laamdo mo ngon-den e mum jooni oo, dum laatorike saabe goondinal men ngal. Eden ceyoroo jikke hebude ngedu e annoora Laamdo. <sup>3</sup> Wanaa dum tan, eden ceyoroo torraaji men duu sabi eden anndi torraaji ndimata mujal, <sup>4</sup> mujal ngal rima neddaaku oo rima jikke. <sup>5</sup> Jikke oo noo fuurataa, sabi Ruuhu Ceniido mo ndokke-den oo hebbiniani en jilli Laamdo dii.

<sup>6</sup> Sabi nde in ngalaano semmbe ndee, nden Almasiihu maayani en, enen yedduße Laamdo, e ley wakkati mo Laamdo subii oo. <sup>7</sup> Ana tiidi neddo jaabā maayande goddo fay so oon yo pooccitiido, ana moyya neddo jaabā maayande neddo moyyo. <sup>8</sup> Kaa Laamdo tabintinanii en jilli mum e men ko Almasiihu maayani en gila en luuttooße koo. <sup>9</sup> Jooni ko nanngira-den en fooccitiife saabe yiyyam makko dam koo, tayoral en ndafan e jukkungo Laamdo ngoo saabe makko. <sup>10</sup> Sabi nde ngonno-den en konnee'en Laamdo ndee, Laamdo rewrintinii en e mum saabe maayde Biyum oo ndee. Ko ndewrintina-den e makko jooni koo, tayoral en kisinirte saabe ngyuurudam Biyyiko oo dam. <sup>11</sup> Kasen duu eden ceyoroo Laamdo saabe Joomiraado men lisaa Almasiihu, dewrintindo en e Laamdo oo.

### *No Aadama nannditirta e Almasiihu garoynoonoo oo*

<sup>12</sup> Jooni, saabe neddo gooto luutti naatiri e aduna oo, kasen duu luutti dii ngaddi maayde. Non maayde ndee yottorii yimbe fuu, sabi 6e fuu 6e luutti. <sup>13</sup> Gila Sariya Muusaa oo jippinaaka, luutti ana ngoodi e aduna oo, kaa so sariya walaa, luutti kiiisataake. <sup>14</sup> Gila e Aadama faa e Muusaa, walaa fuu mo maayde heerii. Fay 6e luuttiraali no Aadama luuttuso yamiroore Laamdo 6ee nii duu maayan. Oon Aadama ana nanndita e garoyoowo oo.

<sup>†</sup> 4:8 Jabuura 32.1-2

<sup>‡</sup> 4:17 Puddoode 17.5

<sup>§</sup> 4:18 Puddoode 15.5

<sup>15</sup> Kaa en kaanaa fonndude luuttal Aadama e dokkal Laamdo. Goonga, yimbe heewbe maayii saabe luuttal neddo gooto, kaa hinnee Laamdo 6uri fuu mawnude, kajum e moyyere nde o wadani yimbe heewbe saabe neddo gooto ndee, dum woni Iisaa Almasiihu. <sup>16</sup> Kasen duu en kaanaa fonndude ko dokkal Laamdo waddata koo e ko luuttal neddo gooto waddata koo. Sabi sariya banngal luuttal neddo gooto jukkungo waddi, kaa moyyere Laamdo mawnde caggal luutti keewdi wadi faa yimbe nanngiraa fooccitiibe. <sup>17</sup> Ko luuttal neddo gooto (dum woni Aadama) waddani maayde laamaade yimbe koo, taylor heboobee hinnee Laamdo keewdo hokkaabe fooccitaare bee, kajum'en laamoto ley nguurndam saabe neddo gooto (dum woni Iisaa Almasiihu).

<sup>18</sup> Ndennoo, no luuttal neddo gooto waddirani yimbe fuu jukkungo nii, hono non kasen golle pooccitiido mo neddo gooto golli wadirta yimbe fuu nanngiree fooccitiibe hokka dum'en nguurndam. <sup>19</sup> No salaare neddo gooto wadiri yimbe heewbe luuttoobe nii, hono non dowtaare neddo gooto duu wadiroyta heewbe nanngireede fooccitiibe.

<sup>20</sup> Sariya Muusaa oo wardii faa luutti 6eyda annditeede, kaa do luutti keewi fuu, don hinnee Laamdo 6urata fuu heewde. <sup>21</sup> Hono no luuttal laamorii saabe maayde ndee nii, hono non hinnee Laamdo oo duu laamoroyto saabe fooccitaare ndee faa naaba en to nguurndam nduumiidam dam Joomiraado men Iisaa Almasiihu hokkata en dam.

## 6

### *Haala maaydude e Almasiihu e wuurtidinde e mum*

<sup>1</sup> Ndennoo, kodum mbiyaten? En keddoto e luuttal yalla hinnee Laamdo oo ana beydoo naa? <sup>2</sup> Dum waawaa laataade! En maaybe banngal luutti, dum woni en ceertii e majji. Ndennoo hono mbaawraten kasen wuurd e ley luutti? <sup>3</sup> Odon anndi lootogal men batisima kabbungal en e Iisaa Almasiihu ngal haabii en e maayde mum duu. <sup>4</sup> Ndennoo, e ley batisima oo en maaydii e makko en irdaama e makko, yalla no Almasiihu wuurtiri e hakkunde maaybe saabe baawde Baabiraado teddude dee nii, enen duu eden nguurda non nguurndam kesam. <sup>5</sup> E ley dum, no ndeentir-den e makko maayde nanndund e nde makko ndee nii, hono non ndeentirten e makko immital nanndungal e ngal makko ngal. <sup>6</sup> Sabi eden anndi ko hiiddi ko woni ley men koo tontidaama e makko dow leggal bardugal, yalla terde men luuttojoje dee ana kalkoo, tonngite-den iwde e tonngodee luuttal. <sup>7</sup> Sabi maaydo tonngitaama iwde e tonngodee luuttal, nanngiraama pooccitiido. <sup>8</sup> Ko maayduuden e Almasiihu koo, eden koolii en nguurdan e makko duu, <sup>9</sup> sabi eden anndi ko Almasiihu wuurti e hakkunde maaybe koo, maayataas kasen, maayde duu jaalataako mo kasen. <sup>10</sup> Sabi nde o maayi ndee, o tayii tonngodee luuttal cilol gootol keyoowol yimbe jamaanuuji dii fuu. Jooni e nguurndam makko dam, Laamdo o wuuranii. <sup>11</sup> Hono non, onon duu, laatee no maaybe nii banngal luuttal, no wuuranii Laamdo nii e haabagol mon e Iisaa Almasiihu ngol.

<sup>12</sup> Ndennoo, pati accee luuttal jaaloo terde mon maayooje dee faa njokkon gisaade majje. <sup>13</sup> Pati ndokkee caldi mon dii luuttal, pati ngadon di kaborde oojaaare. Ndokkee ko'e mon Laamdo. Kammari on maaynoobe, jooni kaa on wuurbii, ngadon caldi moodon dii kaborde fooccitaare. <sup>14</sup> Luuttal jaalataako on kasen, sabi on njottii taweede e ley Sariya oo, ko ngondon e mum dee, e ley hinnee Laamdo.

### *No yimbe laatortoo golloobe dowtaniibe fooccitaare*

<sup>15</sup> Kodum hen, ndennoo? En luuttan saabe e ley hinnee ngor-den wanaa e ley Sariya naa? Dum waawaa laataade! <sup>16</sup> Odon anndi so on ngadii ko'e mon e gollande neddo faa dowtandon dum, on laatiima maccube mo dowtanto-don oo. Ndennoo, naa on laatiima maccube luutti naabooji on e maayde, naa on dowtaniima Laamdo naaboowo on e fooccitaare. <sup>17</sup> Kaa jettooje ngoodanii Laamdo! Arannde e tonngodee luuttal ngonno-don, kaa jooni odon nii dowtorii berde laabude laawol ngol njannngine-don ngol. <sup>18</sup> On tonngitaama iwde e tonngodee luuttal, on laatike golloobe dowtaniibe fooccitaare ndee. <sup>19</sup> Mido haalda doo no yimbe paamirta nii kammari on njaawaali faamde. No ngadirno-don caldi mon dii e maral tuundi e ojaaare faa ngollu-don ko boni nii, jooni ngadiron non caldi mon dii e maral fooccitaare faa ngollon ko senii.

<sup>20</sup> Nde ngonno-don e tonngodee luuttal ndee, on laatanooki golloobe dowtaniibe fooccitaare. <sup>21</sup> Kodum kebuno-don e majjum? Fay huunde, so wanaa ko kersirton hande koo, sabi battane majjum yo maayde. <sup>22</sup> Kaa jooni, on tonngitaama iwde e tonngodee luuttal, on laatike gollanoobe Laamdo, odon nguura e senaare. Battane majjum yo nguurndam nduumiidam. <sup>23</sup> Sabi mbarjaari luuttal yo maayde, kaa moyyere nde Laamdo hokkata ndee yo nguurndam nduumiidam e ley haabagol men e Joomiraado men Iisaa Almasiihu.

## 7

*No yimbe tonngitirtee iwde e tonngooode Sariya*

<sup>1</sup> Sakiraabe, mido haaldana on no yimbe anndube Sariya Muusaa oo bee nii. Odon anndi faa laabi pac a neddo e ley Sariya tawetee so nii ana heddi wuурde. <sup>2</sup> Hono nii debbo 6amaado, sariya tonngi dum e gorum oo so nii gorko oo ana wuuri. Kaa so gorko oo maayii, mo tonngitaama iwde e sariya tonngunoodo mo oo. <sup>3</sup> So goddo 6amii mo e ley nguurndam goriiko oo, wiyyete mo jeenoowo. Kaa so goriiko oo maayii, sariya oo yoppitan mo, mo wiyyataake jeenoowo so mo 6amondirii e gorko goddo. <sup>4</sup> Sakiraabe am, onon duu on maayanii Sariya Muusaa, on iwie e ley mum kammari maayde Almasiihu ndee, on jeyaama e goddo, dum woni Almasiihu mo Laamdo wuurtini e hakkunde maaybe oo yalla eden ngolla ko welata Laamdo. <sup>5</sup> Wakkati nde ngonno-den e hiini hoore men ndee, gidaade yonki bonde de Sariya Muusaa oo tekkini dee ana ngolla e terde men faa naafa en to maayde. <sup>6</sup> Kaa jooni, en tonngitaama iwde e tonngooode Sariya Muusaa, sabi en maayii banngal Sariya tonngunoodo en oo faa mbaawen gollande Laamdo ley nguurndam kesam tuugiidam e Ruuhu oo, tawee dam tuugaaki e Sariya kiidoo binndaado oo.

*No Sariya Muusaa anndiniri ko woni luuttal*

<sup>7</sup> Ndennoo, kodum mbiyaten? Sariya Muusaa oo yo luuttal naa? Wanaa! Kaa noo, Sariya oo anndini kam ko woni luuttal. Sabi mi anndataano ko woni tuuyo so Sariya oo wiyaalino: «Pati tuuyye-daa!» <sup>8</sup> Luuttal ngal tuugike kadaadi dii, wadi e am sii tuuyooji fuu. Sabi so Sariya walaa, luutti dii yo baatudi. <sup>9</sup> Arannde, nde mi anndaaano Sariya oo ndee, miin, mido wuurnoo, kaa ko kadaadi dii ngari koo, luuttal laattii guurngal, <sup>10</sup> miin, maay-mi. Jamirooje kaannoode waddande kam nguurndam dee, laattii nabooje kam to maayde. <sup>11</sup> Sabi luuttal ngal tuugike kadaadi dii, yonji kam, wardi kam di. <sup>12</sup> Ndennoo, Sariya Muusaa yo ceniido, jamirooje dee duu yo ceniide yo pooccitiide yo moyyufe.

<sup>13</sup> Jooni, ko moyyi waddanii kam maayde naa? Waddanaali! Luuttal woni ko waddani kam maayde. Hono nii ngal annditirtee ngal luuttal jaati, sabi ngal nawtorike ko moyyi faa rima e am maayde. Ndennoo, saabe jamirooje dee luuttal ngal 6anngii ngal luuttal yaabbiitungal.

*No yimbe njogoraaki semmbe habude e luutti*

<sup>14</sup> Eden anndi Sariya Muusaa oo to Ruuhu Ceniido iwi. Kaa min mi neddo lo'udo mo luutti jaalii. <sup>15</sup> Sabi mi faamaali ko ngadan-mi koo: ko njidu-mi wafude koo, mi wadataa dum, kaa ko mbajuu-mi koo, dum ngadan-mi. <sup>16</sup> So mido wada ko mi yidaa koo, dum ana holla mi jaabii Sariya Muusaa oo ana moyyi. <sup>17</sup> Joonnoo, wanaa miin wadirta non, luuttal gonngal e am ngal wadirta non. <sup>18</sup> Mido anndi e ley am, dum woni e ley terde am, ko moyyi walaa e mum. Yifude wafude ko moyyi ana e am, kaa mi waawaau wafude dum. <sup>19</sup> Mi wadataa ko moyyi ko njidu-mi koo, ko boni ko mi yidaa koo ngadan-mi. <sup>20</sup> Kaa so mi wafii ko mi yidaa, wanaa miin gollirta non, luuttal gonngal e am ngal gollirta non. <sup>21</sup> Ko taykii-mi hen dee: wakkati fuu mido yidi wafude ko moyyi, kaa ko boni koo hu6indii kam. <sup>22</sup> To ley hakkille am too, Sariya Laamdo oo ana weli kam jaati, <sup>23</sup> kaa mido maata neesu bondo e ley terde am, ana haabaa e sariya gondo ley hakkille am oo. Neesu bondo oo ana wada kam maccudo luuttal gonngal e terde am ngal. <sup>24</sup> Hee mido yurminii! Homo waawi ittude kam e dee terde nabooje kam to maayde? <sup>25</sup> Jettooje ngodanii Laamdo saabe Joomiraado men Iisaa Almasiihu!

Ndennoo miin, e ley hakkille am mi gollanoowo Sariya Laamdo, kaa e terde am mi gollanoowo luuttal.

## 8

*Haala nguurndam kabbiidam e Ruuhu Laamdo*

<sup>1</sup> Jooni kaa, jukkungo fuu walaa e habbiibe e Iisaa Almasiihu 6ee, <sup>2</sup> sabi baawde Ruuhu dokkoje en nguurndam saabe Iisaa Almasiihu dee ittii en e baawde luuttal, kajum e maayde fuu. <sup>3</sup> Ko Sariya Muusaa ronki timminde saabe loore terde men koo, dum Laamdo timmini. Faa o tosa luutti o neldi 'Biyiiko jaati dow mbaadi nannundi e ndi 6iibbe aadama luuttoobe ndii. E mum o jukki luuttal gollowal e ley terde men ngal. <sup>4</sup> Dum fuu yalla laabhal ngal Sariya oo yamiri ngal ana hilba e meeden, enen jokkuue Ruuhu 6e njokkaali e gidaade yonki mum'en 6ee. <sup>5</sup> Haabbiibe e gidaade yonki 6ee, gidaade yonki miliata, kaa haabbiibe e Ruuhu 6ee, ko Ruuhu jey koo miilata. <sup>6</sup> Miilde gidaade yonki mum tan, maayde waddanta neddo, kaa noo, miilde ko Ruuhu jey koo, nguurndam e jam waddanta neddo. <sup>7</sup> Sabi miiloowo gidaade yonki mum tan yo gajoo Laamdo, sabi joomum dowitzantaako Sariya Laamdo oo, ko selli hen dee, waawaau jaati. <sup>8</sup> Haabbiibe e gidaade yonki 6ee mbaawaa welde Laamdo.

<sup>9</sup> Kaa onon, on kaabataako e gidaade yonki so Ruuhu Laamdo ana e mon, e Ruuhu oo kaboto-don. Neddo fuu mo walaa Ruuhu Almasiihu oo, waldaa e Almasiihu. <sup>10</sup> Kaa so Almasiihu wonii e mon, fay so taweede terde mon dee yo maayde saabe luuttal ngal, yonkiji mon dii kaa yo guurdii kammarii on nanngiraama fooccitiibe. <sup>11</sup> Laamdo guurtindo lisaa Almasiihu e hakkunde maaybe oo, so Ruuhu mum ana e mon, kajum jaati hokkata terde mon maayoope dee nguurndam, o hokkiran dum Ruuhu makko gondo e mon oo.

<sup>12</sup> Jooni kaa, sakiraabe, so won ko tiltsinte-den, wanaa jokkude gidaade yonki tiltsinte-den. <sup>13</sup> So on nguurdii no gidaade yonki ngorri nii fuu, on maayan. Kaa so on mbardii gidaade dee Ruuhu Laamdo oo, on nguuran. <sup>14</sup> Be Ruuhu Laamdo oo dowataa bee yo biibbe Laamdo. <sup>15</sup> Sabi Ruuhu mo Laamdo hokki on oo wadataa on maccube faa wartira on e kulol. Ko kebodon dee, Ruuhu gadoowo on biibbe Laamdo. Kanko wadata en noddiren Laamdo «Abba». <sup>16</sup> Ruuhu oo jaati, kajum e berde men dee ana ceedoo en biibbe Laamdo. <sup>17</sup> So en biibbe, en ronoobe duu. So en ronoobe ko Laamdo fodi koo, en rondoobe e Almasiihu. So eden torridee e makko, en kebidan e makko teddeengal duu.

### *Haala teddeengal garoyoowal*

<sup>18</sup> Mido anndi torraaji meeden hannde dii mbaawaa fonndeede e teddeengal ngal Laamdo 6annginanta en janngoo ngal. <sup>19</sup> Tagoore ndee fuu ana heppi jalaande nde Laamdo 6annginta teddeengal biibbe mum ndee. <sup>20</sup> Sabi tagoore ndee, baawde naabooje nde e meere laamotoo nde. Wanaa e sago mayre dum wadaa, Laamdo muuyrunoo dum non. Kaa jikke ana woodi, <sup>21</sup> sabi tagoore ndee tonngitete iwde e tonngooide nolgol, soottitee heba ngedu e teddeengal ngal biibbe Laamdo bee kebata ngal. <sup>22</sup> Sabi eden anndi, faa jooni tagoore ndee fuu ana uuma ana tampi e naawalla qatawera. <sup>23</sup> Wanaa dum tan, enen hebirbe Ruuhu Laamdo oo no dokkal Laamdo adiingal nii bee duu eden uuma, sabi eden keppi Laamdo soottitaaki terde men dee wada en biibbe mum. <sup>24</sup> Sabi e ley jikke kisina-den. Kaa jikke kebaado qootti laataade jikke, sabi neddo fwatawa jikke e ko hebi. <sup>25</sup> Kaa so eden pawa jikke e ko en kebaali tafon, en ndoomiran dum sawraare.

<sup>26</sup> Hono non Ruuhu oo waran walla en e loore men duu, sabi en anndaa no kaanden wadirde duwaawu nii. Kaa Ruuhu oo e hoore mum jaaganto en Laamdo, jaagoroo uumaali di mbaawaa sifeede e haalaaji. <sup>27</sup> Laamdo kumpitiido ko woni ley berde men oo duu ana anndi anniya Ruuhu, sabi e sago makko Ruuhu oo jaagirantoo seniibe bee.

<sup>28</sup> Edan anndi, yidube Laamdo noddiraabe anniya makko bee, Laamdo ana wada huunde fuu gollida faa laatanoo dum'en ko moyyi. <sup>29</sup> Sabi ee Laamdo anndi gila tagaaka bee, o hoddiranii dum'en nanndude e Biyiko oo, yalla Bidde oo ana laatoo hammadiijo sakiraabe heewbe. <sup>30</sup> Kasen duu ee o hoddirani bee, o noddii dum'en, ee o noddi bee, o nanngirii dum'en fooccitiibe, ee o nanngiri fooccitiibe bee, o hokkii dum'en ngedu mum'en e teddeengal makko.

### *Haala jilli Almasiihu*

<sup>31</sup> Caggal dum fuu, kodum mbiyat? So Laamdo ana wondi e men, homo waawi honude en? <sup>32</sup> Kanko, fay Biyiko oo e hoore mum mo hadaali en, o hokkitirii dum kammarii men en fuu. Fay huunde hadataa mo hokkude en ko moyyi fuu, o hokkida en dum e mum. <sup>33</sup> Homo naabataa ee Laamdo subii bee sariya? Fay gooto, sabi Laamdo nanngirii ee fooccitiibe! <sup>34</sup> Homo waawi liibude ee sariya? Walaa, sabi lisaa Almasiihu maayanii en, ko buri dum fuu, o wuurtanii en. Omo joodii jaamo Laamdo omo jaaganoo en. <sup>35</sup> Kodum waawi seenndude en e jilli di Almasiihu yidi en dii? Billaare naa, wemmbere naa, torra naa, yolbere naa, kolndam naa, farati naa, naa kaafaawi? <sup>36</sup> Nii Binndi dii mbiiri:  
«Saabe maa miden nii kosa maayde

jannde fuu,

miden nanngiraa no baali kirsoytedi nii.»\*

<sup>37</sup> Dum fuu e taweede, eden kebira jaalogal manngal saabe jidjo en oo. <sup>38</sup> Sabi mido taylori, wanaa maayde, wanaa nguurndam, wanaa malaa'ika'en, wanaa laamu, wanaa ko wari jooni, wanaa ko waroya, wanaa semmbe, <sup>39</sup> wanaa baawde gonde dow, wanaa gonde ley, wanaa huunde fuu ko tagaa, fay huunde waawaa seenndude en e jilli di Laamdo wadi e men dii e ley haabagol men e Joomiraado men lisaa Almasiihu.

## 9

### *Haala lepol ngol Laamdo suubi*

<sup>1</sup> Ko kaalan-mi doo koo yo goonga, sabi ko ngen-mi e Almasiihu koo kaaliran-mi, mi fenataa. Hakkille am mo Ruuhu Ceniido dowata oo, ana seedanoo kam <sup>2</sup> mboy-yonki cattudo, kajum e naawalla duumiido ana e am <sup>3-4</sup> saabe Israa'iilankooobe sakiraabe am bee.

\* 8:36 Jabuura 44.23

Mido yelinoo laataade kudaado mi seerta e Almasiihu miin e hoore am so ana nafannoo lepol am ngol. Kambe ngoni fe Laamdo wadi 6iibbe mum, holli fe teddeengal mum. Kambe njey aadiji dii e Sariya Muusaa oo. Kasen duu Laamdo anndinii fe no rewirtee, wadaniit fe podooje mum. <sup>5</sup> Lejol am yo iwdi maamiraabe Israa'iila aranndeebee bee, Almasiihu duu banngal 6ii-aadamaaku mum e lejol ngol iwi, kanko woni Laamdo, o tiimdo huunde fuu, yo yette faa abada. Aamiina.

<sup>6</sup> Dum wanaa wiide konngol Laamdo ngol laatike meere. Sabi wanaa iwbe e Israa'iila see fuu ngoni Israa'iilankoobe, <sup>7</sup> wanaa iwbe e Ibarahiima 6ee fuu ngoni 6iibbe mum jaati. Sabi Laamdo wii Ibarahiima: «Iwdi Isiyaaka ndii, kayri innditortoo innde maa.»<sup>\*</sup> <sup>8</sup> Dum woni: wanaa 6iibbe Ibarahiima rimiraabe no yimbe fuu ndimirtee nii ngoni 6iibbe Laamdo, rimiraabe saabe fodoore ndee 6ee nanngiraa no iwdi makko jaati nii. <sup>9</sup> Sabi Laamdo fodii dii konngi wii: «Mi wartan e hono oo wakkati mawuuri, Saaratu heban 6iddo gorko.»<sup>†</sup> <sup>10</sup> Wanaa dum tan. Rebekka duu 6amii reedu funeebe. Baaba maabbe yo Isiyaaka, maama men oo. <sup>11-12</sup> Gila 6iibbe bee ndimaaka sako 6e ngada ko moyyi naa ko boni, nden Laamdo wii Rebekka: «Mawniraado oo laatoto macculo mijiraado oo.»<sup>‡</sup> O wadirii non faa anniya makko banngal subagol tabita, dum woni: subagol makko ngol fawaaki e golle yimbe, e Laamdo noddoowo oo ngol fawii <sup>13</sup> no Binndi dii mbiiri nii: «Yaakuuba korsin-mi, Iisuuwa koynu-mi.»<sup>§</sup>

<sup>14</sup> Ndennoo, kodum mbiyaten? Laamdo yo oojiido naa? Fes! <sup>15</sup> Annii ko o wii Muusaa: «Mi hinnoto mo muuyi-mi hinnaade,

mi yurmoto mo muuyi-mi yurmaade.»<sup>\*</sup>

<sup>16</sup> Ndennoo, subagol makko fawaaki e sago neddo naa e golle mum, ko fawii e mum dee, dow Laamdo jurmotoodo oo. <sup>17</sup> Sabi e ley Binndi dii, Laamdo wii Fira'awna: «Ko ngadir-maa-mi kaananke dee, faa mi hollira baawde am e maa, kasen duu faa innde am oo yonee e aduna oo fuu.»<sup>†</sup> <sup>18</sup> Ndennoo, Laamdo yurmoto mo muuyi, yoornnan 6ernde mo muuyi.

<sup>19</sup> Ana moyya daja biido kam: «So non dum worri, kodum Laamdo felirta yimbe so fay gooto waawaa salaade muuyde makko dee?» <sup>20</sup> Aan neddo oo, kodum ngon-daa faa njeddaa Laamdo? Loonde mahaande ana wiya mahudo dum oo: «Ko saabii so mahir-daa kam nii?»

<sup>21</sup> Mahoowo loode ana waawi wafude e loope dee ko yidi fuu: e loopal gootal o maha loonde nde gollirtaake so wanaa e dow ko hensaa, o maha wonnde gollirteende ko wanaa ko hensaa. <sup>22</sup> Haya, fay so taweede Laamdo muuyii bannginde tikkere mum kajum e baawde mum, o mujanii 6e o tikkani bee mujal cattungal, sum woni haanduve e halkaade bee. <sup>23</sup> O wadirii nii faa o banngina annoora makko mawdo dow 6e o yurmotoo bee, 6e o lanndinianii gila ko 6ooyi yalla ana ke6a ngedu e annoora makko. <sup>24</sup> Been yimbe ngoni enen 6e o noddi bee, wanaa ley Yahuudiyankoobe see tan, ley leji godsi dii duu. <sup>25</sup> Nii Laamdo wiiri dum e dewtere annabi Hosee'a:

«Lejol ngol wanaa lejol am ngol,  
mi noddiroyan ngol lejol am,

yimbe 6e korsinaaka bee,  
mi noddiroyan 6e yimbe am horsu6e.

<sup>26</sup> Kasen duu do 6e mbiyeteno 6e nganaa yimbe am doo,  
don 6e mbiyoytee 6iibbe Laamdo guurdo oo.»<sup>†</sup>

<sup>27</sup> Annabi Esaaya duu haalii haala Israa'iilankoobe, wii: «Fay so 6iibbe Israa'iila keewiri no njaareendi geeci nii, seeda maabbe tan hisintee, <sup>28</sup> sabi Joomiraado tabintinan konngol mum faa hi6a e leydi ndii ko yaawi.»<sup>§</sup> <sup>29</sup> Kasen duu nii Esaaya wiirunoo gila arannde: «Sinndo Joomiraado Jom Semmbe oo daldaalino en iwdi,  
tawanno en laatike no ngeenndi Sodooma nii, en nanndii e ngeenndi Gomoora.»<sup>\*</sup>

#### No Laamdo nanngirta goondinbe Iisaa bee fooccitiibe

<sup>30</sup> Ndennoo, kodum mbiyaten? Ko mbiyaten annii: yimbe 6e nganaa Yahuudiyankoobe fe tewtaalino nanngireede fooccitiibe yeeso Laamdo 6ee, been kefi fooccitaare, dum woni fooccitaare saabe goondinal. <sup>31</sup> Israa'iilankoobe tewtunoobe nanngireede fooccitiibe yeeso Laamdo saabe jokkude Sariya 6ee ndonkii hebude nanngireede fooccitiibe. <sup>32</sup> Ko saabii? Saabe 6e tewtiraali dum goondinal, golle maabbe 6e tewtiri dum faa 6e pergitii e «haayre fergitoore ndee» <sup>33</sup> no haala kaa hippiraa ley Binndi dii nii:

«Mi fawan e Siyona haayre nde yimbe pergitotoo e mum so lifa dum'en.  
Kaa goondindo nde fuu hersataa abada!»<sup>†</sup>

\* 9:7 Puddooode 21.12    † 9:9 Puddooode 18.10,14    ‡ 9:11-12 Puddooode 25.23    § 9:13 Malakiya 1.2-3    \* 9:15 Pergu 33.19    † 9:17 Habaakuk 9.16    ‡ 9:26 Hosee'a 2.25; 2.1    § 9:28 Esaaya 10.22-23    \* 9:29 No Sodooma e Gomoora kalkiraa nii winndaama e ley Puddooode 19.1-29    † 9:33 Esaaya 28.16

## 10

<sup>1</sup> Sakiraafé, ko njidu-mi e 6ernde am jaati, e ko naagotoo-mi Laamdo: Israa'iilankooбе kisinee. <sup>2</sup> Midо seedanoo 6e ege kirana Laamdo sanne, kaa kiram maabbe dam waldaa e faamu. <sup>3</sup> Be paamaali fooccitaare nde Laamdo hokkata neddo ndee, faa 6e piyani ko'e maabbe dabare laataade fooccitiibe. Hono nii 6e dowtanaaki sariya mo Laamdo darni faa nanngira neddo pooccitido oo. <sup>4</sup> Sabi Almasihihi woni timmoodie Sariya Muusaa oo, yalla goondindo Almasihihi fuu ana nanngiree pooccitido.

*No kisindam woodirani goondindo Almasihihi fuu*

<sup>5</sup> Ko Muusaa winndi banngal fooccitaare iwnde e Sariya ndee annii: «Neddo fuu jokkuudo Sariya oo, w提醒 dan saabe Sariya oo.»<sup>\*</sup> <sup>6</sup> Kaa ko fooccitaare iwnde e goondinal ndee wii koo: pati wii e 6ernde maa «Homo njabbata dow kammu?» Dum woni faa jippina Almasihihi, <sup>7</sup> naa «Homo yahata laakaraa?» Dum woni faa immintina Almasihihi e hakkunde maaybe. <sup>8</sup> Ndennoo, kodum fooccitaare iwnde e goondinal wiyata? Dum doo nde wiyata: «Konngol Laamdo ana badi maa, engol e hunduko maa, engol e 6ernde maa.»<sup>†</sup> Ngol konngol woni kabaaru goondinal ngal min mbaajotoo ngal. <sup>9</sup> So a seedorike hunduko maa Iisa yo Joomiraado, a goondinii e 6ernde maa Laamdo w提醒 urtinii mo e hakkunde maaybe, a hisinte. <sup>10</sup> Sabi goondindo e ley 6ernde mum, Laamdo nanngiran dum pooccitido, ceedorido hunduko mum, Laamdo hisinan dum<sup>11</sup> no Binndi dii mbiiri nii: «Goondindo mo fuu hersataa.» <sup>12</sup> Jooni, walaa ko seenndi Yahuudiyanke e mo wanaa Yahuudiyanke, 6e fuu 6e Joomiraado gooto, o kebbinoowo moyyereej makko e noddoo6e mo 6ee fuu. <sup>13</sup> Sabi «neddo fuu noddudo innde Joomiraado, hisinte.»<sup>‡</sup>

<sup>14</sup> Kaa hono 6e mbaawiri noddude mo so 6e ngoondinaali mo? Hono 6e mbaawiri goondinde mo so 6e nanaali kabaaru makko? Hono 6e mbaawiri nande kabaaru makko so baajotoodo walaa? <sup>15</sup> Hono yimbe mbaawiri waajaade so nelaaka? Binndi dii mbii: «Huunde fuu buraa yiigol waroobe yottinde Kabaaru Lobbo 6ee ngol woodude.»<sup>§</sup> <sup>16</sup> Kaa wanaa yimbe fuu njabani Kabaaru Lobbo oo. Annabi Esaaya wii: «Joomiraado, homo goondini waaju amen oo?»<sup>\*</sup> <sup>17</sup> Hono nii goondinal he6iraa e nande waaju, waaju duu he6iraa e konngol Almasihihi.

<sup>18</sup> Kaa mido lamndoo dum doo: Israa'iilankooбе nanaali naa? Be nanii jaati! Nii Binndi dii mbii:

«Daade maabbe nanaama e aduna oo fuu,  
konngi maabbe njottiima faa hoore leydi.»<sup>†</sup>

<sup>19</sup> Midо lamndoo kasen: Israa'iilankooбе paamaali naa? Ley Tawreeta Muusaa Laamdo wii tafon:

«Mi wadan kiron 6e laataaki lejol 6ee,  
mi wadan tikkanon lejol ngol walaa hakkille.»<sup>‡</sup>

<sup>20</sup> Nden kaa, annabi Esaaya hulaali wiide caggal mum:  
«Be tewtaalino kam 6ee tawii kam,  
6e lamndanaaki kam 6ee,

mi 6annganii dum'en.»<sup>§</sup>

<sup>21</sup> Kaa banngal Israa'iila, Laamdo wii:  
«Nannde fuu mido lanndinii ja66aade lejol caliingol jeddungol ngol.»<sup>\*</sup>

## 11

*No Laamdo holliri ana yurmoo Israa'iilankooбе*

<sup>1</sup> Ndennoo, mido lamndoo: Laamdo yoppii yimbe mum Israa'iilankooбе 6ee naa? O yoppaali! Sabi miin e hoore am mi Israa'iilanke, mi iwdi Ibarahiima, e suudu baaba Benjamin njeyaa-mi. <sup>2</sup> Laamdo yoppaali yimbe mum 6e susinoo gila arannde see. Tama on anndaa ko Binndi dii mbii nde annabi Iliyasa w提醒 lantonoo Israa'iilankooбе 6ee to Laamdo, wii: <sup>3</sup> «Joomiraado, 6e mbarri annabaafé maa, 6e ngurjinii ittiirde maa sadaka, miin tan gooto heddi, ebe ndaara no 6e mbarda kam.» <sup>4</sup> Kodum Laamdo jaabii mo? Dum doo: «Mi moo6tanii hoore am ujunaaji njeddon gorko 6e cujidanaali tooru wiyeteendu Ba'ala.» <sup>5</sup> Hono non, hakkunde yimbe hannde 6ee, ana woodi yimbe seeda 6e Laamdo suborii saabe hinnee mum. <sup>6</sup> Kaa so o suborike 6e hinnee, en anndan o suboraaki 6e saabe golle maabbe. So wanaa dum, hinnee Laamdo oo heddataako laataade hinnee hankasen.

<sup>7</sup> Ndennoo, hono laatii? Ko laatii dee, Israa'iilankooбе 6ee ke6aali ko ndaartunoo koo, 6e Laamdo subii 6ee nii kebi dum. W66e 6ee, 6erde mum'en mbumnaa <sup>8</sup> no winndorii nii:

\* 10:5 Lewinkooбе 18.5 † 10:8 Fillitagal Tawreeta 30.12-14 ‡ 10:13 Yo'ilä 3.5 § 10:15 Esaaya 52.7 \* 10:16

Esaaya 53.1 † 10:18 Jabuura 19.5 ‡ 10:19 Fillitagal Tawreeta 32.21 § 10:20 Esaaya 65.1 \* 10:21 Esaaya

«Laamđo uddii hakkillaađi mađđe,  
wumnnii gite mađđe, faadinii noppo mađđe.

Faa hannde non worri.»\*

<sup>9</sup> Daawuuda duu wii:

«Yo rewgol mađđe bonngol ngol laatano 6e piccal kajum e yammbuure,  
laatano 6e fergitere yalla e6e njukkee.

<sup>10</sup> Yo gite mađđe niibine pati 6e njiya,  
yo cagge mađđe ture faa abada!»†

<sup>11</sup> Ndennoo, mido lamdoo: ko Yahuudiyankooobe bee pergitii koo, yalla faa 6e caama faa abada naa? Wanaa! Kaa saabe luutti mađđe dii, yimbe 6e nganaa Yahuudiyankooobe bee kebir kisindam dam, yalla Yahuudiyankooobe bee ana kira. <sup>12</sup> So luutti mađđe dii ngaddanii aduna oo ko moyyi, so waasude mađđe goondinde lisaa duu waddanii 6e nganaa Yahuudiyankooobe bee ko moyyi, wanaa haala so Yahuudiyankooobe bee fuu tuubii.

*Haala hisineede 6e nganaa Yahuudiyankooobe*

<sup>13</sup> Jooni, onon 6e nganaa Yahuudiyankooobe bee kaaldan-mi: ko laatii-mi nelaado e moodon koo, mido mantoroo golle mo ndokkaa-mi oo <sup>14</sup> yaama mi heba waddude kiram e ley lejol am, faa mi hisina yoga e mađđe. <sup>15</sup> So woddineede Yahuudiyankooobe rewrintinii aduna oo e Laamđo, hono laatoytoo so ee njab̄oyaama? Walaa fuu no laatoytoo so wanaa iwde e maayde so naata e nぐurndam.

<sup>16</sup> So tamre aranndeere sakkaama Laamđo, tame keddiide dee duu cakkaama. So dadi lekki cakkaama Laamđo, cafe dee duu cakkaama. <sup>17</sup> Jonnoo, Israa'iilankooobe ana mba'i no maangoroowi tutaa ki cafe mum yogaaje caltaa. Aan mo wanaa Yahuudiyanke nanndudo e cabal maangoroowi ki tutaka, a waddaama a dobaama e maangoroowi kii. Nii kebir-daa ngedu e ko iwata e dadi maangoroowi tutaa kii no cafe godde dee kebir nii. <sup>18</sup> Kammarri majjum, pati manta yeeso cafe caltaade dee. Kaa so ada mantoo, anndaa wanaa aan wuurni dadi dii, dadi dii nぐuurni maa. <sup>19</sup> Ana moyya tawee ada wiya: «Cafe caltaama yalla mido dobbee do de ngonnoo doo.» <sup>20</sup> Ana selli! Kaa ko de caltiraa dee, rafi goondinal majje, aan ada heddi e dobeede saabe goondinal maa. Ndennoo, pati mawninkina, tawde-daa e kulol Laamđo. <sup>21</sup> Sabi so Laamđo dalaali cafe laylilje dee, dalataa ma aan duu. <sup>22</sup> Ndennoo, taykita moyyuki Laamđo e janngere mum fuu: omo janngana saambe bee, kaa omo moyya e maa so nii ada jiibi e kii moyyuki. So wanaa dum, aan duu a saltete. <sup>23</sup> Israa'iilankooobe duu, so be jiibaali e salaare mađđe ndee, 6e ndoboyte, sabi Laamđo ana waawi dobrir 6e e maangoroowi kii no 6e caltiranoo nii. <sup>24</sup> Ndennoo aan iwde e maangoroowi ki tutaka kii oo, so a saltaama iwde e makki a dobaama e maangoroowi tutaa kii, haala walaa cafe iwde e lekki tutaa kii, so caltanooma ana mbaawi dobeede e inna mum'en.

*No Laamđo yurmortoo yimbe fuu*

<sup>25</sup> Sakiraabe, mido yidi anndinde on oo doo sirri, pati yeewron ko'e mon on hakkilante'en: yoga e Israa'iilankooobe, ko'e mum'en tiidinaa faa nde 6e nganaa Yahuudiyankooobe goondinoyoobe bee fuu kisinaa. <sup>26</sup> Hono non Israa'iilankooobe bee fuu kisirtee, no Binndi dii mbiiri nii:

«Kisinoowo oo Siyona iwrata,

mo ittan iwdi Yaakuuba fuu e geddi Laamđo.»‡

<sup>27</sup> «Dum woni aadi am e mađđe

wakkati mo tosyan-mi luutti mađđe dii fuu.»§

<sup>28</sup> Ko 6e calii Kabaaru Lobbo oo koo, Yahuudiyankooobe bee laatorii konnee'en Laamđo kammarri mon. Kaa ko Laamđo subii 6e koo, 6e laatiike yiibbe mum saabe maamiraase mađđe. <sup>29</sup> Sabi mimsee walaa e dokkal Laamđo, kajum e noddaango mum. <sup>30</sup> No calorinodon Laamđo arannde, kebu-don jooni yurmeende saabe salaare Yahuudiyankooobe nii, <sup>31</sup> hono non, jooni 6e calorii mo yalla e6e keba yurmeende kamoe duu saabe yurmeende nde ngadana-don ndee. <sup>32</sup> Sabi Laamđo uddii yimbe fuu e ley salaare, yalla omo yurmoo 6e fuu.

<sup>33</sup> Hee ngalu Laamđo ana mawni! Hakkilantaaku makko e anndal makko ana luggidi! Fay gooto waawaa anndude anniyaaji makko. Fay gooto waawaa faamde laawi makko.

<sup>34</sup> Sabi nii winndorii:

«Homo anndi miiloođi Joomiraado?

Naa homo waawi laataade howruuo makko?»\*

<sup>35</sup> «Homo adii hokkude mo sako o yoba dum?»†

\* **11:8** Fillitagal Tawreeta 29.3, Esaaya 29.10   † **11:10** Jabuura 69.23-24   ‡ **11:26** Esaaya 59.20   § **11:27** Yeremiya 31.33-34   \* **11:34** Esaaya 40.13   † **11:35** Ayyuuba 41.3

36 Sabi, huunde fuu e makko iwi, huunde fuu saabe makko woodiri, huunde fuu kanko woodani. Yo teddeengal wooden mo faa abada! Aamiina!

## 12

### *No goondinē Iisaa kaani uuurdude*

<sup>1</sup> Ndennoo sakiraabe, mido ndaarda on saabe yurmeende Laamdo ndee, cakkee ko'e mon laatoo sadaka guurdo, ceniido, beldo Laamdo. Dum woni dewal ngal kaan-don rewrerde mo ngal. <sup>2</sup> Patijemmbree aduna, kaa dalee Laamdo heydintina hakkillaaji mon yalla ferde mon ana mbaylitoo. Nden, on mbaawan anndude muuyde Laamdo: ko moyyi e ko weli mo e ko hiibii.

<sup>3</sup> Saabe moyyere nde Laamdo hokki kam ndee, mido wiya gooto e mon fuu: pati naabsee ko'e mon to on njottaaki. Ko kaan-don waafude dee, yeewron ko'e mon miilooji hakkilantaaku baarooji e goondinal ngal Laamdo etani on ngal. <sup>4</sup> Gooto e men fuu ana jogii caldi keewdi, kaa caldi dii fuu ngaldaa golle. <sup>5</sup> Hono non, enen e heewde fuu, en neddo gooto e ley habbagol men e Almasihu, en fuu eden njeydaa no gooto fuu jeydiri e goddo nii.

<sup>6</sup> En ndokkaamaa dokke ceertude de Laamdo hokkiri en moyyere mum. Dokkaado haaltude konngol ngol Laamdo loowi e mum, haaltira ngol no hawirta e goondinal nii.

<sup>7</sup> Dokkaado gollande deental goondinē Laamdo, golla. Dokkaado tinndinde tinndina.

<sup>8</sup> Dokkaado waajaade waajoo. Dokkitiroowo oo hokkira fernde laabfunde. Hooreeo fuu ardoroo soobee. Jurmotoodo yurmorooy neddo dow seyo.

<sup>9</sup> Jilli mon dii laatoo dii ngaldaa e naafigaaku. Ngoddee ko boni, tiidee e ko moyyi.

<sup>10</sup> Njidondiree jilli sakiraagu, gooto fuu teddina banndum faa furna dum hoore mum.

<sup>11</sup> Pati laatee nattuue, laatee soobirante'en, ndewiron Joomiraado berde laabfude, <sup>12</sup> mbeltee e ley jikke oo, mujee torra, pati ceeree e duwaawu. <sup>13</sup> Mballee seniibe Laamdo bee e haajuujii mum'en dii, laatee jippinoobe hoobbe, <sup>14</sup> nduwanee torroobe on bee, nduwo-don, pati kudon. <sup>15</sup> Mbeltee e weltotoobe bee, mboydee e woyoobe bee. <sup>16</sup> Laatodee miilooji gooti, laatee leydinkiniibe, pati mawninkinee, pati njogoree ko'e mon on hakkilante'en.

<sup>17</sup> So won gaafudo on ko boni, pati njoostee dum. Ndaaree waafude ko yimbe fuu miillii ana moyyi. <sup>18</sup> Nguurdee e yimbe fuu dow jam so ana waawi laataade, dow no mbaawru-don.

<sup>19</sup> Sakiraabe horsube, pati njoostanee ko'e mon, ko kaan-don waafude dee, dalee tikkere Laamdo ndee yoostanoo on. Sabi e ley Binndi dii Joomiraado wii: «Miin yoottoytoo mi yooyan 6e.»\* <sup>20</sup> Nii winndorii kasen: «So gajo maa yolbii namminaa dum, so domdfii njarnaa dum. So a wadii nii, a wadan o yaagoo saabe ko o wadii ko boni koo.»† <sup>21</sup> Pati dal ko boni jaale, jaalora ko boni koo moyyere.

## 13

### *Haala dōwtanaade laamiiibe*

<sup>1</sup> Yo gooto fuu dōwtano laamiiibe 6ee, sabi laamu walaa so wanaa iwrudo to Laamdo oo, kasen duu laamiiibe 6ee Laamdo lammini dum'en. <sup>2</sup> Saabe dum, neddo fuu calaniido laamu saliima yamiroore Laamdo, caliido yamiroore Laamdo nee jukkete. <sup>3</sup> Gadoowo ko moyyi walaa ko huldata hooreebee see, kuloowo 6e dee, gadoowo ko boni. Ada yidi waasude hulde laamu naa? Ndennoo, waafu ko moyyi, o yette. <sup>4</sup> Sabi laamu yo gollanoowo Laamdo faa nafe. Kaa so tawii ko boni ngadataa, hul, sabi wanaa meere laamu wakkorii kaafaawi, o gollanoowo Laamdo faa o tabintina jukkungo mum faade e gadoowo ko boni fuu. <sup>5</sup> Ndennoo, waajibi dōwtano-don laamiiibe 6ee, wanaa saabe hulde jukkeede tan, pati hakkillaaji mon jiija on duu. <sup>6</sup> Dum saabii so odon njooba lampo, sabi laamiiibe 6ee e ley golle mum'en nanngugol lampo ngol, be gollanoobe Laamdo. <sup>7</sup> Ndokkee 6e fuu hakkeejii ma66e. Ndokkee lampo mo kaan-don hokkude lampo, ndokkon usuru mo kaan-don hokkude usuru, kulon mo kaan-don hulde, teddinon mo kaan-don teddinde.

<sup>8</sup> Pati jamaande fuu 6iloo hakkunde mon so wanaa jamaande jilli. Homo fuu rewa banndum jilli. Sabi jiddo neddo hono mum fuu, tabintinii Sariya Muusaa oo. <sup>9</sup> E ley dum, dii doo kadaadi: «Pati jeenu, pati jaadu hoore, pati wujuu, pati tuuye-daa», kanji e jamirooje godde dee fuu ede kawriti e ndee doo yamiroore wootere: «Njidifraa tanaa maa no njidir-daa hoore maa nii.» <sup>10</sup> Jiddo tanaa mum gollataa dum ko boni, ndennoo, jilli tabintinta Sariya oo.

<sup>11</sup> Odon anndi wakkati mo ngon-den e mum. Wakkati mo kaan-don finde oo yonii. Sabi joomi kisindam 6uri 6adaade en diina nde naatuno-den e goondinal ndee. <sup>12</sup> Jemma oo woddiima, jaloomaa oo fattiima. Ndennoo, njoppen gollude golleeji nimre dii, 6amen ka6itorde fooyre, <sup>13</sup> nguurden no haaniri, no wonbe e fooyre jaloomaa nii, tawee wanaa e

ley wanngiyaare e sigiro e ko sofi e njaahilaaku e poodondiral e haasidaaku.<sup>14</sup> Boornoree Joomiraado men Iisaa Almasiihu no kaddungal ni, pati kiinnee gidaade yonki mon, pati njokkon de.

## 14

### *Haala tewtude ko naabata deental goondinbe yeeso*

<sup>1</sup> Njä6ee mo goondinal mum lo'i tawa on piñiraali dum ko woni e hakkille mum.<sup>2</sup> To banngal jaamdu, oo ana tawree goondinal faa waawa jaamde huunde fuu, tawee ootoo goondinal mum ana lo'i faa waasa jaamde tew.<sup>3</sup> Naamoowo tew oo pati yawa mo jaamataa tew oo. Mo jaamataa tew oo pati piñia jaamoowo tew oo, sabi Laamdo ja66ima mo.<sup>4</sup> Aan, kodum ngon-daa faa piñia gollanoowo goddo? Mo heddo tarsinaade naa mo saama, yo donngal kalfaado makko oo. Kaa mo tarsinto faa gasa, sabi Joomiraado ana waawi juubinde mo.

<sup>5</sup> To banngal jalaade, oodoo ana jogorii jalaade dee ana 6urdi moyyude, ootoo ana jogorii jalaade dee fuu potu. Gooto fuu yo hebu tayoral e ley hakkille mum.<sup>6</sup> Burdindo jalaade dee oo wadirii dum kammari Joomiraado. Kasen duu, jaamoowo ko yidi fuu oo wadirii dum kammari Joomiraado, sabi o yettan Laamdo. Mo jaamataa tew oo wadirii dum kammari Joomiraado, o yettan Laamdo kanko duu.<sup>7</sup> Sabi fay gooto e men wuuraniali hoore mum, kasen duu fay gooto e men maayanaali hoore mum.<sup>8</sup> So en nguuri, Joomiraado oo nguuran-den, so en maayii, Joomiraado oo maayan-den. So en nguur naa so en maay, Joomiraado oo jey en.<sup>9</sup> Sabi Almasiihu maayii, kasen duu wuurtii faa laatanoo wuurbé e maayé fuu Joomiraado.

<sup>10</sup> Aan, ko wadi so ada piñia sakiike maa goondindo oo? Naa aan, ko wadi so ada yawa sakiike maa goondindo oo? En fuu, en ndaroyto yeeso sarirde Laamdo,<sup>11</sup> sabi ana winndii: «Joomiraado wii:

«Mi hunorike baawde am:

Koppi fuu kofanto kam,

gooto fuu sellinan miin woni Laamdo. » \*

<sup>12</sup> Nden gooto men fuu jaabanto hoore mum yeeso Laamdo.

<sup>13</sup> Dum nee, pati pelondirene e ko'e men hankasen, 6amee anniya reentaade e huunde fuu ko waabi fergitinde sakiike mon liba dum.<sup>14</sup> Saabe Joomiraado men Iisaa mido tayori jaamdu fuu harmaa e hoore mum. Kaa so neddo miillii won harmundu, dum harmanan dum kajum.<sup>15</sup> So a torrii sakiike maa goondindo oo saabe jaamdu maa, a jokkaali laawol jilli. Pati halku mo Almasiihu maayani oo saabe jaamdu maa nduu.<sup>16</sup> Ndennoo, ko kebuton so taw-don ana moyyi koo, pati waddana yimbe haalde haala mbonka.<sup>17</sup> Sabi Laamu Laamdo fawaaki e jaamdu naa e yardu, ko fawii e mum dee, fooccitaare e jam e seyo e ley habbagol men e Ruuhu Cenido oo.<sup>18</sup> Golliranooow Almasiihu hono non fuu, Laamdo welete dum, yimbe 6ee duu teddinan dum.<sup>19</sup> Ndennoo, tewten beydude jam hakkunde men, kasen duu humo fuu tewta ko naabata bannduum yeeso e ley goondinal.

<sup>20</sup> Pati bonnitin golle Laamdo saabe jaamdu. So goonga, jaamdu fuu ana dagii, kaa so jaamdu ndu jaamataa nduu ana liba sakiike maa, jaamde ndu moyyaa.<sup>21</sup> Ko moyyi dee, waasude jaamde tew e waasude yarde doro, kajum e waasude wadude huunde fuu ko fergitata sakiike mum.<sup>22</sup> Huunde fuu ko ngoondin-daa hen, yo laato hakkunde maa e Laamdo. Mo sikkitataako ko woni e hakkille mum, welii hoore!<sup>23</sup> Kaa neddo fuu cikkitido e ko jaamata, jukkete, sabi joomum jaamirtaa goondinal. Huunde fuu ko waldaa e goondinal yo luuttal.

## 15

<sup>1</sup> Enen sellu6e goondinal 6ee, eden kaani wallude 6e goondinal mum lo'i 6ee, mbaasen tewtude ko weli en tan.<sup>2</sup> Gooto e men fuu yo tewtu ko welata tanaa mum, faa oon yaara yeeso e ley goondinal.<sup>3</sup> Sabi Almasiihu tewtaalino ko weli dum, kaa o wii no winndorii ni:  
«Bonkaaji bonkiibe ma dii e am njani.» \*<sup>4</sup> Ko winndanoo arannee e ley Binndi dii koo fuu, faa jaangina en winndiraa, yalla mujal e berde buubude de Binndi dii ndokkunda en dee ana laatanoo en jikke.<sup>5</sup> Yo Laamdo Jom mujal, buubinoowo berde oo, hokku on laataade miilo wootoo no Iisaa Almasiihu anndiniri on ni,<sup>6</sup> faa teddiniron Laamdo anniya gooto e daande wootere. Sabi kanko Laamdo woni Baaba Iisaa Almasiihu Joomiraado men oo.

<sup>7</sup> Njä6ondiree no Almasiihu ja6borii on ni, faa Laamdo teddinee.<sup>8</sup> Mido wiya on: Almasiihu warii gollande Yahudiyankee faa hollita Laamdo yo koolniido. Sabi Almasiihu tabintinii podooje de Laamdo wadannoo njaatiraabe Yahudiyankee dee<sup>9</sup> yalla leji goddi dii duu ana teddinira Laamdo saabe yurmeende mum, no Binndi dii mbiiri ni:

\* 14:11 Esaaya 45.23    \* 15:3 Jabuura 69.10

«Saabe dum, mi jaarete hakkunde lepi,  
mi yimete faa teddina innde maa.»<sup>†</sup>

10 Binndi dii mbii kasen:

«Leji, mbeltodee e yimbe Joomiraado bee.»<sup>‡</sup>

11 Kasen:

«Onon lepi dii fuu, njettee Joomiraado,  
yo yimbe fuu njettu mo.»<sup>§</sup>

12 Annabi Esaaya duu wii:

«Iwdo e Yessa waroyan,  
oon immoytoo faa laamoo lepi dii,

di pawoyan jikke majji e makko.»<sup>\*</sup>

13 Yo Laamdo Jom jikke oo hebbin on seyo e jam fuu e ley goondinal mon, yalla odon 6eydoo heewde jikke saabe baawde Ruuhu Ceniido oo!

#### *No Pool haaldi kabaaru golle mum*

14 Sakiraabe am, miin jaati mido taylor odon moyyi sanne, odon keewi anndal, kasen duu odon mbaawi waajondirde. 15 Kaa ley bataaki oo mido suusi haalande on haalaaji yogaaji faa laabaa faa mi miccintina on di. Mi haaldii non saabe moyyere nde Laamdo hokki kam 16 nde wadi kam gollanoowo Iisaa Almasiihu e ley 6e nganaa Yahuudiyankoobe ndee. Ko mbaajotoo-mi Kabaaru Lobbo oo koo yu golle ceniido yalla 6e nganaa Yahuudiyankoobe 6ee ana laatoo sadaka beldo Laamdo mo Ruuhu Ceniido oo senni. 17 Ndennoo, e haabagol am e Iisaa Almasiihu, mido waawi mantoraade golleji di ngollan-mi Laamdo dii. 18 Sabi walaa fuu ko cuusu-mi haalde so wanaa ko baawde Almasiihu tabintini e ley golle am faa waddana 6e nganaa Yahuudiyankoobe 6ee dowitzanaade Laamdo. Haala am e golle am duu, 19 Laamdo tabintinirii dum baawde taagumansaajji e kaayde e ley baawde Ruuhu Laamdo oo. Hono non njottinir-mi Kabaaru Lobbo haala Almasiihu oo nokkuuje dee fuu gila Urusaliima e seraaji mum faa leydi Illiriya. 20 Kasen duu, gila arannde anniya am yo waajaade Kabaaru Lobbo oo do innde Almasiihu ndee yottanooki pati mi maha dow maadi neddo goddo, 21 no Binndi dii mbiiri nii:

«Be njottinanooka haala makko 6ee njiyoyan,  
6e nanaalino kabaaru makko ana haalee 6ee paamoyan.»<sup>†</sup>

#### *Haala anniyaaji Pool*

22 Golle am oo hadi kam warde to moodon too cili keewdfi. 23 Kaa jooni golle oo huu6ii dee doo leyde, kasen duu ko njidu-mi warde to moodon koo wadii duu6i kuurdi jooni. 24 Mido yidi fajude to mon so mido yaha Espaniya, mi wonda e moodon seeda, njoo6inon kam ko kasindinan-mi e laawol am ngol.

25 Kaa jooni Urusaliima njahan-mi faa mi walla seniibe won6e ton 6ee. 26 Sabi deente goondin6e gonde Makedoniya e Akaya dee anniyyike hawrintinde kaalisi faa mballa misikiina'en jeyaabe e seniibe Urusaliima 6ee. 27 Be anniyorii dum 6erde laabude, kaa e6e kaani wafande 6een dum duu. Sabi tawii 6e nganaa Yahuudiyankoobe 6ee kefii ngedu e moyyereeji di Ruuhu oo hokki Yahuudiyankoobe 6ee dii, ndennoo, 6e nganaa Yahuudiyankoobe 6ee duu ana kaani feccude jawle mum'en e Yahuudiyankoobe 6ee. 28 So dum yawtii, so mi hokkii 6e ko hawrintinaa koo, mi yaabporto to moodon too so mido yaha Espaniya. 29 Mido anndi so mido wara to moodon, mi wardan e barke Almasiihu kiibudo oo.

30 Sakiraabe, saabe Joomiraado men Iisaa Almasiihu e saabe jilli di Ruuhu oo hokkata dii, mido ndaarda on: kabodo-don e am e ley duwaawuji mon faade e Laamdo saabe am, 31 yalla mido dada e 6e ngoondinali won6e Yahuudiya 6ee, kasen seniibe won6e Urusaliima 6ee njaaboo ballal ngal naabanan-mi dum'en ngal. 32 Hono non, so Laamdo muuyii, mi yottorto on weltaare, kasen duu mi fowta hakkunde mon. 33 Yo Laamdo gaddoovo jam oo wondu e mon, on fuu. Aamiaina!

## 16

#### *Jowtaali*

1 Mido haalana on kabaaru banndii men debbo biyeteedo Febe, gollanoowo deental goondin6e gonngal ley Kankiriya oo. 2 Njaaboro-don mo e dow innde Joomiraado no seniibe 6ee kaani wafude nii, kasen duu mballee mo e huunde fuu ko mo hasindini e mum, sabi kanko duu o wallii heewbe, miin e hoore am mido hen. 3 Mido jowta Piriskilla e Akilas, gollidoobe e am golle Iisaa Almasiihu 6ee. 4 Sabi 6e kosii mursude yonkiji

<sup>†</sup> 15:9 2 Samuyila 22.50, Jabuura 18.50    <sup>‡</sup> 15:10 Fillitagal Tawreeta 32.43    <sup>§</sup> 15:11 Jabuura 117.1    \* 15:12  
Esaaya 11.10    <sup>†</sup> 15:21 Esaaya 52.15

maābē faa 6e ndannda yonki am. Wanaa miin tan yettata 6e, deente goondinbē 6e nganaa Yahuudiyankoobe dee fuu ana njetta 6e.<sup>5</sup> Mido jowta deental goondinbē kawrooval galle maābē ngal fuu. Mido jowta Epaynetus, gido am korsudo oo. Kanko adii goondinde Almasiihu ley leydi Asiya fuu.<sup>6</sup> Mido jowta Mariyama tampando on sanne oo.<sup>7</sup> Mido jowta Andoronikus e Yuniyas, suudu baabaabē am worbē 6e uddidanoo-mi kasu bēe. Be nelaabe teddinaabē, kasen duu kambe adii kam goondinde Almasiihu.

<sup>8</sup> Mido jowta Ampiliyatus mo korsinir-mi saabe Joomiraado oo.<sup>9</sup> Mido jowta Urbanus, gollidoowo e men golle Almasiihu oo, kajum e Estakis gido am korsudo oo.<sup>10</sup> Mido jowta Apelles mo goondinal mum Almasiihu horaa so tawaa ana laabē oo. Mido jowta galle Aristobil.<sup>11</sup> Mido jowta Herodiyon suudu baabaajo am oo. Mido jowta yimbe galle Narsisi haābōiibē e Joomiraado bēe.<sup>12</sup> Mido jowta Tirifena e Tirifosa, been yo rewbe gollanoobē Joomiraado. Mido jowta Persis mo korsin-mi, oon yo debbo tampudo sanne e ley gollande Joomiraado.<sup>13</sup> Mido jowta Rufus mo Joomiraado subii oo, mido jowta inna makko mo nanngir-mi no innam nii, miin duu.<sup>14</sup> Mido jowta Asinkiriti e Felegon e Hermes e Patorobas e Hermasa e goondinbē Iisaa wondube e maābē bēe.<sup>15</sup> Mido jowta Filolog e Yuliya, mido jowta Nere e banndum debbo, kajum e Olimpas, mido jowta seniise wondube e maābē bēe fuu.<sup>16</sup> Gooto gooto mon fuu jowtira sakiike mum jowtaango wondungo e jilli. Deente goondinbē Almasiihu dee fuu ana njowta on.

<sup>17</sup> Sakiraabē, mido ndaarda on, ndeento-don e waddoobē ceeraagu e pergitte saabe salagol mum'en jannde nde kefu-don ndee, ngoddee bē!<sup>18</sup> Sabi yimbe wa'ube non ngollantaan Joomiraado men Almasiihu, ko 6e ngollanta dee, deedī maābē dii. Haalaaji maābē beldi e manooye maābē jaayde 6e majjinirta hakkillaaji yimbe 6e yoyaa bēe.<sup>19</sup> Kaa onon, kabaaru dowaare mon yottike yimbe fuu. Saabe dum mido weltanii on, kaa mido muuyani on laato-don hakkilante'en banngal ko moyyi, laato-don laabūbe banngal ko boni.<sup>20</sup> Laamdo gaddoowo jam oo wadan niison Ibiliisa ley teppe mon booyataa. Yo hinnee Joomiraado men Iisaa wonu e mon!

<sup>21</sup> Timote gollidiido am oo ana jowta on. Lukiyus e Yason e Sosipatoros suudu baabaabē am bēe ana njowta on.<sup>22</sup> Miin, Tertiyus, binndando Pool oo bataaki oo, mido jowta on saabe haābāgol meeden e Joomiraado.<sup>23</sup> Gayus, njaatigi am mo deental goondinbē ngal hawrata galle mum oo, ana jowta on. Erasta kalfinaado kaalisi ngeenndi ndii oo ana jowta on, kajum e Kartus sakiike men oo. [<sup>24\*</sup>]

#### *Jettooje*

<sup>25</sup> Jettooje ngoodanii Laamdo baawdo hokkude on semmbe oo. O hokkiran on dum Kabaaru Lobbo haala Iisaa Almasiihu mo mbaajii-mi oo. Oon Kabaaru Lobbo yo 6anngugol sirri Laamdo cuudanoodo gila arannde<sup>26</sup> kaa jooni o 6annginaama. Dewte annabaabē anndinii dum lepi dii fuu no Laamdo duumiido oo yamiri nii, faa di ngoondina Laamdo di dowtanoo dum.<sup>27</sup> Yo teddeengal woodan Laamdo gooto hakkilante oo faa abada saabe Iisaa Almasiihu. Aamiina!

---

\* **16:24** E dereeji booydi dii, yoga ana bēyda aaya 24:Yo hinnee Joomiraado men Iisaa Almasiihu wonu e mon, on fuu. Aamiina!

## Bataaki Pool arano faade e Korintunkooõe

<sup>1</sup> Oo 6ataaki ga amen iwri, miin Pool, kajum e sakiike men Sosteni. Miin Pool, mi noddiraado sago Laamdo faa mi laatoo nelaado Iisaa Almasiihu. <sup>2</sup> Miden njowta deental goondinõe Laamdo gonnal ngalluure Korintu.\* Laamdo laõbinirii on saabe Iisaa Almasiihu, noddii on faa laato-don yimõe mum, onon e noddooõe innde Joomiraado men Iisaa Almasiihu õo mbaawi wonde fuu. Sabi Iisaa yo Joomiraado maõõbe, yo Joomiraado men. <sup>3</sup> Yo on keõu moyyere e jam iwde e Baabiraado men Laamdo e Joomiraado men Iisaa Almasiihu.

### No Pool yettiri Laamdo banngal Korintunkooõe

<sup>4</sup> Mido yetta Laamdo saabe mon wakkati fuu dow moyyere makko nde ndokkire-don Iisaa Almasiihu ndee. <sup>5</sup> Saabe makko on keõõiarsku fuu e ley haala e ley annandal fuu. <sup>6</sup> Seedaaku amen haala Almasiihu jõõbii e mon jaati, <sup>7</sup> õum wadi so on ñakoraaka fay dokkal Laamdo gootal e ley doomugol mon Joomiraado men Iisaa Almasiihu faa warta. <sup>8</sup> Kanko hokkata on semmbe faa õo aduna haadi, yalla odon laatoo õe ngalaajõõne pannde gartol makko, kanko Joomiraado men Iisaa Almasiihu. <sup>9</sup> Laamdo yo koolniido, kanko noddi on kaõõbo-don e Biyyiko Iisaa Almasiihu Joomiraado men oo.

### Haala poondondiral hakkunde goondaõõnõe

<sup>10</sup> Sakiraõõe, mido ndaarda on õum doo e innde Joomiraado men Iisaa Almasiihu: nanngondiree, laato-don daande wootere, pati ceertton, laato-don hakkille gooto e anniya gooto. <sup>11</sup> Sakiraõõe am, mi narrii yimõe suudu Kolowe poondondiral won hakkunde mon. <sup>12</sup> Ko njidu-mi wiide dee, yogaõõe mon ana mbiya ana ngoodani Pool, wõõõõe ana mbiya ana ngoodani Apollos,<sup>†</sup> wõõõõe duu ana mbiya ana ngoodani Piyeer, wõõõõe kasen duu ana mbiya ana ngoodani Almasiihu. <sup>13</sup> Tama Almasiihu yo pecciido? Tama Pool maayani on dow leggal bardugal, naa e innde Pool lootira-don lootogal batisima? <sup>14</sup> Mi yettirii Laamdo ko mi lootaali fay gooto e mon lootogal batisima koo, so wanaa Kirispus e Gayus. <sup>15</sup> Non, fay gooto waawaa wiide e innde am lootira-don lootogal batisima. <sup>16</sup> Ooho, goonga mi batisiino kasen duu galle Istifanas. Ko yawti õum, mi anndaa yalla mi batisii goddo. <sup>17</sup> Sabi Almasiihu nelaali kam mi batisa, ko mo neli kam dee, mi haala Kabaaru Lobbo oo, tawa mi haaliraali õum jõeepjal haala, pati maayde makko dow leggal bardugal ndee laatoo meere.

### No Almasiihu holliri baawde Laamdo e hakkilantaaku Laamdo

<sup>18</sup> Haala maayde Iisaa dow leggal bardugal yo safiyaaku banngal halkotoõe õee, kaa banngal men enen hisinteeõe õee, ka baawde Laamdo. <sup>19</sup> Sabi ana winndii:

«Mi bonnitan hakkilantaaku hakkilante'en õee,  
mi jõõban faamu faamuõõe õee.‡

<sup>20</sup> Ndennoo, hakkilante won ko woni naa? Dunkee Sariya won ko woni naa? Baawdõ haala e oo jamaanu won ko woni naa? Wanaa Laamdo waylitii hakkilantaaku oo aduna wadii õum majjere naa? <sup>21</sup> Yimõe aduna oo e hakkilantaaku mum'en fuu annditaali no Laamdo holliri hoore mum e ley hakkilantaaku mum nii. Õum saabii so Laamdo yidi hisinirde goondinõe õum õee waaju amen nanndudo e safiyaaku oo. <sup>22</sup> Yahuudiyankooõe ana ndaarta kaayne, Yunaninkooõe ana njidu kajum'en hakkilantaaku. <sup>23</sup> Kaa enen, kabaaru toteende Almasiihu e leggal bardugal mbaajoto-den. Banngal Yahuudiyankooõe õum metti, banngal lejni goddi õum safiyaaku. <sup>24</sup> Kaa banngal noddabõõõe õee, Yahuudiyankooõe e lejni goddi fuu potu, Almasiihu yo baawde Laamdo yo hakkilantaaku Laamdo. <sup>25</sup> Sabi golle Laamdo mo yimõe njogorii yo safiyaaku oo ana õuri hakkilantaaku neddo, kasen duu ko õe njogorii yo loore Laamdo koo ana õuri semmbirantaaku neddo.

<sup>26</sup> Yeewee ko'e mon, onon sakiraõõe õe Laamdo noddi: banngal yimõõe, hakkilante'en keewaa e ley mon, jõm'en semmbe keewaa e ley mon, iwfõõe e lejni teddudi keewaa e ley mon. <sup>27</sup> Kaa Laamdo subõike ko aduna jogorii yo safiyaaku koo faa hoyna hakkilante'en õee, ko aduna jogorii yo loore koo faa o hoyna ko jogii semmbe koo. <sup>28</sup> O subõike ko hoyi, ko yawnii, ko jataaka e aduna oo koo faa o wada ko jataaa koo yo meere, <sup>29</sup> yalla õii-adama fuu ana ronka mantaade yeeso Laamdo. <sup>30</sup> Kanko haõõi on e Iisaa Almasiihu faa Iisaa laatanii en hakkilantaaku iwdo e Laamdo, laatanii en foocitaare e senaare e coottitaari <sup>31</sup> faa «mantotoodo fuu mantoroo golle Joomiraado» hono no winndorii nii.

\* 1:2 Golle Nelaõõe 18.1-17    † 1:12 Golle Nelaõõe 18.24-28    ‡ 1:19 Esaaya 29.14

## 2

*Haala hakkilantaaku Laamdo*

<sup>1</sup> Sakiraabõe, min, nde ngarnoo-mi to mon faa mi waajoo on goonga Laamdo teddudo oo ndee, mi waajoraaki on haalaaji beldi, mi waajoraaki on hakkilantaaku yimõõ. <sup>2</sup> Sabi mi fellisino mi waajataako on fay huunde so wanaa haala Iisaa Almasiihu e toteede mum e leggal bardugal. <sup>3</sup> Nde ngondunoo-mi e mon ndee, mido lo'i, mido huli, mido sijna sanne. <sup>4</sup> Haala am e waaju am fawanooki e jnejal haala jaalotoongal neddo. Ko dum fawinoo e mum dee, baawde de Ruuhu Ceniido hollata dee <sup>5</sup> pati goondinal mon fawoo e hakkilantaaku yimõõ, fawoo e baawde Laamdo.

<sup>6</sup> Dum e taweede, misen mbaajoo hakkilantaaku hakkunde juubõõe e ley goondinal. Wanaa hakkilantaaku oo doo aduna min mbaajotoo naa hakkilantaaku jom'en baawde halkootooõe e ley oo doo jamaanu - <sup>7</sup> hakkilantaaku Laamdo min mbaajotoo. Hakkilantaaku oo yo goonga teddudo cuudaado yimõõ mo Laamdo fodani en gila aduna tagaaka faa naaten e teddeengal mum. <sup>8</sup> Fay gooto e adunankooõe laamuõõ bee anndaa oo hakkilantaaku, sabi sinndo ebe anndunoo mo, õe tontataano Joomiraado teddudo oo. <sup>9</sup> Kaa nii winndorii:

«Ko yitere yiyaali nowru nanaali,  
e ko hakkille waddaali abada,

dum jaati woni ko Laamdo moyyinani yidubõõe dum.»\*

<sup>10</sup> Kaa enen, Laamdo hollirii e dum Ruuhu Ceniido. Oon Ruuhu ana yiya fuu, fay ko luggidi to Laamdo. <sup>11</sup> Homo waawi anndude neddo faa laabõõ so wanaa yonki wonki e mum kii? Laamdo duu hono non, fay gooto anndaa mo faa laabõõ so wanaa Ruuhu gondo e makko oo.

<sup>12</sup> Enen, wanaa adunankaaku keb-den, Ruuhu iwdo e Laamdo oo keb-den, yalla eden annda moyyere nde Laamdo wadani en ndee fuu. <sup>13</sup> So misen mbaajoo dum, min nawtortaaiko haalaaji di hakkilantaaku 6iõõõe aadama waajotoo min õii - haalaaji di Ruuhu oo waajotoo õii min nawtortoo. Hono non min pamminirta hebuõõe Ruuhu bee goongajji Ruuhu õii.

<sup>14</sup> Mo hebaali Ruuhu Laamdo oo waawataa jaabaaade kulle oon Ruuhu, sabi de safiyaaku do joomum. O waawataa faamude de, sabi Ruuhu oo tan waawi hollude no kulle dee carirtee.

<sup>15</sup> Neddo kebudo Ruuhu oo, ana waawi sarde fuu, kaa fay gooto waawaa sarde dum. <sup>16</sup> Sabi nii Bindii õii mbiiri:

«Homo anndi anniya Joomiraado oo?

Homo waawi waajaade dum?»†

Kaa enen, anniya Almasiihu oo njogi-den.

## 3

*Haala gollanoõe Laamdo*

<sup>1</sup> Miin noo, sakiraabõe, mi waawaa haalirande on hono no on hebuõõe Ruuhu Ceniido nii. No kaaliran-mi on dee, hono no on adunankooõe nii, hono no on cukaloy keccoy e ley goondinal Almasiihu ngal nii. <sup>2</sup> Biraadam ndokku-mi on, wanaa jaamdu tekkundi, sabi on mbaawanaano ndu. Fay jooni duu, on mbaawanaano ndu, <sup>3</sup> sabi adunankaaku tan ngurdudon tafon. Ko haasidaaku e poodondiral woni hakkunde mon koo, wanaa dum ana holla e oo doo aduna njeya-don? Wanaa edum holla nguurndam 6ii-aadama nguuri-don naa? <sup>4</sup> So gooto e mon wii Pool woodani, goddo kasen wii Apollos woodani, wanaa dum ana holla miilooji oo doo aduna njokku-don?

<sup>5</sup> Ko Apollos woni? Ko Pool woni? Min gollanoõe Laamdo tan, gooto fuu ko Joomiraado hokki dum. E juude amen ngoondin-don. <sup>6</sup> Miin, mi tutii, Apollos yarnii, kaa Laamdo woni mawninoowo. <sup>7</sup> Homo non, tutudo oo e jarnudo oo fuu nganana hen fay huunde, Laamdo mawninoowo oo tan woni fuu. <sup>8</sup> Tutudo oo e jarnudo oo fuu potu, homo e maõõõe fuu barjete ko waarata e tampere mum. <sup>9</sup> Sabi minen min gollidoõõe e Laamdo, onon on ngesa Laamdo, on maadi Laamdo.

<sup>10</sup> Kammari moyyere nde Laamdo wadani kam ndee, mi asii gasol no mahoowo hakki-lante wadata nii, mi wadii mahol aranol. Jooni goddo ana maha e maggot. Kaa gooto fuu wada hakkille e no mahirta nii. <sup>11</sup> Sabi fay gooto waawaa wadude mahol gonngol so wanaa aranol ngol, kannigol woni Iisaa Almasiihu. <sup>12</sup> Neddo ana jõõõa e maadi aranndeeri ndii kanjne naa carda kaayõe dime naa ledde naa hudo naa gawye. <sup>13</sup> Nannde gartol Almasiihu, neddo fuu sariya 6annginan fayda golle mum, sabi inden, neddo fuu yiite 6annginan golle mum, holla gooto fuu fayda golle mum. <sup>14</sup> Mo golle mum heddi daraade dow mahol aranol ngol, heban mbarjaari. <sup>15</sup> Kaa mo yiite ngee jaami golle mum, waasii mbarjaari mum, kaa kajum hisinte, ana wa'i no coobitiido e yiite nii.

\* 2:9 Esaaya 64.3    † 2:16 Esaaya 40.13

<sup>16</sup> Tama on anndaa on suudu Laamdo, kasen Ruuhu Laamdo oo ana e mon? <sup>17</sup> Ndennoo, neddo fuu kalkudo suudu Laamdo nduu, Laamdo halkan õum. Sabi suudu Laamdo nduu yo seniindu, kasen duu onon ngoni suudu nduu.

<sup>18</sup> Pati fay gooto jaayra hoore mum. Miild e mon yo hakkilante e oo aduna fuu yo laato safi, yalla ana laatoo hakkilante jaati. <sup>19</sup> Sabi hakkilantaaku e oo aduna yo safiyaaku yeeso Laamdo. Sabi ana winndii: «Laamdo nanngiran hakkilante'en õee hiila mum'en.» \* <sup>20</sup> Ana winndii kasen: «Joomiraado ana anndi miiloogi hakkilante'en õee, omo anndi õi meere.» † <sup>21</sup> Ndennoo, pati fay gooto mantoroo yimõe, sabi onon njey fuu: <sup>22</sup> Pool e Apollos e Piyeer, kajum e aduna oo, nguurndam e maayde, hannde e janngo, fuu onon njey. <sup>23</sup> Onon, Almasiihu jey on, Almasiihu duu, Laamdo jey õum.

## 4

### *Haala golle nelaabõe Almasiihu e tampereeji mum'en*

<sup>1</sup> Ndennoo, njogoree min min gollanoõe Almasiihu, njogoree min min halfinaabõe goongaaji Laamdo tedduõi cuudaadi õii. <sup>2</sup> Kalfinaado, hoolaare tan ndaardaa. <sup>3</sup> Jooni, banngal am, so on pelii kam naa so mi darnaama e sarirde õisõe aadama wiyoõbe mi wanaa koolniiido, walanaa kam baasi. Mi felataa hoore am duu jaati. <sup>4</sup> So goonga nii, fay so mi walaa ko mi feldi hoore am, õum waadataa kam mi pooccitiido. Joomiraado woni caroowo kam. <sup>5</sup> Saabe õum, pati pelee fay gooto fade wakkati oo yottaade, fade Joomiraado oo warde. Kanko yaltinta ko suudinoo e nimre, kanko õannginta ko woni e õerõe yimõe. Nannde nden, gooto fuu heðan e Laamdo jettooe de foti heðude.

<sup>6</sup> Sakiraabõe, haalaaji õii fuu mi fawii õum dow amen miin e Apollos kammari moodon, yalla miden laatanoo on misaalu, paamon pati njawton ko winndii koo, tawa on mawninkinaaki e jabande oodoo e salanaade ootoo. <sup>7</sup> Ndennoo homo burnu maa wõõõõ õee? Kodum njogi-daa ko a hokkaaka? Ko njogi-daa fuu a dokkaado, ko wadi so ada mantoroo õum hono õum wanaa dokke Laamdo?

<sup>8</sup> Woy on kaarii, woy on kebii arsuku, woy on laamiima, minen min laamaaki! Haya miden njidi laamo-don jaati, yalla miden mbaawa laamodaade e mon minen duu! <sup>9</sup> Sabi ana nanndani kam, minen nelaabõe õee, Laamdo heedini min caggal no saraabõe wareteeõe nii. Sabi min laatike fijirteeõe yeeso aduna oo fuu: yeeso malaa'ika'en e yimõe fuu. <sup>10</sup> Min majjuõe saabe Almasiihu, onon on hakkilante'en e haõõagol mon e Almasiihu. Min lo'üõe, onon on jom'en semmbe. Min hoynaabõe, onon on teddinaabõe. <sup>11</sup> Fay wakkati mo ngon-den e mum jooni oo, min ceeraali e yolbere e domka e kolndam e fiiyede, kapum e yiilaaru, <sup>12</sup> miden tiinnitoo wuurdude semmbe terde amen. So min njennaama, min nduwoto. So min torraama, min mujan. <sup>13</sup> So min jo'aama, min mbaaltinan hakkillaaji joomum'en. Faa jooni miden njogoraa no mbuuwdi nii ley aduna oo, hono tuundi ndi yimõe fuu mbedotoo.

<sup>14</sup> Mi winndiraali õum faa mi hersina on, ko mbinndir-mi õum dee, faa mi jannginira on no sukaabõe am horsuõe nii. <sup>15</sup> Fay so taweede e ley haõõagol mon e Almasiihu odon njogii dowooõe ujunaaji ujunaaji, on keewaa baabiraabõe kaa. Sabi e haõõagol mon e Almasiihu, min laatii baaba mon nde mbaajji-mi on Kabaaru Lobbo oo ndee. <sup>16</sup> Õum wadi so mido ndaarda on nemmbon kam. <sup>17</sup> Õum wadi duu so nel-mi e mon Timote õiyam korsudo koolniido e ley haõõagol mum e Joomiraado. O miccintinan on laawi õi njokku-mi saabe Almasiihu e no mbaajortoo-mi diin laawi nii nokku fuu e ley deente goondinõõõ dee fuu. <sup>18</sup> Won e mon mawninkiniõõõ dow jikkude mi warataa to mon. <sup>19</sup> Kaa booyataa mi waran to mon so Joomiraado jaabii. Nden mi humpitoto ko wanaa haala mawninkiniõõõ õee tan, mi humpitoto baawde mum'en duu. <sup>20</sup> Sabi Laamu Laamdo wanaa haala tan, yo baawde. <sup>21</sup> Hono njid-don mi warda e mon? Sawru naa jilli e newaare?

## 5

### *Haala ko yaannii hakkunde goonainõõõ*

<sup>1</sup> Haya, ko soõi nanaama wadii hakkunde mon. Hono ndee somnde wadaali fay hakkunde heeferõõ: gooto e mon ana wondi e jom suudu baam mum! <sup>2</sup> Kasen duu odon mantoroo õum! Ko kaanno-don wadude dee, metteede õum, yalla odon itta gadudo oo golle bondi e hakkunde mon.

<sup>3</sup> Miin, mido woddorii on banngal terde, kaa mido õattori on e hakkille. Gila jooni hono no mi tawaao ton nii, mi sarii gadudo golle oo. <sup>4</sup> So on kawritii e dow innde Joomiraado men lisaa, hakkille am ana tawdee e mon, baawde Joomiraado men lisaa duu ana e men, <sup>5</sup> yo oon neddo wade e juude Iibiliisa, terde mum kalkee, yalla yonki mum ana hisinee ñannde gartol Joomiraado.

<sup>6</sup> So goonga dee, on ngalaa ko mantoro-don fey! Tama on anndaa yuufinirdi seeda ana yuufina conndi farani njiibaandi fuu? <sup>7</sup> Laabinee ko'e mon, itton yuufinirdi kiinndi ndii hakkunde mon, yalla odon laatoo conndi farani njiibaandi keyri ndi walaa yuufinirdi. Non ngorru-don jaati, sabi layyaari men iidi Paska ndii hirsama, õum woni Almasiihu. <sup>8</sup> Ndennoo, teddiniren iidi oo ko wanaa luutti e bone hono no yuufinirdi kiinndi naa yuufinirdi coibundi naa mbonndi. Teddiniren mo buuru mo walaa yuufinirdi, buuru laagal kajum e goonga.

<sup>9</sup> E bataaki mo mbinndunoõ-mi e mon oo, mi wii on e ley makko pati nawtondiron e sobiõe. <sup>10</sup> Nde mbiinoo-mi non ndee, mi faandoraakino sobiõe wonõe e oo doo aduna õee fuu, naa haasidi'en fuu naa wuyõe fuu naa rewoõe tooruují fuu. So non fii worri, waajibi njalton aduna oo. <sup>11</sup> Ko njidunoo-mi wide on, pati nawtondiron e innditortoodo sakike tawee yo coibudo naa haasidi naa dewoowo tooruují naa õo'ovo yimõe naa jaroowo doro naa gujjo. Baado hono non, pati jaamdon e mum duu. <sup>12-13</sup> Sabi õe ngalaa e ley deental goondinõe Laamdo ngal õee, wanaa miin sarata õe, Laamdo sarata õe. Kaa wonõe ley deental goondinõe Laamdo ngal õee, onon carata õum'en. Sabi nii winndorii: «Ittee neddo bondõ oo e ley mon.»\*

## 6

### *Haala gullondiral hakkunde sakiraabe goondinõe*

<sup>1</sup> So luurral wadii hakkunde mon, hono joomum'en cuusirta wullitaade oojiiõe õee njoppa fooccitiõe õee? <sup>2</sup> Tama on anndaa fooccitiõe õee caroya aduna oo? Ndennoo, so onon fooccitiõe õee caroya aduna oo, hono ndonkirton sarde kulle pamare dee? <sup>3</sup> Tama on anndaa enen caroya malaa'ika'en õee? Sako kulle dam doo nguurndam! <sup>4</sup> Ndennoo, so luurral wadii hakkunde mon banngal kulle aduna, ko saabii so oofon ngullitoyoo õe deental goondinõe ngal jataaki õee? <sup>5</sup> Faa njaago-don mbiiru-mi non. Tama on ngalaa fay hakkilante gooto baawdo sarde sakiraabe luurruõe? <sup>6</sup> Ee, goondindo wullanoo goondindõe banndum, tawa to õe ngoondinali!

<sup>7</sup> Haya, ko cardaton e mum hakkunde mon koo duu yo ayiibe bondõ jaati. Ko saabii so on cubaaki mujuude toopanngé? Ko saabii so on cubaaki mujuude õoleede? <sup>8</sup> Kaa onon toonata, onon folata fay sakiraabe mon.

<sup>9</sup> Tama on anndaa oojiiõe naatataa e Laamu Laamdo oo? Pati njaayree ko'e mon: sobiõe e rewoõe tooruují ja jeenoõe e luufunkooõe <sup>10</sup> e wuyõe e haasidi'en e yaroõe doro e õo'ovoõe yimõe e yanoõe, fay gooto e õee naatataa e Laamu Laamdo oo. <sup>11</sup> Yoga mon laatinoke hono non, kaa jooni on lootaama on laabii, on nanngiraama fooccitiõe saabe innde Joomiraado men lisaa Almasiihu, kajum e Ruuhu Laamdo men oo.

### *No goondinõe kaaniri teddinirde Laamdo terde mum'en*

<sup>12</sup> Odon mbiya: «Huunde fuu ana daganii kam.» Ooho, kaa wanaa fuu nafata. So goonga «huunde fuu ana daganii kam», kaa mido salii huunde fuu mara kam. <sup>13</sup> Odon mbiya: «Naamdu jey reedu, reedu jey naamdu.» Ooho, kaa Laamdo halkan di didi fuu. Terde ūii-aadama tagiraaka kammari ko sobi, ko de tagiraak dee, faa de ndewa Joomiraado, Joomiraado duu hayba de. <sup>14</sup> Laamdo immintindo Joomiraado men iwde e maayde oo, imminnitiran en enen duu e baawde mum. <sup>15</sup> Tama on anndaa terde mon ngoni caldi Almasiihu? Ndennoo, ana dagoo mi õama caldi Almasiihu dii mi wada õum caldi debbo coottoowo hoore mum? Abada! <sup>16</sup> Tama on anndaa piilondirõe e debbo coottoowo hoore mum fuu, laatodike e mum terde goote? Sabi ana winndii: «Be didon fuu õe laatoto neddo gooto.»\* <sup>17</sup> Kaa kaabondirõe e Joomiraado laatodike e mum ruuhu gooto. <sup>18</sup> Ndogee ko sobi! Luuttal fuu ngal neddo luutti, takkataako e terde mum. Kaa coibindo hoore mum toojii terde mum. <sup>19</sup> Tama on anndaa terde mon dee ngoni suudu Ruuhu Ceniido gondo e mon mo Laamdo hokki on oo? Wanaa onon njey ko'e mon, <sup>20</sup> sabi Laamdo soottitorii on coggu tiidudo. Ndennoo, teddiniree Laamdo terde mon dee.

## 7

### *Haala dewgal*

<sup>1</sup> Jooni kaa mido yidi jaabaade lamndi di mbinndan-don kam dii. Goonga, ana moyyi e gorko waasude õamde debbo. <sup>2</sup> Kaa pati fijirde wada, gorko fuu yo tawre debbo, debbo duu tawree gorko. <sup>3</sup> Yo gorko hokku genndum hakke mum, debbo duu hokku gorum hakke mum. <sup>4</sup> Debbo jeyaa terde mum, gorum jey de. Gorko duu hono non, jeyaa terde mum, genndum oo jey de. <sup>5</sup> Pati fay gooto e mon salanoo godõo so wanaa tawee e dow kawral mon wakkati keertaado faa kebon no jaagoro-don Laamdo. Kaa caggal õum, keddo-don

wuurdude no haaniri nii pati mbaason nantaade so Iibiliisa seytoo on. <sup>6</sup> Ko kaalan-mi on doo koo, wanaa ko tilsi, mi kolludo on laawol lobbol nii. <sup>7</sup> Miin, mido yidi yimõe fuu laatoo hono am, kaa gooto fuu no Laamdo hokkiri dûm: yoga hokkira nii enne, yoga hokkira nii too.

<sup>8</sup> Faade e õe õamaali e õe õamaaka, kajum e rewõe õe worõe mum'en maayi, mido wiya worruude no am nii õuri moyyude e mum'en. <sup>9</sup> Kaa so tawii õe mbaawaa nantaade, õe ndewla, sabi dûm õuri joodoraade nii tan ana maaya muuyo.

<sup>10</sup> Wonõe e dewle õee, mido yamira dûm'en ndee yamiroore nde iwaali e am, iwnde e Joomiraado: debbo haanaa seerde gorum. <sup>11</sup> So taweede mo seerii oon yo hedoro non, naa duu o warta e mum. Gorko duu haanaa seerde genndum.

<sup>12</sup> Kaa wobõe õee, miin e hoore am haalanta dûm'en, wanaa Joomiraado: so goondindo lisaa ana jogii debbo mo goondinaali tawee debbo oo ana yarrii wondude e makko, pati o seera dum. <sup>13</sup> Naa so debbo goondindo ana dewlaa gorko mo goondinaali tawee gorko oo yarrii wondude e makko, pati o seera dum. <sup>14</sup> Sabi gorko mo goondinaali oo ana lääbiniree genndum, kasen duu debbo mo goondinaali oo ana lääbiniree gorum. So wanaa dum, 6iõõe mon laatoto õe anndaa Laamdo, tawee nee õe seniõõe. <sup>15</sup> Kaa mo goondinaali, so yidi seerde goondindo oo, yo seer. Goondindo oo kaa, so debbo so gorko, tilsi naaka e dewgal ngal, sabi Laamdo noddii en faa nguuren e jam. <sup>16</sup> Debbo goondindo, hono anndirtaa ada waawi hisinde gora? Gorko goondindo, hono anndirtaa ada waawi hisinde gennda?

#### *No gooto fuu haani worrude no Joomiraado feccirani dum nii*

<sup>17</sup> Dum nee, yo gooto fuu wuurdudu no Joomiraado feccirani dum nii, no worrunoo nde Laamdo noddii dum ndee. Dum njamir-mi deente goondinõe dee fuu. <sup>18</sup> Tawaado yo taadiido nde Laamdo noddii dum ndee, pati tewta bonnitidde ko taadaa koo. Noddaado so tawi taadaaki, pati taado. <sup>19</sup> Taadaade e waasude taadaade fuu walaa ko nafata, ko nafata dee, jokkude jamirooje Laamdo. <sup>20</sup> Yo gooto fuu hedoro no worrunoo wakkati nde Laamdo noddada dum ndee. <sup>21</sup> Nde noddete-daa ndee, so tawii a diimajao, pati dum laatane sugulla. Kaa so a heõii laawol no ndimdiraa, rïmdu. <sup>22</sup> Sabi maccudo mo Joomiraado noddii, laatike coottitaado Joomiraado. Dimo noddadaa duu, laatike diimajao Almasiilu. <sup>23</sup> On coottitoraama coggu tiisduo, ndennoo pati laatee maccube yimõe. <sup>24</sup> Sakiraõõe, gooto fuu no worrunoo nde noddetee ndee, yo hedoro non yeeso Laamdo.

#### *Haala dewlude e waasude dewlunde*

<sup>25</sup> Banngal yimõe õe ndewlaali õee, mi walanaa õe yamiroore iwnde to Joomiraado, kaa mi haalan ko woni miilo am, miin mo yurmeende Joomiraado wadi koolniido oo: <sup>26</sup> saabe torraaji jooni dii, mido miila neddo hedderoo no worri nii õuri moyyude e mum. <sup>27</sup> So dewgal won hakkunde maa e debbo, pati tewtaa tayude ngal. So dewgal walaa hakkunde maa e debbo, pati tewtaa debbo. <sup>28</sup> Kaa so a õamii duu, a luuttaali. Mboomri duu so õamaama, luuttaali. Kaa naatube e dewle õee billoto e nguurndam mum'en, mi yidanana on dum. <sup>29</sup> Sakiraõõe, ko kaalunoo-mi koo annii: wakkati oo badike. Jooni, yo õamõõe õee mba'u no õamaali nii, <sup>30</sup> woyooõe mba'a no mboyaali nii, weltiife mba'a no mbeltaaki nii, soodoõõe mba'a no njogaaki nii, <sup>31</sup> heõooõe e oo doo aduna mba'a no meedaali heõude e makko nii. Sabi oo doo aduna no wa'i nii, annii yawta.

<sup>32</sup> Ko njidu-mi dee, ceerton e sugulla. Mo dewlaali, hakkille mum to kulle Joomiraado yahata, ko welata Joomiraado tewtata. <sup>33</sup> Kaa dewludo, hakkille mum to kulle aduna yahata, ko welata genndum tewtata, <sup>34</sup> joomum fecciaa. Hono non, mo õamaaka, kajum e mboomri, hakkille mum to kulle Joomiraado yahata, yalla terde mum e yonki mum fuu ana cenoo. Kaa õamaado, hakkille mum to kulle aduna yahata, ko welata gorum tewtata. <sup>35</sup> Faa nafa on mbiiru-mi non, wanaa faa tonnga on. Mido yidi nguardon no kaan-don wuurdude nii, kaõõ-don e Joomiraado, tawa hakkillaaji mon peccaaki.

<sup>36</sup> So muuyo mawnii e neddo sanne faa huli pati ronka nantaade e cabbaado mum, miila dewgal ngal ana haani timmineede, yo ngal timmine no joomum yidri nii, luuttaali. <sup>37</sup> Kaa so gorko fellisi e õernde mum fuu tawa tilsi naaka, faa õami anniya huurtintaa cabbaado mum, so ana waawi nantaade, wadii ko moyyi. <sup>38</sup> E ley dum, kuurtindo cabbaado mum wadii ko moyyi, kaa mo huurtinali cabbaado mum õuri wadude ko moyyi.

<sup>39</sup> Debbo õamaado yo kaõõdaado so nii gorum ana heddi wuurdude. Kaa so gorjiko oo yawtii, mo o yidi fuu ana waawi õamde mo, yo tawe e laawol Joomiraado ngol tan. <sup>40</sup> Dum nee, so o heddiima e ngoortaalaaku o õurata welde hoore. Dum woni miilo am, kasen duu mido miila miin duu, mi heõii Ruuhu Laamdo.

<sup>1</sup> Jooni mido jaaboo lamndal mon banngal tew cakkanaado tooruungi dili. Eden taylori «en fuu eden njogii anndal». «Anndal» nee waddan mawninkinaare, jilli ngoni ko naabata deental goondinbe ngal yeeso. <sup>2</sup> Neddo fuu miiludo ana anndi huunde, anndaa tafon no haani anndirde. <sup>3</sup> Kaa neddo fuu jiddo Laamdo, Laamdo ana anndi dum.

<sup>4</sup> Ndennoo e banngal jaamugol tew cakkanaado tooruungi, eden anndi «so goonga, ley aduna, tooru wanaa fay huunde», «Laamdo walaa so wanaa gooto oo». <sup>5</sup> Sabi fay so ko yimbe mbiyata rewetehee koo ana ngoodi dow kammu e dow leydi - so goonga, wiyyeteehee «rewetehee» e «joomiraabe» keewi - <sup>6</sup> enen, banngal men, Laamdo gooto tan woodi, Baabiraado tagudo huunde fuu mo nguuran-den oo. Kasen Joomiraado gooto tan woodi, Iisaa Almasiihu mo huunde fuu laatorii oo, mo kebir-den nguurndam oo.

<sup>7</sup> Kaa wanaa yimbe fuu paami dum tafon. Yogaabe woownooße rewede tooruungi, faa hannde ebe jaama tew cakkanaado tooruungi e miilde tew oo tooruungi jaati njey dum. Dum wadata so ebe miila be coban, tawi be mbaawaa seenndude goonga e pene. <sup>8</sup> Tayoral, jaamdu battintaa en Laamdo. So en jaamii, nafataan en fay huunde, so en jaamaali, bonnantaan en fay huunde. <sup>9</sup> Goonga, on ndokkaama laawol faa mbaawon jaamde huunde fuu. Kaa ndeentee pati ngol laawol liiba be njibaaли e ley goondinal bee. <sup>10</sup> Sabi aan anndudo goonga oo, so lo'udo yii ma ada jaama ley suudu tooru, hakkille mum hokkataa dum jaamde tew cakkanaado tooruungi kajum duu naa? <sup>11</sup> Hono non, oon sakiike men lo'udo mo Almasiihu maayani oo, halkortoo saabe anndal maa ngal. <sup>12</sup> So on toopirii non sakiraabe be njibaaли e ley goondinal bee, so on njibii hakkillaaji maabbe, on luuttii Almasiihu. <sup>13</sup> Dum nee, so tawii jaamdu ana liiba sakiike am, mi jaamataa kasen tew abada, pati mi liiba sakiike am.

## 9

### *Haala ko nelaado foti wadaneede*

<sup>1</sup> Mi jeyaa hoore am naa? Mi laataaki nelaado naa? Mi yiyaali Joomiraado men Iisaa naa? Goondinal mon, wanaa e ley golle mo ngollan-mi Joomiraado oo iwi naa? <sup>2</sup> Fay so banngal yogaabe mi wanaa nelaado, banngal mon onon mi nelaado, sabi ko ngoondin-don Iisaa koo ana holla Joomiraado neli kam jaati.

<sup>3</sup> Annii ko mbiyani-mi felooße kam bee: <sup>4</sup> min kaandaa e heбude jaamdu e yardu e ley golle amen naa? <sup>5</sup> Min kaandaa e naborde rewbe amen no nelaabe wobbe bee nii naa? No mijiraabe Joomiraado bee nii, kajum e Piyeer? <sup>6</sup> Naa miin e Barnabas tan ngoni haanbe gollude faa keba no nguurdar? <sup>7</sup> Homo e mon yii sordaasi joboowo hoore mum? Homo woni demoowo mo jaamataa ko hetti e ngesa mum? Homo woni duroowo mo yarataa kosam sewre mum?

<sup>8</sup> Ko kaalan-mi koo, e dow miflooji yimbe tan fawii naa? Sariya oo yamiraali dum naa? <sup>9</sup> Sabi nii wiinndiraa e Sariya Muusaa: «A hadataa ngaari aloori tappoori gawri muutude gawri.»\* Ga'i alooji dii tan ngoni ko Laamdo wattani hakkille naa? <sup>10</sup> Tama wanaa saabe men o haalirta? Goonga, enen mbinndanaa ngol konngol, sabi demoowo e tappoowo fuu ana ngollira jikke heбude ngeedu mum'en. <sup>11</sup> Min awiili e mon kulle ruuhunkooje. So min kettii e mon kulle adunankooje, yalla miden kaawanee dum naa? <sup>12</sup> So wobbe ana kaandi e heбude jaamdu e junngo mon, wanaa minen бuri haandude hen?

Kaa minen, min njokkaali ngol laawol. Miden muja huunde fuu pati min kada Kabaaru Lobbo haala Almasiihu oo yaade yeeso. <sup>13</sup> Tama on anndaa golloobee e ley Suudu Dewal Mawndu bee ana nguuri e kulle de yimbe ndokkata Suudu nduu dee? Tama on anndaa halfinnaabe golle ittirde sadaka bee ana keba ngeedu mum'en e mayre? <sup>14</sup> Hono non, Joomiraado yamirii waajotoobe Kabaaru Lobbo bee nguura e Kabaaru Lobbo oo.

<sup>15</sup> Kaa miin, mi jokkaali hen fay laawol gootol, kasen duu mi wiinndiraa dum faa mi heбa huunde. Maayde бuri kam jaagaade huunde. Sabi dum woni ko mantortoo-mi, mi jaabataa fay gooto itta kam e majjum duu. <sup>16</sup> Sabi waajaade Kabaaru Lobbo oo manataa kam, dum tilsdum kam. Bone woodanii kam so mi waajaaki Kabaaru Lobbo oo! <sup>17</sup> Sinndo mi golliriino oo golle saabe mido fellisinnoo dum miin e hoore am, nden kaa mi heбanno njoбdi. Kaa laatite tilsere ngolliran-moo-mi, mo golle mo kalfinnaa-mi. <sup>18</sup> Ndennoo kođum woni njoбdi am? Njoбdi am, dum woni seyo am ko mbaajotoo-mi Kabaaru Lobbo meere meree koo, tawti e ko mi lamndataako ko waajotoobe Kabaaru Lobbo oo bee poti heбude.

<sup>19</sup> Mi walaa e marginal fay gooto, kaa mi wadii hoore am maccudo yimbe fuu, yalla mido heбa ko бuri heewde e maabbe. <sup>20</sup> Eley Yahuudiyankooße, mi wadii hoore am Yahuudiyanke, yalla mido heбa be. E ley jokkube Sariya Muusaa, mi wadii hoore am jokkufo Sariya Muusaa, yalla mido heбa be, fay so wanaa waajibi mi jokka Sariya oo. <sup>21</sup> E ley be ngalaal e Sariya Muusaa bee, mi wadii hoore am mo walaa e Sariya oo, yalla mido heбa be, fay so miin e hoore am, mi waasaali taweede e sariya Laamdo oo, sabi ley sariya Almasiihu

\* 9:9 Fillitagol Tawreeta 25.4

ngon-mi.<sup>22</sup> E ley lo'ube, mi wadii hoore am mi lo'udo, yalla mido heba 6e. Walaa fuu no mi wadaali hoore am kammari yimbe fuu, yalla ana daja 6e kisin-mi.<sup>23</sup> Ko ngadan-mi fuu, mi wadiran dun kammari Kabaaru Lobbo oo yalla mido heba hen ngeedu.

<sup>24</sup> Tama on anndaa dafondirteebe 6ee fuu yo dogoo6e, kaa gooto tan hebata deesewal? Ndennoo, ndogiree hebude ngal. <sup>25</sup> Lanndiniantoo6e ndaggú fuu, mbiiran terde mum'en biirugol cattungol. Ko 6e ngadirta dum dee, faa 6e keba deesewal ngal duumataako. Enen nee, faa keben deesewal duumotoongal. <sup>26</sup> Saabe majjum mi dogiraali meere, mi wa'aali no ka6ooowo e henndu nii. <sup>27</sup> Kaa mido biira terde am no naawiri mido jaalii de, yalla miin baajotoodo wobbe Kabaaru Lobbo oo, pati mi waasa yarraneede.

10

## *Haala waasude rewde tooruujii*

<sup>1</sup>Sakiraabé, mido yidi paamon faa gasa ko hewtii maamiraabé men jamaanu Muusaa koo. Be fuu 6e ngoniino e ley luurde ndee, 6e fuu duu 6e lummbiino geeci oo. <sup>2</sup>E ley habbagol maabée e Muusaa 6e fuu 6e kebii lootagal batisima e ley luurde ndee, kajum e ley geeci oo. <sup>3</sup>Kasen duu 6e fuu 6e jaamidii naamuud wooturu ruuhunkooro, <sup>4</sup>6e fuu 6e njardii njaram ngoatam ruuhunkooyam, sabi ebe njaranno dam e haayre ruuhunkoore jokkunoonde e maabée ndee. Nden haayre woni Almasihiu. <sup>5</sup>Kaa ko 6uri heewde e maabée, Laamdo welaaka dum'en. Dum saabii so 6e kalkii ley ladde jeereende ndee.

<sup>6</sup> Dum fuu edum holla en pati njokken gidaade yonki bonde no maabbe nii. <sup>7</sup> Pati laatee rewooobe tooruucci no yoga maabbe nii, hono no winndorii nii: «Yimbe bee njoodiima ana naama ana njara, kasen immii ana mboma.»\* <sup>8</sup> Pati naaten e fijirde no yogaabe e maabbe naatiri e fijirde nii. Dum saabii so ujunaaji noogay e taton neddo maayi jaannde wootere. <sup>9</sup> Pati itten koro Almasihu no yoga maabbe nii. Dum saabii so bolle kalki dum'en. <sup>10</sup> Pati njermitee no yoga maabbe nii. Dum saabii so malaa'ika baroowo oo halki ee. <sup>11</sup> Dum fuu wadii yalla ana laataanoo en misaalu, dum winndiraama faa dum waajoo en, enen wonbe e cakite jamaanu bee. <sup>12</sup> Dum nee, miiloowo ana darii fuu, wada hakkille pati booboo e leydi. <sup>13</sup> Walaa torra ittoowa koro hebuka on ka hefaali biibbe aadama. Laamdo yo koolniido, o dalataata torra koroowa burka on semmbe fawee e mon. Torra fuu koroowa on, o hokkan on no mbaawron munude dum, o hokkan on laawol no njaltiron e mum.

<sup>14</sup> Saabe dum, sakiraabe am horsu  e, ngoddee dewal tooruujii. <sup>15</sup> Mido haalirana on hono no on hakkilanteen nii, caree onon e ko'e mon ko mbii-mi koo. <sup>16</sup> Horde hiraande seniinde nde njetteten Laamdo kammari mum ndee, so en njarii nde, tama en ndeentaali e yiyyam Almasiihu dam? Buuru mo tayaten oo, so en jaamii mo, tama en ndeentaali e terde Almasiihu dee? <sup>17</sup> Tawi buuru oo yo gooto, enen duu, enen e heewde fuu, en terde goote, sabi eden njogii ngeduu e oon buuru gooto. <sup>18</sup> Taykee lejol Israa'iila ngol: tama yimbe ma  be jaamoo  e sadakaajii bee ndeentaali e Laamdo gadanaado ittirde sadaka ndee oo? <sup>19</sup> Mido yidi wiide tew cakkanaado tooruujii won ko woni naa? Naa tooru e hoore mum won ko woni? <sup>20</sup> Walaa! Ko njidu-mi wiide dee, ko heefere bee cakkotoo koo, sakketeey seydaani'en, wanaa Laamdo. Mi yida  a ndeenton and seydaani'en. <sup>21</sup> On mbaawaa yarde e horde Joomiraado ndee njaron kasen and horde seydaani'en, on mbaawaa jaamde e la'al Joomiraado ngal jaamon kasen and la'al seydaani'en bee. <sup>22</sup> Naa iirtude tikkere Joomiraado njid-den? Naa en miili eden buri mo semmbe?

*Haala ngadiree huunde fuu faa Laamdo teddinee*

<sup>23</sup>Mbii-don: «Huunde fuu ana dagii.» Ooho, kaa wanaa fuu nafata. So goonga, «huunde fuu ana dagii», kaa wanaa fuu naabata deental goondinbe ngal yeeso. <sup>24</sup>Pati fay gooto laatoo hammadi haaje mum tan, ndaarta naffaa wobbe bee duu. <sup>25</sup>Tew cootteteedo luumo fuu, odon mbaawi jaamirde dum hakkillaaji ci niijataa on tawa on lamndaaki yalla dum tew cakkanaado tooruujii naa wanaa. <sup>26</sup>Sabi «leydi e ko woni e mum fuu Joomiraado woodani.»<sup>†</sup> <sup>27</sup>So neddo mo goondinaali noddidi on, on njabbi nootaade, jaamon ko ndokke-don fuu, tawa hakkillaaji mon niijataa on. <sup>28</sup>Kaa so won biido on: «Dum ko sakkanaa tooruujii», nden, pati jaamee dum saabe biido non oo e saabe hakkille mum niijoowo dum. <sup>29</sup>Wanaa ko wartata e hakkillaaji mon onon kaalan-mi doo, ko wartata e hakkille biido non oo kaalan-mi.

Kaa fotaa ko hakkiile neddo goddo sara ndimaaku am.<sup>30</sup> So mido yetta Laamdo e dow ko jaaman-mi, ko wadi so mido bonkee e nduuu jaamdu ndu njettu-mi Laamdo kammari mum?

<sup>31</sup> Ndennoo, so on naaman, so on njaran naa ko ngadaton fuu, ngadiree dum faa Laamdo teddinee. <sup>32</sup> Pati laatanee fay gooto fergitere, wanaa Yahuudiyanikoobe wanaa be nganaa Yahuudiyanikoobe wanaa deental goondinbe Laamdo ngal. <sup>33</sup> Ngolliree no am nii, sabi mido

\* 10:7 Pergu 32.6 † 10:26 Jabuura 24.1

tewta ko welata yimõe fuu e dow huunde fuu, tawee mi tewtaali nafaa am miin tan, ko nafata heewõe tewtan-mi, yalla eõe kisinee.

## 11

<sup>1</sup> Nemmbee kam no nemmbiran-mi Almasiihu nii.

### *Haala banngal soomugol hoore*

<sup>2</sup> Mido yetta on ko micciti-don kam e huunde fuu koo, e ko njokku-don waajuuji di mbaajii-mi on dii koo. <sup>3</sup> Kaa noo, mido yidi paamon Almasiihu woni hooreejo gorko fuu, gorko woni hooreejo debbo, kasen duu Laamdo woni hooreejo Almasiihu. <sup>4</sup> Ndennoo, gorko fuu kippiido kufina so ana duwoo naa so ana haalta konngol ngol Laamdo loowi e mum ngol, hoynii hooreejo mum oo. <sup>5</sup> Kaa debbo fuu mo soomaaki so ana duwoo naa so ana haalta konngol ngol Laamdo loowi e mum ngol, hoynii hooreejo mum oo, sabi omo wa'i hono no o laõido nii. <sup>6</sup> Sabi so debbo soomaali hoore mum, yo mesu sukundu mum. Kaa so nii mesude hoore mum naa laõude nde ana yaannoo debbo, yo soomu hoore mum. <sup>7</sup> Gorko noo haanaa hippaade kufina, sabi yo mbaadi Laamdo, kajum e darja mum. Kaa debbo yo darja gorko. <sup>8</sup> Sabi wanaa gorko ittaa e debbo, debbo ittaa e gorko. <sup>9</sup> Wanaa gorko taganaa debbo, debbo taganaa gorko. <sup>10</sup> Saabe dum ana wajilibi e debbo soomude e hoore mum taagumansa baawde saabe malaa'ika'en. <sup>11</sup> Kaa dum e taweede, e ley haõõagol men e Joomiraado, debbo ana haõõii e gorko, gorko duu ana haõõii e debbo. <sup>12</sup> Sabi no debbo ittiraa e gorko nii, hono non debbo duu rimiraa gorko. Kaa dum fuu, to Laamdo dum iwi. <sup>13</sup> Caree onon e ko'e mon: yalla ana ñardi e debbo rewa Laamdo tawa soomaaki? <sup>14</sup> Wanaa neesu oo e hoore mum ana anndina on sukundu juutundu ana yaaginii e gorko, <sup>15</sup> kaa e debbo, yo darja? Sabi o hokkiraama sukundu juutundu yalla ana sudda hoore ndee. <sup>16</sup> Muuyndo yeddude dum fuu yo anndu en ngalaa oon aada, wanaa minen, wanaa deente goondinõe Laamdo dee.

### *Haala hiraande seniinde*

<sup>17</sup> Won ko njidu-mi yamirde on kasen, haala no kawritirton. Haala majjum mi waawaa yettude on, sabi kawrite mon dee naabataa on yeeso, to boni de naabata on. <sup>18</sup> Ko adii fuu, mi nanii so on kawritii, luurral ana hakkunde mon, kasen duu won ko ngoodin-mi hen. <sup>19</sup> Ana tilsi pelle-pelle ngada hakkunde mon, yalla hoolniiõe jaati wonõe e ley mon õee ana annditee. <sup>20</sup> So on kawritii e nokku gooto, wanaa hiraande Joomiraado ndee jaamaton. <sup>21</sup> Sabi gooto gooto mon fuu henoto jaamde hiraande mum faa õee doo njolba, õee too cigira. <sup>22</sup> Tama on ngalaa cuudi do kaan-don jaamde e yarde? Naa on yawõe deental goondinõe Laamdo ngal? Naa odon njidi hoynude õee ngalaa ko njogii õee? Ko mbiyan-mi on? Mi yetta on naa? Mi waawataa yettude on e dum.

<sup>23</sup> Sabi miin, e Joomiraado kebu-mi ko njottin-mi on koo: e ley jemma mo Joomiraado men Iisaa jammaba e mum oo, o õami buuru, <sup>24</sup> o yetti Laamdo, o heli buuru oo, o wii: «Dum yo terde am keliraade kammari mon. Ngadee dum faa miccito-don kam.» <sup>25</sup> Hono nii, nde be tilii hiraande ndee, o õami horde peguujam, o wii: «Ndee doo horde woni aadi keyri tabintiniraandi yiyyam am. Faa nde njaraton fuu, miccito-don kam.» <sup>26</sup> Sabi nde jaamaton oon buuru e nde njaraton nden horde peguujam fuu, odon mbaajoo haala maayde Joomiraado faa nde o warti.

<sup>27</sup> Dum nee, neddo fuu jaamirdo buuru Joomiraado no haanaa, yardi horde makko no haanaa, oon luuttii terde Joomiraado dee e yiyyam makko dam fuu. <sup>28</sup> Ndennoo, gooto fuu yo yeewto hoore mum fade mum jaamde oon buuru naa yarde nden horde. <sup>29</sup> Sabi neddo fuu jaamdo buuru oo so yari horde ndee, so miilaaki dum terde Joomiraado dee, jukkete saabe ko jaami koo e ko yari koo. <sup>30</sup> Dum saabii so õawõe e lo'üfe ana keewi e mon, kasen duu won yawtuõe. <sup>31</sup> Sinndo eden yeewtotonoo ko'e men, en yeewtatanooke. <sup>32</sup> Kaa Joomiraado ana sara en faa ne'a en, pati njukkide-den e aduna oo.

<sup>33</sup> Ndennoo sakiraõe am, so odon kawrita faa jaamdon hiraande Joomiraado ndee, ndoomondiree. <sup>34</sup> So tawii won jolbudo e mon, yo jaamu to suudu mum too, pati kawrite mon dee laatanoo on jukkungo. Kaa ko heddi koo mi biltan dum so mi warii.

## 12

### *Haala dokke Ruuhu Ceniido*

<sup>1</sup> Haala dokke de Ruuhu Ceniido hokkata dee, sakiraõe, mido yidi paamon de faa gasa. <sup>2</sup> Nde ngonno-don heeferse ndee, odon anndi no tooruucci muumi dii majjiniri on. <sup>3</sup> Dum wadi so njidu-mi paamon dum doo: fay gooto waawaa wiide «Iisaa yo kudaado» so Ruuhu Laamdo ana e mum, kasen duu fay gooto waawaa wiide «Iisaa yo Joomiraado» so Ruuhu Ceniido walaa e mum.

<sup>4</sup> Dokke de Ruuhu Ceniido hokkata en dee ana ceerti sifaaji, kaa Ruuhu oo yo gooto. <sup>5</sup> Gollanoõe deental see ana ceerti sifaaji, kaa Joomiraado oo yo gooto. <sup>6</sup> Golleeji ana ceerti sifaaji, kaa Laamdo gooto oo kajum gollata di fuu ley yimbe 6ee fuu. <sup>7</sup> Ruuhu Laamdo oo ana baanngina e gooto fuu dokkal nafoowal deental ngal fuu. <sup>8</sup> O hokka oodoo waaju kebbinaado hakkilantaaku, o hokka ootoo waaju kebbinaado anndal. <sup>9</sup> Kanko Ruuhu gooto oo hokkata oodoo goondinal, ootoo sellinde jawbe. <sup>10</sup> O hokka oodoo wadude kaayde, ootoo haaltude konngol ngol Laamdo loowi e mum ngol, oodoo seenndude ko woni seydaani'en e Ruuhu goonga oo, ootoo haalirde demde Ruuhu Ceniido, o hokka goddo duu maandinde deen demde. <sup>11</sup> Ruuhu gooto oo tan gollata dum fuu, feccirana gooto fuu dokkal ngal muuyi.

### *Haala caldi keewdi ði neddo gooto*

<sup>12</sup> E ley dum, no neddo gooto jogorii caldi keewdi nii, e no caldi dii e heewde fuu laatorii neddo gooto nii, hono non Almasiihu duu wa'i. <sup>13</sup> Sabi en fuu en mbatisiraama Ruuhu gooto faa laato-den neddo gooto, so en Yahuudiyankooõe naa so en nganaa Yahuudiyankooõe, so en rimbe naa so en riimaybe, kasen duu en fuu en njaraama Ruuhu gooto oo.

<sup>14</sup> Neddo wanaa salndu wooturu, yo caldi keewdi. <sup>15</sup> So koyngal wii: «Nde mi wanaa junngo, mi jeyaaka e neddo oo», dum hadataa ngal jeyeede e makko. <sup>16</sup> Naa so nowru wii: «Nde mi wanaa yitere, mi jeyaaka e neddo oo», dum hadataa ndu jeyeede e makko. <sup>17</sup> So caldi dii fuu yo gite, hono neddo oo nanirta? Naa so di fuu di noppo, hono neddo oo maatirta ko uurata e ko luubata? <sup>18</sup> Kaa noo, Laamdo reentini caldi dii fuu e neddo gooto hono no muuyiri nii. <sup>19</sup> Salndu wooturu laatataako neddo. <sup>20</sup> Ndennoo, caldi dii ana keewi, kaa neddo oo yo gooto. <sup>21</sup> Yitere waawaa wiide juningo: «Haaje am walaa e maa.» Hoore duu waawaa wiide koyde: «Haaje am walaa e mon.» <sup>22</sup> Kaa noo, caldi neddo nannduci e burdi lo'ude dii, diin ngoni kasindinaadi sanne. <sup>23</sup> Di nanngir-den burdi jaasude dii, diin bur-den teddinde. Burdi gaccinaade dii, diin bur-den suufude, <sup>24</sup> sabi caldi men goddi dii kasindinaa e suufede. Laamdo reentini caldi fuu, hokki caldi lo'udi dii teddeengal, <sup>25</sup> pati ceeraagu wada e neddo oo, yalla caldi dii fuu ana tiidondira. <sup>26</sup> So tawii salndu wooturu naawii, goddi dii fuu naawdan e mum. So salndu wooturu teddinaama, goddi dii fuu mbeltidoto e mum.

<sup>27</sup> Onon, on fuu on terde Almasiihu, gooto e mon fuu yo salndu e caldi makko dii. <sup>28</sup> Nii Laamdo darniri deental goondinbe ngal: ko adii fuu o joyyini nelaabe, o jokkini hen haaltoõe konngol ngol Laamdo loowi e mum'en, o jokkintini hen jannginoõe, caggal dum, wadoõe kaayde e sellinoõe jawbe e faabotoõe e ardotoõe, kajum e haaliroõe demde Ruuhu. <sup>29</sup> Yimbe fuu yo nelaabe naa? Naa haaltoõe konngol ngol Laamdo loowi e mum'en? Naa jannginoõe? Yimbe fuu ngadata kaayde naa? <sup>30</sup> Yimbe fuu ndokkaa sellinde jawbe naa? Naa haalirde demde Ruuhu? Naa maandinde deen demde? <sup>31</sup> Hono non, tiinnee, poodanee dokke surde heewde nafaa dee.

Kaa jooni mi hollan on laawol burnogluu moyyude ngol.

## 13

### *Haala jilli*

<sup>1</sup> So kaalir-mi demde yimbe e demde malaa'ika'en, kaa fuu so jilli ngalaa e am, mi lennguru senyooru naa mi mbaggu dinndoowo tan. <sup>2</sup> So Laamdo loowii kam konngol mum mi anna sirriji fuu e annde fuu, naa so tawraa-mi goondinal faa mi sottina baamle kaaye, kaa fuu so jilli ngalaa e am, mi wanaa fay huunde. <sup>3</sup> So ndokku-mi jawdi am fuu misikiina'en naa so ndokkitir-mi tew am duppee, kaa fuu so jilli ngalaa e am, nafataa kam fay huunde.

<sup>4</sup> Jilli ana njogii munal, ana njogii moyyuki. Di ngaldaa e haasidaaku, di ngaldaa e haawtaare, mawninkinaare duu waldaa e majji. <sup>5</sup> Jilli ngaddataa ko yaannii, nganaa hammadi haaje mum, edi caloo metti, di caawataa rikke. <sup>6</sup> Jilli kuyantaa oonaare, goonga di kuyanta. <sup>7</sup> Jilli ana njaafuu fuu, ana kooloo fuu, ana njoonndoroo fuu, ana muuja fuu.

<sup>8</sup> Jilli mbonataa abada. Haaltude ko Laamdo loowi e men koo ana timma, demde ana timma, anndal ana timma. <sup>9</sup> Sabi anndal men ana jaki, looweede men konngol Laamdo ana jaki, <sup>10</sup> kaa so ko hiibei koo warii, ko jaki koo fuu wittan. <sup>11</sup> Nde mi cukalel ndee, no cukalel haaldata nii kaaldan-mi, no cukalel miilortoo nii miilortoo-mi, no cukalel yiirata nii njiiran-mi. Kaa ko mawnu-mi koo, mi seerii e golle cukaaku. <sup>12</sup> Jooni en njiyatataa kulle dee faa laabe, ko wa'i hono no timtorgal niigungal nii njiiraten. Kaa wakkati waran en njiiran de gite men jaati. Jooni anndal am hiibaaali, kaa wakkati waran nde anndan-mi faa hiibaa, no Laamdo anndiri kam faa hiibei nii.

<sup>13</sup> Ndennoo, kulle tati ngoni duumotoode: goondinal e jikke e jilli. Kaa jilli buri de fuu teddude.

**14***Haala dokke Ruuhu Ceniido*

<sup>1</sup> Ndennoo, poodanee jilli no mbaawru-don fuu, tewton kasen dokke Ruuhu Ceniido dee. Ko õur-don fuu haande tewtude e majje, haaltude konngol ngol Laamdo loowi e mon ngol. <sup>2</sup> Sabi kaaliroowo demde Ruuhu e Laamdo haaldata, wanaa e yimbe. Sabi fay gooto faamataa ko joomum haalata, Ruuhu oo hokkata joomum haalde goongaaji Laamdo tedduci cuudaadi dii. <sup>3</sup> Kaa loowaado konngol Laamdo oo, yimbe haalanta, faa naâa dum'en yeeso e ley goondind, hokka dum'en semmbe, bûubina berde mum'en. <sup>4</sup> Kaaliroowo demde Ruuhu, hoore mum naâata yeeso, loowaado konngol Laamdo oo noo, deental goondinbe naâata yeeso. <sup>5</sup> Mido yidu kaaliron demde Ruuhu on fuu, kaa ko õurani kam, kaalton konngol ngol Laamdo loowi e mon ngol. Sabi kaalitoowo konngol ngol Laamdo loowi e mum õuri kaaliroowo demde Ruuhu, so wanaa tawa neddo ana waawi maandinbe, yalla deental goondinbe ngal ana yaara yeeso.

<sup>6</sup> Ndennoo sakiraabe, so mi wariino to mon mi haalirananno on demde Ruuhu, so haala am waddanaalino on ko Laamdo baannginani kam koo, naa anndal, naa konngol ngol Laamdo loowi kam ngol, naa waaju, kodum dum fuu dum nafata on? <sup>7</sup> Tayko-den kaaki wanngiyaare hono sereendu naa hoddu. So õi piyaka faa laaâa, hono annditirten ko sereendu nduu fiyata naa ko hoddu nduu hodata? <sup>8</sup> Naa so puufoowo buututal wolde fuufaali faa laaâa, homo lanndinantoo wolde ndee? <sup>9</sup> Hono non, onon duu, so on njottinirii kabaaru oo demde Ruuhu tawa ko famminii fuu walaa hen, hono paamirte-don? On tippike haala mon! <sup>10</sup> No demde dee keewiri e no ceertiri e aduna oo nii fuu, walaa haala ka nanataake hen. <sup>11</sup> Kaa so neddo haaldii e am demngal ngal mi nanataa, mi laatike janano mum, laatike janano am. <sup>12</sup> Hono non, onon duu e ley foodanagol mon dokke Ruuhu dee, tewtee dokke nabooje deental goondinbe ngal yeeso dee, tewtee de faa sanne.

<sup>13</sup> Dum nee, kaaliroowo demde Ruuhu fuu jaagoo Laamdo waawde maandinbe de. <sup>14</sup> Sabi so mido jaagoro Laamdo demde Ruuhu, goonga, yonki am ana e duwaawu, kaa mi faamataa miin e hoore am. <sup>15</sup> Ndennoo, hono ngadan-mi? Mi jaagorto yonki am, mi jaagorto hakkille am. Mi yimiran yonki am, mi yimiran hakkille am. <sup>16</sup> So wanaa dum, so a yettierii Laamdo demde Ruuhu tan, hono tawaado ton mo woowaa dum waawirta wiide «Aamiina» e yettugol maa ngol? Sabi joomum nanataa ko kaalataa koo. <sup>17</sup> Fay so yettugol maa ngol ana woodi sanne, ngol nafataa joomum. <sup>18</sup> Mido yetta Laamdo, ko õur-mi on on fuu heewde haalirde demde Ruuhu koo. <sup>19</sup> Kaa e ley deental goondinbe, haalde konngi joy pamminiidi baajotoodi heddiibi see, õurani kam haalirde konngi ujunaaji ujunaaji demde Ruuhu.

<sup>20</sup> Sakiraabe, pati laatee õe ngalaa hakkille no cukaloy nii. Laatee cukaloy banngal bone, kaa laatee baaliki'en banngal hakkille. <sup>21</sup> Nii winndorii e Sariya:

«Yimbe õe demde godde,  
kajum e kundude wõõbe  
kaaliranam-mi yimbe am bee.

Dum fuu e taweede,

õe kettintaako kam.»\*

Hono non Joomiraado wiiri.

<sup>22</sup> Hono non, demde Ruuhu dee yo maande do õe ngoondinaali see, kaa do goondinbe see, wanaa non worri. Haaltude konngol ngol Laamdo loowi e mum duu yo maande do goondinbe see, kaa do õe ngoondinaali see, wanaa non worri. <sup>23</sup> Ndennoo, so yimbe deental goondinbe ngal fuu njoodiima, so õe fuu õe naatii e haalirde demde Ruuhu, so yimbe õe mboowaa dum naa õe ngoondinaali ngarii, joomum'en mbiyatada on haandibee naa? <sup>24</sup> Naa so gooto e õeen yimbe warii, tawii yimbe fuu ana kaalta konngol ngol Laamdo loowi e mum'en ngol, ko o nanataa koo fuu ana fammina mo luutti makko, ana sara mo duu, <sup>25</sup> sirriji õernde makko baanginee, o diccoo o sujidana Laamdo, o wiya: «So goonga nii, Laamdo ana wondi e mon.»

*No deental goondinbe haani worrude*

<sup>26</sup> Ndennoo sakiraabe, hono wadetee? So on kawritii, dokkaado yimre e dokkaado janngingol e dokkaado ko Laamdo baannginani dum e dokkaado haalirde demde Ruuhu e dokkaado maandinbe de, fuu yo wadire faa naâa deental goondinbe ngal yeeso. <sup>27</sup> So demde Ruuhu kaalirtee, didon naa taton so heewii kaani wadude dum, gooto fuu e wakkati mum. Yo gooto mon maandin. <sup>28</sup> Kaa so maandinoowo walaa, joomum deyyinoo e ley deental ngal, gunndoo e ley õernde mum, haalda e Laamdo. <sup>29</sup> Didon naa taton kaalta konngol ngol Laamdo loowi e mum'en, heddiibi see cara haala maâbe kaa. <sup>30</sup> Kaa so won ko Laamdo

\* 14:21 Esaaya 28.11-12

6annginani gooto e joodsiõõ bee, yo kaaloowo arano oo deyyino. <sup>31</sup> Sabi on fuu, odon mbaawi haaltude konngol ngol Laamdo loowi e mon ngol, tawa gooto gooto kaaldaton, yalla deental ngal fuu ana heõa anndal e cuusal. <sup>32</sup> Haaltooõe konngol ngol Laamdo loowi e mum'en bee ana poti waawde jogaade konngol mum'en ngol, <sup>33</sup> sabi Laamdo wadataa ko jiiõata kawrital, o Laamdo gaddoowo jam.

No worri e deente seniõõbee dee fuu nii, <sup>34</sup> yo rewõõe ndeyyino ley deente dee, sabi õe ndunjanaaka haalde ley hen. Yo õe dowtoro no sariya oo wiiri nii. <sup>35</sup> So tawii won ko õe njõõci faamtinaade, yo õe accu faa õe koota, õe lamndoo jom'en cuudi maõõe. Sabi konngol debbo nanee ley deental goondinõõbe ana yaaginii. <sup>36</sup> Naa odon miila konngol Laamdo ngol to mon iwi? Naa onon tan kebi ngol?

<sup>37</sup> Neddo fuu miiludo ana waawi haaltude konngol ngol Laamdo loowi e mum ngol naa miiludo yo kebudo Ruuhu Ceniido, ana haani annditidde ko mbinnandan-mi faade e mon koo yo yamiroore Joomiraado. <sup>38</sup> Mo annditali dum fuu, Laamdo annditataa joomum. <sup>39</sup> Ndennoo sakiraõõe, poodeane looweede konngol Laamdo, kasen duu pati kadee demde Ruuhu haalireede. <sup>40</sup> Kaa huunde fuu yo wadire no haaniri, tawee jiiõaaki.

## 15

### *Haala immital Almasiihu*

<sup>1</sup> Sakiraõõe, mido miccintina on Kabaaru Lobbo mo njottin-mi on, mo njabu-don, mo jiiõubu-don e mum oo. <sup>2</sup> Saabe oon Kabaaru kisirinte-don so tawii on nanngirii mo no kaalanir-mi on nii. So wanaa dum, goondinal mon laatoto meere.

<sup>3</sup> Mi yottini on kabaaru furdö faydinde mo kebu-mi oo, dum woni: Almasiihu maayirii saabe luutu men, no Binndi õi mbiiri nii, <sup>4</sup> o iraama, o immitike e jalooma tataõoo no Binndi õi mbiiri nii, <sup>5</sup> o 6anngani Piyeer, caggal dum, o 6anngani taalibaõõe sappo e didon õõee, <sup>6</sup> caggal dum, o 6anngani ko õuri sakiraõõe teemede njoyon darannnde wootere. Ko õuri heewde e maõõe ana nguuri faa jooni, kaa won yawtube e maõõe. <sup>7</sup> Jokkiti hen kasen, o 6anngani Yaakuuba, o 6anngani nelaõõe õõee fuu. <sup>8</sup> Ko sakitii koo, o 6anngani kam miin baado no 6ingel ngel lebbi mum kiõõaali nii. <sup>9</sup> Sabi miin õuri nelaõõe õõee fuu famduude, mi fotaa fay noddireede nelaado, sabi mi torriino deental goondinõõbe Laamdo ngal. <sup>10</sup> Jonnoo, saabe moyyere Laamdo ndee laatorii-mi ko ngon-mi koo. Moyyere nde mo wadani kam ndee duu laatanaaki kam meere, sabi miin õuri nelaõõe õõee fuu gollude. So goonga, wanaa miin gollata, moyyere Laamdo wonnde e am ndee gollata. <sup>11</sup> Kaa so miin so kamõõe, fuu fotu, hono non min mbaajorii, hono non ngoondinir-don.

### *Haala immital maayõõe*

<sup>12</sup> Jooni, miden mbaajoo Almasiihu immitike e maayde. Ndennoo, hono yoga mon wiirata maayõõe immitataako? <sup>13</sup> Sinndo immital maayõõe walaa, Almasiihu e hoore mum immitaaki, <sup>14</sup> so Almasiihu immitaaki, waaju amen yo meere, goondinal mon duu yo meere. <sup>15</sup> Edum holla duu ko min kaali haala Laamdo koo yo fenaande, sabi min mbii Laamdo immitinti Almasiihu, tawi wanaa goonga so maayõõe immitataako. <sup>16</sup> Sabi so maayõõe immitatako, Almasiihu e hoore mum immitaaki, <sup>17</sup> so Almasiihu immitaaki, goondinal mon yo meere, odon ngondi e luutti mon faa jooni, <sup>18</sup> maaynoõõe e ley goondinal lisaa Almasiihu õõee duu kalkike. <sup>19</sup> So jikke men e Almasiihu e ley õam doo nguurndam tan nafannoo, enen õuranno yimõõe fuu yurminaade.

<sup>20</sup> Kaa jooni, Almasiihu immitintaama e maayde, laatike arano e immitotoõõe. <sup>21</sup> Sabi no neddo gooto sabinbiniri maayõõe nii, hono non kasen neddo gooto sabinbiniri immital e maayde. <sup>22</sup> No yimõõe fuu maayirta saabe Aadama nii, hono non kasen yimõõe fuu immitintirtee saabe Almasiihu, <sup>23</sup> kaa gooto fuu e wakkati mum immitotoo. Dum woni Almasiihu woni arano oo, caggal dum, õe o jey õõee njokka hen jannnde gartol makko. <sup>24</sup> So dumbettike, dargal daroo, Almasiihu halka kaanankaaku e baawde e semmbe fuu, totta Laamdo Baabiraado men oo Laamu oo. <sup>25</sup> Sabi ana tilsi Almasiihu laamoo faa nde Laamdo wadi o yaõõa wayõõe õõee fuu. <sup>26</sup> Gajo cakitotoodo halkeede oo yo maayde, <sup>27</sup> sabi ana wiindii: «Laamdo wadii huunde fuu ley koyde makko.» \* Kaa so wiyyama non, tayoral Laamdo gadudo huunde fuu ley koyde makko oo walaa hen. <sup>28</sup> So huunde fuu heedii ley Bajjo oo, Bajjo oo e hoore mum heedan ley gadudo huunde fuu ley makko oo faa Laamdo laamoo huunde fuu e neddo fuu.

<sup>29</sup> Hayá, won yogaõõe jaõõõõe lootireede lootogal batisima saabe maayõõe. So tawii maayõõe immitataakono, kodum wadi so yimõõe ana mbatisiree saabe maõõe? <sup>30</sup> Enen e ko'e men, ko wadi so eden njarroo wakkati fuu naatude e farati? <sup>31</sup> Sakiraõõe, jannnde fuu mido hosa maayde saabe golleeji am õi. Mido haalana on dum kammari ko mantortoo-mi on saabe habõõgol mon e Joomiraado men lisaa Almasiihu koo. <sup>32</sup> So no neddo wa'i nii tan

miilortonoo-mi ko kaõannoo-mi e waasooji ley Efeesu koo, kodum dum nafata kam? So maayõe immitataakono, ngaden no wiiraa nii: «Naamen njaren, sabi en maayoõe janno.»<sup>33</sup> Pati njaayree ko'e mon: «Yaadude e bonõe ana bonna needi.»<sup>34</sup> Ngartiree hakkillaja mon e ko haani, pati luuttee. Sabi yoga mon anndaa Laamdo. Ko mbiiru-mi non yalla odon njaagoo.

<sup>35</sup> Kaa dajan lamndiido: «Hono maayõe immitortoo? Terde hode õe tawretee?»<sup>36</sup> Pamaro hakkill! Aawdi ndi aaw-daa fuu, sinaa waata so fuda.<sup>37</sup> Aawdi ndi aaw-daa fuu, so gawri so goddum yo wabbere tan, a aawataa wullere ndee e hoore mum.<sup>38</sup> Caggal dum, Laamdo waadata ndi sii wullere nde muuyi, aawdi fuu e sii wullere mum.<sup>39</sup> Kulle jogiide yonki duu ngaldaa terde: yimõe terde mum, daabaaaji terde mum, pooli terde mum, lõddi terde mum.<sup>40</sup> Ana woodi terde kammunkooje e terde leydinkooje. Kammunkooje dee e ñjari mum, leydinkooje dee e ñjari mum.<sup>41</sup> Naange e jalbugol mum, lewru e jalbugol mum, koode e jalbugol mum. Fay koode dee e ko'e mum'en jalbugol mum'en ana seerti.

<sup>42</sup> Immital maayõe duu hono non worri. Ko iretee koo ana ñola, ko immitotoo koo nolataa.<sup>43</sup> Ko iretee koo ana hoyi, ko immitotoo koo ana teddi. Ko iretee koo ana lo'i, ko immitotoo koo ana jogii semmbe.<sup>44</sup> Ko iretee koo yo terde leydinkooje, ko immitotoo koo yo terde ruuhunkooje. Terde leydinkooje ana ngoodi, ndennoo terde ruuhunkooje duu ana ngoodi.<sup>45</sup> Dum wadi so ana winndii: «Neddo arano oo, dum woni Aadama, laatii yonki wuuarki.» Aadama cakito oo noo yo Ruuhu dokkoowo nguurndam.<sup>46</sup> Wanaa ko jeyaa e Ruuhu koo ardii warde, ko jeyaa e leydi koo ardii warde, caggal dum, ko jeyaa e Ruuhu koo jokki hen.<sup>47</sup> Neddo arano oo e leydi iwi, leydi moyyiniraa. Neddo didaõo oo e kammu iwi.<sup>48</sup> No iwõo e leydi oo wa'i nii, hono non iwõe e leydi õee duu mba'i. No iwõo dow kammu oo wa'i nii, hono non iwõe dow kammu õee duu mba'ata.<sup>49</sup> Hono no nanndir-den e iwõo e leydi oo nii, hono non nanndirten e iwõo dow kammu oo duu.<sup>50</sup> Sakiraõe, ko kaalunoomi koo annii: tew e yiyam mbaawataa naatude e Laamu Laamdo oo, kasen duu ko ñolataa waawataa tawreede ko ñolataa.

<sup>51</sup> Mido õannginana on sirri: en maayataa en fuu, kaa en fuu en mbayilitete<sup>52</sup> e wakkati gooto, no himyaõe yitere nii, so buutatal cakite jamaanu ngal fuufi. Sabi ngal fuufi, maayõe bõe immitotoo bõe ñolataa, enen, mbaylite-den.<sup>53</sup> E ley dum, ana tilsi terde ñoloõje dee boornoo ko ñolataa, terde maayooje dee duu boornoo ko maayataa.<sup>54</sup> So terde ñoloõje dee boornike ko ñolataa, maayooje dee boornike ko maayataa, e oon wakkati, ngol konngol binndaangol tabitan: «Jaalogal modii maayde.»<sup>†</sup>

<sup>55</sup> «Maayde, hoto jaalogal maa woni?

Maayde, hoto semmbe maa woni?»<sup>‡</sup>

<sup>56</sup> Maayde, e luuttal hefata semmbe, luuttal duu e Sariya oo hefata baawde.<sup>57</sup> Kaa jettooje ngoodanii Laamdo dokkiroovo en jaalogal saabe Joomiraado men lisaa Almasiihu.

<sup>58</sup> Ndennoo sakiraõe am horsubõe, laatee joottiõe õe ndimmbataako, õeydo-don ñannde fuu soobaade e golle Joomiraado oo, sabi odon anndi ko ngollaton e haõbagol mon e Joomiraado koo wanaa meere.

## 16

### *Haala wallugol seniõõe wonõe ngalluure Urusaliima*

<sup>1</sup> Jooni kaa, haala ballal mon faade e seniõõe wonõe ngalluure Urusaliima õee, onon duu ngadon no njamar-mi deente goondinõe gondie leydi Galaatiya dee nii.<sup>2</sup> Alan fuu, gooto e mon fuu moõõta ko waawi, pati ndoomon faa mi wara, kawrinon ballal ngal.<sup>3</sup> So mi warii, mi waddanan õe cubõto-don õee bataakijji anndinooji ko õe ngoni, faa õe naba ballal mon ngal Urusaliima.<sup>4</sup> So ana foti ko mi yaha miin duu, min njaadan.

### *Haala anniyaaji Pool*

<sup>5</sup> Mi garoovo to mon so mi iwii leydi Makedoniya, sabi ton yaõõortoo-mi.<sup>6</sup> Ana moyya mi faõõa to mon seeda naa mi dabba ton jaati. E ley dum odon mbaawi yooõinde kam faa mi yaha to njahan-mi fuu.<sup>7</sup> Sabi e ngol laawol, mi yidaa fanjude on tan so mi yaõõoo, mido yidi faõõu to mon seeda so Joomiraado jaõii.<sup>8</sup> Kaa mi faõõan do Efeesu doo faa iidi Pantekot,<sup>9</sup> sabi mi heõii doo laawol manngol no mi gollira golle nafoowo, wayõe duu ana keewi.

<sup>10</sup> So Timote warii e mon, njaõõõe dum faa gasa pati hula, sabi Joomiraado o gollanta no am nii.<sup>11</sup> Ndennoo, pati fay gooto yawa mo. Njooõinee mo e laawol ngol yalla omo warta e am e jam, sabi mido doomi mo, kanko e sakiraõe õee.

<sup>12</sup> Haya, sakiike men Apollos, mi ndaardii mo cili keewdi o yaada e sakiraõe õee to mon, kaa faa hannde o jaõaali fey. O waran so o heõindimma.

### *Baynondiral*

<sup>13</sup> Njeertee, niifée e ley goondinal, laatee worōe, 6eydoro-don semmbe. <sup>14</sup> Ko ngadaton fuu, ngadiree cūm jilli.

<sup>15</sup> Odon anndi Istifanas e koreeji mum. Kajum'en adii fuu goondinde ley leydi Akaya, 6e tiinnike e gollande seniibē 6ee. Sakiraabē, mido waajoo on: <sup>16</sup> njarranee yimbe wa'u6e non, kajum e gollidoobē e ma66e, tiinniibē e golle oo fuu. <sup>17</sup> Mido weltii e garol Istifanas e Fortunatus e Akaykus ngol. Be ngadanii kam ko onon on mbaawaa wadande kam saabe waasude mon taweede. <sup>18</sup> Be mbaaltinii hakkille am, kajum e hakkillaaji mon fuu. Teddinee hono ma66e.

<sup>19</sup> Deente goondinbe gonde leydi Asiya dee ana njowta on. Akilas e genndum Piriskilla e deental goondinbe kawrooval galle ma66e ngal ana njowta on sanne e innde Joomiraado. <sup>20</sup> Sakiraabē fee fuu ana njowta on. Gooto gooto mon fuu jowtira sakiike mum jowtaango wondungo e jilli.

<sup>21</sup> E junngo am jaati mbinndiran-mi ngoo doo jowtaango: miin Pool mido jowta on. <sup>22</sup> Neddo fuu mo yidaa Joomiraado, kuddi woodanii cūm! Joomiraado amen Iisaa, war! <sup>23</sup> Yo hinnee Joomiraado men Iisaa wonu e mon! <sup>24</sup> Jilli am ana e mon on fuu saabe ha66agol men e Iisaa Almasiihu.

## Bataaki Pool dīdābo faade e Korintunkooōe

<sup>1</sup> Oo 6ataaki ga am iwri, miin Pool nelaado Iisaa Almasiihu e sago Laamdo, kajum e sakiike men Timote. Miden njowta deental Laamdo gonnal Korintu ngal, minden njowta seniife wonbe leydi Akaya 6ee fuu. <sup>2</sup> Yo on kebu moyyere e jam iwde e Baabiraado men Laamdo e Joomiraado men Iisaa Almasiihu.

### No Pool yettiri Laamdo

<sup>3</sup> Jettoje ngoodanii Laamdo Baaba Joomiraado men Iisaa Almasiihu. Kanko woni Baabiraado jom yurmeende, o Laamdo 6uu6inoowo berde faade e huunde fuu. <sup>4</sup> Kanko 6uu6inta berde men e ley torraaji men fuu, yalla enen duu, eden mbaawa 6uu6inde berde wonbe e sii torraaji fuu no kanko o 6uu6inirta berde men nii. <sup>5</sup> Sabi, no njogori-den ngedu e torraaji Almasiihu keewdi dii nii, hono non Almasiihu duu 6uu6inirta berde men. <sup>6</sup> So min torraama, dum faa kisine-don, berde mon 6uu6a. So berde amen 6uu6inaama minen, dum yalla berde mon ana 6uu6a, mbaawon mujude sii torraaji ci min torreetee minen e ko'e amen dii. <sup>7</sup> Jikke amen e moodon ana selli, sabi minden anndi no njogori-den ngedu e torraaji amen dii nii, hono non kasen njogori-den ngedu e 6uu6inegol berde ngol min ndokkaa ngol duu.

<sup>8</sup> Sakiraa6e, minden njidi anndinde on torraaji kewtiidi min e leydi Asiya dii. Torraaji kewtiidi min ton dii ana ya66itii sanne faa min tayi jikke fay e yonkiji amen. <sup>9</sup> Ana wa'anno min hono no min saraabe sariya wareede. Kaa noo, dum wadirii pati min pawa jikke amen e ko'e amen, kaa min pawa de e Laamdo immintinoowo maay6e oo. <sup>10</sup> Kanko danndi min e nden maayde, o danndan min kasen duu. E makko jaati min pawi jikke o danndan min kasen <sup>11</sup> e ley ko mballirton min duwaawuuji mon koo, yalla moyyere nde min kebirta duwaawuuji yimbe heew6e ndee ana wada heew6e njetta Laamdo saabe amen.

### Haala bantugol Pool

<sup>12</sup> Senaare e laa6al berde iwgali to Laamdo min nguurdii e aduna oo, sako hakkunde mon. Dum woni jaayo amen, kasen duu berde amen ana mbaaltii e majjum. Min njokkaali hakkilantaaku 6i66e aadama, hinnee Laamdo dowi min. <sup>13</sup> Sabi ko min mbinndanta on koo, fay huunde walaa ley hen so wanaa ko njanngaton so paamon. Mido yidi paamon <sup>14</sup> ko puudu-don faamude jooni koo faa laa6a: jaandge gartol Joomiraado men Iisaa min mantorto on hono no onon duu mantorto-don min nii.

<sup>15</sup> Saabe nden hoolaare anniyorinoo-mi arannde warde to mon yalla odon ceyoo cili didi. <sup>16</sup> Ko njidunoo-mi dee, mi fanja to mon, mi yaha leydi Makedoniya, caggal dum, mi warta to mon kasen lanndinano-don kam mi yaha leydi Yahuudiya. <sup>17</sup> Nde mbiyan-mi mi waran to mon too ndee, mi soobaaki naa? So mi fellisii huunde, tama muuyde am tan ngadan-mi faa dum waddana ooho e a'aa fuu taweede e am? <sup>18</sup> No Laamdo laatorii koolniido nii, hono nor konngol ngol min kaalani on ngol waasiri laatorade ooho e a'aa. <sup>19</sup> Sabi Iisaa Almasiihu Bii Laamdo oo wanaano ooho e a'aa: ooho tan woni e makko. Kanko woni mo miin e Silas e Timote min mbaajii kabaaru mum to mon too oo. <sup>20</sup> Sabi podooje Laamdo dee fuu tabitii e ley makko. Ndennoo enen duu, kanko mbiiraten Aamiina faa Laamdo teddinee. <sup>21</sup> Laamdo jaati ju66ini min, minen e mon fuu, ha66agol men e Almasiihu. Kanko jaati su66i en. <sup>22</sup> Kasen kanko wadi maande makko e men, o loowi Ruuhu makko e berde men laatoo pi6iraado moyyereeji di o mo6tani en dii.

<sup>23</sup> Laamdo ceennu-mi, yurmaade on hadi kam wirfitaade Korintu. <sup>24</sup> Wanaa yifude dawrande goondinal moodon - sabi odon tabiti e goondinal ngal - ko min njidi dee, wallondirde e moodon faa ceyo-don.

## 2

<sup>1</sup> Dum nee, mi fellisiino mi wirfataako to mon, pati mi waddana on sugulla kasen. <sup>2</sup> Sabi so mi sunlinii on, homo seynata kam so wanaa onon 6e curlin-mi 6ee? <sup>3</sup> Dum wadi so mbinndir-mi no mbinndir-mi nii e ley 6ataaki am oo. Mi yidaano warde to mon so fotube seynude kam 6ee cujlinaa kam. Mido hoolii on fuu seyo am yo seyo mon on fuu. <sup>4</sup> Ruubu e bernde mettunde e gondi keewdi mbinndiran-mi on. Mi yidaaa sunlinde on, ko njidi-mi dee, anndinde on no jilli am poti mawnude e mon on fuu.

### No Pool yaaforii toopudo oo

<sup>5</sup> So gooto e mon laati6e sabaabu sunu, wanaa miin o suni, on fuu - naa yoga e moodon, pati mi yawta goonga. <sup>6</sup> Jukkungo ngo 6urbe heewde e mon njukki joomum ngoo heyii, <sup>7</sup> jooni kaa, ko 6uri moyyude dee: njaafod-on mo, koomton mo pati mboy-yonki jaaloo

mo. <sup>8</sup> Ndennoo, mido ndaarda on tabintinon jilli mon e makko. <sup>9</sup> Sabi ittude koro mon saabanii kam winndande on kasen faa mi annda odon dwtanii kam. <sup>10</sup> Mo njaafi-don fuu mi yaafoto dum miin duu. Banngal am, ko njaafotoo-mi koo – so won ko kaan-mi yaafaade mo – mi yaafoto dum yeeso Almasiihu faa nafa on <sup>11</sup> pati Iibiliisa jammboo en, sabi eden anndi anniyaaji mum.

### *Haala jaalogal Almasiihu*

<sup>12</sup> Nde njaa-mi Torowas faa mi waajoo Kabaaru Lobbo haala Almasiihu oo ndee, mi tawii Joomiraado udditanii kam ton damal <sup>13</sup> kaa hakkille am waaltaaki, sabi mi tawaali ton Titus sakiike am oo. E oon wakkati, mbaynii-mi sakiraaēe bee, paa-mi leydi Makedoniya.

<sup>14</sup> Kaa jettoyo ngoodanii Laamdo dokkoowo en jaalogal wakkati fuu saabe habbāgol men e Almasiihu. Laamdo hokki min saakude anndal Almasiihu nokku fuu hono no uurdi mbelndi nii. <sup>15</sup> E ley dum, do Laamdo, min uurdi Almasiihu e ley hisinteeēe bee e halkotoobē bee. <sup>16</sup> Do halkotoobē bee, min kaccol maayde naabooowol 6e e maayde, do hisinteeēe bee, min uurdi nguurndam naaboori 6e e nguurndam.

Homo foti gollude oo golle? <sup>17</sup> Min nganaa julortooōe konngol Laamdo ngol no heewbē ngadata nii, sabi min nelaaēe Laamdo, miden kaalda 6erde laabude yeeso Laamdo ley habbāgol amen e Almasiihu.

## 3

### *Haala gollanoobē aadi keyri*

<sup>1</sup> Kori min puusitaali mantaade kasen? Naa miden kaajaa bataakiiji anndinooji ko min ngoni paadi e mon naa iwdi e mon hono no yimbe yogaabē kaajiraa nii naa? <sup>2</sup> Onon jaati ngoni bataaki amen binndaado e 6erde amen, mo yimbe fuu mbaawi anndude e janngude. <sup>3</sup> Sabi ana tayloraa on bataaki Almasiihu saabe golle amen. Bataaki oo winndiraaka dawa, Ruuhu Laamdo guurdo o winndiraa. Kasen duu mo winndaaka e alluuje kaaye, do mo winndaa e mum dee, e 6erde yimbe.

<sup>4</sup> Miden njogii hoolaare mawnde e Laamdo saabe Almasiihu. <sup>5</sup> Minen min ngalaa baawde faa min ngolla oo golle. Baawde amen to Laamdo iwri. <sup>6</sup> Kanko wadi min fotube laataade gollanoobē aadi keyri. Ndiin aadi fawaaki e Sariya binndaado, e Ruuhu Ceniido ndi fawii. Sabi Sariya binndaado oo ana naabaa yimbe to maayde, kaa Ruuhu oo to nguurndam naabata yimbe.

<sup>7</sup> Sariyaaji binndaadi e alluuje kaaye, naabooji yimbe to maayde *dii*, ana njogii darja faa Israa'iilankooē ndonki yeewde yeeso Muusaa saabe darja gondo hen oo, fay so taweede o jifoowo. <sup>8</sup> Kaa golle Ruuhu oo buri darja! <sup>9</sup> Golle liboovo oo ana jogii darja, sako golle foocitaare oo. <sup>10</sup> Eden mbaawi fay wiide ko joginoo darja arannde koo majjii kammari darja gardo jooni mo walaa nanndo oo. <sup>11</sup> Ko jifata koo ana waawi jogaade darja, kaa ko jifata faa abada koo buri fuu jogaade darja.

<sup>12</sup> Nde wonnoo miden njogii oo jikkē, ngorgu min kaaldata. <sup>13</sup> Min ngadataa no Muusaa nii, gadunoodo heedode e yeeso mum pati Israa'iilankooē keddooye yeewde darja jifoowo oo faa timma. <sup>14</sup> Kaa 6erde maabē mbumii. Sabi faa hannde so eēe keddi jaangude aadi kiinndi ndii, heedode ndee ana heddi e geese maabē. Nde huncaaka tafon, sabi e kabbiido e Almasiihu tan nde huncetee.\* <sup>15</sup> Goonga, faa e jalooma mo ngon-den e mum jooni oo, so Tawreeta Muusaa ana jannghee, heedode ndee ana heddi huurde hakkillaaji maabē. <sup>16</sup> Kaa so neddo warti e Joomiraado fuu, heedode ndee huncete iwde e mum. <sup>17</sup> Sabi Joomiraado woni Ruuhu oo, kasen do Ruuhu Joomiraado oo woni fuu, don ndimaaku duu woni. <sup>18</sup> Enen 6e geese mum'en cudditaa bee fuu, darja Joomiraado oo ana bannga e meeden no e timtorgal nii. Omo nii waylita en faa nannden e makko mbaadi, darja makko 6eydoo e meeden. Dum woni golle Joomiraado, kanko woni Ruuhu oo.

## 4

### *Haala jawdi ley loode*

<sup>1</sup> Ndennoo, min kaa6ataa, sabi Laamdo hokki min oo golle kammari yurmeeende mum. <sup>2</sup> Min calike kulle cuudiide kersinoanje dee. Min yojnataa yimbe, min mbaylitataa konngol Laamdo ngol. Ko min ngadata dee, e ley banngingol amen goonga ngol miden tewta hefude hakkillaaji yimbe fuu yeeso Laamdo. <sup>3</sup> So Kabaaru Lobbo mo min mbaajii oo suudaama, halkotoobē bee tan o suudantee. <sup>4</sup> Been ngalaa goondinal, sabi Iibiliisa wumni hakkillaaji maabē pati ee njiya fooyre Kabaaru Lobbo kollooovo darja Almasiihu jogiido mbaadi Laamdo oo. <sup>5</sup> Sabi wanaa kabaaru amen min mbaajotoo, ko min mbaajotoo dee,

\* **3:14** Yogaabē ana paamira aaya oo hono nii: Sabi faa hannde so eēe keddi jaangude aadi kiinndi ndii, heedode ndee ana heddi e geese maabē, 6e paamaali aadi ndii huncaama saabe Almasiihu.

kabaaru Iisaa Almasiihu, Joomiraado men oo. Minen, saabe makko min laatorii maccube moodon. <sup>6</sup> Sabi Laamdo biido: «Yo fooyre yaaynu e ley nimre» oo, kajum yaayni fooyre mum e ley õerde amen, faa hokka min anndal darja mum jiyeteedo e yeeso Almasiihu oo.

<sup>7</sup> Miden njogorii ndiin jawdi mawndi e ley amen hono no ley loode de ngalaal semmbe nii, yalla ana anndee deen baaawde mawde e Laamdo iwi, wanaa e amen. <sup>8</sup> E huunde fuu minden nii 6illee, kaa min kalkaaki, minden nii e wemmbere wakkati fuu, kaa min tayaali jikke, minden nii torree, kaa Laamdo yoppaali min, minden nii tippee e leydi, kaa min maayaali. <sup>9</sup> Wakkati fuu, maayde Iisaa ndee ana e terde amen, yalla nguurndam Iisaa dam duu ana yiyeet e terde amen. <sup>10</sup> Fay so minden nguuri, minden kosa maayde wakkati fuu saabe ko min mbaajotoo kabaaru Iisaa koo, yalla nguurndam Iisaa dam ana yiyeet e terde amen maayojo dee. <sup>11</sup> Hono nii, maayde gollirta e amen, nguurndam gollirta e mon.

<sup>12</sup> Ana winndii: «Mi goondinii Joomiraado, dum wadi so mido waajoo.»\* Minen duu min goondinbe hono no makko nii, dum wadi so minden mbaajoo. <sup>13</sup> Sabi minden anndi immintindo Joomiraado men Iisaa e maayde oo immintinidan min e makko minen duu, kasen duu waddan min yeeso makko, minen e moodon fuu. <sup>14</sup> Ko hewtii min fuu yo kammar moodon yalla moyyere Laamdo ndee ana yottoo yimbe heewbe. Hono nii yimbe heewbe njettirta Laamdo faa Laamdo 6eydoo teddineede.

### *Haala teddeengal manngal duumiingal*

<sup>15</sup> Dum wadi so min kaabataa. Fay so terde amen dee yo kalkotoode, yonkijji amen dii ana keydintinee jaannde fuu. <sup>16</sup> Sabi torraaji amen hannde dii ana kakindii ana njawta, kasen duu di lanndinanto min teddeengal manngal ngal timmataa, 6urngal diin torraaji abada. <sup>17</sup> Sabi wanaa e ko yiyyetee min ngatti hakkillaaji amen, e ko yiyyataake min ngatti hakkillaaji amen. Sabi ko yiyyetee koo, yawtan, kaa ko yiyyataake koo, heddot faa abada.

## 5

### *No ndarorto-den yeeso Almasiihu*

<sup>1</sup> Eden anndi so suudu leydiiru ndu kodu-den e mum jooni nduu wurjinaama, dum woni terde men, Laamdo darnanii en suudu dow kammu ndu junngo darnaali, darotoondu faa abada. <sup>2</sup> Eden nii caabbitoo saabe heppugol men naatude e ley suudu men dow kammu nduu, eden boornoroo ndu no kaddungal nii, <sup>3</sup> yalla so en boorniima ndu pati tawe-den en wuttiiniibe. <sup>4</sup> Sabi e ley nduu suudu, en tampii en ottii. En njidaa boortaade ndu, ko njid-den dee, boornaade wonndu dow mayru, yalla nguurndam dam ana moda ko halkotoo ko woni e men koo. <sup>5</sup> Laamdo jaati lanndinianii en e kabaaru majjum, mo loowi en Ruuhu makko laatoo piõiraado moyyereesi desanaadfi en dii.

<sup>6</sup> Ndennoo, eden njogii hoolaare wakkati fuu, fay so eden anndi so nii eden keddii e dee doo terde, eden ngoõdii suudu Joomiraado nduu tafon. <sup>7</sup> Sabi ko ngoondin-den nguurduden, wanaa ko njiyaten nguurdun-den. <sup>8</sup> Ndennoo eden njogii hoolaare, kaa ko 6urani en, eggude e dee doo terde kammar faa kodoyer banngi Joomiraado. <sup>9</sup> Kaa waadude ko welata mo woni ko 6ur-den fuu tewtude, hodude doo e eggude doo fuu fotu. <sup>10</sup> Sabi ana tilsi en fuu ndaro-den yeeso Almasiihu faa care-den, yalla gooto fuu ana yõbee golle mum mo waaduno e aduna, so golle lobbo naa so golle bondö.

### *No Iisaa hawrintiniri en e Laamdo*

<sup>11</sup> Ndennoo, tawee min anndii ko woni hulde Joomiraado, min tewtan he6ude hakkillaaji yimbe bee. Laamdo ana anndi min, mido joonndorii onon duu odon anndi min e ley õerde mon. <sup>12</sup> Min njidaa mantaade yeeso mon. Ko min njidi dee, hokkude on daliili no mantordon min, yalla odon keba ko njaabo-don mantortooõe kulle gonde sella, õe mantortaaiko kulle gonde e õerde. <sup>13</sup> So min njogoraama min haanduõe, dum saabe Laamdo. So min njogoraama min yeedduõe, dum kammar moodon. <sup>14</sup> Sabi jilli Almasiihu njaalike min, sabi min taylori, gooto maayanii yimbe fuu, ndennoo yimbe fuu maayii. <sup>15</sup> O maayanii yimbe fuu, yalla wuурre bee ana jootta wuurrande ko'e mum'en, mo õe nguuranta dee, maayando õe so wuurtani õe oo.

<sup>16</sup> Ndennoo, gila jooni, walaa fuu mo min njogorii no 6ii-aadama jogortoo neddo nii. So min njogorikeno non Almasiihu, jooni min joottii jogoraade mo non. <sup>17</sup> So neddo haabike e Almasiihu, tagitaama tagu keso. Ko hiiddi koo yawtii, hankasen kabaaru oo fuu heyditi. <sup>18</sup> Dum fuu to Laamdo iwri, kanko neli Almasiihu faa rewrintina en e makko, o halfini min golle rewrintingol hakkunde makko e yimbe. <sup>19</sup> Sabi Laamdo wonnoo e ley Almasiihu faa rewrintina yimbe aduna fuu e mum e waasude jataade luutti mum'en. Kanko halfini min kabaaru rewrintingol ngol. <sup>20</sup> Ndennoo, min daraniife Almasiihu, hono no Laamdo jaati waajortoo ko iwata e kundude amen koo. Miden ndaarda on dum doo e innde Almasiihu:

\* **4:13** Jabuura 116.10

ngartee e Laamdo! <sup>21</sup> Almasiihu meedaali luuttude abada. Kaa Laamdo fawii luutti men fuu dow makko, yalla habbagol men e Almasiihu ana wada en fooccitiise yeeso Laamdo.

## 6

### *No Pool'en ngolliranta Laamdo*

<sup>1</sup> Minen, kammari min gollidoõbe e Laamdo, midenndaarda on pati pijiron moyyere Laamdo nde keb-don ndee. <sup>2</sup> Sabi o wii:

«Mi hettindanike ma wakkati lobbo,  
mi faabike ma jalaande kisindam.»\*

Jooni jaati woni wakkati lobbo, jooni woni jalaande kisindam. <sup>3</sup> Min njidaa wafude fay huunde ko fergitata yimõbe so feloore tawee e golle amen. <sup>4</sup> Kaa e huunde fuu, min kolliran miden kaandi e laataade gollanoõbe Laamdo ley tiinnitaare mawnde, ley torraaji, ley cadeele, ley wemimbere, <sup>5</sup> ley piide, ley kasu, ley murtere, ley tampere, ley rafi döyngol, ley yolbere, <sup>6</sup> ley laabä, ley anndal, ley mujal, ley moyyuki, ley Ruuhu Ceniido, ley jilli di ngaldaa e naafigaaku, <sup>7</sup> ley konngol goonga, ley baawde Laamdo, e kaborde fooccitaare gonde ja juude amen name e naame, <sup>8</sup> ley teddeengal, ley koyeedam, ley ko yimõbe no'ata min, kajum e ko njettada min. Miden kolla yimõbe min gollanoõbe Laamdo ley ko min njogoraa min majjinoõbe tawee min goongirante'en, <sup>9</sup> ley ko min njogoraa min anndaaka tawee min anndaabe, ley ko min njogoraa min maayoõbe jooni tawee min wuurse, ley ko min njogoraa min jukkaabe tawee min maayaali, <sup>10</sup> ley ko min njogoraa min sunaab tawee min seyotoõbe wakkati fuu, ley ko min njogoraa min misikiina'en tawee miden ngada heewõbe arsukunte'en, ley ko min njogoraa min ngalaat fay huunde tawee minen njey fuu.

<sup>11</sup> Korintunkooõe, min kaaldanii on laabä reedu, min njaajinanii on berde amen.

<sup>12</sup> Minen, min paadinanaali on berde amen, onon paadinani ko'e mon berde mon. <sup>13</sup> Jooni mido haaldira e moodon no kaaldoowo e õikkoy mum nii: njaajinee berde moodon.

### *No laatori-den suudu Laamdo guurdo*

<sup>14</sup> Pati kaabondiree e õe ngoondinaali bee, sabi edum wa'i hono no reentinde daabaaji didi di ngaldaa faa ndemda. Won ko reentini fooccitaare e oojaare naa? Won ko reentini fooyre e nimre naa? <sup>15</sup> Won ko reentini Almasiihu e Iibiliisa naa? Won ko reentini goondindo e mo goondinaali naa? <sup>16</sup> Aadi won hakkunde suudu Laamdo nduu e tooruji ñii naa? Anndee, enen ngoni suudu Laamdo guurdo oo. Sabi Laamdo wii:

«Mi hodidan e maõõe,  
mi yiilodoto e maõõe,  
mi laatoo Laamdo maõõe,  
õe laatoo yimõbe am.»†

<sup>17</sup> Dum saabii so Joomiraado wii kasen:

«Iwee hakkunde maõõe!

Ceertee e maõõe!

Pati memee ko sobi!

Nden, mi jaõõoto on.‡

<sup>18</sup> Mi laatanto on baaba,

laatano-don kam õõõõe rewõõe e worõõe.

Dum Joomiraado Jom Baawde oo wii.»§

## 7

<sup>1</sup> Sakiraõõe horsuõõe, en ngadanaama õõe podooje fuu, ndennoo laõõinen ko'e men iwde e tuundi ngonndi e terde men e yonkijji men fuu, tabintinen senaare men e ley kulol Laamdo.

### *Haala sunu e seyo*

<sup>2</sup> Laõõinanee min berde moodon! Min toonaali fay goto, min mbonnanaali fay goto, min naamaali jawidi fay goto. <sup>3</sup> Mi haaldaali dum faa laatanoo on jukkungo. Sabi mi haalino gila naanen: miden njidi on sanne, fay huunde seenndataa en, wanaa nguurndam wanaa maayde. <sup>4</sup> Mido hoolii on sanne, mi heõii jaati no mi mantoroo saabe moodon, on õuubinii õernde am sanne, mido heewi seyo e ley tampereeji amen ñii fuu.

<sup>5</sup> Sabi, fay nde min njottii leydi Makedoniya ndee, min powtinaaki fey, torraaji tan min njii, gila e kulol ley berde faa e sippirooji. <sup>6</sup> Kaa Laamdo õuuõinoowo berde sunaaõe oo, õuuõinirii berde amen garol Titus. <sup>7</sup> Wanaa garol makko ngol tan wadi dum, ko õuuõinndon õernde makko koo waaltinii hakkillaaji amen, kajum e ko mo wii odon njidi ylide kam sanne e ko o haalanli min haala sunu mon kammari ko wadi koo e haala tiinnaare mon e

\* 6:2 Esaaya 49.8    † 6:16 Lewinkooõe 26.12, Esekiyel 37.27    ‡ 6:17 Esaaya 52.11

§ 6:18 2 Samuyila 7.14,

am, dum õuri fuu õeydude seyo am. <sup>8</sup> So õataaki am oo sujliniino on, mi mimsitaali dum jooni. Fay so mi mimsitiino – sabi mi yii õataaki oo sujliniino on fay so e wakkatiwel gootel – <sup>9</sup> mido seyii jooni. Wanaa ko cunjuno-don koo waddani kam seyaade, ko sugulla moodon waddani on tuubude koo. Sabi sugulla kewtinoodo on oo ana hawri e sago Laamdo, hono non, walaa ko min mbonnannoo on. <sup>10</sup> Sabi sugulla kawroowo e sago Laamdo oo waddata tuubugol, tuubugol ngol waddata kisindam, mimsee walaa e majjum. Kaa sugulla aduna, maayde waddata. <sup>11</sup> Ndennoo, yeewee sugulla kawroowo e sago Laamdo oo ko waddani on: o waddanii on soobaade, o wallii on daranaade ko'e mon, o waddanii on metteede e gadudo bone oo, kajum e kulol, o waddanii on yeeweade kam, kajum e tiinnaade, o wallii on jukkude bondo oo. E huunde fuu on kollii odon laabi e oon kabaaru. <sup>12</sup> Ndennoo so mi wiindanii on, wanaa saabe toojnudo mbinndir-mi, wanaa saabe toojnaado duu mbinndir-mi, ko mbinndiran-mi on dee, yalla odon õannginanee soobee mo njogani-don min oo yeeso Laamdo. <sup>13</sup> Hakkillaaji amen mbaaltorike saabe majjum.

Ko jokkiti hen kasen, seyo Titus ngoo õeydi waaltinge hakkillaaji amen, sabi on fuu on õuuñini õernde makko. <sup>14</sup> So mi mantorike on seeda yeeso makko duu, on kersinaali kam. Kaa no min kaalanirta on goonga wakkati fuu nii, hono non ko min mantorii on e yeeso Titus koo laatorii goonga. <sup>15</sup> Bernde makko õeydoto yidude on so o miilike no dowtiri-don on fuu e no njaõõri-don mo kulol e sijjnugol nii. <sup>16</sup> Mido seyii ko kebu-mi e mon hoolaare e dow huunde fuu koo.

## 8

### *Haala wallugol seniõõe wonõõe Urusaliima*

<sup>1</sup> Sakiraõe, miden njidi anndinde on moyyere Laamdo jippiinde e deente goondinõõe Iisaa gonde leydi Makedoniya dee. <sup>2</sup> Kambe e horireede õillaare sattunde fuu, keewal maõõe seyo waddanii õe hokkitirde ko heewi, fay so eõe e talkaaku cattudo. <sup>3</sup> Mi seede: õe ndokkitirii ko õe mbaawi fuu fay ko õuri baawde maõõe, õerde laabude tal õe ndokkiri. <sup>4</sup> Be ndaardii min sanne yalla eõe keba laawol wadude juude maõõe e wallugol seniõõe wonõõe Urusaliima õee. <sup>5</sup> Be ngadii ko õuri miilo amen. Ko adii fuu, õe ndokki ko'e maõõe Joomiraado, caggal õum, e sago Laamdo õe ndokki min ko'e maõõe minen duu. <sup>6</sup> Dum wadi so min ndaardi Titus timmintonoya to moodon ngal dokkal no fuddirnoo ngal nii. <sup>7</sup> On arsukunte'en e huunde fuu – goondinal e waaju e anndal, odon njogii soobee dow huunde fuu, odon korsini min duu. Tiinno-don faa arsinkinire-don non e ngal dokkal duu.

<sup>8</sup> Wanaa kammari tilsere wadi so mbiiri-mi non, ko mbiiri-mi non dee, faa mi hokka on laawol hollude jilli mon dii ana celli. <sup>9</sup> Sabi odon anndi moyyere Joomiraado meeden Iisaa Almasihu: kanko arsukunte oo, o wadfi hoore makko talka kammari mon yalla odon laatoroo arsukunte'en talkaaku makko oo. <sup>10</sup> Mido haalana on ko woni miilo am haala wallugol seniõõe wonõõe Urusaliima õee, sabi dum õuri naafude on: rowanen onon adii fiide dabare wallude õe, onon adii fuddude golle oo duu. <sup>11</sup> Jooni noo, kiõõinee dum. No tiinnori-don fiide dabare nii, tiinnoree non gollude dum duu, ndokkiron no baawde mon mbaarata. <sup>12</sup> Sabi so neddo anniyike wadude moyyere, Laamdo jaabanan dum hakke ko jogii koo, wanaa hakke ko jugaaki. <sup>13</sup> Mi wiyaali naaton e õillaare yalla wõõõe bee ana powta, yimõõe fuu pota njidu-mi. <sup>14</sup> Jooni dum forran onon on keõii faa heewi faa mbaawon wallude wonõõe e baasal õee. Caggal jooni, so tawii onon on ngonii ley baasal, kamõõe õe keõii ko heewi faa õe mbaawa wallude on. Hono nii yimõõe potirta, <sup>15</sup> no wiindorii nii: «Mooõtunoodo ko heewi oo yaõõintinaali, mooõtunoodo seeda oo jakoraaka.»\*

### *Kabaaru Titus e yaaduõe mum*

<sup>16</sup> Jettooe ngoodanii Laamdo e ko wadi e õernde Titus sii soobee mo min njogani on oo. <sup>17</sup> Titus jaabii ko min jaagii dum wirfitaade to mon koo. Ko õuri dum fuu, soobirantaaku mawdo e õernde laabunde tal o wirfitorii faade to moodon. <sup>18</sup> Miden nelidida e makko sakiike men jetteteedo e deente goondinõõe dee fuu saabe golle mo o gollani Kabaaru Lobbo oo. <sup>19</sup> Wanaa dum tan, deente goondinõõe dee cuibii mo, yalla omo laatoo jaado amen faa min naba dokkal ngal Urusaliima. Ngal dokkal ana teddina Joomiraado, ana õanngina anniya amen lobbo duu. <sup>20</sup> Miden ngada ko min mbaawi fuu pati min keba feloore e ndiin jawdi keewndi ndi min ndaranii. <sup>21</sup> Sabi wanaa ko woodi yeeso Joomiraado tan min tewtata, miden tewta ko woodi yeoso yimõõe duu. <sup>22</sup> Miden nelidida e didon bee sakiike meeden mo min taykitii soobee mum wakkatiji keewdi e kulle keewde. Jooni mo õuri fuu tiinnaade e golle oo kammari hoolaare mawnde nde mo joganii on ndee. <sup>23</sup> Titus duu yo gondiido am yo gollidiido am kammari moodon. Sakiraõe men wonduõe e makko fee yo nelaabõe deente goondinõõe dee, õe teddeengal Almasihu. <sup>24</sup> Ndennoo jooni, kollee õe jilli moodon, kollee õe kambe e deente goondinõõe dee fuu miden njogii daliili e mantoraade on.

\* 8:15 Pergu 16.18

**9**

*No Laamdo yidiri dokkiroowo seyo*

<sup>1</sup> Fataa ko mi winndana on banngal wallugol seniõe wonõe Urusaliima õee, <sup>2</sup> sabi mido anndi on muuyii wallude õe sanne. Mi mantorike on dum yeeso Makedoniyanõõe, mbiimõ õe: Akayanõõe lanndiniima gila rowanen wallude. Tiinnaare moodon soobini ko õuri heewde e maõõe. <sup>3</sup> Kaa mido nela e moodon õee sakiraõõe pati ko min mantorii on koo laatoo meere, kaa tawee odon lanndinii no mbiiru-mi nii. <sup>4</sup> So wanaa dum, so Makedoniyanõõe ngardii e amen to moodon tawi on lanndinaaki, hoolaare nde min njoginoõe moodon ndee laatanto min gacce, kasen duu onon õurata fuu hersude. <sup>5</sup> Dum nee, ko njii-mi hen ana tilsi mi ndaarda sakiraõõe bõe ardoõ kam to moodon, ndaranoõ ballal ngal poduno-don ngal. Nden so mi warii fuu mi tawan engal hawriti, ngal laatoo ballal õernde laabunde tal, tawee wanaa tilsere. <sup>6</sup> Taykee: aawudo seeda, seeda hettata, aawudo ko heewi, ko heewi hettata. <sup>7</sup> Gooto fuu yo hokku ko anniyii e õernde mum, tawa wanaa dow metti, wanaa e tilsere. Sabi Laamdo ana yidiri dokkiroowo seyo. <sup>8</sup> Laamdo ana waawi hokkude on sii moyyereejõ fuu, yalla e huundele fuu odon keba ko heyata on wakkati fuu, keddoro-don ko heewi kammari golle lobbo fuu, <sup>9</sup> hono no winndorii nii:

«Omo saaka moyyere makko e ley talka'en,

moyyuki makko duumoto faa abada.»\*

<sup>10</sup> Laamdo dokkoowo demoowo aawodi hokka dum nguure oo, hokkan on aawdi heyoori on onon duu, o funnan ndi, yalla moyyuki mon ana rima faa heewa. <sup>11</sup> Sabi o arsinkinan on e huunde fuu, faa mbaawon hokkitirde wakkati fuu. Nden heewõe njettan Laamdo e ko mballir-don qum'en ko iwri e juude amen koo. <sup>12</sup> Sabi ngal ballal wanaa faa nafa seniõe õee tan wadiraa, ko ngal wadiraa dee, faa ngal waddana heewõe yettude Laamdo. <sup>13</sup> So õe yeewi ballal moodon ngal, õe teddinan Laamdo saabe dowaare mon nde ceettorto-don Kabaaru Lobbo haala Almasiihu, õe teddinan mo duu saabe ko caakaton jawdi mon e maõõe, kamõe e yimõõe fuu. <sup>14</sup> Be kolliiran korsa maõõe faade e moodon duwaauuji õi õe nduwantoo on õi saabe moyyere mawnde nde Laamdo wadani on ndee. <sup>15</sup> Jettooje ngoodanii Laamdo saabe dokkal mum dasungal sifa!

**10**

*No Pool jaaborii felube dum*

<sup>1</sup> Min Pool biyeteedo lo'udo so mido hakkunde moodon kaa cuuso so mido woddii on oo, mido waajoroor on newaare e moyyuki Almasiihu, <sup>2</sup> mido ndaarda on: pati ngadee so mi garjoo on nde ngaroy-mi to mon fuu. Sabi banngal wiyoõe misen ngollana muuyooji õii-aadama õee anniyii-mi gollirde ngorgu. <sup>3</sup> Goonga, min õõõõe aadama tan, kaa no min kaõirtee nii wanaa no õõõõe aadama kaõirtee. <sup>4</sup> Sabi kaõorde de min kaõortoo dee nganaa de õii-aadama, semmbe majje to Laamdo iwri faa de mbaawi wurjinde tataaji e leydi. Minen, min wurjinoõe miilooji wayõe e leydi <sup>5</sup> kajum e mawninkinaare fuu hadoore yimõõe anndude Laamdo. Kasen min nanngooõe miilo fuu faa min ngartira dum e dowaanaade Almasiihu. <sup>6</sup> So dowaare moodon hiibõi, min lanndiniima jukkude nedõõ fuu mo dowaaki.

<sup>7</sup> Yeewree kudde dee no ngorri nii – so won e moodon kooliido yo nedõõ Almasiihu, yo miccito dum doo duu: no jooomu laatorii nedõõ Almasiihu nii, minen duu, non min laatorii yimõõe Almasiihu. <sup>8</sup> Joomiraado men iisaa hokkii min baawde faa min naõõe goondinal mon yeeso, wanaa faa min ngurjina ngal. Fay so mantii-mi hen faa kosu-mi yaõõitaade, dum hersintaa kam. <sup>9</sup> Mi yidaa miilon mi tewtoowo hulgõnde on e bataakiji am õii. <sup>10</sup> Sabi ana wiyee bataakiji am õii ana teddi, ana njogii semmbirantaaku, kaa so mido hakkunde mon, mido lo'i, haala am ana yawnni. <sup>11</sup> Nedõõ fuu biyoowo non, yo anndu ko min mbinndata so misen ngoddii on koo, dum min ngollata so min ngondii e moodon duu. <sup>12</sup> Min cuusaa fonndude ko'e amen e mantootõõe õee. Min nanndaa e maõõe duu. Kamõe, eõe ponnda ko'e maõõe e etiridum maõõe, õe nanndintaa ko'e maõõe e fay gooto so wanaa e ko'e maõõe tan! Be ngalaa hakkille.

<sup>13</sup> Minen noo, min njidaa mantaade faa yaõõitoo keerol, misen kaada e keerol ngol Laamdo darnani min ngol, faa min njottii on onon duu. <sup>14</sup> So min njottanooki to mon, min yaõõbitinoke keerol e manti amen. Kaa min yaõõbitaaki keerol, sabi minen adii waddude e mon Kabaaru Lobbo haala Almasiihu oo. <sup>15</sup> Min mantortaako golle wõõõe mo walanaa min. Kaa no goondinal moodon feydortoo nii, misen njikkii feydoraade non teddungal e hakkunde moodon, tawee min yaõõbitaaki ko Laamdo darnani min koo. <sup>16</sup> Nii wadata so min keba no min mbaajoro Kabaaru Lobbo oo e nokkuuje gonde caggal moodon dee, min mbaasa mantoraade golle gollaado faa timmi e ley nokkuuje de wõõõe kalfinaa. <sup>17</sup> Ana

\* 9:9 Jabuura 112.9

winndii: «Mantotoodo fuu, yo mantoro golle Joomiraado.»<sup>\*</sup> <sup>18</sup> Sabi wanaa manoowo hoore mum woni jaabaado, jaabaado dee, mo Joomiraado mani.

## 11

### *No Pool feliri nelaabe peneebe*

<sup>1</sup> Jooni kaa dalee kam mi haaldana on no badiido haandfude nii. Mido jaagii on mujanon kam. <sup>2</sup> Mido joganii on kiram iwrudam to Laamdo jaati, sabi mi haabii dewgal mon e gorko gooto, dum woni Almasiihu. Mido yidi naabude on to makko no mbommri ceniindi nii. <sup>3</sup> Kaa mido huli pati hakkillaaji mon mbaylite, nanndon e Hawwaa mo mboddi yoyundi ndii yojpi oo faa njoppon hoolaare mon laabunde sellunde wonnde e Almasiihu ndee. <sup>4</sup> Mido huli dum sabi so won gardo waajaade on Isaa goddo mo waldaa e mo min mbaajie e ley moodon oo, naa so on kebiir ruuhu goddo naa kabaaru lobbo mo waldaa e mo kebungo-don e amen oo, on njabboto dum sanne. <sup>5</sup> Kaa mido miila diin kalahali mawdi, dum woni nelaabe moodon bee, walaa fuu ko burdi kam. <sup>6</sup> Ana waawi taweede mi wanaa fasiilante banngal haala, kaa mi wanaa baaydo anndal, min kollii on dum faa laabi wakkati fuu e ley huunde fuu.

<sup>7</sup> Nde kaalan-mi on Kabaaru Laamdo Lobbo oo tawi on njobaali ndee, mi leydinkinike kammarri teddinde on, mi mboofii e ley majjum naa? <sup>8</sup> Deente goondinbe godde ndokki kam ko mi wuurrud faa mi gollana on. <sup>9</sup> Nde ngonnoo-mi to moodon too ndee tawi mido hasindini, mi fawaaki e dow fay gooto e mon. Sabi sakiraabe iwbe Makedoniya bee ngaddanii kam ko jatikiranoo-mi koo. E oon wakkati, mido wajunoo laataanaade on donngal. Non worri faa hannde duu. <sup>10</sup> Goonga Almasiihu gondo e am oo kaalan-mi on: ley leydi Akaya ndii fuu fay gooto waawaa hadude kam mantoraade ko mi laataanaaki on donngal koo. <sup>11</sup> Ko saabii so ngadir-mi non? Saabe mi yidaa on ngadir-mi non naa? Laamdo ana anndi mido yidi on!

<sup>12</sup> No ngorrungoo-mi nii, mi heddoto e worrude non. Sabi yogaabe ana tewta laawol mantoraade ko fe ngorri no amen nii koo. Ngol laawol, mido yidi haafude fe ngol. <sup>13</sup> Been yo nelaabe peneebe yo gollooobe jambbotoobe yo boorniibe saaya nelaabe Almasiihu. <sup>14</sup> Dum haaynaaki, sabi fay Iibiliisa ana boornoo saaya malaa'ika jom fooyre. <sup>15</sup> Ndennoo haaynaaki duu so gollanoobe Iibiliisa boorniima saaya gollanoobe fooccitaare. Kaa jukkungo maabbe laatoto hakke golle maabbe.

### *Haala torraajii kewtiid Pool*

<sup>16</sup> Mi haalanii on naanen, mido wiya on kasen duu: pati fay gooto e moodon nanngira kam kaahaango. Kaa fay so on nanngirii kam non, njabees kaandi am dii, yalla miin duu mido mantoo seeda. <sup>17</sup> Nde mantortoo-mi nii ndee, wanaa no gollanoowo Laamdo nii kaaldan-mi, no kaandudo nii kaaldan-mi. <sup>18</sup> Sabi heewbe ana mantoroo kulle aduna, miin duu, mido waawi mantaade. <sup>19</sup> Sabi onon jogoriibe ko'e mum'en yo hakkilante'en bee, odon njarranii haandfube bee no weliri on. <sup>20</sup> Goonga, odon muja nelaabe peneebe bee maccina on, naama jawdi mon, njana on, pamdina on, piya on banaaje. <sup>21</sup> Mido yaagoo wiide on miden lo'unoo e majjum sanne.

Tawee nee, huunde fuu ko fe cuusi mantoraade kambe, mido suusi mantoraade dum miin duu. Mido haalda doo hono no mi kaandudo nii. <sup>22</sup> So fe Yahuudiyankooße, miin duu mi Yahuudiyanke. So fe Israa'ilankooße, miin duu mi Israa'ilanke. So fe iwdi Ibarahiima, miin duu mi iwdi Ibarahiima. <sup>23</sup> So fe gollanoobe Almasiihu, miin buri fe fuu laataade dum - doo kaaldan-mi hono no mi kaandudo nii. Miin buri fe tiinnaare, buri fe uddeede kasu, buri fe fiyeede. Wakkati fuu, mido hosa maayde. <sup>24</sup> Cili joy Yahuudiyankooße ana piya kam, cilol fuu dorrii capantati e jeenay. <sup>25</sup> Cili tati Romankooße ana piya kam cabbi. Mi wedaama kaaye cilol gootol. Cili tati mido naata laana ana mutida e am, mi doyii jemma e jaloomaa ley geeci. <sup>26</sup> Mido e laawol wakkati fuu, mido e farati banngal maaje e banngal yanoobe, banngal lejol am e banngal leji godfi, mido e farati e ley geelle e ley ladde jeerende, ley geeci e ley sakiraabe peneebe. <sup>27</sup> Mi gollii faa mi tampii, wakkati fuu mi daanataako doyngol juutungol. Mi yolpii, mi domdii, wakkati fuu mido hoora, mi jaangaama, mi holii. <sup>28</sup> Mi haalaali ko heddi koo so wanaa huunde wootere: *jannde* fuu miilooji banngal deente goondinbe dee fuu ana kabbi hoore am. <sup>29</sup> So won lo'udo, loore mum ana hewta kam. So won pergiido, ana jawnia yonki am.

<sup>30</sup> So ana tilsi mi mantoo, loore am ndee mantortoo-mi. <sup>31</sup> Laamdo ana anndi mi fenaali. Jettooje ngoodanii mo kanko Baaba Isaa Joomiraado men oo faa abada. <sup>32</sup> Nde ngonnoo-mi Damas ndee, battaa kaananke biyeteedo Aretas joyyiniino yimbe faa kayba ngeenndi ndii yalla ana nannga kam, <sup>33</sup> kaa ngadfaa-mi e ley sagiire, ndiwniraa-mi e falanteere tatawol ngeenndi ngol, njippinaa-mi caggal mayri, teotori-moo-mi.

\* 10:17 Yeremiya 9.23

12

## *Haala ko Laamdo bannginani Pool*

<sup>1</sup> Ana tilsi mi mantoo fay so gasa. Dum e taweede, mi haalan ko yellitii e am, kajum e ko Joomiraado 6annginani kam koo. <sup>2</sup> Ana foti duubi sappo e nay, gorko gooto mo anndumi, ka66iido e Almasiihu, njabbinaama faa dow kammu fûrdo fuu towde. Mi anndaa yalla terde makko duu njabbinaama naa njabbinaaka, Laamdo tan anndi. <sup>3-4</sup> Mido anndi oon gorko naannaama alienjenne - omo hedderii terde makko dee naa mo heddoraaki de? Mi anndaa, Laamdo anndi - o nani ton haala daduka hakkille ka 6ii-aadama fotaa haaltude. <sup>5</sup> Kanko mantortoo-mi, mi mantortaako hoore am so wanaa e loore am. <sup>6</sup> Fay so mi muuyiino mantaade, mi haandaali, sabi goonga kaalannoo-mi. Kaa mido nanta hoore am e majjum, pati yimbe miila mido buri ko njii mido wada naa ko nani mido haala. <sup>7</sup> Ko Laamdo loowi e am koo ana dací hakkille, kaa pati mi mawninkinoroo dum, ko wa'i hono gi'al suufaama e terde am, dum woni nelaaado Iibiliisa ana fiya kam faa hada kam mawninkinaare fuu. <sup>8</sup> Cilitati mido jaagoo Joomiraado yo doofanam ngal, <sup>9</sup> kaa o wii kam: «Hinnee am oo heyii ma, sabi baawde am e loore ki6irta.» Saabe dum mi beydiima seyaade e mantaade dow loore am ndee, yalla baawde Almasiihu dee ana tawee e am. <sup>10</sup> Dum saabii so mido seyoro loore e jennooje e cadeele e torraaji e wemmbere fuu kammari Almasiihu. Sabi nde lo'u-mi fuu, nden kefan-mi semmbe.

## *No Pool sunliri banngal Korintunkooōe*

<sup>11</sup> Mi haaldii hono no mi kaandudo, kaa onon ngaddani kam haalirde non. Onon kaannoo jinggande kam, sabi fay so mi wanaa fay huunde, kalahali moodon mawdi dii, dum woni nelaa6e moodon bee, burdaali kam fay huunde. <sup>12</sup> Golleejii mawdi e kaayeefiji e taagumansaaji kollooji mi nelaaado ngollaama to mon, kaaddi mujnal duu di ngolliraa. <sup>13</sup> Kodum deente goondin6e Iisaa godde dee burdi on, so wanaa ko mi fawaaki e mon koo? Njaafee kam e oon toopanngae!

<sup>14</sup>Jooni, mi lanndiniiima warde to mon cilol tatafol, mi fawataako e mon. Wanaa jawdi moodon tewtan-mi, onon e ko'e mon tewtan-mi. Sabi wanaa 6i66e kaani fagganaade saaraabe mum'en jawle, saaraabe kaani fagganaade 6i66e mum'en jawle. <sup>15</sup>Miin, mi seyorto hokkude on ko njogii-mi fuu, mi seyorto hokkude on fay hoore am, yalla mido walla on. So mi mawninii jilli am e moodon, on buytoto e yifude kam naa? <sup>16</sup>Ndennoo en kawrii mi fawanooki e dow mon, kaa wiyaama mi yojnii on, mi hebirii on hilaa. <sup>17</sup>Won nelaabe am 6e nelir-mi faa mi jaamaa jawdi mon naa? <sup>18</sup>Titus jaagii-mi yo yaa to moodon, neldidin-imi e mum sakiike men oo. Titus jaamaali jawdi moodon, goonga naa pene? Wanaa minenngoni miilo wooto e laawol gootol naa?

<sup>19</sup>Booyii odon miila min laabinoobe ko'e amen yeeso moodon. Kaa ko min ngadata dee, miden kaalda yeeso Laamdo ley haabagol amen e Almasiihu. Sakiraabe horsube, ko min ngadata koo fuu, yalla odon njaara yeeso. <sup>20</sup>Mido hula, so mi warii to moodon, pati mi tawira on no mi yiddaa, tawiron kam no on njidaa. Mido huli pati mi tawda on e poodondiral e haasidaaku e konnaagu e tikkere e jipondiral e joore e mawninkinaare e fitina. <sup>21</sup>Mido hula, so mi wirfitiima to moodon, pati Laamdo hoyna kam hakkunde mon kasen, mi surja saabe heewée luuttunoobe bé tuubaali iwde e tuundi mum'en e fijirde mum'en e njaahilaaku mum'en.

13

Bay nondir al

<sup>1</sup> Mido wara to mon jooni cilol tatabol. «Huunde fuu ko neddo happaa ana hasindini e seedaaku yimbe didon naa taton.»\* no winndorii nii. <sup>2</sup> Mi haalaniino luuttunoobe nde ngonnoo-mi to mon cilol didabol ndee, jooni duu ko mi walaa to mon koo, mido haaltana be kasen kambe e heddiibe bee fuu: so mi wartii, mi yurmataako fay gooto. <sup>3</sup> Onon, odon tewta finnde holloore Almasiihu oo e am haalirta haala mum. On keban finnde ndee duu. Almasiihu lo'aali banggal moodon, mo cemmbididdo e moodon. <sup>4</sup> Sabi o tontiraama e legal bardugal dow loore makko, kaa omo wuurdii baawde Laamdo. E ley haabbgagol amen e makko, min lo'ufie, kaa min kollan on, misen nguurdira e makko dow baawde Laamdo.

<sup>5</sup> Yeeetee ko'e mon faa njiyon so odon ngoodinti, taykitee ko'e moodon. Tama on maataali liisa Almasiihu ana e moodon? So on maataali, yeewtagol mon ngol ana holla on ngalaa e goonga. <sup>6</sup> Kaa mido joondorrii on anndan minen banngal amen miden e goonga. <sup>7</sup> Miden jaagoo Laamdo pati ngagdon fay huunde ko boni, wanaa faa holla minen miden e goonga, faa ngollon ko moyyi, fay sinndo tawii minen banngal amen, min laatiin hono fe ngalaa e goonga. <sup>8</sup> Sabi min mbaawaa veddudee goonga oo, ko min mbaawi dee, daranaade mo. <sup>9</sup> So

\* 13:1 Fillitago! Tawreeta 19 15

min lo'ii tawi onon odon njogii semmbe, miden ceyii hen, min jaagoto Laamdo faa laatodon hibbuue. <sup>10</sup> Saabe dum, mizo winndana on dum gila mi waraali tafon, yalla so mi warii, pati mi bonna e moodon hakke baawde de Joomiraado oo hokki kam dee. Ko ndokkiraam-de, faa yaara yeeso, wanaa faa wurjina.

<sup>11</sup> Sakiraabe, walaa ko heddi so wanaa waynaade. Poodanee hibbuude, njabee waajeede, njogee miilo wooto, nguuree e jam. Nden, Laamdo Jom jilli e jam oo wondan e moodon. <sup>12</sup> Yo gooto e moodon fuu jowtir banndum jowtaango wondungo e jilli. Seniibe gee fuu ana njowta on.

<sup>13</sup> Yo hinnee Joomiraado men Iisaa Almasiihu e jilli Laamdo e deental moodon e Ruuhu Ceniido oo ngonu e moodon, on fuu!

## Bataaki Pool faade e Galaatiyankooōe

<sup>1</sup> Oo bataaki ga am iwri, miin Pool nelaado oo. Wanaa yimbe neli kam, mi neliraaka saabe neddo fuu, Iisaa Almasiihu jaati neli kam, kajum e Laamdo Baabiraado men immintindo mo e maayde oo. <sup>2</sup> Miin e sakiraaēe wondubē e am bee fuu, miden mbinnda oo bataaki faade e mon, onon deente goondinēe Iisaa gonde leydi Galaatiya dee. <sup>3</sup> Yo on kebu moyyere e jam iwde e Baabiraado men Laamdo e Joomiraado men Iisaa Almasiihu. <sup>4</sup> Almasiihu hokkitirii hoore mum kammari luutti men yalla ana dannda en e oo jamaanu bondo. Nii o wadiri sago Laamdo Baabiraado men. <sup>5</sup> Yo teddeengal woodan Laamdo faa abada abadin. Aamiina.

### No Kabaaru Lobbo oo laatorii gooto

<sup>6</sup> Ana haaynii kam sanne no njawir-don yoppude Laamdo, noddirdo on moyyere Almasiihu oo, so njokku-don kabaaru lobbo goddo. <sup>7</sup> Wanaa wiide kabaaru lobbo goddo won, kaa yimbe ana njiba on, ana njidi waylitinde Kabaaru Lobbo haala Almasiihu oo. <sup>8</sup> So neddo waajike on ko seerti e Kabaaru Lobbo mo min mbaajii on oo, fay so minen e ko'e amen naa so malaa'ika iwdo dow kammu, yo kuddi wonu e joomum. <sup>9</sup> Min kaalaniino on dum, jooni duu mido haaltana on: so neddo waajike on ko seerti e Kabaaru Lobbo mo keb-don oo, yo kuddi wonu e mum.

<sup>10</sup> Dum nee, yarraamuya yimbe ndaaran-mi naa yarraamuya Laamdo? Tama ko welata yimbe ndaaran-mi? So faa jooni mi ndaarannoodo ko welata yimbe, mi laatataakono maccudo Almasiihu.

### No Pool laatorii nelaado

<sup>11</sup> Sakiraaēe, mido yidi paamon: Kabaaru Lobbo mo mbaajotoo-mi oo, wanaa e neddo iwi. <sup>12</sup> Sabi wanaa neddo hokki kam mo, wanaa neddo jaangini kam mo, Iisaa Almasiihu ɓannginani kam mo. <sup>13</sup> On nanii no ngorrungoo-mi arannnde e ley diina Yahuudiyanooōe oo. Mi toririi deental goondinēe Iisaa ngal no mbaawru-mi fuu, mi siinii wurjinde ngal. <sup>14</sup> Mido burnoo heewēe e waaldeeē am Yahuudiyanooōe jokkude diina Yahuudiyanooōe, kajum e hirande neesuuji njaatiraabe amen. <sup>15</sup> Kaa Laamdo suōike kam gila mi finaali, noddii kam saabe moyyuki mum nde muuyunoo ndee, <sup>16</sup> o ɓannginani kam Biyiko yalla mido waajoo kabaaru mum ley heeferbe. Oon wakkati, mi lamndondiraali e fay gooto, <sup>17</sup> mi yahaali Urusaliima to adiibe kam laataade nelaabe bee, njaa-mi don e don leydi Arabiya, ngartu-mi Damas. <sup>18</sup> Duubi tati caggal mum, njaa-mi Urusaliima yalla mido anndondira e Piyeer. Ngondu-mi e makko balde sappo e joy. <sup>19</sup> Mi yiyaali nelaado fay gooto, so wanaa Yaakuuba mijii Joomiraado oo. <sup>20</sup> Ko mbinndan-mi on doo koo, hakkunde am e Laamdo mbinndir-mi, mi fenaali. <sup>21</sup> Caggal dum, njaa-mi leydi Siriya e leydi Silisi. <sup>22</sup> E oon wakkati, deente kaabbiide e Almasiihu gonde leydi Yahuudiya dee meedaali yiirude kam gite mum'en. <sup>23</sup> Be nananno tan ana wiyee: «Neddo torrannoodo en nden oo, ana waajoo jooni diina ka siinunoo njifude kaa.» <sup>24</sup> Eēe teddinannoo Laamdo saabe am.

## 2

### No nelaabe njabirani Pool

<sup>1</sup> Duubi sappo e nay caggal mum, ḥabbitin-mi kasen Urusaliima, miin e Barnabas. Titus duu ana wondi e amen. <sup>2</sup> Mi yaarii ton saabe ko Laamdo ɓannginani kam koo. Mi hawritii ton e mawbe deental goondinēe, miin tan e maabbe, mi anndinii 6e Kabaaru Lobbo mo mbaajii-mi 6e nganaa Yahuudiyanooōe oo. Sabi mi yidaa golle am yaabbiido oo e mo jooni oo fuu latooto meere. <sup>3</sup> Kaa fay Titus jaado am oo, kajum e taweede yo Yunaninkee fuu, tilsinaaka taadeede. <sup>4</sup> Dum e taweede sakiraaēe peneebe coorike e deental goondinēe ngal. Ko 6e ndaarti dee, anndande ndimaaku mo keb-den e ley haabagol men e Iisaa Almasiihu oo faa 6e ngartira en e maccungaaku. <sup>5</sup> Min njabanaali 6e fay wakkati gooto yalla goonga Kabaaru Lobbo oo ana heddanoo on. <sup>6</sup> Haya, jogoraabe mawbe bee, no 6e njogoranoo nii, miin walaa ko hilli kam e majjum, sabi Laamdo surdintaa yimbe. Been mawbe tilsinaali min godđum fey. <sup>7</sup> Be paamii Laamdo halfini kam waajaade Kabaaru Lobbo oo faade e 6e nganaa Yahuudiyanooōe, hono no halfiniri Piyeer waajaade Yahuudiyanooōe bee nii. <sup>8</sup> Sabi no Laamdo neliri Piyeer hakkunde Yahuudiyanooōe bee nii, non neliri kam miin duu hakkunde heeferbe. <sup>9</sup> Yaakuuba e Piyeer e Yuhanna, nuyde deente goondinēe teddinaade fee, nde njinoo moyyere nde Laamdo hokki kam ndee, 6e ndokki kam miin e Barnabas fuu juude faa tabintina kawral hakkunde amen. Ndennoo minen, min njaha

to heeferþe, kamþe þe njaha to Yahuudiyaniko6e. <sup>10</sup> Ko þe jaagii min tan, min miccitoo misikiina'en see. Mi tiinnike e majjum jaati.

### No Poolnijiri Piyeer to Antiyokiya too

<sup>11</sup> Kaa nde Piyeer wari e ngeenndi mbiyeteendi Antiyokiya ndee, mi ninjii dum yeeso yimþe sabi o boofudo. <sup>12</sup> Sabi fade nelaaþe Yaakuuba bee warde, omo jaamdanoo e goondinþe Iisaa þe nganaa Yahuudiyaniko6e. Kaa nde been ngarnoo ndee, o wodditii þe nganaa Yahuudiyaniko6e þee, o jootti jaamduude e mum'en, hultude jokkuþe sariya taadagol þee. <sup>13</sup> Yahuudiyaniko6e goondinþe Iisaa wobþe duu tawti mo faa naþi fay Barnabas e naafigaaku mum'en. <sup>14</sup> Nde njiinoo-mi no þe ngorri nii dartaaki, eþe ngoorti goonga gondo e Kabaaru Lobbo oo, mbii-mi Piyeer yeeso yimþe fuu: «Aan Yahuudiyanke, a worraano doo hono no Yahuudiyaniko6e ngorri nii, no lepi goddi dii ngorri nii ngorrunda. Hono mbaawru-daa tilsinirde yimþe þe nganaa Yahuudiyaniko6e 6ee kinaa laatoo hono no Yahuudiyaniko6e nii?»

### No Laamdo hisinirta yimþe saabe goondinal

<sup>15</sup> Minen, min iwdi Yahuudiyaniko6e, min njeyaaka e lepi goddi luuttooji dii. <sup>16</sup> Tawee nee, miden anndi nedðo nanngirtaake pooccitiido saabe jokkugol Sariya Muusaa oo, e goondinal mum Iisaa Almasiihu nanngirtree pooccitiido. Minen duu min ngoondinii Iisaa Almasiihu, yalla miden nanngiree fooccitiise saabe goondinal amen Almasiihu, tawee wanaa jokkugol Sariya Muusaa. Sabi fay gooto nanngirtaake pooccitiido saabe jokkugol Sariya Muusaa. <sup>17</sup> Minen, miden ndaarta nanngireede fooccitiise saabe haþþagol amen e Almasiihu. E ley majjum so min tawaama min luuttooþe minen duu hono no þe nganaa Yahuudiyaniko6e þee nii, dum ana holla Almasiihu yo daraniido luuttal naa? O wanaa! <sup>18</sup> Sabi so mi wii mi maatoto ko ngurjinnoo-mi, mi tabintinanno mi boofooowo. <sup>19</sup> Kaa banngal Sariya Muusaa, miin mi maaydø, Sariya oo jaati wadi dum, yalla mido wuurrana Laamdo. Mi tontidaama e Iisaa Almasiihu dow leggal bardugal, <sup>20</sup> mi wuuraa miin e hoore am, Almasiihu wuuri ley am. Nguurndam nedðo dam nguuran-mi jooni dam, e ley goondinal Bii Laamdo nguuran-mi dam, oon jiddo kam so hokkitiri hoore mum saabe am. <sup>21</sup> Mi tippitataako moyyere Laamdo ndee. Sabi so tawii jokkude Sariya oo waðata nedðo pooccitiido, Almasiihu oo maayii meere.

## 3

### Haala jokkude Sariya Muusaa naa goondinde Iisaa

<sup>1</sup> Eehey Galaatiyankoo6e, woy oðon pamdi hakkille! Homo dawri on? On cifanaama faa laaþi pacu no Iisaa Almasiihu tottiraa e leggal bardugal. <sup>2</sup> Njaabee kam dum doo tan: saabe jokkude mon Sariya Muusaa keþir-don Ruuhu Ceniod oo, naa on keþirii mo saabe on nanii Kabaaru Lobbo oo, on ngoondinii? <sup>3</sup> Kodum famdiniri on nii hakkille? On puðdirii semmbe Ruuhu Laamdo oo, hono njidir-don jooni timminirde tiinnaare mon jaati? <sup>4</sup> Ko hewtii on koo fuu laatike meere naa? Dum waawaa laataade meere. <sup>5</sup> Dokkoowo on Ruuhu so wada kaayde hakkunde mon oo, dum nee saabe oðon njokki Sariya o waðirta dum naa saabe on nanii Kabaaru Lobbo on ngoondinii?

<sup>6</sup> Nii winndorii: «Ibarahiima goondinii Laamdo, Laamdo jatorii mo saabe majjum mo pooccitiido.»\* <sup>7</sup> Ndennoo anndee: goondinþe þee, kajum'en jaati ngoni iwdi Ibarahiima. <sup>8</sup> Sappaama e ley Binndi, Laamdo nanngiran þe nganaa Yahuudiyaniko6e þee fooccitiise saabe goondinal mum'en. Dum saabii so Binndi dii mbiyani Ibarahiima oo kabaaru lobbo gila wadaali tafon: «Leþi dii fuu keþiran barke saabe maa.»† <sup>9</sup> Ndennoo, goondinþe fuu keban barke no Ibarahiima goondindo oo heþiri barke nii. <sup>10</sup> Kaa fawþe jikke mum'en e jokkude Sariya Muusaa, yo hudaabe. Sabi ana winndii: «Kuddi woodanii nedðo fuu mo jokkaali faa hiþi ko woni e dewtere Sariya ndee fuu.»‡ <sup>11</sup> Tayoral, fay gooto nanngirtaake pooccitiido yeeso Laamdo saabe Sariya oo. Sabi ana winndii: «Pooccitiido wuurdan goondinal.»§ <sup>12</sup> Sariya oo noo fawaaki e goondinal, sabi ana winndii: «Jokkudo Sariya oo wuurdan saabe Sariya.»\* <sup>13</sup> Almasiihu soottitike en iwde e kuddi ndi Sariya oo fawi e men ndii, ko mo roondanii en ndi koo. Sabi ana winndii: «Bilaado e leggal bardugal fuu yo kufaado.»† <sup>14</sup> Dum Iisaa wadi yalla þe nganaa Yahuudiyaniko6e þee duu ana keþa barke mo Ibarahiima heþi oo saabe Iisaa Almasiihu, keþiren Ruuhu podaado oo e ley goondinal.

### Haala Sariya e fodoore

<sup>15</sup> Sakiraabe, mido sifanoo on ko woodi jannnde fuu koo: so nedðo moyyiniit talkuru ndonu no sariya laamu jaþiri nii, fay gooto waawaa imminde dum, waawaa beydude hen fay

\* 3:6 Puddoode 15.6    † 3:8 Puddoode 12.3    ‡ 3:10 Fillitagal 27.26    § 3:11 Habaakuk 2.4    \* 3:12 Lewinkoo6e  
18.5    † 3:13 Fillitagal Tawreeta 21.23

huunde.<sup>16</sup> Laamđo wadani Ibarahiima e iwđo e mum podooje. Binndi dii mbiyaali: «Iwđe e mum», hono no di cappike heewđe, gooto nii di cappii nde di mbii: «Iwđo e maa». Dum woni Almasiiihu oo.<sup>17</sup> Ko njidu-mi wiide koo annii: aadi ndi Laamđo fiđi ndii, Sariya gardo duuđi teemedē nay e capantati caggal mum oo fiđataa dum, bonnataa fodoore Laamđo ndee.<sup>18</sup> Sabi so ndonu mo Laamđo fodunoō oo e Sariya oo fawinoo, mo fawatanooko e fodoore ndee. Kaa noo, saabe fodoore ndee Laamđo hokkiri moyyere mum ndee Ibarahiima.

<sup>19</sup> Ndennoo, ko Sariya Muusaa nafata? O waddiraama faa o ńanggina luutti faa nde iwđo e Ibarahima podanaado fodoore ndee oo wari fuu. Laamđo hokki yimđe Sariya oo, o hokkiri će malaa'ika'en, kajum e curoowo.<sup>20</sup> Kaa so gooto tan curoowo nafataa. Fodoore ndee, Laamđo tan fodi.

<sup>21</sup> Ndennoo, Sariya oo ana luuttondiri e podooje Laamđo dee naa? Luuttondiraa! Sinndo sariya baawdō hokkude yimđe nguurdam jippinanooma, fooccitaare iwanno e sariya oo jaati.<sup>22</sup> Kaa Binndi dii mbii aduna oo fuu, luutti mari dum, yalla goondinđe bee fuu ana ndokke ko podanaa koo saabe goondinal mum'en Iisaa Almasiiihu.

<sup>23</sup> Fade wakkati goondinal warde, en kawjanooma ley hawju Sariya faa goondinal ngal ńangginaa.<sup>24</sup> Hono non Sariya oo laatorii dowoo wo en faa wakkati mo Almasiiihu wari e mum oo, yalla eden nanngiree fooccitiđe saabe goondinal ngal.<sup>25</sup> Jooni ko wakkati goondinal ngal wari koo, en njaltii e maral dowoo wo oo.

<sup>26</sup> Jonnoo, on fuu on 6iđe Laamđo saabe goondinal mon Iisaa Almasiiihu.<sup>27</sup> On fuu on kađike e Almasiiihu saabe looteede mon lootogal batisima. Hono nii boornori-don mo no kaddungal nii.<sup>28</sup> Ndennoo, ceenndiigu walaa hakkunde Yahuudiyanke e Yunaninke, naa dimo e diimajo, naa gorko e debbo, on fuu on gootum e hađđagol mon e Iisaa Almasiiihu.<sup>29</sup> So tawii Almasiiihu jey on, on iwđi Ibarahiima, on ndonan ko Laamđo fodunoō koo.

## 4

<sup>1</sup> Mido wadana on misaalu: so nii donoovo yo cukalel, walaa fuu ko seenndata dum e maccudo, tawee nee kajum jey jawdi ndii fuu.<sup>2</sup> Mo heddoto ley hawju hayboōe mo e dawranoobe jawdi makko faa sarti mo baaba makko sartanii mo oo yottoo.<sup>3</sup> Enen duu, nde en sukaabe ndee, en maccube semmbeeji aduna dii.<sup>4</sup> Kaa nde wakkati cartaado on hiđđi ndee, Laamđo neli Bajjo muudum mo debbo rimi, dōwtaniiđo Sariya Muusaa,<sup>5</sup> yalla omo soottitoo wonđe e ley Sariya see, kefen laataade 6iđe Laamđo.<sup>6</sup> Kammarri on 6iđe makko, Laamđo nelii RuuhuBiyum oo e ley berde men. Ruuhu oo wadata so noddiren Laamđo «Abba».<sup>7</sup> Hankasen, en nganaa maccube, en 6iđe. Kammarri en 6iđe, Laamđo duu wadii en ronoobe.

### No Pool hultirani Galaatiyankooē

<sup>8</sup> Nden, nde on anndaano Laamđo ndee, odon ngonnoo e maral reweteeđe 6e nganaa reweteeđe jaati bee.<sup>9</sup> Kaa jooni ko anndu-don Laamđo koo, naa mido haannoo wiide jooni ko Laamđo anndi on koo: hono mbaawirton wirfitaade e semmbeeji aduna lo'udi ni galaa nafaa dii? Ko saabii so odon njidi laattaade maccube majji kasen?<sup>10</sup> Odon teddini jalaade yogaaje e lebbi yogaaji e wakkatiđi yogaaji e kitaale yogaaje.<sup>11</sup> Mido huli pati golle mo ngollan-mi on oo fuu mursee.

<sup>12</sup> Sakiraađe, mido ndarda on, mba'ee no am nii, sabi miin duu mi laatinoke hono mon. On ngadaali kam baasi fuu,<sup>13</sup> sabi odon anndi rafi-cellal waddani kam haalande on arannde Kabaaru Lobbo oo.<sup>14</sup> Naw am oo itti koro mon, dum fuu e taweede on njawaali kam on nefaaли kam kammarri jaaw oo. Ko ngadu-don dee, on njafforike kam no malaa'ika Laamđo nii, naa hono mi Iisaa Almasiiihu.<sup>15</sup> Oon wakkati, odon keewnoo seyo sanne! Mido waawi seettanaade on: so odon mbaawino, on doofanno gite mon ndokkon kam. Ndennoo hono seyo mon ngoo laatii?<sup>16</sup> Mi laatike gajoo mon saabe mido haalana on goonga naa?<sup>17</sup> Anniya mo been yimđe njoganii on oo moyyaa. Ko 6e njidi dee, seenndude on e am yalla odon ndaranoo 6e.<sup>18</sup> Sikke walaa, daranaade neddo ana moyyi so faa moyya, kasen duu waajibi dum wadée wakkati fuu, wanaa yeeso am tan.<sup>19</sup> Sukađbe am, kammarri mon mido naawaa kasen naawalla naawđo hono no ḥatawere nii, faa mbaadi Almasiiihu tawee e mon.<sup>20</sup> Hee mi yidii tawdeede e mon jooni yalla mido heđa haaldude e mon ko wanaa no kaaldirannoo-mi e mon nii, sabi kabaaru mon ana wemmbiniil kam sanne.

### Haala aadi kiinndi e aadi keyri

<sup>21</sup> Onon yiduđe jokkude Sariya Muusaa, mido lamndoo on: on nanaali ko Sariya wii naa?<sup>22</sup> Ana winndii: Ibarahiima ana joginoo 6iđe worđe didon, gooto o heđdi dum e kordđo, godđo oo o heđdi dum e dimo.<sup>23</sup> Bii kordđo oo rimiraama no yimđe fuu ndimirtee nii, kaa bii dimo oo rimiraama saabe fodoore Laamđo.<sup>24</sup> Won ko saawii e ley kaa janta. Rewđe didon bee ana capporaa aadijii didi. Ngootiri, ndi Haajara ndii yo aadi waamnde haayre wiyyeteende Siinaayi ndii. Kayri, maccungaaku ndi rimata.<sup>25</sup> Haajara yo waamnde haayre

wiyeteende Siinaayi wonnde Arabiya ndee, ende sapporaa ngalluure Urusaliima hannde ndee. Sabi Urusaliima e hodube e mum bee fuu e margal ngoni.<sup>26</sup> Kaa Urusaliima gondo dow kammu oo yo dimo, kanko woni inna men.<sup>27</sup> Sabi ana winndii:

«Aan dimaro mo meedaali rimude,  
welta!

Aan mo anndaa naawalla qatawere,  
ilina gullaali seyo!

Sabi debbo jeebaado heban sukaabe  
faa bura debbo kaybaado gorum.»\*

<sup>28</sup> Kaa onon sakiraabe, on biibbe hebaabe dow fodoore Laamdo ndee hono no Isiyaaka nii.

<sup>29</sup> Nden, dimiraado no yimbe ndimirtee nii, ana torra dimiraado Ruuhu Laamdo oo. Fay hannde duu non worri.<sup>30</sup> Kaa kodum Binndi dii mbii? Di mbii: «Ribbu kordoo oo e biyum, sabi bii kordo oo rontdataa e bii dimo oo abada.»†<sup>31</sup> Ndennoo sakiraabe, en nganaa biibbe kordo oo, en biibbe dimo oo.

## 5

### *Haala ndimaaku goondinbe lisaa*

<sup>1</sup> Almasiihu rimdinii en yalla eden ndimda dor. Dum nee, tiinnee pati on ngartire e maccungaaku. <sup>2</sup> Kettinanee kam! Miin Pool, mido wiya on: so on njabii taadeede, Almasiihu nafataa on fay huunde. <sup>3</sup> Kasen mido haalana neddo fuu jaabudo taadeede: ana tilsi e mum jokkude Sariya Muusaa oo fuu. <sup>4</sup> Onon tewtoobe nanngireede fooccitiibe saabe Sariya bee, on seertube e Almasiihu, on ngodditiima moyyere Laamdo ndee. <sup>5</sup> Kaa minen, kammaro goondinal miden pawa jikke amen e Laamdo nanngiroowo en fooccitiife oo. Dum woni ko min njoonndorii saabe Ruuhu oo. <sup>6</sup> Sabi kaabbiido e lisaa Almasiihu, taadagol e waasude taadagol fuu fotu, ko nafata tan, goondinal tabintinoowall Jilli.

<sup>7</sup> On puudirrii no woodi. Homo hadi on jokkude goonga? <sup>8</sup> Ko waylit hakille mon koo iwraali to Laamdo noddudo on oo. <sup>9</sup> Ana wiyyee: yuufinirdi seeda ana yuufina conndi farani njiihaandi fuu. <sup>10</sup> Dum fuu e taweede Joomiraado hokkii kam hoolaare e mon, mi taylorii miilo mon seerataa e miilo am. Kaa jiibowoo on oo, ko waawi laataade fuu, jukkete. <sup>11</sup> Kaa miin sakiraabe, so tawii faa hannde mido waajoo kincaa neddo taadee, ko saabii so mido torree faa jooni? Siindu dum mbaajotonoo-mi, waajoo am haala maayde lisaa dow leggal bardugal mettataano fay gooto. <sup>12</sup> Jiibowee on bee, yo bee der ko'e maabbe.

<sup>13</sup> Sakiraabe, on noddaama faa ndim-don. Jonnoo, pati ngadee so ndimaaku mon laatanoo on sabaabu faa njokkon gidaade yonki. Ko kaan-don wadufe dee, homo fuu gollana goddo e dow jilli. <sup>14</sup> Sabi Sariya oo fuu wadaama e ley ndee yamiroore wootere: «Njidiraa tanaa maa no njidir-daa hoore maa nii.»\*<sup>15</sup> Kaa so odon qatondira, odon jaamondira hono no dawaadi nii, njeertee pati on timmondir.

### *Haala Ruuhu Ceniido, kajum e gidaade yonki*

<sup>16</sup> Ndennoo, mido wiya on: dalee Ruuhu Ceniido dowa on, nden on njokkataa gidaade yonki mon. <sup>17</sup> Sabi gidaade yonki ana kabaa e Ruuhu oo, Ruuhu oo duu ana habaa e gidaade yonki dee. Hongel e majji fuu ana habaa e gonngel faa mbaasuu-don gollude ko muuy-don. <sup>18</sup> So Ruuhu dowaata on, on ngalaa e ley Sariya Muusaa oo hankasen.

<sup>19</sup> Ko gidaade yonki hannginta yo tuundi e ko soobi e njaahilaaku<sup>20</sup> e dewal tooruuj e mbonjabaaku e konnagaagu e poofondiral e kiram e tikkere e haawtaare e luurrall e rafikawral<sup>21</sup> e haasidaaku e sigiro e wanngiyaare e ko nanndi e mum'en. Mido jeertina on dum doo no njeertinirnoo-mi on dum nii, gollooobee kulle baade non bee naataaa e Laamu Laamdo oo.<sup>22</sup> Kaa ko Ruuhu Ceniido rimata e men koo woni jilli e seyo e jam e mujah e moyyuki e yurmeende e goondinal<sup>23</sup> e leydinkinaare, kajum e nantaare. Taylor, Sariya oo hadataa kulle baade non.<sup>24</sup> Jeyaaabe e lisaa Almasiihu bee tipitorike himmeeji mum'en e gidaade yonki mum'en fuu caggal, ana wa'i hono no bee tontii de e leggal bardugal nii.

<sup>25</sup> Kammaro Ruuhu oo kefir-den nguurndam kesam dam, ndennoo njokken e Ruuhu,  
<sup>26</sup> pati mawninkino-den, pati toojondiren, pati haasidaaku tawee hakkunde men.

## 6

### *No goondinbe kaaniri wallondirde*

<sup>1</sup> Sakiraabe, so won tawaado ana wada ko boni, onon jogiibe Ruuhu bee kaani ooncude dum, tawee e needi. Kaa gooto mon fuu hayba hoore mum pati seyte kajum duu.

<sup>2</sup> Mballondiree roondaade donnege mon tedduude, hono non kiibbinirton sariya Almasiihu oo.<sup>3</sup> So neddo miiliif woni woni, tawi walaa ko woni, yonjii hoore mum.<sup>4</sup> Yo gooto

\* 4:27 Esaaya 54.1

† 4:30 Puddoode 21.10

\* 5:14 Lewinkooē 19.18

fuu yeewto golle mum. So won ko waawi mantoraade, mantorto golle mum jaati, fotaa ko nanndina dum e golle nedđo godđo.<sup>5</sup> Sabi gooto fuu donngal mum roondotoo.

<sup>6</sup> Jannginteedo konngol Laamđo ngol ana haani feccendirde e jannginoowo dum ko heđi ko woodi fuu.

*No gooto fuu hettirta ko aawi*

<sup>7</sup> Pati njaayree ko'e mon, Laamđo jađataa yaweede. Gooto fuu, ko aawi koo hettata. <sup>8</sup> Aawđo ko welata yonki mum, hettan maayde. Kaa aawđo ko welata Ruuhu Ceniido, hettan hen nguurndam nduumiidam. <sup>9</sup> Pati kaafen gollude ko moyyi. Sabi so en kaabaali, en kettan so wakkati oo warii. <sup>10</sup> Ndennoo, e ley wakkati keddaniido en oo, ngadanan yimđe fuu moyyere, burđe fuu haandude hen, sakiraabe men goondinđe Iisaa Almasiihu bee.

*Baynondiral*

<sup>11</sup> Yeewee dī binndi futti dī mbinndiran-mi on junngo am. <sup>12</sup> Tilsinđe on taadeede 6ee, tewtoođe yalla ana manee. Walaa ko 6e ngadiri non so wanaa pati 6e torriree saabe leggal bardugal Almasiihu ngal. <sup>13</sup> Sabi fay kambe taadaabe 6ee, 6e njokkataa Sariya. Ko 6e njidiri taado-don dee, faa 6e mantoroo dum. <sup>14</sup> Miin e hoore am kaa, mi mantortaako kinaa leggal bardugal Joomiraado men Iisaa Almasiihu ngal. Saabe ngal bardugal mi hillaka e kabaaru aduna, aduna duu hillaka kam. <sup>15</sup> Sabi taadaade naa waasude taadaade, fayda walaa hen. Ko jogii fayda dee, tagiteede tagu keso. <sup>16</sup> Jokkuđe ngol laawol fuu, yo keđu jam e hinnee, kambe e Israa'iilankooē Laamđo 6ee fuu.

<sup>17</sup> Hankasen fay gooto pati tampina kam, sabi terde am ngadii 6atitande saabe Iisaa.

<sup>18</sup> Sakiraabe, yo hinnee Joomiraado men Iisaa Almasiihu wonu e mon! Aamiina.

## Bataaki Pool faade e Efeesunkooōe

<sup>1</sup> Oo bataaki ga am iwri miin Pool nellaado Isaa Almasiihu e sago Laamđo. Mido jowta seniīe hoolniīe e ley haă̄bagol mum'en e Isaa Almasiihu hee. <sup>2</sup> Yo on keēu moyyere e jam iwd e Baabiraado men Laamđo e Joomiraado men Isaa Almasiihu.

*No Laamđo hokkirta yimbe moyyere saabe Almasiihu*

<sup>3</sup> Jettooje ngoondanii Laamđo Baaba Joomiraado men Isaa Almasiihu gadando en barkeeji di Ruuhu oo hokkata dii fuu to dow kammu too saabe haă̄bagol men e Almasiihu. <sup>4</sup> Sabi fade aduna oo tageede, Laamđo subiima en saabe Almasiihu, yalla eden laatoo seniīe be ngalaa feloore yeeso makko. Saabe jilli makko <sup>5</sup> o hoddiranii en gila arannnde laatoden biibbe makko saabe Isaa Almasiihu. Dum woni ko o yidani en saabe moyyuki makko <sup>6</sup> yalla omo yettiree moyyere makko mawnde nde walaa do haadi ndee. Nden moyyere o hokki en saabe Biyiiko korsudo oo. <sup>7</sup> E haă̄bagol men e makko coottitira-den yiiyam makko dam, luutti meeden njaafaa ko waarata e keewal makko hinnee. <sup>8</sup> Oon hinnee o wayli e meeden, o hokki en hakkilantaaku kiibbudo e anndal kiibbungal, <sup>9</sup> mo anndini en sago makko suudinoongo ngoo. Gila arannnde mo anniyorii tabintinirde ngo Biyiiko oo saabe moyyuki makko. <sup>10</sup> Sago ngoo yo hawrintinde huunde fuu e hawju hooreejo gooto, dum woni Almasiihu, wanaa ko woni dow kammu wanaa ko woni e leydi. Laamđo timminan sago mum ngoo so wakkati hiibbi.

<sup>11-12</sup> E ley haă̄bagol men e makko, en cubaama, enen fawbe jikke men e Almasiihu gila jooni hee. Laamđo tabintinirooho huunde fuu no muuyiri oo, hoddiranii en laataade sabaabu mawnineede teddeengal mum.

<sup>13</sup> Saabe Almasiihu, onon duu, on nanii konngol goonga ngol, dum woni Kabaaru Lobbo kisindo on oo. Nde ngoondin-don Almasiihu ndee, Laamđo wadii e mon maande mum nde loowi e mon Ruuhu Ceniido podanoodo oo ndee. <sup>14</sup> Oon Ruuhu Ceniido woni piibraado moyyereeji desanaadi en, faa jaannde kebaten soottiteede. Hono non Laamđo yettirtee saabe teddeengal muufum.

*Haala duwaawu Pool*

<sup>15</sup> Kammari majjum, gila nan-mi kabaaru goondinal moodon Joomiraado men Isaa, kajum e jilli di njogani-don seniīe hee fuu dii, <sup>16</sup> mi seerataa e yettude Laamđo kammari moodon nde jaagantoo-mi on Laamđo fuu. <sup>17</sup> Mido jaagoo Laamđo Joomiraado meeden Isaa Almasiihu oo, Baabiraado Jom darja, hokka on Ruuhu mum Ceniido gadoowo on hakkilante'en, bannginanoowo on Laamđo faa anndon dum. <sup>18</sup> Kasen duu mido jaagoo Laamđo uddita berde moodon faa paamon jikke mo o hokki on nde o noddi on ndee, paamon no moyyereeji desanaadi seniīe dili keewiri e no teddiri, <sup>19</sup> paamon kasen no baawde makko mawde de ngalaa kaaddi dee ngorri e meeden, enen goondinbe hee. Deen baawde keewde semmbe <sup>20</sup> o holli e ley Almasiihu nde o wuurtini dum e hakkunde maaybe so o joyyini dum jaamo makko dow kammu, <sup>21</sup> ton o būrni dum laamu e baawde e semmbe e kaanankaaku fuu, kajum e inde fuu baawde inndeede, wanaa de hannde dee tan, de janngo dee duu. <sup>22</sup> Laamđo fawii Almasiihu dow huunde fuu, hokkii mo laataade hooreejo deental goondinbe, hokkii mo 6urde huunde fuu. <sup>23</sup> Deental goondinbe ngal yo terde Almasiihu. Ngal hebbinaama mo kanko keewoowo huunde fuu e yimbe fuu oo.

## 2

*No kisinirte-den saabe hinnee Laamđo*

<sup>1</sup> Onon, on maaynoobe saabe junuuabajji moodon e luutti moodon, <sup>2</sup> on jokkunoobe laawol bonngol ngol aduna oo jokki ngol, on dowtaninoobe laamiido baawde gonde dow mbeeyu dee oo. Laamiido oo yo Ibiliisa golloowo faa hannde ley yimbe saliīe Laamđo hee. <sup>3</sup> En fuu e maă̄be njeyano-den, e gidaade yonki men ngonno-den, en jokkunoobe gidaade dee, en jokkunoobe miilooji men bondi. No ngorrundo-den nii jaati, eden kaandunoo e jukkungo Laamđo ngoo no maă̄be nii. <sup>4</sup> Kaa Laamđo yo keewdo yurmeende. Saabe jilli mawdi di mo yići en dii <sup>5</sup> mo wuurtindii en e Almasiihu, enen maaynoobe saabe luutti men hee. Goonga, saabe hinnee Laamđo oo kisinira-don. <sup>6</sup> E ley haă̄bagol men e Isaa Almasiihu, Laamđo wuurtindii en e makko, joyyindii en e makko to dow kammu too. <sup>7</sup> Hono nii o bannginirta no hinnee makko 6urdi huunde fuu mawnude. Jamaanuuji garooji dii fuu njyan moyyuki makko ki o wafani en e Isaa Almasiihu. <sup>8</sup> Saabe hinnee Laamđo oo kisinira-don e dow hoolaade mon Almasiihu. Dam kisindam, wanaa e golle moodon haă̄bi, ko dam haă̄bi e mum dee, e dokkal Laamđo. <sup>9</sup> Dam wanaa njoödi golle nedđo pati fay gooto

he6a mantoraade dām.<sup>10</sup> Sabi Laamđo wadi en ko ngon-dēn jooni koo: e ley ha6bagol men e Iisaa Almasiihu o tagiri en faa ngollen golleejī lobbi dī o lanndinanii en gila aranne dī.

### *No Almasiihu wadīri en lejol gootol*

<sup>11</sup> Jooni midō haalda e mon onon heefordirnoōbe arannee bēe. Mantortooōbe yo «taadiiōbe» ana koyna on noddira on «yimbe be taadaaki» fay so taadagol ma6be ngol ko junngō 6ii-adama gollata e terde tan. Ndennoo onon, miccīte ko ngonno-don arannee koo:<sup>12</sup> oon wakkati, on ngalaano Almasiihu, on jananbē woddiōbe lejol Israa'iila ngol Laamđo su6ii ngol, on ngalaano e aadijī pawiidi e fodoore Laamđo dī, on nguurdii on ngalaano jikke, on ngalaano Laamđo e ley aduna oo.<sup>13</sup> Kaa jooni, e ha6bagol moodon e Iisaa Almasiihu, onon woddiunoōbe arannee bēe on battiniraama saabe yiyyam makko dām.

<sup>14</sup> Sabi kanko Almasiihu, kanko woni jam meeden ko o wadi Yahuudiyankooōbe e leji godđi fuu lejol gootol koo. Nde o hokkitirnoō hoore makko ndee, nden o wurjini kokowol palaangol ngol, dum woni o ittii ngajaandi hakkunde leji dī.<sup>15</sup> O ittii jamirooje e kadaadi Sariya Muusaa fuu faa o wada Yahuudiyankooōbe e leji godđi lejol gootol kesol e ley ha6bagol mum e makko. Nii mo wadīri jam oo.<sup>16</sup> E maaygol makko dow leggal bardugal o ittiri ngajaandi ndii, mo reentini leji dī laatii terde goote, mo rewrintini de e Laamđo.<sup>17</sup> O warii waajaade on jam onon woddiunoōbe bēe, o warii waajaade 6adinoōbe bēe duu jam.<sup>18</sup> Sabi kammarī makko en fuu kebirten laawol yottaade Baabiraado saabe Ruuhu Ceniido gooto oo.

<sup>19</sup> Ndennoo, on nganaa jananbē hankasen, on nganaa ho6be duu, ko ngon-don dee, on wondubē e seniibē, on jeyaaēe e suudu Laamđo.<sup>20</sup> On mahaama e dow ko nelaaēe e annabaabē ni6i, Iisaa Almasiihu e hoore mum woni haayre doobiraande maadi ndii.<sup>21</sup> Kanko wafata maadi ndii fuu nanngondira, faa ndi toowa ndi laatoo suudu Joomiraado seniindu.<sup>22</sup> Ley ha6bagol mon e makko on mahondiraama faa laati-don hodorde Laamđo do o hodiri Ruuhu makko doo.

## 3

### *No Pool halfiniraa golle banngal bēe nganaa Yahuudiyankooōbe*

<sup>1</sup> Saabe dum midō diccanoo Laamđo, miin Pool uddaado kasu saabe Iisaa Almasiihu mo ngollanan-mi hakkunde mon onon bēe nganaa Yahuudiyankooōbe bēe.<sup>2</sup> Tayoral on nanii kabaaru golle mo Laamđo halfini kam e ley moyyuki mum faa nafa on oo ana haalee.<sup>3</sup> Sabi o 6annnginani kam sirri makko. Mi winndanii on haala majjum no ra6bidiri,<sup>4</sup> so on njanngii dum on anndan no paamir-mi sirri haala Almasiihu oo.<sup>5</sup> Oon sirri anndinanooka 6i6be aadama ley jamaanuuji jawtudi dī, kaa jooni Laamđo 6annnginirii mo Ruuhu Ceniido oo faa nelaaēe mum e annabaabē mum seniibē fuu paami mo.<sup>6</sup> Annii no sirri oo worri: saabe Kabaaru Lobbo oo, bēe nganaa Yahuudiyankooōbe bēe kebii ngedu e moyyereejī desaadī dī no Yahuudiyankooōbe bēe kebiri nii, kasen duu bēe ndeentii e mum'en terde goote, bēe ndeentii e mum'en fodoore nde Laamđo fodi saabe ha6bagol ma6be e Iisaa Almasiihu.

<sup>7</sup> Oon Kabaaru Lobbo laatti-mi golloovo mum. Golle oo yo moyyere nde Laamđo wadirani kam baawde mum.<sup>8</sup> Miin 6urdo seniibē bēe fuu famfude oo, mi wadanaama moyyere faa mi waajoo bēe nganaa Yahuudiyankooōbe barkeeji gondi e Almasiihu dī ngalaa do kaadi dī.<sup>9</sup> Mi wadanaama kasen famminde yimbe fuu no Laamđo tagudo huunde fuu oo tabintinirta sirri mum cuudinoodo gila arannee oo,<sup>10</sup> yalla laamu e baawde gonde e mbeeyu de njiyataake dee fuu ana paama no anndal Laamđo yaajiri e huunde fuu, paamira dum kammarī deental goondinbē ngal<sup>11</sup> ko waarata e anniya booydo mo Laamđo tabintiniri Joomiraado men Iisaa Almasiihu.<sup>12</sup> Eley ha6bagol men e makko kanko Almasiihu eden mbaawi 6adoraade Laamđo hoolaare saabe ko ngoondin-den mo koo.<sup>13</sup> Saabe dum, midō ndaarda on pati tayon jikke saabe torraaji kewtotoodi kam kammarī moodon dī, sabi dīn torraaji yo teddeengal moodon.

### *Haala jilli dī Almasiihu yidī en*

<sup>14</sup> Saabe majjum, midō nii diccanoo Baabiraado<sup>15</sup> jeydo lejol gonngol dow kammu e gonngol e leydi fuu oo.<sup>16</sup> Mido jaagoo mo kanko jom teddeengal manngal oo o hokka on semmbe saabe Ruuhu makko Ceniido oo<sup>17</sup> faa Almasiihu wona e ley 6erde moodon ko ngoondin-don mo koo. Mido jaagoo mo kasen o pii6ina on e ley jilli, o tabintina on ley majji.<sup>18</sup> Non paamirton, onon e seniibē bēe fuu, no jilli Almasiihu daduci hakkille dī poti mawnude faa ngalaa do di kaadi,<sup>19</sup> anndon dī yalla odon keewa ki6gal Laamđo ngal.

<sup>20</sup> Tayoral, Laamđo gollirdo ley meeden baawde mawde oo ana waawi gollide ko 6uri duwaawuuji men e miilooji men.<sup>21</sup> Yo teddeengal woodan mo ley deental goondinbē saabe Iisaa Almasiihu e ley jamaanuuji dī fuu faa abada abadin! Aamiina.

**4**

*No goondinbe Isaa bee laatorii terde goote*

<sup>1</sup> Miin uddaado kasu saabe gollande Joomiraado oo, mido ndaarda on: nguuron nguurdam kawroojam e noddaango ngo Laamdo noddi on e mum ngoo <sup>2</sup> tawee e leydinkinaare e newaare e munal. Tiifondiron e ley jilli. <sup>3</sup> Ruuhu Ceniido wadirri on gooto e jam kabbondirdo on oo. Tiinno-don e heddaade ley oon ngootummaaku. <sup>4</sup> On terde goote, odon njogii Ruuhu gooto, no jikke mo Laamdo noddi on faade e mum oo yo gooto nii. <sup>5</sup> Kasen Joomiraado gooto woodi, goondinal gootal woodi, batismi gooto woodi, <sup>6</sup> kajum e Laamdo gooto Baaba yimbe fuu, tiimdo 6e fuu, golliroovo 6e fuu, gondo e maabbe 6e fuu.

<sup>7</sup> Homo e men fuu hebii moyyere Laamdo ko waarata no Almasiihu hokkiri dum nii. <sup>8</sup> Sabi nii winndorii:

«O nabbi dow, o naaborii honaaabe heewbe,  
o hokkii yimbe dokke.»\*

<sup>9</sup> Kodum woni maanaa «o nabbi?» Walaa ko woni maanaa majjum, so wanaa o jippinoke e nokkuuje burde fuu leyfude e leydi ndii. <sup>10</sup> Jippinoodo oo, kajum e hoore mum woni nabbudo faa tiimi kammuuji dii fuu, yalla ana heewa aduna oo fuu. <sup>11</sup> Dokke makko dee annii: o wadi yogaabe nelaaabe, yogaabe haaltoobe konngol ngl Laamdo loowi e mum'en, yogaabe waajotoobe, yogaabe duroobe yimbe kajum jaanginoobe. <sup>12</sup> Ko o wadiri non, faa o lanndina seniibe 6ee faa mbaawa gollande deental goondinbe, yalla terde Almasiihu dee - dum woni deental goondinbe ngal - ana yaara yeeso e ley goondinal, <sup>13</sup> laato-den daande wootere e ley goondinal meeden e anndugol meeden Bii Laamdo oo, kasen duu laato-den hiibbi, njotto-den darnde Almasiihu hiibbunde ndee. <sup>14</sup> Ndennoo, en laatataako sukaabe naabiraabe bempeeje e kenuuli no laana nii. Jannde yimbe yidubbe naabude wobbe ley majjere yonnataa en hankasen. <sup>15</sup> Ko laatoto-den dee, haaloobe goonga ley jilli, yaaroobe yeeso e huunde fuu faade e Almasiihu, oon laatiido hooreeo oo. <sup>16</sup> Kanko waddani terde dee fuu nanngondirde faa gasa saabe jokkolde de ndokkaa dee. Hono non, so tergal fuu gollii golle mum, nden terde dee mawnan, njahan yeeso ley jilli.

*Haala neddaaku keso ley Almasiihu*

<sup>17</sup> Ndennoo, ko jokkata koo mbiyan-mi on: mido ndaarda on yeeso Joomiraado pati nguurdon hankasen no heefersie nii, sabi miilooji maabbe dii yo boli, <sup>18</sup> hakkillaaji maabbe e njiiiske, 6e njeyaka e nguurdam dam Laamdo hokkata dam saabe majjere maabbe e tiidugol maabbe ko'e. <sup>19</sup> Be ngalaa yaage, 6e ngadii ko'e maabbe jaahili'en, 6e joottataa gollude kudde cobude. <sup>20</sup> Kaa onon, wanaa non njanngir-don haala Almasiihu. <sup>21</sup> Tayoral, on nanii kabaaru makko, on njanngii goonga gondo e makko oo. <sup>22</sup> Ndennoo, ittee ko hiiddi ko woni ley mon koo, njoppee nguurdam moodon aranam bonniraadam muuyooji jaayrooji dam, <sup>23</sup> dalon yonkiji mon e hakkillaaji mon keydintinee. <sup>24</sup> Njogilee neddaaku keso mo Laamdo tagi dow mbaadi mum ley senaare e foocitaare goongaraare.

<sup>25</sup> Ndennoo, celon fenaande, homo fuu haalda e tanaa mum goonga, sabi homo e men fuu ana jeydaa e goddo no calcii neddo gooto njeydiri nii. <sup>26</sup> So on mettaama, pati luuttee. Pati janal naange tawdu on e tikkere. <sup>27</sup> Pati ndokkon Ibilisa laawol e ley mon. <sup>28</sup> Yo guijo njottu wujjuje, ko haani wadude dee, wuura e semmbe terde mum, yalla ana waawa wallude hasindinbe. <sup>29</sup> Pati konngol bonngol yaltu e kundude mon, ko kaan-don wadude tan yo haalde haalaaji naafooji baawdi naabude wobbe 6ee yeeso e ley goondinal, yalla odon ngadana hettintoobe on 6ee ko moyyi. <sup>30</sup> Pati cuunlinee Ruuhu Laamdo Ceniido oo, kanko wadi maande makko e mon kammari jannde coottitaari mon ndee. <sup>31</sup> Ittee metti fuu e berde moodon, ceeron e konnaagu e tikkere e dukooji e noore, kajum e ko boni fuu. <sup>32</sup> Moyyondiree e ko'e mon, njurmondiron, njaafondiron no Laamdo yaaforii on e ley haabagol mon e Almasiihu nii.

**5**

*Haala wuurd e ley fooyre*

<sup>1</sup> Ndennoo, laatee nemmboobe Laamdo kammari on 6ibbe makko 6e o horsini. <sup>2</sup> Nguurdon e yifondirde, no Almasiihu yidiri en so hokkitiri hoore mum saabe men no layyaari nii, no sadaka beldi Laamdo nii. <sup>3</sup> Ko on seniibe Laamdo koo, on kaanaa fay haalde haala huunde fuu ko wartata e fijirde e ko soobi e joote. <sup>4</sup> Pati kaalee haalaaji bondi naa boli naa cofudi, sabi hono majji kaanaa taweede e mon. Ko kaan-don wadude dee, njetton Laamdo. <sup>5</sup> Paamee dum doo faa gasa: pijoowo e cobudo e jootaa, dum woni dewooovo tooruuji, kambe 6e ngalaa ngeefu e laamu Almasiihu e Laamdo oo. <sup>6</sup> Pati fay gooto jaayriira on haalaaji boli, sabi hono majji cabinbinta tikkere Laamdo e dow saliibe mo 6ee.

\* 4:8 Jabuura 68.19

<sup>7</sup> Ndennoo, pati njokkondiree e 6een. <sup>8</sup> Arannde e nimre njeyano-don, kaa jooni e ha6bagol mon e Joomiraado e fooyre njeya-don. Ndennoo nguurdee no 6i6be fooyre nii, <sup>9</sup> sabi fooyre rimata moyyuki e fooccitaare e goonga fuu. <sup>10</sup> Tewton faamude ko welata Joomiraado. <sup>11</sup> Pati ngadon juude mon e golleeji di ngalaa nafaa golleteedi e ley nimre, ko haani dee, njaltinon di. <sup>12</sup> Ko 6een yimbe ngadata e cuucukka koo, ana yaannii fay jantaade. <sup>13</sup> Kaa huunde fuu ko yaltinaa, 6angan ley fooyre, <sup>14</sup> huunde fuu ko 6anganinaa foynan. Dum wadi so ana wiye:

«Aan daaniido, fin!

Imma e hakkunde maaybe,

fooyre Almasiihu ndee yaaynan e maa.»

<sup>15</sup> Ndennoo, ngadee hakkille faa sanne no nguurdaton nii, tawee wanaa no nuykaabe nii, no hakkilante'en nii. <sup>16</sup> Wakkati fuu mo keb-don, nawtoro-don dum, sabi jamaanu oo yo bondo. <sup>17</sup> Saabe dum, pati laatee 6e ngalaa hakkille, paamee ko woni sago Joomiraado. <sup>18</sup> Pati njaree doro faa cigiron, sabi dum naannan on e laalu. Ko haani dee, keewee Ruuhu, <sup>19</sup> mbaajondiron jime Jabuura e jettooe e jime de Ruuhu hokkata on dee, njimanon Joomiraado, njettiron mo 6erde laabude. <sup>20</sup> Njetton Baabiraado men Laamdo wakkati fuu dow huunde fuu saabe Joomiraado men Iisaa Almasiihu. <sup>21</sup> Homo e mon fuu dowtanoo banndum saabe Joomiraado men Iisaa Almasiihu.

### *Haala rewbe e worbe mum'en*

<sup>22</sup> Onon rewbe, dowtano-don worbe mon no dowtiranto-don Joomiraado nii. <sup>23</sup> Sabi gorko woni hoore jom suudu mum no Almasiihu woniri hoore deental goondinbe ngal nii, dum woni terde mum de hisini dee. <sup>24</sup> No deental goondinbe ngal dowtiranii Almasiihu nii, hono non debbo fuu haani dowtiranade jom suudu mum e huunde fuu. <sup>25</sup> Onon worbe, njidiree rewbe mon no Almasiihu yidiri deental goondinbe ngal so hokkitiri hoore mum saabe maggal <sup>26</sup> faa senna ngal nii, caggal o la6binirii ngal lootogal e haala makko, <sup>27</sup> yalla omo darna deental goondinbe ngal yeeso makko tawee ngal teddinaangal, ngal ceniingal, ngal walaa ayiibe naa tuundi naa jnoofi-jnoofi naa ko nanndi e mum fuu. <sup>28</sup> Hono non, ana tilsi e worbe njida rewbe mum'en no njidiri terde mum'en nii. Neddo fuu jiddo jom suudu mum, hoore mum yidi. <sup>29</sup> Sabi fay gooto wajnaa caldi mum, ko wa6ata dee, namminan di, hinnoo di no Almasiihu hinnortoo deental goondinbe ngal nii, <sup>30</sup> sabi en caldi terde makko dee. <sup>31</sup> Biindi dii mbii: «Dum wadi so gorko yoppan innu mum e baam mum, naangondira e jom suudu mum, 6e didon fuu 6e laatoo neddo gooto.»\* <sup>32</sup> Dum yo sirri mawdo. Mido wiya on: sirri oo, ko woni hakkunde Almasiihu e deental goondinbe ngal koo haalata. <sup>33</sup> Kaa no waawi laataade fuu, gorko fuu yidira jom suudu mum no yidiri hoore mum nii. Debbo duu teddina gorum.

## 6

### *Haala 6i6be e saaraabe*

<sup>1</sup> Onon 6i6be, dowtanee saaraabe moodon saabe Joomiraado, sabi dum woni ko dartii. <sup>2</sup> «Teddin inna maa e baam maa.» Ndee woni yamiroore aranndeere nde fodoore ha6bii e mum. <sup>3</sup> Fodoore ndee woni: «yalla ada heba moyyere, balde maa njuuta e leydi ndii.»\*

<sup>4</sup> Onon saaraabe, pati 6anganinaa 6i6be mon, ko kaan-don dee, biirdude 6e dow yamiroore Joomiraado e needi mum.

### *Haala maccube e halfaa6e*

<sup>5</sup> Onon maccube, dowtanee halfaa6e moodon dow kulol e sijnjugol tawee e 6erde laabude no dowtiranto-don Almasiihu nii. <sup>6</sup> Dowtanee 6e tawa wanaa yeeso ma6be tan yalla 6i6be adama ana njetta on. Ko haani dee, dowtanee 6e no maccube Almasiihu ngollirta muuyde Laamdo 6erde laabude nii. <sup>7</sup> Ngolliranee 6e anniya lobbo faa wa'a no Joomiraado ngollanton, wanaa yimbe, <sup>8</sup> sabi odon anndi neddo fuu golludo ko moyyi, so dimo so diimaajo, Joomiraado yoban dum hakke golle mum oo. <sup>9</sup> Onon halfaa6e, ngorree non e maccube moodon. Pati ngidee 6e, anndon Kalfaado moodon onon e ma6be fuu ana dow kammu, kasen duu oon burdintaa yimbe.

### *Haala kaborde de Laamdo hokkata faa Ibilisa jaaloree*

<sup>10</sup> Walaa ko heddie so wanaa wiide on keewon semmbe e ley habbagol mon e Joomiraado, tuugo-don baawde makko mawde dee. <sup>11</sup> Bamee kaborde de Laamdo hokki on dee fuu, yalla odon mbaawa daraade faa cakko-don dabareeji Ibilisa dii. <sup>12</sup> Sabi wanaa yimbe kabaten, ko kabaten dee, laamu e baawde e hooreyaaku ley oo doo aduna ni6budo, kapum e seydaani'en bonbe wonbe e mbeeyu bee. <sup>13</sup> Saabe dum, bamee kaborde de Laamdo hokki on dee fuu,

yalla odon mbaawa ha6aade nde jalaande bonnde ndee warii, kefon kasen jii6ude caggal  
nde kabi-don fuu faa timmi.

<sup>14</sup> Ndennoo, ndaree, kumo-don goonga, boorno-don fooccitaare no saaya ndeedaagu nii.  
<sup>15</sup> Lanndinaade waajaade Kabaaru Lobbo gaddoowo jam oo laatanoo on padé. <sup>16</sup> Wakkati  
fuu yo goondinallaatano on wawaade nde mbaaw-don sakkoraade kure ku66ooje de Bondó  
oo wedotoo on dee fuu. <sup>17</sup> Yo kisindam laatano on kufina njamndi, nanngon kaafaawi ki  
Ruuuhu Ceniido hokkata kii, kanki ki konngol Laamdo. <sup>18</sup> Wakkati fuu ngadée duwaawuuji  
e jaagundeeji ley ha66agol mon e Ruuuhu Ceniido. Kakkilee pati on joottu jaaganaade  
seniibé bee fuu Laamdo. <sup>19</sup> Naagano-don kam miin duu newnaneede konngol, yalla nde  
moodon yalla odon annda no min ngorri e yalla omo waaltina hakkillaaji mon.

<sup>21</sup> Tikikus, sakiike men korsudo gollanoowo Joomiraado koolniido, humpitan on dum  
fuu, yalla onon duu odon jootta humpeede kam anndon no ngorru-mi. <sup>22</sup> Mi nelii mo e  
moodon yalla odon annda no min ngorri e yalla omo waaltina hakkillaaji mon.

*Baynondiral*

<sup>23</sup> Sakiraabe, yo Baabiraado men Laamdo e Joomiraado men Iisaa Almasiihu ngadan on  
jam e jilli gondudi e goondinal. <sup>24</sup> Yidube Joomiraado men Iisaa Almasiihu jilli dí timmataa  
bee fuu, yo hinnee Laamdo wonu e mum'en.

## Bataaki Pool faade e Filipiyankooōe

<sup>1</sup> Miin Pool e Timote, maccube Iisaa Almasiihu, mbinndi oo 6ataaki faade e deental goondinđe Iisaa gonngal ngeenndi Filipa. Min njowntii on, onon hooreeēe e gollanoōe deental ngal, min njowntii on fuu, onon seniīe habbiīe e Iisaa Almasiihu see. <sup>2</sup> Yo on kebu moyyere e jam iwde e Baabiraado men Laamdo e Joomiraado men Iisaa Almasiihu.

### No Pool yettira Laamdo kammati Filipiyankooōe

<sup>3</sup> Mido yetta Laamdo nde micctii-mi on fuu. <sup>4</sup> Wakkati fuu nde jaagantoo-mi on Laamdo on fuu, e seyo jaagirantoo-mi on, <sup>5</sup> sabi gila jannnde ngoondin-don Kabaaru Lobbo haala Iisaa faa jooni odon ndarodii e am. <sup>6</sup> Mido tayori Laamdo pudsudo golle lobbo e mon oo, o jokkan dum faa dum hiōōa e ley gartol Iisaa Almasiihu. <sup>7</sup> Ana haani mi miilana on diin miilooji on fuu, sabi hakkiile am ana e mon. On fuu on ndeentii e am moyyere nde Laamdo hokki kam nde ngeyyaa-mi e nde ndaranii-mi tabintinde Kabaaru Lobbo oo ndee. <sup>8</sup> Mido horsiniri on fuu korsa Iisaa Almasiihu, Laamdo ana seedii. <sup>9</sup> Ko jaagantoo-mi on Laamdo anni: yo jilli mon seydo yaarude yeeso, seydotroo anndal, seydotroo seenndude pene e goonga, <sup>10</sup> yalla odon mbaawa subaade ko moyyi. Nden on laatoto laabube 6e ngalaajinēe jinēe nannde gartol Iisaa Almasiihu. <sup>11</sup> On laatoto duu hebbinaa6e golleeji pooccitiidi iwdi e Iisaa Almasiihu, yalla Laamdo ana teddinee, yettee.

### No uddeede Pool nabiri Kabaaru Lobbo oo yeeso

<sup>12</sup> Sakiraabe, ko njisu-mi anndon dee, torra kebu6o kam oo waddanii Kabaaru Lobbo oo yaarude yeeso <sup>13</sup> faa hayboobē galle kaananke oo e heddiīe 6ee fuu tayori ko ngeyyiraami koo yo saabe Iisaa Almasiihu. <sup>14</sup> Ko 6uri heewde e sakiraabe 6ee duu, geyyelle am dee feydanii dum'en hoolaade Joomiraado. Dum saabii so ebe mbaajoroo konngol Laamdo ngol rafi kulol.

<sup>15</sup> Goonga, yogaabe ana mbaajoroo kabaaru Iisaa Almasiihu oo haasidaaku e poodondiral, kaa wo66e ana e anniyaaji lobbi. <sup>16</sup> Been ngolliranta Almasiihu jilli, sabi e6e anndi Laamdo hokki kam daranaade Kabaaru Lobbo oo. <sup>17</sup> Kaa fee too ko mbaajortoo kabaaru Almasiihu faa nafa dum'en kajum'en tan, anniyaaji ma66e moyyaa, kasen duu ko 6e miilotoo dee, seydude torra am ley geyyede am oo. <sup>18</sup> Dum kaa bonnataa fay huunde! Ko waawi laataade fuu, so Iisaa Almasiihu inndaama hen tan ana heya, so latii anniyaaji bondi naa anniyaaji lobbi fuu mido seyyi.

Goonga, mi seyoto caggal mum duu <sup>19</sup> sabi mido anndi saabe duwaawuji mon e ballal Ruuhu Iisaa Almasiihu, dum fuu dum sakinato kam kisindam. <sup>20</sup> Mido joonndorii e hakkiile am fuu, mi hersataa e dow fay huunde. Mido hoolii Almasiihu teddinte saabe ko hewtii kam koo gila jooni faa abada, nguur-mi maay-mi fuu. <sup>21</sup> Sabi banngal am, Almasiihu yo yonki am, maayde duu yo tino am. <sup>22</sup> Kaa so mi uuuri, ana moyya nguurdam am waddana kam gollude golle nafoowo. Ndennoo mi anndaa ko cubotoo-mi. <sup>23</sup> Hakkille am feccike pecce didi: ko 6uri-mi yidude, yaade mi joodfodoyoo e Almasiihu, dum jaati 6uri moyyude. <sup>24</sup> Kaa mi heddo wuurdie buri nafude on, onon. <sup>25</sup> Mido tayori dum, mido anndi mi heddo e aduna mi wonda e mon on fuu, yalla odon njaara yeeso, ceyo-don ley goondinal <sup>26</sup> faa gartol am hakkunde mon seydanraade ha66agol mon e Iisaa Almasiihu kammari am.

### Haala daranaade Kabaaru Lobbo oo

<sup>27</sup> Onon, nguuree nguurdam kawroojam e Kabaaru Lobbo haala Iisaa Almasiihu, yalla so mi warii tuumtaade on naa so mi waraali, mi nana kabaaru mon, mi annda odon tabiti e anniya goto, odon ndarodii gootal e ha6anaade goondinal Kabaaru Lobbo oo, <sup>28</sup> tawa on accataa konnee'en bee kul6ina on e dow fay huunde. Banngal ma66e, dum yo maande halkagol, kaa onon, dum maande kisindam mon. Dum to Laamdo iwrata. <sup>29</sup> Sabi onon ndokkaa moyyere Laamdo saabe Almasiihu. Wanaa faa ngoondinon mo tan ndokkire-don, on ndokkaarma dum kases faa torrire-don kammari makko, <sup>30</sup> kajum e daranaade ha66o ngo njii-don mido habee, ngo nan-don mido habee faa jooni ngoo.

## 2

### Haala leydinkinaare Almasiihu e teddeengal mum

<sup>1</sup> Ko Iisaa Almasiihu heddi hokkude on semmbe e suusinde on ley jilli koo, ko ndeentudon e Ruuhu Ceniido so njidondir-don njurmondir-don, <sup>2</sup> ki66iniree seyo am ko laati-don daande wootere e jilli gooti e 6ernde wootere e anniya gooto koo. <sup>3</sup> Pati ngolliree huunde

fuu haasidaaku naa haawtaade dow pene, ngolliree leydinkinaare, yalla gooto fuu ana jogoroo hoore mum banndum ana buri dum.<sup>4</sup> Pati fay gooto laatoo hammadi haaje mum tan, ndaarta nafaa wobbe bee duu.<sup>5</sup> Yo anniya Iisaa Almasiihu tawe e mon:

<sup>6</sup> Kanko, fay so taweede mbaadi Laamdo ana e makko,  
o tuugaaki e majjum faa o heddo fotude e Laamdo,

<sup>7</sup> o famdinii hoore makko,  
o bami mbaadi maccudo,  
o laati hono neddo.

O jogoraa o neddo

<sup>8</sup> o leydinkinii,  
o dowtanii Laamdo faa o maayi,  
o maayi e dow leggal bardugal.

<sup>9</sup> Saabe dum kasen, Laamdo toownii mo faa sanne,  
hokki mo innde burnde inde fuu,

<sup>10</sup> yalla koppi fuu ana koforoo saabe innde makko to tawaa fuu,  
so dow kammu so dow leydi so ley leydi,

<sup>11</sup> yalla gooto fuu ana sellina

Iisaa Almasiihu woni Joomiraado,  
faa Baabiraado men Laamdo teddinee.

### No goondinbe pooynirta ley aduna

<sup>12</sup> Dum e taweede, sakiraabe am horsube, nde ngondunoo-mi e mon ndee, odon dowtanii Laamdo wakkati fuu. Sako jooni nde ngodditi-mi, nden kaan-don furde dowtanaade mo. Njirwiniron hono non kisindam dam Laamdo hokki on dam, ngadiron dum kulol e sijyugol.

<sup>13</sup> Sabi Laamdo ana golla e mon faa muuyon ko weli dum, ngollon dum.

<sup>14</sup> E ko ngollaton fuu, pati jermondiree pati ndukidee,<sup>15</sup> yalla odon laatoo laabube be ngalaa piine, laato-don biibbe Laamdo be ngalaa ayiibe hakkunde yimbe hannde oopiihe bonbe. On pooynan hakkunde maabbe hono no koode pooyniri ley aduna nii<sup>16</sup> ko nangundon konngol nguurdam ngol faa gasi koo. Nii wadata so mi mantoroo on piannde gartol Iisaa Almasiihu. Sabi mi don-donnaali mee, mi tampaali mee. <sup>17</sup> Fay so dum yaadi e yonki am mi laatoto sadaka mbayleteedo dow sadaka mo goondinal mon sakkantoo Laamdo oo, mi seyoti, mi weltodoto e mon.<sup>18</sup> Onon duu ceyoree hono non, mbeltodo-den.

### Haala gollidiibe didon hoolniibe

<sup>19</sup> So Joomiraado men Iisaa jaabii, mi nelan Timote e mon ko booyataa, yalla so mi humpitike kabaaruji mon dii ana waaltina hakkille am.<sup>20</sup> Sabi kanko tan woni gondudo e am anniya gooto, kasindindo e kabaaru mon,<sup>21</sup> heddiibe bee fuu hammadi haaje mum'en tan, wanaa saabe Iisaa Almasiihu.<sup>22</sup> Kaa Timote, odon anndi no holliri neddaaku mum, sabi mo wallii kam waajaade Kabaaru Lobbo oo no biiddu wallirta baaba mum nii.<sup>23</sup> Kanko anniyyi-mi nelude wakkati mo paamu-mi no alhaali am laatootoo fuu.<sup>24</sup> Kaa Joomiraado hokkii kam taylor, booyataa mi waran to mon, miin e hoore am.

<sup>25</sup> Hono non mi yii tilsii mi nela e mon sakiike men Epaforodit, gollidiido am oo. O wallii kam haabanaade Kabaaru Lobbo oo. Kanko woni mo neluno-don faa walla kam e haaje oo.<sup>26</sup> Omo yeewaa on fuu, kasen o wemmbanoomaa sanne ko nan-don o sellaano koo.<sup>27</sup> Tayoral, o jawiino faa o hosii maayde. Kaa Laamdo yurmike mo, yurmike kam miin duu, pati mi heba sugulla dow sugulla.<sup>28</sup> Dum saabii so kejii-mi law faa mi nela mo e mon, yalla so on njiitii mo odon ceyoo, miin duu sugulla am buystoo.<sup>29</sup> Ndennoo, njabboree mo saabe Joomiraado seyo manngo. Teddinee yimbe wa'ube non fuu,<sup>30</sup> sabi kanko kammari gollande Iisaa Almasiihu o hosiri maayde, mo hokkitiri yonki makko faa o waddana kam ballal ngandunkuno-don waddande kam onon e ko'e mon ngal.

## 3

### Haala annduude Iisaa Almasiihu

<sup>1</sup> Caggal dum, sakiraabe am, ceyoree Joomiraado. Winnditanaade on kulle dee tampintaa kam, sabi kanje ndokkata on hoolaare:<sup>2</sup> ndeento-don e dawaadi - dum woni gollooē ko boni, waajotoobe haala taadagol penewol bee!<sup>3</sup> Sabi enen ngoni taadiibe jaati bee, eden ndewira Ruuhu Laamdo, eden mantoroo Iisaa Almasiihu, en pawaali jikke men e dow ko'e men.<sup>4</sup> Haya, miin mido waawnoo fawde jikke am dow hoore am. So wobbe miilii ana mbaawi fawde jikke mum'en dow ko'e mum'en, miin buri haandise e majjum,<sup>5</sup> sabi mi taadaama gila e halooma jettabo mo pinu-mi e mum oo, mi Israa'iilanke iwdo e suudu Benjamin, mi Yahuudiyanke 6ii Yahuudiyanke. E banngal Sariya Muusaa mido jeyaa e waalde Farisa'en,<sup>6</sup> mido hirana Sariya oo sanne faa mido torrannoo deente goondinbe Iisaa dee, fay gooto waawaano piinjude kam banngal fooccitanaade Sariya oo.<sup>7</sup> Kaa ko

njogorinoo-mi yo tino am koo fuu, saabe Iisaa Almasiihu mi tawii yo mursee. <sup>8</sup> Goonga, mido jogorii dum fuu yo mursee saabe anndude Joomiraado am Iisaa Almasiihu 6uri kulle dee fuu. Saabe makko njarrii-mi mursude ko njogii-mi, mido jogorii huunde fuu yo mbuuwdi yalla Almasiihu ana laatanoo kam tino, <sup>9</sup> mi heba tawdeede e mum. Mi walaa fooccitaare nde mbaaw-mi hefude miin e hoore am e jokkugol am Sariya oo, mi pooccitiido saabe fooccitaare iwrannde kam e hoolaade Almasiihu, kayre woni fooccitaare nde Laamdo hokki goondinbe mo 6ee. <sup>10</sup> Sago am mi annda mo kanko Iisaa Almasiihu, mi annda baawde de Laamdo wuurtiniri mo dee, mi reenta e makko torra, mi nannda e makko maayde, <sup>11</sup> yalla miin duu mido heba immintineede hakkunde maaybe pannnde darngal.

<sup>12</sup> Mi wiyaali mi hefii dum gila jooni naa mi kiibudo, kaa mido wondi e dogude hono no dadondirteedo nii yalla mido heba dum, sabi miin e hoore am, Iisaa Almasiihu hefii kam. <sup>13</sup> Goonga sakiraabe, mi wiyaali mi hefii dum. Kaa mido waada huunde wootere: mido yeggit ka yabbii, mido foodanoo ko warata. <sup>14</sup> Mido dogana haattirde, faa mi heba mbarjaari dow kammu ndi Laamdo noddata en e mum saabe Iisaa Almasiihu. <sup>15</sup> Enen hakkilanteen 6ee fuu, miiloro-den hono non. So odon miiloo huunde wonnde, Laamdo 6annginanan on dum. <sup>16</sup> Kaa no wa'i fuu, do tawe-den fuu, njokken laawol no ngorru-den jooni nii.

<sup>17</sup> Sakiraabe, on fuu nemmbee kam, yeewee worru6e no njii-don miden ngorri nii 6ee. <sup>18</sup> Sabi heewbe laatike konnee'en leggal bardugal Iisaa Almasiihu. Mi haalanii on dum cili kuurdi, mi haaliran on jooni duu e bojji. <sup>19</sup> Kambe, battane ma6be yo halkere, dedi ma6be ngoni laamdo'en ma6be, hersa ma6be 6e paayirta, aduna tan fe kabanta. <sup>20</sup> Kaa enen, dow kammu njeye-den, eden keppi kisinoowo men iwoovo ton oo, dum yo Joomiraado men Iisaa Almasiihu. <sup>21</sup> Kanko, o waylitan terde men lo'ude dee faa de keba teddeengal no terde makko dee nii, sabi omo jogii baawde faa o waada huunde fuu dowtanoo mo.

## 4

### *Haala seyoraade Joomiraado*

<sup>1</sup> Sakiraabe am horsube, on njeewnii kam sanne, on laatike seyo am e deesewal am. Gidiraabe am, tabitee e Joomiraado.

<sup>2</sup> Mido ndaarda banndiraabe am rewbe, dum woni Ewodi e Sintis, yo 6e laato daande wootere saabe Joomiraado. <sup>3</sup> Aan Sinsigis, gollidiido am koolniido oo duu, mido ndaarde paabo-daa 6e, sabi 6e mballii kam habanaade Kabaaru Lobbo oo, kambe e Keleman e gollidiibe am wobbe, 6e inde mum'en mbinndaa e dewtere ngeurndam 6ee.

<sup>4</sup> Ceyoree Joomiraado wakkati fuu. Mido wiya on kasen, ceyee! <sup>5</sup> Yo yimb6e fuu anndu newaare mon. Joomiraado ana badii. <sup>6</sup> Pati fay huunde sujlinaa on abada, ko haani dee: jaagoree Laamdo haajuuji mon fuu duwaawu gondudo e jettooe. <sup>7</sup> Nden, Laamdo hokkan on jam dadudo hakkille, jii6inan berde mon e hakkillaaji mon e Iisaa Almasiihu.

<sup>8</sup> Haya, sakiraabe, tiidee e ko moyyi e ko haani yeteede fuu, dum woni teddungal e goonga, kajum e fooccitaare e senaare e ko haani yideede e ko haani teddineede. <sup>9</sup> Ngolliree ko pammin-mi on e ko keb-don e am, ko narru-don kam e ko njiiru-don kam. Nden Laamdo gaddoovo jam oo tawdete e mon.

### *No Pool barkiniri dokkal Filipiyankooē*

<sup>10</sup> Mido seyori Joomiraado seyo manngo sabi jooni on keydintini ballal mon faade e am. Tayoral, hakkillaaji mon ana ngonnoo e am, kaa on kebaali yottinde ballal ngal. <sup>11</sup> Wanaa saabe won ko kaajaa-mi wadi so mbii-mi non, sabi mi woowtiniike hejjitoraade no tawraami fuu. <sup>12</sup> Mido waawi wuurdude e baasal, mido waawi wuurdude e kebal. E no waawi worrude fuu, mi biirorike haarannde e yolbere, mi biirorike hebbinde ejakoreede, <sup>13</sup> mido waawi fuu e ley haffagol am e Iisaa Almasiihu dokkoovo kam semmbe oo. <sup>14</sup> Kaa dum e taweede, on ngadii ko moyyi ko mballu-don kam e ley torra am oo koo.

<sup>15</sup> Filipiyankooē, odon anndi e ley puddoode mon nande Kabaaru Lobbo oo, nde iwmi leydi Makedoniya ndee, fay deental goondinbe gootal wallondiraali e am, so wanaa ngal mon ngal. <sup>16</sup> Nde ngonnoo-mi Tesaloniiki ndee duu, on neldii kam ko kasindin-mi e mum jaati, wanaa fay nde wootere, cili kuurdi! <sup>17</sup> Wanaa dokkal tewtan-mi - faa tino golle mon lobbo oo beydoo tewtan-mi. <sup>18</sup> Ko neldu-don Epaforodit koo yottike faa gasi, humtii haajuuji am fuu, mi hefii faa heewi. Dokkal mon ngal laatike uurdi mbelndi, no sadaka beldo Laamdo jaabado nii. <sup>19</sup> Laamdo teddudo jom ngalu oo humtiran haajuuji mon fuu saabe Iisaa Almasiihu. <sup>20</sup> Yo teddeengal woodan Baabiraado men Laamdo faa abada abadin. Aamiina.

### *Bay nondir*

<sup>21</sup> Njowtanee kam seniiße haabbiise e Iisaa Almasiihu fuu. Sakiraabe wonduße e am 6ee ana njowta on. <sup>22</sup> Seniiße 6ee fuu ana njowta on. Be ana adoo jowtude on fuu wonße ley galle kaananke Roma mawdo oo 6ee.

<sup>23</sup> Yo hinnee Joomiraado men Iisaa Almasiihu wonu e mon!

## Bataaki **Pool faade e** **Koloosiyankooōe**

<sup>1</sup> Oo 6ataaki ga am iwri miin Pool neladaa Iisaa Almasiihu e sago Laamdo, kajum e sakiike men Timote. <sup>2</sup> Min njowntii on onon seniīē wonbē Koloosi, sakiraabē hoolniiē hääbiiē e Almasiihu. Yo Baabiraado meeden Laamdo wadan on moytere e jam!

### No Pool yettirta Laamdo kammari Koloosiyankooōe

<sup>3</sup> Min ceerataa e yettude Laamdo, Baaba Joomiraado men Iisaa Almasiihu, nde min naagantoo on Laamdo fuu,<sup>4</sup> sabi min kaalanaama kabaaru goondinal mon Iisaa Almasiihu, kajum e jilli di njogani-don seniīē bēe fuu<sup>5</sup> saabe jikke mo ndesana-don dow kammu oo. On kebii oon jikke nde nan-don konngol goonga ngol ndee, dum woni Kabaaru Lobbo oo.<sup>6</sup> Oon Kabaaru Lobbo yottoriima on no mo yottorii aduna oo fuu nii, omo wa'i no lekki mawnoowi ndimoowi 6idde mum nii. Hono non Kabaaru Lobbo oo worri hakkunde mon onon duu, gila jaannde keb-don hettinaade haala hinnee Laamdo oo so paamu-don no mo wa'i jaati nii.<sup>7</sup> Dum woni ko Eparafas gollidiido amen korsudo waajii on, kanko gollanoowi Almasiihu koolniido hakkunde mon oo.<sup>8</sup> O haalani min duu jilli di Ruuhu oo hebbini e mon dii.

<sup>9</sup> Saabe dum, minen duu, gila min nani dum, min ceeraali e jaaganaade on Laamdo. Miden jaagoo mo o hebbina on hakkilantaaku e faamu mo Ruuhu hokkata oo, yalla odon annda ko woni sago makko faa gasa.<sup>10</sup> Hono non, kebon wurde nguurndam beloojam Joomiraado kawroojam e muuyde mum e dow huunde fuu, tabiton e golle lobbo fuu, seydon anndude Laamdo.<sup>11</sup> Miden jaaganoo on Laamdo kasen hokka on semmbe mawdō no baawde mum teddude dee mawniri nii, yalla odon tawree tiinnitaare e mupal fuu.<sup>12</sup> Njettiree Baabiraado oo seyo, sabi o wadii on fotube hebude ngedu e moyyereeji desanaadi seniīē gondi e fooyre dii.<sup>13</sup> Kanko yaltini en e baawde nimre, so o naanni en e laamu Biyiiko korsudo<sup>14</sup> coottitiido en so yaafii luutti meeden oo.

### Haala teddungal Almasiihu

<sup>15</sup> Kanko Almasiihu o mbaadi Laamdo mo yiylataake oo.

Kanko woni hammadi e dow tagoore ndee fuu.

<sup>16</sup> Sabi huunde fuu saabe makko tagiraa,

ko woni dow kammu e ko woni e leydi fuu,

ko yiyyetee e ko yiylataake fuu,

dum woni bimmbeeje laamu naa kaanankaaku naa hooreyaaku naa baawde,  
dum fuu kanko tagiraa, kanko taganaa.

<sup>17</sup> O woodii gila fay huunde woodaa,  
huunde fuu ana yubondiri saabe makko.

<sup>18</sup> Kanko woni hoore terde,  
dum woni kanko woni hoore deental goondinbē ngal.

Kanko woni fuddoode,  
kanko woni hammadiijo e wuurtube hakkunde maaybē,  
yalla omo bura huunde fuu.

<sup>19</sup> Sabi Laamdo muuyi ko woni e mum koo fuu  
wona e makko kanko Almasiihu.

<sup>20</sup> E oon Bajjo mo rewrintiniri huunde fuu e makko  
ko o waddani 6e jam saabe yiyyam mum juppiidam dow leggal bardugal koo.

Ko woni dow kammu e ko woni dow leydi fuu  
rewrintinaama e makko.

<sup>21</sup> Arannde, on fuu on woddiibē Laamdo, on laatinoke waybē makko saabe miilooji mon e golleeji mon bondi.<sup>22</sup> Kaa jooni, mo rewrintinii on e makko saabe maayde nde Biyiiko laatiido neddo oo maayi ndee, yalla omo darna on yeeso makko tawee on seniīē on ngalaa ayiibe on ngalaa jiine.<sup>23</sup> Kaa noo, kinaa keddo-don e goondinal, jiibon e ley maggal, laatodon joottiibē 6e ndimmbataako 6e iwataa e jikke mo Kabaaru Lobbo hokkata oo. Oon Kabaaru Lobbo, on nanii mo, sabi tagoore ndee fuu waajaama mo. Kanko ngollanan-mi miin Pool.

### No Pool haborii banngal deental goondinbē Iisaa

<sup>24</sup> Mido seyyi jooni saabe torraaji di kebu-mi kammari ko ngollan-mi on koo. Hono non, ko heddi e torraaji Almasiihu koo, dum kiibiniran-mi caldi am kammari terde makko dee, dum woni deental goondinbē ngal.<sup>25</sup> Kanngal laatii-mi golloowo mum. Laamdo halfini kam oo golle, yalla mido waajoo on haala makko kaa fuu.<sup>26</sup> Kaan haala yo sirri

cuudaninoodo jamaanuuji gila aranne, kaa jooni Laamđo 6annginanii mo seniīe mum.<sup>27</sup> Sabi been Laamđo anniyii anndinde sirri mum goodando lepi fuu, no sirri oo teddirl e no mawniri nii. Oon sirri annii: Almasiihu ana e moodon, dum hokki on jikke hebude ngedu e annoora Laamđo.<sup>28</sup> Oon Almasiihu min kaalata haala mum, minden mbaajoo yimbe fuu, minden anndinira dum'en hakkilantaaku fuu yalla minden njottina neddo fuu yeeso Laamđo tawa yo kiibudo e ley haibagol mum e Almasiihu.<sup>29</sup> Saabe dum mido golla mido sooboro baawde makko gollirooje semmbe e ley am dee.

## 2

<sup>1</sup> Mido yidi anndon haib naawngo ngo kabetee-mi saabe moodon, onon e yimbe wonbe Lawdikiya e wobbe 6e meedali yiide kam bee fuu,<sup>2</sup> yalla berde mon ana buuba, laato-don gooto saabe jilli, keewon hakkilantaaku kiibudo faa paamon sirri Laamđo oo, dum woni Almasiihu<sup>3</sup> mo ngalu Laamđo fuu suudii e mum oo. Ngalu oo yo hakkilantaaku e anndal.<sup>4</sup> Ko kaalanir-mi on dum, pati kiilire-don haalaaji beldi.<sup>5</sup> Sabi fay so taweede mido woddiri on terde, hakkille am kaa ana wondi e moodon, mido seyoroo gondal mon lobbal ngal, kajum e no tiisir-don e gooncinal mon e Almasiihu ngal nii.

### *Haala jokkude e Almasiihu*

<sup>6</sup> Jooni, ko njaabu-don lisaa Almasiihu laatoo Joomiraado moodon koo, njokkon e makko, <sup>7</sup> niibon e makko, accon o naba on yeoso e ley gooncinal, keddo-don e ngal gooncinal ko waaraata e jannde nde keb-don ndee, njetton Laamđo sanne.

<sup>8</sup> Ndeentee pati fay gooto hilira on haalaaji luggi e haalaaji bol iwdi e neesuuji biibbe adama kajum e semmbeeji aduna dii. Deen gede iwaali e Almasiihu.<sup>9</sup> Sabi ko woni e Laamđo fuu ana e Almasiihu, e ley terde mum jaati.<sup>10</sup> Onon duu, on kebii ko woni e Laamđo koo fuu e ley haibagol mon e Almasiihu, kanko tiimudo laamu e baawde fuu oo.<sup>11</sup> E makko on taadanooma, kaa wanaa taadagol ngol yimbe ngadata ngol, dum taadagol iwngol e Almasiihu ngol nde o itti on e terde bii-aadamaaku luuttooje dee ndee.<sup>12</sup> E ley ko loota-don lootogal batisima koo, on irdanooma e makko, kasen, on nguurtindinanooma e makko saabe on ngoondinii baawde Laamđo guurtindo mo oo.<sup>13</sup> On maaynoobe saabe junuuubaaji moodon e saabe on laatanooki yimbe Laamđo. Kaa Laamđo wuurtindinii on e Almasiihu,

yaafike en luutti men fuu,

<sup>14</sup> tosii deryewol kiiti jinjooji en dii,

ittii ngol, tontii ngol dow legal bardugal.

<sup>15</sup> O boorti laamu e baawde,

o hersini dum'en yeoso yimbe fuu

nde o jaalorii dum'en maayde Almasiihu ndee.

<sup>16</sup> Ndennoo, pati fay gooto jinjir on dow ko jaamaton e ko njaraton naa saabe teddingol jalaade yogaaje e darde lewru e jalaade powteteede.<sup>17</sup> Dum fuu dum cappotoodum kudde garoyooye tan, kaa goonga oo e Almasiihu woni.<sup>18</sup> Pati accon rewoobe malaa'ika'en wiyoobe yo leyfinkiniibe pela on. Been yimbe ana kaibii e ko njii ley koydi, kasen ebe mawninkinii e dow meere saabe miilooji maibbe aduna,<sup>19</sup> 6e njokkaali haibaaade e Almasiihu hooreejo oo. Oon hokkata terde dee fuu ko kaaaja, hawrintinira de jokkolde e dadi. Kasen duu saabe makko terde dee ana mawnira no Laamđo muuyiri nii.

### *Haala maaydude e Almasiihu e wuurdude e mum*

<sup>20</sup> On maaydii e Almasiihu, on iwii e semmbeeji aduna oo dii. Ndennoo, kodum wadi so odon nguurdha no jeyaaše e oo doo aduna nii? Kodum wadi so odon njaabu daaleede:<sup>21</sup> «Pati 6amu, pati meedu, pati memu»?<sup>22</sup> Dum fuu dum kadaadum dow meere, dum fuu dum waaju iwdi e yimbe tan. Laamđo tagii kulle dee fuu faa nawtoro-den dum'en sakitoo nola.<sup>23</sup> So goonga, yimbe ana miila kadaadi dii yo hakkilantaaku, sabi wiyeteno kinaa yimbe cujidira no semmbe mum'en foti, kinaa yimbe leyfinkino, kinaa yimbe mbiira caldi mum'en. Kaa noo, tawaama diin kadaadi fuu paabataako yimbe jaalaade gidaade yonki.

## 3

<sup>1</sup> Ndennoo, ko nguurtindina-don e Almasiihu koo, tewtee kudde gonde dow kammu to Almasiihu joodii jaamo Laamđo too.<sup>2</sup> Ngattee hakkillaaji moodon e kudde gonde dow kammu, pati ngattee di e kudde gonde e leydi.<sup>3</sup> Sabi on maayii, nguurndam dam keb-don jooni dam ana suudidaa e Almasiihu to Laamđo.<sup>4</sup> So Almasiihu laatiido nguurndam moodon oo 6anngii, on 6anngidan e makko onon duu, kebon ngedu e teddeengal makko.

### *Haala ko hiidäi e ko heydi*

<sup>5</sup> Ndennoo, mbaree kulle adunankooje gonde e moodon dee, ko wa'i hono ko sobi, kajum e fijirde e gidaade yonki e muuyooji bondi, kajum e joote, sabi joote yo rewde tooruujii.

<sup>6</sup> Diin luutti kajum'en njippinta tikkere Laamdo e dow saliise goondinde mo 6ee. <sup>7</sup> Onon duu, hono non ngorrundo-don aranne, hono non nguurduno-don e diin luutti. <sup>8</sup> Kaa jooni, njoppee dee doo kulle: tikkere e jaangere e ko boni e mbonka, kajum e wulde hunduko. <sup>9</sup> Pati fay gooto e moodon fenana baandum, sabi on ittii ko hiiddi ko wonnoo ley mon koo, kajum e golleeji mum fuu, <sup>10</sup> on laatike yimbe heybe. Laamdo tagudo ko heydi ko woni ley mon oo seerataa e heydintinde dum faa dum nannda e muudum, yalla odon keba anndal kiibungal. <sup>11</sup> Ndennoo jooni, walaa ko seenndi Yahuudiyanke e Yunaninke, taadiido e mo taadaaki. Jooni wanaa mo jaanngali, wanaa neddo ladde, wanaa dimo, wanaa diimaajo, sabi Almasiihu woni fuu, woni e maabbe 6e fuu.

<sup>12</sup> Ndennoo, saabe Laamdo subike on, sennii on, horsinii on, tawre-don jilli e yurmeende e moyyuki e leydinkinaare e newaare kajum e mujal. <sup>13</sup> Muujondiree, so yoga moodon ana jogii ko injira goddo, njaafondiron. No Joomiraado yaaforii on nii, njaafondiron. <sup>14</sup> E ley dum fuu, berde moodon keewa jilli, sabi jilli njubbata huunde fuu faa gasa. <sup>15</sup> Accon jam Almasiihu oo laamoo miilooji mon, sabi Laamdo noddii on faa ngondon e jam laatodon terde goote. Njetton Laamdo sanne. <sup>16</sup> Yo konngol Almasiihu ngol heew e moodon. Yo gooto e moodon fuu waajao goddo oo, jeertinira dum hakkilantaaku. Njimanee Laamdo e ley berde laabude, njettiree mo Jabuura e jaarooke, kajum e jime de Ruuhu Ceniido oo hokkata on dee. <sup>17</sup> Ko ngadaton fuu, so haala so golle, ngadiree dum fuu e innde Joomiraado men lisaa, njetton Baabiraado men Laamdo saabe makko.

#### No jokkubē Almasiihu poti wuurdude

<sup>18</sup> Onon rewbe, dōwtano-don worße moodon no rewbe woodanbe Joomiraado poti wadude nii. <sup>19</sup> Onon worbe, njidee rewbe moodon, pati jaangon e maabbe.

<sup>20</sup> Onon sukaabe, dōwtano-don saaraabe moodon e huunde fuu, sabi dum woni ko welata Joomiraado. <sup>21</sup> Onon saaraabe, pati jaanginee sukaabe moodon so berde mum'en metta.

<sup>22</sup> Onon maccube, dōwtano-don halfaabe moodon e huunde fuu, tawa wanaa yeeso mafbe tan yala biibbe adama ana njetta on. Ko haani dee, dōwtiranee be berde laabude e ley kulol Joomiraado. <sup>23</sup> Huunde fuu ko ngollanton, ngadiron dum berde laabude, sabi Joomiraado ngollanton, wanaa yimbe ngollanton, <sup>24</sup> anndon Joomiraado barjoto on, hokkan on moyyereeji desanaaci yimbe mum. Sabi kalfaado mo ngollanton oo yo Almasiihu. <sup>25</sup> Gadoowo ko boni fuu, heban mbarjaari golle mum bondoo oo, sabi Laamdo gurdintaa yimbe.

## 4

<sup>1</sup> Halfaabe, njogoree maccube moodon bee jogaade lobbe e dow fooccitaare, anndon onon duu odon njogii kalfaado dow kammu.

<sup>2</sup> Nduumee e duwaawu, tawee odon njeertii odon njetta Laamdo. <sup>3</sup> Nduwanee min minen duu, yalla Laamdo ana udditana min damal faa min mbaajoo konngol mum ngol, yalla misen mbaawa saakude goonga teddudo kaaloowo haala Almasiihu oo. Saabe makko jaati uddiraa-mi jooni e ley kasu. <sup>4</sup> Naagee Laamdo yalla miso waajoroo oon goonga teddudo no haaniri nii.

<sup>5</sup> Laatee hakkilante'en hakkunde yimbe be ngoondinaali 6ee. Nde keb-don wakkati fuu, nawtoro-don dum. <sup>6</sup> Haala mon ana haani laataade haala mbelka ngadaaka lamdam, yalla odon annda no kaan-don jaaboraade gooto fuu.

#### Bay nondirral

<sup>7</sup> Tikikus, sakiike men korsudo gollidiido am koolniido e ley golle Joomiraado oo, humpitán on kabaaruji am dii fuu. <sup>8</sup> Ko wadi so nel-moo-mi e moodon, yalla odon annda no min ngorri e yalla omo waaltina hakkillaaji mon. <sup>9</sup> Mido neldida e makko Onesim, jeyaado e moodon oo. Oon yo sakiike amen korsudo koolniido. Kambe dison, be kumpitan on ko wadi gaa koo fuu.

<sup>10</sup> Aristarka mo uddidaa-mi oo ana jowta on, kajum e Marka sakiike Barnabas mo mbiinoo-mi so warii to moodon njaaboo-don dum oo. <sup>11</sup> Isaa noddirteedo Yustus oo duu ana jowta on. Kambe tan ngoni Yahuudiyankooōe gollidoobe e am kabaaru Laamu Laamdo oo. Eee mballa kam sanne.

<sup>12</sup> Epafaras, gollanoowoo Isaa Almasiihu oo, ana jowta on. Kanko duu e moodon o jeyaa. Wakkati fuu omo soobii e duwaawu saabe moodon yalla odon njibbe a ley kiibgal, timminon muuyde Laamdo fuu. <sup>13</sup> Mido seedanoo mo omo tampani on, onon e Lawdikiyankooōe e Hiyerapolisankooōe fuu. <sup>14</sup> Luuka cawroovo mo korsin-mi oo, kajum e Demas ana njowta on. <sup>15</sup> Miden njowta sakiraabe men wonbe Lawdikiya bee, miden njowta Nimfa e deental goondinbe kawrooval galle mum ngal. <sup>16</sup> Nde on njanngii oo bataaki, ngadee dabare faa deental goondinbe Lawdikiya ngal jannga mo. Onon duu, njanngon bataaki

garoowo iwrande on Lawdikiya oo. <sup>17</sup> Mbiyee Arkippa yo tiinno e timminde golle mo Joomiraado halfini dsum oo.

<sup>18</sup> E junngo am jaati mbinndiran-mi ngoo doo jowtaango: miin Pool mido jowta on. Pati njeggitee e geyyelle ngon-mi.  
Yo hinnee Laamdo wonu e moodon!

## Bataaki Pool arano faade e Tesaloniikiyankooōe

<sup>1</sup> Oo bataaki ga am iwri, miin Pool, kajum Silas e Timote. Miden njowta deental goondinēe gonnegal Tesaloniiki kaabōiingal e Baabiraado men Laamdo e Joomiraado men lisaa Almasiihu. Yo on kebu moyyere e jam.

### Goondinal Tesaloniikiyankooōe

<sup>2</sup> Miden njetta Laamdo wakkati fuu saabe moodon on fuu, sabi min ceerataa e miccitaade on e ley duwauuji amen. <sup>3</sup> Miden miccitoo on wakkati fuu yeeso Laamdo Baabiraado men, miden miccitoroo on golleeji dī ngollir-don saabe goondinal, minden miccitoroo on tinnitaare moodon saabe jilli, minden miccitoroo on mujal moodon saabe fawgol mon jikke e Joomiraado men lisaa Almasiihu.

<sup>4</sup> Sakiraabe amen 6e Laamdo yidi, minden anndi Laamdo subike on. <sup>5</sup> Sabi ko min mbaajii on Kabaaru Lobbo oo koo laataaki haala sola, baawde duu ana e makko, sabi Ruuhu Ceniiho hokki on tayoral kiibungal e ko min mbaajii koo yo goonga. Odon anndi no min ngorrunko hakkunde moodon duu. Kammari moodon tan min ngolliri.

<sup>6</sup> On nemmbii min, on nemmbii Joomiraado sabi on njaabii konngol Laamdo fay e ley torraaji mawdi, njaabiori-don ngol seyo ngo Ruuhu Ceniiho waddata ngo. <sup>7</sup> Nii wadi so kollu-don goondinēe wonēe ley leyde Makedoniya e Akaya fuu no kaami worrude. <sup>8</sup> Sabi on mbaajike konngol Joomiraado ngol, on caakii ngol, wanaa ley leyde Makedoniya e Akaya tan, goondinal mon Laamdo nanaama e nokkuuje dee fuu. Fotaa ko min seyda hen haala ngokka. <sup>9</sup> Kambe goondinēe bee jaati kumpitata min no njaabiori-don min arannde, no njoppir-don tooruji so ngartuu-don e Laamdo faa ngollanon Laamdo guurdo goongaraajo oo, <sup>10</sup> faa ndoomon Biyiko iwoowo dow kammu. Kanko woni lisaa mo o immintini hakkunde maaybe, kisinoowo en e jukkungo waroowo ngo.

## 2

### No Pool golliri ley Tesaloniiki

<sup>1</sup> Sakiraabe, onon Tesaloniikiyankooōe bee, odon anndi ko min ngari e mon koo laataaki meere. <sup>2</sup> Fade amen warde, min torraama, min koynaama ley ngeenndi Filipa, hono no anndir-don nii. Kaa Laamdo men hokki min ngorgu min mbaajoroo Kabaaru Lobbo oo soobee. <sup>3</sup> Sabi waaju amen fawaaki dow majjere, fawaaki dow fugaaraaku, dum wanaa hiila duu. <sup>4</sup> No Laamdo hordi min faa halfini min Kabaaru Lobbo oo nii, hono non min mbaajortoo, wanaa ko welata yimbe min tewtata, ko welata Laamdo kumpitiidō gerde amen oo min tewtata. <sup>5</sup> Hono no anndir-don nii, abada min mbaajoraaki haalaaji beldi, min daminaaki e kaalisi. Laamdo ana seedii.

<sup>6</sup> Min tewtaali faa biibbe aadama teddina min, wanaa onon wanaa wobbe. <sup>7</sup> Kaa fay so e doole min ngardunoo duu, min mboofaali sabi min nelaabe Almasiihu. Kaa bele tan min ngardi. Miden kinnorii on hono no inna hinnortoo biibbe muudum nii. <sup>8</sup> Sabi korsa amen e moodon ana satti sanne, min njarrike hokkude on ko wanaa Kabaaru Lobbo haala Laamdo tan, minden njarrii hokkude on fay yonkiji amen, sabi on laatike sakiraabe amen horsube.

<sup>9</sup> Sakiraabe, nde min mbaajotonoo on Kabaaru Lobbo haala Laamdo oo ndee, odon miccitoo min ngollino sanne, min tampii sanne duu. Min ngollii jemma e jalooma fuu faa min njogoo ko'e amen, pati min laatanoo on donngal. <sup>10</sup> Odon ceedanii min, Laamdo ana seedanii min, no min ngorri hakkunde mon nii, onon goondinēe bee. Miden cennii, minden pooccitti, min ngalaa niijoore fuu. <sup>11</sup> Gooto gooto mon fuu min ngolliranii dum no baaba golliranta biibbe mum, hono no anndir-don nii.

<sup>12</sup> Min mbaajike on, min mbaaltinii hakkillaaji mon, min ndaardii on nguurdon nguurdam kawroojame muuyde Laamdo, noddoowo on faa naaton e Laamu mum tedduudo oo.

<sup>13</sup> Kasen won ko saabanii min yettude Laamdo wakkati fuu: nde nan-don konngol Laamdo ngol e kundude amen ndee, on njaabioraaki ngol konngol yimbe. Ko njaabiori-don ngol dee, konngol Laamdo. Ngol kajum jaati. Kann gol gollata e ley moodon, onon goondinēe bee. <sup>14</sup> Sakiraabe, ko hewtii deente goondinēe Laamdo gonde Yahuudiya niibude e lisaa Almasiihu dee koo, hewtike on onon duu. Sabi onon duu on mujili torraaji dī 6e mujununo dii, yimbe moodon jaati torrata on, hono no Yahuudiyanoo torrii 6e nii. <sup>15</sup> Kambe mbari Joomiraado men lisaa. Be mbari annabaaabe. Haya, 6e torrii min minen duu. E6e ngolla ko welaa Laamdo, 6e konnee'en yimbe fuu. <sup>16</sup> Sabi e6e njidi hadude min waajaade leji goddi yalla ana kisa. Nii wadata so luutti maabbe kiibba, kaa jukkungo Laamdo sakitike hewtaade 6e.

*No Pool yidirnoo wifitoraade Tesaloniiki*

<sup>17</sup> Kaa minen, sakiraabe, min ceerii e moodon wakkatiwel gootel e jiile gite wanaa ferde. Min tiinnike sanne yalla miden keba yiide on. Miden njeewaa on sanne sanne. <sup>18</sup> Saabe majjum, miin Pool, mi muuyiino warde to mon cili kuurdii, kaa Ibiliisa hadi kam. <sup>19</sup> Homo woni jikk e amen e seyo amen e deesewal amen yeeso Joomiraado men lisaad nde wartoyii? Wanaa onon naa? Jaati! <sup>20</sup> Sabi onon ngoni teddeengal amen e seyo amen.

### 3

<sup>1</sup> Dum wadi nde wonnoo min mbaawaa kaariya mon, walanaa min baasi minen tan min keddo ley ngalluure Ateena. <sup>2</sup> Min nelii sakiike amen Timote gollidoowo e Laamdo saakude Kabaaru Lobbo haala Almasiihu oo, yalla omo hokka on semmbe, o niifina on saabe goondinal mon. <sup>3</sup> Dum fuu walaa ko wadi dum, so wanaa e ley dii torraaji pati fay gooto e mon yeryerta, sabi odon anndi en fodanaabe dum. <sup>4</sup> Gila nde min ngondunoo e moodon ndee, miden kaalananno on torraaji kewtotoodi en. Non dum laatorii hono no anndir-don nii. <sup>5</sup> Dum saabii so ndonku-mi waawde kaariya mon, nel-mi faa mi annda yalla odon coobii e goondinal ngal, naa ceytotodo seytike on, golle amen laatike meere. <sup>6</sup> Kaa jooni Timote iwi to mon, wartii e amen. O seynirii min goondinal mon e jilli mon sabi odon miccitoo min wakkati fuu, odon njidi yiide min sanne, hono no minen duu min njidiri yiide on nii. <sup>7</sup> Sakiraabe, ko tawde-don e goondinal koo, waaltinii min e ley gillaare amen e ley torra amen. <sup>8</sup> Jooni min nguurtii kammari odon niifi e Joomiraado. <sup>9</sup> Jettooje fuu de min mbaawi yettirde Laamdo kammari moodon, min njettiran dum saabe seyo amen fuu ngo ceynir-don min yeeso makko. <sup>10</sup> Jemma e jalooma miden ndaarda Laamdo yiide on faa min kiibintina ko jaki e goondinal mon.

*No Pool duwanorii deental goondinbe gonngal Tesaloniiki*

<sup>11</sup> Yo Laamdo Baabiraado men e Joomiraado men lisaad newnan min laawol faa min njaha to mon. <sup>12</sup> Yo Joomiraado beydu jilli hakkunde moodon faa sanne, njidondiron, njidon yimbe fuu hono no min njidiri on nii, <sup>13</sup> faa o hokka on semmbe, laato-don yimbe ee ngalaa jinjoore, wonbe ley senaare yeeso Laamdo Baabiraado men e ley gartol Joomiraado men lisaad kajum e seniibe mum fuu.

### 4

*Haala nguurndam dam Laamdo yidi*

<sup>1</sup> Caggal dum, sakiraabe, min njannginii on no kaan-don worrude faa wela Laamdo. Odon ngada dum jaati. Kaa miden ndaarda on saabe Joomiraado men lisaad tiinno-don, beydon soobee. <sup>2</sup> Sabi odon anndi jamirooje de min ndokki on iwde e Joomiraado men lisaad dee. <sup>3</sup> Ko woni sago Laamdo dee, senaare moodon. Nanto-don e njaahilaaku. <sup>4</sup> Homo e mon fuu reena terde mum\* reenira de laabal e teddeengal, <sup>5</sup> pati jokka gidaade yonki hono no heefere ee anndaa Laamdo fay seeda nii. <sup>6</sup> Fay gooto pati yaha naato bannduum, pati tooja dum, sabi dee kudde fuu Joomiraado woni jobtotoodi de, hono no min kaalanirnoo on gila arannee e no min njeertirnirnoo on nii. <sup>7</sup> Sabi Laamdo noddiraali en faa coben, ko mo noddiri en dee, faa nguuren e senaare.

<sup>8</sup> Ndennoo, calido ko haalaa jooni koo fuu, wanaa neddo salanii. Laamdo dokkudo on Ruuhu mum Ceniiido oo o salanii. <sup>9</sup> Kaa banngal jilli hakkunde sakiraabe, fotaa ko min mbinndana on, sabi onon e ko'e moodon, Laamdo anndini on no njidondirton. <sup>10</sup> Hono non ngollirton hakkunde sakiraabe wonbe ley leydi Makedoniya fuu. Sakiraabe, miden ndaarda on beydon soobe. <sup>11</sup> Tiinno-don ndeeyon, kiinno-don haaju mon, homo fuu wuura e semmbe terde mum, hono no min mbiirunoo on nii. <sup>12</sup> Nden ee ngoondinaali lisaad ee njogorto on yimbe, on kasindintaa e neddo fuu fay huunde.

*Haala gartol Joomiraado*

<sup>13</sup> Sakiraabe, miden njidi paamon faa gasa ko wartata e banngal maaybe, pati cunjiree hono no yimbe ee ngalaa jikk ee nii. <sup>14</sup> So nii en ngoondinii lisaad maayii, wuurtii, hono non Laamdo hawrindinirta maaybe goondinnoobe fee duu e makko. <sup>15</sup> Miden kaalana on ko Joomiraado wii: enen wuurb e forruue e gartol Joomiraado bee, en ardataako maaybe fee naabeede to makko. <sup>16</sup> Sabi Joomiraado e hoore mum jippotto iwde dow kammu dow ooynaango manngo, nde eewaanga hooreejoo malaa'ika'en nanetee e nde buutatal Laamdo fuufetee ndee. Nden maaybe goondinnoobe Almasiihu bee adootoo fuu immitaade. <sup>17</sup> Caggal dum, enen wuurb e heddinoobe bee, en fuu en mbeewitidinte e maabbe, naabide-den

\* **4:4** Yogaabe ana paamira aaya oo hono nii: Homo e mon fuu wada suudu, jogoroo ndu laabal e teddeengal.

ley duule, faa kawren e Joomiraado ley mbeeyu. Hono nii ngondirten e makko faa abada.  
<sup>18</sup>Dum saabii homo e mon fuu waaltinira hakkille banndum diin haalaaji.

## 5

<sup>1</sup>Sakiraabe, fotaa ko min mbinndana on haala jamaanuuji e wakkatiji gartol Joomiraado oo. <sup>2</sup>Sabi onon, odon anndi tuur jaannde gartol Joomiraado ndee wardan no gujjo wardata ley jemma nii. <sup>3</sup>Wakkati nde yimbe miilataa njaalataa, nde mbiyata jam tan e hoolaare woodi, nden kunkoo saamata e mum'en, hono no natawre juhirta haamili nii. Be mbaawaa dafude e oo kunkoo fey. <sup>4</sup>Kaa sakiraabe, onon on ngalaa ley nimre, dum hadata jaalaande ndee juhude on no gujjo juhirta nii. <sup>5</sup>On fuu on biibbe fooyre, on yimbe jalooma. En njeyaaka e jemma, en njeyaaka e nimre. <sup>6</sup>Ndennoo pati daano-den hono no woobbe bee nii. Mbaalen e jeerngo, ndeento-den. <sup>7</sup>Sabi daanotoobe jemma daanotoo, sigiroobe jemma cigirta. <sup>8</sup>Kaa enen yimbe jalooma fee, ndeento-den. Boorno-den goondinal e jilli, dum yo saaya men ndeenaagu. Jikke hebude kisindam duu laatanoo en kufina ndeenaagu. <sup>9</sup>Sabi Laamdo yidanaa en jukkungo mum, ko o yidani en dee, keioreen kisindam saabe Joomiraado men Iisaa Almasiihu, <sup>10</sup>maayrudo kammarri men yalla en fuu eden nguurda e mum so wartii, tawe-den en wuurse tawe-den en maaybe fuu fotu. <sup>11</sup>Dum saabii homo e mon fuu waaltina hakkille banndum, gooto fuu faaboo goddo banngal goondinal, hono no ngollirton nii.

### *No deental goondinbe haani worrude*

<sup>12</sup>Sakiraabe, minden ndaarda on anndanon gollooēe hakkunde mon bee. Ebe dowa on faade e Joomiraado, ebe mbaajoo on. <sup>13</sup>Teddiniron be sii teddeengal fuu, njidiron be saabe golle maabe.

Ngondon gondal sabu Laamdo hakkunde moodon. <sup>14</sup>Miden ndaarda on, sakiraabe, njeertinon nattube, maalto-don hulbe, paabo-don lo'ube, tawde-don e mujal hakkunde yimbe fuu, <sup>15</sup>tiinno-don pati fay gooto yoostoo so won ko banndum wadi dum. Wakkati fuu tewton wafondirde ko moyyi, ngadanon yimbe fuu hono non.

<sup>16</sup>Ceyo-don wakkati fuu, <sup>17</sup>pati ceeron e duwaawu, <sup>18</sup>njetton Laamdo no ngorru-don fuu. Sabi dum woni ko Laamdo muuyani on, onon jiiibube e Iisaa Almasiihu bee.

<sup>19</sup>Pati kadon Ruuhu Ceniido gollude hakkunde moodon, <sup>20</sup>pati koynon waaju annabaaabe, <sup>21</sup>kaa tayko-don huunde fuu, naangon ko moyyi e muudum. <sup>22</sup>Ngoddo-don sii bone fuu.

### *Bay nondiral*

<sup>23</sup>Yo Laamdo gaddoovo jam oo e hoore mum sennu on senaare hiibunde, reena gooto gooto mon fuu ndeenaagu timmudo faa laato-don yimbe be ngalaa piipoore jaannde gartol Joomiraado men Iisaa Almasiihu. <sup>24</sup>Noddudo on oo yo koolniido, kasen duu kanko tabintinoya dum.

<sup>25</sup>Sakiraabe, minden jaagoo on duwaawu.

<sup>26</sup>Njottinon sakiraabe bee fuu calminaali amen e jilli amen.

<sup>27</sup>Mido tilsinira on saabe Joomiraado, njannganon sakiraabe bee fuu oo bataaki.

<sup>28</sup>Yo hinnee Joomiraado men Iisaa Almasiihu wonu e mon.

## Bataaki Pool dišabō faade e Tesaloniikiyankooē

<sup>1</sup> Oo bataaki ga am iwri, miin Pool, kajum e Silas e Timote. Miden njowta deental goondinbe gonngal Tesaloniiki, kabbiingal e Baabiraado men Laamdo e Joomiraado men Iisaa Almasiihu. <sup>2</sup> Yo on kebu moyyere e jam iwde e Baabiraado men Laamdo e Joomiraado men Iisaa Almasiihu.

*No Laamdo sarirta yimbe wakkati gartol Iisaa*

<sup>3</sup> Sakiraabe, waajibi min njetta Laamdo wakkati fuu saabe mon. Edum foti jaati, sabi goondinal mon ana beydoo yaarude yeeso, kasen duu jilli hakkunde mon ana beydoo soobaade e gooto gooto mon fuu. <sup>4</sup> Dum saabii so miden mantoroo on e deente goondinbe Laamdo dee. Miden mantoroo on saabe mujjal mon e goondinal mon e ley torraaji e 6illaareeji di pawe-don dili fuu. <sup>5</sup> Ko torri-don saabe Laamu Laamdo koo, Laamdo wadan on fotube hebude Laamu Laamdo. Dum fuu edum holla Laamdo ana sarira no fooccitorii. <sup>6</sup> Sabi Laamdo yo pooccitido, o yobiran torrube on bee torra, <sup>7</sup> kaa onon torriibe jooni bee, o fowtindinan on e amen. O wadan dum so Joomiraado men Iisaa gondo dow kammu oo wartii, ana wondi e malaa'ika'en mum anndinoobe baawde makko bee. <sup>8</sup> O 6angan ley metangal yiite faa o jukka 6e anndaa Laamdo, 6e njabaali Kabaaru Lobbo haala Joomiraado men Iisaa bee. <sup>9</sup> Jukkungo waroowo e mabbe ngooye halkere duumiinde, 6e ngooddinee Joomiraado e darja mum e semmbe mum fuu. <sup>10</sup> Dum waroyan jaannde Joomiraado wartoyii faa teddinee hakkunde seniibe mum, goondinbe dum bee kaaydinee e mum. Onon duu, odon njeyaa e mabbe, sabi on ngoondinii waaju mo min mbaajii on oo. <sup>11</sup> Kammari dum, miden nduwanoo on wakkati fuu, yalla Laamdo ana wada on fotube hebude nguurndam dam noddi on e mum dam. Miden jaagoo Laamdo yo wallir on semmbe mum faa njottinon golleeji lobbi dili njid-don gollude dili fuu saabe odon ngoondini mo. <sup>12</sup> Hono nii, innde Joomiraado men Iisaa teddinirtee e ley mon, onon duu teddinire-don saabe makko e dow moyyere makko, kanko Laamdo men e Joomiraado men Iisaa Almasiihu.

## 2

*Haala gartol Joomiraado e ko ardi ngol*

<sup>1</sup> Sakiraabe, miden njidi haalande on haala gartol Joomiraado men Iisaa Almasiihu e deental men e makko. Miden ndaarda on: <sup>2</sup> pati hakkillaaji mon njaaawa jiibaade, naa kulon saabe wiyegol jaannde gartol Joomiraado ndee yottiima. Pati kulon fay so goddo wii on Laamdo loowi dum kaan haala, wanaa so on narrui dum waajotoobe, wanaa so on kaalanaama minen mbindi dum e bataaki. <sup>3</sup> Pati fay gooto heba no yojnira on e fay huunde. Sabi nden nalaande warataa so wanaa yimbe heewbe murtira Laamdo, Neddo Bondo oo 6angan, dum woni yiitenke oo, <sup>4</sup> konnee, pawdo hoore mum e dow huunde fuu ko wiyetee laamdo naa ko sujidantee, faa joodoyii ley suudu Laamdo, wii hoore mum yo Laamdo. <sup>5</sup> Tama on miccitaaki mido haalanannoo on dum nde ngondunoo-mi e mon ndee? <sup>6</sup> Jooni kaa odon anndi ko faddii Neddo Bondo oo warde, kaa mo 6angan nde wakkati makko yottike. <sup>7</sup> Sabi gila jooni baawde Bondo cuudaade dee ana ngolla e aduna oo, kaa paddiido de oo ana doo tafon. So oon iwii doo tan, <sup>8</sup> Neddo Bondo oo 6angan, kaa Joomiraado men Iisaa wardan mo henndu hunduko mum, halkira mo fooyre garol mum. <sup>9</sup> Neddo Bondo oo wardan e doole Iibiliisa, warda e semmbe mawdo e kaayefiji e taagumansaaji peneeji, <sup>10</sup> kajum e oopaaare fuu faa jaayra halkotoobe bee, sabi 6e njabaali yidude goonga baawdo hisinde be oo. <sup>11</sup> Saabe dum, Laamdo hokki 6e semmbe majjinoowo, faa waddana be goondinde fenaande <sup>12</sup> yalla 6e ngoondinaali goonga oo so ana mbeltoroongoaare bee fuu ana njukkee.

*No goondinbe kaaniri, niibude e Iisaa Almasiihu*

<sup>13</sup> Sakiraabe be Laamdo horsini, minen, waajibi min njetta Laamdo wakkati fuu saabe mon, sabi Laamdo subike on gila fuddoode faa hisinira on ko Ruuhu Ceniido wadi on seniibe e ko ngoondin-don goonga oo koo. <sup>14</sup> Dum o noddiri on e Kabaaru Lobbo mo min kaalani on oo, yalla odon keba ngeduu mon e darja Joomiraado men Iisaa Almasiihu. <sup>15</sup> Sakiraabe, ndennoo tiinnee, niibee e ko min anndini on koo so e haala amen e so bataaki amen.

<sup>16</sup> Joomiraado men Iisaa Almasiihu kajum e Laamdo Baabiraado men njidi en so 6uu6ini berde men faa abada, ndokki en jikke lobbo saabe moyyere mum'en. <sup>17</sup> Yo 6e ndokku on semmbe, 6e niibina on e golle lobbo e haala lobba fuu.

**3**

*No Tesaloniikiyankooōe kaaniri jaaganaade Pool Laamđo*

<sup>1</sup> Caggal dum, sakiraabē, jaagano-don min Laamđo, yalla konngol Joomiraado ngol ana yaawa saakaade, kasen duu ngol teddinee hono no to mon nii,<sup>2</sup> yalla miden kisa e yimbe oojiibe, bonbe. Sabi wanaa yimbe fuu ngoni goondinbe.<sup>3</sup> Kaa Joomiraado yo koolniido, mo hokkan on semmbe, mo reena on e Bondo oo.<sup>4</sup> Joomiraado hokki min tayoral e mon, sabi jooni odon njokki jamirooje de min ndokki on dee, kasen duu on keddoto jokkude de.<sup>5</sup> Yo Joomiraado men wađu berde mon keewa jilli Laamđo, keewira mujal no Almasiihu heewiri mujal nii!

*No tilsiri gooto fuu golla*

<sup>6</sup> Sakiraabē, minden njamira on e innde Joomiraado men Iisaa Almasiihu, ngodđito-don sakiraabē nattube 6e njokkaali waaju mo narri min oo bee.<sup>7</sup> Onon e ko'e mon, odon anndi no min kaani nemmbireede, sabi min ngondiraali e mon dow nattere.<sup>8</sup> Walaa fuu mo min jaamani meeere meere, jemma e jalooma fuu min ngollii faa min tampi pati min laatanoo on donngal.<sup>9</sup> Miden mbaawnoo ndaardude on nguure, kaa min ngadiraali non, yalla miden ngada e ko'e amen misaalu faa nembon min.<sup>10</sup> Sabi nde min ngonnoo to mon ndee, minden mbiyannoo on dum doo: mo jađataa gollude, pati jaama.<sup>11</sup> Walaa ko min mbiiri non, so wanaa min nanii yoga e mon ana natti, ngollataa fay huunde so wanaa naatutde e ko walanaa dum'en.<sup>12</sup> Miden njamira been yimbe, minden mbaajoo dum'en e innde Joomiraado men Iisaa Almasiihu 6e ngollira deeyere, 6e nguura e semmbe terde mađbe.

<sup>13</sup> Kaa onon sakiraabē, pati kaabee wađude ko moyyi.<sup>14</sup> So won caliidō jokkude ko min kaali e oo doo 6ataaki koo, ngattanee joomum hakkille, ngodđo-don dum, yalla ana hersa.<sup>15</sup> Kaa noo, pati nanngiree joomum yo gajo. Njeertiniree dum no sakiike nii.

*Baynondiral*

<sup>16</sup> Joomiraado gaddoowo jam oo, yo wadan on jam wakkati fuu e ley huunde fuu. Yo Joomiraado wondu e mon, on fuu.

<sup>17</sup> E junngo am jaati mbinndiran-mi ngo doo jowtaango no mboowru-mi nii: miin Pool mido jowta on. Nii ngadiran-mi maande am ndee e 6ataakiji am fuu.<sup>18</sup> Yo hinnee Joomiraado men Iisaa Almasiihu wonu e mon, on fuu!

## Bataaki Pool arano faade e Timote

<sup>1</sup> Oo bataaki ga am iwri, miin Pool nelaado Iisaa Almasiihu e dow yamiroore Laamdo kisinoowo en oo e dow yamiroore Iisaa Almasiihu jikke men oo. <sup>2</sup> Aan Timote, a 6iyam jaati e ley goondinal, mido jowte. Yo Baabiraado men Laamdo e Joomiraado men Iisaa Almasiihu njurme, ndokke moyyere e jam.

*Haala fammingol ngol walaa nafaa*

<sup>3</sup> Timote, hedda ngeenndi Efeesu hono no njamir-maa-mi nde njahan-mi Makedoniya ndee nii, yalla ada hada yogaabe jannginde ko luuttondiri e waaju men oo <sup>4</sup> hono taali e mantoragol dammbe ngol walaa do haadi. Dee kulle jeddi tan ngaddata, nafataa no Laamdo fodirnoo hisinirde yimbe e ley goondinal nii. <sup>5</sup> Sabi faandaa yamiroore ndee yo jilli iwooji e bernde laabunde e hakkille baaltiido kajum e goondinal ngal waldaa e naafigaaku. <sup>6</sup> Won yogaabe celii e faandaa oo, njokkii haalaaji boli. <sup>7</sup> Hebude laataade jannginoobe Sariya Laamdo tan ee tewtataa, kaa ee paamataa, wanaa ko ee kaalata koo wanaa ko ee tiltsinta koo.

<sup>8</sup> Eden anndi Sariya oo ana moyyi, so golliraama golle Sariya. <sup>9</sup> Paamen Sariya Laamdo oo wanaa fooccitiibe bee wadanaa. Be o wadanaa dee, bonbe e saliibe, yeddoobe e luuttoobe, ee teddinaali ko senii e ee teddinaali Laamdo, warooobe inna mum'en e abba mum'en e yuppoobe yiyyam yimbe wobbe <sup>10</sup> e jeenoobe e luufunkoobe e soodoobe yimbe so cootta dum'en e fenoobe e hunotoobe dow pene – Sariya oo darniraama faa sakkoo huunde fuu ko luuttondirtaa e waaju celludo oo. <sup>11</sup> Oo waaju ana hawra e Kabaaru Lobbo mo kalfinaa-mi banngindo teddeengal Laamdo Jom mbelko'aaku oo.

*No Pool yettiiri Joomiraado*

<sup>12</sup> Mi yettiiri Joomiraado men Iisaa Almasiihu dokkudo kam semmbe oo saabe ko o jogorii kam mi koolnido o wattu kam e golle makko koo. <sup>13</sup> Arannde mido bonkotonoo mo, mido torrannoo yimbe makko, mido hoynannoo mo. Kaa Joomiraado men oo yurmike kam sabi mi anndaano ko ngollannoo-mi e ley waasude am goondinde. <sup>14</sup> Moyyere makko heewi e am sanne, hokki kam goondinal e jilli kebirteedi saabe Iisaa Almasiihu. <sup>15</sup> Mido haalane haala koolniika ka yimbe fuu kaani yarraade: Iisaa Almasiihu warii e aduna oo faa hisina luuttoobe, miin woni burdo bonde e maabbe. <sup>16</sup> Kaa ko njurmiraab-mi, miin burdo bonde oo, yalla Iisaa Almasiihu ana wadira kam misaalu mujal mum ki6ungal, yalla warooobe goondinde mo bee fuu ana keba nguurdam nduumiidam. <sup>17</sup> Laamdo gooto, laamiido duumiido e laamu mum, mo maayataa iyiyataake oo yo darja e teddeengal ngoodan mo faa abada abadin. Aamiina!

<sup>18</sup> Biyam Timote, waaju mo kalfinan-maa-mi oo annii: miccito-daa ko Laamdo loowi yimbe haala maa koo. Eley majjum kaboo-daa hono no sordaasi cuuso habortoo nii <sup>19</sup> tawee e ley goondinal e hakkille mo jiijaali ma. Won yoppube oon hakkille, goondinal maabbe heli hono no laana helirta nii. <sup>20</sup> Himene e Aleksandere ana njeyaa e maabbe. Mi wadii ee fuu e junngo Ibiliisa faa ee annda ee kaanaa bonkaade Laamdo.

## 2

*Haala duwaawu*

<sup>1</sup> Anni ko adotoo-mi waajaade goondinbe: ee ngadana yimbe fuu duwaawuji e naagundeeji e jettooje. <sup>2</sup> Nduwano-den kaanankoobe e jom'en doole duu, yalla eden nguurda deeyere e waaltaare e neddaaku e kulol Laamdo e dow huunde fuu. <sup>3</sup> Dum woni ko moyyi ko welata Laamdo kisinoowo en, <sup>4</sup> jiddo yimbe fuu kisa, keba anndude goonga. <sup>5</sup> Sabi Laamdo yo gooto, gooto duu woni curuoow hakkunde makko e yimbe, oo woni Iisaa Almasiihu neddo oo <sup>6</sup> dokkitirdo hoore mum faa soottitoo yimbe fuu. Hono nii o famminiri nde wakkati oo yottinoo, Laamdo ana yidi yimbe fuu kisa. <sup>7</sup> Dum Laamdo wadiri kam baaajootoodo e nelaado faa mi fammina yimbe ee nganaa Yahuudiyanchoobe bee goondinal e goonga. Goonga kaalan-mi, mi fenaali.

<sup>8</sup> Ndennoo, mido yidi do worbe kawriti faa ngada duwaawu fuu kuncira juude mum'en gerde laabude, tawee ngaldaa e tikkere naa jeddondiral.

*No rewbe kaaniri jokkirde Laamdo*

<sup>9</sup> Rewbe duu paroroo kaddule jottiide, tawee e needi e leyfinkinaare. Pati ee codoroo moollie e kanjee naa jaaye, pati ee paroroo bagiji tiifudi coggu, <sup>10</sup> yo ee paroro golleesi lobbi. Sabi dum woni ko hawrata e rewbe hulbe Laamdo. <sup>11</sup> Yo debbo nantu hunduko

mum, tawree dawtaare timmunde wakkati nde janngintee ndee. <sup>12</sup> Mi jaðanaali debbo jannginde naa ardaade gorko. Ko wajibii e mum dee, tiifude e hunduko mum. <sup>13</sup> Sabi Aadama adii Hawwaat tageede. <sup>14</sup> Kasen duu wanaa Aadama Iibiliisa yojni, debbo oo oyjoni so luutuu yamiroote Laamdo. <sup>15</sup> Kaa dum fuu debbo ana hisinee e beynugol, so ana heddiid ee goondinal iilli ee seneeraa leydinkinaare.

3

*No hooreeēē deental goondinēē kaani worrude*

<sup>1</sup> Kaa haala ana hoolnii: muuydo laataade hooreejo deental goondinþe fuu, muuyii golle lobbo jaati. <sup>2</sup> Ndennoo, ana tilsi hooreejo oo laatoo neddo mo walaa niine, jom debbo gooto, nantiido, hakkilante, jom needi, jippinoowo hobbe, baawdo jaannginde, <sup>3</sup> tawee wanaa jaroowo doro, wanaa kabeteedo, laatoo newiido, jaajudo bernde, kaariyante e jawdi jananndi, <sup>4</sup> kawjiido koreejii mum faa gasi, biirudoo biibbe mum faa be downtanii dum e dow teddeengal. <sup>5</sup> Sabi so neddo waawaali hawjaade koreejii mum, hono hinhortoo deental goondinþe Laamdo ngal? <sup>6</sup> Pati tawee jooomum yo tuubudo ko fooyaali nde mawminkinoo so jukkiree no Iibiliisa jukkirtee nii. <sup>7</sup> Ana tilsi kasen wonþe sella 6ee ceettanoo mo ko moyyi, pati o heþa gacce so piccal Iibiliisa nannga mo.

*No gollanoobe deental goondinbe kaani worrude*

<sup>8</sup>Gollanoobe deental goondinbe ngal bee duu ana kaani taweede yo tedduube, ngalaa berde didi, njabataa doro jaaloo dum'en, jaamataa ribaa, <sup>9</sup>tawa ebe kaybira goonga teddudo gondo e goondinal oo hakkillaaji di ninjataa be. <sup>10</sup>Aranel hen fuu, be yeewee kori be ngalaa niine. So tawii be ngalaa niine, nden kaa ebe mbaawi fudfude laataade gollanoobe deental goondinbe lisaa. <sup>11</sup>Hono non rewbe bee duu tawree teddeengal, tawa be nganaa jo'oobe yimbe, be nantiibe, hoolniise e banngal huunde fuu. <sup>12</sup>Gollanoowo deental pati dewla ko buri debbo gooto, hawjoo koreeji mum faa gasa. <sup>13</sup>Gollanbe deental goondinbe ngalaa moyyi fuu keban teddeengal, kasen duu keban cuusal kiibbungal ley goondinal mum'en lisaa Almasihu.

### *Haala sirri diina men*

<sup>14</sup> Mido yidi warde to maa ko booyataa. Kaa ko waddani kam winndude e maa oo bataaki,  
<sup>15</sup> yalla fay so booyii mi waraali, afa annda no kaan-den worrude e ley suudu Laamdo.  
Suudu nduu yo deental goondinbe Laamdo guurdo oo jaati. Deental ngal jaati woni nuygal  
goonga. <sup>16</sup> Sikke fuu walaa, sirri diina men oo ana mawni:

O ɓanngirii e suura ɓii-aadama,  
Ruuhu oo ɓannginii fooccitaare makko,  
malaa'ika'en njii mo,  
o oyynaama ley lepi,  
o goondinaama ley aduna,  
o ɻabbintinaama dow kammu,  
o hefii teddeengal Laamdo.

4

## *Haala jannde majjinoore*

<sup>1</sup> Ruuhu Ceniido oo haalii faa laabi nde o wii cakite jamaanu dajan yimbe yoppibe goondinal, njokka e caggal seydaani'en majjinoobe, kajum e waaju seydaani'en. <sup>2</sup> Be njokkan naafigaaku fenoobe 6e berde mum'en mbaati faa niye naawataa dum'en, hono berde dee cumiraade njamndi ngulndi taw. <sup>3</sup> Been yimbe ana karmina dewle, ana kada kulle yogaaje jaameerde, tawee kanje nee ko Laamdo tagiri de yalla goondinbe anndubee goonga bee fuu ana jaama de, njettira de Laamdo. <sup>4</sup> Sabi ko Laamdo tagi fuu ana moyyi, walaa fuu ko haani dunyiteede, so neddo hemrii dum jettooe Laamdo. <sup>5</sup> Sabi konngol Laamdo e duwaawu ana labbigina huunde fuu.

## *Haala laataade gollanoowo Iisaa lobbo*

<sup>6</sup> So a waajike dum sakiraabe men bee, a laatoto gollanoowo Iisaa Almasiihu lobbo, sabi a waajitorike konngi goondinal e waaju lobbo mo njokku-daa faa gasi oo. <sup>7</sup> Kaa taali foli di kawrataa e diina ciil, woddita di. Eeltir hoore maa kulol Laamdo. <sup>8</sup> Sabi eeltude caldi mum ana nafa e kulle yogaaje, kaa kulol Laamdo ana nafa e huunde fuu, sabi e maggol kebu-den tayoral e nguurdam jooni dam, podane-den garoyoojam dam duu. <sup>9</sup> Kaa haala hoolnii, huunde fuu buraa ka haande yarreede! <sup>10</sup> Saabe majnum eden ngolla, eden tiinnitoo, sabi eden pawi jikke men e Laamdo guurdo, kisinoowo yimbe fuu sako goondinbe. <sup>11</sup> Dum woni ko kaan-daa yamirde, dum woni ko kaan-daa waajaade.

<sup>12</sup> Pati fay gooto yawore a suka, laatano-daa goondinbe misaalu haala e golle, jilli e goondinal, kajum e laabal. <sup>13</sup> Fade am warde, tiidaa e jaangande yimbe Binndi dii, mbaajo-daa 6e, pamminaa 6e. <sup>14</sup> Pati yeeba dokkal Ruuhu Ceniido ngal ndokke-daa nde Laamdo loowi yimbe haala maa, mawbe duu pawnoo juude mum'en dow maa ndee. <sup>15</sup> E deen kulle kaan-daa tiinnaade, yalla yimbe fuu ana njija no beydorto-daa yaarude yeeso. <sup>16</sup> Haybu hoore maa, kaybaa ko njanngintaa koo, tiidaa e majjum. Sabi so a tiidii e majjum, a hisinan hoore maa, a hisinan hettinantoobe ma bee fuu.

## 5

### *Waajuji Poolfaade e goondinbe Iisaa*

<sup>1</sup> Pati fel gorko mawdo, waajora dum needi no baaba maa nii. Waajora jokolbe no mijiraabe maa nii, <sup>2</sup> mbaajoro-daa debbo mawdo no inna maa nii, mbaajoro-daa sukaabe rewbe no banndiraabe maa rewbe nii, tawee e dow laabal e nantaare.

<sup>3</sup> Teddin rewbe be worbe mum'en maayi, dum woni rewbe maayiraabe 6e ngaldaa e fay gooto bee. <sup>4</sup> Kaa so debbo mo gorum maayi ana jogii biib6e naa taaniraabe, ko ana adoo fuu wajibaade e biib6e bee, 6e pamminee no Laamdo huldetee e ley cuudi maab6e, 6e mbarjoo saaraabe maab6e mbarjaari lobbiri. Sabi dum woni ko welata Laamdo. <sup>5</sup> Debbo mo gorum maayi mo walaa doondiido dum mo waldaa e fay gooto, fawii jikke mum e Laamdo. Omo duumoo e duwaawu jemma e jaalooma, omo jaaganoo yimbe Laamdo. <sup>6</sup> Kaa maayraado kabanoowo aduna tan, yo maaydo fay so maayaali. <sup>7</sup> Dum kaan-daa yamirde 6e pati 6e keba feloore. <sup>8</sup> Mo hinnaaki sakiraabe mum, wanaaa haala 6e wondi galle, oon yo jankirdo goondinal, omo furi fay mo goondinalia oo bonde.

<sup>9</sup> Mo kaan-daa tonngude innde mum e ley dewal rewbe maayraabe haanbe walleede, ko famdi fuu sinaa joomum heba duusii capande jeegom, tawee duu gorko gooto dewlunoo dum. <sup>10</sup> O seettanee golle lobbo ko wa'i hono ne'ude sukaabe, jippinde kodo, lootude koyde seniibe, weemtinde beemudo e gollude huunde fuu ko moyyi. <sup>11</sup> Kaa haabuu6e be worbe mum'en maayi bee, pati winndu inde maab6e. Sabi so muuyooji maab6e ndunyii 6e e yi6ide 6ameede, nden kaa be kuuccan Iisaa Almasiihu, <sup>12</sup> sariya Laamdo doga dow maab6e, sabi be mbonnii aadi maab6e aranndeeri ndii.\* <sup>13</sup> E ley dum 6e ngontant laaliibe, 6e naata e nduu suudu nii, 6e njalta be naata e nduu. Kaa ko buri fuu bonde kasen, 6e latatike heewbe haala, haaltoobe sirri, ebe kaalaaja ci ngalanana 6e. <sup>14</sup> Dum saabii so mido yidi haabuu6e rewbe maayraabe bee ndewlee, feyna, kayba cuudi mum'en, yalla gajoo oo ana ronka damal no bonnira inde men. <sup>15</sup> Sabi jooni yoga e maab6e njoppii laawol ana njokki e Ibiliisa jaati. <sup>16</sup> Debbo goondindo fuu mo rewbe maayraabe ngoni ley galle mum yo wallu dum'en, pati ngal donnal fawoo e deental goondinbe ngal. Hono non wadata so deental ngal waawa wallude rewbe maayraabe be ngaldaa e fay gooto bee.

<sup>17</sup> Hooreebe deental goondinbe dawranoobe faa gasa bee ana kaani teddineede teddeen-gal manngal. Burbe fuu haandude e teddeengal manngal yo tampitotoobe dow waaju e jannde 6ee. <sup>18</sup> Sabi Binndi dii mbii: «A hadataa ngaari aloori tappoori gawri muuufsude gawri.»† Di mbii kasen: «Gollowo ana haandi e njo6di mum.»‡ <sup>19</sup> Pati ja6u felde mawdo deental goondinbe so wanaa dow seedaku yimbe di6on naa taton. <sup>20</sup> Niib6e e luuttal, fel dum'en yeeso yimbe fuu, yalla ana laatanoo heddiibe 6ee kulol. <sup>21</sup> Mido ndaarde yeeso Laamdo e yeeso Iisaa Almasiihu e yeeso malaa'ika'en 6e o suubi bee, dowtano-daa deen jamirooje, tawee a jinngantaa fay gooto, a burdintaa yimbe duu. <sup>22</sup> Pati yaaw fawde juude maa dow hoore fay gooto faa kalfinaa dum golle deental goondinbe. Pati reentu e luutti wo66e, jogora hoore maa laabal.

<sup>23</sup> Hankasen, pati yan ndiyam bolam tan, njaraa peguujam seeda kammari reedu maa nduu e jawuuji keewdi ngar-ngartooji e maa dii.

<sup>24</sup> Luutti yimbe yogaabe banngan gila caraaka. Kaa luutti yogaabe dii, caggal sareede di banngata. <sup>25</sup> Dum e taweede golleeji lobbi dii njiyete faa laaba pacä. Fay di njiyataake law dii duu keddataako ana cuuidi.

## 6

<sup>1</sup> Goondinbe wonbe e maccungaaku fuu, yo njogoro halfaa6e mum'en haandube e teddungal kiibungal pati innde Laamdo ndee e diina kaa mbonkee. <sup>2</sup> Kasen duu tawaabe ana njogii kalfaado goondindo fuu, pati miila o sakiike mum'en so njaworoo mo dum. Yo 6e ngolliran mo soobee faa bura no 6ee too nii, sabi o goondindo, kasen duu o korsudo. Pamminaa dee kudde, mbaajoro-daa de.

### *Haala jannde peneere e joote jawdi*

\* **5:12** So debbo mo gorum maayi winndaama ley dewal rewbe maayraabe fuu, 6amii aadi jokkan Iisaa tan, 6amataake kasen. † **5:18** Fillitagol Tawreeta 25.4   ‡ **5:18** Luuka 10.7

<sup>3</sup> Baajotoodo goddum mo jokkaali haala Joomiraado men Iisaa Almasiihu selluka hawroowa e kulol Laamdo kaa, <sup>4</sup> oon yo mawninkiniido mo anndaa fay huunde, o kaahaango keewdö duko e jeddi. Dum waddata haasidaaku e poofondiral e mbonka e sikkitaare bonnde. <sup>5</sup> Dum waddata dukooji di ngalaa do kaadi hakkunde yimbe 6e hakkillaaji mum'en mbitti. Been yimbe njoppii goonga, njogorike kulol Laamdo ana hokka jawdi. <sup>6</sup> Goonga, kulol Laamdo yo jawdi mawndi, so neddo hejnitorike ko jogii. <sup>7</sup> Sabi juude bole ngardu-den e aduna oo, kasen duu juude bole kootirten. <sup>8</sup> Ndennoo, so en kefii nguure e koltal tan kejnjitoro-den dum. <sup>9</sup> Kaa yidüue jawidi sanne beeceyete, njomoo e piccal, njumpa e gidaade yonki keewdö laaliide majjinooe, joolooje yimbe e ley halkere mawnde. <sup>10</sup> Sabi joote jawdi woni inna bonanndaaji dii fuu. Yoga yaari banngal jawdi faa majji laawol goondinal, ngaddani ko'e mum'en torraaji keewdi.

### *Haala haybude ko yamiraa*

<sup>11</sup> Kaa aan neddo Laamdo oo, wodda dee kudde, tewtu fooccitaare e kulol Laamdo e goondinal e jilli e mujjal e leydinkinaare. <sup>12</sup> Wadu ko mbaaw-daa fuu faa kefää jaalaade golle Ibiliisa e ley goondinal, nanngaa nguurndam nduumiidi dam. E majjam Laamdo noddu maa, saabe majjam njaadir-daa goondinal maa no woodiri yeeso yimbe heewbe. <sup>13</sup> Mido yamire yeeso Laamdo guurnoo wo huunde fuu oo, e yeeso Iisaa Almasiihu ceettiido no woodiri yeeso Pontiyu Pilaatu kaananke oo, <sup>14</sup> haybu ko njamira-daa koo tawa tuundi walaa hen jiine ngalaa hen, faa jaannde gartol Joomiraado men Iisaa Almasiihu. <sup>15</sup> Gartol ngol wadan e wakkati mum. Kanko woni gooto oo, Jom mbelko'aaku, Jom Baawde, Kaananke kaanankoobe, Joomiraado joomiraabe. <sup>16</sup> Kanko tan woni Bajjo duumotoodo, gondö ley fooyre nde fay gooto waawaa badaade. Kanko woni mo neddo fuu yiyaali, waawaa yiide mo duu. Yo teddeengal e baawde duumiide ngoodan mo. Aamiina.

### *Bay nondiral*

<sup>17</sup> Yamir arsukunte'en e oo aduna pati mawninkinoo, pati pawa jikke mum'en e jawle de jiiibataa. Ko 6e kaani waadüde dee, 6e pawa jikke maabbe e Laamdo dokkoowo en huunde fuu faa heewa yalla eden neemoo hen, <sup>18</sup> 6e ngolla ko moyyi, arsuku maabbe laatoo golleeji lobbi, 6e laatoo saahiiibe tawa wakkati fuu ebe mballa wobbe e ley jawle maabbe. <sup>19</sup> Nii 6e pagganortoo ko'e maabbe jawle ko waroya, faa 6e kefa nguurndam jaati dam.

<sup>20</sup> Timote, haybu ko kalfine-daa koo, woddfa haalaaji cobudi boli dii, kajum e miilooji biyeteedi anndal dii. <sup>21</sup> Yogaabe ana mantoroo ngal anndal, faa celi e goondinal.

Yo hinnee Laamdo wonu e mon.

## Bataaki Pool dīfaō faade e Timote

<sup>1</sup> Oo 6ataaki ga am iwri, miin Pool nelaado Iisaa Almasiihu e sago Laamđo faa mi fammina yimbe haala nguurndam dam Laamđo fodani en ngondam e Iisaa Almasiihu dam.  
<sup>2</sup> Mi jowtii ma, aan Timote 6iyam korsudo oo. Yo Baabiraado men Laamđo e Joomiraado men Iisaa Almasiihu njurme, ndokke moyyere e jam!

### No Pool jeertiniri Timote

<sup>3</sup> Mido yetta Laamđo mo ngollanan-mi oo. Hakkille mo jinjaali kam ngolliranana-moo-mi, hono no maamiraabe am bee ngadifnroo nii. Jemma ejhalooma fuu mi seerataa e miccitaade ma e ley duwaawuuji am, <sup>4</sup> sabi mido miccitoo gondi maa. Mido yidi yiide ma sanne yalla seyo am ana hiibä. <sup>5</sup> Mido miccitoo goondinal maa ngal waldaa e naafigaaku ngal maama maa debbo Loyis e inna maa Enis njoginoo, mido tayori aan duu kanngal njogi-daa. <sup>6</sup> Dum saabii so mido miccintine: heycintin kasen dokkal ngal Laamđo hokku maa nde paw-mi juude am dow maa ndee. <sup>7</sup> Sabi Laamđo hokkiraali en Ruuħu faa kulen yimbe. Ko o hokkiri en dee, faa Ruuħu hokka en semmbe e jilli e nantaare.

<sup>8</sup> Ndennoo, pati yaaga waajaade kabaaru Joomiraado men oo, pati yaagora duu ko uddiraa-mi kasu saabe makko koo. Reentu e am torraaji saabe Kabaaru Lobbo haala Iisaa, tawa a pawiido e dow baawde Laamđo. <sup>9</sup> Kank o hisinii en, o noddii en faa laatoden yimbe makko seniiñe. Wanaa saabe golle men o noddiri en, ko o noddiri en dee, saabe ko o anniyii hisindeen koo e saabe hinnee makko mo o wayli e men oo kammari Iisaa Almasiihu gila e al'ajal. <sup>10</sup> Kaa joomi moyyere ndee fannginiraama saabe fanngugol kisinoowo en, Iisaa Almasiihu kalkudo maayde, fanngindo nguurndam e duumagol e ley Kabaaru Lobbo oo. <sup>11</sup> Saabe oon Kabaaru Lobbo Laamđo wadiri kam baajotoodo e nelaado e jaanginoowo. <sup>12</sup> Dum saabii so mido torree diin torraaji, kaa mi yaagaaki fey, sabi mido anndi mo ngoondin-mi oo, mido tayori omo waawi reenude ko kalfinaa-mi koo faa jaannde gartol makko. <sup>13</sup> Jogora haalaaji celludi di narru-daa kam dii misaalu e ley goondinal e jilli di kebu-đen e ley haħħagol men e Iisaa Almasiihu dii. <sup>14</sup> Oo kaliifa moyyo, haybir dum Ruuħu Ceniido jippiido e men oo.

<sup>15</sup> Ada anndi Asiyankoobe fuu celii e am, Fijela e Hermoseena ana njeyaa e maħħe. <sup>16</sup> Yo Joomiraado neemin koreeji Onesifoor, sabi o buuħinii fernde am cili keewdi, kasen duu geyyelle am dee njaaginaaki mo. <sup>17</sup> Ko buri dum fuu, nde mo warnoo Roma ndee, mo tewtirii kam soobee faa mo yiiti kam. <sup>18</sup> Yo Joomiraado yoħu mo o heba yurmeende jaannde darngal. Ko mo gollani kam ley ngeenndi Efeesu koo, ada anndi dum sanne.

## 2

### Haala laataade gollanoowo Iisaa koolniido

<sup>1</sup> Ndennoo aan 6iyam, semmbindinira moyyere wonnde e Iisaa Almasiihu ndee. <sup>2</sup> Ko kaalan-maa-mi yeeso seedee'en heewbe koo, halfin dum yimbe hoolniibe waawbe famminde woħże. <sup>3</sup> Torride-daa e am no sordaasi Iisaa Almasiihu lobbo nii. <sup>4</sup> Walaa fuu sordaasi cuŋlanoowo ko wanaa haħo so mawđo mum welee dum. <sup>5</sup> Dadondirteedo doddu duu hebataa deesewal sinnaa jokkira no yamiraa nii. <sup>6</sup> Kasen duu demoovo golludo faa tampi, kajum haani adaade hebude ngedu mum e ko hettaa koo. <sup>7</sup> Miila ko kaalanan-maa-mi koo, sabi Joomiraado udditan hakkille maa faa paamaa huunde fuu.

<sup>8</sup> Miccita Iisaa Almasiihu immintinaado e maayde, mo lejol Daawuuda, no Kabaaru Lobbo mo mbaajotoo-mi oo famminiri nii. <sup>9</sup> Saabe makko torriraa-mi faa kaħħaa-mi hono no mi janooowo nii, kaa konngol Laamđo ngol kajum kaa haħħaaka. <sup>10</sup> Dum wadi so mido muja huunde fuu saabe subaabe bee, yalla kambe duu ebe keba kisindam iwdam e Iisaa Almasiihu dam, bee naata e teddeengal mum faa abada. <sup>11</sup> Haala kaa ana hoolnii:  
So en maaydii e makko,  
en nguurdan e makko.

<sup>12</sup> So eden muja torraaji,  
en laamodoto e makko.

So en mbii en anndaa mo,  
o wiyan o anndaa en enen duu.

<sup>13</sup> So en laataaki hoolniibe,  
kank omo heddi o koolniido,  
sabi o waawaa yeddude hoore makko.

### Haala golloovo mo Laamđo yarrii

<sup>14</sup> Dum woni ko kaan-daa miccintinde goondinbē. Njeertinaa 6e yeeso Laamdo pati 6e poodondira e haalaaji di nafataa fay huunde so wanaa bonnitidde hettintoobē. <sup>15</sup> Tiinna, yalla so a darike yeeso Laamdo, ada laatoo golloowo jarranaado mo golle mum hersinaali, laato-daa naftortoodo konngol goonga ngol no haaniri nii. <sup>16</sup> Sel haalaaji coðudi 6oli, sabi wondube e hono dii haalaaji 6ee ittiraaka so wanaa 6eydude woddaade Laamdo. <sup>17</sup> Haala maðbe ana lapira no uuþere lajnoore nii. Himene e Filitus ana njeyaa e maðbe. <sup>18</sup> Been woortue goonga ana mbiya immital bettike, ana mbonnitira non goondinal yogaabē. <sup>19</sup> Kaa Laamdo wadid nuugyl cellungal, ana wiindii dow maggal: «Joomiraado ana anndi yimþe mum.» Ana wiindii kasen: «Noddoowo innde Joomiraado fuu wodðoo ko boni.»

<sup>20</sup> Wanaa kaþje e cardi tan ngoni kaaki defirdi ley galle jom jawdi, ledðeeji e loopeeji duu ana hen. Ardiidi dii ngollirtaake so wanaa e dow ko hensaa, godði dii ana ngolliree ko wanaa ko hensaa. <sup>21</sup> Ndennoo, so neddo laðbinii hoore mum e golleeji bondi dii fuu, laatoto hono no kaakol keertaangol, ceniingol nafoowol joomum, lanndinanaangol faa golliree golle lobbo fuu.

<sup>22</sup> Dogu fijirde cukaaku. Ndaartu fooccitaare e goondinal e jilli e jam, aan e noddiroobē Joomiraado berde laabude 6ee fuu. <sup>23</sup> Wodðita jeddi haalaaji laaliid di ngala ko nafata, ada anndi dukooji tan di ngaddoya. <sup>24</sup> Sabi maccudo Joomiraado haanaa dukideede, ko haani tan laataade newaniid yimþe fuu, baawdo jannginde, jom mujal, <sup>25</sup> ne'iroowo yedðooþe 6ee jam-jam miilde Laamdo hokka 6e no 6e tuubira, 6e paama goonga, <sup>26</sup> faa hakkillaaji maðbe ngarta, 6e kisa e piccal Ibilisa nanngudo 6e so ana gollina 6e muuyde mum oo.

### 3

#### *Haala cakite jamaanu*

<sup>1</sup> Anndu, ley cakite jamaanu tiidallaaji ngadan, <sup>2</sup> sabi yimþe laatoto yidubé ko'e mum'en, jootube e jawdi, mantotoobē, mawninkiniibē, bonkotoobē Laamdo, murtiroobē saaraabé mum'en, bonnoobē moyyere, 6ee teddintaa ko senii, <sup>3</sup> yoorþe berde, 6e njaaftaako, jo'oobé yimþe, 6e ngalaan nantaare, 6aleebé yonki, wajubé ko moyyi fuu, <sup>4</sup> jammbotoobē, wulþe, haawtiibé, 6e joote aduna burani dum'en Laamdo. <sup>5</sup> Be nanddinkinto e hulþe Laamdo, kaa e 6e njedda baawde mum. Wodðita been yimþe. <sup>6</sup> Won e maðbe naatoobē e galleeji, keþa hakkillaaji ndewoy luuttoowy sanne njokkoowoy sii gidaade yonki fuu. <sup>7</sup> Wakkati fuu ekoy njidi faamude, kaa abada koy mbaawataa faamude goonga. <sup>8</sup> Been worþe naatoobē e galleeji njeddi goonga hono no Yannes e Yamberes njeddirnoo Muusaa nii. Be ngalaahakkille, goondinal maðbe walaa ko nafata. <sup>9</sup> Kaa 6e njaaftaa yeeso, sabi yimþe fuu annditan 6e ngalaahakkille no Yannes e Yamberes nii.

#### *Haala Binndi ceniid dii*

<sup>10</sup> Kaa aan a yii fammingol am e neesu am e anniyaaji am e goondinal am e mujal am e jilli am e tinnitaare am <sup>11</sup> e torraaji am e tampere am. A yii duu ko hewtii kam Antiyokiya e Ikoniya, kaþum e Listara koo fuu, a yii no mujir-mi torraaji kewtiidi kam dii. Kaa Joomiraado biltii kam e majji di fuu. <sup>12</sup> Goonga, kaþiido e Iisaa Almasiihu fuu so yidii wuurdude e kulol Laamdo, torrete. <sup>13</sup> Kaa yimþe bonþe hiiloobé yimþe 6ee 6eydorto bone. Eþe majjina woþþe, eþe majjina ko'e maðbe duu. <sup>14</sup> Kaa aan, niibü e ko njanngu-daa ko njarri-daa faa laaþi koo, ada anndi jaanginþe ma bee. <sup>15</sup> Gila a suka ada anndi Binndi ceniidi dii. Kanji mbaawi famminde ma laawol kisindam keþirteedam goondinal Iisaa Almasiihu. <sup>16</sup> Binndi ceniidi dii fuu Laamdo loowi di wiindubé 6ee, nafaa majji yo jannginde, kaþum e 6annginande nedðo boofi mum, ooncude en e ne'ude en ley nguurndam pooccitiidam <sup>17</sup> yalla nedðo Laamdo fuu ana hiþþa, lanndinanoo golle lobbo fuu.

### 4

#### *Haala tiidufde e waaju*

<sup>1</sup> Mido ndaarde saabe Laamdo e saabe Iisaa Almasiihu caroyoowo wuurbé e maayþe oo, mido ndaardire saabe gartol makko kaþum e Laamu makko: <sup>2</sup> mbaajo-daa konngol Laamdo ngol yaafu maa tiidu maa fuu, hollitin 6e boofi maðbe, fel 6e, hokku 6e semmbe e kaaddi mujal maa e waaju maa fuu. <sup>3</sup> Sabi wakkati waran nde 6e calotoo nande waaju celludo oo, 6e njokka muuyooji maðbe faa 6e gamana ko'e maðbe jaanginoobé ko 6e njidi nande koo, <sup>4</sup> 6e cukka noppa maðbe pati 6e nana goonga, 6e mbaylitoo e taali. <sup>5</sup> Kaa aan, nanto-daa e huunde fuu, mujaa torra, mbaajo-daa Kabaaru Lobbo oo, timminaa golle mo ngollantaa Laamdo oo faa laaþa.

<sup>6</sup> Kaa miin, yiyyam am 6adike laataade no sadaka kirsamaajo nii sabi wakkati am 6adike. <sup>7</sup> Mi wadid ko mbaaw-mi fuu faa mi heþa jaalaade golle Ibilisa e ley goondinal, mi yottinii do kaan-mi haadufde, mi haybii goondinal ngal. <sup>8</sup> Gila jooni mido resanaa deesewal fooccitaare

ngal Joomiraado pooccitiido caroowo oo hokkata kam *jannde* darngal. Wanaa miin tan hokketee ngal, miin e heppube gartol makko 6ee fuu.

*Haala waajuuji cakitiidi*

<sup>9</sup> Tiinna ngaraa e am law. <sup>10</sup> Sabi Demas yoppii kam saabe yifude mum aduna, fa'ii Tesaloniki. Keresna yehii Galaatiya, Titus duu fa'ii Dalmaatiya, <sup>11</sup> Luuka tan wondi e am. Fanju Marka ngardaa e mum, sabi omo waawi faabaade kam sanne e ley golle oo. <sup>12</sup> Tikkus, mi nelii dum Efreesu. <sup>13</sup> So ada wara, ngaddanoraam kam saaya am ka njoppunoo-mi Torowas ley galle Karapo kaa, kajum e dewte dee. Ko bur-mi yifude ngadданaa kam, dewte guri dee. <sup>14</sup> Aleksandere baylo oo wadii kam ko naawi kam sanne. Joomiraado yoban mo ko waarata e golle makko. <sup>15</sup> Aan duu, reenta e makko, sabi o yeddi waaju amen sanne.

<sup>16</sup> Nannde ndarnaa-mi aranne yeeso caroowo faa mi bilta hoore am ndee, fay gooto faabaaki kam, 6e fuu 6e celu e am. Pati Laamdo nanngir 6e dum! <sup>17</sup> Kaa Joomiraado faabike kam, hokki kam semmbe yalla mido ooynoo waaju makko, faa leji dii fuu nana. Nii woni no kisiniraa-mi e hunduko rawaandu ladde. <sup>18</sup> Joomiraado ittan kam e bone fuu, hisina kam faa mi hewta laamu mum dow kammu oo. Yo teddeengal woodan mo faa abada abadin. Aamiina!

*Baynondiral*

<sup>19</sup> Mido jowta Piriskilla e Akilas, mido jowta koreeji Onesifoor. <sup>20</sup> Erasta ana heddi Korintu, Torofim, mi yoppii dum Miletus sabi wanaa celludo. <sup>21</sup> Tiinno-daa ngaraa gila dabbunde waraali. Ebulus e Pudes e Lina e Kalawdiya e sakiraabe 6ee fuu, ana njowte.

<sup>22</sup> Yo Joomiraado tawde e maa! Yo hinnee Laamdo wonu e mon.

## Bataaki Pool faade e Titus

<sup>1</sup> Oo 6ataaki ga am iwri, miin Pool. Mi maccudo Laamdo, mi nelaaado Iisaa Almasiihiu faa mi wada su6aa6e Laamdo 6ee ngoondina d6um, kasen duu 6e annda goonga gondo e kulos Laamdo, <sup>2</sup> 6e pawa jikk6e ma6be e ngeurndam nduumiidam. Laamdo mo bonnataa aadi oo fodiino dam ngeurndam gila e al'ajal. <sup>3</sup> Nde sarti makko oo yottinoo ndee, kanko Laamdo kisinoowo en oo, o banngini konngol makko ngol, kasen duu o yamirii mi halfinee waajaade ngol. <sup>4</sup> Titus, mi jowtii ma. A 6iyam jaati kammari goondinal Iisaa ngal ndeentuden e mum jooni ngal. Yo Laamdo Baabiraado men e Iisaa Almasiihiu kisinoowo en ngadane moyyere e jam!

### No Titus golliri ley Kereta

<sup>5</sup> Mi dalii ma ruunde Kereta faa njokkito-faa ko heddinoo e golle oo koo, kasen duu cubano-daa ngeenndi fuu maw6e deental goondin6e hono no njamir-maa-mi nii. <sup>6</sup> Tawee mawd6o cubaado oo walaa feloore, jom debbo gooto, tawee 6i66e mum yo goondin6e 6e yim6e mbaawaa jinirde dum'en neetaraaku naa salaare. <sup>7</sup> Sabi hooreejo deental goondin6e, Laamdo halfini dum golle oo, ndennoo ana tilsi jooomum tawee walaa feloore, wanaa mawninkiniido, wanaa gul6o 6ernde, wanaa jaroowo doro, wanaa kafeteedo, wanaa jaamoowo ribaa. <sup>8</sup> Jooomum ana haani laataade jippinoowo ho6be, jiddo ko moyyi, hakkilante, pooccitiido, kuld6o Laamdo, nantiido, <sup>9</sup> tawa jooomum ana downtanii konngol goongaraawol ngol no ngol waajoraa nii. Hono non jooomum waawirta hokkude wob6e 6ee semmbe e ley waaju celludo oo, kasen duu waawa libude yeddo6e dum 6ee.

<sup>10</sup> So goonga dee, heew6e calike jokkude goonga, sako hakkunde Yahuudiyanko6e tilsin6e goondin6e Iisaa fuu taadee bee. Kambe 6e laatike haaloobe haalaaji boli, yoppo6e yim6e. <sup>11</sup> Ana tilsi mu66aa kundude ma6be, sabi ebe nii mbonnira galleeji kuundi waaju mo haanaa waajeede, faa 6e kebira dum kaalisi no harmiri.

<sup>12</sup> E ley keretanko6e, gooto ma6be mo 6e njogorii yo hakkilante, wii: «Keretanko6e yo feno6e wakkati fuu, 6e daabaaji bondi, 6e nattube himmirse e deedi mum'en.» <sup>13</sup> Ko keretanee oo wii koo yo goonga. Dum nee, dartin 6e, yalla ebe ke6a goondinal cellungal, <sup>14</sup> 6e 6jotta jokkude taali Yahuudiyanko6e kajum e jamirooje yim6e yoppu6e goonga bee. <sup>15</sup> Laabu6e, huunde fuu ana daganii dum'en. Kaa so6ube kajum e 6e nganaa goondin6e bee, fay huunde daganaaki dum'en, sabi miiilooji ma6be e hakkillaaji ma6be fuu ana co6i. <sup>16</sup> Ebe mbiya ebe anndi Laamdo, kaa galleeji ma6be ana kollita 6e anndaa mo. Be waajaabe, murtube, fay golle lobbo gooto 6e mbaawaa gallude.

## 2

### Haala waaju celludo

<sup>1</sup> Kaa aan, waaja ko hawrata e waaju celludo oo. <sup>2</sup> Wor6e naye6e, wii 6e laatoo kaaryiante'en, 6e ne'oo, 6e nantoo, 6e laatoo sellube goondinal e jilli e mujanal. <sup>3</sup> Rew6e naye6e duu ngeurdaa e senaare, mbaasa laataade jo'o6e yim6e, caloo doro jaaloo dum'en. Be laatoo fammo6e ko moyyi, <sup>4</sup> yalla ebe mbaajoo sukaabe rew6e 6ee yidude wor6e mum'en e sukaabe mum'en. <sup>5</sup> Be mbaajoo 6een laatoo nantiibe, laabu6e, hiinni6e cuudi mum'en, moyyu6e, downtantoo6e wor6e mum'en, pati konngol Laamdo ngol bonkee. <sup>6</sup> Sukaabe wor6e duu, waajora dum'en non yalla ebe nantoo e <sup>7</sup> huunde fuu. Aan e hoore maa, laatana 6e misaal e ley golle lobbo fuu, mbaajoro-daa laafal e teddeengal <sup>8</sup> e haala selluka ka yeddataako, yalla way6e men ana kersa, ndonka hebude e men feloore. <sup>9</sup> Maccub6e, waaja dum'en downtanoo halfaa6e mum'en e huunde fuu, mbelna 6erde ma6be, mbaasa yeddude 6e, <sup>10</sup> wanaa haala wujjude 6e. Be laatoo hoolni6e hi66ube, faa yim6e fuu teddina waaju haala Laamdo kisinoowo en oo.

<sup>11</sup> Laamdo bannginii moyyere mum faa yim6e fuu kisa. <sup>12</sup> Nden moyyere ekkintinta en no ceerdaten e geddi Laamdo, kajum e gidaafe yonki oo aduna. Kayre moyyere ndee ekkintinta en kasen no laatorto-den nantiibe, fooccitiibe, hulfe Laamdo e oo doo aduna, <sup>13</sup> tawa eden ndoomti jikk6e belnoowo en hoore oo e wakkati mo teddeengal Laamdo mawd6o oo banngata kajum e teddeengal Iisaa Almasiihiu kisinoowo en oo. <sup>14</sup> Kanko Iisaa Almasiihiu woni dokkitirdo yonki mum kammari men, yalla omo soottito en e bone fuu, o labbinana en hoore makko, laato-dien lejol makko kanko tan, tiinniingol e gallude galleeji lobbi.

<sup>15</sup> Dum kaan-daa jannginde, dum kaan-daa waajaade e felirde hettinto6e ma 6ee no baawde maa poti. Pati fay gooto yawe.

**3***No goondinbe Iisaa poti worrude*

<sup>1</sup> Miccintin goondinbe 6ee leydinkinanoo kaanankoo6e, 6e dowtanoo dum'en, 6e lanndinanoo golle lobbo fuu. <sup>2</sup> Pati 6e mbonkoo fay gooto, pati 6e laatoo habete6e, 6e newoo, 6e kolla yimbe fuu leydinkinaare hi66unde. <sup>3</sup> Sabi arannde enen duu en laalino6e, salino6e, majjuno6e. En laatinoke maccube gidaade yonki, kajum e dakameeji dí ngaldaa sii. Eden ngondunoo e ngajaandijji e haasidaaku, eden mbayanoo eden mbajondirnoo e ko'e men. <sup>4</sup> Kaa nde Laamdo kisinoowo en oo fannginnoo moyyuki mum e jilli mum ndee, <sup>5</sup> o hisinii en. Wanaa saabe golle men lobbo o hisiniri en, saabe yurmeende makko o hisiniri en. O hisinirii en lootogal ndimtotoongal en, keydintinirooval en saabe Ruuhu Ceniido <sup>6</sup> mo o loowiri en kammari Iisaa Almasihu kisinoowo en oo faa keew-den. <sup>7</sup> O wadirii dum yalla eden nanngiree fooccitiife kammari hinnee makko, ndonen nguurndam nduumiidam dam paw-den jikke men e mum dam. <sup>8</sup> Kanka woni haala hoolniika.

Mido yidi tilsinnaa kulle dee, yalla goondinbe Laamfo 6ee ana jii6a e golle lobbo. Dum woni ko moyyi, ko nafata yimbe. <sup>9</sup> Kaa woddsita jeddi boli e mantoragol dammbe e poodondiral e duko banngal Sariya oo. Diin golleeji ngalaa fayda, walaa ko dí nafata. <sup>10</sup> Ceenndoovo yimbe fuu, daala dum faa hi66a cili didi. So joomum ja6anaali ma, celaa e mum. <sup>11</sup> Anndaa baado hono non yo majjudo yo luuttoowo, hono non sariri hoore mum.

*Baynondiral*

<sup>12</sup> So mi nelii e maa Aretemas naa Tikikus, njaawno-daa ngaraa tawaa kam Nikopolis, sabi ton anniyii-mi dabbude. <sup>13</sup> Tiinno-daa mballaa Jenas janngudo sariya laamu oo kajum e Apollos e dow dawol mum'en ngol, pati 6e nakoree fay huunde. <sup>14</sup> Yimbe men 6ee duu ekkitoo gollude golle lobbo, 6e mballa hasindinbe e walleede 6ee pati nguurndam ma66e laatoo meere.

<sup>15</sup> Wondiibe am 6ee fuu ana njowte. Miden njowta gidiraabe men goondinbe Iisaa 6ee fuu. On fuu, yo hinnee Laamfo wonu e mon.

## Bataaki Pool faade e Filemon

<sup>1</sup> Oo 6ataaki ga amen iwri, miin Pool, kajum e sakiike men Timote. Miin Pool, mi uddiraado kasu sabaabu waajaade kabaaru Iisaa Almasiihu. Miden njowte, aan Filemon collidiido amen korsudo oo. <sup>2</sup> Miden njowtu duu deental goondinbe Iisaa gonggal galle maa ngal kajum e Appiya sakiike amen debbo oo e Arsippa balludo kam haðanaade Kabaaru Lobbo oo. <sup>3</sup> Yo Baabiraado men Laamdo e Joomiraado men Iisaa Almasiihu ngadan on moyyere e jam.

### *Haala jilli Filemon e goondinal mum*

<sup>4</sup> Filemon, mi seerataa e yettude Laamdo nde jaaganto-maa-mi Laamdo fuu, <sup>5</sup> sabi mi nanij illi ci rjid-daa seniibe bee dii e goondinal maa Joomiraado men Iisaa. <sup>6</sup> Mido naagoo Laamdo yo deental maa e amen ley goondinal nafu faa pamminaa yimbe moyyere fuu nde kebaten saabe Iisaa Almasiihu. <sup>7</sup> Sakiike, mi seyike sanne, hakkille am duu waaltike saabe jilli gondi e maa dii, sabi a 6uuðinii berde seniibe bee.

### *No Pool surirani Onesim*

<sup>8</sup> Kammari dum, fay so taweede mido jogii baawde saabe Iisaa Almasiihu yamirde ma ko wajibii e maa, <sup>9</sup> ko 6urani kam mi ndaarde saabe jilli. Miin Pool nayeejo oo, kasen duu jooni mi uddaado kasu saabe Iisaa Almasiihu, <sup>10</sup> mido paage haala Onesim\* laatiido 6iyam e laawol Iisaa e ley do ngeyyaa-mi doo. <sup>11</sup> Arannde, walaano ko mo nafete, kaa jooni, o nafan en sanne, miin e maa fuu. <sup>12</sup> Mido neltire mo, anndaa o fecdere yonki am. <sup>13</sup> Ko 6urannoo kam, nanngude mo bannge am, o walla kam no kaanno-daa wallirde kam nii e oo doo wakkati mo ngon-mi e geyyelle sabaabu Kabaaru Lobbo oo. <sup>14</sup> Kaa mi yidaa wadude fay huundre tawa en mbaddaali, sabi mi yidaa tilsinde ma wadude moyyere, ko njidu-mi dee, ngadiraad e sago maa.

<sup>15</sup> Ana moyya tawee ko Onesim seenndiranoo e maa wakkatiwel seeda faa o wonda e maa faa abada, <sup>16</sup> tawa wanaa no maccudo nii tan, ko 6uri maccudo, hono no sakiike men korsudo nii. Miin, mido horsini mo sanne, kaa aan 6uri horsinde mo, sabi ada horsiniri mo o maccudo maa, kajum e ko o latati sakiike maa saabe Joomiraado koo. <sup>17</sup> Ndennoo, so nii ada nanngiri kam deento maa, jaðbora mo no kaan-daa jaðboraade kam miin nii. <sup>18</sup> So tawii won ko o wadu maa, naa won ko ndewataa mo, faw dum fuu e dow am. <sup>19</sup> Miin Pool winndiri junngo am mi yobete, min e hoore am, fotaa ko mi miccintine mido rewe nguurdam maa dam. <sup>20</sup> Goonga sakiike, mido ndaarde dum doo saabe Joomiraado: 6uuðiniraa bernde am deental men e Iisaa Almasiihu.

<sup>21</sup> Kammari mido tayori dowtaare maa saabani kam winndude e maa, anndude a wadan ko 6uri ko jaagi-maa-mi koo. <sup>22</sup> Kasen duu, fewjanam jippunde, sabi mido jikki njaabandon duwaawuji mon mi wara to mon.

### *Bay nondiral*

<sup>23</sup> Epafaras mo uddidaa-mi saabe Iisaa Almasiihu oo ana jowte. <sup>24</sup> Collidiife am bee doo ana njowte: Marka e Aristarka e Demas e Luuka.

<sup>25</sup> Yo hinnee Joomiraado men Iisaa Almasiihu wonu e mon!

---

\* **1:10** Maanaa Onesim woni «Nafaa».

## Bataaki **faade e** **Ibaraninkooōe**

*No Laamđo haaldiri e men Biyum*

<sup>1</sup> Laamđo haaldiino e njaatiraāše men gila ko 600yi cili keewdī e sifaaji keewdī, o haaldiri e maābe annabaāše. <sup>2</sup> Kaa e ley dee nalaade cakitotoode o haaldirii e men Biyiko mo o tagiri aduna oo fuu, mo o wadi donoovo huunde fuu oo. <sup>3</sup> Kajum woni jalbugol annoora teddeengal Laamđo, kajum nanndi e Laamđo jaati, omo tammborii huunde fuu konngol makko jogiingol semmbe. Caggal nde o tilii laābinde luutti yimbe dī ndee, o joodii jaamo Laamđo Toowđo oo to dow kammu too. <sup>4</sup> Dum būrni mo malaa'ika'en teddude fotude e innde nde Laamđo hokki mo būrnde inde mabbe dee.

*Haala Bidđo būrđo malaa'ika'en*

<sup>5</sup> Fay gooto e malaa'ika'en 6ee Laamđo wiyaali:

«Aan a Biyam,

hannde laatii-mi baam maa.»\*

Naa kasen:

«Mi laatoo Baaba mum,  
laatoo Biyam.»†

<sup>6</sup> Kasen duu, nde o nelata hammadiijo makko oo e aduna oo ndee, o wii:

«Yo malaa'ika'en Laamđo fuu cujidana dum.»‡

<sup>7</sup> Laamđo wii banngal malaa'ika'en fee:

«O wadii malaa'ika'en makko kenuuli,  
o wadii kaadime'en makko lewle yiite.»§

<sup>8</sup> Kaa banngal Bidđo oo, mo wii:

«Laamu maa, aan Laamđo, woodan faa abada abadin!

Fooccitaare yo tuugorde laamu maa.

<sup>9</sup> Ada yidi fooccitaare,  
ada wajni oojaare,

saabe dum, Laamđo Joomiraado maa suñori maa,  
hokku maa seyo būrngo ngo wondiibe maa ngoo.»\*

<sup>10</sup> O wii kasen:

«Gila e fuddoode, Joomiraado,  
aan tabintini leydi,

juude maa tagir-daa kammuuji dī,  
<sup>11</sup> kanji dī timman, kaa aan, a heddoto,

dī fuu dī kiiddiran no kaddule nii,

<sup>12</sup> a sowiran dī no saaya nii,

dī mbattitoroo no neddo wattitortoo e saayaaji mum nii.

Kaa aan, a wattitataako,

nguurndam maa duu timmataa.»†

<sup>13</sup> Fay nde wootere, Laamđo wiyaali gooto e malaa'ika'en:

«Joodaa jaamo am,

faa mi wada njaaāaa waybe maa.»‡

<sup>14</sup> Malaa'ika'en 6ee fuu yo ruuhuuji gollanooji Laamđo, dī mo nelata faa ngollana heboōe kisindam 6ee.

## 2

*Haala kisindam mawđam*

<sup>1</sup> Ndennoo, eden kaani wattude hakkillaaji men sanne e ko nan-dēn koo, pati en cerindo goonga so majjoyen. <sup>2</sup> Nelal Laamđo ngal malaa'ika'en 6ee njottini ngal yo goonga, luuttuše naa yedduše mo fuu, kebii jukkungo ngo kaandi. <sup>3</sup> Hono nadirten enen so en njeebiima hono dam kisindam mawđam? Dam kisindam, Joomiraado men jaati ardinoō haalde haala majjam, kasen duu hettinooße mo 6ee cellini haala makko. <sup>4</sup> Laamđo geydi e dow seedaaku maābe oo kasen maandeeji e taagumansaaji e kaayde mawđe, kajum e dokke Ruuhu Ceniido de o fecciri muuyde makko dee.

*Haala dowudo en faade e kisindam*

\* 1:5 Jabuura 2.7    † 1:5 2 Samiyila 7.14    ‡ 1:6 Fillitagal Tawreeta 32.43    § 1:7 Jabuura 104.4    \* 1:9 Jabuura 45.7-8    † 1:12 Jabuura 102.26-28    ‡ 1:13 Jabuura 110.1

<sup>5</sup> E ley dum, wanaa malaa'ika'en 6ee Laamđo hokki laamaade aduna garoowo mo kaalaten haala mum oo. <sup>6</sup> Mo o hokki laamaade oo - won do Binndi dii ceettii, mbii:

«Kodum fuu yimbe ngoni sako ada wadana dum'en hakkille?

Kodum biibbe aadama ngoni sako ada hayba dum'en?

<sup>7</sup> A lo'inii 6e wakkatiwel seeda e ley malaa'ika'en,  
a filkii 6e pilki darja e teddungal,

<sup>8</sup> a wadij huunde fuu e ley hawju maabbe.»\*

So wiyaama Laamđo wadij huunde fuu ley hawju maabbe, dum ana holla o lamminii dum'en huunde fuu, fay huunde heddaaki ko downtanaaki 6e. Kaa so goonga, wanaa kulle dee fuu dowtanii 6e tafon. <sup>9</sup> Ko njii-den koo yo Iisaa leydinkiniido ley malaa'ika'en wakkatiwel seeda, jooni omo filkaa darja e teddungal saabe ko o yii torra maayde koo. Hono non, saabe hinnee Laamđo, o maayanii yimbe fuu.

<sup>10</sup> E ley dum, ana haani tagudo huunde fuu mo huunde fuu woodani, anniyiido naannude yimbe heewbe e darja mum oo, wadij Iisaa buuwudo laawol kisindam oo kiibudo, o hiibbinirii dum torraaji. <sup>11</sup> Sabi Iisaa cenoowo goondinbe oo kajum e sennaabe bee yo iwdi ngoottiri, o yaagortaako noddirde 6e sakiraabe. <sup>12</sup> Omo wiya Laamđo:  
«Mi haalanlan sakiraabe am bee innde maa ndee,

mi manete hakkunde kawrital maabbe.»†

13 O wii kasen:

«Mi fawan jikke am e Laamđo.»

Kasen duu o wii:

«Mido nii, miin e koreeji di Laamđo hokki kam dii.»‡

<sup>14</sup> Hono non, nde wonnoo dii koreeji yo tew e yiyyam, Iisaa duu reentii e majji ndiin mbaadi faa o jaaloo laamiido maayde oo, dum woni Iibiliisa. O jaaloroo dum maayde makko <sup>15</sup> faa o rimdina worrunoobe hono maccuube saabe kulol maayde 6ee - kulol ngol nanngunoob 6ee e ley nguurndam maabbe fuu. <sup>16</sup> Sabi eden tayori wanaa malaa'ika'en o wari wallude. Ko o wari wallude dee, iwdi Ibarahiiima. <sup>17</sup> Ndennoo ana wajibii o nannda e sakiraabe makko 6ee e huunde fuu, yalla omo laatanoo 6e e jukkungo ngo 6e kaandi saabe luutti maabbe. <sup>18</sup> Nde wonnoo kanko e hoore makko o torraama nde Iibiliisa tewti seyttaade mo ndee, saabe dum, omo waawi faabaade wobbe tewteteabe faa ceytee bee duu.

### 3

#### No Iisaa burdi annabi Muusaa teddude

<sup>1</sup> Onon sakiraabe seniibe jeydube noddaango Laamđo see, nde wonnoo Iisaa Almasiihu faabike on, ngadee hakkillaaji mon e makko, kanko mo ceettorto-den bernde wootere yo nelaado, yo Jottinoowo Sadaka Mawdo. <sup>2</sup> Oon yo koolniido banngal Laamđo cuiido dum oo hono no Muusaa laatorii koolniido ley suudu Laamđo nduu fuu nii. <sup>3</sup> E ley dum, Laamđo jatorii teddeengal Iisaa buri ngal Muusaa ngal, no teddeengal mahoowo suudu furdi maadi mum nii. <sup>4</sup> Sabi suudu fuu ana woodi moyyindo dum, moyyindo huunde fuu oo yo Laamđo. <sup>5</sup> Muusaa laatike koolniido e suudu Laamđo nduu fuu, o maccudo Laamđo. Golle makko laatike seedaaku, omo sappoo ko Laamđo banginta caggal makko. <sup>6</sup> Kaa Almasiihu yo koolniido e suudu Laamđo nduu no biddo nii. Enen ngoni suudu makko nduu, so tawii en tidii e hoolaare e jikke ko mantorto-den koo.

#### Haala naatude e ley fowtere Laamđo

<sup>7</sup> Saabe dum, no Ruuhu Ceniido oo wiiri nii:

«Hannde, so on nanii daande makko,

<sup>8</sup> pati tiidinee ko'e mon hono no njaatiraabe mon ngadunoo so murti nii,\*  
jannde 6e itti koro Laamđo ley ladde jeereende ndee.

<sup>9</sup> Ton 6e itti koro am faa 6e kumpitoo kam,

fay so taweede 6e njii golleeji am ko foti duuksi capande nay.

<sup>10</sup> Saabe dum tikkiran-mi yimbe oo jamaanu,  
mbii-mi: wakkati fuu, 6erde maabbe ana ndunya 6e faade e majjere,  
6e anndaa laawi am fey!

<sup>11</sup> Faa kunii-mi ley tikkere am, mbii-mi:

Be naataata ley fowtere am abada.»†

\* 2:8 Jabuura 8.5-7    † 2:12 Jabuura 22.23    ‡ 2:13 Esaaya 8.17-18    \* 3:8 Dum yimbe Israa'iila murtirnoobe annabi Muusaa so mbii ana mbirfitoo leydi Misira.    † 3:11 Jabuura 95.7-11

<sup>12</sup> Ndennoo sakiraabē, kaybee pati fay gooto e mon tawree bernde bonnde nde wanaa goondinnde, murtannde Laamdo guurdo oo. <sup>13</sup> Nde Laamdo wiinoo «hannde» ndee, o sappike wakkati moodon, ndennoo mballondiron jannnde fuu pati luuttal hoomta on, so yoorna berde mon. <sup>14</sup> So en tiidii e hoolaare nde kebu-den gila puuddoode ndee, so en keddiike e mayre faa timmoode, nden kaa en ndeentii e Almasiihu. <sup>15</sup> Nii Binndi dii mbii naanen: «Hanne, so on nanii daande makko,

pati tiidinee ko'e mon hono no njaatiraabe mon ngadunoo so murti nii.»

<sup>16</sup> Hoće ngoni murtube fay so taweede nanii daande Laamdo bee? Tama wanaa yimbe 6e Muusaas döwi iwde leydi Misira bee? <sup>17</sup> Hoće ngoni 6e Laamdo tikkani ko foti duubi capandē nay? Tama wanaa luuttube so kalkii e ley ladde jeereende bee? <sup>18</sup> Hoće ngoni 6e o hunanii naatataa e fowtere makko bee? Tama wanaa murtirbe mo bee? <sup>19</sup> En njii 6e kebaali naatude e fowtere makko saabe 6e ngoondinaali.

#### 4

<sup>1</sup> Nde wonnoo fodoore naatugol e ley fowtere Laamdo ndee ana heddi, kulen pati fay gooto e men waasa naatude. <sup>2</sup> Sabi enen duu en mbaajiraama kabaaru lobbo no njaatiraabe men mbaajiraano nii. Kaa kambe, waajuu mo 6e nani oo nafaali 6e sabi 6e kettinoraaki mo goondinal. <sup>3</sup> Kaa enen goondinbe bee, en naatan e fowtere Laamdo ndee. Kayre woni nde o wii banngal murtube bee:

«Ley tikkere am kunii-mi, mbii-mi:

Be naatataa ley fowtere am abada!»\*

Dum e taweede, golleeji Laamdo tilike gila nde o tagi aduna ndee. <sup>4</sup> Sabi nokku gooto e ley Binndi dii haalii haala jalaande jeddaberde ndee, wii:

«Laamdo fowtii e golleeji mum fuu e ley jalaande jeddaberde ndee.»†

<sup>5</sup> O wii kasen:

«Be naatataa ley fowtere am abada.»

<sup>6</sup> Adiibe nande kabaaru lobbo oo fee naatali e ley ndee fowtere saabe 6e calike goondinde. Kasen, edum holla ana woodi fodanaabe naatude. <sup>7</sup> Ley majjum, Laamdo wadirsi sarti goddo biyeteedo «hannde», dum woni mo cifi-den dow too oo. Caggal duubi keewdi, o yottiniri haala makko Daawuuda, o wii:

«Hanne, so on nanii daande makko,

pati tiidinee ko'e mon.»‡

<sup>8</sup> Be kebaali fowtere Laamdo nde Yosuwa dowunoo 6e faade e mum ndee. So 6e kebiino dum, Laamdo haalataano caggal dum haala sarti goddo. <sup>9</sup> Jonnoo, yimbe Laamdo bee ana keddorii fowtere hono nde Laamdo fowti ley jalaande jeddaberde ndee. <sup>10</sup> Sabi naatudo e fowtere Laamdo, kajum duu fowtiran no Laamdo fowtiri e golleeji mum nii. <sup>11</sup> Ndennoo, waajibi tiinnito-den no mbaawru-den fuu naatude e fowtere Laamdo ndee pati fay gooto saamira no salaniibe Laamdo bee caamiri nii.

<sup>12</sup> Konngol Laamdo ngol ana wuuri ana jogii barke. Engol 6uri kaafaawi ki banngeeji mum didi fuu mbelnaa welde, engol sooro hakkunde yonki e hakkille, hakkunde gi'e e mbuso, ngol seennda dum'en. Engol itta koro miilooji e anniyaaji gondi e bernde. <sup>13</sup> Walaa fuu ko tagaa ko suudanii Laamdo, huunde fuu ana fannginaa yeeso makko kanko mo ngaraten daraade yeeso mum oo.

#### No Iisaa laatorii Jottinoowo Sadaka Mawdo

<sup>14</sup> Ndennoo tiiden e goondinal men ngal ceedori-den bernde wootere ngal, sabi en kebii Jottinoowo Sadaka Mawdo jottiido nokku Laamdo, dum woni Iisaa Bii Laamdo oo. <sup>15</sup> Eden njogii Jottinoowo Sadaka Mawdo mo waasaali yurmaade en e loore men ndee. Sabi o tewtaama seytoreede no hefiraa fuu no ceytora-den nii, kaa noo hebaaka, nde wonnoo o luuttaali. <sup>16</sup> Ndennoo, badoro-den bimmbeere Jom moyyere oo hoolaare, yalla eden keba yurmeende e moyyere faa paabe-den nde kasindin-den fuu.

#### 5

#### No Iisaa laatorii jottinoowo sadaka kibudo

<sup>1</sup> So neddo subaama hakkunde yimbe honoroobe mum faa laatoo Jottinoowo Sadaka Mawdo, halfinte golle Laamdo, yalla ana yottina sadakaaji jaamri e kirssamaaji faa tosa luutti. <sup>2</sup> Joomum ana waawi yurmaade 6e anndaa Sariya Laamdo so majji bee, sabi kajum e hoore mum yo lo'udo no maabbe nii. <sup>3</sup> Saabe nden loore omo haani yottinde sadakaaji kammarri luutti makko kanko e hoore makko e kammarri luutti yimbe bee fuu. <sup>4</sup> Fay gooto

\* 4:3 Jabuura 95.11    † 4:4 Puuddoode 2.2    ‡ 4:7 Jabuura 95.7-8

waawaa hokkude hoore mum darja Jottinoowo Sadaka Mawđo, sinaa so Laamđo suđii dum no suforii Haaruuna nii.

<sup>5</sup> Almasiihu duu, wanaa kajum hokki hoore mum darja Jottinoowo Sadaka Mawđo, dokkudo mo oo yo Laamđo. Kajum wii mo:

«Aan a Biyam,

hannde laatii-mi baam maa.»\*

<sup>6</sup> O wii e ley nokku godđo:

«A jottinoowo sadaka faa abada

no Malkisedeke† nii.»‡

<sup>7</sup> Nde lisaa wonnō e leydi ndii ndee, jaagoriima gullaali cattudi e gondi, jaagundeeji faade e Laamđo baawdo hisinde mo e maayde oo. Laamđo jađanii mo saabe ko o dōwtanii dum koo. <sup>8</sup> Fay so taweede kanko woni Biddo oo, tampereiji makko ekkintinii mo dōwtaare.

<sup>9</sup> Caggal nde o hiđinnoo golle makko fuu, o laatanike dōwtaniibē mo 6ee fuu sewnde kisindam faa abada, <sup>10</sup> sabi Laamđo wadii mo Jottinoowo Sadaka Mawđo no Malkisedeke nii.

### *Haala ko nabata goondinalyeeso*

<sup>11</sup> Miden njogii haalaaji keewđi e oo kabaaru, kaa firritande on dum ana tiidi sabi on paamataa law. <sup>12</sup> Odon kaannoo laataade jaanginoobe booyii, kaa faa jooni odon kaani jaangineede poodooode konngi Laamđo dii. Odon kaannoo taweede jaamdu tekkundu jaamaton, kaa faa jooni e muynam ngon-don. <sup>13</sup> Muynoowo fuu seenndataa ko boni e ko moyyi, sabi yo baddo. <sup>14</sup> Kaa hillifaabe 6ee njey jaamdu tekkundu nduu, biirube hakkillaaji mum'en so mboowni dum'en seenndude ko boni e ko moyyi 6ee.

## 6

<sup>1</sup> Ndennoo, njaaren yeeso faade e ko mawđe anndintee, pati keddo-den e ko fuddoobe anndintee e ley goondinal mum'en Almasiihu. Fataa ko ngarten e haala tuubude iwde e golleeji nađooji en to maayde, e haala goondinde Laamđo. <sup>2</sup> Fataa ko ngarten e haala lootagal batisima, e hono fawugol juude dow nedđo faa duwanoo dum, e immital maaybe, kajum e jukkungo duumiingo. <sup>3</sup> Njaaren yeeso! Non ngadaten so Laamđo jađii. <sup>4</sup> Won fuu no murtube so iwi e laawol Laamđo bee tuubirta kasen naa? Be njii fooyre Laamđo, 6e keđii moyyere Laamđo, 6e kefii ngedu e Ruuhu Ceniiđo, <sup>5</sup> 6e meedii haala Laamđo moyyuka kaa e kaayde wakkati garoyoovo oo. <sup>6</sup> Dum fuu e taweede hahaali 6e saamde. Be mbaawaa tuubineede kasen, ana nanndi hono kambe e ko'e mađbe ebe tontitoo Bii Laamđo oow e dow leggal bardugal, ebe kersina dum. <sup>7</sup> Tayko-den leydi: so ndi haarii yiwoole tawtawtondirde, so ndi funnii nguure nafoowo remube 6ee, ndiin leydi heđii barke iwrudo to Laamđo. <sup>8</sup> Kaa so ndi funnii kebbe e tuppe, ndi walaa nafaa, booyataa ndi hudee, sakitoor ndi duppee.

<sup>9</sup> Kaa onon, sakiraabe am horsube, fay so min kaalddi nii, miden tayori e laawol lobbol ngon-don, dum woni laawol kisindam ngol. <sup>10</sup> Sabi Laamđo wanaa ooniido sako yeeboo golle moodon naa jilli di kollu-don dum nde ngollan-don seniibe 6ee ndee e no ngadaten faa jooni nii. <sup>11</sup> Kaa miden muuya gooto e moodon fuu holla soobee mum faa do maayi, yalla odon tayora jikke mo keđu-don oo tabitan. <sup>12</sup> Min njidaa laato-don waamuše, ko min njidi dee, njemmbon heđoobe podooje Laamđo 6ee saabe goondinal e mujal.

### *Haala podooje Laamđo cellude*

<sup>13</sup> Nde Laamđo fodanta Ibarahiima ndee, hoore mum hunorii, sabi fay gooto fotaa mo kanko e hoore makko teddeengal faa mo hunoroo dum. <sup>14</sup> O wii: «Mi hunike, mi wadan e maa barke, mi hebbinan iwdi maa faa heewa!»\* <sup>15</sup> Dow dum, Ibarahiima muji faa heđi ko Laamđo fodunoo hokkude dum koo. <sup>16</sup> Yimbe ana kunoroo burdo dum'en teddude, hunoore ndee ana tabintina haala mum'en, itta jeddi gondi hakkunde mum'en fuu. <sup>17</sup> Banngal heđoobe fodoore Laamđo ndee see, Laamđo yidunoo keđa tayoral anniya mum waylitataako fey, dum saabii so Laamđo 6eydi hunoore e dow fodoore mum ndee. <sup>18</sup> Dee kudde didi, dum woni hunoore ndee e fodoore ndee, mbaylitataako abada sabi Laamđo fenataa. Ndennoo, enen tuugiibe e Laamđo 6ee, edum buubina 6erde men, yalla eden keddo e jikke mo ndokka-den oo. <sup>19</sup> Oon jikke yo juggal cellungal koolniingal e yonkiji men. Omo dowa en faa njawten heedoođe faliinde e nokku burdo fuu senaade to dow kammu too. <sup>20</sup> Lisaa seekani en laawol naatirgol ton, sabi mo laatanike en Jottinoowo Sadaka Mawđo faa abada no Malkisedeke nii.

## 7

### *Kabaaru jottinoowo sadaka biyeteedo Malkisedeke*

\* 5:5 Jabuura 2.7    † 5:6 Yeew 7.1-10    ‡ 5:6 Jabuura 110.4    \* 6:14 Puddoođe 22.16-17

<sup>1</sup> Malkisedeke oo laatinoke kaananke ngalluure wiyyeteende Salaam, o jottinoowo sadaka Laamdo Toowdo oo. Kanko hawritoynoo e Ibarahiima wakkati wartannoo wolde tawi jaaliido kaanankoo6e, mo duwanii dūm.\* <sup>2</sup> Ibarahiima hokki mo sappo6erde huunde fuu ko he6unoo e wolde ndee. Maanaa innde Malkisedeke woni: «kaananke pooccitiido». Nde wonnoo o kaananke Salaam duu, maanaa mum yo «kaananke jom jam». <sup>3</sup> Binndi dii cifaaki baabiiko naa inniiko naa dammbe makko fey. Di cifaaki pinaade makko naa battane makko. Edi nanndina mo e Bii Laamdo oo: o heddot o jottinoowo sadaka faa abada.

<sup>4</sup> Yeeewe no teddeengal Malkisedeke foti mawnude, sabi fay Ibarahiima njaati men oo hokkii mo sappo6erde ko he6unoo e wolde ndee fuu. <sup>5</sup> Kasen duu, yottino6e sadaka iw6e e Lewi<sup>†</sup> bee njamiraa e ley sariya nanngude sappo6erde e Israa'ilankoo6e fuu, fay so taweede been yo iw6e e Ibarahiima no ma6be nii. <sup>6</sup> Kaa fay so Malkisedeke jeyanooka e iwdi Lewi, nanngii sappo6erde jawdi Ibarahiima, duwanii dūm, kajum ke6udo podooje Laamdo oo. <sup>7</sup> Jeddii fuu ngalaa, mo duwaawu iwri e mum ana 6uri duwanteedo oo teddude. <sup>8</sup> Banngal iw6e e Lewi, yimbé maayo6e bee kebata sappo6erde ndee, kaa Malkisedeke yo guurdo no Binndi dii ceedorii nii. <sup>9</sup> Kasen duu eden mbaawi wiide: ko Ibarahiima hokki sappo6erde ndee koo, Lewi mo iwdi mum nanngata sappo6erde oo, kajum duu hokkii nde. <sup>10</sup> Sabi fay so taweede o rimaaka tafon, e calci njaatiiko Ibarahiima o wonnoo nde Malkisedeke ja66ii dūm ndee.

<sup>11</sup> Sariya dokkaado Israa'ilankoo6e oo tuugike yottingol sadakaaji Lewinkoo6e ngol. Jonnoo, so tawiino nii ngol yottingol sadakaaji ana hi66unoo, garol jottinoowo sadaka goddo no Malkisedeke nii, mo wanaa iwdi e Haaruuna, hasindintaakeno. <sup>12</sup> Sabi so yottingol sadakaaji waylitii, waajibli sariya duu waylitoto. <sup>13</sup> Eley dūm, Joomiraado men mo haala mum haaleete doo oo jeyaaka e iwdi Lewi, e suudu baaba wonndu jeyaa, ndu fay gooto e mum wadaali juningo mum e golle yottinirde sadakaaji ndee. <sup>14</sup> Sabi en fuu en anndii, Joomiraado men oo e suudu baaba Yahuuda iwi, kaa Muusaa haalaali huunde fuu e mayru e banngal yottingol sadakaaji.

#### *No Iisaa laatorii jottinoowo sadaka no Malkisedeke nii*

<sup>15</sup> Ko jottinoowo sadaka goddo nanndudo e Malkisedeke 6anggi koo, 6eydii la66inde ko njidu-mi hollude on koo. <sup>16</sup> Wanaa saabe sariyaaji kawrooji e lejol makko dii o suboraa o jottinoowo sadaka, ko o suboraa dee, saabe nguurndam njogidam semmbe dam timmataa dam. <sup>17</sup> Sabi Binndi dii mbii:

«A jottinoowo sadaka faa abada  
no Malkisedeke nii.»

<sup>18</sup> Hono nii sariyaaji aranndeeli dii njoppiraa saabe loore mum'en e famfude mum'en naafa. <sup>19</sup> Sabi e ley Sariya Muusaa oo fay gooto laataaki ki66uso. Jooni kaa en pawii jikke men e ko 6uri Sariya Muusaa oo moyyude koo, e oon jikke 6attorto-den Laamdo.

<sup>20</sup> Kasen duu, Laamdo wadii Iisaa jottinoowo sadaka e dow hunoore muu6um. Lewinkoo6e bee nee, Laamdo hunanaaki dūm'en. <sup>21</sup> Kaa Iisaa laatorike jottinoowo sadaka e dow hunoore Laamdo biido nii oo:

«Joomiraado hunike, mimsitataa:  
A jottinoowo sadaka faa abada.»\*

<sup>22</sup> Hono nii Iisaa laatorii tolma aadi burndi moyyude ndii.

<sup>23</sup> Ko jokkiti hen kasen, yottino6e sadaka bee ana keewnnoo yalla so gooto maayii ana daja loomtiido dūm. <sup>24</sup> Kaa Iisaa woni jottinoowo sadaka mo walaa loomtotoodo fey, sabi o duumoto faa abada. <sup>25</sup> Dum wadi so mo waawi hisinde battroriife Laamdo saabe makko bee kisindam ki66udam. Omo heddoe e surande 6e sabi o guurdo duumiido.

<sup>26</sup> Iisaa woni Jottinoowo Sadaka Mawdo porroovo e ko kasindin-den koo: o ceniido, o walaa jinjoore, ko so6i fuu walaa e makko. O seenndaama e luutto6e bee, kasen duu o hokkaama nokku burdo fuu teddude dow kammu. <sup>27</sup> Mo nanndaali e bee too yottino6e sadaka maw6e hasindin6e e ittude sadakaaji jannde fuu. Be ittana luutti ma6be sadaka kam6e e ko'e ma6be tafon, caggal majjuum, be ittana luutti yimbé bee sadaka. Kaa Iisaa ittanii luutti yimbé sadaka cilol gootol keyoowol yimbé jamaanuuji dii fuu nde o hokkitiri hoore makko no layyaari nii ndee. <sup>28</sup> Sariya Muusaa oo ana darnana yimbé lo'ube Jottinoowo Sadaka Mawdo, kaa hunoore nde Laamdo hunii caggal Sariya oo ndee darnii Biddo ki66inaado faa abada oo.

## 8

#### *No Iisaa laatorii curoowo ley aadi burndi moyyude ndii*

\* <sup>7:1</sup> Yeew Puddoode 14.17-20    † <sup>7:5</sup> Lewi woni njaati Muusaa e Haaruuna.    ‡ <sup>7:21</sup> Jabuura 110.4

<sup>1</sup> Haala 6urka faydinde e ley ko kaalaten koo annii: en ke6ii Jottinoowo Sadaka Mawdo, oon woni joodiido jaamo bimmbeere Jom manngu wonnde dow kammu. <sup>2</sup> Omo golla golle makko e ley nokku dewal ceniido, dum woni hukkum goongaraajo mo Joomiraado darni, wanaa mo neddo darni. <sup>3</sup> Jottinoowo sadaka fuu ana suboraa faa yottina Laamdo sadakaaji jaamri e kirsamaaji. Dum nee, waajibi lisaa laatantoodo en Jottinoowo Sadaka Mawdo oo duu he6a huunde nde yottina. <sup>4</sup> Sinndo ga leydi gaa o wonnnoo, o laataaka jottinoowo sadaka sabi yottinoobe sadaka hawroo6e Sariya Muusaa ana ngoodi. <sup>5</sup> Been yottinoobe sadaka ana ngollana Laamdo ley nokku dewal cappotoodo goongaraajo gondo to dow kammu too oo, kanko o naandinaado tan. Nde Muusaa anniyinoo darnude hukkum seedaaku oo ndee, Laamdo jeertini mo, wii: «Tiinno-daa, ngadiraah huunde fuu dow njubukki ki kollu-maa-mi dow haayre kii.»\* <sup>6</sup> Kaa jooni, Almasiihu he6ii golle dewal burdo mo ma66e oo moyyude, sabi o curanoowo yimbe ley aadi 6urndi moyyude ndii. Ndiin aadi waldaa e aranndeeri ndii, o fawii ndi e podooje 6urde moyyude dee. <sup>7</sup> E ley dum, sinndo aadi aranndeeri ndii walaano ella, hasindintaakeno e aadi ngonndi. <sup>8</sup> Kaa Laamdo felii ndi nde wii:

«Miin Joomiraado mido wiya palaade ana ngara  
de ngadidan-mi e Israa'iilankooße e Yahuudiyankooße aadi keyri.

<sup>9</sup> Ndi waldaa e aadi ndi ngadidinnoo-mi e njaatiraabe ma66e  
nde dow-mi dum'en faa mi yaltina dum'en leydi Misira ndee.

Ko kam6e e ko'e ma66e 6e mbonni aadi am koo,  
muin duu mi duurtiima 6e.

Non mbii-mi, miin Joomiraado.»

<sup>10</sup> O wii kasen:

«Ndiin aadi woni ko ngadidan-mi e Israa'iilankooße caggal deen jalaade:

Mi wadan sariyaaji am e hakkillaaji ma66e,  
mi winnda di e ferde ma66e,  
mi laatoo Laamdo ma66e,  
6e laatoo yimbe am.

<sup>11</sup> Hankasen fay gooto hasindinaa e tinndinde jeydaafe e leydi ngootiri,  
wanaa haala sakiike mum faa waajoo dum, yo anndu Joomiraado,  
sabi yimbe fuu anndan kam,  
lo'ufe e teddu6e fuu.

<sup>12</sup> Sabi mi yaafoto oojaare ma66e,  
mi ittan luutti ma66e e hakkille am fey.»†

<sup>13</sup> Ko mo haali kabaaru aadi keyri ndii koo, o hiiddini aadi aranndeeri ndii. Jooni kaa, ko naywi faa noofii koo yonii sawndintineede.

## 9

### *Haala sadakaaji ley aadi kiinnodi ndii*

<sup>1</sup> Aadi aranndeeri ndii ana joginoor sariyaaji kawjordi dewal Laamdo, kajum e nokku dewal ceniido gondo ga leydi gaa. <sup>2</sup> Oon nokku yo hukkum mo cuudi dici: aranndeeri nduu suudu seniindu wiyetee, don moottila kaa e taabal ngal e buuru cakkaado oo ngonnoo. <sup>3</sup> Yeesooru nduu woni caggal heedoode faliinde ndee, endu wiyeetee nokku 6urdo fuu senaade. <sup>4</sup> Ley mayru urirde kanjneere ndee e keesuwal aadi muumdiniraangal kanje ngal ngonnoo. Ana e ley keesuwal ngal loongel kanje keewngel jaamdu wiyeteedu «maanu», kajum e sawrnu Haaruuna wilitinnoondu nduu e alluuje de aadi ndii wiindaa e mum dee. <sup>5</sup> Ana to dow keesuwal too kudde dici nemmbinaade hono malaa'ika'en biyeteede cerubin, de finnde teddeengal Laamdo. Biifoole majje ana kuuri nokku do yiyyam dam yuppetee faa luutti njaafee foo. Kaa en mbaawaa sifaade deen kudde faa laabaa e oo wakkati.

<sup>6</sup> Dee kulle fuu e yu6bondirde hono nii, yottinoobe sadaka 6ee jannde fuu ana naata ana njalta to suudu aranndeeri too faa ngolla golle mum'en dewal Laamdo. <sup>7</sup> Kaa suudu yeesooru nduu, Jottinoowo Sadaka Mawdo oo tan naatata e mayru hitaande fuu cilol gootol. Kasen duu o naatataa tawee o naaboraali yiyyam faa o ittana hoore makko sadaka, o ittana duu boofi di yimbe 6ee ngadi tawi anndanaali dici sadaka. <sup>8</sup> Dum Ruuhu Cenii6o sappotoo faade e nokku burdo fuu senaade: damal naarrugal e makko 6aanngintaake so nii hukkum ceniido oo ana heddi nawtoreede. <sup>9</sup> Dum yo taagumansa wakkati men jooni faa holla dum doo: sadakaaji jaamri e sadakaaji kirsamaaji jottinaadi Laamdo dici mbaawaa labbinde neddo dewiroovo nii Laamdo faa hakkille mum waaltoo. <sup>10</sup> Dewal gorrungal nii ana ha66aa e sariyaaji keertiidi jaamdu e yardu e lootogal, dewal baawngal yiyeede tan, sariyaaji kaandi jokkeede faa jannde Laamdo tabintini huunde heyre.

*Haala sadaka ley aadi keyri ndii*

<sup>11</sup> Kaa jooni, Almasiihu 6anngii, laatike Jottinoowo Sadaka Mawđo gadudo moyyereeji. O naatii e hukkum 6urđo teddude 6urđo hi6bude, mo junngo nedđo darnaali, kasen duu hukkum oo jeyaaka e leydi ndii. <sup>12</sup> O naatii ley nokku 6urđo fuu senaade oo, o naaddaali e yiyyam damkoy e ga'oy, ko o naaddi dee, yiyyam makko jaati. Hono nii o soottitorii en faa abada cilol gootol keyooowl yimbe jamaanuuji dii fuu. <sup>13</sup> E ley Sariya Muusaa, so yiyyam damđi e ga'i kajum e ndoondi nale dappaange wiccaama cōbudo oo, la6binan joomum banngal diina. <sup>14</sup> Yiyyam Almasiihu dam 6uri dūm waawde la6binde hakkillaaji men iwde e golleeji nabooji en to maayde dii, yalla eden ndewaa Laamdo guurdo oo. Sabi e baawdē Ruuhu duumiido oo, Iisaa hokkii hoore mum Laamdo no layyaari ndi walaa ella nii.

<sup>15</sup> Dum waddani mo laataade curoowo hakkunde yimbe e Laamdo ley aadi keyri ndii, yalla noddaabe bee ana keba ndonu keddotoodo faa abada mo Laamdo fodi oo. Sabi kanko maayiri faa mo soottitoob mboofuse e ley aadi aranndeeri ndii bee. <sup>16</sup> So nedđo maayii, yoppii wasu. Wasu yo aadi hakkunde basiido e donoowo, ana tabita caggal maayde basiido oo. <sup>17</sup> Waajibi wasu tabita caggal maayde, sabi o tabitataa sinnaa so joomum maayi. <sup>18</sup> E ley dūm, fay aadi aranndeeri ndii tabitaali so wanaa yiyyam yuppa. <sup>19</sup> Caggal nde Muusaa holliti yimbe bee jamirooje gonde e Sariya dee fuu ndee, 6ami yiyyam ga'oy e damkoy, jillondiri 6am e ndiyam e haabu mbaalu wodeewo e cafe hisopi, wicci dewtere Sariya ndee e yimbe bee fuu. O wii: <sup>20</sup> «Dum woni yiyyam tabintinojam aadi ndi Laamdo yamiri on dōwto-don ndii.» \* <sup>21</sup> Hono non kasen, o wicciyi yiyyam e dow hukkum ceniido oo, kajum e kaaki dewirđi Laamdo dii fuu. <sup>22</sup> So goonga, banngal Sariya oo ana wa'i hono yiyyam la6binta huunde fuu! Kasen duu, so sadaka yiyyam wadaaka, yaafaamuya walaa.

*No Iisaa Almasiihu laatorii kirksamaari kibbundi*

<sup>23</sup> Dee kudde ngoni nate kollitoote kudde gonde dow kammu dee, eđe kasindini e la6binireede yiyyam daabaaji. Kaa kudde kammunkooje dee, kajum'en jaati, ana kasindini e sadakaaji 6urđi dii too moyyude. <sup>24</sup> Sabi Almasiihu naataali e nokku dewal ceniido mo junngo niđi. Oon yo nanndoore goongaraajo gondo dow kammu oo. Ko Almasiihu wadi dee, to kammu too jaati o naati faa o heya en jooni yeeso Laamdo. <sup>25</sup> O naatiraali ton faa o itta hoore makko sadaka cili keewđi, no Jottinoowo Sadaka Mawđo naatirta hitaande faa hitaande e ley nokku 6urđo fuu senaade oo nabora yiyyam daaba nii. <sup>26</sup> So tawiino nii, Almasiihu torreteno cili keewđi gila e pudiſoode aduma faa jooni, kaa dūm laatoraaki non. O 6anngii cilol gootol keyooowl yimbe jamaanuuji dii fuu, yalla omo hokkitir hoore makko hono no layyaari nii faa o tosa luutti yimbe. <sup>27</sup> Battane 6ii-aadama yo maayde cilol gootol, caggal dūm, saree. <sup>28</sup> Hono non, Almasiihu duu hokkitir hoore mum hono no layyaari nii cilol gootol faa roondoo luutti yimbe heewbe. O 6angan cilol dida6ol, kaa wanaa faa o roondoo luutti, faa o waddana yimbe doomoobe garol makko bee kisindam.

## 10

<sup>1</sup> Sariya Muusaa oo yo mbeelu moyyereeji garooji dii, wanaa mbaadi majji jaati. Dum saabii fay e ley sadakaaji jottinteedi hitaande faa hitaande dii, o waawaa wadude rewoobe bee hi6bube. <sup>2</sup> So omo waawnoo dūm, yottingol sadakaaji yoppeteno, sabi rewoobe bee fuu la6binteno cilol gootol timmungol, hakkillaaji ma6be jiņataa 6e banngal luutti hankasen. <sup>3</sup> Kaa wanaa non laatorii. Hitaande faa hitaande diin sadakaaji miccintinan yimbe luutti mum'en. <sup>4</sup> Sabi yiyyam ga'i e damđi 6am waawaa ittude luutti fey.

<sup>5</sup> Dum saabii, nede Almasiihu 6adinoo warde e aduna ndee, wii Laamđo:  
«A yidaa sadakaaji kirksamaaji e sadakaaji namri,

kaa a wadanii kam terde.

<sup>6</sup> Sadakaaji duppamaaji e sadakaaji banngal luutti,  
a seyortaako dūm.»

<sup>7</sup> E ley dūm, Almasiihu wii:  
«Mido nii, mi warii faa mi wada sago maa, aan Laamđo,

no kabaaru am winndiraa e ley dewtere maa Sariya nii.» \*

<sup>8</sup> Arannde, o wii: «A yidaa sadakaaji kirksamaaji, a yidaa sadakaaji namri kajum e sadakaaji duppamaaji e sadakaaji banngal luutti, a seyortaako di.» Dum fuu e taweede, dūn sadakaaji no Sariya oo yamiri nii ngadiraa. <sup>9</sup> Caggal dūm, o wii: «Mido nii, mi warii faa mi wada sago maa.» Hono nii Laamđo ittiri njubuki sadaka arano oo tabintini dida6o oo. <sup>10</sup> Saabe ngoon sago cennira-den e sadaka terde Iisaa Almasiihu cilol gootol keyooowl yimbe jamaanuuji dii fuu.

<sup>11</sup> Eley njubuki sadaka arano oo, Jottinoowo sadaka fuu yo daraniido golle mum jaannde fuu, ana yottina sadakaaji dii wakkati fuu, kaa di mbaawaa ittude luutti fey. <sup>12</sup> Kaa

Almasiihu yottinii sadaka gooto ittoowo luutti keyoovo yimbe jamaanuuji dli fuu, caggal dum, o joofii jaamo Laamdo. <sup>13</sup> Don mo doomata faa Laamdo wada mo yaabaa waybe makko. <sup>14</sup> E sadaka gooto oo, faa abada o hiigginirii been be luutti mum'en laabintee bee.

<sup>15</sup> Dum woni ko Ruuhu Ceniido oo duu seedantoo en. Sabi o wii tafon:

<sup>16</sup> «Joomiraado wii:

Ndii aadi ngadidan-mi e maabbe

caggal dee jalaade:

Mi wadan sariyaaji am e berde maabbe,  
mi winnda di e hakkillaaji maabbe.»

<sup>17</sup> O jokkintini hen kasen, o wii:

«Mi ittan e hakkille am luutti maabbe e boofi maabbe fey.»<sup>†</sup>

<sup>18</sup> Ndennoo do luutti njaafaa, sadaka ittoowo luutti hasindintaake don hankasen.

### No kaan-den badoraade Laamdo

<sup>19</sup> Ndennoo sakiraabe, yiyyam lisaa njuppaadam dam hokki en laawol naatude e nokku burdo fuu senaade oo dow hoolaare. <sup>20</sup> O udditanii en laawol kesol guurngol jawtirgol heedoode ndee, kanngol woni terde makko dee. <sup>21</sup> Nde wonnoo jottinoowo sadaka mawdo ardinaado suudu Laamdo nduu njogi-den, <sup>22</sup> ndennoo, badoro-den Laamdo berde de ngalaa naafigaaku jogiide goondinal ngal sikke fuu walaa e mum. Sabi luutti di berde men caawunoo dli fuu ittaama, caldi men duu lootiraama ndiyam laabudam. <sup>23</sup> Beyden jikke men dow ko cedori-den bernde wootere koo, sabi podando en oo yo koolniiido. <sup>24</sup> Ngattondiren hakkille faa tiifondirene ley jilli e golleeji lobbi. <sup>25</sup> Pati njoppen hawritidde no yogaabe ngadata nii, seydo-den waajondirde nde wonnoo odon njiya jalaande Joomiraado oo ana wara warde.

<sup>26</sup> So en murike en keddiike e luutti caggal ko anndu-den goonga oo faa laabi koo, annden sadaka ittoowo luutti heddaaki hankasen. <sup>27</sup> Ko heddii dee, doomugol kulbiniingol jannde kii, kajum e yiite jaamoowe yeddube Laamdo bee ngee. <sup>28</sup> So neddo bonnii Sariya Muusaa oo e dow seedaaku yimbe didon naa taton, yurmataake, warete! <sup>29</sup> Kaa walaa fuu burdo haandude e jukkungo ko foti so neddo yaabii Bii Laamdo, sobinii yiyyam aadi cennudam dum dam, hoynii Ruuhu gaddoowo moyyere oo. <sup>30</sup> Sabi eden anndi Laamdo wii:

«Miin yobtoyttoo mi yoboyan 6e.»

O wii kasen:

«Joomiraado saran yimbe mum.»<sup>‡</sup>

<sup>31</sup> Hee, naatude e junngo Laamdo guurdo oo ana hulfinii!

<sup>32</sup> Miccitee jalaade mon arane dee, caggal nde hakkillaaji mon njaaynaa, hee on tiinnitike ley torraaji e mujal. <sup>33</sup> Wakkatiji odon koyniree jennooje e toojannge hakkunde yimbe, wakkatiji odon ndeenta e wobbe wadaabe non. <sup>34</sup> On cunodike e uddaabe kasu, kasen duu nde teeta-don ko njogi-don koo fuu ndee, on njogorike dum seyo, sabi odon anndi onon njogii jawdi burndi fuu, ndi timmataa. <sup>35</sup> Ndennoo, pati njoppee hoolaare mon sabi ende jogii mbarjaari mawndi. <sup>36</sup> E ley dum, odon kaani mujude, yalla odon ngada sago Laamdo, kebon mo o fodani on oo, <sup>37</sup> sabi ana winndii:

«Doo e yeeso seeda,

kaando warde oo waran, o taadataa.»

Laamdo wii:

<sup>38</sup> «Pooccitaniido kam wuurdan goondinal, §

kaa so wirfitiima,

bernde am yarrataako dum.»

<sup>39</sup> Enen noo, en njeyaaka e wirfitotoobe faa kalkoyoo 6ee, 6e njeye-den e mum dee, goondinbe faa yonkiji mum'en kisinee 6ee.

## 11

### Haala goondinal

<sup>1</sup> Goondinal yo tayorde heban ko fawi jikke e mum e hoolaade ko yiyaali ana woodi.

<sup>2</sup> Saabe maggal, njaatiraabe men kefsiri seedaaku lobbo yeeso Laamdo.

<sup>3</sup> Saabe goondinal, paamir-den aduna oo e koode dee fuu konngol Laamdo tagiraa, ko yiyyetee koo tagiraa ko yiyyataake koo.

<sup>4</sup> Saabe goondinal, Haabiila ittiranii Laamdo sadaka burdo mo Kaabiila oo, goondinal saabii so Laamdo jatorii mo o pooccitiido nde jabani mo sadakaaji makko. Kasen, fay so taweede o maayii, goondinal makko ana heddie waajaade en faa jooni.

<sup>7</sup> Saabe goondinal, Nuuuh sehiri laana faa dannda koreejii mum dii. O dowtanii Laamdo jeertindo mo ko warata, ko yiyaaka tafon koo. Ko o goondini Laamdo koo, o sariri aduna oo fuu. E lev dum, Laamdo iatorii mo o poocciitido.

<sup>8</sup> Saabe goondinal, Ibarahiima nootorii noddaango Laamđo, yalti faade e leydi ndi Laamđo fodi mo heđan ndii, o yalti tawi kanko nee o anndaa to o yahata. <sup>9</sup> Saabe goondinal, o joodorinoo no kodo nii e leydi o fodanaa ndii. Isiyaaka e Yaakuuba duu njoododike e makko e ley hukkummaaji, kambe duu ngoni heđidoobe e makko fodoore wootere ndee. <sup>10</sup> Sabi omo foodanoo ngalluure niňbunde duumiinde nde Laamđo diidi so mahi ndee.

<sup>11</sup> Saabe goondinal, Ibarahiima hokkira hefude sii, fay so taweede o naywiino, gendiiko Saaratu duu yo dimaro wonnoo. Sabi Ibarahiima ana jogorii podando dum oo yo koolniido. <sup>12</sup> Dum wadi so gooto naywudo faa sadii maayde hebi sii potudo koode kammu heewde mo waawaa limeede no njaareendi maayo waawiraaka limeede nii.

<sup>13</sup> Been yimbe fuu maaydiid ee goondindum'en tawo podoode Laamdo dee tabitaali, kaa  
6e coyniima dum 6e kuyanii dum duu, 6e njarriima duu 6e ho66e, 6e warwar6e aduna  
oo.<sup>14</sup> Yarrowiise hono nii 6ee kollii faa laab6i pac aana tewtana ko'e mum'en leydi ndi njey.  
<sup>15</sup> Kasen duu so nii hakkillaajii maab6e ana ngonnnoo e leydi ndi 6e njaltunoo e mum ndii, e6e  
mbaawnoo wirfitaade ton.<sup>16</sup> Kaa so goonga, e6e poordanoo leydi 6urndi moyyude, dum  
woni ngonndii dow kammu ndii. Saabe dum, Laamdo yaagortaako noddireede Laamdo  
maab6e, o moyyinaniib6e ngalluuure.

<sup>17</sup> Saabe goondinal, Ibarahima jabiri ittude Isiyaaka sadaka no layyaari nii nde Laamdo itti koro makko ndee. Fay so taweede Laamdo fodanii mo lejol makko heewan, o lanndinike ittude biyiiko korsudo oo sadaka,<sup>18</sup> mo Laamdo wii e mum oo: «Iwidi Isiyaaka ndii, kayri innditortoo innde maa.»<sup>\*</sup> <sup>19</sup> Ibarahima ana jogorii Laamdo ana waawi fay immintinde biyiiko Isiyaaka e maayde. Saabe nden hoolaare, o wartriranaa biyiiko ana wa'i hono immitiido e maayde nii.

<sup>20</sup> Saabe goondinal, Isiyaaka duwanorii Yaakuuba e Iisuwa dow moyyereeji garoyooji dii.

<sup>21</sup> Saabe goondinal, Yaakuuba duwanorii gooto fuu e biibbe Yuusufu didon bee, nde o 6adino maayde ndee. O tuugii sawru makko, o turii omo teddina Laamdo.

<sup>22</sup>Saabe goondinal, Yuusufu sapporii pergu 6isbe Israa'iila iwde leydi Misira nde 6adino maayde ndee. E ley majjum, o wasii 6e 6e naabora gi'e makko.

<sup>23</sup> Saabe goondinal, saaraabe Muusaa cuudiri düm lebbi tati caggal rimeede mum, sabi 6e njii o cukalel moy-nqarel, kasen, be cuusii woortude yamiroore kaananke oo ndee.

<sup>24</sup>Saabe goondinal, nde Muusaa mawni ndee, salorii wiyeede taanii Fira'awna. <sup>25</sup>O subike reentude e yimbe Laamdo bee e ley torraaji diina weltoraade wakkatiwel seeda ley luuttal. <sup>26</sup>Omo jatorii hoynireede no Almasiihu hoynirtee nii buri moyyude diina jawle Misira dee, sabi omo fawi jikke makko e mbarjaari waroyoori ndii.

<sup>27</sup> Saabe goondinal, o yaltiri leydi Misira tawi o hulaali tikkere kaananke oo, o fellisi yaade hono omo yiya Laamdo mo yiyyataake oo nii. <sup>28</sup> Saabe goondinal, o adorii fuddufe iidi Paska, o yamiri yiyyam wujee e dame galteeji pati malaa'ika baroowo oo mema hammadiiye Israa'ilankooibe bee.

<sup>29</sup> Saabe goondinal, Israa'iilankooße tacciri Maayo Maaliya ngoo dow leydi njoorndi. Kaa Misirankooße ndaarunoobe taccirde non bee fuu njoolii.

<sup>30</sup> Saabe goondinal, tataaji piliidi Yeriko dii caamiri ko Israa'iilankooße ngadi balde jeddi ana piltoo di koo.

<sup>31</sup> Saabe goondinal, Rahab debbo pijoowo oo waasiri halkodaade e heeferbe bee, sabi o ja66iima Israa'iilankoofe soorotoofe e leydi ndii faa kora ndi bee, o jippinirii dum'en dow teddeengal.

<sup>32</sup> Kodum mbiyan-mi kasen? Wakkati oo heyataa kam faa mi haala kabaaru Gedeyon e Barak e Samson e Yefte e Daawuuda e annabi Samuyila, kajum e annabaabe wobbe bee. <sup>33</sup> Been yimbe fuu, goondinal waddani dum'en jaalaade kaanankooibe e laamoraade fooccitaare e hebude podooje Laamdo. Kanngal waddani fe muubbude kundude dawaadi ladde <sup>34</sup> e nifude giteeli gujitoojii e dadfude e kaafaawi mbelki. Fay so taweede fe lo'unoobe, fe kebii semmbe, fe worworbe e golowole, fe cayfitii konuuji gardi e maabbe dii. <sup>35</sup> Saabe goondinal yoga e rewibe kefiri maavhe mum'en ngeurtinjaa.

Saabe goondinal, yimbe wobbe torraama faa maayi, calii heefidirde sako coottitee, yalla ana kefa wuurtfugo fürrngol moyyuuqo ngol.<sup>36</sup> Wobbe kasen niaavraa, piavaa dorri, e ko

\* 11:18 But see also 21:12

guri dum ngeyyaa nabaa ley kasu. <sup>37</sup> Yoga maabbe mbedaa kaaye faa maayi, yoga tayiraa ngarjaawi, yoga wardaa kaafaawi. Ebe njiloo ebe boornii guri be'i e baali, be misikiina'en, be torraabe, be jukkaabe jukkungo naawngo. <sup>38</sup> Been yimbe, yiilotoobe e ley laddeeji, njabboobe kaaye, soorotoobe e luurooji kaaye, naatoobe e gayde, be kaandaano e oo aduna.

<sup>39</sup> Be fuu be kebii seedaaku lobbo yeeso Laamdo saabe goondinal maabbe. Dum fuu e taweede, be kebaali ko Laamdo fodi koo, <sup>40</sup> sabi o fodanii en ko moyyi ko furi ko maabbe koo. O muuyi be laatataako hiibube so wanaa be tawdee e men.

12

*No ne'ugol Joomiraado hollirta jilli mum*

<sup>1</sup> Ndennoo enen, so nii seedee'en banngal goondinal potube nii heewde ana pilii en, ceerten e donngal fuu e luuttal lo'ortoongal en no yaafiri ngal, njaaren yeeso dow mujal no dadondirteedo nii,<sup>2</sup> tawee hakillaajii men ana e lisaa ardiido waaduge goondinal e gerde men oo, o tabintinoowo ngal duu. Kanko subii mujude leggal bardugal ngal dow seyo wonnog yeeso makko ngoo, o yawi hersa maggal. Joomi, o joodfayii jaamo Laamdo dow bimbleere mum ndee.

<sup>3</sup> E ley dum, ngattanee hakkille oon muñudo konnaagu luuttoobë fee, yalla odon mbaasa tampude, mbaason tayude jikke e goondinal mon. <sup>4</sup> Odon caloo luuttal odon kaba e mum, kaa on kabaaki faa yiyyam dogi tafon. <sup>5</sup> Kasen duu on njeggitii oo doo waaju mo Laamdo haaldiri e moodon no biibbe mum nii oo:

«Biyam, pati yaw ne'ugol Joomiraado ngol,  
kasen duu, pati tayu jikke so mo ninji ma.

<sup>6</sup> Sabi Joomiraado ne'an mo horsini fuu,

kasen duu fiyan mo nanggiri siyum fuu.»\*

<sup>7</sup> Muje ne'ugol ngol, anndon Laamod naangiri on 6i6be mum. Homo woni 6i6do mo baamum ne'ataa dum? <sup>8</sup> So on ngalaa e ne'ugol ngol 6i6be bee fuu ne'eteet ngol, on nganaa 6i6be laabu6e, on nganaa 6i6be halal. <sup>9</sup> Baabiraabe men aduna bee ana ne'anno en, en teddinii 6e. Ko hadata en downtanaade Baabiraado men dow kammu oo faa bura no maabbe nii yalla eden nguura? <sup>10</sup> Baabiraabe men ana ne'irannoo en no milorii ana woodi e wakkatiwel seeda. Kaa Laamod kammarri faa nafa en ne'irta en, yalla eden ndeenta e mum ley senaare mum. <sup>11</sup> Ne'ugol fuu e ley oo wakkati yoomre waddata, seynataa. Kaa caggal dum, engol waddana jaafu6e ne'eede bee fooccitaare e jam.

<sup>12</sup> Ndennoo 6amtee juude mon noodee dee, cemmbintinee e koppi mon di ngalaan semmbe dii. <sup>13</sup> Njokkee laawi pooccitiidi, pati koyngal layoowal seeltu, ko haani dee, ngal sella.

*No njeertinirta-den pati en mbaasu moyyere Laamdo*

<sup>14</sup>Tiinnee ndaaree wondirde e yimbé fuu dow jam, tewton senaare, sabi so on ngalaa nde on njiyatoo Joomiraado. <sup>15</sup>Njeertee pati fay gooto waasa moyyere Laamdo ndee, pati fay gooto e mon laatoo hono no haako haaduko wilitirta nii, so raabíra yimbé heewbé haadugol mum. <sup>16</sup>Njeertee pati fay gooto e mon laatoo jaahili naa adunanke no Isiuwa nii, coottudo hammadiyaaku mum faa heba ko jaamaa wakkatiwel gootel tan. <sup>17</sup>Odon amndi caggal dum, nde o yidi hebude duwaawu baam makko ndee, o tippitaama. O bami nii faa o woyi kaa o hebaali dabare fuu no o waylitira ko wadfaa koo.

<sup>18</sup> Onon, on ngardaali to Laamdo hono no yimbé Israa'iila ngardunoo to haayre Siinaayi nii. Kambe 6e ngarii to huunde waawnde memeede nde yiite hubbata e mum. Be ngari e ley nimre niibbunde tika e henndu mawndu. <sup>19</sup> Be nanii fuufaango buututal ngoo, kajum e daande toownde iwnde dow kammu ndee. Nanunoobe nden daande bee fuu jaagike Laamdo pati beydanee hen fay konngol gootol no poti hulde. <sup>20</sup> Sabi 6e ndonkii waawtude ndee doo yamiroore: «Ko memi nden waamnde haayre fuu, fay so daaba, wardete kaaye.» <sup>21</sup> Goonga, ko yimbé bee njii koo ana hulbinii faa Muusaa e hoore mum wii: «Mi hulii sanne faa mido sinna.»

<sup>22</sup> Kaa onon, on ngarii e haayre Siyona ndee, kajum e ngalluure Laamdo guurdo oo, dum woni Urusaliima dow kammaa oo, to malaa'ika'en ujunaaji ujunaaji kawriti so ana mbeltodoo. <sup>23</sup> On ngarii e kawrital hammadiiße 6e inde mum'en mbinndaa dow kammaa bee, on ngarii e Laamdo caroowo yimbe fuu oo, on ngarii e yonkiji fooccitiife laatiibe hibbüübe 6ee. <sup>24</sup> On ngarii e lisaa curoowo hakkunde yimbe e Laamdo ley aadi keyri ndii oo. On ngarii e yiyyam makko laabbinoojam, ngaddudam kabaaru burdo kabaaru yiyyam Haabiila junnpiidam oo moyvuude.

25 Ndennoo tiinnee pati calo-don Laamfo kaaldoowo e moodon oo, sabi salinoobe jeertingol makko dow leydi gaa bee ndadaali, wanaa haala enen so en calanike jeertingol

iwrungol dow kammu.<sup>26</sup> Arannde, daande makko dimmbii leydi ndii. Jooni kaa, o fodii dum doo, o wii: «Mi dimmban ndi cilol gonngol kasen, wanaa leydi tan, kammu e leydi fuu.»<sup>†</sup> <sup>27</sup> Ko o wii «cilol gonngol kasen» koo ana holla ko moyyinaa fuu dimmboto faa saama, yalla ko dimmbataako koo ana heddo kajum tan.<sup>28</sup> Saabe dum, nde wonnooda laamu mo dimmbataako kebaten, njetten hen Laamdo, ndewren mo no weldata mo tawee e leydinkinaare e kulol,<sup>29</sup> sabi Laamdo meeden oo ana wa'i no yiite halkoowe nii.

## 13

### *Haala waajuuji cakitiidä*

<sup>1</sup> Keddo-don e yidondirde, sabi on sakiraabe.<sup>2</sup> Pati njeebee jippinde hoobbe, sabi woobbe njippinii malaa'ika'en tawi anndaa ko be ngnoni.<sup>3</sup> Miccritee udadaabe bee hono no onon e ko'e mon odon uddidaa e maabbe nii. Miccritee torraabe torra cattudo hono no onon e ko'e mon odon torridaa e maabbe nii.<sup>4</sup> Yo yimbé fuu teddin dewgal, pati jeenoyee so ngarton e lelde mon. Sabi Laamdo saran fijoobe wonbe e dewgal e be ngalaa e dewgal fuu.<sup>5</sup> Joote jawdi haanaa taweede e mon. Kejnitoree ko njogi-don, sabi Laamdo jaati wii:

«Mi teelnataa ma, mi yoppataa ma abada!»<sup>\*</sup>

<sup>6</sup> Saabe majjum, eden mbaawi haalde dum doo dow hoolaare:  
«Joomiraado woni paabotoodo kam,  
mi hulataa.

Kodum fuu neddo waawi wafude kam?»<sup>†</sup>

<sup>7</sup> Miccritee ardiibe dowie on so kaalani on konngol Laamdo bee. Ngattee hakkillaaji mon e battane nguurdnam maabbe dam, nemmboon goondinal maabbe ngal.

<sup>8</sup> Isaa Almasihu waylitatako: no worrunoo keejen nii, worri hannde, non worrata faa abada duu.<sup>9</sup> Pati njabeen waajuuji goddi di on mboowaa nande naa hakkillaaji mon. Ko buri moyyude, berde mon keba semmbe e ley moyyere, ko wanaa jokkude sariyaaji keertiidi jaamdu. Jokkuue diin sariyaaji bee fay huunde kebaali hen.

<sup>10</sup> Tottinoobe sadaka gollube ley hukkum ceniido bee ndannanaaka jaamde sadaka pawiido e ittirde sadaka men ndee. <sup>11</sup> Sabi e ley njubuki Sariya Muusaa, Jottinoowo Sadaka Mawdo waddata yiham kirsamaaji ley nokku burdo fuu senaade oo itta dam sadaka kammarilutti, kaa tewuuji majji dii, to caggal daaka too sumetee. <sup>12</sup> Dum wadi so Isaa duu maayoyi caggal ngeenndi faa sennira yimbé yiham mum.<sup>13</sup> Ndennoo, njalten tawoyen mo to caggal ngeenndi too, ndoondo-den hersa ka yimbé ndonndini mo kaa!<sup>14</sup> Sabi ga aduna gaa en ngalaa ngeenndi nduumotoondi, kaa eden tewta ngeenndi ngaroyoori ndii.

<sup>15</sup> Isaa ana yottinana en sadaka men jettirdo Laamdo. Njettireen kundude men innde makko wakkati fuu. <sup>16</sup> Kaa pati njeebee wafude ko moyyi, ndeenton e huunde fuu, sabi diin sadakaaja ana mbela Laamdo.

<sup>17</sup> Dowtano-don dwooboé on, leydinkinano-don be, sabi ebe kaybi yonkiji mon dii, nde wonnooda kaalttoyaa dum yeeso Laamdo. Accee be ngollira golle oo e seyo tawee wanaa e metti, sabi so be ngadirii dum metti nafataa on.

<sup>18</sup> Miden jaagoo on duwaawu, sabi miden anndi hakkillaaji amen jinjaali min, nde wonnooda sago amen woni yaarude no woodi e huunde fuu.<sup>19</sup> Mido jaagoo on sanne nduwano-don kam, yalla Laamdo ana hokka kam laawol mi warta e moodon law.

### *Baynondiral*

<sup>20-21</sup> Laamdo gaddoovo jam guurtindo Joomiraado meeden Isaa, yo wadu on hiibube e huunde fuu ko moyyi ko kaaje-don, yalla odon ngadaa sago mum. Yo o wadu e meeden muuyide makko saabe Isaa Almasihu. Isaa woni duroowo baali lobbo oo, tabintiniroowo aadi nduumiindi ndii yiham mum. Yo teddeengal wooden mo faa abada abadin. Aamiina.

<sup>22</sup> Sakiraabe, mido jaagoo on kettiniree dii waajuuji mujal, sabi ko kaal-mi koo yo seeda.

<sup>23</sup> Mido anndina on sakiike meeden Timotee yoppitaama. So o yaawii yottaade gaa, min ngardan to mon.

<sup>24</sup> Miden njowta hooreebé mon bee e seniibe bee fuu. Iwbe Italiya bee duu ana njowta on.

<sup>25</sup> Yo hinnee Laamdo wonu e moodon, on fuu!

## Bataaki Yaakuuba

### *Jowtaango*

<sup>1</sup> Oo bataaki ga am iwri, miin Yaakuuba maccudo Laamdo, maccudo Joomiraado men lisaa Almasiihu, faade e cuudi baaba sappo e didi caakiidi e nokkuuje dee fuu dii. Onon e jam!

### *Haala goondinal e hakkilantaaku*

<sup>2</sup> Sakiraabe am horsube, nde torraaji di ngaldaa sii ngarii ittude koro mon, njogoree dum fuu seyo, <sup>3</sup> sabi odon andi itteede koro goondinal mon rimata mujal. <sup>4</sup> Kaa noo, kinaa mujal mon satta, yalla odon laatoo hiibube, huunde fuu jakataa on.

<sup>5</sup> Ndennoo, so gooto mon ana jakoraa hakkille, yo jaago Laamdo dokkoowo fuu oo, hokkan mo. Sabi Laamdo yo dokko mo mimsataa, mo hiiataako. <sup>6</sup> Kaa joomum jaagoroo e goondinal tawee sikkitaaki, sabi cikkitotoodo ana nanndi e bempeeje de henndu saawii e mum, so ana sogga dum yaade. <sup>7</sup> Neddo baado nii pati miila hebude e Joomiraado fay huunde. <sup>8</sup> Neddo gadudo berde didi, anndaa ko yidi: hannde too, jaango gaa.

### *Haala talkaaku e ngalunkaaku*

<sup>9</sup> Sakiraado goondindoo so tawi yo talka, yo seyo sabi yeeso Laamdo o tedduido. <sup>10</sup> Kaa so tawii yo galoo, ana wajibii e mum seyo sabi Laamdo leydinii dum. Hono no piindi booyataa ley ngesa nii, arsukuntaaku duu non wa'i. <sup>11</sup> So naange wulii, yoorna funngooji dii, piindi ndii saama, nari mum fuu yalta. Hono non jaati arsukunte oo saamirta, kabaaruujii mum fuu mbona.

### *Haala torraaji e jarribaaji*

<sup>12</sup> Neddo fuu tiinnitiido ley torraaji ittooji koro mum welii hoore. Sabi nde tiinnitaare makko ndee tabiti fuu, mo heban teddeengal gondugal e nguurndam nduumiidam, dam Laamdo fodani yiibbe muuudum dam. <sup>13</sup> So neddo jarribaama, pati wiya: «Laamdo jarribini kam.» Sabi fay gooto waawaa jarribinde Laamdo bone, kasen duu Laamdo jarribintaa fay gooto. <sup>14</sup> Kaa jarribaaji ana nannga neddo so tuuyooji mum poodii dum, naabii dum. <sup>15</sup> Caggal dum, so tuuyooji bondi cowiima, ndiman luuttal. Nde luuttal benndi fuu, kajum rimata maayde.

<sup>16</sup> Sakiraabe am horsube, pati on njaayre. <sup>17</sup> Moyyere fuu nde ndokke-den, kulle lobbe fuu de ndokke-den, to kammu too iwranta en. Dum fuu to Laamdo tagudo naange e koode dum iwranta en. Laamdo waylitataako, ko niibei fuu walaa e makko. <sup>18</sup> Kanko muuyi so o wadi en biibbe makko, o rimitiri en konngol makko, konngol goongaraawol, yalla eden laatoo dikkuruuue e tagoore makko ndee.

### *Haala nande konngol Laamdo so jokka*

<sup>19</sup> Sakiraabe am horsube, ngadee hakkille e dum doo: kettinee tafon, taadon haalde, taadon tikkude. <sup>20</sup> Sabi neddo tikkudo waawaa gollude ko foocitii yeeso Laamdo. <sup>21</sup> Ndennoo, njoppee huunde fuu ko tuunni e ko satti bonde, njaaboro-don konngol ngol Laamdo tuti e berde moodon ngol leydinkinaare. Engol waawi hisinde yonkiji moodon.

<sup>22</sup> Ngadhee ko konngol ngol wii on, pati kaadhee e hettinaade ngol tan. So wanaa dum, on tawan on njaayrii ko'e moodon. <sup>23</sup> Sabi kettintoodo konngol so waasa jokkude ngol, ana wa'i hono no yeewoovo hoore mum e timtorgal so yiya no yeeso mum tagiraa. <sup>24</sup> Caggal o yii hoore makko, o wittii, oon wakkati fuu o yeggitata no o wa'i. <sup>25</sup> Kaa oon yeewoovo sariya kiibudo dimdinoowo oo, so tiinnike e mum, so tuugike dum, laatoto hono golliroowo konngol ngol, wanaa hono nanoowo tan so yeggita. Laamdo wadan barke e golle makko fuu.

<sup>26</sup> Neddo fuu jogoriido hoore mum yo diinanke lobbo, so tawii waawanaa demngal mum, jaayrii hoore mum, diina mum kaa duu nafataa fay huunde. <sup>27</sup> Diina laabuka seniika do Laamdo Baabiraado men kajum woni: faabaade rewbe talka'en ee worbe mum'en maayi e atiime'en ley billaare mum'en, e haybude hoore mum e tuundi aduna.

## 2

### *No arsukunte e misikiino fuu potiri e men*

<sup>1</sup> Sakiraabe am, onon goondinbe Joomiraado meeden lisaa Almasiihu Jom teddeengal, pati furdineebiibbe aadama. <sup>2</sup> So arsukunte gadudo care kanje pariido warii do mbataton doo jooni, e so misikiino boorniido kaddule tuunnude kajum duu warii, <sup>3</sup> so on njii boorniido kaddule lobbe oo, ngadanon dum hakkille, njoyyinon dum e joonnde teddunde, mbiyon dum «Jooda», mbiyon misikiino oo «Dara too enne» naa «Jooda e leydi», <sup>4</sup> so on

ngadirii non, on ceenndaali ko'e moodon naa? On laatike saroobe 6e mijjooji bondi.<sup>5</sup> Sakiraabe am horsufe, kettinee! Misikiina'en aduna oo bee wanaa Laamdo sufike 6e faa hokka 6e arsukuntaaku goongaraajo, kebaado e goondinal, 6e naata e Laamu Laamdo mo Laamdo fodani yiibbe dum oo naa?<sup>6</sup> Kaa onon, on koynii misikiina'en bee. Tama wanaa arsukunte'en 6ee torrata on, so naaba on laamu?<sup>7</sup> Wanaa kambe mbonkotoo lisaa mo njogidon innde mum lobbere oo naa?

<sup>8</sup> Goonga, so tawii on njokkii sariya Laamu Laamdo no Binndi dii mbiiri nii: «Njidiraa tanaa maa no njidiraa hoore maa nii»,<sup>\*</sup> so on njokkii dum, on ngadii ko moyyi.<sup>9</sup> Kaa so on gurdinii 6iibbe aadama, on luuttii, sariya oo holii on woofoojee.<sup>10</sup> Sabi so neddo woofii woottere e jamirooje sariya dee, fay so jokkii keddiide dee fuu, luuttii sariya oo fuu.<sup>11</sup> Sabi Laamdo biido «Pati jeenu», kajum wii kasen «Pati jaadu hoore.» Jooni, fay so a jeenaali, so a jaadii hoore, a laatike boofudo sariya oo.<sup>12</sup> Kaaldee, ngolliree hono no yimbe sardeteeye sariya dimdinoowo nii.<sup>13</sup> Caroovo mo yurmataako, Laamdo yurmataako dum. Kaa jurmotoodo, walaa fuu ko o huldata sariya.

<sup>14</sup> Sakiraabe am, tama won biyoowo e moodon «Mido goondini Laamdo.» Kodum fuu dum nafata so golle makko hollataa omo goondini? Ngal goondinal ana waawi hisinde mo naa?<sup>15</sup> So tawii ada jogii sakiraado gorko naa banndiraado debbo 6e laatii hasindin6e sanne sanne koltal e jaamdu jaannde mum,<sup>16</sup> so gooto mon wii 6e: «Yo on tawoy jam, kolton kolte tekkuufe, jaamon faa kaaron» tawee on ndokkaali 6e ko 6e kasindini e mum koo, koltal e nguure, kodum dum nafata?<sup>17</sup> Goondinal e hoore mum duu non worri: so ngal waldaa e golle lobbo, ngal waatii, ngal nafataa.

<sup>18</sup> Kaa so won biido ma: «Aan, a jom goondinal, miin, mi jom golle», nden, mi jaaboto joomum: «Hollam goondinal maa tawee waldaa e golle lobbo so ada waawi. Miin duu mi hollirte golleeji am mi goondindo.»<sup>19</sup> Ada goondini Laamdo yo gooto naa? Gasii! Kaa fay seydaani'en ana ngoondini dum faa e6e cijja no 6e poti hulde!<sup>20</sup> Jaaydo! Kinaa mi holle goondinal ngal waldaa e golle nafaa fuu walaa e mum.<sup>21</sup> Hono njaati men Ibarahiima wadi so nanngiraa pooccitiido, wanaa golle muudum naa? O fawi 6iyiko Isiyaaka e ittirde sadaka ndee faa o hirsaa dum.<sup>22</sup> A yii goondinal Ibarahiima e golle mum fuu ana hawri, kasen duu golle makko hiib6ini goondinal makko.<sup>23</sup> Hono nii ko Binndi dii mbii koo tabitiri: «Ibarahiima goondinii Laamdo, Laamdo jatorii mo saabe majjum mo pooccitiido»,<sup>†</sup> faa o noddiraa gido Laamdo.<sup>24</sup> Ndennoo on niji, e golle neddo nanngirtee yo pooccitiido, wanaa goondinal mum tan.<sup>25</sup> Hono non Rahab, debbo pijoowo oo duu. O nanngiraa mo pooccitiido kammarri golle lobbo mo gollunoo oo, nde o jaab6inoo nelaabe 6ee so o walli dum'en hootirde laawol gonngol ndee.<sup>26</sup> Jooni nee, hono no caldi neddo maayirta so foofaango iwii e mum nii, hono non goondinal waatirta so golle lobbo iwii e mum.

### 3

#### *Haala biirudde demngal mum*

<sup>1</sup> Sakiraabe am, pati heew6e e moodon tewta laataade jannginoobe. Sabi ofon anndi enen jannginoobe, so en ngadii ko boni en carete sariya naaw6o faa bura yimbe wobbe 6ee.<sup>2</sup> En fuu eden mboofa e nokkuuje keewde. So tawii won mo mboofataa so ana haala, oo laatii neddo kiib6o, baaw6o durde caldi mum fuu.<sup>3</sup> No ngadirten labaale e kundude pucci yalla ana dowtanoo en nii, hono non nabirten caldi majji duu.<sup>4</sup> Yeewee laanaaaji geeci dii no di poti manngu e no kene mawde naabirta di. Kaa dum fuu e taweede gurfirgel tusukel dirnata di, marsoowo di oo naaba di do yiidri fuu.<sup>5</sup> Demngal duu hono non. Demngal yo salndu famardu e caldi neddo kaa engal mantoroo kulle mawde. Yeewee! Ladde no foti mawnude nii fuu, pettel yiite ana waawi sumude nde fuu.

<sup>6</sup> Demngal duu yo yiite. Engal lommbii hakkunde terde, engal moo6i boneeji fuu, engal sobina terde fuu. Engal hubb6iree yiite jahannama, engal suma nguurndam meeden fuu.<sup>7</sup> Biib6e aadama mbiirii sii daabaaji fuu, iwde waasooji ladde e pooli e ladi faa yottaade ko woni ley ndiyam fuu.<sup>8</sup> Kaa demngal, fay gooto waawaa biirudde dum. Demngal haadataa haannde mum, ngal kasaara bondo, keewngal tooke bonde.<sup>9</sup> Kanngal njettirten Baabi-raado men Joomiraado, kanngal duu kuufirten yimbe, tawi Laamdo tagi 6e so nanndini 6e e muuudum.<sup>10</sup> Jettooje e kuddi fuu ley hunduko wooto koo nii njaltata. Sakiraabe am, wanaa non dum haani worrude.<sup>11</sup> Tama ndiyam mbeldam e ndiyam kaafudam ana mbaawi ildude e sewnde wootere?<sup>12</sup> Sakiraabe: ibbi ana waawi rimde 6ohe naa? Maangoroowi ana waawi rimde ibbe naa? Ndennoo, sewnde haafundne yaltintaa ndiyam mbeldam.

#### *Haala hakkilantaaku iwrudo to Laamdo*

\* 2:8 Lewinkoo6e 19.18 † 2:23 Puddfoode 15.6

<sup>13</sup> Hakkilante naa paamdo ana e moodon naa? Joomum hollira dum caahu e golleesi gadiraadi sawraare e hakkilantaaku. <sup>14</sup> Kaa so tawii kirondiral bonngal naa haasidaaku ana e 6erde moodon, pati mantoro-don on hakkilante'en, dum yo yeddude goonga oo. <sup>15</sup> Oon hakkilantaaku iwataa to Laamdo. Do aduna doo o iwata, e gidaade yonki o iwata, e seydaani o iwata. <sup>16</sup> Sabi do kiram e haasidaaku ngoni fuu, njiibü e boneeji duu don tawetee. <sup>17</sup> Kaa hakkilantaaku iwdö to Laamdo, labbiinam 6ernde tafon. Caggal dum, o wadda jam. Omo heewi sawraare, omo heewi newaare, omo heewi yurmeende, omo wada golleesi lobbi. O seenndataa 6iib6e aadama. Naafigaaku walaa e makko. <sup>18</sup> Yiib6e jam 6ee, jam aawata, fooccitaare mawnde yaltanta 6ee.

## 4

### No yidugol aduna laatorii wajugol Laamdo

<sup>1</sup> Hoto golowole e habooji gondi e ley moodon dii iwi? Tama wanaa e jooteeji moodon kabooji e ley 6erde moodon dii di iwi? <sup>2</sup> So on tuuyaama huunde on kebataa, dum wadi on mbaran ko'e. Odon kaasidoo on kebataa sago mon, dum wadi on nduddan kabon. On kebaali, sabi on jaagaaki Laamdo. <sup>3</sup> Odon jaagoo mbaason hebude, sabi anniya bondo woni ko jaagorto-don, yalla odon keba gidaade yonki mon tan. <sup>4</sup> Odon nanndi e jeenoobe. Tama on anndaa yifüde aduna yo konnaagu Laamdo? Ndennoo, anniyiido laataade giidu aduna fuu, wadii hoore mum konnee Laamdo. <sup>5</sup> Pati miilee Binndi dii meere kaalata: «Laamdo ana horsini ruuhu mo wadi e meeden oo sanne.» <sup>6</sup> Kaa noo, Laamdo waadanii en moyyere burnde mawnude kasen. Sabi dum Binndi dii mbyiyata:

«Laamdo salanto mawninkiniibe,  
hinnoto leydinkiniibe 6ee.»\*

<sup>7</sup> Ndennoo, njabanee Laamdo. Kabon e Ibiliisa o dogan o woddo on. <sup>8</sup> Battitee Laamdo, kanko duu o battoto on. Onon luuttube 6ee labbiinee juude mon, onon wadube 6erde didi 6ee, labbiinee 6erde moodon! <sup>9</sup> Noornee, cuñlee, mboyee, ngadee jaleede moodon bojji, ngadee weltaare moodon sugulla. <sup>10</sup> Leydinkinee e yeeso Joomiraado, o toownan on.

<sup>11</sup> Sakiraabe, pati fay gooto e moodon jo'a banndum. Neddo fuu jo'udo banndum naa hiiti dum, bonkiima sariya Laamdo oo, hiitiike sariya oo. So a wadii nii, a wadii hoore maa kiitotoodo sariya oo, a dwtantaako mo. <sup>12</sup> Gooto woni darnudo sariya, oo woni Laamdo Caroozo oo: kanko tan woni baawdo hisinde naa halkude. Aan, ko ngon-daa faa kiitooda tanaa maa?

### No neddo haaniri wakkilde e Laamdo

<sup>13</sup> Onon wiyoobe: «Hannde naa janngo, min njahan ngalluure maaniire e maaniire, min ngada ton hitaande misen njaagoo, min keba tino», ngadee hakkille! <sup>14</sup> On anndaa ko wadata janngo. Kođum woni nguurdam mon? Dum cuurki fannguki wakkatiwel gootel tan so majji. <sup>15</sup> Hono nii kaanno-don wiide: «So Joomiraado muuyii, min nguuran, min ngolla huunde maani e huunde maani.» <sup>16</sup> Kaa jooni, on mawninkiniike, on kaawtike. Haawtaare hono nii fuu, ana boni. <sup>17</sup> Dum nee, anndudo gollude golle lobbo, so gollaali dum, luutti.

## 5

### Haala arsukunte'en bon6e golle

<sup>1</sup> Jooni nanee onon arsukunte'en, mboyee, ngadee woondu saabe torraaji kewtotoodi on. <sup>2</sup> Jawle moodon mbonii, kaddule moodon mooyii. <sup>3</sup> Kanje moodon e cardi moodon sugii. Ngol sugugol laatantoo on seedaaku boneeji mon, jaama tew mon no yiite nii. Aduna warii e timmude, faa hannde odon paggoo jawle. <sup>4</sup> Njođdi golloobee hettube gese moodon ndi calidon yođude ndii wullata. Joomiraado Jom Semmbe oo nanii gullaali hettube 6ee dii. <sup>5</sup> On njootaama, on mbeltike ley oo doo aduna, on paynii ko'e moodon saabe jannde kirsete-don. <sup>6</sup> On carii poocciitido mbar-don dum, tawi waawaaw daranaade hoore mum.

### No nafaa mujal mawniri

<sup>7</sup> Haya, sakiraabe, mujee faa Joomiraado oo wara. Hono no demoowo doomirta faa leydi hokka dum kettal lobbali, o mujan faa o heba yiwoonde aranndeere e sakitotoonde, <sup>8</sup> onon duu mujee, tiinnitee, sabi gartol Joomiraado oo battiima. <sup>9</sup> Sakiraabe, pati njijondiree yalla odon mbaasa sareede. Miccritee wakkati fuu Caroozo oo ana 6adii sanne, omo darii damal! <sup>10</sup> Sakiraabe, miccritee annabaabe wowlunoobe innde Joomiraado 6ee mujii torra. Onon duu mujiree no ma66e nii. <sup>11</sup> Eden mbiya tiinnitiibe 6ee mbelii hoore. On nanii tiinnitaare Ayyuuba ana haalee, kasen on njii ko Joomiraado oo faandinoor hen, sabi Joomiraado yo keewdo yurmeende sanne, jom hinnee.

\* 4:6 Tinndi 3.34

<sup>12</sup> Kaa ko adii huunde fuu, sakiraabe am, pati kune: wanaa hunoraade kammu,\* wanaa hunoraade leydi, wanaa huunde wonnde. So goonga, mbiyon goonga, so pene, mbiyon pene pati Laamdo sara on.

*Haala jaagoraade Laamdo dow goondinal*

<sup>13</sup> Won torriido e moodon naa? Duwoo! Won ceyiido e moodon naa? Yettira Laamdo jime. <sup>14</sup> Won jawdo e moodon naa? Nodda mawbe deental goondinbe, be ngujira dum nebam e innde Joomiraado, be nduwanoo dum. <sup>15</sup> Duwaawu duworaado goondinal, kajum sellinan jawdo oo, non Joomiraado imminan dum. So joomum luuttiino duu, yaafete. <sup>16</sup> Ndennoo, gooto fuu haalana goddo luutti muufum, jaaganee banndiraabe moodon Laamdo, yalla odon cellinee. Naagunde Laamdo nde neddo pooccitiido jaagii ana jogii baawde waafude kulle mawde. <sup>17</sup> Annabi Ilyaasa yo neddo hono men. O ndaardi Laamdo o duwii pati kammu toba. Duusi tati e lebbi jeegom, waadere tollaaki e leydi. <sup>18</sup> Caggal dum, o jaagii Laamdo kasen kammu oo toba. Nden Laamdo jippini tobo, leydi fudini ko hettetee.

<sup>19</sup> Sakiraabe, so gooto e mon majjii laawol goonga, so goddo wartirii dum, <sup>20</sup> anndee gartirdo luuttudo iwde e laawol majjere hisinii yonki iwde e maayde, saabe dum, luutti keewdi ana njaafee.

---

\* 5:12 Hunoraade kammu woni hunoraade Laamdo.

## Bataaki Piyeer arano

<sup>1</sup> Miin Piyeer nelaado Iisaa Almasiihu winndi oo doo bataaki faade e mon, onon 6e Laamdo su6ii, laatiib6e ho66e e ley aduna oo, saakiib6e e dee doo leyde: Ponta e Galaatiya e Kappadokiya e Asiya e Bitiniya. <sup>2</sup> Laamdo Baabiraado men subike on hono no anndirnoo dum nii, non Ruuhu mum wadi on yimbe Laamdo, faa dowtano-don Iisaa Almasiihu, yalla yiyyam mum dam ana la66ina on. Yo Laamdo 6eydan on moyyere e jam!

### Haala jikke nguurndam nduumiidam

<sup>3</sup> Jettooe ngoodanii Laamdo Baaba Joomiraado men Iisaa Almasiihu. Dow yurmeende makko mawnde ndee o rimtorii en rimtegol didabol saabe immitagol Iisaa Almasiihu e hakkunde maay6e faa keben jikke duumotoodo. <sup>4</sup> Non eden mbaawi fawde jikke men dow moyyereeji di Laamdo resani en dow kammu dii. Kanji, di mbonataa, di tuunnataa, di 6uytataako. <sup>5</sup> Laamdo reeniri on goondinal mon e ley baawde makko, faa hisina on. O lanndinike 6annginde dam kisindam e wakkati cakite aduna oo.

<sup>6</sup> Odon nii ceyii hen seyo manngo, fay so jooni ana haani ley wakkatiwel gootel torraaji di ngaldaa sii itta koro mon. <sup>7</sup> Dii torraaji kollata cellal goondinal mon. Hono no kanje wadirtee e yiite faa yeewee yalla o dimo, onon duu hono non korirte-don. Goondinal mon duu ana 6uri kanje sabi kanje heddataako. Ndennoo on njettete, on ke6an darja e teddeengal kammarri goondinal mon ngal jaannde Iisaa Almasiihu 6anngii. <sup>8</sup> Iisaa, on njiyaali dum kaa odon njidi dum. On njiyatcaa mo jooni, kaa odon ngoondini mo. Dum hebbini on seyo, seyo manngo dadungo hakkille, <sup>9</sup> sabi odon ke6a tino goondinal mon, dum woni kisindam yonkiji mon.

<sup>10</sup> Annabaabe sappiibe ko fa'i e moyyere nde podana-don ndee, yeewii kasen duu tewtii faamude dam kisindam. <sup>11</sup> Ruuhu Almasiihu gondo e ma66e oo anndinii 6e gila wakkati majjum waraali, torraaji kewtotoodi Iisaa Almasiihu e teddeengal jokkoowal hen. Annabaabe 6ee tewtii faamude nde dum wadata e no dum wadirta. <sup>12</sup> Kaa Ruuhu oo holliitino 6e oon kabaaru wanaaa ko'e ma66e 6e mbaajantoo, onon 6e mbaajantoo. Joonnoo, waajotoobe Kabaaru Lobbo 6ee njottinii on oon kabaaru dow baawde Ruuhu Ceniido iwdo dow kammu. Oon kabaaru, malaa'ika'en hoore ana njidi anndande dum faa sanne.

### Haala nguurndam ceniidam

<sup>13</sup> Dum nee, tawa odon lanndinii, odon kakkili, odon peerti gite mon! Pawon jikke moodon fuu dow moyyere nde Laamdo hokkoya on namnde Iisaa Almasiihu 6anngoyii ndee. <sup>14</sup> Bikkoy dowtaniib6e Laamdo, pati njokkee e gidaade yonki de ngonno-don e mum arannde dee. Nden, on anndaalino goonga. <sup>15</sup> Jooni, laatee seniib6e e huunde fuu ko ngollaton, hono no Laamdo noddudo on oo seniorii nii. <sup>16</sup> Sabi Binndi dii mbii:

«Laatee seniib6e, sabi miin mi ceniido.»\*

<sup>17</sup> Odon noddira Laamdo Baabiraado moodon, kanko woni cariroovo gooto fuu e golle mum, o burdintaa yimbe. Ndennoo ley ko ngollaton fuu, kulee mo faa do kodaaku moodon haadi e aduna. <sup>18</sup> Odon anndi on coottitaama yalla odon tonngitee iwde e tonngode nguurndam mon meereejam dam tawru-don baabiraabe moodon. Ndii coottitaari wanaa huunde timmoore hono cardi naa kanje. <sup>19</sup> Iisaa Almasiihu soottitirii on yiyyam mum teddudam, Almasiihu nanndudo e njawdiri ndi walaa ella ndi walaa tuundi. <sup>20</sup> Laamdo subike Almasiihu gila aduna oo tagaaka, kaa e cakite jamaanu Laamdo 6annginii mo saabe moodon. <sup>21</sup> On ngoondinii Laamdo saabe Iisaa Almasiihu mo o immintimi e maayde so o honki dum teddungal, faa goondinal mon e jikke mon fuu favoo e Laamdo.

<sup>22</sup> Jooni, caggal on cennirii ko'e moodon dowtanaade goonga faa njidon goondin6e 6ee sakiraabe moodon, njidon 6e jilli di ngaldaa e naafigaaku. Ndennoo njifondiree jilli mawdi dow bernde laabundue. <sup>23</sup> Laamdo waafsi aawdi e berde mon so ndimta-don rimtegol didabol. Ndiin aawdi wanaa timmoori, ndiin woni konngol Laamdo guurngol duumiingol ngol.

<sup>24</sup> Sabi,

«Bii-aadama yo hu6o,  
dawla muufum yo piindi.

Hudo yooran, piindi solan,

<sup>25</sup> kaa konngol Joomiraado ngol  
duumoto faa abada.»†

Ngol konngol woni Kabaaru Lobbo mo mbaaja-don oo.

**2**

<sup>1</sup> Saabe majjum, njoppon ko boni fuu: jammba e naafigaaku e haasidaaku e poore fuu.  
<sup>2</sup> No cukaloy keccoy muuyirta kosam endi inniraabe mum'en nii, hono non onon duu muuyiron non konngol Laamdo laabungol ngol, yalla odon mawnira saabe maggol kison,  
<sup>3</sup> sabi Binndi dii mbii: «on meedii hinnee Joomiraado.»

*Haala haayre wuurnde, kajum e yimbe seniibe*

<sup>4</sup> Ngaree e Joomiraado, sabi kanko woni haayre wuurnde nde yimbe tippitii, kaa Laamdo subike nde, teddinii nde. <sup>5</sup> Onon duu odon mba'i hono no kaaye guurde mahirteede suudu duumiundi nii. On yottinoobe sadaka seniibe, waddanoobe Laamdo sadakaaji ruuhunkooji di mo jaabortoo saabe Iisaa Almasiihu. <sup>6</sup> Sabi Binndi dii mbii:

«Mi fawwan Siyona haayre dooborde,

haayre subaande, horsunde,

kasen duu goondindo nde fuu

hersataa abada.»\*

<sup>7</sup> Onon goondinbe 6ee, nden haayre ana horsi e mon. Kaa 6e ngoondinaali 6ee, Binndi dii mbiyanii 6e:

«Haayre nde mahoobe 6ee tippitii ndee,

kajum latatt haayre burnde fuu teentilaade e maadi ndii,†

<sup>8</sup> nden haayre yimbe pergitotoo,

so nde lifa dum'en.»‡

Saliife rewde konngol ngol ana pergitoo e mayre no 6e podiranaa dum nii.

<sup>9</sup> Kaa onon, on lejol cubaangol, on yottinoobe sadaka gollanoobe Kaananke oo, on jaalejol ceniingol, on yimbe 6e Laamdo subanii hoore mum, faa kaalon haala golleeji makko lobbi, kanko woni nodduudo on iwde e nimre faade e fooyre mum haayniinde!

<sup>10</sup> Arannde on nganaano yimbe Laamdo, kaa jooni on yimbe makko. On kebaalino yurmeende makko, kaa jooni on ke6ii yurmeende makko.

*Haala dowitzaneade hooreebe 6ee*

<sup>11</sup> Sakiraabe am horsube, on nganaaa so wanaa ho6be e yimbe jananbe e aduna oo. Saabe majjum, mido yaggina on, ngoddito-don gidaade yonki, sabi wakkati fuu ede ndaarta halkude yonkiji moodon. <sup>12</sup> Maree needi hakkunde yimbe 6e ngoondinaali 6ee, yalla fay so 6e kappiri on bone, ebe njiya golle moodon lobbo, 6e teddina Laamdo nannde ganngani 6e.

<sup>13</sup> Njaabanee kaanankooobe 6ee fuu saabe Joomiraado, gila e kaananke burdo toowde, <sup>14</sup> faa e wakiilu mum nelaado faa jukka wadoobe ko boni, yetta wadoobe ko moyyi. <sup>15</sup> Sabi ko woni sago Laamdo dee, mu6iron kundude nuykaabe majju6e f6ee golle moodon lobbo. <sup>16</sup> Onon jey ko'e mon, kaa kaybee pati dum laatanoo on sabaabu faa ngollon golle bondo. Ngorron no maraa6e Laamdo nii. <sup>17</sup> Teddinee yimbe fuu, njiidee sakiraabe goondinbe 6ee, kulee Laamdo, teddinee kaananke mawdo oo.

*Haala jokkude Iisaa Almasiihu*

<sup>18</sup> Maccub6e, dowitzanee halfaa6e moodon teddinton dum'en, wanaa halfaa6e moyyu6e newiibe 6ee tan, fay oojii6e 6ee duu dowitzanee dum'en, <sup>19</sup> sabi neddo mo toopaali, so torraama mujiri saabe Laamdo, wadii ko moyyi. <sup>20</sup> So tawii a toojudo a jukkaama batte majjum, fay so a mujii, teddeengal hongal kebataa? Kaa so on mujii torraaji kewtiidi on ley golle mon lobbo oo, Laamdo ana yidi dum. <sup>21</sup> Dum Laamdo noddori on, sabi Almasiihu torriarmaa saabe mon. O hollii on laawol yalla odon njokka koyde makko. <sup>22</sup> Abada mo luuttaali, fay gooto nanaali fenaande e hunduko makko. <sup>23</sup> Nde 6e njennunoo mo ndee, o yennitaaki 6e, nde 6e kollunoo mo bone ndee, o giidaaki 6e. O doomtirii 6e Laamdo cariroowo jaadiral oo. <sup>24</sup> Iisaa Almasiihu e hoore mum roondike luutti meeden e caldi mum dow leggal bardugal, faa maayanen luutti, nguuranen fooccitaare. On cellinaama kammarri barmande makko. <sup>25</sup> Arannde, on baali majjudi, kaa jooni, on ngartiraama e duroowo kayboowo yonkiji moodon.

**3***Haala moyyondiral bamru6e*

<sup>1</sup> Hono non onon rewbe duu, dowitzanee worbe mon. Fay so worbe mon nganaaa jokku6e konngol Laamdo, golle mon ana waawi waylitinde 6e, tawee fay haala wadaali hen. <sup>2</sup> Be njiyan no golleeji mon laasiri e no teddinir-don worbe mon. <sup>3</sup> Pati pare moodon laatoo pare jaayirde: moorli, sofaade e goornaade kaddule jaayirde. <sup>4</sup> Tiidee e codaari cuudiindi

\* 2:6 Esaaya 28.16    † 2:7 Jabuura 118.22    ‡ 2:8 Esaaya 8.14

yalla 6erde mon ana codoroo sawraare e deeyere, dum woni codaari ndi timmataa. Kayri woni codaari teentiliindi ndi Laamdo yidi.<sup>5</sup> Arannde, non rewbe seniife parortoonoo, fawbe jikke mum'en e Laamdo bee. Been njabani worbe mum'en,<sup>6</sup> hono no Saaratu dowtanirii jom suudu mum Ibarahiima faa ana noddira dum kalfaado nii. Onon duu, so on ngollii golle lobbo tawi kulol fuu imminaali hakkillaaji moodon, on 6iib6e makko, kanko Saaratu.

<sup>7</sup> Onon worbe bee duu, tiid ee rewbe mon e gondal mon ley suudu. Anndon debbo fotaa gorko doole. Teddinee be sabi onon e mabbe fuu on reentube e moyyere wootere, dum woni nguurndam ngoongaraajam dam. Ngadiron non, pati fay huunde e duwaawuuji mon cagga e laawol.

### *Haala torrireede saabe laawol lobbol*

<sup>8</sup> Ko selli hen dee, on fuu laatee hakkille gooto, nawtondiron, gooto gooto mon fuu yida goddo oo jilli sakiraagu, kinnondiree, leydinkino-don.<sup>9</sup> Bone, pati njobiree dum bone, pati njennitee jennudo on. Ko kaan-don wafude dee, nduwano-don joomum, sabi kammari dum Laamdo noddiri on, yalla odon ndokkee moyyere.<sup>10</sup> Sabi Binndi dii mbii:

«Muuydo dammitoraade nguurndam lobbam  
e jalaade belde fuu,

yo nantu demngal mum e ko boni,  
nannga hunduko mum e pene,

<sup>11</sup> duurtoo ko boni wada ko moyyi,  
ndaarta jam tiida e muudum.

<sup>12</sup> Sabi Joomiraado ana yeewa fooccitiib6e bee,  
ana hettindoo duwaawuuji mum'en,  
kaa omo salanoo wadoo6e ko boni bee.»\*

<sup>13</sup> Homo torrata on so on tiinnike e ko moyyi?<sup>14</sup> Kaa so tawii on torriraama saabe fooccitaare, on mbelii hoore. Pati kulee yim6e bee kasen duu pati hakkillaaji moodon njii6o!<sup>15</sup> Teddinee lisaa Almasihu e 6erde moodon: o ceniido, o Joomiraado men. Wakkati fuu, tawa odon lanndinii jaabaade neddo fuu lamndiido on dalili jikke mo ngen-don e mum oo.<sup>16</sup> Njaaboree be sawraare e needi, tawee walaa fuu ko hakkille mon njijata on. Nden, fay so won ko be jo'i on, naa be njenni on kammari odon njokki laawol Almasihu lobbol ngol, yenoobe on bee tan kersata dow majjum.

<sup>17</sup> Torreede e ley golle lobbol, so tawii dum Laamdo muuyi, suri torreede e ley golle bondo.

<sup>18</sup> Sabi lisaa Almasihu e hoore mum maayii cilol gootol keyoowol yim6e jamaanuuji dii fuu kammari luutti 6iib6e aadama. Pooccitiido oo maayiri saabe be pooccitaaki bee, faa mo battina en Laamdo. O maayii ko yiayam makko yuppaa koo, kaa Ruuhu Ceniiido immintini mo o guurdo.<sup>19</sup> E oo Ruuhu jaati lisaa yaari gila ko booyi waajoyii yonkiji uddaadi ley kasu.<sup>20</sup> Kanji luutti Laamdo e jamaanu Nuuhu, Laamdo mujanii di ko booyi, nde Nuuhu sehanloo laana mum mawka kaa ndee. Yim6e seeda naatunoo ley laana kaa so kisi e ndiyam dam, yim6e njetton tan.<sup>21</sup> Dum hollitinnoo lootogal batismi gila waraali. E ley maggal on kisisi. Lootogal batismi ngal wanaa faa itta tuundi caldi dum wadifaa. Ko dum wadiraa dee, faa nootoro-don Laamdo e hakkille mo njijaali on. E immitagol lisaa Almasihu Laamdo hisinirta on.<sup>22</sup> Mo njaboyii dow kammu, kanko jooni omo joodii jaamo Laamdo. Malaa'ika'en e kaanankoo6e e jogiibe baawde fuu tilsinaama e rewde konngol makko ngol.

## 4

### *Haala nguurndam kesam*

<sup>1</sup> Nde lisaa Almasihu wonnoo ley aduna oo ndee, torraama. Onon duu 6amon anniya hono no makko nii, lanndinanee torra. Sabi torraado ley aduna seerii e luutti.<sup>2</sup> Gila jooni faa do nguurndam mon haafid, njokkon muuyde Laamdo, celon e gidaafe yonki.<sup>3</sup> Nguurndam mon 6ettiidam dam heyyi on, on ngadiino ko heefere6e bee njidi fuu: nde nguurno-don njaahilaaku e gidaade yonki e sigiro e wanngiyaare e yaraawo bonngo e dewal tooruucci karmungal.<sup>4</sup> Ko njottu-don tawdeede e mabbe e oo njaahilaaku cattudo koo, haaynii be sanne, dum saabii so ebe jo'a on.<sup>5</sup> Kaa be ndaroto yeeso Laamdo, lanndiniido sarde wuurb6e e maay6e oo.<sup>6</sup> Dum wadi so yim6e be nguuraa jooni bee kaalanaa Kabaaru Lobbo oo, yalla fay so be cariraama no yim6e fuu carirtee nii e ley caldi mabbe, ebe mbaawa wuurdude no Laamdo nii ley ruuhu.

<sup>7</sup> Timmoode huunde fuu 6adike. Nantee, kakkilee ndennoo, yalla odon keddo e wadude duwaawu jaannde fuu.<sup>8</sup> Ko ardi dum fuu, njifondiron no mbaawru-don fuu sabi kammari jilli luutti keewdi ana njaafee.<sup>9</sup> Nde on njahondirii, homo fuu teddina banndum, ko waldaa e njurjurtondirde.

<sup>10</sup> Ko gooto e moodon fuu hefi dokke Laamđo koo, yo nafir de wođđe, hono no kawjotoodo lobbo, kalfinaado moyyere Laamđo heewnde sifa nii. <sup>11</sup> Kaaloowo fuu, ana haani haaldude haala Laamđo. Golloowo fuu, ana haani gollirde semmbe mo Laamđo hokki đum oo. Dum yalla Laamđo ana teddinee e ley huunde fuu, tediniree saabe Iisaa Almasiihu. Yo teddungal e baawđe ngoodan Iisaa Almasiihu faa abada abadin! Aamiina!

### *Haala seyooraade torra*

<sup>12</sup> Sakiraabe am horsube, pati torra ittoowa koro mon naawnoowa hono no yiite nii haayno on, hono no huunde nde haanaa wardi e mon nii. <sup>13</sup> Mido haalana on ceyee sabi ko ndeentir-don e Iisaa Almasiihu torraaji jooni koo, yalla odon ceyoo sanne ley ilinaali nde teddeengal makko banngii.

<sup>14</sup> So on koyniraama saabe innde Iisaa Almasiihu, on mbelii hoore. Sabi Ruuhu teddeengal, đum woni Ruuhu Laamđo, ana jippoo e moodon. <sup>15</sup> Pati fay gooto e moodon jukkiree war-hoore e nguyka e njangu naa naatude e ko walanaa đum. <sup>16</sup> Kaa so gooto mon torrirama saabe yo neddo Iisaa, pati yaagoroo đum, njettee Laamđo saabe nden innde.

<sup>17</sup> Jooni wakkati oo yottike nde Laamđo fuddata sarde yimđe. To yimđe rewoobe mo fee o fuddirta. So sariya oo fuddirii enen, hono timmirta e dow 6e njokkaali Kabaaru Laamđo Lobbo 6ee? <sup>18</sup> Binndi dii mbii:

«So hisinde fooccitiibe tiidi,

kofum hewtotoo yeddufe Laamđo e luuttoobee?»\*

<sup>19</sup> Ndennoo so nii fii worri, neddo fuu torraado so tawii đum Laamđo muuyi, yo faw jikke mum e Tagudo koolniido oo, heddoe e wadude golle lobbo.

## 5

### *Haala waajufaade e mawđe*

<sup>1</sup> Mido waajoo mawđe wonduse e moodon 6ee đum foo, sabi miin duu mi mawđo, mi seedinoke torraaji Iisaa Almasiihu dii, mi tawdete e teddungal bannginoyteengal ngal.

<sup>2</sup> Tiidee e sewre nde Laamđo halfini on ndee. Pati ndurdon nde tilsere, ndurdon nde bernde laabunde no Laamđo yidiri nii. Pati ndurdon nde kammarri kaalisi, ndurdon nde soobee.

<sup>3</sup> Pati kayyinee sewre nde Laamđo halfini on ndee, kaa ngadanor sewre ndee misaalu nde njokka e mon. <sup>4</sup> Nden so Duroowo Mawđo oo banngoyii, on keban deesewal teddeengal ngal bontataa abada.

<sup>5</sup> Hono non onon sukaabe jokolđe, njabée yamiroore mawđe. On fuu, kollondiree leyfinkinaare ley gollidal mon, sabi Binndi dii mbii:

«Laamđo salanto mawninkiniibe,

hinnoto leyfinkiniibe 6ee.»\*

<sup>6</sup> Ndennoo, leyfinkinanee Laamđo Jom Semmbe oo, yalla omo toowna on so wakkati cubaado oo yottike. <sup>7</sup> Tippee sugullaaji moodon dii fuu yeeso Laamđo, sabi omo wadani on hakkille.

<sup>8</sup> Kakkilee, mbaalon e jeerngo! Sabi gano moodon Ibiliisa ana wada yaha-warta no laddeuru yolbundu nii, ana ndaara mo fadda faa jaama. <sup>9</sup> Kabito-don, tiidion e goondinal moodon, sabi odon anndi sakiraabe moodon saakiiibe e aduna oo 6ee, kajum'en duu ana ngondi e diin torraaji.

<sup>10</sup> Torraaji mon booyan seeda. Kaa Laamđo cattudo hinnaade en oo noddii en faa naaten e teddeengal mum duumiingal e Iisaa Almasiihu. Nden, Laamđo bilta on, juuđina on, hokka on semmbe, darna koyde mon. <sup>11</sup> Yo baawđe ngoodan mo faa abada! Aamiina.

### *Baynondiral*

<sup>12</sup> Silas mo anndu-mi yo sakiraado koolniido wallii kam winndande on oo bataaki dađđo, waajaade on e seedanaade on: kabaaru hinnee Laamđo goongaraajo oo, ana worri no mbinndir-mi nii. Keddodee hen!

<sup>13</sup> Deental goondinbe gonngal Baabila, ngal Laamđo subii no suborii on nii, engal salmina on. Marka biyam oo duu ana salmina on. <sup>14</sup> Calmondiree salminaango wondungo e jilli.

On fuu yo on kebu jam onon yimđe Iisaa Almasiihu 6ee!

## Bataaki Piyeer dīdāō

<sup>1</sup> Oo bataaki ga am iwri, miin Simon Piyeer. Mi maccudo Iisaa Almasiihu mi nelaado mum. Mi jowtii on, onon hebuōe goondinal hono ngal amen ngal saabe fooccitaare Iisaa Almasiihu, Laamdo meeden kisinoowo en oo. <sup>2</sup> Yo Laamdo hebbinir on moyyere e jam e ley ko anndu-don mo koo, e ko anndu-don Joomiraado meeden Iisaa koo.

### No goondinbe kaaniri wuurdude e kulol Laamdo

<sup>3</sup> E ley baawde Laamdo dee Iisaa hokkii en huunde fuu ko kaaja-den faa nguurden e kulol Laamdo. Iisaa wallii en anndude Laamdo, noddirdo en darja mum e moyyuki mum oo. <sup>4</sup> E ley darja makko e moyyuki makko o fodanii en moyyereji korsudi, mawdi sanne. O fodii di faa ndadon sarri bonannda mo gidaade yonki ndimi gondo e aduna oo, yalla odon ndeenta e Laamdo tagu. <sup>5</sup> Saabe dum, coobee, bēydon e dow goondinal moodon ngal moyyuki, e dow moyyuki kii anndal, <sup>6</sup> e dow anndal ngal nantaare, e dow nantaare ndee mujal, e dow mujal ngal kulol Laamdo, <sup>7</sup> e dow kulol Laamdo ngol yidugol sakiraabé, e dow yidugol sakiraabé ngol jilli goongaraaji. <sup>8</sup> So dii sifaaji lobbi ana ngoodi e mon, tawee duu edi bēydo, di ngadan on bēydotoobe yaade yeeso nafoobe e ley anndugol mon Joomiraado men Iisaa Almasiihu. <sup>9</sup> Sabi neddo fuu mo diin sifaaji ngalaa e mum yo bumdo naa pamduido jile, sabi yeggitii Laamdo labbin ium e luutti mum yabbiiidi dii.

<sup>10</sup> Kaa onon sakiraabé, cooboree no mbaawru-don fuu e tabintinde noddaango ngo Laamdo noddi on faade e mum ngoo e ko o suūi on koo. Sabi so on ngadii dum on pergitataako abada! <sup>11</sup> Hono nii Laamdo yaajiniranta on damal naarrugal e laamu duumiido oo, laamu Joomiraado men Iisaa Almasiihu kisinoowo en oo.

<sup>12</sup> Ndennoo, fay so tawii odon anndi deen kulle odon niibi e goonga mo kebu-don oo, mi miccintinan on de wakkati fuu. <sup>13</sup> Mi yii ana tilsi mi finndina hakkillaaji mon faa miccidon dum so mido heddi foofude. <sup>14</sup> Sabi mido anndi mi booyataa e aduna hankasen, dow no Joomiraado men Iisaa Almasiihu holliri kam nii. <sup>15</sup> Kaa mi wadan ko mbaaw-mi fuu, yalla so mi iwii doo, odon mbaawa miccitaade kulle dee wakkati fuu.

### No haala annabaabe tabitiri e Almasiihu

<sup>16</sup> Nde min anndini on garol Joomiraado men Iisaa Almasiihu e baawde mum ndee, min njokkaali fillaaji neejudi iwdi e yimbe. Gite amen jaati min njiri manngu makko! <sup>17</sup> O hokkaali teddeengal e darja iwde e Laamdo Baabiraado oo wakkati nde daande Laamdo jom darja mawdo oo wii: «Oo doo yo Biyam korsudo mo ceyortoo-mi.» <sup>18</sup> Nden daande woni nde min nani iwnde dow kammu, minen e ko'e amen, sabi miden ngondunoo e makko to dow haayre seniinde too.

<sup>19</sup> Dum fuu bēydani min kasen tayorde ko annabaabe see kaalnoo koo. Odon nii ngada ko moyyi e wattude hen hakkillaaji moodon, sabi konngi maabé ana wa'i no lampa pooyinoowa ley nimre, faa nde fajiri fooynta, hoodrefe fajiri jalban ley berde moodon.\* <sup>20</sup> Kaa aranel hen fuu, anndee ko wiinndaal ley dewte annabaaku koo annabaajo oo loowaali dum hoore mum. <sup>21</sup> Fay nde wootere Laamdo loowaali konngol mum e bii-aadama dow sago bii-aadama, kaa Ruuhu Ceniido wadi so annabaabe see kaalti konngol iwrungol to Laamdo ngol.

## 2

### Haala annabaabe peneebe e halkaare mum'en

<sup>1</sup> No annabaabe peneebe ngorrunkoo e ley lejol Israa'iila ngol nii, hono non waajotoobe fenooe ngorroyta e ley moodon. Be cooran e ley moodon jannde peneere halkoore. Be njeddan fay Kalfaado maabé coottitinoodo be oo. Hono non fe pooidiranta ko'e maabé halkaare yaawnde. <sup>2</sup> Heewbe njokkan e njaahilaaku maabé oo, baman faa laawol goonga ngol bonkee kammari been waajotoobe. <sup>3</sup> Joote maabé waddanan fe haalde pene faa be jaagoroo on, kaa jukkungo maabé saraama booyii, halkere maabé ana doomi be.

<sup>4</sup> Miccitoro-don no Laamdo soōbintinaali malaa'ika'en luuttunoobe see nii. Ko o wadi dee, o geyyori be calali o wedii be ley nimre jahannama faa jaannde darngal. <sup>5</sup> Miccitoro-don duu no o soōbintiniraali aduna arano oo nii, ko o wadi dee, o reeni Nuuhu baajotoodo fooccitaare oo e njeddon woōbe, o wayli e dow yeddoobe Laamdo bee ilam tuufaanu. <sup>6</sup> Laamdo sarii geelle didi Sodooma e Gomoora, o halkirii dum'en yiite faa latiido ndoondi, yalla ede laatanoo yeddoobe Laamdo waroobe bee misaal. <sup>7</sup> E ley hen, o danndii Luuđu pooccitiido cunjudo sanne saabe njaahilaaku bonbe see. <sup>8</sup> Oon pooccitiido koddunoodo e

\* <sup>1:19</sup> Hoodere fajiri ndee woni Almasiihu, jaaynoowo ley berde goondinbe dum. Yeew Banngingol Yuhanna 22.16

maäße, 6ernde mum moyyunde ndee ana mettannoo jałooma beetudo fuu saabe golleeji maäße bondi di mo yiylata e di mo nanata.

<sup>9</sup>Dum fuu ana holla, Joomiraado ana waawi reenude döwtaniiöe dum bee iwde e torraaji ittooji koro maäße, ana waawi kasen resande ooñiöe bee jukkungo faa jañnde dargal, <sup>10</sup>wanaa haala dogoobe caggal gidaade yonki coñudé, hoynüe hooreyaaku Joomiraado bee.

Been waajotoobe fenoobe kulataa gacce, ana kaawtii, ana mbonkoo tedduüe wonöe dow kammu bee. <sup>11</sup>Kaa malaa'ika'en bee e 6urde 6e semmbe e baawde fuu mbonkataako 6e faa kiitoo 6e yeeso Joomiraado. <sup>12</sup>Kaa been yimöe, 6e ngalaa hakkiile no daabaaji ladde njogoraaki hakkiile nii, dimiraadi faa loohee mbaree. E6e mbonkoo ko 6e anndaa, dum wadi so 6e kalkirte no daabaaji mbardeete nii. <sup>13</sup>Hono non 6e kebirta njoñdi oonaare maäße. Be gacce moodon, 6e ella moodon, sabi fay fijirde bonnde jałooma ana wela 6e. So 6e njooddiike e moodon e ley kawrital naamdu, e6e mbelee e jammiba maäße. <sup>14</sup>Be kaabataa yeewde rewöe jananöe, 6e joottataa wadude junuubu, koydo yonki fuu 6e koomtan dum. Berde maäße yo mboownaade e joote, 6e hudaabe Laamdo. <sup>15</sup>Be celli laawol poocciingol ngol, 6e majjii saabe ko 6e njokki laawol Balaama\* <sup>6ii</sup>Bosora koo, jañudo oonaade saabe joote jawdi. <sup>16</sup>Oon annabaajo felaama dow luuttal mum wakkati nde ndakiwa mum haaldiri e mum daande neddo, hadi dum waclüde ko nuykaado wadata.

<sup>17</sup>Waajotoobe fenoobe bee yo 6ulli di ngalaa ndiyam, 6e duule de henndu soggata, nimre burnde fuu niibüde 6e ndesanaa. <sup>18</sup>Be ndaarii seytoraade yimöe e dow konngi mawdi goli. Be mbirfintinii yaltube ko booyaali hakkunde majjuöe bee faa 6e njokkintina dum'en gidaade njaahilaaku gondé e yonki. <sup>19</sup>E6e podana been ndimaaku tawee kambe e ko'e maäße 6e maccuüe bonnanda, sabi gooto fuu yo maccudo ko jaalii dum. <sup>20</sup>So tawii e anndal Joomiraado men Iisaa Almasiihu kisinoowo en oo 6e ndadir e tuundi aduna, so 6e mbirfintiima e mayri kasen faa ndi jaalike 6e, no 6e mbattinirta nii ana 6uri no arannde nii bonde. <sup>21</sup>Tawee 6e anndaalino laawol fooccitaare ngol Fey 6uri anndude ngol faa gasa so duurtoo yamiroore seniinde nde 6e ndokkanoo ndee. <sup>22</sup>Ko hewtii 6e koo sellinii dii tinndi: «Rawaandu jaamtan tuurre mum.» Wiyaama kasen: «Ngiroowu lootaado talloto e loope.»

### 3

#### *Haala gartol Joomiraado*

<sup>1</sup>Sakiraäbe am horsüe, oo woni 6ataaki didäbo mo mbinndan-mi on. E ley didi dii fuu, mido yidi heydintinde e hakkillaaji mon anniyaaji lobbi faa miccito-don, <sup>2</sup>haalaaji di annabaabe seniibe kaalnoo gila ko 6ooyi, kajum e ko Joomiraado men kisinoowo oo yamiri, ko nelaabe e mon anndini on koo. <sup>3</sup>Adee anndude dum doo: e jalaade cakitotoode dee, jaayroöe yimöe jokkuöe gidaade yonki mum'en 6ee ngaroyan. Be njaayran on, <sup>4</sup>6e mbiya: «Hono fodoore gartol makko ndee latati? Sabi gila e njaatiraäbe faa joomi, huunde fuu ana worri e alhaali mum hono no worrunoo gila e fuddoode aduna nii.» <sup>5</sup>E6e ndaara yeggitidde Laamdo tagiri kammu e leydi fuu konngol muudum. O tagiri leydi ndii ndiyam, ndi yaltii ley ndiyam, <sup>6</sup>e majjam kasen, aduna oo halkorii ilam tuufaanu. <sup>7</sup>E konngol makko ngol kasen, kammu e leydi jamaanu kawru-6en oo ndesanaama yiite faa jañnde dargal, nde yedduüe Laamdo bee kalketee ndee.

<sup>8</sup>Sakiraäbe am horsüe, pati njeggiton oo goonga: to Joomiraado, jałooma gooto ana wa'i hono no duusi ujunere nii, kaa duu duu6i ujunere ana mba'an i mo hono no jałooma gooto nii. <sup>9</sup>Joomiraado taadintaa tabintide fodoore mum no yoga yimöe paamirta taadugol nii, o mujando on tan sabi o yidaa fay gooto halkoo. Ko o yidi dee, yimöe fuu ngarta e makko, tuuba. <sup>10</sup>Kaa jañnde gartol Joomiraado ndee juhiran en no guijo juhirta nii. Oon wakkati, dillere mawnde wadan, kammu oo timman. Kudde kammunkooje fuu kalkoto ley yiite. Leydi ndii e golleeji gondi e mum fuu bannginte sarete.

<sup>11</sup>Haya so tawii dum fuu hono non dum halkortoo, odon kaani jokkude laawol ceniingol! Odon kaani wuurdude kulol Laamdo <sup>12</sup>so tawee odon ndooma odon ngolla faa jalaande Laamdo ndee warda no yaawiri nii! Oon wakkati, kammu hu66an halkoo, kudde kamunkooje fuu taayan ley yiite. <sup>13</sup>Kaa eden ndoomiri no Laamdo fodiri nii: kammu keso e leydi keyri do fooccitaare tawetee.

<sup>14</sup>Tawee deen kulle ndoomaten, sakiraäbe am horsüe, coobee yalla Joomiraado ana tawa on e jam, tawa on ngalaa tuundi on ngalaa ella. <sup>15</sup>Paamon mujal Joomiraado meeden ngal ana newnana on kisindam. Non sakiike men Pool korsudo oo winndirani on, no Laamdo hokkiri mo hakkillantaaku nii. <sup>16</sup>Non o winndiri dum e 6ataakiji makko dii fuu. Bataakiji makko dii ana njogii konngi dii maanaa mum tiidi faamude, di yimöe famarbe

\* <sup>2:15</sup> Balaama janngini kaananke ngeenndi mbiyeteendi Mo'ab oo seytade Israa'iilankoo6e faa 6e naata e jeenu kajum e dewal tooruui.

jannde e hoyþe yonki ley goondinal mbaylitata koro mum, hono no þe ngadírta e nokkuuje godde ley Binndi díi duu nii. Kamþe ngaddanta ko'e maþþe halkaare.<sup>17</sup> Kaa onon sakiraabé am horsuþe, nde wonnoo on kumpitaama dum gila jooni, ndeentee pati bonþe hee naþora on e majjere mum'en so njoppon do tabitinno-don ñoo. <sup>18</sup> Mawniron e ko anndu-don Joomiraado men Iisaa Almasiihu kisinoowo en oo koo e ko keþu-don moyyere mum koo! Yo teddeengal woodan mo gila jooni faa abada! Aamiina!

## Bataaki Yuhanna arano

*Haala Konngol dokkoowol yimbe nguurndam*

<sup>1</sup> Miden mbinndana on haala nedđo goodudo gila puccoođe.\* Min nanii haala makko, min njirii mo gite amen, min taykike mo, min memirii mo juude amen. Kanko woni Konngol dokkoowol yimbe nguurndam.<sup>2</sup> Nguurndam dam 6annginaama min njii dam, dum saabii so siden kaalana on haala majjam. Dam nguurndam nduumiidam ngondam do Baabiraado dam min 6annginanaa, dam min kaalanta on haala mum jooni.<sup>3</sup> Ndennoo, ko min njii e ko min nani min kaalanta on onon duu, yalla ođon ndeentira e amen hono no min ndeentiri e Baabiraado e Biyum Iisaa Almasiihu nii.<sup>4</sup> Dum min mbinndanta on, yalla seyo men ana hi6aa.

*No Laamđo holliriyo fooyre*

<sup>5</sup> Kabaaru mo min narri Almasiihu, mo min kaalanta on haala mum oo, annii: Laamđo yo fooyre, nimre fuu walaa e mum.<sup>6</sup> So en mbii eden ndeentii e makko, kaa tawee e nimre ngn-den, en penii, goonga walaa e golle men.<sup>7</sup> Kaa so e fooyre nguur-den no o worri e fooyre kanko e hoore makko nii, nden en ndeentii enen e ko'e men, kasen duu yiyyam Biyiko Iisaa la6inan en e tuundi fuu.

<sup>8</sup> So en mbii en luuttaali, en njaayrii ko'e men, en ngalaa e goonga.<sup>9</sup> Kaa so en njaadiranii Laamđo luutti men, o yaafoto en, o la6ina en e tuundi fuu. Sabi kanko, o koolniido, o poocciitido.<sup>10</sup> So en mbii en luuttaali, en njogorike Laamđo yo penoowo, konngol makko naatali e men.

## 2

*No Almasiihu laatorii ballo men*

<sup>1</sup> Sukaabe am, mi winndanii on dum, pati on luutti. Kaa so won luuttudo, eden njogii balloovo do Baabiraado, oo woni Iisaa Almasiihu poocciitido oo.<sup>2</sup> Kanko hokkitiri yonki makko yalla luutti men ana njaafee, wanaa luutti men enen tan, luutti aduna oo fuu.

*Haala yidondirde*

<sup>3</sup> Ko anndinta en eden anndi Laamđo dee, haybude jamirooje mum.<sup>4</sup> Biido «mido anndi mo», tawa haybataa jamirooje makko, joomum yo penoowo, walaa e goonga.<sup>5</sup> Kaa kaybudo konngol Laamđo ngol, jilli Laamđo ana ki6ei e mum jaati. Nii anndirten eden njii e makko.<sup>6</sup> Biido ana njii e makko, ana haani wuurdna no Almasiihu wuurdunoo nii.

<sup>7</sup> Sakiraabe am horsube, ko mbinndan-mi on koo wanaa yamiroore heyre, yo yamiroore 6ooynde nde ke6-don gila arannde. Nden yamiroore 6ooynde woni konngol ngol nan-don ngol.\*<sup>8</sup> Dum e taweede, yamiroore 6ooynde nde mbinndan-mi on ndee, nde heyre duu, goonga mayre ana 6annga e Almasiihu, ana 6annga e mon, onon duu. Sabi nimre ana timma, fooyre jaati ndee tawi fuddii yaaynude.<sup>9</sup> Biido e fooyre woni, tawi ana waji sakiike mum, oo kaa e nimre woni faa hannde.<sup>10</sup> Jiddo sakiike mum e fooyre woni, walaa ko fergitata dum.<sup>11</sup> Bajudo sakiike mum e nimre woni ana wummbiloo, anndaa to yahata sabi nimre wumnni dum.

*Haala waasude yidude aduna*

<sup>12</sup> Sukaabe, mido winndana on  
sabi luutti mon njaforaama saabe Almasiihu.

<sup>13</sup> Baabiraabe, mido winndana on  
sabi odon anndi goodudo gila e puccoođe oo.

Jokol6e, mido winndana on  
sabi on njaalike Ibilisa Bondo oo.

<sup>14</sup> Sukaabe, ko mbinndiran-mi on dee,  
saabe odon anndi Baabiraado.

Baabiraabe, ko mbinndiran-mi on dee,  
saabe odon anndi goodudo gila e puccoođe oo.

Jokol6e, ko mbinndiran-mi on dee,  
saabe odon njogii semmbe,  
konngol Laamđo ngol njii e mon,  
kasen duu on njaalike Bondo oo.

\* **1:1** Goodudo gila puccoođe oo yo Iisaa. (Yeew Linjiila ngeđu Yuhanna 1.1-18 duu.)

\* **2:7** Yamiroore ndee yo yidondirde.

<sup>15</sup> Pati njidee aduna, kajum e ko woni e mum fuu. Sabi jiddo aduna waawaa yidude Baabiraado. <sup>16</sup> Sabi huunde fuu ko woni e aduna banngal gidaade yonki e ko daria e yitere e haawtaade banngal jawdi, jeyaaka e Baabiraado, dum fuu e aduna jeyaa. <sup>17</sup> Aduna e muuyooji mum fuu timman, kaa gadoowo sago Laamdo duumoto faa abada.

### *Jeertaango dow konnee'en Almasiihu*

<sup>18</sup> Sukaabe am, timmoodie aduna oo badike. On nanii konnee-Almasiihu waran. Haya, jooni konnee'en-Almasiihu heewbe annii. Dum anndir-den timmoodie dee. <sup>19</sup> E men jaati 6e iwata, kaa be njeyanooka e men. Sabi kambe, sinndo e men be njeyano, be keddedotono e men. Kaa dum hollata kambe be fuu be njeyanooka e men. <sup>20</sup> Kaa onon, Almasiihu hokkii on Ruuhu Ceniido, on fuu odon anndi goonga. <sup>21</sup> Mi winndiranaali on saabe on anndaa goonga. Ko mbinndiran-mi on dee, saabe odon anndi goonga. Kasen duu odon anndi fenaande fuu walaa e goonga. <sup>22</sup> Ndennoo, homo woni penoowo? Jeddudo Iisaa yo Almasiihu, kajum woni penoowo.<sup>†</sup> Jeddudo Baabiraado e Bajjo oo fuu yo konnee-Almasiihu. <sup>23</sup> Sabi jeddudo Bajjo oo walanaa Baabiraado oo, ceedaniido Bajjo oo fuu ana woodani Baabiraado oo duu. <sup>24</sup> Onon, tiidiee e ko nan-don gila arannde koo. Haala ka nand-on gila arannde kaa, so jii6ii e mon, onon duu on jii6an e Bajjo oo, on jii6an e Baabiraado oo. <sup>25</sup> Kasen duu, ko Almasiihu fodani en dee, nguurndam nduumiidam.

<sup>26</sup> Mi winndanii on dum banngal yimbe majjinoobe on. <sup>27</sup> Kaa onon, Ruuhu Ceniido mo o hokki on oo, ana jii6ii e mon, fotaa ko njanngine-don. Sabi Ruuhu makko oo jannginta on huunde fuu, kanko Ruuhu oo goonga o jannginta on, wanaa fenaande. Ndennoo, jii6ee e Almasiihu no Ruuhu mum oo jannginiri on nii.

### *No laatori-den 6iibbe Laamdo*

<sup>28</sup> Jooni sukaabe am, jii6ee e Almasiihu, yalla eden ndardoo yeeso makko rafi kulol, pati kersen jannnde gartol makko. <sup>29</sup> So on anndii Laamdo yo pooccitiido, tayoree mo golleeji mum pooccitii fuu yo 6iyiiko.

## 3

<sup>1</sup> Yeewee no Baabiraado foti yidirde en, faa noddire-den 6iibbe Laamdo. En 6iibbe mum jaati. Ko hadi aduna oo anndude en dee, o anndaa Baabiraado. <sup>2</sup> Sakiraabe am horsube, jooni en 6iibbe Laamdo. Ko laatoto-den koo, 6annginaaka tafon. Kaa eden anndi nde Almasiihu 6anngii, en nanndan e mum, sabi en njijyan mo kanko e hoore makko no o worri nii jaati.

<sup>3</sup> Joonndoriido dum e makko fuu, la6iniran hoore mum no Almasiihu laa6iri nii.

<sup>4</sup> Golludo ko boni fuu, luuttii Sariya Laamdo. Sabi golluke ko boni yo luuttude Sariya. <sup>5</sup> Odon anndi Almasiihu 6anngirii faa roondanoo en luutti men. Kajum, luutti ngalaa e mum. <sup>6</sup> Niibudo e makko fuu, heddataako e luutti. Luuttoowo fuu, yiyaali mo, anndaa mo.

<sup>7</sup> Sukaabe am, pati fay gooto majjina on! Golloowo ko fooccitii yo pooccitiido, hono no Almasiihu worri yo pooccitiido nii. <sup>8</sup> Kaa luuttoowo yo neddo Ibiliisa, sabi Ibiliisa ana luutta gila e puddyode. Saabe majjum Bii Laamdo oo wardi faa halka golleeji Ibiliisa. <sup>9</sup> Laatiido 6ii Laamdo fuu heddataako luuttude, sabi Ruuhu Laamdo ana jii6i e mun. Joomum waawaa heddaade luuttude, sabi yo 6ii Laamdo. <sup>10</sup> Ko seenndata 6iibbe Laamdo e 6iibbe Ibiliisa dee, mo gollataa ko fooccitii fuu, wanaa neddo Laamdo. Mo yidaa sakiraabe mum duu, hono non worri.

### *Haala jilli*

<sup>11</sup> Oo woni kabaaru mo nan-don gila arannde oo: njidondiren. <sup>12</sup> En kaanaa wa'ude no Kaabiila jokkudo Ibiliisa Bondo oo so wari mijum nii. Kodum wadi so o wari dum? O wardii dum kammari golle makko yo bondo, mo mijuko oo kaa yo lobbo. <sup>13</sup> Ndennoo sakiraabe, pati kaayne-don so aduna oo wajii on. <sup>14</sup> Ko njid-den sakiraabe men koo, 6annginani en en njaalike maayde, en naatii e nguurndam. Mo yidaa sakiike mum fuu, heddike yo maaydo. <sup>15</sup> Neddo fuu bajudo sakiike mum, jaadfi hoore. Odon anndi jaadudo hoore, nguurndam nduumiidam walanaa dum.

<sup>16</sup> No anndirten ko woni jilli dee, Almasiihu hokkitirii yonki mum kammari men. Ndennoo enen duu, eden kaani hokkitirde yonkiji men kammari sakiraabe men. <sup>17</sup> So jogiido nguure hitaande yii sakiike mum yo kasindindo, yurmaaki dum, hono jilli Laamdo mbaawiri jii6irde e mum? <sup>18</sup> Sukaabe am, pati jilli men laato haala bola tan, njidiren golle e goonga. <sup>19-20</sup> Nii anndirten e goonga ngon-den. Kasen duu so berde men pelii en, en mbaaltinan de yeeso Laamdo, sabi Laamdo 6uri de manngu, kanko woni anndudo huunde fuu.

<sup>21</sup> Ndennoo sakiraabe am horsube, so nii berde men pelaali en, en tawdataake e kulol yeeso Laamdo, <sup>22</sup> o hokkan en ko naagi-den mo fuu, sabi en kaybii jamirooje makko, eden

<sup>†</sup> 2:22 So neddo yeddii Iisaa yo Almasiihu, yeddii o kaananke, yeddii o kisinoowo duu.

ngada ko weli mo. <sup>23</sup> Yamiroore makko yo goondinde Iisaa Almasiihu Biyiko oo, kajum e yifondirde hono no o yamiri en nii. <sup>24</sup> Kayboowo jamirooje Laamdo fuu, ana jiiibi e Laamdo, Laamdo duu ana jiiibi e mum. Ruuhu mo o hokki en oo, kajum anndinta en omo jiiibi e men.

## 4

### *Haala Ruuhu goonga e ruuhu majjere*

<sup>1</sup> Sakiraabe am horsube, baajotoode fuu biido Ruuhu Laamdo ana e mum, pati ngoondinee dum faa koron yalla Ruuhu Laamdo jaati woni e mum naa wanaa. Sabi annabaabe peneebe heewbe caakike e aduna oo. <sup>2</sup> Annii no anndirton Ruuhu Laamdo ana e neddo: jabudo Iisaa Almasiihu warii laatike neddo fuu, oon, Ruuhu Laamdo ana e mum. <sup>3</sup> Kaa mo jaabanaali Iisaa fuu, Ruuhu Laamdo walaa e mum. E konnee-Almasiihu iwi. On nanii haala garol konnee-Almasiihu oo. Oon, ana ley aduna oo gila jooni. <sup>4</sup> Sukaabe am, onon, on yimbe Laamdo, on njaalike annabaabe peneebe bee. Sabi Ruuhu gondo e mon oo furi semmbe diina gondo e aduna oo. <sup>5</sup> Been annabaabe peneebe, be adunankooobe. Saabe majjum, haala mbonka be kaalata, aduna oo ana hettinanoo be. <sup>6</sup> Enen, en yimbe Laamdo, anndudo Laamdo fuu hettinanto en. Mo wanaa neddo Laamdo hettinantaako en. Nii ceenndirten Ruuhu goonga e ruuhu majjere.

### *Haala jilli Laamdo*

<sup>7</sup> Sakiraabe am horsube, njidondire, sabi jilli e Laamdo iwi. Mo jilli ngoni e mum fuu yo 6ii Laamdo, ana anndi Laamdo. <sup>8</sup> Mo jilli ngalaa e mum oo anndaa Laamdo, sabi Laamdo e hoore mum jaati anndini en ko woni jilli. <sup>9</sup> Ko Laamdo bannginirani en jilli mum dee, ko o neli BiyikoBajjo ley aduna oo koo, yalla eden kebsira nguurndam saabe mum.

<sup>10</sup> Ko njidu-den Laamdo koo anndintaa en jilli. Ko anndinta en jilli dee, Laamdo yidi en. E ley jilli makko dii o nelii Biyiko faa hokkitira yonki mum yalla luutti men ana njafee. <sup>11</sup> Sakiraabe am horsube, ko Laamdo yidiri en nii koo, enen duu, eden kaani yifondirde. <sup>12</sup> Fay gooto yiyaali Laamdo abada. So en njidondirii, Laamdo jiiiban e men, kasen duu jilli mum kibbi e men.

<sup>13</sup> Hono anndirten eden jiiibi e makko, kanko duu omo jiiibi e men? Ko o hokki en Ruuhu makko oo koo. <sup>14</sup> Minen e ko'e amen, min njii Bajjo oo, miden kaalana on Baabiraado oo neli mo faa o hisina aduna oo. <sup>15</sup> Jabudo Iisaa yo Bii Laamdo fuu, Laamdo jiifan e mum, kajum duu jiiisan e Laamdo. <sup>16</sup> Enen, en anndii jilli di Laamdo yidi en dii, en koolike di. Laamdo e hoore mum jaati anndini en ko woni jilli. Niiabudo e jilli fuu, e Laamdo jiiibi. Laamdo duu jiiisan e mum. <sup>17</sup> No Almasiihu wa'i nii, hono non enen duu kaan-den wa'ude e oo doo aduna. Nii woni no jilli dii kibbiri e men, pati kulen jannde dargal. <sup>18</sup> Kulol walaa ley jilli, jilli kibbudi ittan kulol. Sabi kulol yo jukkungo doomi, kasen duu gondudo e kulol fuu, jilli Laamdo kibbaali e mum. <sup>19</sup> Enen, ko o adii yidude en koo, wadi so njidondir-den. <sup>20</sup> Biido «mido yidi Laamdo», so tawi ana wajni sakiike mum, yo penoowo. Sabi mo yidaali sakiike mum mo yiayata, waawaa yidude Laamdo mo yiyaali. <sup>21</sup> Jiddo Laamdo fuu, yo yidu sakiike mum duu. Ndee doo yamiroore, Almasiihu waddani en dum.

## 5

### *Haala goondinde Bii Laamdo*

<sup>1</sup> Goondindo Iisaa woni Almasiihu fuu laatike 6ii Laamdo. Jiddo saaraa fuu, yidan biiyiko duu. <sup>2</sup> No anndirten eden njidi bii6e Laamdo dee, ko njid-den Laamdo so njokku-den jamirooje mum koo. <sup>3</sup> Sabi haybude jamirooje makko woni yidude mo. Jamirooje makko nganaa donngal, <sup>4</sup> sabi ko iwi e Laamdo fuu, jaaloto gidaade yonki. Goondinal men njaalorto-den de.

<sup>5</sup> Homo jaalotoo gidaade yonki? Walaa fuu jaalotoodo gidaade yonki so wanaa goondindo Iisaa woni Bii Laamdo. <sup>6</sup> Oon woni Iisaa Almasiihu gardudo e ndiyam e yiyyam.\* Wanaa e ndiyam tan o wardi, o wardii e ndiyam e yiyyam fuu. Ruuhu oo duu hollata dum, sabi Ruuhu oo woni goonga. <sup>7</sup> Sabi kulle tati ana kolla Iisaa woni Almasiihu, <sup>8</sup> dum woni Ruuhu e ndiyam e yiyyam, seedaaku majje oo duu yo gooto. <sup>9</sup> Eden njaba seedaaku yimbe, kaa seedaaku Laamdo oo furi semmbe. Sabi kanko woni mo Laamdo haali haali Biyum. <sup>10</sup> Goondindo Bii Laamdo, hefii oon seedaaku e ley fernde mum. Mo goondinali Laamdo, kajum jogorike Laamdo yo penoowo, sabi jaabali seedaaku mo Laamdo haali haala Biyum oo. <sup>11</sup> Dum woni seedaaku oo: Laamdo hokkien en nguurndam nduumiifdam, dam nguurndam ana e Biyiko oo. <sup>12</sup> Goodando Bii Laamdo oo fuu, hefii nguurndam dam. Mo walanaa dum, hebaali dam.

\* 5:6 Ndiyam dam woni ndiyam lootagal batisima. Yiyyam dam ana hollita maayde Iisaa.

*Baynondiral*

<sup>13</sup> Onon goondinþe Bii Laamðo oo 6ee, mi winndanii on ðum, yalla odon tayora on keþii nguurndam nduumiidam. <sup>14</sup> Eden njogii ndee hoolaare ðo makko: so en nduworike huunde hakke muuyde makko, o jaabanto en. <sup>15</sup> Eden anndi en keþii ko nduwi-ðen koo, nde wonnoo eden anndi omo jaabanoo en duwaawu men.

<sup>16</sup> Ndennoo, so won jiido sakiike mum ana luutta luuttal ngal waddantaa nedðo maayde, o jaaganoo ðum Laamðo, Laamðo duu hokkan ðum nguurndam. Kaa won luuttal gaddoowal maayde. Mi wiyaali jaagoro-don saabe ngal luuttal. <sup>17</sup> Oonaare fuu yo luuttal, kaa wanaa luuttal fuu wadataa maayde.

<sup>18</sup> Eden anndi 6ii Laamðo fuu heddataako e luutti, sabi Bii Laamðo oo ana hayba nedðo oo, Ibiliisa Bondo oo memataa mo.

<sup>19</sup> Eden anndi en yimbé Laamðo, aduna oo fuu annii e maral Bondo oo.

<sup>20</sup> Eden anndi Bii Laamðo warii, hokkii en hakkille mo anndiren deweteedo goongaraajo oo. Jooni eden njeyaa e goongaraajo oo, sabi eden jiiþi e Biyiko Iisaa Almasiihu. Kanko woni Laamðo goongaraajo oo, kanko woni nguurndam nduumiidam. <sup>21</sup> Sukaabé am, ndeenee ko'e mon e deweteedo godðo.

## Bataaki Yuhanna dīdābō

<sup>1</sup> Miin mawdō deental goondinbē winndi oo bataaki faade e debbo teddudo\* mo Laamdo subii. Mido jowte, aan e 6iibbe maa fuu, onon 6e njidir-mi goonga. Wanaa miin tan yidi on, anndubē goonga oo 6ee fuu ana njidiri on<sup>2</sup> saabe goonga gondō e men, duumotoodo e men faa abada oo.<sup>3</sup> Laamdo Baabiraado men e Biyum Iisaa Almasiihu yurmoto en, hokkan en moyyere e jam kammarri goonga e jilli.

### *Haala goonga e jilli*

<sup>4</sup> Mi seyike sanne ko kumpitii-mi won 6iibbe maa jokkirbē goonga oo no Baabiraado yamiri en nii. <sup>5</sup> Jooni, debbo teddudo, mido ndaarde, njidondiren. Ko mbinnanan-maami koo wanaa yamiroore heyre, dum yamiroore nde kebu-dēn gila arannde. <sup>6</sup> Ko woni jilli dee, haybude jamirooje Laamdo. Nden yamiroore woni nde kaan-don haybirde no nanir-don dum gila arannde nii. <sup>7</sup> Sabi majjinoobē heewbē caakike e aduna oo. Be njaaali Iisaa Almasiihu warii laatike neddō. Baado no maabēe nii fuu yo majjinoowo yo konnee-Almasiihu. <sup>8</sup> Kaybee ko'e mon, pati golle mo ngollu-don oo mursee, kefon mbarjaari kiibundi. <sup>9</sup> Sabi mo jiiōaali e laawol Almasiihu ngol, walanaa Laamdo. Niibudo e maggol ana woodani Baabiraado e Bajjo oo fuu. <sup>10</sup> So won gardō e mon ana waajoo ko waldaa e laawol ngol, pati njabēe dum e ley galleeji mon, pati fay njowtee dum. <sup>11</sup> Sabi jowtudo mo fuu, kajum e makko laatike gootum.

### *Baynondiral*

<sup>12</sup> Ko kaan-mi haalande on koo ana heewi, mi yidaa winndande on dum fuu e derewol. Kaa mido yeloo warde to mon, kaalden hunduko e hunduko, yalla seyo men ana hiibba.

<sup>13</sup> Haya, 6iibbe sakiike maa debbo mo Laamdo subii oo ana njowte.

---

\* **1:1** Debbo teddudo oo e 6iibbe mum yo deental goondinbē gootal.

## Bataaki Yuhanna tataō

<sup>1</sup> Miin mawdō deental goondinbē winndi oo bataaki faade e Gayus sakiike am korsudo mo njidir-mi goonga oo.

<sup>2</sup> Sakiike am korsudo, mido yeloo kebaa neema e cellal, no hakkille maa deeyiri e Laamđo nii. <sup>3</sup> Hee mi seyike nde yoga e sakiraabē ngari kaalani kam no tiinnori-daa e goonga e no njokkir-daa mo nii. <sup>4</sup> Seyo fuu buranaa kam ko nan-mi biibē am ana njokki goonga oo koo.

### *Haala ballalfaade e sakiraabē*

<sup>5</sup> Sakiike am korsudo, golle lobbo mo ngollantaa sakiraabē bēe, fay bē a anndaa bēe,\* ana hollita a koolniido. <sup>6</sup> Be kaalii haala jilli maa yeeso deental goondinbē. So a jokkii yoobinde bēe ko bēe kasindini e laawol maabēe, no hawrita e muuyde Laamđo nii, a wadan ko moyyi. <sup>7</sup> Sabi kambe, saabe Almasiihu bēe immorii laawol ngol. Be ndardaali yimbē bēe ngoondinaali Iisaa bēe fay huunde. <sup>8</sup> Ndennoo, enen goondinbē Iisaa, eden kaani wallude hono been yimbē, yalla eden ngollida e maabēe goonga.

### *No Diyoterefes e Demeteriyus ngorri*

<sup>9</sup> Won ko mbinndu-mi faade e deental goondinbē ngal, kaa Diyoterefes, muuydo ardinde hoore mum oo, jabantaa kam. <sup>10</sup> Saabe dum, so mi warii, mi hollan ko o wadata koo e no o bonkortoo min nii. Wanaa dum tan: o jaabataako sakiraabē hobbe bēe, kasen duu yidubē jaabaaade bēe bēe, o hadan dum, o ribba dum'en e deental goondinbē ngal.

<sup>11</sup> Sakiike am korsudo, pati nemmbu ko boni, nemmbu ko moyyi. Gadoowo ko moyyi fuu yo neddo Laamđo. Gadoowo ko boni anndaa Laamđo. <sup>12</sup> Demeteriyus yo neddo lobbo sabi omo jiiibi e goonga. Yimbē fuu ana kaala haala makko lobba. Minen duu, minden njabi dum, ada anndi seedaaku amen yo goonga.

### *Bay nondiral*

<sup>13</sup> Ko kaan-mi haalande ma koo ana heewi, mi yidaa winndude dum fuu e derewol. <sup>14</sup> Mido yeloo yiide ma ko 6adii, kaalden hunduko e hunduko.

<sup>15</sup> Gidiraabē maa wonbē doo bēe ana njowte. Mido jowta gidiraabē bēe fuu, gooto gooto. Aan e jam!

---

\* <sup>1:5</sup> Sakiraabē bēe yo saakoo bēe Kabaaru Lobbo oo.

## Bataaki Yahuuda

<sup>1</sup> Oo bataaki ga am iwri, miin Yahuuda, maccudo Iisaa Almasiihu mi mijii Yaakuuba. Mi jowtii on, onon noddaa**be** horsu**be** e Laamdo Baabiraado men bee, onon reena**be** faa gartol Iisaa Almasiihu. <sup>2</sup> Yo Laamdo hebbin e mon yurmeende mum e jam mum e jilli mum!

*Jeertaango dow jannginoobefenoobe*

<sup>3</sup> Sakira**be** am horsu**be**, mido yidunoo faa sanne winndande on banngal kisindam dam ndeentu-den e mum en fuu dam. Kaa jooni mi yii ana tilsi mi winnda faa mi suusina on kabano-don laawol goondinal dokkaangal senii**be** fuu cilol gootol keyoowol yimbe jamaanuuji dii fuu. <sup>4</sup> Sabi won soori**be** e deental ngal, **be** jukkungo mum'en winndaa gila ko booyi. **Be** yeddoofe Laamdo, **be** wayliotoobeyoyere Laamdo ndee faa laatoo yamiroore njaahilaaku, **be** yeddoofe Joomiraado men Iisaa Almasiihu Kalfaa**do** men gooto oo.

<sup>5</sup> Jooni, mido yidi miccintinde on dum doo, fay so taweede on kumpitaama faa laa**bi**: ko Joomiraado danndi yimbe mum to leydi Misira too koo, o sakitike halkude **be** ngoondinaali e ley ma**bb**e bee. <sup>6</sup> Miccitoro-don duu no yoga e malaa'ika'en bee keddaaki do njamiranoо doo nii, ko **be** ngadi dee, **be** njoppu darde ma**bb**e. Saabe dum Joomiraado heddi **be** ley nimre faa kiiti jaannde darngal, geyyii **be** geyyelle duumiide. <sup>7</sup> Kasen duu, Sodooma e Gomoora e geelle pilii**de** dum'en ngadiri njaahilaaku no malaa'ika'en bee ngadiri nii, de nguurdino e tuuyooji di kaanaa waadeede. E ley dum de laatanike yimbe fuu jeertaango jukkungo yiite duumiinge ngee.

<sup>8</sup> Dum e taweede, soori**be** e mon tuugi**be** ko njii e ley koydi mum'en bee, ana sobina caldi mum'en, ana koyna hooreyaaku Joomiraado, ana mbonkoo teddu**be** won**be** dow kammu bee. <sup>9</sup> Jaka fay Miikaa*iilu*, mawdo malaa'ika'en oo, bonkaaki Ibilisa nde **be** nduddunoо banngal ireede tew Muusaa oo ndee. O jaabaali bonkaade Ibilisa faa o wullanoo dum, ko o wii dum dee: «Yo Joomiraado huite.» <sup>10</sup> Kaa been yimbe ana mbonkoo kudde de **be** anndaa dum'en, ko **be** anndi koo jaati woni ko halkata **be**. Dum woni tuuyooji ma**bb**e, ana wa'i hono tuuyooji daabaaji ladde nii. <sup>11</sup> Kaari! **Be** njokkii laawol Kaabiila.\* **Be** ngadii ko'e ma**bb**e e majjere Balaama,<sup>†</sup> yalla ebe keba jawdi. **Be** kalkoto e murtugol ma**bb**e no Koora<sup>‡</sup> halkorii nii. <sup>12</sup> Kambe ngoni ella kawrital jaamdu moodon, sabi ayi**be** be jaamirta, kasen duu ko'e ma**bb**e tan **be** killaa. **Be** duule de ngalaa ndiyam de kenuuli coggata, **be** ledde yaawnde de ngalaa ko tebetee, doofaade, baatude fey. <sup>13</sup> Ebe yufina gacce ma**bb**e no bempeeje geeci piyotoode yufinirta ngufo nii, **be** koode jiilotood**de**, nimre burnde fuu ni**bb**ude **be** ndesanaa faa abada.

<sup>14</sup> Henok taanii Aadama jeddab*o* oo sappinoke kabaaru ma**bb**e gila ko booyi, wii:  
«Yeewee Joomiraado ana warda e malaa'ika'en mum senii**be** ujunaaji ujunaaji

<sup>15</sup> faa sara yimbe fuu.

O holllitan bon**be** bee golle mum'en fuu no foti bonde,  
o holllitan **be** geddi fuu di been luuttoobeyeddoofe Laamdo kaali.»

<sup>16</sup> Been yimbe yo bonnoobeyoyere, woytotoo**be**, jokkoobeyidaade yonki mum'en, ebe mantoo, ebe mana wobbe yalla ebe keba ko **be** njidi.

*Haala ni**bb**ude nguurndam dow goondinal*

<sup>17</sup> Kaa onon sakira**be** am horsu**be**, miccitetee konngi di nelaab*be* Joomiraado men Iisaa Almasiihu bee cappinoo dii. <sup>18</sup> Nii **be** mbiiri on: «E cakite jamaanu, jaayroob*be* yimbe, jokku*be* gidaade yonki mum'en bonde ngaroyan.» <sup>19</sup> Kambe ngoni seenndoob*be* yimbe, miiloogi adunankooji **be** njogii, Ruuhu Laamdo oo walaa e ma**bb**e. <sup>20</sup> Kaa onon sakira**be** am horsu**be**, maheeh nguurndam mon dow goondinal moodon cattungal senaade ngal, keddee e naagaade Laamdo e dow baawde Ruuhu Ceniido. <sup>21</sup> Keddee e jilli Laamdo tawa odon ndoomti yurmeende Joomiraado meeden Iisaa Almasiihu naboire on to nguurndam nduumiidam. <sup>22</sup> Njurmee yoga yimbe won**be** e sikke,<sup>23</sup> ndiwttee yoga ma**bb**e iwde e yiite, ndannond **be**. Wobbe bee noo, njurmoro-don **be** e dow jeertagol, nefon fay saaya ka terde ma**bb**e commi kaa.

24-25 Laamdo ana waawi reenude on e tarataraade, ana waawi darnude on yeeso teddeengal mum, tawee jinjoore walaa e mon, on seyi*be*. Yo teddeengal e mangnu e semmbe e laamu ngoodan mo, kanko Laamdo gooto kisinirdo e Iisaa Almasiihu Joomiraado meeden oo, gila huunde fuu tagaaka faa jooni, faa abada abadin. Aamin!

\* **1:11** Kaabiila yo bardo mijnum Haabiila. † **1:11** Yeew 2 Piyeer 2.15 ‡ **1:11** Gorko biyeteedo Koora murtini yimbe Israa'iila nde Muusaa haybannoo **be** ley ladde ndee.

## Banngingol ngol Iisaa Almasiihu 6annginani Yuhanna

<sup>1</sup> Dewtere ndee ana moo&gt;ti kulle de Iisaa Almasiihu 6anngini. Laamdo 6annginani mo dee kulle faa o holla maccube mum bee ko warata booyataa. Iisaa neli malaa'ika mum faa humpita dum maccudo makko Yuhanna. <sup>2</sup> Oon duu seettiima huunde fuu ko yii, dum woni, o haalii konngol Laamdo ngol, o seedii e dow Iisaa Almasiihu oo huunde fuu ko o yii. <sup>3</sup> Neddo fuu janngudo ndee dewtere annabaaku welii hoore. Neddo fuu kettiniido nde so jokki ko winndaa e mayre koo welii hoore, sabi wakkati mo kulle dee ngadata oo gadiima.

### Misaalu faade e deente goondin&be jeddi

<sup>4</sup> Miin Yuhanna winndi oo doo bataaki faade e deente jeddi goondin&be gonde e leydi Asiya dee. Yo on kebu moyyere e jam iwde e Laamdo goodudo, goodunoodo, garoowo oo, iwde e ruuhuji jeddi gondi e yeeso bimmbeere makko laamu ndee dii, <sup>5-6</sup> iwde e Iisaa Almasiihu, seedee koolniido e dow kulle dee oo, arano e wuurtineede hakkunde maaybe, laamiido kaanankoofe aduna oo.

Yo teddeengal e baawde ngoodan Iisaa faa abada, kanko yidi en so o yuppi yiyyam makko, o tonngiti en iwde e tonngodee luuttal, o wadi en jeyaa&fe e laamu, o wadi en yottino&fe sadaka faa ngollanen Laamdo Baabiraado makko oo! Aamiina.

<sup>7</sup> Taykee, omo wara e duule.

Yimbe fuu njiyan mo,  
fay yuwnoo&fe mo bee,  
lepi aduna fuu curjan saabe makko.

Hono non laatortoo! Aamiina.

<sup>8</sup> Joomiraado men Laamdo, goodudo, goodunoodo, garoowo, Jom Baawfe oo, wii:  
—Miin woni arano, miin woni cakito.

### No Yuhanna yiiri Almasiihu ana tediniree

<sup>9</sup> Miin woni Yuhanna sakiye mon deentudo e mon torraaji, deentudo e mon laamu Iisaa Almasiihu, e mujidiido e mon mujal makko. Mi ribbanooma yaade ruunde wiyeteende Patamos saabe ko mbaajii-mi konngol Laamdo ngol e ko ceedanii-mi Iisaa koo.

<sup>10</sup> E ley Nalaande Joomiraado ndee, \* keew-mi Ruuhu, nan-mi caggal am daande tekkunde no daande buutatal nii <sup>11</sup> ana wiya:

—Ko njiyatataa koo, wadu dum dewtere, neldaa nde deente goondin&be jeddi dee: deental Efeesunkoo&fe e deental Simirnankoo&fe e deental Pergamenkoo&fe e deental Tiyatrankoo&fe e deental Sardesankoo&fe e deental Filadelfinkoo&fe e deental Lawdikiyankoo&fe.

<sup>12</sup> Njeysi-mi yalla mido yiya kaaldoowo e am oo, njii-mi moottilaaji kanjne jeddi, <sup>13</sup> nanndoore neddo ana hakkunde majji, ana foornii saaya, ana ha&66i ganndilaawol kanjne e beccce mum. <sup>14</sup> Lee&fe hoore makko ana ndawni far no haabu, naa no firaafad nii, gite makko ana njaaynira no metangal yiite nii, <sup>15</sup> koyde makko ana delkira no jakawalle jalbirta so wadaama e yiite faa wojji coy nii, kasen duu daande makko ana wa'i no dillere ndiyam keewdam nii. <sup>16</sup> Omo jogii e junngo makko jaamo ngoo koode jeddi, kaaafaawi ki banngheeji mum didi fuu mbeli ana yalta e hunduko makko, yeeso makko ana delkira no naange jalbirta hakkunde naange nii.

<sup>17</sup> Nde njii-moo-mi ndee, caamu-mi yeeso makko mbaa-mi no maayo&do nii. O fawi junngo makko jaamo e am, o wii:

—Pati hul! Miin woni arano, miin woni cakito, <sup>18</sup> miin woni guurdo oo. Mi maayiino, kaa mido nii wuuri faa abada. Miin jogii baawde dow maayde e baawde dow laakaraa. <sup>19</sup> Ndennoo, winndu ko njiyatataa koo, dum woni ko wafata jooni koo e ko waroya caggal mum koo. <sup>20</sup> Annii sirri koode jeddi de njiyatataa e junngo am jaamo dee, kajum e moottilaaji kanjne jeddi: koode jeddi dee yo malaa'ika'en deente goondin&be jeddi dee, moottilaaji kanjne jeddi dii yo deente goondin&be jeddi dee.

## 2

### Haala bataakiji faade e deente goondin&be jeddi

#### Bataaki faade e Efeesunkoo&fe

1 —Winndu faade e malaa'ika deental goondin&be won&fe Efeesu, mbiyaa:

\* <sup>1:10</sup> Nalaande Joomiraado ndee woni jannde alan.

«Annii haalaaji jogiido koode jeddi e junngo mum jaamo, jahoowo hakkunde moottilaaji kanjne jeddi:

<sup>2</sup> Mido anndi golleeji maa e mujal maa ley tampere. Mido anndi a hokkataa bonbe 6ee laawol, a itti koro innditirteebe nelaa6e bee a tawii 6e fenoobe. <sup>3</sup> A jom mujal, a torraama saabe innde am, dum e taweede yonki maa jawaali. <sup>4</sup> Kaa mido felire dum doo: a yoppii jilli maa di njogino-daa arannde dii. <sup>5</sup> Ndennoo miccita no ngorrungo-daa gila a saamaali. Tuubu, ngollirua no ngollirno-daa arannde nii! So wanaa dum, so a tuubaali, mi waran e maa mi itta moottila maa e nokku mum.

<sup>6</sup> Kaa mido yarrani maa dum doo: ada wajj golleeji jokku6e Nikola no mbajir-mi di nii. <sup>7</sup> Jogiido noppo fuu, yo nanu ko Ruuhu haalanta deente goondinbe dee koo! Jaaliido fuu, mi hokkan dum jaamde 6i66e lekki nguurndam ndariiki e alienenne Laamdo kii.»

#### *Bataaki faade e Simirnankoo6e*

<sup>8</sup> — Winndu faade e malaa'ika deental goondinbe wonbe Simirna, mbiyaa:

«Annii haalaaji biyeteedo arano e cakito, maaynoodo so wuurti oo:

<sup>9</sup> Mido anndi torra maa e baasal maa, tawee nee a arsukunte. Mido anndi bonnoobe innde wiyoobe e ko'e mum'en 6e Yahuudiyanikoobe tawee be nganaa. Ko fe ngnoni dee, 6e deental rewoofe Iibiliisa. <sup>10</sup> Pati hul torra dadii6o hewtude ma. Tayka, yoga mon Iibiliisa wedoto dum ley kasu faa tewta seyttaade on. On torrete balde sappo. Yo a laato koolniido faa maayde tawe hen, mi hokke teddeengal gondungal e nguurndam nduumiidam. <sup>11</sup> Jogiido noppo fuu, yo nanu ko Ruuhu haalanta deente goondinbe dee koo! Jaaliido fuu, maayde didobere ndee memataa dum fey.»

#### *Bataaki faade e Pergamenkoobe*

<sup>12</sup> — Winndu faade e malaa'ika deental goondinbe wonbe Pergame, mbiyaa:

«Annii haalaaji jogiido kaafaawi ki bangjeeji mum didi fuu mbeli:

<sup>13</sup> Mido anndi nokku do kofu-daa, do Iibiliisa laamii doo. Ada tiidi e innde am, a yankiraali goondinal maa e am fay wakkati nde Antipas seede am koolniido oo waraa ley mon ndee, dum woni do Iibiliisa hodi doo. <sup>14</sup> Kaa won pelooje seeda de njogani-maa-mi: ada mujanma yimbe wonbe hakkunde mon nanndube e Balamaa. Kanko jaangini Balaka seyttaade Israa'ilankoo6e faa jeena kajum e jaamde tewuuji cakkanaadi tooruuji. <sup>15</sup> Nii, jokku6e yimbe Nikola ngorri hakkunde mon, jannde ma66e e golleeji ma66e fuu potu. <sup>16</sup> Ndennoo tuubu, so wanaa dum, mi waran e maa jooni, mi ha6ira e ma66e kaafaawi ngnoki e hunduko am kii. <sup>17</sup> Jogiido noppo fuu, yo nanu ko Ruuhu haalanta deente goondinbe dee koo! Jaaliido fuu, mi hokkan dum jaamdu suudiindu wiyeteendu e maanu, mi hokkan dum kaayel danewel binndaangel innde heyre nde fay gooto anndaa so wanaa dokkaad6o dum.»

#### *Bataaki faade e Tiyatirankoo6e*

<sup>18</sup> — Winndu faade e malaa'ika deental goondinbe wonbe Tiyatira, mbiyaa:

«Annii haalaaji 'Bii Laamdo mo gite mum njalbirta no metangal yiite, mo koyde mum delkirta no jakawalle jarnaado nii:

<sup>19</sup> Mido anndi golleeji maa e jilli maa e goondinal maa e ballal ngal ngadan-daa wob6e, kajum e mujal maa. Mido anndi golleeji maa cakitiidi dii 6uri aranndeeli dii heewde. <sup>20</sup> Kaa mido felire dum doo: ada mujanma Yesabel, oo debbo biyoowo hoore mum annabaajo. Omo hoomta maccube am omo jaangina dum'en fijirde e jaamde tewuuji cakkanaadi tooruuji. <sup>21</sup> Mi hokkii mo wakkati no mo tuubira, kaa o jaabaa6i tuubude iwde e fijirde makko ndee. <sup>22</sup> Saabe majjum mi wedoto mo dow leeso naawalla. Fijidoobe e makko fee duu, so tuubaali iwde e laawol makko ngol, torrete torraaji mawdfi, <sup>23</sup> mi halkan 6i66e makko duu. Deente goondinbe dee fuu anndan minn woni ittoowo koro hakkillaaji e gerde, kasen duu mi yogan gooto e mon fuu hakke golle mum. <sup>24</sup> Kaa onon Tiyatirankoo6e heddiibe 6e njokkaali ngol laawol 6ee, 6e ngolliraali ko yoga inndirta e sirriiji Iibiliisa luggi », mido wiya on: walaa donngal gonngal ngal pawan-mi e mon <sup>25</sup> so wanaa yo on tiidu e ko njogi-don koo faa nde ngar-mi fuu. <sup>26-28</sup> Jaaliife — dum woni wadoobe sago am faa timmoode fee — mi hokkan dum'en baawde de ke6u-mi e Baabiraado am dee, faa 6e ndurda jaaleji dii loocol naawngol, 6e pusira di no mahoovo loode fusirta loode nii. Mi hokkan 6e hoodere fajiri ndee duu. <sup>29</sup> Jogiido noppo fuu, yo nanu ko Ruuhu haalanta deente goondinbe dee koo! »

## 3

#### *Bataaki faade e Sardesankoo6e*

<sup>1</sup> — Winndu faade e malaa'ika deental goondinbe wonbe Sardes, mbiyaa:

«Annii haalaaji jogiido ruuhuji Laamdo jeddi e koode jeddi:

Mido anndi golleeji maa, ada wiyee a guurdo, tawee nee a maaydo. <sup>2</sup> Jeerta cemmbindinaa seeda mo njogi-daa oo gila waataali, sabi miawaali fay gooto e golleeji maa ana hi66i yeoso Laamdo am. <sup>3</sup> Ndennoo, miccita no ke6ir-daa e no nanir-daa Kabaaru Lobbo oo, tuubu ngolliraa mo. So a jeertaaki, mi wardan no gujjo nii, kasen duu a anndataa wakkati mo ngaran-mi ma66ude ma. <sup>4</sup> Kaa noo, ada jogii do Sardes doo yimbe 6e tuunninaali kaddule mum'en. Be 6oornotoo kaddule daneeje 6e njaada e am, sabi e6e kaandi hen. <sup>5</sup> Hono non, jaaliido fuu foornortoo kaddule daneeje. Abada mi tosataa innde mum e dewtere ngeurndam ndee. Mi seedoto omo jeydaa e am yeoso Baabiraado am e malaa'ika'en mum. <sup>6</sup> Jogiido noppo fuu, yo nanu ko Ruuhu haalanta deente goondinbe dee koo!»

*Bataaki faade e Filadelfinkoo6e*

<sup>7</sup> —Winndu faade e malaa'ika deental goondinbe won6e Filadelfi, mbiyaa:  
«Annii haalaaji ceniido goongirante, mo cokitirgal Daawuuda kaananke oo woni e junngo mum. So o udditi fay gooto uddataa, so o uddii fay gooto udditataa.

<sup>8</sup> Mido anndi golleeji maa. Tayka, mi udditi damal yeoso maa ngal fay gooto waawaa uddude. Aan e famduude semmbe fuu, a haybii konngol am, a yankiraala innde am. <sup>9</sup> Haya, mi neldeye jeyaa6e e deental rewo6e Ibilisa wiyo6e e ko'e mum'en 6e Yahuudiyan6oo6e tawee 6e fenoo6e, 6e nganaa. Mi dooldinan 6e ngara 6e cujidoya e koyde maa. Nden 6e paaman mi yidii ma. <sup>10</sup> Ko njamir-maa-mi mujaa koo, a mujii sanne. Saabe dum, mi reenete e wakkati nde 6illaare warata horde aduna faa itta koro yimbe fuu. <sup>11</sup> Mi 6adike warde. Tiidu e ko njogi-daa koo pati fay gooto teeta deesewal maa jaalogal. <sup>12</sup> Jaaliido fuu, mi wadan dum nuygal ley suudu Laamdo am seniindu, o yaltataa e mayru abada. Mi winndan e mum innde Laamdo am e innde ngalluure Laamdo am, dum woni Urusaliima keso iwoowo dow kammu to Laamdo am so jippoo oo, mi winndan e mum innde am heyre ndee. <sup>13</sup> Jogiido noppo fuu, yo nanu ko Ruuhu haalanta deente goondinbe dee koo!»

*Bataaki faade e Lawdikiyankoo6e*

<sup>14</sup> —Winndu faade e malaa'ika deental goondinbe won6e Lawdikiya, mbiyaa:  
«Annii haalaaji biyeteedo Aamiina oo, seedeet koolniido goongirante, layli tagoore ndee fuu:

<sup>15</sup> Mido anndi golleeji maa, a wulaa a buuba. Yo a laato guldo naa buubudo! <sup>16</sup> Nde wonnoo ada forri a wulaa a buuba, mi tuttete iwde e hunduko am. <sup>17</sup> Ada wiya: «Mi galoo, mi moo6tii jawle, mi hasindinaa e fay huunde. » Tawee nee, a anndaa a jaaddo hoore a jurminifiido a baasudo a bumdo a koldo! <sup>18</sup> Mido waaje: soodoo e am kanje la66iniraado yiite, yalla ada heba jawdi, coodaa e am kaddule daneeje 6oorno-daa, yalla ada suura hersa terde maa bole dee, coodaa e am nebam ngeujaa gite maa yalla jiile maa ana laa6a. <sup>19</sup> Miin, mido fela mido ne'a yimbe 6e njidu-mi. Ndennoo, darana ko moyyi, tuuba! <sup>20</sup> Hettina, mido nii darii e damal mido salmina. Neddo fuu nando daande am so udditi, mi naatan galle mum, mi naamda e mum. <sup>21</sup> Jaaliido fuu, mi hokkan dum jooddadae e am dow bimmbeere am laamu, no miin duu njaalorii-mi so njooddi-mi e Baabiraado am dow bimmbeere mum nii. <sup>22</sup> Jogiido noppo fuu, yo nanu ko Ruuhu haalanta deente goondinbe dee koo!»

## 4

*Haala damal udditiingal dow kammu*

<sup>1</sup> Caggal dum, njii-mi damal ana udditi dow kammu. Daande nde nanunoo-mi arannde wa'unde no buutatal nii ana haalda e am, ana wiya:

—Nabbu ngaraa doo, faa mi holle ko haani laataade caggal dum doo.

<sup>2</sup> Don e don, keew-mi Ruuhu, njii-mi bimmbeere laamu to dow kammu too, neddo gooto ana joo6ii dow mayre. <sup>3</sup> Joodiido oo, mbaadi mum ana jalgira no haayre yaspa, ana wojjitira no haayre sardis, ciib6o-ciisongal ana filii bimmbeere ndee ana jalgira no haayre emerooda nii. <sup>4</sup> Bimmbeere ndee, bimmbeere laamu noogay e nay ana pilii nde, mawbe noogayon e nayon ana njoodii dow majje, ana 6oornii kaddule daneeje, tenngaade cajiraade kanje ana e ko'e ma66e. <sup>5</sup> Maje e sawtuuji e gidaali ana njalta e bimmbeere laamu ndee, cunkume jeddi ku66ooje ana yeoso mayre doo, deen ngori ruuhuji Laamdo jeddi dii. <sup>6</sup> Ko wa'i hono weendu laabundu tal nanndundu e timtorgal ana fooccii yeoso mayre.

Kudde nay guurde jogiide gite keewde yeoso e caggal fuu, ana hakkunde mayre e sera mayre. <sup>7</sup> Huunde wuurnde aranndeere ndee ana wa'i no rawaandu ladde nii, didobere ndee ana wa'i no ngaari nii, tato6ere ndee, yeoso mum ana wa'i no yeoso neddo nii, nayobere ndee ana wa'i hono no ciial diwooval nii. <sup>8</sup> Wootere e kudde nay guurde dee fuu

ana jogii biifoole jeegom, wootu fuu ana jogii gite keewde ley e dow fuu. Jemma e jaalooma fuu de celataa e yimde, ede mbiya:

«Ceniido, Ceniido, Ceniido

yo Joomiraado Laamdo Jom Baawde,  
goodunoodo, goodudo, garoovo oo!»

<sup>9</sup>Kudde nay guurde dee ana njimana joodiido dow bimmbeere laamu, guurdo faa abada oo, jime teddungal e darja e jettooje. <sup>10</sup>Nde 6e ngadata dūm fuu, mawbe noogayon e nayon bee kippoto e leydi yeeso joodiido e bimmbeere oo, cujidana guurdo faa abada oo, njoyyina tenngaadē mum'en yeeso bimmbeere ndee, mbiya:

<sup>11</sup> «Joomiraado amen, Laamdo amen,  
aan haandi e hebude darja e teddungal e baawde,  
sabi aan tagi kulle dee fuu  
e muuyde maa de laatorii, de tagiraa.»

## 5

### *Haala dewtere Laamdo e kaando udditinde nde*

<sup>1</sup>Caggal dūm, njii-mi e jungeo jaamo joodiido dow bimmbeere laamu ndee oo dewtere nde dow mum e ley mum winndaa, uddiraande pedoode jeddi maandude. <sup>2</sup>Non njii-mi malaa'ika jom semmbe ana ooynoo e daande toownde, ana wiya:

—Homo haandi e fettude pedoode dee uddita dewtere ndee?

<sup>3</sup>Fay gooto walaa dow kammu walaa dow leydi walaa ley leydi kaando udditidde dewtere ndee naa yeewde ley mayre. <sup>4</sup>Ngullu-mi gullaali cattudi, sabi hebaaka kaando udditidde dewtere ndee naa yeewde ko woni e mayre. <sup>5</sup>Non gooto e mawbe 6ee wii kam:

—Pati woy! Rawaandu ladde haliindu jeyaandu e suudu baaba Yahuuda nduu, iwndu e Daawuuda nduu, jaalike. Endu waawi fettude pedoode jeddi dee, ndu uddita dewtere ndee.

<sup>6</sup>Nden njii-mi Njawdiri ana darii hakkunde bimmbeere ndee, kudde nay guurde dee e mawbe 6ee ana pilii ndi. Endi nanndi e kirsanoondi. Endi jogii luwe jeddi e gite jeddi, dūm woni ruuhuuj Laamdo jeddi neleteedi e aduna oo fuu dii. <sup>7</sup>Ndi yehi nannoyde dewtere ndee e jaamo joodiido dow bimmbeere ndee oo. <sup>8</sup>Ko ndi nanngi dewtere ndee koo, kudde nay guurde dee e mawbe noogayon e nayon bee cujidi yeeso mayri. Gooto e maabbe fuu ana jogii hoddoo e urduke kanjeeere heewnde urdi, dūm woni duwaauuji seniibbe 6ee. <sup>9</sup>Hedde ebe njima jimol kesol ebe mbiya e maggol:

«Aan haani 6amde dewtere ndee

pettaa pedoode mayre,  
sabi a hirsanooma,  
a soottitanike Laamdo yimbe  
e suudu baaba fuu e demngal fuu e jaalejol fuu e lejol fuu,  
yiyam maa coottitori-daa 6e,  
yalla ebe tawdee e Laamdo.

<sup>10</sup>A wafii 6e kaanankoo6e e yottino6e sadaka Laamdo meeden oo,  
6e laamoo aduna oo.»

<sup>11</sup>E ley holleede am, nan-mi daade malaa'ika'en heewbe, ujunaaji ujunaaji. Ebe pilii bimmbeere ndee e kudde guurde dee e mawbe 6ee, <sup>12</sup>ebe njima ebe toowna daade maabbe:  
«Njawdiri kirsanoondi ndii

ana haandi e hebude baawde e jawdi  
e hakkilantaaku e semmbe  
e teddungal e darja e jettooje!»

<sup>13</sup>Non nan-mi huunde fuu ko tagaa ko woni dow kammu e ko woni dow leydi e ko woni ley leydi e ko woni dow geeci e ko woni e mum'en fuu, ana wiya:

«jettooje e teddungal e darja e baawde  
ngoodanii joodiido dow bimmbeere ndee oo  
e Njawdiri ndii faa abada!»

<sup>14</sup>Kudde nay guurde dee njaabii:  
—Aamiina!

Mawbe 6ee duu, kippii e leydi cujidani 6e.

## 6

### *Pedoode jeddi*

#### *Haala fettugol fedoode arandeere: jaalogal*

<sup>1</sup>Oon wakkati, yeew-mi non njii-mi Njawdiri ndii fettii wootere e pedoode jeddi dee. Nan-mi wootere e kudde nay guurde dee ana iidina daande mum no gidaango nii, ana wiya:

—War gaa!

<sup>2</sup> Yeew-mi, njii-mi puccu daneejo. Baddiido mo oo ana jogii laajal, o hokkaa tenngaade laamu, o yaari no jaalotoodo nii o jaaloto duu.

*Haala fettugol fedoode didobere: barondiral*

<sup>3</sup> Nde Njawdiri ndii fettunoo fedoode didobere ndee, nan-mi huunde didobere ndee ana wiya:

—War gaa!

<sup>4</sup> Non puccu goddo bodeejo yalti. Baddiido mo oo hokkaa kaafaawi mawki, o hokkaa baawde yalla omo itta jam e aduna oo, faa yimbe mbarondira.

*Haala fettugol fedoode tatober: tiidalla*

<sup>5</sup> Nde Njawdiri ndii fettunoo fedoode tatober: ndee, nan-mi huunde wuurnde tatober: ndee ana wiya:

—War gaa!

Njii-mi puccu baleejo. Baddiido mo oo ana jogii peesorgal e junngo mum. <sup>6</sup> Nan-mi ko wa'i no daande neddo iwii hakkunde kudde nay guurde dee, ana wiya:

—Munnabi alkama naa munnabijje tati gawri waarata e njoödi golle jalooma. Kaa pati mursee nebam dam e peguujam dam.

*Haala fettugol fedoode nayobere: maayde*

<sup>7</sup> Nde Njawdiri ndii fettunoo fedoode nayobere ndee, nan-mi daande huunde wuurnde nayobere ndee, ana wiya:

—War gaa!

<sup>8</sup> Yeew-mi, njii-mi puccu oolo. Baddiido mo oo ana wiye Maayde, laakaraa ana jokki e makko. Be ndokkaa baawde dow nayobere aduna oo faa 6e mbarda yimbe kaafaawi e yolbere e albalaawuujji e daabaaji ladde.

*Haala fettugol fedoode joyobere: wardaafe saabe seedaaku mum'en*

<sup>9</sup> Nde Njawdiri ndii fettunoo fedoode joyobere ndee, njii-mi to ley ittirde sadaka too yonkiiji wardanoobe saabe konngol Laamdo ngol e seedaaku mo 6e ceettii oo. <sup>10</sup> Be eewnii faa toowi, 6e mbii:

—Joomiraado ceniido goongirante, faa mande ndoomu-daa sarde yimbe won6e e aduna oo bee faa njobjo-daa yiyan amen dam?

<sup>11</sup> Gooto e maabbe fuu hokkaa saaya ndaneewa, 6e mbiyaa 6e powta seeda tafon, faa adadu sakiraabe maabbe, gollidiibe maabbe fodanaabe wareede no maabbe nii bee, kiibba.

*Haala fettugol fedoode jeegobere: palooma mawdo*

<sup>12</sup> Nden njii-mi Njawdiri ndii fetti fedoode jeegobere ndee. Non leydi dimmbii dimmbagol manngol, naange ngee 6awliri no kaasa baleewa nii, lewru nduu fuu wojjiri no yiyan nii, <sup>13</sup> koode kammu dee caami e leydi no 6ibbe ibbe kecce caamirta so henndu mawndu wibbii. <sup>14</sup> Kammu oo iwi, taggiraa no daago taggirtee nii, kaaye e duude fuu doofaa iwde e nokkuuje mum'en. <sup>15</sup> Nden kaanankooibe aduna e yimbe teddu6e e hooree6e sordaasi'en e arsukunte'en e jom'en semmbe e rimbe e riimaybe fuu cuudii e loowi kaaye, kajum e hakkunde kaaye. <sup>16</sup> Hedde e6e mbiya loowi kaaye dii e kaaye dee:

—Caamee e amen! Cuudon min e gite joodiido dow bimmbeere laamu ndee oo, kajum e tikkere Njawdiri ndii! <sup>17</sup> Sabi jalooma mawdo tikkere maabbe ndee yottiima, homo waawi daafude?

## 7

*Haala yimbe 144 000 wadaabe maande Laamdo*

<sup>1</sup> Caggal dum, njii-mi malaa'ika'en nayon ana ndarii e paale nay dee. Be cakkii kenuuli aduna nay dii, pati mbifa wanaa e leydi wanaa e geeci wanaa fay e lekki. <sup>2</sup> Njii-mi kasen malaa'ika goddo iwrudo funnaange ana jogii gadırgal maande Laamdo guurdo oo ngal. O eewnii daande toownnde faade e malaa'ika'en nayon hokkaabe baawde torrude leydi e geeci. <sup>3</sup> O wii 6e:

—Pati mbonnee leydi ndii e geeci oo e ledde dee tafon, faa nde kebu-den waafude maandeeji e tilde maccube Laamdo meeden bee.

<sup>4</sup> Non nan-mi adadu wadaabe maande e dow tiide mum'en bee: e6e mbaara e ujunaaji teemedere e ujunaaji capande nayon e ujunaaji nayon (144 000) iw6e e cuudi Israa'ilankooibe bee dii fuu:

<sup>5</sup> iw6e e Yahuuda yo ujunaaji sappo e didon (12 000),

iw6e e Ruuben, ujunaaji sappo e didon (12 000),

iw6e e Gada, ujunaaji sappo e didon (12 000),

<sup>6</sup> iw6e e Asiira, ujunaaji sappo e didon (12 000),

iwþe e Naftali, ujunaaji sappo e didon (12 000),  
 iwþe e Manaasa, ujunaaji sappo e didon (12 000),  
<sup>7</sup> iwþe e Simeyon, ujunaaji sappo e didon (12 000),  
 iwþe e Lewi, ujunaaji sappo e didon (12 000),  
 iwþe e Isakar, ujunaaji sappo e didon (12 000),  
<sup>8</sup> iwþe e Jebulon, ujunaaji sappo e didon (12 000),  
 iwþe e Yuusufu, ujunaaji sappo e didon (12 000),  
 iwþe e Bejamin duu, ujunaaji sappo e didon (12 000),  
 cuudi baaba dii fuu ngadanaama maande.

*No yimþe lejni fuu njettirta Laamdo*

9 Caggal dum, yeew-mi, njii-mi jamaa keewdo mo limataako iwdo e yimþe lejol fuu e suudu baaba fuu e jaalejol fuu e demngal fuu ana darii yeeso bimmbeere laamu ndee e Njawdiri ndii. Eþe boornii saayaaji daneeji, caþe tamarooje ana e juude maþþe.<sup>10</sup> Eþe ilina, eþe mbiya:

—Kisindam dam to Laamdo men joodiido dow bimmbeere laamu ndee iwrata, kajum e Njawdiri ndii.

<sup>11</sup> Malaa'ika'en bee fuu pilii bimmbeere ndee, mawþe bee e kudde nay guurde dee fuu kippii e leydi ana cujidana Laamdo,<sup>12</sup> ana mbiya:

«Aamin!

Jettooje e darja e hakkilantaaku e jaaroje  
 e teddungal e baawde e semmbe,

fuu ngoodanii Laamdo meeden faa abada!»

<sup>13</sup> Non gooto e mawþe bee lamndii kam:

—Hobe ngoni see yimþe boorniibee saayaaji daneeji? Hoto 6e iwi?

<sup>14</sup> Mbii-moo-mi:

—Moobbo, aan woni anndudo.

O jaþoiti o wii kam:

—Kamþe ngoni iwþe e torra mawdo tawi eþe ndeenii. Be loonnii saayaaji maþþe, 6e ndawninirii dum'en yiyyam Njawdiri ndii.\* <sup>15</sup> Dum saabii so 6e keddoto yeeso bimmbeere laamu Laamdo ndee, 6e ndewa mo jemma e jalooma ley suudu makko seniindu nduu, kasen duu, joodiido e bimmbeere laamu ndee oo huuran e maþþe hukkum mum. <sup>16</sup> Be njolbataa, 6e domdataa, naange tappataa 6e, fay nguleefi ngooti yottataako 6e. <sup>17</sup> Sabi Njawdiri ngonndi e hakkunde bimmbeere laamu ndii duran 6e, juurna 6e e cewle ndiyam ndokkojam nguurndam. Laamdo soccan gondi gite maþþe fuu.

## 8

*Haala fettugol fedoode jeddöbere: deyyere mawnde*

<sup>1</sup> Nde Njawdiri ndii fettunoo fedoode jeddöbere ndee, kammu oo deyyinii teen ko waarata e feccere leer. <sup>2</sup> Non njii-mi malaa'ika'en njeddon dariiibee yeeso Laamdo 6ee ndokkaama buutute jeddi.

<sup>3</sup> Malaa'ika goddo jogiido urdude kanjeeere daroyii bannge ittirde sadaka. O hokkaa urdi keewndi faa o sakkodoo dum e duwaawuujii seniibee, o yottina di dow ittirde sadaka kanjeeere wonnde yeeso bimmbeere laamu ndee. <sup>4</sup> Cuurki uurdii ndii ñabbidi e duwaawuujii seniibee 6ee iwde e junngo malaa'ika dariido yeeso Laamdo oo. <sup>5</sup> Malaa'ika oo 6ami urdude ndee, hebbini nde yiite e ley ittirde sadaka ndee, wedii nde e leydi. Non gidaali e dillereeji ngadi, maje maji, kasen leydi dimmbii.

*Buutute jeddi*

<sup>6</sup> Caggal dum, malaa'ika'en njeddon jogiibee buutute jeddi 6ee lanndinanii fuufude de.

*Haala buutatal aranndeewal*

<sup>7</sup> Malaa'ika arano oo fuufi buutatal mum, non malumaluuje e yiite jillondiraange e yiyyam mbedaa e leydi ndii. Feccere tatoþere leydi ndii sumi, feccere tatoþere ledde dee sumi, kasen duu huðo hecco koo fuu sumi.

*Haala buutatal didobal*

<sup>8</sup> Malaa'ika didaþoo oo fuufi buutatal mum, non ko wa'i no waamnde haayre huþþoore nii wedaa e ley geeci. Tatoþere geeci oo laatii yiyyam,<sup>9</sup> tatoþere kudde guurde gonde e geeci dee mbaati, tatoþere laanaaji ndiyam dii kalkii.

*Haala buutatal tatoþal*

\* <sup>7:14</sup> Maanaa 6e ndawninirii saayaaji maþþe yiyyam, dum woni luutti maþþe fuu njaafaama.

<sup>10</sup> Malaa'ika tata&oacute; oo fuufi buututal mum, non koodal manngal ku&gt;sirooval no cunkumal nii iwi dow kammu oo, saami e tato&gt;bere maaje ka&gt;jum e cewle ndiyam. <sup>11</sup> Ngal koodal «Kaadeefi» wiyetee. Ngal haadini tato&gt;bere ndiyameejii dii kati, yim&gt;be heew&gt;fe maayi saabe diin ndiyameejii kaadudi.

### *Haala buututal nayo&gt;bal*

<sup>12</sup> Malaa'ika naya&gt;oo oo fuufi buututal mum, non tato&gt;bere naange e tato&gt;bere lewru e tato&gt;bere koode piyaa, faa gootel hen fuu tato&gt;bere mum ni&gt;ba, jemma e jaalooma fuu mbaasa tato&gt;bere fooyre mum'en.

<sup>13</sup> Caggal dum, njii-mi ciilal ana diwa dow mbeeyu, nan-mi engal eewnoo e daande toownde engal wiya:

—Yoo yoy! Yoo yoy! Bone woodanii yim&gt;be aduna nde malaa'ika'en taton heddi&gt;fe 6ee puufi buutute mum'en!

## 9

### *Haala buututal joyo&gt;bal*

<sup>1</sup> Malaa'ika joya&gt;oo oo fuufi buututal mum, non njii-mi hoodere iwii dow kammu saamii e leydi. Nde hokkaa cokitirgal bunndu ndu luggeefi mum walaa do haadi nduu. <sup>2</sup> Nde sotti bunndu nduu, non cuurki yalti e mayru no wuriya mawdo nii, ki ni&gt;bin naange e mbeeyu fuu. <sup>3</sup> Buureeti njalti e cuurki kii caakii e leydi, ndokkaa baawde torrude no jahe nii. <sup>4</sup> Di njamira pati di mbonna wanaa hudo wanaa ledde wanaa huunde fuu ko fudata e leydi, di torra yim&gt;be 6e maande Laam&gt;d&gt; walaa e tiife mum'en 6ee tan. <sup>5</sup> Di ndokkaa torrude 6ee yim&gt;be faa naawa lebbi joy, kaa dii ndokkaaka warde 6e. Torra majji ana wa'i hono naawalla nde yaare fidii neddo nii. <sup>6</sup> Ley diin lebbi, yim&gt;be muuyan maayde kebataa, yim&gt;be poodanto maayde, nde doga dum'en.

<sup>7</sup> Diin buureeti ana nanndi e pucci lanndinaniidi wolde. Ko wa'i no tenngaade cajiraade kanjne nii ana e ko'e majji, yeesooji majji ana mba'i no yeesooji yim&gt;be nii. <sup>8</sup> Edi njogii lee&gt;bi mbaadi no cukuli rew&gt;fe nii, niyye majji ana mba'i no niyye dawaadi ladde nii. <sup>9</sup> Ko wa'i no ganndeeye jamde nii ana e becce majji, soyfa biiffoole majji ana wa'i hono no wotorooji keewdi kabbaadi e pucci doganooji wolde nii. <sup>10</sup> Edi njogii lace jogiide kure no jahe nii, edi njogii yamiroore torrider yim&gt;be lace majji dee hakke lebbi joy. <sup>11</sup> Kaananke majji yo malaa'ika kawjotoodo bunndu ndu luggeefi mum walaa do haaci oo. Innde makko e ibaraninkoore Abaddon, e ley yunaninkoore Apolliyon, dum woni kalkoowo.

<sup>12</sup> Bone arano oo bettike. Tayka, boneeji didi ana ngara caggal makko kasen.

### *Haala buututal jeego&gt;bal*

<sup>13</sup> Malaa'ika jeega&gt;oo oo fuufi buututal mum, non nan-mi daande iwrii kam to luwe nay gonde e co&gt;buli ittirde sadaka kanjneere wonnde yeeso Laam&gt;d&gt; ndee, <sup>14</sup> ana wiya malaa'ika jeega&gt;oo jogiido buututal oo:

—Yoppitin malaa'ika'en nayon ha&gt;bbaabe to maayo manngo wiyeteengo Efarata.

<sup>15</sup> Laam&gt;d&gt; fodii yoppitingol malaa'ika'en nayon bee ndee hitaande e nduu lewru e oo jaalooma e oo wakkati jaati faa 6e lanndinoo warde tato&gt;bere yim&gt;be. <sup>16</sup> Mi nanii adadu konunkoo&gt;fe waddi&gt;fe pucci: 6e ujunaaji noogay cili ujunaaji sappo. <sup>17</sup> Annii no njiru-mi pucci dii e waddi&gt;fe bee e ley holleede am: ebe foornii kaddule jamde bodeeje nanndude e yiite, kajum e bulabulaaje e oole nanndude e sitti. Ko'e pucci dii ana wa'i no ko'e dawaadi ladde nii, yiite e cuurki e sitti ana njalta e kundude majji. <sup>18</sup> Dii balaawuuji tati, dum woni yiite ngee e cuurki kii e sitti oo, njalti e kundude pucci dii so mbari tato&gt;bere yim&gt;be. <sup>19</sup> Sabi semmbe pucci dii ana e kundude mum'en, ana fay e lace majji duu. Lace majji dee ana nanndi e boggi leydi, ede njogii ko'e, deen ko'e di ngaajirta yim&gt;be.

<sup>20</sup> Heddi&gt;fe ana nguuri caggal diin balaawuuji bee ana keddii tuubaali e kulle de ngolliri juude mum'en dee, 6e njoppaali sujidane seydaani'en, kajum e tooruujii kanjne e kaalisi e jakawalle e kaaye e ledde. Ebe cujidana diin tooruujii di njiyataas, nanataas, ndillintaako. <sup>21</sup> Be tuubaali iwde e war-hoore e mbojubaaku e fijirde e nguyka.

## 10

### *Haala malaa'ika jogiido dewtel*

<sup>1</sup> Caggal dum, njii-mi malaa'ika goddo jom semmbe ana iwa dow kammu ana jippoo. Omo foornii luurde, ciib-o-ciibongal ana tiimti hoore makko, yeeso makko ana delkira no naange jalbirta nii, korre makko ana mba'i no looci yiite nii. <sup>2</sup> Omo jogii e junngo makko dewtel uditiingel. O darni koyn gal makko jaamal dow geeci, o darni nanal dow njoorndi, <sup>3</sup> o eewnii daande toownde no rawaandu ladde uggitra nii. Nde o eewnii ndee, gidaali jeddi

njaabii.<sup>4</sup> Nde gidaali jeddi dii tilinoo haalde ndee, kosu-mi winndude, non nan-mi daande iwrii kam dow kammu, ana wiya kam:

—Pati winndu ko gidaali jeddi dii mbii koo, yo laato kumpa!

<sup>5</sup> Non malaa'ika mo njii-mi ana darii e gecci kajum e njoorndi oo hunci junngo mum naamo faa toowi,<sup>6</sup> hunorii Guurdo duumiido faa abada, tagudo kammu e ko woni e mum, tagudo leydi e gecci e ko woni e mum'en. Malaa'ika oo wii:

—Booyataa hankasen!<sup>7</sup> Kaa e ley balde de buututal malaa'ika jeddaabo ngal fuufata dee, Laamdo tabintinan anniya mum cuudinoodo. Dum laaorto no o haalanirnoo annabaabe gallanoobe mo bee nii.

<sup>8</sup> Non daande iwrunkonde kam dow kammu ndee wii kam kasen:

—Yaa 6amoy dewtel udditiingel gonngel e junngo malaa'ika dariido e gecci e njoorndi oo.

<sup>9</sup> Njaa-mi to malaa'ika oo, mbii-mi dum hokka kam dewtel ngel. O wii kam:

—Bamu ngel modaa ngel! Ngel welan e hunduko maa no njuumri nii, kaa ngel wulnan reedu maa taw.

<sup>10</sup> Nanngu-mi dewtel ngel e junngo malaa'ika oo, modu-mi ngel. Ngel weliri e hunduko am no njuumri nii, kaa reedu am wuli taw!

<sup>11</sup> Caggal dum, mbiyaa-mi:

—Ana tilsi mbaajo-daa ko Laamdo loowi e maa koo kasen e jaaleji keewdi e leji keewdi e demde keewde e kaanankooobe heewbe.

## 11

### *Haala seedaaku annabaabe didon*

<sup>1</sup> Ndokkaa-mi kudol eenndirgol, wiyyaa:

—Imma, eenndoy suudu Laamdo seniindu nduu e ittirde sadaka ndee, kiiso-daa rewoobee wonbe hen bee,<sup>2</sup> kaa pati eenndu daalaare mayru ndee, sabi nde hokkaama heefere bee. Be njabban ngeenndi ceniindi ndii ko waaraata e lebbi capande nay e didi.<sup>3</sup> Mi neloyan seedeer en am didon bee, be boornyo licce caakuui,<sup>\*</sup> be mbaajoto ko Laamdo loowi be koo hakke balde ujunere e teemede didi e capande jeegom.

<sup>4</sup> Been seedeer en didon ngoni jaytuunaaje didi e moottilaaji didi dariidi yeeso Joomiraado jom aduna oo.<sup>5</sup> Gajo fuu muuyodo torrude be, yiite yaltoyer e kundude annabaabe bee halka dum. Muuyodo torrude be, waajibi halkiree non.<sup>6</sup> Ee njogii yamiroore haafude kammu tobude e ley balde de be mbaajoto konngol Laamdo ngol e mum dee. Ee njogii yamiroore waylitinde ndiyameeji laatoo yiyyam, kasen duu ebe mbaawi jippinde e aduna oo sii balaawu fuu nde be muuyi fuu.

<sup>7</sup> Nde didon bee tilii e seedaaku mum'en oo fuu, taktakol jeyaangol e bunndu ndu luggeefi mum walaa do haadi nduu yaltan yana e maabbe, jaaloo be, wara be.<sup>8</sup> Tewuuji maabbe ngona e daalaare ngalluuure mawnde, do Joomiraado maabbe fejanoo e leggal bardugal doo. Nden ngalluuure ana nanndi e Sodooma<sup>†</sup> naa Misira.<sup>9</sup> Yimbe jaaleji fuu e cuudi baaba fuu e demde fuu e leji fuu njiyan tewuuji maabbe ko waaraata e paloomaaji tati e feccere jalooma, fay gooto be nduunantaako ira di ley yanaande.<sup>10</sup> Wonbe e aduna oo bee fuu mbeltoto e maayde maabbe ndee, faa wa'ana dum'en no iidi nii, hedde ebe ndokkondira dow weltaare. Sabi annabaabe didon bee torriino be sanne.<sup>11</sup> Kaa caggal jaloomaaji tati e feccere dii, fuufaango nguurndam iwngoo to Laamdo naati e maabbe, non be immitii be ndarii e koyde maabbe. Kulol manngol nanngi iyannoobe be bee fuu.<sup>12</sup> Daande toownde iwri be dow kammu, ana wiya be:

—Nabbee gaa!

Be nabbi dow kammu e ley lurde, waybe maabbe fuu keddi ana yeewa be.<sup>13</sup> E oon wakkati, leydi dimmbii semmbe wurjini sappobere ngalluuure ndee. Ujunaaji jeddi neddo halkii hen, heddiibe bee kuli, njabani Laamdo Jom kammu oo teddeengal.

<sup>14</sup> Tayka, bone didabo oo yawtii, bone tatabo oo ana wara fooyataa.

### *Haala buututal jeddaabol*

<sup>15</sup> Malaa'ika jeddaabo oo fuuif buututal mum, daade toowde nanaa dow kammu, ana mbiya:

—Laamuujii aduna oo fuu laatike laamu Joomiraado men kajum e Almasihu mum. O laamoto faa abada!

<sup>16</sup> Mawbe noogayon e nayon joodsiibe dow bimmbeeje yeeso Laamdo bee kippii e leydi, cuijidan Laamdo,<sup>17</sup> ana mbiya:

«Miden njette, Joomiraado Laamdo Jom Baawde,

\* <sup>11:3</sup> Maanaa be boornoo licce caakuuij woni hollude sunu hono rewbe boornotoobe kaddule cuddu nii. <sup>† 11:8</sup> Sodooma yo ngotiri e geelle didi de Laamdo halki saabe heewgol majje luutti. Yeew Puddoode 19.1-29

goodudo goodunoodo oo minden njette,  
sabi a gollirii baawde maa mawde dee,  
a tabintinii laamu maa.

<sup>18</sup> Heeferē bee yo tikkūē,  
kaa tikkere maa aan warii,  
wakkati mo carataa maaybē yonii,  
wakkati warii, mo barjoto-daa annabaabē gollanoobē ma 6ee,  
seniibē hulbē innde maa 6ee,  
teddubē e lo'ubē fuu,  
e wakkati mo kalkataa bonnoobē leydi 6ee.»

<sup>19</sup> Suudu Laamdo seniindu wonndu dow kammu nduu udditaa, keesuwal aadi ngal 6anngi e ley mayru. Maje maji, dillereeji e gidaali ngadū, leydi dimmbii, malumaluuje gutte caami.

## 12

### No kuungal waddi e debbo ḡaywudo

<sup>1</sup> Taagumansa kaayniido 6anngi dow kammu, dum woni debbo foorniido naange ana fawi koyde mum e lewru ana filkii pilkol koode sappo e didi. <sup>2</sup> O haamili, omo wulla saabe tampere e naawalla ḡataware. <sup>3</sup> Taagumansa goddo 6anngi dow kammu, dum woni kuungal bodewal manngal nanndungal e mboddi. Engaj jogii ko'e jeddi e luwe sappo, hoore fuu ana jogii tenngaade laamu. <sup>4</sup> Laaci maggal wuuwi tatoberē koode kammu, wedii dum e leydi. Ngal darii yeeso debbo ḡaywudo oo faa ngal moda 6iyiko nde o rimii dum.

<sup>5</sup> Non o rimi 6iddo gorko. Oon woni durdoowo lepi dii fuu loocol naawngol. Biddo oo diwtaa faade to Laamdo e bimmbeere mum laamu. <sup>6</sup> Debbo oo dogi yehi ley ladde, nokku do Laamdo moyyinannoo dum. O hayboyaa ton balde ujunere e teemedē didi e capande jeegom (1 260).

<sup>7</sup> Wolde wadi to dow kammu too. Malaa'ika biyeteedo Miika'a'ilu e malaa'ika'en mum kasi e kuungal ngal e malaa'ika'en mum, <sup>8</sup> ngal jaalaa, kanngal e malaa'ika'en maggal, <sup>9</sup> mursi nokku maabē gondo dow kammu too oo. <sup>9</sup> Ngal kuungal manngal nanndungal e mboddi ribbaama. Kanngal woni mboddi aranndeeri mbiyeteendi Ibiliisa naa Seydaani, ceytotoondi aduna oo fuu ndii. Ndi wedaama e leydi, kayri e malaa'ika'en mayri fuu.

<sup>10</sup> Non daande toownde iwri kam dow kammu, ana wiya:

«Jooni kisindam ðam war!

Jooni semmbe e Laamu Laamdo meeden ngari,  
laamu ana e hawju Almasiihu.

Sabi kalmotoodo sakiraabe meeden,  
kalmotoodo 6e to Laamdo jemma e ñalooma oo,  
ribbaama iwde dow kammu.

<sup>11</sup> Sakiraabē men 6ee libii mo saabe yiyyam Njawdiri ndii,  
kajum e dow haala seedaaku maabē,  
6e cubaaki nguurndam maabē e dow maayde.

<sup>12</sup> Saabe dum, kammu e hoðubē e mum fuu mbeltee!

Kaa leydi e geeci, bone woodanii on!

Sabi Ibiliisa jippiima e mon ana tikki tikkere mawnde,  
sabi ana anndi wakkati seeda heddanii dum.»

<sup>13</sup> Nde kuungal manngal nanndungal e mboddi ngal anndunoo wedaama e leydi ndee, ngal jokkitii debbo dimdo 6iddo gorko oo. <sup>14</sup> Debbo oo hokkaa biifoole ciilal manngal, faa mo diwira faade to nokku mo o moyyinanaa ley ladde oo, do o haybetee hakke duuþi tati e feccere, faa o reenoo e mboddi ndii. <sup>15</sup> Kuungal manngal ngal siryi ndiyam, ðam ili caggal debbo oo no maayo nii faa dam naba mo. <sup>16</sup> Kaa noo, leydi ndii faabii debbo oo, ndi aari hunduko mayri, ndi modi ndiyam dam kuungal ngal siryi ðam. <sup>17</sup> Kuungal manngal ngal tikkani debbo oo sanne, yehi haþoyde e ko heddi e iwdi debbo oo koo, dum woni dowtanniibē jamirooje Laamdo so tiidi e seettanaade Isaa. <sup>18</sup> Non Kuungal ngal\* darii e njaareendi danjeere geeci oo.

## 13

### Haala tak takol iwgol ley geeci

<sup>1</sup> Caggal dum, njii-mi tak takol jogiingol luwe sappo e ko'e jeddi ana yeenja iwde e geeci oo. Hoore fuu ana jogii tenngaade laamu. Inde bonkorde Laamdo ana mbinndaa e ko'e

\* <sup>12:18</sup> Kuungal ngal darii... E dereeji fooydi dii, yoga mbii: Ndarii-mi e njaareendi danjeere geeci oo.

dee fuu. <sup>2</sup> Taktakol ngol njii-mi ngol ana nanndi e ndo&u, koyde maggol ana wa'i no koyde taktakol mbiyeteengol ursa\* ngol nii, hunduko maggol ana wa'i no hunduko rawaandu ladde nii. Kuungal nanndungal e mboddi ngal hokki ngol baawde mum, bimmbeere mum laamu ndee, e baawde laamaade. <sup>3</sup> Hoore wootere e ko'e taktakol ngol ana wa'i hono ko barminanoo barmere waawnoonde warde dum, kaa barmere ndee sellinaama, faa dum haaynii won&e e aduna oo bee fuu, &e njokki e maggol. <sup>4</sup> Be cujidani kuungal ngal sabi ngal hokkii taktakol ngol baawde maggol laamaade. Kasen duu, &e cujidani taktakol ngol, e&e mbiyab:

—Homo nanndi e taktakol ngol? Homo waawi ha&bude e maggol?

<sup>5</sup> Taktakol ngol hokkaa haalde haalaaji mantordi bonkotoodi Laamdo, ngol hokkaa baawde laamaade lebbi capande nay e &is. <sup>6</sup> Ngol fuddi bonkaade Laamdo, engol bonkoo innde makko ndee, kajum e hoforde makko, dum woni &e hoforde mum'en woni dow kammu too bee. <sup>7</sup> Ngol hokkaa baawde ha&bude e seniibee bee, ngol jaaloo dum'en. Ngol hokkaa baawde laamaade suudu baaba fuu e jaalejol fuu e demngal fuu e lejol fuu. <sup>8</sup> Yimbe won&e e aduna oo bee fuu cujidanan taktakol ngol, dum woni neddo fuu mo innde mum tawaaka ana winndii gila e diidugol aduna oo e ley dewtere nguurndam ndee, dewtere Njawdiri kirsanoondi ndii.

<sup>9</sup> Jogiido noppo fuu, yo nanu! <sup>10</sup> Neddo fuu podanaado ha&beede so na&ee, ha&bete na&ee. Neddo fuu podanaado wardeede kaafaawi, wardete kaafaawi. Dum nee, waajibi yimbe Laamdo bee tawree mujal e hoolaare.

### *Haala taktakol iwgol e leydi*

<sup>11</sup> Caggal dum, njii-mi taktakol gonngol ana yalta e ley leydi. Engol jogii luwe didi nanndude e luwe &ii-mbaalu, kaa engol haaldanno hono no kuungal nanndungal e mboddi ngal nii. <sup>12</sup> Ngol golliri baawde taktakol aranndewol ngol barmere mum hosunoo warde dum so sellinaa ngol, fuu e dow yamiroore mum. Ngol dooldini yimbe aduna bee cujidana ngol. <sup>13</sup> Taktakol dida&ol ngol wadii kaayefiji mawdi, &amii faa ngol jippini yiite iwde dow kammu faa yottii leydi, yimbe fuu ana yeewa. <sup>14</sup> Ngol yojniri yimbe aduna kaayde de ngol hokkaa wa&bude e dow yamiroore taktakol aranndewol ngol. Engol tinnida yimbe aduna moyyina tooru nanndundu e taktakol barminiranoongol kaafaawi faa hosi waatude kaa ana wuuri ngol. <sup>15</sup> Ngol hokkaa baawde ngol wada yonki e tooru nduu faa ndu watti haalde e wa&dude faa neddo fuu mo sujidanaali ndu waree. <sup>16-17</sup> Taktakol ngol dooldini yimbe fuu yo kefu maande e juude mum'en jaame naa e tiide mum'en, yalla teddu&e e lo'ube, arsukunte'en e misikiina'en, rimbe e riimaybe, fuu ana ndonka soodude e soottude so tawraaka maande ndee. Maande ndee yo innde taktakol ngol naa limre innde maggol. <sup>18</sup> Do kaan-daa faamude doo annii: neddo fuu jom hakkille waawan faamude limre taktakol ngol, sabi limre ndee ana hawra e loomto innde neddo. Limre mayre yo teemede jeegom e capande jeegom e jeegom (666).

## 14

### *Haala jimol soottitanoobe bee, kajum e njawdiri ndii*

<sup>1</sup> Yeew-mi, njii-mi Njawdiri ana darii dow haayre Siyona ana wondi e yimbe ujunaaji teemedere e capande nay e nayon (144 000), &e innde mayri e innde Baabiraado mayri mbinndaa e tiide mum'en. <sup>2</sup> Nan-mi daande iwrii kam dow kammu wa'unde no dillere ndiyam keewdfam nii, no gidaango manngo nii. Daande nde nan-mi ndee ana wa'i no dillere fiyo&e kollu mum'en nii. <sup>3</sup> Been yimbe fuu ana njima jimol kesol yeeso bimmbeere Laamdo ndee e yeeso kusdfe nay guurde dee e yeeso mawbe bee. Fay gooto waawaano ekkitaa&de jimol ngol so wanaa yimbe ujunaaji teemedere e capande nay e nayon (144 000) soottitanoobe e aduna oo bee. <sup>4</sup> Been ngoni &e meedaali tuunninde ko'e mum'en bangal rewbe, sabi &e laabube. Ebe njokki e Njawdiri ndii do ndi waawi yaade fuu. Been ngoni soottitanoobe e hakkunde yimbe, yalla &e laatoo adiise fuu sakkeede Laamdo kajum e Njawdiri ndii, <sup>5</sup> kasen duu fenaande meedaali yaltude e kundude ma&be, &e ngalaa jinjoore.

### *Haala malaa'ika'en taton*

<sup>6</sup> Oon wakkati njii-mi malaa'ika goddo ana diwa dow mbeeyu, ana jogii Kabaaru Lobbo duumido oo, omo waajoo dum yimbe aduna oo, dum woni yimbe lejol fuu e suudu baaba fuu e demngal fuu e jaalejol fuu. <sup>7</sup> Omo eewnotonoo e daande toownde, omo wiya:

—Kulee Laamdo teddinon mo, sabi wakkati mo o sarata oo warrii. Cujidanee tagudo kammu e leydi e geeci e cewle ndiyam oo!

<sup>8</sup> Malaa'ika goddo dida&ol jokki e makko, ana wiya:

\* 13:2 Ursu yo taktakol manngol, takkere maggol ana mawni, engol jogii leebi e koolde mawde.

—Nde halkiima! Baabila ngalluure mawnde ndee halkiima! Nde sigirinii lepi dii fuu fijirde mayre bonnde.

<sup>9</sup> Malaa'ika goddo, tatabo, jokki e ma66e ana eewnoo daande toownde, ana wiya:

—Neddo fuu cujidiani taktakol ngol e tooru nanndundu e maggol nduu, ke6udo maande maggol e tiinde naa e junngo, <sup>10</sup> waajibi joomum yara peguujam tikkere Laamdo dam, njuppaadam tawi jillaaka e ley horde loonde tikkere makko. Joomum jukkete e ley yiite e sitti yeeso malaa'ika'en seniibe bee e yeeso Njawdiri ndii. <sup>11</sup> Cuurki jukkungo ma66e duumoto faa abada, ee kefataa fowtere jemma e palooma fuu. Sabi 6e cujidiani taktakol ngol e tooru nanndundu e maggol nduu, 6e kefii maande innde maggol.

<sup>12</sup> Dum nee, waajibi yimbe Laamdo bee tawree mujal. Been ngoni haybu6e jamirooje Laamdo so ngoondini Iisaa bee.

<sup>13</sup> Oon wakkati nan-mi daande ana iwra kam dow kammu, ana wiya:

—Winndu dum doo: gila jooni, maayoob6e saabe gollande Joomiraado bee mbelii hoore.

Ruuhu oo wii:

—Goonga! Be 6oottinoyto iwde e tampere ma66e ndee, sabi barke golleeji ma66e jokkan e ma66e.

### *Haala wakkati kettal aduna*

<sup>14</sup> Yeew-mi, njii-mi luurde raneere, nanndoore neddo nii ana joodii dow mayre. Tengaade sapiraande kanjee ana e dow hoore makko, omo jogii wawdu welndu e junngo makko. <sup>15</sup> Malaa'ika goddo yalti e suudu Laamdo seniindu nduu ana eewnoo daande toownde, ana wiya joodido e luurde oo:

—Jippin wawdu maa nduu kettaa, sabi wakkati kettal yottiima, ko woni e leydi ndii koo yonii hetteede!

<sup>16</sup> Non joodido e luurde oo sadiri ko woni e leydi ndii koo wawdu mum, leydi ndii fuu hettaa.

<sup>17</sup> Malaa'ika goddo yalti e suudu Laamdo seniindu wonndu dow kammu nduu, ana jogii kajum duu wawdu welndu. <sup>18</sup> Malaa'ika goddo kawjotoodo yiite oo yalti e ley ittirde sadaka ndee, ana eewnoo daande toownde, ana wiya malaa'ika jogiido wawdu welndu oo:

—Jippin wawdu maa nduu, kettaa 6i66e peguuje leydi ndii dee, sabi de benndii.

<sup>19</sup> Malaa'ika oo sadiri 6i66e peguuje leydi ndii wawdu mum, te6i dee, wedii de e 6oosirde mawnde. Dum woni tikkere Laamdo jukkoowo jukkungo naawngo. <sup>20</sup> Bi66e peguuje dee 6osaa to cagal ngeenndi too, yi6iam yalti e 6oosirde ndee faa hewti labaale pucci, dam ili ko waarata e njuunndi kilooji teemeede tati.

## 15

### *Haala jimol Muusaa e jimol Njawdiri*

<sup>1</sup> Caggal dum, njii-mi dow kammu taagumansa goddo mawdo kaayniido. Njii-mi malaa'ika'en njeddon ana njogii balaawuuji jeddi cakitiidi dii, sabi e majji tikkere Laamdo ndee timmata.

<sup>2</sup> Njii-mi weendu nanndundu e timtorgal jillondirndu e yiite. Jaalinoob6e taktakol ngol 6ee ana ndarii banne mayru. Been ngoni jaalinoob6e ngol, kannngol e tooru nanndundu e maggol nduu e limre innde maggol ndee, ee6e njogii kolli di Laamdo hokki 6e dii. <sup>3</sup> E6e mbiya e ley jimol Muusaa macculo Laamdo oo e ngol Njawdiri ndii:

«Joomiraado Laamdo Jom Baawde,

golleeji maa yo mawdi, yo kaayniidi!

Laawi maa yo poocciidi, yo goondudi,

aan woni kaananke jaalepi!

<sup>4</sup> Homo woni mo hulataa ma, Joomiraado,

mo teddintaa innde maa?

Sabi aan woni gooto Ceniido.

Lepi fuu ngaran cujida yeeso maa,

sabi 6e njii no golleeji maa pooccitorii.»

### *Haala le'e jeddi keewde balaawuuji jeddi*

<sup>5</sup> Caggal dum, njii-mi suudu Laamdo seniindu – dum woni hukkum seedaaku gondo dow kammu oo – ana 6uditoo. <sup>6</sup> Malaa'ika'en njeddon jogiib6e balaawuuji jeddi 6ee njalti e mayru, ana 6oornii kaddule laabude paca jalbooe, ana ka6bi gaandilaaji kanjee e becce mum'en.

<sup>7</sup> Wootere e kudde nay guurde dee hokki malaa'ika'en njeddon 6ee le'e kanjeeje jeddi keewde tikkere Laamdo guurdo faa abada oo. <sup>8</sup> Non suudu nduu heewi cuurki saabe annoora Laamdo e semmbe mum. Fay gooto waawaano naatude e mayru, so wanaa nde balaawuuji jeddi di malaa'ika'en njeddon ngaddi dii timmi.

## 16

<sup>1</sup> Non nan-mi daande toownde iwrii kam to suudu seniindu too, ana wiya malaa'ika'en njeddon bee:

—Njehee, njuppoyee e aduna oo le'e tikkere Laamdo jeddi dee!

<sup>2</sup> Malaa'ika arano oo yehi, yuppi la'al mum e leydi, uube bonde naawde kewtii yimbe tawraafe maande taktakol ngol e sijidanoofe tooru nanndundu e maggol bee.

<sup>3</sup> Malaa'ika didaabo oo yuppi la'al mum e geeci, geeci oo waylitii, laatii no heyyere yiyyam maaydo nii. Ko tagaa ko wuuri ko woni ley geeci fuu waati.

<sup>4</sup> Malaa'ika tataabo oo yuppi la'al mum e dow maaaje e cewle, de mbaylitii yiyyam. <sup>5</sup> Non nan-mi malaa'ika kawjotoodo ndiyameeji oo, ana wiya:

—Aan Laamdo a pooccitiido, a goodudo goodunoodo, aan woni Ceniido oo, sabi jaadirdo e sariya maa. <sup>6</sup>Saabe ko 6e njuppi yiyyam seniife e yiyyam annabaafe koo, aan duu, ndokkudaan 6e yiyyam 6e njara! Ebe kaandi hen.

<sup>7</sup> Non nan-mi daande iwrii to ittirde sadaka too, ana wiya:

—Goonga! Joomiraado Laamdo Jom Baawde, sariyaaji maa yo goongaraajii yo pooccitiidi!

<sup>8</sup> Malaa'ika nayaabo oo yuppi la'al mum e dow yitere naange, nde hokkaa sumirde yimbe ngleefi mayre. <sup>9</sup> Yimbe 6ee cumiraa ngleefi cattuki, kaa 6e tuubaali 6e teddinaali Laamdo. Ko 6e ngadi dee, 6e njennu innde Laamdo mo baawde ngoondani dow dii balaawuuji oo.

<sup>10</sup> Malaa'ika joyaabo oo yuppi la'al mum e dow bimmbeere taktakol ngol, do o laamii doo ni66innaa tika, yimbe ndarrii ana jata toni mum'en saabe naawalla. <sup>11</sup> Be njenni Laamdo jom kammuu oo saabe uube mafbe e naawalla mafbe, kaa fuu, 6e tuubaali iwde e golleeji mafbe bondi dii.

<sup>12</sup> Malaa'ika jeegaabo oo yuppi la'al mum dow maayo manngo wiyyeteengo Efarata, ndiyam maggo beebei faa yoori faa mo hokka kaanankoo6e iwoor6e funnaange 6ee laawol. <sup>13</sup> Non njii-mi seydaani'en tati bonbe nanndu6e e paabi, wooturu ana yalta e hunduko kuungal nanndungal e mboddi ngal, wooturu ana yalta e hunduko taktakol manngol ngol, wooturu ana yalta e hunduko annabaajo peneejo oo. <sup>14</sup> Been seydaani'en bonbe yo wadoobe kaayeefiji, yahoo6e e kaanankoo6e aduna oo fuu faa hawrintinana dum'en wolde ley jalaande darngal, jalaande Laamdo Jom Baawde oo.

<sup>15</sup> Joomiraado wii:

—Kakkilee! Mido nii warda no guijo nii. Baaldo daanaaki haybi kaddule mum pati yaara terde fole yimbe njija dum ana taartii, welii hoore!

<sup>16</sup> Di kawrintini 6e e nokku biyeteedo e ibaraninkoore Harmagedon.

<sup>17</sup> Malaa'ika jeddaabo oo yuppi la'al mum e mbeeyu, daande toownde yalti e suudu seniindu nduu to bimmbeere laamu too, ana wiya:

—Timmii!

<sup>18</sup> Maje maji, dillereeji e gidaali ngadi, dimmbagol leydi manngol wadi. Hono ngol dimmbagol leydi wadaali e aduna oo gila yimbe tagaa, no ngol sattiri mawnude! <sup>19</sup> Ngalluure mawnde ndee feccaa pecce tati. Galluje jaaleji godde dee fuu kalkii. Laamdo rewttii ngalluure mawnde wiyyeteende Baabila, mo yarni nde horde peguujam heewnde tikkere makko. <sup>20</sup> Duude dee fuu kalkii, baamle kaaye dee fuu majji fey. <sup>21</sup> Malumaluuje 6utte caami e yimbe, wootere hen fuu teddeeji mum ana waara e kilooji capande nay. Yimbe 6ee njenni Laamdo saabe balaawu malumaluuje oo, sabi oon balaawu sattii bonde sanne.

## 17

### *Haala jukkungo Baabila*

<sup>1</sup> Caggal dum, gooto e malaa'ika'en njeddon jogiib6e le'e jeddi 6ee wari, wii kam:

—War faa mi holle jukkungo bamfaaru rewru anndaandu sanne, joodiindu dow ndiyameeji keewdi nduu. <sup>2</sup> Kayru kaanankoo6e aduna 6ee pijata, yimbe aduna 6ee cigirii e bamfaaraaku mayru.

<sup>3</sup> Keew-mi Ruuhu, malaa'ika oo na6i kam faa ley ladde jeereende. Non njii-mi debbo ana waddii taktakol bodewol keewngol inde bonkorde Laamdo, jogiingol ko'e jeddi e luwe sappo. <sup>4</sup> Debbo oo ana boornii kaddule lobbe bodeejie, ana sodii kanjee, kaaye dime e jaaye luulu. Omo jogii e junngo makko horde loonde kanjee heewnde ko harmi heewnde tuundi bamfaaraaku makko. <sup>5</sup> Ndee doo innde nde maanaa mum suudii ana winndaa e tiinde makko:

«Baabila ngalluure mawnde, inna bamfaaraaku,  
kajum e ko harmi ley aduna oo fuu».

<sup>6</sup> Njii-mi oon debbo sigirii saabe heewgol ko yari yiyyam seniife 6ee e yiyyam waraa6e saabe njoppaali haala Iisaa.

Ko njii-moo-mi koo, kaaynaa-mi sanne. <sup>7</sup> Kaa malaa'ika oo wii kam:

—Ko saabii so dum ana haayni maa? Mi firritante maanaa cuudiido oo, maanaa debbo oo e taktakol ngol o waddii jogiingol ko'e jeddi e luwe sappo ngol. <sup>8</sup> Taktakol ngol njii-daa ngol, engol woodunoo, kaa ngol heddaaki jooni. Engol haani yaltude e bunndu ndu luggeefi mum walaa do haadí nduu, ngol halkoyoo. Yimbe aduna 6e inde mum'en mbinnndaaka e dewtere nguurndam ndee gila e fuddoode aduna 6ee, so njii ngol, kaayde nanngan dum'en, sabi engol woodunoo ngol heddaaki, ngol 6anngoyan kasen duu.

<sup>9</sup> Dum doo ana holla waajibi neddo tawake hakkilantaaku e faamu: ko'e jeddi dee yo kaaye jeddi de debbo oo joodii e mum dee. Ede cappoo kasen kaanankoo6e njeddon: <sup>10</sup> njoyon yaabbiike, njeegaboo oo ana woodi jooni, njedda6o oo waraali tafon, kaa so o warii, wakkatiwel seeda o laamotoo. <sup>11</sup> Taktakol goodunoongol ngol yo gooto e njeddon 6ee, ngol wartan hono kaananke jetta6o nii, kaa cakite maggol yo halkaare.

<sup>12</sup> Luwe sappo de njii-daa dee yo kaanankoo6e sappo 6e kefaali laamu tafon, kaa 6e kebeyon baawde laamaade no kaanankoo6e nii hakke wakkatiwel gootel, kambe e taktakol ngol. <sup>13</sup> Be fuu 6e anniya gooto, 6e ndokka taktakol ngol doole maabbe e laamu maabbe. <sup>14</sup> Be kabán e Njawdiri ndii, kaa ndi jaaloto 6e sabi kayri woni Joomiraado joomiraabe e Kaananke kaanankoo6e, kasen duu wondiibe mayri 6ee yo noddaabe, subaabé, goondin6e.

<sup>15</sup> Malaa'ika oo wii kam kasen:

—Ndiyameejii di njii-daa bamfaaru nduu ana joodii dow mum'en dii, kanji ngoni jaalepi e jamaa e leji e demde. <sup>16</sup> Luwe sappo de njii-daa dee, kajum e taktakol ngol, mbajan bamfaaru rewru nduu, sola dum faa laabaa hed doroo terde bole, naama tew mum, nduppa ko heddi koo e yiite. <sup>17</sup> Sabi Laamdo loowii e 6erde maabbe wafude anniya mum, 6e laatoo daande wootere, 6e ndokka taktakol ngol laamu maabbe, faa nde konngi Laamdo dii fuu tabiti.

<sup>18</sup> Bamfaaru rewru ndu njii-daa nduu, kajum woni ngalluure mawnde hu6indiinde kaanankoo6e aduna.

## 18

### No Baabila halkirtee

<sup>1</sup> Caggal duum, njii-mi malaa'ika goddo keewdo baawde ana iwa dow kammu ana jippoo, fooyre makko yaayni e aduna oo. <sup>2</sup> O eewnii faa toowi, o wii:

«Nde halkiima!

Baabila ngalluure mawnde ndee halkiima!

Nde laatike hodorde seydaani'en bonbe,

suudorde ruuhu tuunnudo fuu

e foondu tuunnundu wajaandu fuu!

<sup>3</sup> Sabi leyde dee fuu cigirii caamii

saabe bamfaaraaku mayre oo,

Kaanankoo6e aduna 6ee pijii e mayre,

jaagotoobe e aduna 6ee fuu ke6ii jawdi

saabe neemaaji mayre yaabbiitidi dii.»

<sup>4</sup> Non daande wonnde iwri kam dow kammu, ana wiya:

—Njaltee e mayre, onon yimbe am! Pati on ndeentu e mayre luutti, pati balaawuuji mayre hewta on. <sup>5</sup> Sabi luutti mayre njowondirii faa njottii kammu, Laamdo rewlike golleeji mayre bondi dii. <sup>6</sup> Ngadiranee nde no nde wadirani on nii. Njo6to-don ko nde wadii on koo cowe didi. Horde loonde nde nde siiwani on e mum ndee, ciwanee nde hen cili didi! <sup>7</sup> Jukkee nde, ngadée sugulla mayre hakke no nde teddiniri hoore mayre so nde wuuri e neema nii, sabi ende wiya e 6ernde mayre: «Mi kaananke debbo, mi wanaa debbo mo gorum maayi, abada mi wonataa e cuddu.» <sup>8</sup> Saabe duum, e nalooma gooto balaawuuji mayre caamata e mayre: maayde e sugulla e yolbere, kasen duu nde duppete e yiite, sabi Joomiraado Laamdo caroowo nde oo yo Jom Semmbe.

### Haala woyeede Baabila

<sup>9</sup> Nde kaanankoo6e aduna reentube e mayre jeenu so neemodii e mayre 6ee njii cuurki cumu mayre, 6e mboyan, 6e jonoto.

<sup>10</sup> Be toowtan nde 6e ndaroo, saabe hulde jukkungo mayre pati hewtoo 6e, 6e mbiya:

—Yoo yoy! Yoo yoy! Baabila, ndee ngalluure mawnde, ndee ngalluure jogiinde semmbe, e ley wakkati gooto tan, nde jukkaa!

<sup>11</sup> Jaagotoobe e aduna 6ee mboyan cuunlanan nde, sabi fay gooto heddataako e soodude jaaguuij maabbe dii. <sup>12</sup> Jaaguuij maabbe yo kanjje e cardi e kaaye dime e jaaye e bagijji lobbi e bagijji ciidi e bagijji hariiri tiifudi e bagijji bodeeji e ledde uuroojie yogaaje e kaaki moyyiniraadijiyi niibi e kaaki moyyiniraadi ledde tiifude coggu e jamde kire e jamde baleeje

e haayre wiyyeteende marba. <sup>13</sup> Jaaguuji maabbe kasen yo fungooji belnirdi e uurnirdi e gowe e nebam uuroojam e uurdi miira e uurdi suurtinteedi e peguujam e nebam biibbe jaytuun e conndi alkama e na'i e baali e pucci e wotorooji e maccube e ruggaabe.

<sup>14</sup> Jaagotoobe bee mbii ngalluure ndee:

—Ko njiduno-daa hebuude fuu woddiike ma: neema maa e dawla maa fuu halkike, a hewttaa dum abada kasen.

<sup>15</sup> Jaagotoobe hebuude jawdi e mayre bee toowtan nde ndaroo to woddi, saabe hulde jukkungo mayre ngoo pati hewto 6e, 6e mboyan, 6e jonoto, <sup>16</sup> 6e mbiyan:

—Yoo yoy! Yoo yoy! Ngalluure mawnde parortoonde bagiji lobbi e bagiji ciidi e bagiji bodeeji, sodoftonoonde kanrje e kaaye dime e jaaye! <sup>17</sup> E ley wakkati gooto tan, dee jawle fuu kalkaa!

Dawranoobe laanaaji ndiyam mawdi dii 6ee e dawooobe bee e summboobe bee, kajum e heboobe nguure mum'en e lummingol geeci bee, 6e fuu 6e toowtan 6e ndaroo. <sup>18</sup> So 6e njii curki cumu mayre, 6e ngullan, 6e mbiya:

—Ngalluure honde nanndunoob e nden ngalluure mawnde?

<sup>19</sup> Be njooran leydi dow ko'e maabbe no 6e poti metteede, 6e mboyan 6e jonoo, 6e ngulla 6e mbiya:

—Yoo yoy! Yoo yoy! Ndee ngalluure mawnde, nde neema mum hokki jogiibe laanaaji e ley geeci fuu jawdi, e ley wakkati gooto tan, nde halkike! <sup>20</sup> Kammu, welta e halkeede mayre! Seniibe e nelaabe e annabaabe, onon duu mbeltee hen! Sabi Laamdo sarii nde ko nde wadi on koo!

<sup>21</sup> E oon wakkati, malaa'ika jom semmbe 6ami kaayal nanndungal no niisirde mawnde nii, wedii dum semmbe ley geeci, wii:

—Nii Baabila ngalluure mawnde ndee wedortee, nde yiyyataake abada kasen!

<sup>22</sup> Hankasen, fay gooto nanataa e mayre kolli hodoobe gaaci e yimoobe e puufoobe cereeli e buutute, golloowo jeenjudo fay gooto yiyyataake kasen e ley mayre. Dillere unude nanataake kasen e ley mayre, <sup>23</sup> fooyre lampa yaaynataa ley mayre kasen, jommbaajo gorko e jommbaajo debbo welbe daade maatataake e mayre kasen. Non worrata sabi jaagotoobe mayre burnoo aduna oo fuu doole. Kasen duu nde hoomtirii leji dii fuu mbojobaaku mayre. <sup>24</sup> Yiyyam annabaabe e seniibe e waranoobe ley aduna oo 6ee fuu tawaama e mayre.

## 19

*Jime jettooje Laamdo ley alijenne*

<sup>1</sup> Caggal dum, nan-mi daade toowde hono jamaa keewdo iwri kam dow kammu, ana wiya:  
«Halleluya!\*

Kisindam e teddungal e baawde

ngoodanii Laamdo meeden,

<sup>2</sup> sabi sariyaaji makko yo goongaraaji  
yo pooccitii!

O sarii bamfaaru rewru anndaandu sanne

bonnirannoondu aduna oo fuu bamfaaraaku mum oo,

kasen duu o yoobtiyiyyam maccube makko njuppaadam e mayru dam.»

<sup>3</sup> Be mbii didobere:

«Halleluya!

Cuurki cumu ngalluure mawnde ndee kii  
ana njabba faa abada!»

<sup>4</sup> Mawbe noogayon e nayon 6ee e kudde nay guurde dee, kippii e leydi cujidani Laamdo joodiido e bimmbeere laamu oo, ana mbiya:

—Aamiina! Halleluya!

<sup>5</sup> Daande iwri to bimmbeere too, ana wiya:

—Njettee Laamdo meeden, onon maccube makko fuu, onon hulbe mo fuu, tedduube e lo'ube!

*Haala kuurtungu Njawdiri ndii*

<sup>6</sup> Non nan-mi ko wa'i no daande jamaa keewdo nii, ko wa'i no dillere ndiyam keewdam nii, ko wa'i no gidaali mawfi nii, ana wiya:

«Halleluya! Sabi Laamdo Joomiraado meeden

Jom Baawde oo tabintini laamu mum.

<sup>7</sup> Mbelto-den, ceyo-den, teddinen mo,

\* **19:1** Halleluya yo haala ibaraninkoore, dum woniNjetten JOOMIRAA DO.

sabi kuurtungu Njawdiri ndii yottiima,  
kasen duu jommbaajo mayri lanndiniike.

<sup>8</sup> O hokkaama kaddule o 6oornoo,  
bagi daatudo, jalboowo, laabudo.  
Deen kaddule ngoni golleeji seniibe moyyudi dii.

<sup>9</sup> Malaa'ika oo wii kam:

—Winndu: noddaafe e jiiri yannge Njawdiri ndii 6ee, mbelii hoore!

O wii kam kasen:

—Dii konngi yo goongaraaji, to Laamdo di iwi.

<sup>10</sup> Kippii-mi e leydi yeeso makko faa mi sujidanma, kaa o wii kam:

—Patti! Miin, mi maccudo hono maa hono sakiraabe maa tiidube e seettanaade Iisaa 6ee.

Sujidan Laamdo!

Sabi ko woni annabaaku dee, yo seettanaade Iisaa.

### *Haala garol Almasiihu faa jukka takakol*

<sup>11</sup> Caggal dum, njii-mi kammu ana udditii, non puccu daneejo banngi. Baddiido mo oo ana wiyeet Koolniido ana wiyeet Goongirante, goonga o sarirta, goonga o honirta. <sup>12</sup> Gite makko ana mba'i no metangal yiite nii, tengaade laamu keewide ana e hoore makko, innde ana winndii e makko nde fay gooto anndaa so wanaa kanko. <sup>13</sup> Omo 6oornii saaya cuuwaaka e yiyyi, innde makko yo: «Konngol Laamdo.» <sup>14</sup> Konuuji kammu dii njokki e makko ana 6oornii kaddule bagi daatude, danneeje, laafude, ana mbaddi pucci daneeji. <sup>15</sup> Kaafaawi mbelki ki mo soppirta lepi ana yalta e hunduko makko. Mo durdan di loocol naawngol, o dippaan e 6oosirde peguuje yaltinoore tikkere Laamdo Jom Baawde mawnde. <sup>16</sup> Ndee doo innde ana winndaa e saaya makko, ana winndaa e busal makko:

«Kaananke kaanankoobe e Joomiraado joomiraabe».

<sup>17</sup> Non njii-mi malaa'ika ana darii e dow yitere naange. O eewnii faa toowi, o wii pooli diwooji dow mbeeyu dii fuu:

—Ngaree nootee jiiri yannge mawdo mo Laamdo wadi oo, <sup>18</sup> faa nducciton tew kaanankoobe e tew hooreebe sordaasi'en e tew jom'en semmbe e tew pucci e waddiibe mum'en e tew yimbe fuu - rimbe e riimaybe, tedduube e lo'ube!

<sup>19</sup> Non njii-mi takakol manngol ngol e kaanankoobe aduna 6ee e konuuji mum'en ana kawriti faa kafa e baddiido puccu daneejo oo e konu mum. <sup>20</sup> Taktakol ngol honaa, kanngol e annabaajo peneejo gannoodo kaayde yeeso maggal oo. E deen kaayde e hoomtirnoo hebunoobe maande takakol ngol 6ee, sujidanannoobe tooru nanndundu e maggal 6ee. Be didon fuu, 6ee medaa ebe nguuri e weendu yiite e sitti hu6ooru nduu. <sup>21</sup> Heddiibee 6ee kalkiraa kaafaawi njaltannooki e hunduko baddiido puccu daneejo oo kii, pooli dii fuu ngari nducciti tewuuli mabbe faa kaari.

## 20

### *Haala laamu gadoowo duubi ujunere*

<sup>1</sup> Caggal dum, njii-mi malaa'ika ana iwa dow kammu ana jippoo, ana jogii e junngo mum kokitrgal bunndu yiite ndu luggeefi mum walaa do haadi nduu, kajum e calalol manngol.

<sup>2</sup> O nanngi kuungal ngal, dum woni mboddi aranndeeri mbiyeteendi Ibiliisa naa Seydani ndii, o ha66i dum duubi ujunere. <sup>3</sup> O wedii dum e ley bunndu ndu luggeefi mum walaa do haadi nduu, o uddi ndu dow mum, o meeli ndu, pati ngal yonna jaalepi faa nde duubi ujunere dii ki66i. Caggal dum, ngal humtete wakkati seeda.

<sup>4</sup> Non njii-mi bimmbeeje laamu. Joodiife e majje 6ee ndokkaama baawde sarde. Njii-mi kasen yonkiji 6e ko'e mum'en tayiranoo saabe ko 6e ceettanii Iisaa koo e saabe ko 6e mbaajii konngol Laamdo koo. Been ngoni 6e cujidanaali takakol ngol e tooru nanndundu e mum nduu, 6e kebaali maande ndee e tiide naa e juude mabbe. Been nguurtii, laamodii e Almasiihu duubi ujunere. <sup>5</sup> Dum woni immital aranal ngal. Maaybe heddiibee 6ee nguurtalaal 6ee nde duubi ujunere dii ki66i. <sup>6</sup> Malu e senaare ngoodanii jeyaabe e immital aranal 6ee! Maayde didobere ndee walaa ko waawi e mabbe, 6e laatanto Laamdo e Almasiihu yottinoobe sadaka, 6e laamodoo e Almasiihu duubi ujunere.

### *Haala jaaleede Ibiliisa*

<sup>7</sup> So duubi ujunere dii ki66i, Ibiliisa humtete yalta kasu mum, <sup>8</sup> faa yonna jaalepi gondi e paale aduna nay dee, dum woni garol Yaajuuju e Maajuuju,\* kajum e hawrintinde 6e faa 6e mba'a no njaareendi geeci kammari wolde. <sup>9</sup> Been yimbe cankitii e aduna oo fuu, 6e pilii ngalluure horsunde ndee, do seniibe 6ee ngoni doo. Oon wakkati fuu, yiite iwi dow kammu,

\* 20:8 Yaajuuju e Maajuujuana mbiyee Gogu e Magogu e ibaraninkoore.

halki 6e.<sup>10</sup> Iibiliisa yojjannoodo 6e oo wedaa e weendu yiite e sitti nduu, do taktakol ngol e annabaajo peneejo oo ngoni doo. Don 6e njukketee jemma e jalooma faa abada.

### *Haala jannde dargal*

<sup>11</sup> Caggal dum, njii-mi bimmbeere laamu mawnde raneere won joodiido e dow mayre. Kammu e leydi fuu ndogi iwi yeeso joodiido oo, di njiitaaka kasen.<sup>12</sup> Njii-mi maaybe bee, tedduoe e lo'ube, ana ndarii yeeso bimmbeere laamu ndee. Dewte udditaa, e ley majje dewtere nguurndam ndee duu udditaa. Maaybe bee cariraa golleeji mum'en binndaadi e dewte dee dii, gooto fuu hakke golle mom.<sup>13</sup> Geeci oo tottii maaybe mom, maayde e laakaraa tottii maaybe mom'en, gooto e maabbe fuu sariraa hakke golle mom.<sup>14</sup> Maayde e ko sabinbinta dum fuu mbedaae e weendu yiite nduu. Nduun weendu woni maayde didobere ndee.<sup>15</sup> Neddo fuu mo innde mom tawaaka ana winndii e dewtere nguurndam ndee, wedaama e weendu yiite nduu.

## 21

### *No huunde fuu heydintinirtee*

<sup>1</sup> Caggal dum, njii-mi kammu keso e leydi keyri, sabi kammu arano oo e leydi aranndeeri ndii fuu iwi, geeci duu walaa.<sup>2</sup> Njii-mi Ngalluure Seniinde ndee – dum woni Urusaliima keso oo – ana iwa dow kammu to Laamdo ana jippoo, ana parorii no jommbaajo parortoo faa lanndinoo hawra e gorum nii.<sup>3</sup> Nan-mi daande toownde iwrunde to bimmbeere laamu too, ana wiya:

–Anni hodorde Laamdo e yimbe: o hodidan e maabbe, 6e laatoo lepol makko. Laamdo e hoore mom wondan e maabbe, laatoo Laamdo maabbe.<sup>4</sup> O soccan gondi gite maabbe fuu. Maayde e sugulla e gullaali e naawalla kedataako, sabi kulle booyde dee fuu njawtii.

<sup>5</sup> Joodiido e bimmbeere ndee oo wii:

–Mi heydintinan huunde fuu!

O wii kam:

–Windu dii konngi fuu, di celludi di goongaraaji.

<sup>6</sup> O wii kam kasen,

–Huunde fuu biltike! Miin woni arano miin woni cakito, miin woni fuudoode miin woni timmoode. Neddo fuu domfudo, mi hokkan dum e sewnde ndiyam nguurndam ndee meere meere.<sup>7</sup> Neddo fuu jaaliido hefan dum fuu, mi latoto Laamdo mur, laatoo siyam.<sup>8</sup> Kaa rofeebe e be ngalaa goondinal e sobuue golleeji e waroobe yimbe e fijoobe e bonjobi'en e rewoobe tooruucci e fenoobe bee fuu, weendu yiite e sitti huubooru nduu woni ngedu mum'en. Dum woni maayde didobere ndee.

### *Haala Urusaliima keso*

<sup>9</sup> Caggal dum, gooto e malaa'ika'en njeddon jogiinoobe le'e jeddi keewde balaawuuji jeddi cakitiidi dii wari, haaldi e am, wii:

–War faa mi holle jommbaajo debbo, jom suudu Njawdiri ndii.

<sup>10</sup> Non keew-mi Ruuhu, malaa'ika oo naabi kam faa dow haayre mawnde toownde. O holli kam Urusaliima ngalluure seniinde ndee ana iwa dow kammu to Laamdo ana jippoo,<sup>11</sup> annoora Laamdo ana e mayre faa ende jalgira no haayre rimre nii, no haayre yaspe laa'bunde no timtorgal nii.<sup>12</sup> Tatawol tekkungol toowngol ana filtii nde, engol jogiij dame sappo e didi, damal fuu ana jogii malaa'ika. Cuudi baaba biibbe Israa'ilila sappo e didi dii, inde mum'en ana mbinndaa e dame dee:<sup>13</sup> dame tati funnaange e dame tati hiirnaange e dame tati saahal e dame tati saleeri.<sup>14</sup> Tatawol ngalluure ndee ngol ana fawii e dow kaaye sappo e didi, wootere e majje fuu innde iwnde e sappo e difon nelaabe Njawdiri ndii bee eena e mum.

<sup>15</sup> Malaa'ika kaaldannoodo e am oo ana jogii loocol kanje eenndirgol faa eennda ngalluure ndee e dame mayre e tatawol mayre ngol.<sup>16</sup> Tatteeji mayre nay dii fuu potu, njuunndi mayre e njaannji mayre potu. O eenndiri nde loocol ngol o joginoo ngol, nde laatti gebe ujunaaji sappo e didi (12 000),<sup>\*</sup> njuunndi ndii e njaannji ndii e tooweendi mayri fuu foto.<sup>17</sup> O huulii tatawol ngol, ngol hawri e kuule teemedere e capande nay e nay (144), huulagol ngol yimbe kuulortoo ngol malaa'ika oo huulortoo.<sup>18</sup> Tatawol ngol yaspe mahiraa, ngalluure ndee kanje dimo baado no timtorgal laa'ungal nii mahiraa.<sup>19</sup> Foomre tatawol ngalluure ndee ana pariraa sii kaaye dime fuu: aranndeere ndee yaspa, didobere ndee safiir, tatobere ndee agate, nayobere ndee emerooda,<sup>20</sup> joyobere ndee sardoniksi, jeegobere ndee sarduaan, jeddobere ndee kirisolita, jettoobere ndee berili, jeenabere ndee topaas, sappobere ndee kirisoparaas, sappo e go'obere ndee yasente, sappo e difobere ndee ametiste.<sup>21</sup> Dame sappo e didi dee yo naaye luulu daneeje sappo e didi, damal fuu

\* 21:16 Dum hawrata kilooji 2 200

jaayre luulu wootere moyyiniraa. Daalaare ngalluure ndee yo kanjje dimo jalbiroowo no timtorgal nii.

<sup>22</sup> Mi yiyaali suudu dewal e ley ngalluure ndee, sabi Joomiraado Laamdo Jom Baawde oo e Njawdiri ndii ngoni suudu dewal mayre. <sup>23</sup> Ngalluure ndee haajaaka naange naa lewru yaaynana dum, sabi darja Laamdo yaaynata nde, Njawdiri ndii woni lampa mayre. <sup>24</sup> Jaaleji dii fuu e ley fooyre mayre njahata, kaanankoofe aduna bee ngaddan e ley mayre jawle mum'en. <sup>25</sup> Jemma walaa e mayre, kasen duu dame mayre uddataako jalooma! <sup>26</sup> Be ngaddan jawle e teddeengal jaaleji maabbe e ley mayre. <sup>27</sup> Huunde soobunde naatataa e mayre, wanaa haala golloobe ko wajaa, kajum e fenoobe. Naatoobe e mayre dee, be inde mum'en mbinndaae e dewtere nguurndam bee, dum woni dewtere Njawdiri ndii.

## 22

<sup>1</sup> Caggal dum, malaa'ika oo holli kam maayo ngo ndiyam mum hokkata nguurndam, njalbiroojam no timtorgal nii, edam iwra to bimmbeere laamu Laamdo e Njawdiri ndii too. <sup>2</sup> Edam ila e hakkunde daalaare ngalluure ndee. Fonngooji maayo ngoo didi fuu, lekki kokkoowi nguurndam ana e mum, ndimooowi cili sappo e didi - lewru fuu cilol. Haakolojo makki yo safaaare sellinoore jaaleji. <sup>3</sup> Ko Laamdo huudi fuu, tawataake ley ngalluure ndee hankasen. Bimmbeere laamu Laamdo e Njawdiri ndii darotoo e ley mayre, maccube makko ndewan mo, <sup>4</sup> njija yeeso makko, innde makko winndee e tiife mum'en. <sup>5</sup> Jemma walaa hankasen, be kaajataake fooyre lampa naa fooyre naange sabi Joomiraado Laamdo laatoto fooyre maabbe. Be laamoto faa abada abadin.

### *Haala gartol Iisaa*

<sup>6</sup> Malaa'ika oo wii kam:

—Dii konngi ana celli, ana ngoondi. Joomiraado Laamdo, loowudo konngol mum ley annabaabe oo, neli malaa'ika mum faa holla maccube mum ko warata booyataa.

<sup>7</sup> Iisaa wii:

—Kettinee, mido wara booyataa!

Neddo fuu kaybudo ko woni e dewtere annabaaku ndee doo, weli hoore.

<sup>8</sup> Miin, Yuhanna, mi nanii mi yii kulle dee fuu. Caggal ko nan-mi e so njii-mi koo, kippii-mi e leydi yeeso malaa'ika kollannoode kam oo faa mi sujidana mo. <sup>9</sup> Kaa o wii kam:

—Patti! Miin, mi maccudo hono maa hono sakiraabe maa annabaabe bee, kajum e hayboobe konngi gondi e ndee doo dewtere bee. Sujidan Laamdo!

<sup>10</sup> O wii kam kasen:

—Pati suudu haalaaji annabaaku gondi e ndee doo dewtere dii, sabi wakkati mo dum fuu dum laatotoo 6adiima. <sup>11</sup> Gadoowo ko boni yo heddo e bonannda mum, cobudo golleeji yo heddo e golleeji mum cobudi dii, moyyo yo heddo e moyyuki mum, ceniido yo heddo e senaare mum!

<sup>12</sup> Iisaa wii:

—Kettinee, mido wara booyataa, mido waddora mbarjaari faa mi barjoo gooto fuu hakke golle mum. <sup>13</sup> Miin woni arano miin woni cakito, miin woni fuddoode miin woni timmoode.

<sup>14</sup> Loonnoobe saayaaji mum'en yalla ana mbaawa jaamde e 6ibbe lekki nguurndam kii e naatirde e ngalluure ndee damal, mbelii hoore! <sup>15</sup> Kaa wonbe caggal mayre bee, be dawaad, be bojobii'en, be fijoobe, be waroobe yimbe, be rewoobe tooruucci, be fenoobe e ley haalaaji e golleeji fuu.

<sup>16</sup> Miin Iisaa, mi nelii malaa'ika am faa seettoo dee kulle e ley deente goondinbe dee. Miin woni iwdi Daawuuda, mi taaniiko, miin woni hoodere fajiri jalboore ndee!

<sup>17</sup> Ruuhu oo e jommbaajo debbo oo ndarrii ana mbiya:

—War gaa!

Neddo fuu nando yo wii: «War gaa!»

Neddo fuu domduudo yo war, muuydo fuu yo yar e ndiyam ndokkoojam nguurndam dam meere meere.

<sup>18</sup> Miin Yuhanna, mido jeertina neddo fuu nando konngi annabaaku gondi e ndee doo dewtere dii: neddo fuu beydudo e majji huunde, Laamdo feydan e jukkungo joomum balaawuuji cifaadi e mayre dii. <sup>19</sup> Neddo fuu tayudo yoga e konngi ndee doo dewtere annabaaku, Laamdo tayan goodi mum e lekki nguurndam cifaaki e mayre kii, kajum e ngalluure seniinde sifaande e mayre ndee.

<sup>20</sup> Ceettantoodo deen kulle oo wii:

—Tayoral, mido wara booyataa!

Aamiina! War Joomiraado men Iisaa!

<sup>21</sup> Yo hinnee Joomiraado men Iisaa wonu e mon on fuu!